


Niospa meka fena
Jesucristoñoa



New Testament in Yaminahua (PE:yaa:Yaminahua)

Niospa meka fena Jesucristo^{noa} New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 22 Feb 2024 from source files dated 29 Jan 2022

6c7b7ce2-9d87-5405-91e6-71ce1387adcc

Contents

MATEO	1
MARCOS	45
LUCAS	70
JUAN	113
LOS HECHOS	143
ROMANOS	179
1 CORINTIOS	199
2 CORINTIOS	221
GÁLATAS	234
EFESIOS	241
FILIPENSES	248
COLOSENSES	252
1 TESALONICENSES	256
2 TESALONICENSES	260
1 TIMOTEO	262
2 TIMOTEO	268
TITO	272
FILEMÓN	275
HEBREOS	276
SANTIAGO	291
1 PEDRO	297
2 PEDRO	303
1 JUAN	306
2 JUAN	311
3 JUAN	312
JUDAS	313
APOCALIPSIS	315

Mateo Jesúsnoa Yoikĩ Keneni

Jesucristo áfe xinifáfe anefo

(Lc. 3.23-38)

¹ Ë mato yoinõ a taeyoi ipaonifo Jesucristo áfe xinifo. Jesucristo áfe xini David. Nã David áfe xini Abraham. Nãfo Jesucristo áfe xinifo taeyoi iyopaonifo.

² Nã Abraham áfe fake Isaaca ini. Isaaca áfe fake Jacobo ini. Jacobo fake Judá ini. Áfe extofori ini. ³ Judapa fake Fares fe Zara ini. Áto afa Tamar ini. Fares áfe fake Esrom ini. Esrom áfe fake Aram ini. ⁴ Aram áfe fake Aminadab ini. Aminadab áfe fake Naasón ini. Naasón áfe fake Salmón ini. ⁵ Salmón fake Booz ini. Booz áfe afa Rahab ini. Booz áfe fake Obed ini. Obed áfe afa Rut ini. Obed áfe fake Isai ini. ⁶ Isai áfe fake xanĩfo David ini. Xanĩfo David áfe fake Salomón ini. Salomón áfe áfa fene fetsaya iyopaoni, Urias.

⁷ Salomón áfe fake Roboam ini. Roboam áfe fake Abías ini. Abías áfe fake Asa ini. ⁸ Asa áfe fake Josafat ini. Josafat áfe fake Joram ini. Joram áfe fake Ozías ini. ⁹ Ozías áfe fake Jotam ini. Jotam áfe fake Acaz ini. Acaz áfe fake Ezequías ini. ¹⁰ Ezequías áfe fake Manasés ini. Manasés áfe fake Amón ini. Amón áfe fake Josías ini. ¹¹ Josías áfe fake Jeconías ini; áfe extofori ini. Mã Jeconías rama xanĩfo ikaino, Babilonia anoxõ xanifáfe áfe sorarofõ nĩchini israelifo ato ifitanifo anã ato yonomaxikakĩ. Mã sorarofáfe ato ifitanaifono israelifo Babilonia ano fonifo. Jeconíasri iyonifo. Jeconías áfe extofori kainifo.

¹² Nãskata Babilonia anoax fake fetsafari kainifo. Jeconías áfe fake Salatiel ini. Salatiel áfe fake Zorobabel ini. ¹³ Zorobabel áfe fake Abiud ini. Abiud áfe fake Eliaquim ini. Eliaquim áfe fake Azor ini. ¹⁴ Azor áfe fake Sadoc ini. Sadoc áfe fake Aquim ini. Aquim áfe fake Eliud ini. ¹⁵ Eliud áfe fake Eleazar ini. Eleazar áfe fake Matán ini. Matán áfe fake Jacobo ini. ¹⁶ Jacobo áfe fake José ini. Nã José áfe áfi ini, María. Nã María fake ini, Jesús. Jesús áfe ane fetsa Cristo ini.

¹⁷ Abraham áfe fenafo ichapa ini, nã David kainitĩa catorce inifo Abraham áfe fenafo. Askatari nã David áfe fenafo ichapa ini. Nãskano David áfe kaifo yora fetsafáfe Babilonia ano ato iyonifo ato yonomaxikakĩ. Babilonia ano ikanax David áfe fenafo catorce inifo. Askatari David áfe fenafo Babilonia anoax anã fenifo áto mai ano. Mã fenixakakĩ David áfe fena fetsafari kainifo catorce inifo. Askatari Cristo kaini.

María Jesucristo kãini

(Lc. 2.1-7)

¹⁸ Ë mato yoinõ ea nikakapo afeskax Jesucristo kãinimakĩ. José fe María yoinãyonifo fianãxikakĩ. Fianãyofafomano Niospa Yõshi Sharapa María fake nanemani. ¹⁹ José Nios Ifofasharakõiax sharakõini. Nãskaxõ José María yõpáinima yorafáfe ferotaifi. Fomãxopaoni. Nãskaxõ tsoa yoixoma José María enepaini. ²⁰ Nãskano José áfe namapa õini Niospa áfe ájirinĩ yoiaito. Yoikĩ iskafani: “José, rateyamafe María fe fianãxiki. Na fake nanea Niospa Yõshi Sharaxõ akakĩ. ²¹ María fake feronãfake fii kiki. Mĩ anekĩ Jesús faxikai. Nãato ato ifipakenakakĩ. Nãskaxõ afe yorafo áto chaka soaxoxii kiki ato nimapakexakĩ,” ixõ ájirinĩ José yoini.

²²⁻²³ Chanĩmakõini nãskakõini nã Nios yoimisto yoini keskarakõini. Iskafakĩ kirika keneyoni Niospa shinãmanaino:

Këro xotofake feronãfake fe imisma fake onixii. Fake feronãfake fixõ anekĩ Emanuel faxii,

ixõ yoini. (Akka nõko mekapa Emanuel fakĩ, “Nios nofe ika,” ixõ nõ yoimis.)

²⁴ Mã ájirinĩ yoiano José moinácafani. Nã ájirinĩ yoia keskafakĩ, José María fini. Mã fixõ áfe pexe ano iyoni. ²⁵ Mã afe fianãx afe chotanãnima áfe fake kãiyonõ. Mã fake kãiano anekĩ Jesús fani.

2

Feronãfakefo fishi tãpikõimisfo a xini oaikirinoax mai fetsa anoax Jesús õipai fenifo

¹ Herodes xanĩfo ikano Jesús kãini Belén pexe rasi anoax, Judea mai anoax. Nãskano a xini oaikirinoax mai fetsa anoax feronãfakefo fishi tãpikõimisfo fenifo Jerusalén ano. ² Nokotoshikaxõ yõkanifo: “¿Faniãme a rama kãia judeofáfe áto xanifo ikai? Mã nõ õia áfe fishi oaito. Nãskakẽ nõ oa Jerusalén ano xanifo õiyoi. Nõ akiki inimai nõ oa, ‘Mĩ nõko xanifokõ,’ ixõ yoipaikĩ,” fanifo.

³ Askafaifono fetsafáfe yoiaito nikakĩ Herodes shinãchakakõini xanifo iki kiki ixõ. Askatari keyokõi Jerusalén anoafãferi shinãchakakõinifo. ⁴⁻⁵ Akka Herodes judeo inima. Nãskaxõ

ato kenamani a ato Nios kīfixomis āfe xanīfofo fenōfo ato yōkaxiki. Askatari a Moisés yoikī kirika keneni keskara ato tāpimamisfo ato kenamani ato yōkaxiki. “¿Faniāx Cristo kāixiimē?” ato faito kemanifo iskafakakī: “Belén anoax iki, Judea mai anoax,” fanifo. “Niospa meka yoimisto nānori kirika keneyoni a inōpokoai yoikī Niospa shināmanaino. Iskafakī keneni:

⁶ Belén, Judā mai anoax pishtakōi. Akka pexe rasi fetsafo epapakōifo. Askafiax Belén sharafinakōia ixii māmāi israelifo āto xanīfo finakōia kāixiaino Belén anoax. Nāskakē āfe inakōifo israelifo āto xanīfokōi ixii,

ixō kirikakī keneni Niospa meka yoimisto Niospa shināmanaino,” fanifo.

⁷ Nāskakē Herodes a fishi tāpimisfo ato yōkani onexō tsōa nikayamanō: “¿Afeṭia fishi mā ōitamē?” ato fani. ⁸ Nāskaxō ato nīchini Belén ano. Herodes tāpipaikī, “Belén ano fotakāfe a fake tāpīxikakī. Mā fichixō ea yoifexikakī ēri akiki inimaikanō,” ato fani āa ato pārakī.

⁹ Ato askafaino fonifo. Fokakī fishi rekē kaino chīfafainifo. Nāskax fishi nēteni nā fake yome ano. ¹⁰ Nā fishi anā ōikanax inimakōinifo. ¹¹ Nāskakanax pexe mēra ikifaikaxō fake yome fichinifo afa Marīa yafi. Mā fichikaxō ratokonō mai chachūpakefofānifo, a fakeki inimakakī. Nāskakaxō āto kafo fēpekaxō afama mīshiti sharakōifo Jesūs inānifo. Oro minikāta, pirofomāri mininifo a nō koofatiro pirofomā nakas sharakōi. Askatari pirofomā fetsari āfe ane mīra inānifo. ¹² Nāskakē namakē Niospa ato yoiano anā Herodes ano fonifoma. Fai fētsa fonifo āto mai ari.

Marīa feta José Jesūs ichokinifo Egipto mai ari

¹³ Askata a fishi tāpimisfo mā foaifono, José namakē, Niospa āfe ājirinī yoini: “Moinākafe. Mī āfi feta mī fake yome ichokitāfe Egipto mai ari. Nāri ikiyoxiki nā ē mato yoiaino mā anā onō. Herodes na fake yome fenai kiki retepaikī,” Niospa ājirinī José fani namakē.

¹⁴ Nāskata moinākafe, nā fakishi fonifo Marīa fe José āto fake Jesūs iyoi fokani Egipto ano. ¹⁵ Egipto ano José fe Marīa ipaonifo mā Herodes naano fexixakakī. Nāskakē Egipto ano iyopaonifo. Niospa meka yoimisto nānori kōi kirika keneyoni Niospa shināmanaino iskafakī: “Ēfe fake ē kena Egipto ano,” ixō Niospa meka yoimisto kirika keneni.

Fakefo retenōfo Herodes ato manamani

¹⁶ Fishi tāpimisfo Herodes fomākani. Fai fētsa foafono nikai, Herodes ōitfishkikōini. Fishi tāpimisfāfe taeyoi Herodes yoionifo ato yōkaito iskafakakī: “Afeṭiama nō nā fishi ōikī taefati, mā xini rafe aka,” fanifo. Nāskakē Herodes sorarofo ato manamani fake feronāfake xini rafe akafo, yome mīshifoya ato retenōfo, Belén anoafoto retekāta, a Belén pasotai ikafori ato retenōfo. ¹⁷⁻¹⁸ Nāskara taeyoi Jeremías Niospa shināmanaino kirika keneyoni a inōpokoai yoikī. Iskafakī keneni:

Ramā anoxō nikanifo fāsikōi oiaifono. Raquel oiaito nikanifo āfe fake manoi, mā āfe fake nano. Oiyayamafe fafiaifono nishpanima, ixō Jeremías keneni.

Nā Jeremías yoini keskara mā askakōia.

¹⁹ Mā Herodes naano Niospa ājirinī afanā José yoini namakē iskafakī: ²⁰ “Moinākafe. Mī āfi feta mī fake iyotaxiki Israel mai ano. A fake yomefo retepaimisfo mā naafoki,” fani.

²¹ Nāskafaino moinākafe José. Āfe āfiri mōini āfe fake yafi. Nāskakanax Israel ano anā fonifo. ²² Mā fōkakī nikanifo ato yoiaifono Herodes fake Arquelao mā xanīfokē Judea anoax. Nikai José rateni Judea ano kapai. Nāskaito anā ājirinī José yoini namakē iskafakī: “Galilea mai ano katāfe,” fani. Nāskafaino fonifo Galilea ano āfe āfi fe Jesūs iyokani. ²³ Nāskax nokonifo Nazarete pexe rasi ano. Nāno inifo. Nānori taeyoikōi Niospa meka yoimisfāfe yoionifo, “Cristo Nazarete ano imis,” fakakī, a inōpokoai yoikakī. Nāskakōini.

3

Juan Maotista tsōa istomaxō ato yoini

(Mr. 1.1-8; Lc. 3.1-9, 15-17; Jn. 1.19-28)

¹ Jesūs Nazarete ano ikano Juan ato maotisafapani tsōa istoma ixō Judea mai anoxō. Nānoxō Niospa meka ato yoipaoni. ² Nānoxō ato yoipaoni iskafakī: “Yorafāfe, anā Nios shinākāfe. Māto chaka xatekōikāfe, a mā chakafamis shināmākikāfe. Niospa meka nikakōikāfe. Mā chaima nōko Ifo Nios oi kiki nōko xanīfo finakōia ixii kiki,” ixō Juan ato yoipaoni fāsikōi.

³ Isaiās kirika kenekī yoionifo a inōpokoai yoikī Niospa shināmanaino. Iskafakī yoini:

Tsōa istoma anoxō yorafa yoixii akiki feaifono. Iskafakī ato yoixii: “Mā nōko Ifo oi kiki. Nāskakē itipinīsharakāfe. Āfe fai sharafaxokāfe. Māto chaka xatekāfe,” ixō ato yoiaito nikaxikani,

ixō Isaiās kirika keneyoni Juanoa yoikī.

⁴ Akka Juan áfe rapati kamícho fichi kishi faxō safepaoni. Áfe sītorari fichi koiro safepaoni. Nāskaxō tseo pipaoni, fonari apaoni. ⁵ Nāskano Jerusalén anoafo yafi Judea anoafo fenifo Juan nikai fekani. A faka Jordán chaima ikafori fenifo. ⁶ Mā fēkaxō Juan yoinifo a afara chakafamisfo. Nāskaxō āto chaka xatepaiyaifono Juan ato maotisafapani faka Jordán anoaxō.

⁷ Nāskafono fariseofo xanīfo metsamafo feaifono, saduceofo xanīfo metsamafori fenifo Juan ano. Ichapakōi fenifo, “Nokori Juan nashimanōra,” ikanax. Juan ato ōikī ato iskafani: “¿Afeskaī mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Áa fētsa mato pāratiro nō maotisanō nō chiifā mēra kaimakai Nios nikayamafax ixō mato pārano mā chiifā mēra katiro fetsa afaa tāpiamato mato pārano. Askara Niospa mato iftiriroma mākairoko shināito, ēroko mato maotisafaano. ⁸ Māto chaka xatekāfe, Nios shinākāfe. Mā Nios shināito ē mato maotisafapakai. ⁹ Ē mato anā yoinō nikakapo. Mā shināitiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka māto ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham áfe fena inō. Nāskakanax Abraham fakefo itirofo na tokiri ōikī Nios shinākanax. Akka mā kai anori shināima mā mā chanī: ‘Abraham shināpaoni keskara nō shināira,’ ikax. Askara shināyamafi Satanás fisti ifofafai. ¹⁰ Akka fana fimiyamaito ifāfe reratiro. Áfe tapori tsekaxō koofatiro anā niyamanō. Nāskarifakī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito. ¹¹ Nāskakē ē mato maotisafai māto chaka mā xatepaiyaito Nios Ifofapaikī. Akka nā ea keskarama mā chaima oi kiki, nā sharafinakōia. Aato afama mīshti fatiro, ē atiroma keskara. Akka ē afaama. Mā Nios chanīmara faino aato áfe Yōshi Shara mato mēra naneyoi. Akka tsōa Nios chanīmara fayamaito, Niospa mato omiskōimaxii. ¹² Akka yōra áfe tarepa aros fanaxō mā pachiano topitiro. Nāskaxō katotiro a sharafo fixō a chakafo potaxō koofatiro. Nāskarifakī a chipo oaito a chanīmara faafo yafi a nikakaspamisfo ato paxkanāfaiyoi. Nāskaxō a chanīmara faifo a ika ano ato iyoxii áfe isharapakexanōfo. Akka nā nikakaspamisfo chiifā mēra ato potano anoax omiskōipakenakafo. Chiifā mēranoax omiskōi xatenakafoma,” ixō Juan ato yoini.

Juan Jesús maotisafani faka Jordán anoaxō

(Mr. 1.9-11; Lc. 3.21-22)

¹³ Askata Galilea anoax Jesús kani faka Jordán ari Juan maotisafanō. ¹⁴ Akiki nokoaino Juan Jesús iskafani: “Jesús, ¿afeskakī ē mia maotisafatiromē? Akka mīroko ea atironō,” fani.

¹⁵ Askafaino Jesús kemani iskafakī: “Epa Niospa noko yoia keskara keyokōi nō nikakōitiro. Nāskakē ea mia maotisafatiro,” fani.

Jesús askafaino, Juan Jesús maotisafani. ¹⁶ Nāskata Jesús faka mēranoax fininākafānaino nai fepekemetani. Ariax Niospa Yōshi Shara akiki fotoni, oa rifi keskara Jesús ōiaino. ¹⁷ Askaino nai mēraxō Ápa yoiaito nikani iskafaito: “Mī éfe Fakekōi ē mia noikōi. Ē mikiki inimasharakōi,” ikaito nikanifo.

4

Satanás chakata Jesús afara chakafamapaini

(Mr. 1.12-13; Lc. 4.1-13)

¹ Nāskaino Niospa Yōshi Sharapa Jesús iyoni tsōa istoma anoaxō Satanás afara chakafamapainō.

² Mā cuarenta nia oxax Jesús fonāikōini afaa pishta piyamax. ³ Nāno Satanás akiki nokoni. Mā akiki nokoxō ifofamapaini. Askatari chakafamapaini. Iskafakī yoini: “Mī Niospa Fakemāki na tokirifo pāa fapo,” fani.

⁴ Askafaito Jesús kemani: “Maa, na mī ea yoiai keskara ē akima. A nō pi ai fisti nō shināima nipaikī. Akka Epa Niospa áfe meka fisti shara nō shināitiro. Nāskara Niospa meka yoimisto kenei,” Jesús fani.

⁵ Jesús askafaino Satanás iyoni Jerusalén ano a Nios kīfiti pexefā māmākia. ⁶ Nānoxō yoini iskafakī: “Mī Niospa Fakekōiaxroko mī niri ax ichopakekafanikai. Mī ichopakekafanax mī afeskaimakai. Nā Niospa meka kirikaki keneaki iska: ‘Niospa áfe ājirifo yoixii mia kexenōfo.’ Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskaki,” Satanás Jesús fani.

⁷ Askafaito anā Jesús kemani: “Akka na kirika keneano yoinifo iskafakī Niospa meka: ‘Nōa nō meka fetsafaxō nō yoitiro: ‘Ē afara afeskarafaito, ea Niospa kexei,’ ixō nō

shinātiroma. Akka, “Niospa ea amapayiai keskara nā fisti ē atiroki Niospa ea kexenō,” ixō shinākāfe, ikaki na kirika keneano,” Jesús fani.

⁸ Askata Satanás Jesús iyoni māchifā mānānē. Arixō ōimani nā maifo tii sharafinakōia. ⁹ “Ōipo. Mī ea ratokonō mai chachixō, ‘Mī ēfe ifoki,’ mī ea faito na maitio keyokōi ē mia inātiro mī āfe ifo inō,” fani.

¹⁰ Askafaito Jesús kemani: “Satanás. Emakinoax katāfe. Ē mia ifofaimakai. Na kirika keneana ano Niospa meka yoimisto iskafani: ‘Nā nōko Ifo Nios fisti nō ratokonō mai chachixō nō yoitirokī, nā fistimāi nōko Ifokē,’” fani.

¹¹ Askafaino Satanás Jesús makinoax kaino Niospa āfe ājirifo akiki fotonifo pimaxikakī.

Galilea anoxō Jesús ato yoikī taefani

(Mr. 1.14-15; Lc. 4.14-15)

¹² Akka mā Juan sorarofāfe karaxa mēra ikimana nikata Jesús Galilea mai ano anā oni. ¹³ Nazarete anoax Capernaúm ano nokoni ano ixiki. Nā Galilea ĩa kesemē Capernaúm ini. Nānori yora fetsafori osia ini. Zabulonōfo fe Neftalifo ano ikafo ini. ¹⁴⁻¹⁶ Isaiás kirika kenekī yoini keskakōi Jesús nāno ipaoni. Isaiás kirika kenekī iskafani:

Zabulonōfo fe Neftalifo āto mai ano ikafo ĩa Galilea ano. Faka Jordán okiri chai poketa nāno judeofoma fakish mēra ika keskara, Niospa meka nikakatsaxakakima. Fakish mēra ika keskara ifiakaxō, oa koshi penai keskara ōixikani. Fakish mēra ipafikeranaxakakī atoki penarisatani,

ixō Isaiás a inōpokoai yoikī Jesúsnoa kenei. Nāskarifiai omiskōipakenakafo mēra ikeranafo. Askafikeranafono atoki Jesús nokoaitia nā Ifofafo tii ato nimapakenaka.

¹⁷ Anoxō Jesús ato yoikī taefaki iskafani: “Mā chaima nōko Ifo Nios xanīfo finakōia oi kiki. Nāskakē shināmitsayanā mātō chaka xatekāfe. Afaa chakafatamaroko Niospa meka nikakōikāfe,” ixō Jesús ato yoini.

Jesús cuatro feronāfake kenani tarafanāfānē foe fimisfono āfe inakōi inōfo

(Mr. 1.16-20; Lc. 5.1-11)

¹⁸ Ato yoita Jesús Galilea ĩa kesemē kani. Kakī fichini Simón yafi onefetsa Andrés. Simón āfe ane fetsa Pedro ipaoni. Nā rafeta tarafanāfānē fimisfo inifo, āto tarafanāfā faka naki poteaifāfe. ¹⁹ “Efe fokāfe. Māfi tarafanāfānē fimiskī. Mā foe ichapa rasi tarafanāfānē fiai keskari fakī iskaratiari mā ekeki yora ichapa efexii ē āto Ifo inō,” ixō Jesús ato yoini. ²⁰ Ato askafaino tarafanāfā fafaikani afe fonifo.

²¹ Askata ori chaimashta kaxō Zebedeo fake raferi fichini, Santiago yafi Juan. Nā rafeta āto apa feta kanōa nakixō tarafanāfā itipinī fanifo, kishifakakī. Nā raferi, “Efe fokāfe,” Jesús ato fani. ²² Ato askafaino āto apa kanōa ano nīchifainifo Jesús fe fokakī.

Jesús yora ichapafō tāpimani

(Lc. 6.17-19)

²³ Mā askafaxō afe foafono nā Galilea anofo kafāsakī Niospa meka ato yoini. Judeofāfe ichanāti pexe mēraxō Jesús ato Niospa meka shara yoisharakī iskafani: “Itipinīsharakāfe. Nios nonoax mātō xanīfo ipai kiki,” ixō ato yoifofāsafani. Askatari a isinī ikaifo fetsa fetsatapafo ato sharafāpani. ²⁴ Askafaano nikakaxō Siria mai anofo isinī ikaifo akiki efenifo ato sharafapanō. Isinī ikaifo fetsa fetsatapafo akiki efenifo. A yōshi chaka āto mēra naneafori ato sharafani. A nīsoaifori efeta, a finimismafori efeta, a chatofori efenifo. Ato keyokōi sharafapani. ²⁵ Askafaito yorafā rasichi chīfafainifo. Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekāta Jesús chīfafainifo.

5

Machi mānānēxō Jesús ato yoini

(Lc. 6.20-23)

¹⁻² Yorafā rasi akiki feaifono ōi Jesús ato paxafāini kaax, machi pochini tsaoni. Tsaono āfe meka tāpipaimisfo akiki fenifo. Āfe meka nikai fekani. Akiki feafono ato yoikī iskafani:

³ “Fētsa āto shinā mēraxō shinākī iskafax: ‘Ēakai ē ishariatiroma. Ē Nios yopakōi,’ ikaito Niospa inimamaxii māmāi Nios Ifo sharafaino āfe fakekōi inō.

⁴ “Fētsa shināmitsakōifaino chipo Niospa noikī inimamaxii.

⁵ “Fētsa kakapaimisma imisno Niospa inimamasharaxii. ‘Keyokōi maitio atonā ixiii,’ ixō Niospa yoiyoni keskara atonāri ixii.

⁶ “Fētsa Niospa meka noikōikī Niospa ato imapayiai keskara shara ipaikōikani, nā keskarafo Niospa ato inimamaxii.

⁷ “Fētsa fetsafori noikī ato sharafaito Niospa tāpia. Nāskakē ari Niospa noikī axosharapak-enaka inimamakī.

⁸“Fētsa Nios shināsharakī, āfe òiti mēra faaa chaka shinātama Nios fisti shinākī chipo Nios òixii. Nāskax inimakòixii.

⁹“Akka noikaspa faatanāifono fētsafāfe ato raenā faano, nāfo Niospa ato yoikī iskafaxii: ‘Mā ēfe fakefo,’ ixō ato yoiaino inimakòixikani.

¹⁰“Fētsa Nios Ifofasharapaiyaino, fetsafāfe ato omiskòimafiaifono, Epa Niospa kexe-sharakòiano nāskakē inimakòixii.

¹¹⁻¹²“Mā ea Ifofakē fetsafāfe mato ìchakani, mato omiskòimayanā askatari matoònoa meka chaka yoikani meka fetsa fetsatapafo. Nā mato chakafaiifo keskafakīri mato xinifāfe nā Niospa meka ato yoixomisfori ato chakafapaonifo. Nāskakē inimasharakāfe eòxō matori chakafakani kiki. Mā askaito Niospa afara sharafo mato mekexona nai mēranoa mātonā inō,” ixō Jesús afe imisfo ato yoini.

“Mā tashi keskarata askatari mā pena keskara,” ixō a Ifofafo Jesús ato yoini (Mr. 9.50; Lc. 14.34-35)

¹³Anā Jesús ato yoini iskafakī: “Māfi nono mai anoax tashi keskaraki. Nāskakē shinākāfe. Tashi sharakē nō meetri. Akka tashi sharayamakekai nō shara meetiroma. Nāskarakai tsoa pishta fichipaima. Mā paispakē anā nō pitiroma. Nāskakē nō potatiro. Nāskarifiiai mā tashi keskara. Mā nono mai ano isharaino yorafāfe mato òikani inimatirofo. Askafixō mā Nios anā Ifofasharayamaito matoòxō tsòakai tāpitirofoma Niospa meka shara. Mā tashi paispa keskarakē mato potatirofo. Iskafakī yoitirofo: ‘Mā chakafoki nonoax fotakāfe. Mākai afaama,’ ixō yoitirofo.

¹⁴“Nāskatari mā oa luz peeikai keskarakī. Akka pexe rasi māchi keya mánānēnoax onetiroma. Chai ixō penakòì nō òitiro. Nāskarifiiai matoòxō yorafāfe xafakīa eònoa nikatirofo.

¹⁵Nāskafakīri tsòakai fakishaino òipaifikī luz fepotiroma. Tapo kamakī luz òtaxò kēsho fepotiroma. Askatamaroko tapo kamakī fomākīa nō òtaxò tsàotiro a pexe mēra ikafāfe òisharanòfo. ¹⁶Nāskarifiiai isharakāfe. Mā askaito mato òikakī tāpitirofo mā eònoax xafakīa isharakē. Askata māto Epa Nios nai mēra ikano aònoa yoikī iskafaxikani: ‘¡Aicho! Na yorafa Niosnoax isharakòimisfo. Àto Nios sharakòì,’ ixō yoixikani,” Jesús ato fani yoikī.

Jesús ato yoini a Niospa shināmanaino Moisés kenenìnoa nikasharakòinòfo

¹⁷Anā Jesús ato yoini: “Mā shināiraka iskafakī: ‘A Moisés Niospa shināmanaino kenenì, askatari a Niospa meka yoimis fetsafāferi kirika kenenifo afo Jesús noko nikamakaspai,’ ixō mā shināiraka. Anori shināyamakāfe. Èkai Moisés feta a Niospa meka yoimis fetsafāfe kenenifo keskara ē potayoi onima. Askatamaroko nā kenenifo keskara ē ato tāpimaxii ē fotoni nai mēranoax. ¹⁸Akka ē mato xafakīa yoi. Ea nikasharakāfe. Nai fe mai keyooyamano a Moisés yoini keskara tsòa fetsafatiroma. Askatari faaa nō potatiroma. Akka mā keyokòì mitokomeano, mai fe nai keyoxii. Mā afama mīshiffo keyoano nō anā Moisés mekari nō yopaxima. ¹⁹Akka fētsa Moisés meka nikasharayamaxò fetsafari ato meka chaka tāpimanaino nikakaspamisfo a Moisés kenenì keskara. Nā feronāfāke Epa Nios ika ariax anā faaa itiroma. Nāskafekē fētsa Niospa meka nikasharataifakī fetsafari Niospa meka xafakīa yoiax Epa Nios ika anoax afe xanīfo itiroki. ²⁰Askano nā fariseofo fe a Moisés yoikī kirika kenenì keskara ato tāpimamisfo, ‘Nòfi sharakòì,’ ifiamisxakakī Niospa yoini keskara keyokòì nikafoma. Akka a Moisés yoikī kenenì keskara nikakòìkanaxma tsoa Epa Nios ika ari nokotirofoma,” ixō Jesús ato yoini.

“Òitifishkiyamakāfe,” ixō Jesús ato yoini (Lc. 12.57-59)

²¹Anā Jesús ato yoini iskafakī: “Mā mā nikamiskī a Moisés nòko xinifo ato yoipaoni keskara. Iskafakī ato yoini: ‘Tsoa reteyamakāfe. Mā fetsa retakē xanīfo ano mato iyotirofo matori kopikiri retematirofo,’ ixō nòko xinifāfe yoinifo. ²²Mēstekòì anori yoifinikē ē mato meka fetsari mēstekòì yoinò. Ea nikasharakāfe. Fētsa fetsa ìchaito mī xanīfofo ari iyotiro a omiskòìmanò. Askatari fētsa fetsa chakafai iskafakī: ‘Mī faaa tāpiama. Mī tatimakòì,’ faito Niospa a omiskòìpakenakafo mēra chiifā mēra potatiro anoax omiskòìpakexanò.

²³⁻²⁴“Nāskakē mā Nios kīfiti pexefā mēraxò mā kīfipaikī mā iskafakī shināino: ‘Ooa, ē fetsa chakafaa ē raefama,’ ixō shinākī, anā Nios kīfixoma nā mā Nios ināpaifafāmai fetsa ano koshi fotakāfe. Akiki nokoxò yoisharafe anā mikiki raenò. Nāskaxò anā mā Epa Nios kīfitiro.

²⁵“Mā fetsa nimiano matokī oxò mato iskafatiro: ‘Mī ea nimia. ¿Afetīa mī ea kopifaimē? Mī ea kopifayamaito ē mia xanīfo ano iyoikai,’ mato faito, xanīfo ano kayoxoma koshi raefakāfe. Akka mā askafayamaino xanīfo ano mato iyotiro. Mā mato iyoano xanīfāfe policia yoitiro iskafakī: ‘Na feronāfāke fetsa nimiakī kopifaamaki, karaxa mēra ikimafe,’ fatiro. ²⁶È mato paraima. Fētsa mato karaxa mēra ikimanano mā fena tseketiroma. Akka nā mā nimia kopifatia mā tseketiro,” ixō Jesús ato yoini.

“Māto āfikòima chotapaiyamakāfe,” Jesús ato fani

²⁷ Anā Jesús ato yoini: “Mā mā nikamis a nōko xini Moisés yoini keskara. Iskafakī ato yoini: ‘Māto āfima chotayamakāfe. Askatari kēromāri māto fenema chotamayamakāfe,’ ixō ato yoini. ²⁸ Nāskara chanīma. Nāskakē ēri mato yoi, fētsa āfe āfima ōikī āfe shinā mēraxō shināi: ‘Ē na kēro chotapai,’ ixō shinākī āfe shinā mēraxō chotai.

²⁹ “Akka māto fēro ōikī mā chakafatiro. Nāskakē afara chaka ōiyamakāfe afara chakafaxikakima, nā nōko fero tsexaxō nō ōitiroma keskafakī. Mā māto chaka xateyamax omiskōipakenakafo mēra mā katiro. Akka mā māto chaka xateax mā Nios ika ari kaax mā afe ipaxatiro. Askara shara. ³⁰ Nāskarifikakī māto mēke kayakai aōxori mato afara chakafamakē, mextemekāfe. Mā askafax shara mā itirokī. Nāskarifikakī māto chaka xatekāfe nā mā mextemea keskaraxō. Akka mā māto chaka xateyamax, nā omiskōipakenakafo mēra mā katiro. Akka mā māto chaka xateax, Nios ari mā kaax afe mā ipaxatiro. Askara shara,” ixō Jesús ato yoini.

Feronāfake āfe āfi fe enēnātirofoōnoa Jesús ato yoini
(Mt. 19.9; Mr. 10.11-12; Lc. 16.18)

³¹ Anā Jesús ato yoini: “Nāskatari Moisés nōko xinifo yoini iskafakī: ‘Fētsa āfe āfi potaxikī a potayoxoma iskafatiro kirika kenexō: “Ē anā mia fipaima. Ē mia eneikai,” ixō kenexotiro,’ ixō Moisés ato yoini. ³² Akka anori Moisés yoifinikē anā meka fetsari ē mato yoinō. Tsōa āfe āfi chotayamafiano, feronāfake āfe āfi eneano nā kēro feronāfake fetsa fe chotanāi chakanai. Askatari feronāfake fētsa nā kēro fiax chakanai āfe āfikōima chotai,” ixō Jesús ato yoini.

“A mā yoiyomis keskara akāfe,” ixō Jesús ato yoini

³³ Askata anā Jesús ato yoini: “Mā mā nikamis a Moisés nōko xinifo yoini keskara. Ato iskafakī yoipaoni: ‘A mā Nios yoiyomis keskara axosharakāfe. A mā yoiyomis keskara Epa Niospa mā nikakī akka mā ayamano nā chakakōi itiro,’ ixō Moisés nōko xinifo yoini. ³⁴ Akka nānori ato yoifinikē, ēri mato yoisharanō. Nikakapo. Mā fetsafo yoiyomis keskara axosharakāfe. Iskafakī yoiyamakāfe: ‘A ē mato yoiyoma keskara ē axii. Ē mato yoiyoma keskara ē ayamaino Epa Niospa ea omiskōimatiro,’ ixō yoiyamakāfe. Askatari, ‘A ē mato yoiyoma keskara ē akēma keyokōi nai mēraxō ea omiskōimatiro,’ ixō yoiyamakāfe. Akka nai mēranoax Epa Nios xanīfo finakōia iki. Nāskakē anori nō yoitiroma. ³⁵ Askatari, ‘A ē mato yoiyoma keskara ē ayamaino nono mai anoafāfe ea omiskōimatiro,’ ixō anori yoiyamakāfe. Keyokōi mai ano Epa Niosnā. Askatari, ‘A ē mato yoiyoma keskara ē ayamaino a Jerusalēn anoafāfe ea omiskōimatiro,’ ixō anori yoiyamakāfe. Nā Jerusalēn nōko xanīfo finakōi Niosnā. ³⁶ Askatari, ‘A ē mato yoiyoma keskara ē ayamaino ēfe māpo ea omiskōimatiro,’ ixō yoiyamakāfe. Akka nōa nōko māpo shināxō nōko foo nō fetsafatiroma oxo inō, askatari fiso inō. Epa Nios fistichi askafatiro. ³⁷ Akka fetsafo parayamakāfe. ‘Ē mia axōikai,’ ixō axokāfe. Askatari, ‘Ē mia axōimai,’ ixō axoyamakāfe. ‘A ē yoiyoma keskara ē ayamaino afaa ranā ea omiskōimatiro,’ ixō anori yoiyamakāfe. Mā askara yoikī mā chakafai,” ato fani.

“Tsoa kopiyamakāfe,” Jesús ato fani
(Lc. 6.29-30)

³⁸ Anā Jesús ato yoini iskafakī: “Mā mā nikamiski a nōko xinifo Moisés yoini. Iskafakī ato yoini: ‘Fētsa mato fero tsēkaito, kopikiri mā fero tsēkatiro. Askatari mato piti tēkeaito, pitiri mā tēketiro,’ ixō Moisés yoini. ³⁹ Akka nōko xinifo anori yoifinifono, ē mato meka fetsa yoinō. Ea nikakapo ē mato yoinō. Fētsa mato chakafayanā mato tapasaito, ‘Takai fetsari ea afe,’ fakāfe mato tāpinōfo mā ato kopiyamaito. ⁴⁰ Fētsa mia xanīfo ano iyoxō mia rapati fiapaiyaito, ināfe fotanō. Mī chōpari ināfe. ⁴¹ Xanīfo iyamakī soraronō, ‘Ea pisha chaīma foxōikafe,’ mato fafaito, mā chai foxotiro. ⁴² Akka fētsa mato afarafo yōkaito inākāfe. ‘Ea ināyope,’ mato faito ināfe fīshkoyamakāfe,” ixō Jesús ato fani.

“Mato noikaspaifafono māroko ato noikāfe,” Jesús ato fani
(Lc. 6.27-28, 32-36)

⁴³ Anā Jesús ato yoini iskafakī: “Askatari mā mā nikamis a nōko xinifo yoipaonifono keskara. Iskafakī ato yoipaonifono: ‘Māto kaifo noikāfe. Akka a mato noikaspaifo ato kopikiri noikaspaikāfe,’ ixō nōko xinifo yoipaonifono. ⁴⁴ Anori yoifinifono, akka ē mato yoi a mato noikaspaifo ato kopikima ato noikāfe. Askatari ato axosharakāfe. Askatari a mato omiskōimamisfo Epa Nios ato kifioxokāfe. ⁴⁵ Mā askafai Niospa fake mā iki. Akka Niospa xini onifani yora chakafoya, yora sharafo ato chaxanō. Askatari oiri imani nā yora sharafoya a yora chakafori ato onifaxonī. Nāskakē māri a mato chakafaifoya a mato sharafoifo keyokōi ato noikāfe. Nāskax mā Niospa fake ikikai. ⁴⁶ Akka a mato noiaifos mā ato noia fetsafo noiyamata askarakai sharama. Akka yora chakafo a ato paraxō kori ichapa ato fiamisfori aska famis. Mā askaino Nios matoki inimaīma. ⁴⁷ Mato fe yorafos mā noia askarakai afaama. Akka a Nios Ifofaafomari nāskarifiakani aa ranāri noinākani. ⁴⁸ Nāskakē Epa Nios

nai mēraxō yorafo noiai keskafakī māri yorafo keyokōi noikāfe. A Epa Niospa shināsharamis keskafakī māri askafakāfe,” ixō Jesūs ato yoini.

6

“Afaamaisfori ato noikī afara ato ināsharakāfe,” Jesūs ato fani

¹ Anā Jesūs ato yoini iskafakī: “Mā fetsafo sharafaino, ‘Nā feronāfake sharakōi ea fanōfora,’ ixō anori shināyamakāfe yorafāfe ferotaifi. Mā askaino yorafāfe, ‘Sharara,’ mato fafiaifono, akka Epa Nioskai matoki inimatiroma. Nāskaxō mato afaa inātiroma. ² Nā āa keparanāmisfo keskara iyamakāfe. Afāfe nōko kaifāfe ichanāti pexe mēraxō afaamaisfo afara ato ināmisfo, ‘Sharara noko fanōfora,’ ikaxō. Askatari fofāsakakī afaamaisfo ato afara ināfōfāsafamisfo, ‘Noko yoisharanōfora,’ ikaxō. Akka askafiaifono Niospa ato afaa ināxima. ³ A afara yopaifo mā afara ināki tsoa yoyamakāfe tsōa tāpiyamanō. ⁴ Akka tsōa ōiyamaino afaamaisfo mā ato ināino Epa Nios matoki inimani. Nāskaxō mato afara axosharatiro,” ixō Jesūs ato yoini.

“Epa Nios kifiki iskafakāfe,” ixō Jesūs ato fani
(Lc. 11.2-4)

⁵ Anā Jesūs ato yoini iskafakī: “Mā Epa Nios kifiaitā a chanūmisfāfe kifimisfo keskara iyamakāfe. Akka afāfe nōko kaifāfe ichanāti pexe mēraxō yorafāfe ferotaifi Epa Nios kifimisfo: ‘Noko ōinōfora,’ ikaxō. Epa Nios shinātamaroko ato ōimapaikani. Yorafāfe ato ōiaifono askamisfo. Akka Epa Nios atoki inimaima. Nāskakē ato afara shara ināxiima. ⁶ Akka māri ato keskara iyamakāfe. Mā Nios kifiki tsōa mato ōiyamaino nānoxō Epa Nios kifikāfe. Māto pexe kene mēra ikixō tsōa mato ōiyamaino nānoxō Epa Nios kifikāfe. Akka yorafāfe mato ōiyamafaino Epa Nios fistichi mato nikatiro. Nāskakē matoki inimai. Nāskaxō afara shara mato ināxii.

⁷ “Akka a Nios chanīmara faafāfema kifimisfo keskayamakāfe. Nāfāfe mēxotaima nā meka fisti yoiri famisfo. ‘Nō na meka fisti yoirifaito noko Epa Niospa nikai,’ ixō shināmisfo. Askafiaifonokai Niospa a keskara meka nikapaima. ⁸ Akka māri ato keskara iyamakāfe. Mā Epa Niospa tāpiakī mā afara yopaito, mā yōkayoamano. ⁹ Akka mā kifiki iskafatiro:

Epa Niosi, mī fisti sharafinakōia. Mī nai mēra ika. Nō mia noikōi. ¹⁰ Nai mēra mefe ikafo mī ato yoiaito mia nikakōimisfo. Akka nono mai anoxori nā mī noko amapaiyai keskara nō atiro. Na nono mai ano ikafāfe keyokōichi mia Ifofanōfo. ¹¹ Nā pena tii a nō piyai noko ināfafāife nō afaa yopayamanō. ¹² Nō afara chakafaito nōko chaka noko soaxōfe nā noko chakafāifāfe nō ato raefai keskafakī. ¹³ Nokoki Satanās chaka omayamafe, askakimaroko nomakinoa pōtafe nō nikayamanō, ixō kifiki iskafakāfe.

¹⁴ “Akka fetsafāfe mato chakafaifono mā ato raefai keskafakī Epa Nios nai mēranoato mā fetsafo raefai keskafakī matori chaka soaxotiro. ¹⁵ Akka mā fetsafo raefayamaito Epa Niospari mato chaka soaxotiroma,” ixō Jesūs ato yoini.

Foni tenemisfoōna Jesūs ato yoini

¹⁶ Anā Jesūs ato yoini iskafakī: “Ē mato yoyonō. Mā foni tenei oa shināmitsai keskara mātō femānā iyamakāfe a āa keparanāmisfo ikaifo keskai. Afāfe foni tenekani āto femānā shināmitsai keskara ikani yorafāfe ato ōikani. Askatari foaromekanima yorafāfe ato ōinōfo. Nāskakē Epa Niosnoa shinākanima. Askaifono Epa Nios atoki inimaima. Nāskakē ato afaa ināima. Akka māri foni tenei ato keskara iyamakāfe. ¹⁷⁻¹⁸ Akka mā foni tenei mā Nios shināyanā mā fechokometiro. Askatari fōxti mā foaromesharatiro. Nāskakē Epa Nios fistichi tāpitiro yorafāfe tāpiafomano. Mā askaito yorafāfe tāpitirofoma mā foni teneaito. Akka Epa Nios fistichi tāpitiro. Nāskakē Epa Nios matoki inimatiro. Askatari mato afara shara ināxii,” ixō Jesūs ato yoini.

“Epa Nios ika anoxō afara sharakōifo mato mekexona,” ixō Jesūs ato yoini
(Lc. 12.33-34)

¹⁹ Anā Jesūs ato yoini iskafakī: “Nono mai anoxō afama mīshti ichapa mekeyamakāfe. Mato nakaxa pīaino mā fenotiroki. Askatari chakanai fetsetiro. Askatari yometsofo mātō pexe mēra ikixō mātō afama mīshtifo keyokōi mato fīano mā fenotiro. ²⁰ Akka afama mīshti noitama Nios noikāfe. Nā mato yoini keskara akāfe. Mā akiki nokoaito nā mato afara sharakōi mekexona mato ināxii. Akka ono nai mēraxō afama mīshti mato mekexona, a nakaxa mato pīatiroma. Askatari chakanaima. Askatari anā mātō pexe mēra ikiax tsoa yometsofotiroma. ²¹ Akka mātō afama mīshtifo noikī mā shināfafāini. Nā mātō afama mīshtifo mā shināfafāini keskafakī Niosri shināfafāikāfe, a noikī yonoxosharakāfe,” ixō Jesūs ato yoini.

“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesūs ato yoini

(Lc. 11.34-36)

²² Anā Jesūs ato yoini iskafakī: “Anā ē mato meka fetsari yoinō mā tāpikōinō. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharanō nō xafakīā ōisharatiroma. Nāskatari nō isharakōitiro. ²³ Akka nōko fero chakakē nō ōisharatiroma. Fakishkōi itiro. Nāskarifiakī nōko ōiti mēraxō nō chaka shinākī nō afara chakafamis nō itiro. Akka ōisharakāfē. Mā Epa Nios shināi xafakīā ifixō āfē meka kachikiri faxō mā anā xafakīā shinātiroma. Fakish keskara mā itiro,” ixō Jesūs ato yoini.

“Nōko afama mīshti noisharatama nō Nios noisharakōitiro,” Jesūs ato fani

(Lc. 16.13)

²⁴ Anā Jesūs ato yoini iskafakī: “Tsōa āfē ifo rafe yonosharaxotiro. Fetsa noikaspa, fetsa noisharatiroma, nā yoiāi keskarakōi axotiro, akka a fētsa amapaiyai keskara axotiroroma noikaspatiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiro,” ixō Jesūs ato yoini.

“Epa Niospa āfē fakefo kexesharamis,” ixō Jesūs ato yoini

(Lc. 12.22-31)

²⁵ Anā Jesūs ato yoini iskafakī: “Anā ē mato yoisharanō. Ea nikasharakāfē. Shināchakayamakāfē. Nō afaa piyamata, afaari nō ayaima iyamakāfē. Askatari afaari nō safeima ixō shināchakayamakāfē. Akka a nō piatokai noko imasharatiroma. Askatari a nō safeatori nōko yora noko imasharaxotiro. ²⁶ Akka shinākapo. Peyafāfē afaa fanamisfoma. Afaari topimisfoma. Askaxori afaa mekemisfoma. Nāskafekē Epa Niospa ato pimamis. Akka nā peyafō afaayamafoiakē Epa Nios nai mēra ikato ato pimamis. Akka Niospa mato noikī nā peyafō finōmainifōfā mato kexesharakōimis. ²⁷ Nāskakē, ŷafeskakī mā shināchakaimē? A nō shināchakaitokai pena fisti noko anā nimatiroma. Nāskakē afaa shināchakayamakāfē.

²⁸ “Askatari iskakī shināyamakāfē: ‘Ooa. ŷFanīa ē rapati fitiromē safexiki?’ ixō anori shināyamakāfē. Akka shinākapo afeskax charofo foaikamakī. Nā charofāfē yonokanima. Askatari xapo toro atirofoma rapati faxikakī. ²⁹ Nāskafīax charofo sharamīshti foaikani. Nāskarari xanīfo Salomón rapati sharafinākōia safefixō nā charofo finōama. ³⁰ Akka Niospa nafefo sharashtafo onifani. Sharafiano nō sepakī xateano natiro. Nāskaxō nō koofatiroma. Akka Niospa nafefo finōmainifōfā mato noikī mato rapati safematiroma mato kexesharaxō. Akka mā shināchakakī mā Nios chanīmara fasharaima. ³¹ Nāskakē shināchakayamakāfē. Shinākī iskafayamakāfē: ‘Ooa. Ē fonāiki a ē piāi keyoano, a ē ayairi keyoano koriyaxomari ē afaa safeima,’ ixō anori shināchakayamakāfē. ³² Akka nā Nios Ifofaiāfēma iskara shināmisfo. A piāi fisti shinākata, a safepaiyaifori shināmisfo. Akka Epa Niospa mā mato tāpia afarafo mā yopaito. ³³ Nāskakē Nios mato xanīfoōna shinākāfē. A Niospa mato amapaiyai keskara nāskara fisti shinākōikāfē. Mā askafaito afara fetsa mā yopaito Epa Niospa mato ināxii. ³⁴ Nāskakē shināchakayamakāfē. Yoi iskayamakāfē: ‘Ooa. Ē tāpiama penama afara chaka afeskara afiaino. Ē nā keskara tenetiroma,’ ixō shināyamakāfē. Shinākī iskafakāfē: ‘Epa Niospa na penata ea kexesharamis keskafakī penamari ea kexesharai,’ ixō nānori shinākāfē,’ ixō Jesūs ato yoini.

7

“Fetsafo mekakakī chakafayamakāfē,” ixō Jesūs ato yoini

(Lc. 6.37-38, 41-42)

¹ Anā Jesūs ato yoini iskafakī: “Mēxotaima fetsafo mekakafayamakāfē iskafakī yoiikī: ‘Naato afara chakafakī Niospa omiskōimapainō,’ fakī. Akka mā ato askafayamaino Niospari mato mekakatiroma iskafakī yoiikī: ‘Na yorafo chakafo,’ mato fatiroma. ² Akka māri nāto akai keskafakī afara mā chakafaito, matori Niospa omiskōimaxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma. ³ ŷafeskakī ifi pasta pishta fetsa feronaki ikano mā ōimē, mārōko ifi pasta efapa feostamefixō? ⁴ Akka, ŷmā shināimamē a mā ifi pasta efapa feostamea? Akka, ŷafeskakī mā fetsa iskafaimē?: ‘Yamā, ē mia fixonō a mā ifi pasta pishta fero naki ika,’ fakī, mākōi mā kakamepaimis. Mākai afaa tāpiama. ⁵ Nāskax mā chanīkōi mā ato parapaimis. Akka ē mato yoinō ea nikakapo. Akka mato fero mēranōa a ifi pastafā mā feostamea tsekayokāfē. Nāskaxō ōisharakī, a fetsafo ifi pasta pishta feronaki ika mā tsekaxotiro. Nāskarifikī mato chaka xateyamaxō mā fetsafo chaka xatematiroma. Akka mato chaka xatexō fetsafo mā chaka xatematiroma.

⁶ “Ē meka fetsari mato yoinō mā tāpinō. Paxta pōfē nō nami shara ināpaiifaino noko keyotiro mifiki. Askatari kochi nō afara shara ināino peama peamakī chakana fatiro.

Nāskari fakī yorāfāfe Niospa meka shara nikakaspakī chakafatirofo, Epa Nios chakafakī mekafakakī. Askaifono Epa Niospa meka shara anā ato yoipaiyamakāfe,” ixō Jesús ato yoini.

*“Nō Epa Nios afara yōkaito noko ināitiro,” ixō Jesús ato yoini
(Lc. 6.31; 11.9-13)*

⁷⁻⁸ Anā Jesús ato yoini iskafakī: “Nāskakē ē mato yoi, afara fichipaikī Epa Nios yōkakāfe mato ināi kiki. Fena fena kakīma manakāfe nā Epa Niospa mato ināitīa. Nāskakē Epa Nios kīfifafāikāfe mā kīfīaito mato ināi kiki. Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfīaito ināsharakōixii.

⁹ “Akka māto fake mato yoa yōkaito, ĵmā tokiri ināitiro mē? Maa. Mā kai māto fake mā askafatiroma. ¹⁰ Askatari, ĵmāto fāke mato foe yōkaito mā rono ināitiro mē? Maa. Mā kai māto fake mā askafatiroma. ¹¹ Akka mā chakafixō māto fakefo kexesharaxō afara sharafo mā ato ināitiro. Nāskarifiakī Epa Nios nai mēranoato mā afara yōkaito mato kexesharakatsaxakī afara sharafo mato ināsharaxii nā nai mēraxō mato mekexona.

¹² “Nā mā fīchipaiyai keskafakī fetsafāfe mato axosharaifono, nāskarifiakī māri fetsafo axosharakāfe. Moisés feta a Niospa meka yoimisfāfe nānori yoinifo kirika kenekakī,” ixō Jesús ato yoini.

*Fepoti pishtaōnoa Jesús ato yoini
(Lc. 13.24)*

¹³ Anā Jesús ato yoini iskafakī: “Meka fetsa ē mato yoinō. Nikakapo. Fepoti rafe iskarakī: Fepoti fetsa pishtaki nā fepoti pishta ikikāfe. Akka nā fepoti fetsa efapa. Nā fepoti efapato fai efapa kaa. Nāskakē nā fai efapato yora ichapa fomisfo a omiskōipakenakafo mēra. ¹⁴ Akka fepoti pishta ano fai kaa, pishta fekax. Nā fai Nios ano nokoa nā fai atsō pishtakōi. Nāskakē ichapama aō fomisfo,” ixō Jesús ato yoini.

*Ifi āfe fimioxō nō tāpitiro afe keskaramākī
(Lc. 6.43-44)*

¹⁵ Anā Jesús ato yoini iskafakī: “Ōisharakāfe, a chanīaifāfe mato paratirofokī: ‘Nō Niospa meka yoimis,’ ixō mato paratirofo. Afāfe Niospa meka yoimisfomaki. Akka afofi ovejafo keskarrafo fikanax akka āto shinā mēra poomā pōfēfo keskarakōifo. Nāskakē ato fishtayamakāfe. ¹⁶ Akka mā tāpitiro afaa afeskafakanimākai. Akka ifi āfe fimioxō nō tāpitiro afe keskaramākī. Xopa foaikī moxaya foaitiroma. Askatari kachafi moxaya foaitiroma. Nāskaxō nō tāpitiro moxayafo ōikī xopakairokokē. Nāskarifiakī nō tāpitiro kachafimāi moxayakē. ¹⁷ Akka ifi shara fimi sharaya itiro. Akka ifi chaka fimi chakaya itiro. ¹⁸ Nāskakē Ifi shara fimi chakaya itiroma. Ifi chakari fimi sharaya itiroma. ¹⁹ Akka ifi fimi sharaya iyamaito ifāfe reraxō koofatiro. ²⁰ Nāskakē a ato tāpimamisfoōnoa mā ato tāpitiro sharafo iyamakani chakafo itirofo,” ixō Jesús ato yoini.

*“Akka keyokōi fotiروفoma Epa Nios ika ano. Fisti rasi fotiروفo,” ixō Jesús ato yoini
(Lc. 13.25-27)*

²¹ Anā Jesús ato yoini iskafakī: “Akka yora ichapato yoimis iskafakakī: ‘Jesús, mī ēfe Ifokōi,’ famisfo. Nāskafikaxō atirito ea Ifofamisfoma. Nāskakē ēfe Epa Nios ika ari nokotirofoma. Ēfe Epa nai mēra ikato nā ato amapaiyai keskara akatsaxakakī nāfo ēfe Epa ari nokotirofo afe ipaxakakī. ²² Akka mā mai keyoaino nā onifanifo tii keyokōi Niospa ichanāfaxii. Nā nikakaspamisfo tii omiskōipakenakafo mēra ato potaxii. Nāskakē yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafo yoimis. Mī aneōxori nō a niāfaka chakafo yorafo mēra nanea nō ato makinoa potamis. Mī aneōxori nō afama mīshti famis yorāfāfe atiroma keskafakī. Noko shināfe, Ifo,’ ixō ea yoixikani. ²³ Askaifono ē ato xafakīa yoixii iskafakī: ‘Mā kai efe yorama. Māfi ato pāramiski. Afara chaka fisti mā famiski. Emakinoax fotakāfe,’ ē ato faxii,” ixō Jesús ato yoini.

*Pexe rafeōnoa Jesús ato yoini
(Mr. 1.22; Lc. 6.47-49)*

²⁴ Anā Jesús ato yoini iskafakī: “Akka nā ea nikaito nā ē yoi ai keskara aki, nā yōra pexe fakī tāpixō mai chai pōkixō mai teikī pexe kishi nīchitiro keskafakī. ²⁵ Akka oi ikaino, pexe nāmā faka faitiro. Askatari nēfefakī pexe afeskafatiroma. Nāskakē pexe paketiroma mā mai teikōikimāi pexe kishi niano. ²⁶ Akka nā ē yoi ai to ea nikafikī a ē yoi ai keskara nikaima, askara yora nā yora tatimato pexe fakī mashi ano pexe fatiro keskarakōi. ²⁷ Akka oi ikaino faka faitiro. Askatari nēfefakī pexe potatiro. Nāskax pexe chakanatiro. Nāskarifiakī fētsa ēfe meka nikafikī ea nikaima afofi fenoi fetsekani. Nāskakē omiskōipakenakafo,” ixō Jesús ato yoini.

28-29 Nāskata mā Jesús mekai xateano yorafāfe nikakaxō, “¡Kee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo.

8

Jesús yora rashkishiai sharafani

(Mr. 1.40-45; Lc. 5.12-16)

¹ Askata Jesús ato yoikī xateta māchi keya ariax tisirimepakeaito yorafāfe chīfafainifo afe fōkakī. ² Jesús kaino feronāfake isinī iki rashkishi fetseax Jesúski oni. Akiki oxō ratokonō mai chachipakefōfā yoini iskafakī: “Ifo, ea sharafapaikī mī ea sharafatiro,” fani. ³ Askafaino Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, a rashkishi fetseai koshikōi sharatani. ⁴ Mā sharano Jesús nīchini iskafakī yoiyana: “Mī tsoa yoikī. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

Jesús sharafani romanō xanīfāfe āfe ina yonaito

(Lc. 7.1-10)

⁵ Askafāfāini Capernaúm ano kani. Nāno akiki soraro xanīfo nokoni a yonoxomis sharafamapai. ⁶ Nokoxō yoini: “Ifo, a ea yonoxomis isinī iki. Ēfe pexe ano rakax omiskōiferokima,” fani.

⁷ Askafaino, “Ē kanōkī sharafaxikī,” fani.

⁸ “Ifo, ēkai afama. Akka mī tsoa keskarama. Mī finakōiakī ēfe pexe ano kayamafe. Mī mekapa a ea yonoxomis ea sharafaxōfe nonoxō. ⁹ Akka eari ēfe xanīfāfe yonomamis. Ēri sorarofō yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomis afara ea axōfe ē faino ea axotiro. Akka mī afama mīshiti fatiroki. Mī mekapa a ea yonoxomis ea sharafaxōfe,” ixō yoini.

¹⁰ Askafaito nikakī a afe foafo Jesús ato yoini: “Kee, nikakapo. Na feronāfake israeliyamafixō ea chanīmara fakī finakōi fetsafo keskarama. Akka Israel anoafāfe ea iskafamisfoma chanīmara fakakī. ¹¹ Ē mato xafakīa yoinō. Na maitio ano ikafo Nios chanīmara fakanax nōko xinifo Abrahamnō Isaacanō Jacobonō ichanāxikani Nios yorafo ixikakī. ¹² Akka atiri nōko kaifo nā israelifo Niospa afe yorafo ato imapaifaino chanīmara fakanima. Nāskakanax Nios ika ano nokotirofoma. Niospa ato fakishifā mēra potaxii. Anoax eaiyanā fasi omiskōixikani,” ixō Jesús ato yoini.

¹³ Nāskata Jesús yoini soraro xanifo: “Mī pexe ano katāfe. Mī ea chanīmara faino a mia yonoxomis mā sharakī,” fani.

Jesús Pedro rayos sharafani

(Mr. 1.29-31; Lc. 4.38-39)

¹⁴ Askata Jesús Pedro pexe ano kani. Nāno Pedro āfe rayos yōxafo yonai oxati kamaki raka ini. ¹⁵ Jesús ōikī āfe mēkemā ramāni. Ramāino āfe yona matsirisatani. Mā Jesús sharafaano anā yonanima. Mā sharaxō fininākakāta Jesús pimani.

A isinī ikaifo Jesús ato sharafani

(Mr. 1.32-34; Lc. 4.40-41)

¹⁶ Nāskano mā xini kaino a isinī ikaifo Jesúski efenifo ato Jesús sharafapanō. Atiri a niafaka chakafo ato mēra nanea Jesús āfe mekapa ato makinoo pōtapakeni. Keyokōi Jesús ato sharafapani. ¹⁷ Nānori Niospa meka yويمisto Isaiás a inōpokoi yoikī kirika kenekī iskafani: “Nō isinī imisno Cristo mā noko sharafaa. Askatari nā noko pāefaifo nomakinoo mā noko potaxona,” ixō Isaiás kirika keneni keskara Jesús ani.

A afe fopaimisfoōna Jesús ato yoini

(Lc. 9.57-62)

¹⁸ Askata Jesús ōini yorafā rasi akiki feaifāfe. Askaifono aōxō tāpimisfo yoini iskafakī: “Okiri nō iamāfā pokefainō fokāfe,” ato fani. ¹⁹ Akka Jesús kayoamano a Moisés yoikī kirika keneni keskara ato tāpimamis akiki oxō yoikī iskafani: “Maestro, ēri mefe kapai nā mī kai ari ēri mefe kafāsaxiki,” faito, ²⁰ Jesús kemani: “Akka maxoteneroa kiniya, peyafari naayafo akka ēkai pexe yama,” fani.

²¹ Askatari a afe kafāsamis fētsa iskafakī yoini: “Maestro, ea nīchiyofe ēfe epa naito ē maifayotanō. Chipō mia Ifofaxiki,” faito, Jesús kemani: ²² “Iskaratīa ea Ifofafe. Akka nā ea Ifofaafāfema yora nakē maifatirofo,” ixō Jesús yoini.

Jesús nefē yafī iamāfā poo iki mesenaito nishpa fani

(Mr. 4.35-41; Lc. 8.22-25)

²³ Nāskata Jesús kanōanāfānē naneinīkafāni aōxō tāpimisfori afe naneinīfofānifo. ²⁴ Īamāfā pokefainafono atoki nēfēfā nokoni. Jesús kanōanāfā xaki mēra rakax oxano nefeyanā Īamāfā poo ini. Kanōanāfā faka fospikōini. ²⁵ Askaino aōxō tāpimisfāfe mōinifo iskafayanā: “īfo, mā nō āsaikai! jNō āsayamanō moife!” fanifo.

²⁶ Askafaifono, Jesús ato yoini: “¿Afeskai mā rateimē? Mā ea chanīmara fasharama. Nāskakē mā ratei,” ato fani. Ato askafata, fininākfāfā fāsikōi, “jNēfe, nishpafe!” fata, “jāmā, nishpafe!” fani. Askafaino anā Īamāfā feroinima. ²⁷ Askafaito ōikani yoinānifo: “jKee! ¿Na feronāfake afe keskaramē na nefe feta Īamāfānē ato yoiaito nikaifo?” ikanax yoinānifo.

Feronāfake rafeta Gadara mai anoxō niafaka chakafo nanea- fono Jesús ato makinoa potani

(Mr. 5.1-20; Lc. 8.26-39)

²⁸ Askata Jesús okiri Īamāfā aōxō tāpimisfo feta pokefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinifā mēranoax. Nā rafe mesekōi ipaonifo. Nāskakē yorafāfe a ikafo ano tsoa ato finōtiroma ipaoni atoki mesekākī. Nā maiyafō ano nā rafe ipaonifo. ²⁹ Nāskakē Jesús fichikanax fāsikōi fiisiyanā yoinifo: “Mīfi Niospa Fakeki. Akka, ¿mī noko afeskafaiyoamē? ¿Mī noko omiskōimaniyoamē?” Jesús fanifo.

³⁰ Askafaifono chaimaxō kōchifā rasichi pinifo. ³¹ Nāskakē niafaka chakafāfe Jesús iskafainifo: “Mī nā feronāfake rafe makinoa mī noko potaimākai kochifo mēra noko nīchife,” faifono, ³² “Fotakāfe,” Jesús ato fani. Nāskax niafakafo feronāfake rafe makinoax tsekekanax kochifo mēra ikinifo. Nāskakē kochi rasi ichoax Īamāfā mēra keyopakeni. Nāskax āsai fetсени.

³³ Askaito ōikani a kochifo kexemisfo ichonifo. Mā pexefo tii ano nokokaxō ato yoinifo: “Nā feronāfake rafe nā niafaka naneafo rafe mā Jesús ato makinoa niafaka pōta. Askatari nōko kochifo mēra ikimanano keyokōi nāfoya nōko kochifo Īamāfā mēra keyopakeax āsai fetsea,” ato fanifo. ³⁴ Ato yoiaifono nikakanax keyokōi nā pexefo tii anoax Jesúski fenifo. Akiki nokokaxō yoinifo: “Na nōko mai anoax katāfe,” fanifo.

9

Jesús yora finimisma sharafani

(Mr. 2.1-12; Lc. 5.17-26)

¹ Askata Jesús kanōanāfā mēra nanekaini. Īamāfā okiri pokefaini kaax āfe mai ano nokoni. ² Nāno ikano a feronāfake finimisma yorafāfe akiki efenifo āfe ratatinī rataxō Jesús sharafanō ikaxō. Jesús ōini shināifāfe iskakākī na finimisma Jesús sharafai kiki ikaxō. Nāskakē a finimisma Jesús iskafani: “Efe yorashta, inimafe. Iskaratā mā mia chaka soaxonaki,” fani.

³ Askafaino a Moisés yoiķi kirika keneni keskara ato tāpimamisfāfe atirito nikakaxō āto shinā mēraxō shinānifo iskafakākī: “Natokai ato chaka soaxotiroma. Nios fistichi ato chaka soaxotirokī. Akka nato noko feparapai, ‘Ē Niosra’ noko fapai,” ixō āto shinā mēraxō shinānifo. ⁴ Askafaino Jesús tāpixō a shināifo keskara ato yoini: “¿Afeskakī mato shinā mēraxō mā chaka shināimē? ⁵⁻⁶ Ēfi Cristokī ē yorafo ato chaka soaxotiro. Akka, ¿ē afaa fatiromē? Mē mia chaka soaxona ē fatiromē. Askatari ē mia sharafaa ē fatiromē,” ato fani. “Akka ē mato tāpimanō ē Niosxō mato chaka soaxotiro nono mai anoxō.” Nāskata Jesús a feronāfake finimisma yoini: “Fininākfata mī rakati fifaini mī pexe ano katāfe,” Jesús fani.

⁷ Jesús askafaino a finimisma fininākfāta āfe pexe ano kani. ⁸ Askaito ōikani yorafo ratei fetсениfo. “jKee, ōikapo! Nios tsoa keskarama. Fāsi sharakōi. Nō ōimisma keskara mā noko rama ōimana. Niospa Yōshi Sharaōxō na feronāfake finimisma Jesús āfe mekapa mā sharafaa. Askatari āfe chakari mā soaxona,” ikanax yoinānifo.

Jesús Mateo ifni aōxō tāpimis inō

(Mr. 2.13-17; Lc. 5.27-32)

⁹ Jesús nānoax kakī feronāfake fisti fichini, āfe ane Mateo,* āfe xanīfo kori fixōi tsaokē. Nāskaito Jesús yoini: “Efe kofe ē mia tāpimanō,” faino Mateo fininākfā Jesús fe kani.

¹⁰ Nāskafaito Mateo Jesús iyoni āfe pexe anoxō pikikākī. Askatari a yora chakafori afe inifo a xanīfo kori fixomisfo. Nāfāfe āa chanīxō kori finōmainīfofā fimisfo inifo. Askatari a yora fetsafo chakafamisfori fekanax akairi mīsa ano Jesús fe tsaonifo a feta pixikākī. Jesúsxō tāpimisfori nāno ato fe tsaonifo ato feta pixikākī. ¹¹ Askaito ōikākī fariseofāfe Jesúsxō tāpimisfo yōkanifo: “¿Afeskakī mato maestro nā ato kori fixomisfo feta piimē, a yora fetsa chakafo fetari pii?” fanifo.

¹²⁻¹³ Askafaifāfe nikākī Jesús ato yoini: “A sharafāfe notoro fenakanima. Akka nā isinī ikaiifāfe notoro fenakani. Nāskafakīri yorafāfe yoimisfo iskakākī: ‘Ēkai afaa chakafamisma.

* 9:9 Mateo ane rafeya ipaoni. Āfe ane fetsa Levī.

Nāskakē ē afaa yopaima ēfe chaka ea soaxonō, imisfo. Nāskakē ē ato chaka soaxotiroma. Akka fetsafāfe yoiki iskafaifono: ‘Ē afara chakafamis. Nāskakē a ē imis keskara ē anā ipaima,’ ikaifono ē ato chaka soaxotiro. Akka nā nō sharakōi ikaifoōnoax ē onima. Akka ē oni a yora chakafo āto chaka ato soaxoxiki. Akka ē mato yoipai mā tāpinō a Niospa ato shināmanaino iskafakī kenenifo: ‘Mā yoināfo retexō ea ināxiki mā koamis māto chaka soapaiki, askara ē fichipaima. Akka ē fichipai fetsafo mā ato noikī mā ato sharafaxōaito,’ ixō kenenifo.

“Akka ē onima a yora sharafoōnoax. Askatamaroko a yora chakafoōnoax ē oni ato chaka soaxoxiki,” ixō Jesús ato yoini.

Nā foni tenemisfofāfe Jesús yōkanifo

(Mr. 2.18-22; Lc. 5.33-39)

¹⁴ Juan āfe inafō fēkaxō Jesús yoinifo iskafakakī: “Farisefāfe foni tenekī feyafamisfo Nios shinākakī. Nōri askafamis foni tenekī Nios shinākī. Akka, ¿afeskakī mīōxō tāpimisfāfe foni tenekanimamē?” fanifo.

¹⁵ Askafaifāfe Jesús ato kemani: “Feronāfake āfiyaino, yorafo ano fisti ichanākaxō afara fetsa fetsatapafo afeta pitirofo inimayanā, aicho fakakī akiki inimakakī. Nā kēromā āfe fene ano ato fe ikano tsōa foni tenetirofoma inimakakī. Akka mā fene rēteafono afe yorafāfe shinākakī foni tenetiro,” ixō Jesús ato yoini.

¹⁶ “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatari sama fena fe sama xini isharatiroma. Nāskakēri nā ē mato yoiai keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāsxax māto yora fena keskara shara itiro. ¹⁷ Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyānō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma. Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyānō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma,” ixō Jesús ato yoini.

Jairo fake xotofake mā nakē Jesús ofofani. Askatari kēromāri Jesús rapati mēeax sharani

(Mr. 5.21-43; Lc. 8.40-56)

¹⁸ Nānori Jesús ato yoiaino judeofāfe xanifo nokoni. Jesúski nokoxō xanifāfe a nāmā ratokonō mai chachipakefōfā yoini: “Ēfe fake xotofake rama naa. Akka mī kaxō mī mēkemā mī ramāino anā ototiro,” xanifāfe Jesús fani.

¹⁹ Askafaino Jesús finināfata aōxō tāpimisfo fe kani xanifo aho. ²⁰ Askatari nānori kēro imi nesemisma ini, doce xinia amis imi nesekima. Nā kēromā Jesús kaito aho kaxō a kachikirixori āfe tari kexa ramākani. ²¹ “Ē āfe tari mēeax ē sharatiroma,” ixō āfe shinā mēraxō shināni. ²² Akka Jesús ifiakekafāta nā kēro fichini. Fichita yoini: “Yōxashta, rateyamafe. Mī ea chanīmara faax mā mī sharaki,” Jesús faino nā kēro imi neserisatani.

²³ Askata mā Jesús nokoax xanifāfe pexe mēra ikikaini. Anoxō Jesús ōia yorafāfe āto xāiti manenifo, yora fetsafo oiakani sheesafono. ²⁴ Askaifono Jesús ato iskafani: “Nonox fōtakāfe. Na fakekai naamaki. Oxaki,” ato faito Jesús ōsanifo. ²⁵ Ato kāmata xotofake mētsoinifōfānaino koshikōi fininākafani. ²⁶ Nāskata Jesús nā xotofake naa otoakē nikakanax pexefo tii chanifōfāsanifo.

Fēxo rafe Jesús sharafani

²⁷ Nāskata Jesús xanifāfe pexe anoax kaino fēxo rafetari chīfainifo iskafayanā fāsikōi: “Mī nōko xini David fenaki, noko noife,” fanifo. ²⁸ Askafaifono Jesús pexe fetsa mēra ikikaini. Nāno afe ikiafono Jesús ato yōkani: “¿Mā chanīmara faimē a ē mato sharafatiro?” ato faito, “Ēje, Ifo, nō mia chanīmara fai,” fanifo. ²⁹ Nāskata ato fero ramākayanā ato yoini: “Ea chanīmara faaxfi mā sharaikai,” ato fani. ³⁰ Ato askafaino ōsharanifo. Nāskakē Jesús ato yoisharani: “Ea nikakapo. A ē mato sharafaa tsoa yoiyamakāfe,” ato fani. ³¹ Akka ato anori yoifekē nā Jesús sharafaa nā ano ikafo ato yoifōfāsanifo nā rafeta.

Feronāfake mekamisma Jesús sharafani

³² Nā fēxo rafe imisfo pexe mēranoax tsekefainafono fetsafāfe feronāfake mekamisma Jesúski efenifo Jesús sharafanō. Niafaka chaka a mēra naneano mekamisma ini. ³³ Jesús mā feronāfake makinoa niafaka chaka potano nā feronāfake mekamisma mekani. Nāskakē

nā ano ikafo rateyanā yoinānifo: “jKee, ðikapo! Na nōko mai Israel anoxō Jesús akai keskara tsōa ðimisma,” ikanax yoinānifo. ³⁴ Askafaifono fariseofāfe yoinifo: “Nato nīafaka xanīfooxō nīafaka potai,” ikanax yoinānifo chakafakī mekafakani.

Jesús yorafo shinākōini

³⁵ Nāskakē Jesús pexefo tii judeofo ikafo ano kafāsani. Judeofāfe ichanāti pexe mēraxō Jesús Niospa meka shara ato yoisharani iskafakī: “Isharakāfe. Nios mātō xanīfokōi ipai kiki,” ixō ato yoifofāsafani. Nāskaxō a isinī ikaifo fetsa fetsatapafo ato sharafani. ³⁶ Yorafā rasi akiki feaifono ðikī Jesús ato shinākōini fekaxteaifāfe ðikī, nā ovejafo ifomaiskanax tsōa ato kexeyamano fofāsatirofo keskara ato ðikī. ³⁷ Nāskaxō a aōxō tāpimisfo ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo. ³⁸ Akka Epa Nios kīfikāfe yorafo nīchinō ēfe meka ato yoitanōfo ea Ifofanōfo,” ixō Jesús ato yoini.

10

Jesús aōxō tāpimisfo doce feronāfake ifni

(Mr. 3.13-19; Lc. 6.12-16)

¹ Askata Jesús aōxō tāpimisfo kenani: “Ekeki fekāfe,” ato faino, akiki foaifono ato yoini aōxō yorafo sharafanōfo, a nīafaka chakafo yorafo mēra nanea ato makinoa potanōfo, a isinī ikaifo fetsa fetsatapafo aōxō sharafanōfo.

² Nā feronāfake docefāfe āto anefo iskarakī: fetsa Simón. Nā Simón āfe ane fetsa Pedro. Āfe exto Andrés. Fetsafori āto ane Santiago, āfe exto Juan, nā rafe Zebedeo fake ini. ³ Felipe, Bartolomé, Tomás, Mateo, nā Mateo Roma anoxō xanīfo kori fixomis ini. Askatari Santiago fetsa, Alfeopa fake, Tadeori ini. ⁴ Simón fetsa nāato āfe kai fo feta romanōfo potapaini anā israelifo yonomayamanōfo. Askatari Judas Iscarioteri ifni, nāato Jesús chakafakī ato achimani Jesús retenōfo. Nā tii Jesús ifni aōxō tāpimiskōi inōfo.

Jesús aōxō tāpimisfo nīchini Nios Xanīfoōnoa ato yoitanōfo

(Mr. 6.7-13; Lc. 9.1-6)

⁵ Nāskata Jesús aōxō tāpimisfo nīchini ato iskafakī yoivanā: “Nā nōko kaifomafāfe āto mai ano foyamakani. Askatari nā samāritanōfo ikafo anoriri foyamakani. ⁶ Akka nā nōko kai fo israelifo ato mēra fotakāfe. Nāfo oveja fenoafo keskarafokī. ⁷ Fokaxō ato yoikī iskafatakāfe: ‘Mā chaima nōko Ifo Nios oi kiki nōko xanīfo finakōia ixii,’ ixō ato yoitakāfe. ⁸ A isinī ikaifo ēfe sharaōxō ato sharafatakāfe. Askatari naafono ato otofatakāfe. A rashkishii fetseiafori ato sharafatakāfe. A nīafaka chakafori āto mēra naneafo ato makinoa pōtatakāfe. Akka ēfe shara kaxpa ē mato minia afaa ē mato yōkama. Nāskari fakī, ato kaxpa sharafatakāfe.

⁹⁻¹⁰ “Akka mā kakī afaa mā fokiki. Māto kori foyamata, māto rapati fetsa foyamata, māto sapato fetsa foyamata, māto forosa foyamata, māto mēsteti foyamata fakāki, eōxō ēfe meka mā ato tāpimani kaikai. Nāskakē mā afara yopaito mato inātirofo mā pinō a mato nikamīsāfe.

¹¹ “Mā pexe rasi ano nokoxō nā feronāfāke Nios Ifofasharakōia fenakāfe. A keskara fichixō āfe pexe ano iyoxō Niospa meka ato yoisharaxikakī nā mā kaiñia. ¹² Nā pexe mēra ikixō ato yoikī iskafatakāfe: ‘Aicho. Nō mato ðiyoa,’ ato fakāfe. ¹³ Akka mato ifisharaino, mā tāpitiro nā pexe ifāfe afe yorafo ikisharamis. Nā mā yoiai keskafakī Epa Niospa axosharai tanaima shara inō. Akka a mato ifisharayamaifo, afāfe afe yorafo ikisharamisfoma. Nāskakē nā mā yoiai keskafakī Epa Niospa ato axosharaima. ¹⁴ Akka pexe fetsa mēraxō mato ifikaspaifono, a pexe mēranoax mā tseketiro. Askatari pexe rasi mēraxori mato askafaifono, mā anoax katiro. Mā anoax tsekekaikī māto taekinoa mā mapo taa taa atiro ato ðimākī. Mā askafaino tāpitirofo Nios atoki inimayamaino. ¹⁵ Ē mato paraima yoi. Nā pexe rasi Sodoma anoafo feta Gomorra anoafāfe afara chakakōi fapaonifo. Nāskakē Niospa nā ato omiskōimanaitia ato omiskōimaxii. Akka nā mato nikakspaifo nāfo ato omiskōimaki finakōixii,” ixō Jesús ato yoini.

“Mato omiskōimakani kiki,” ixō Jesús ato yoini

¹⁶ Anā Jesús ato yoini iskafakī: “Ōikapo. Ē mato nīchikai nā yora chakafo mēra. Akka nā yora chakafāfe nā poomānā ovejafo pipaitiro keskafakani kiki mato. Mato askafaifono nā poomā onāyakōi keskara ikāfe eōxō tāpisharakāfe. Nā rīfi afaa chaka shināmisma keskafakī māri askara shinākāfe. ¹⁷ Ōisharakaki. Nā yora chakafāfe mato achikaxō āto xanīfofo ano mato iyotirofoki. Nāskakaxō āto ichanāti pexe mēraxō mato koshatirofoki. ¹⁸ Nāskakaxō xanīfofo ano mato iyotirofo eōxō. Akka anoxō na meka shara eōnoa mā ato yoixii. Askatari judeofomari māto kaifomafori na meka shara eōnoa mā ato yoixii. ¹⁹ Akka mato achikaxō xanīfofo ano mato ināifono shināchakayamakāfe afeskaxō mā ato yoisharaimākai. Xanīfofo

ano mato iyofaifono Epa Niospa mato shināmanaino mā ato yoisharaxii. ²⁰ Akka mā ato yoi mā mekaima Epa Niospa Yōshi Shara mekai mā ato yoiaino.

²¹ “Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apafāferi āto fakefo ato achimakani fetsafāfe ato retenōfo. Fakefāferi āto apa yafi āto afakī ōitifishkikakī ato achimakani fetsafāfe ato retenōfo. ²² Mā ea chanīmara fakē nāskakē eōxō mato yorafāfe noikaspakani. Akka mato noikaspafiaifono mā eōnoax omiskōifikī mā ēfe meka nikasharakōiaito ē mato kexesharakōixii Epa Nios fe mā isharapakexanō. ²³ Akka pexe rasi anoxō mato omiskōimanaifono, pexe rasi fetsa ano ichotakāfe. Akka ē mato yoisharanō. Ea nikasharakāfe. Mā israelifāfe pexe rasi anoxō keyokōi mā ato yoioamano, ē orisaxii.

²⁴ “Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma. ²⁵ Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskax māri ea keskara ixii. Nāskakē nā ea chakafamisfo keskafakī matori chakafakakī finakōixikani. Nāfāfe ea noikaspakani ea yoisiffo iskafakakī: ‘Mī niafaka yōshi chakafāfe xanīfo. Mī Beelzebú,’ ixō ea yoisiffo. Ē mato Ifofekē ea askafamisfo. Akka matori askafakakī finakōixikani,” ixō Jesús ato yoini.

Akka Nios fistiki nō mesetiro

(Lc. 12.2-7)

²⁶ Anā Jesús ato yoini iskafakī: “Akka mato omiskōimafiaifono, atoki rateyamakāfe. Akka nā afara one yoifimisfono Niospa ato xafakīa kāimaxoxii, afarari fomāpaimisfono, nāfori Niospa ato xafakīa kāimaxoxii. ²⁷ Akka nā ē mato yoisiffo yorafāfe ato ferotaiifi xafakīa ato yoisharakāfe. ²⁸ Akka mato retepaifiaifono rateyamakāfe. Afāfe mato retefitirofono, akka mato fero mēsho afeska fatirofoma. Atoki ratetamaroko, Nios fistiki mesekāfe. Nāato noko retexō noko fero mēsho nā omiskōipakenakafo mēra potatiro.

²⁹ “Nāskakē a yora chakafo retemitsamisfoki atoki rateyamakāfe. Epa Niospa mato kexesharai kiki. Shinākapo. Peya mīshiti afaayamafekē Epa Niospa afo shināki. Ato namapaiyamaino tsōakai nā peya mīshitifo retetiroma. ³⁰ Akka ē mato yoi, Epa Niospa mato foo fisti rasi mato tāpikakōia. ³¹ Nāskakē rateyamakāfe. Nā peya mīshitifo kexesharamis keskafakī, matori Epa Niospa kexesharakī finakōiakī,” ixō Jesús ato yoini.

“Akka atiri yorafāfe, ‘Jesús ēfe Ifora’ ea famisfo yorafāfe ferotaiifi. Akka atirifāferi, ‘Jesús ēfe Ifomara’ ea famisfo,” ixō Jesús ato yoini

(Lc. 12.8-9)

³² Anā Jesús ato yoini iskafakī: “Yora fetsafāfe ferotaiifi, ‘Jesús ēfe Ifora’ ea faifāfe ēri ēfe Epa Nios nai mēra ika anoxō, ‘Nafo efe yoraki’ ē ato faxii. ³³ Akka nā yora fetsafāfe ferotaiifi, ‘Jesús ēfe Ifomara’ ea faifāfe ēri, ‘Nafo efe yorafomara’ ē ato faxii ēfe Epa Nios arixō,” ixō Jesús ato yoini.

“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini

(Lc. 12.51-53; 14.26-27)

³⁴ Anā Jesús ato yoini iskafakī: “¿Mā shināimē maitio anoax keyokōi yorafa eōnoax inimanōfo ē oni? Maa. Anorima. Akka nā ē mato yoi ai keskara tsōa anoris shinākanima. Akka nā ea chanīmara faifāfe shara shināifono akka nā ea chanīmara faafāfema afara fetsa chakafo shinākanima. ³⁵ Akka āfe apa ea chanīmara faino āfe fāke ea chanīmara fakaspakī āfe apaki ōitifishkitiro. Askatari āfe āfari ea chanīmara faino āfe fake xotofāke ea chanīmara fakaspakī āfe afakī ōitifishkitiro. Askatari āfe fāfafa yōxafāfe ea chanīmara faino, āfe fāfafa naetāfa ea chanīmara fakaspakī, āfe fāfafa yōxafakī ōitifishkitiro. Akka ē nai mēranoax matoki oyamanikē askakeranafoma. ³⁶ Eōxō nānorifos shinākanima. Akka fetsafāfe ea chanīmara faifono eōxō ato fe yorakōifo noikaspatirofo.

³⁷ “Fētsa āfe apa yafi āfe afa noikī finakōixō akka ea noikī finayamax, ea Ifofamis itirofoma. Askatari fētsari āfe fake feronāfake yafi āfe fake xotofake noikōixō, akka ea noikī finayamax ea Ifofamis itirofoma. ³⁸ Akka fētsa yoitiro iskafakī: ‘Ea omiskōimafiaifono ēfe Ifo ē potatiroma,’ ixō yoitiro. Akka fētsari yoiikī iskafatiro: ‘Ea omiskōimanaifono ē Jesús Ifofaima,’ ea askafax efe nīpaxatiroma. ³⁹ Akka fētsa iskafakī shināi: ‘Ē Jesús Ifofaito ea omiskōimakanira,’ ixō shināki, ēfe meka kachikiri faax, nā keskara yora naax omiskōipakenaka. Akka fetsa eōnoax omiskōifikī ea potaxma nā keskara yora naax efe isharapakenaka,” ixō Jesús ato yoini.

Akka fetsafāfe ato sharafaxōaino, Niospa afara shara ināxii

(Mr. 9.41)

⁴⁰ Anā Jesús ato yoini iskafakī: “Akka fetsafāfe mato nikakōikakī eari nikakōikani. Askatari fetsafāfe ea nikakōikakī ēfe Epa Niosri nikakōikani nāatomāi ea nono mai ano ea nīchinino. ⁴¹ Akka fētsa shināki iskafatiro: ‘Nāatofi Niospa meka yoisimiki. Nāskakē ē āfe meka

nikasharai,' ixō yoitiro. Akka nā Niospa meka yoimis afara shara ināi keskafakī ari Niospa ināsharaxii. Nāskakē fētsari shināki iskafatiro: 'Nā feronāfake sharaki Niospa meka nikasharamiski. Nāskakē āfe meka ē nikakōi,' ixō shināino, nā Niospa meka yoimis afara shara ināi keskafakī ari afara shara ināsharaxii. ⁴² Fētsa ea chanimara faxō ea Ifofakī, aato shināi iskatiro: 'Ē Jesús Ifofamis. Nāskakē afara shara ē axōi,' ixō shināki afara shara axotiro. Nāskakē ē yoinō, e nikakapo. Faka pishta mā fetsa ayamakē Niospa matori afara shara ināsharaxii,' ixō Jesús ato yoini.

11

Juan aōxō tāpimisfo Jesúski nīchini
(Lc. 7.18-35)

¹ Askata Jesús aōxō tāpimisfo doce ato tāpimaxō ato nīchini yorafo Niospa meka shara ato tāpimatanōfo. Jesús mā ato yoikī keyoax ari kani, fetsafo tāpimanikai a pexe rasi chaimashta ikafo ano.

²⁻³ Askatari Juan Maotista karaxa mēra ixō nikani Jesús Apa Niosxō yorafo sharafaito. Nāskakē tāpisharapaini. Nāskaxō karaxa mēraxō aōxō tāpimisfo nīchini Jesús ano. Mā ato nīchia fōkaxō yōkanifo: "¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?" ixō yōkatanōfo Juan ato nīchini.

⁴⁻⁵ Mā Jesús ano nokokaxō yōkanifo. Askafaifono Jesús ato kemani: "Fokaxō Juan yoitakāfe a mā ōiyanā a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashkishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikanani kiki afesfaxō Epa Niospa noko ifitiromakī." ⁶ Nāskaxō ato yoini: "Akka a ea chanimara fasharakōia afara fetsa shinātama ekeki inimakōitiro," Jesús ato fani, Juan ina rafe.

Jesús ato yoini Juanoa

⁷ Nā a Juan ato nichia rafe mā foaifono Jesús yorafo yoikī taefani Juanoa. "¿Afeskakī tsōa istoma anoa Juan ōifokani fonifomē? Juankai nā nēfe tafa pei taka taka akai keskarama. Nāskarifiakī mā mā tāpia Juankai ōiti ranāyama. ⁸ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfōfōfāfe āto pexe anoxō rapati sharakōi safetirofo. ⁹ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa meka yoimis finakōia, fetsafo keskarama. ¹⁰ Akka nā Juanoa yoikī Isaías kirika keneni iskafakī:

Mī nai ariax mai ano oyoamano, nā ēfe meka yoimis ē nīchi taefakī mīonoa ato yoiaino itipinī sharakaxō mia nikakōinōfo, ixō keneni. ¹¹ Akka ē mato yoi ē mato paraima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimim. Akka fetsafāferi faayamafikaxō ea Ifofaifono Nios atoki inimakōirikai. Nāskakē Juan Maotista finakōifiano fetsafāfe finōkōiafo Niospa ato ōimis.

¹² "Nā Juan ato matotisa fapanitīa Niospa meka nikanixakakī, iskaratīari yorafo Nios ika ano ikipaikōikani. Iskakī shināmisfo; 'Nios xanīfo ariax ēri āfe yora ipai afe nīpaxakī. Afaa pishtakai ea nēfetiroma ē āfe yora inō,' ixō shināmisfo. ¹³ Akka Juan oniyamano taeyoi nā Niospa meka yoimisfo feta Moisésri keneni iskafakī: 'Nā noko ifimis nōko Xanīfo finasharakōi oxii,' ixō kenenifo. Akka nā Niospa meka yoimisfāfe kenenifo keskara nānorikōi Juan ato yoini. ¹⁴ Niospa meka yoimisto keneni iskafakī: 'Ē matoki Elías nīchixii,' ixō Niospa yoini. Akka mā āfe meka chanīmara fapaikī mā tāpitiro nā Juan Elías keskari. ¹⁵ Mā ea nikatirokī ea nikakāfe. Ēfe meka māto shinā nā nēra nanekāfe," ato fani.

¹⁶ Nāskaxō anā ato yoini: "Iskaratīa na niyoafo afe keskarafoimāki ē mato yoinō mā tāpinō. Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyairofō keska tsoa kaxesharayamaino ato yoitirofo iskafakakī: ¹⁷ 'Nō nōko xāiti maneaino akka mā mairamisma. Askatari shināmitsayanā nō fanāikaino mā oiamisma,' ixō ato yoitirofo. Akka māri nāskariai mā tsoaki inimamisma. ¹⁸⁻¹⁹ Nāskafakīri Juan yafi ea mā mekafai. Juankai pikī finapaimisma nā ōiai pishta pimis, askatari fimi ene pae pishta ayamisma. Nāskakē aōnoa mā yoia iskafakī: 'Nā Juan niafaka yōshi chakaya,' mā famis. Akka ē yorakōi ē Niospa Fakekōi piyanā ē ayasharamis. Akka mā ea iskafakī yoimis: 'Jesús ichapakōi piimis, askatari pae ayamis,' mā ea famis. 'Nāskax yora chakafō fe rafemis, a romanō xanīfo kori fixomisfo ferī rafemis,' mā ea famis. Akka ē shara imis ea Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo," ixō Jesús ato yoini.

*Pexe rasi anoxō Jesús nikakaspanifo
(Lc. 10.13-15)*

²⁰⁻²¹ Askata anori ato yoita Jesús nā peXe rasi anoafo ato yōani iskafakī: “Ooa, Corazin anoafāfe Betsaida anoafo fe, mā omiskōi finakōixii. Akka Tiro anoxō Sidón anoxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘Ooa, nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo. ²² Akka Niospa Tiro anoafo yafi Sidón anoafori ato omiskōimafiakī ato omiskōimasharaima, akka matoroko omiskōimaki finakōixii. ²³ Akka, ζnō Capernaúm anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii. Akka yōra atiroma keskara afara shara ē mato ispfiano mātō chaka mā kai xateama. Akka nā ē mato ōimana keskara Sodoma anoafo ē ato ōimamiskē āto chaka xatekeranafo. Nāskakē keyokeranafoma. Askatari āto pexefā rasi keyokeranama. ²⁴ Ē mato yoinō. Afetiara Epa Niospa nā chanūmara faafoma ato omiskōimani. Nā Sodoma ano ipaonifo omiskōixikani. Akka māfi omiskōi finakōixii,” ixō Jesús ato yoini.

*“Ekeki feKāfe ē mato shināmasharanō,” ixō Jesús ato yoini
(Lc. 10.21-22)*

²⁵ Ato askafata Jesús Apa kifini iskafakī: “Epa, ē mia aicho fai. Keyokōi nai mēranoafoya nono mai anoafo mī āto Ifo. Mī sharafinakōi. Akka atirifāfe kirika kene tāpifikaxō mia Ifofakaxoma. Iskafakī shināmisfo: ‘Tsoa fetsakai noko keskarama. Nō tāpikōia,’ ixō shināmisfo. Akka nāfo mī meka mī ato tāpimanima. Akka nā kirika kene tāpikaxoma, mia Ifofaifono nāfo mī meka shara mī ato tāpimani, ²⁶ nā mī fichipaiyai keskafakī,” ixō Jesús yoini.

²⁷ Askata anā Jesús ato yoini iskafakī: “Epa Niospa a tāpia keskara eari keyokōi tāpimani, ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifikā tsōa ēfe Epa tāpiama, akka eres fisti ē tāpikōia. Akka nā fetsafari ē ato tāpimanaino nāfāferi Epa Nios tāpitiro. ²⁸ Akka mā shināchakakōikī ea kifikāfe. Nāskaxō mā ea chanūmara fasharayanā mā ea nikasharaito a mato feKaxefai ē mato potaxotiro anā mā shināchakayamanō. ²⁹ Akka ea shināikōikī eōxō mā tāpisharakōitiro. Ē mato noikī fenāmāshta ē mato yonmamis tenemasharayanā. Nāskaxō mā anā shināchakatiro. ³⁰ Akka a ē mato amapaiyai keskara anā feKaxma. Nāskakē anā mātō ōiti feKaxtetiro,” Jesús ato fani.

12

*Nā judeofāfe pena tenetiā Jesúsxō tāpimisfāfe aros keskara metesfenifo
(Mr. 2.23-28; Lc. 6.1-5)*

¹ Askata judeofāfe āto pena tenetiā Jesús aōxō tāpimisfo fe tarepa kani. Aōxō tāpimisfāfe fonāikāi aros keskara meteskaxō pii fonifo. ² Fariseofāfe ōikakī Jesús yoinifo: “Ōipo, Jesús. Iskaratīa nōko pena teneti. Akka Moisés noko yoini na pena tenetiā tsōa pishta yonotiro. Akka mī inafāfe yonokani na aros keskara meteskakī,” ixō yoinifo.

³ Ato askafaifono Jesús ato kemani: “Akka, ζa nōko xini Davidōnoa kirika kenenifo keskara mā ōimismē David afaa afeska fanimē āfe inafo feta fonāikōikī? ⁴ Nāskaxō Nios kifiti pexefā mēra ikikaixō a mēranoa pāa ato pikīni fonāikōikī ano afaayamano. Akka nā pāa nā judeofo ato Nios kifixomisfonā ini. Nāskakē fetsafāfe nā pāa tsōa pitiroma ini. Nānori Niospa Moisés yoifinino akka fonāikōikī David pini a afe rafeafo feta. ⁵ Akka, ζa Moisés keneni keskarari mā tāpimamē? Iskafakī yoini: ‘Nios kifiti pexefā mēra a ato Nios kifixomisfāfe yonotirofo nā pena tenetiā. Nāskakē afaa chakafakanima,’ ixō Moisés keneni. ⁶ Nios kifiti pexefā sharafiano akka ē na pexefā finōkōia. ⁷⁻⁸ Epa Niospa shināmanaino Niospa meka yoimisto Oseas kirika keneni iskafakī: ‘Mā yoināfo inafo retexō ea ināxikī, mā koofamis ea shināki nā shara. Askafiano fetsafo noikī, mā ato sharafaxōaito ē ōimis nā sharafinakōia,’ ixō kirika keneni Niospa shināmanaino. Niospa noko yoimis keskara mā tāpisharaxō, mā ato yoikī chakafakeranama. Nāskakē ē mato yoi iskafakī, ēfe Epa Niospa ea nāmā nīchini xanīfofinakōi ē inō. Nāskakē ē yoitiro afaa nō atiomakī pena tenetiā. Ē mato yoi na ēfe inafāfe akaifo keskara shara,” ixō ato yoini.

*Feronāfake mēke yōshia Jesús sharafani
(Mr. 3.1-6; Lc. 6.6-11)*

⁹ Nāskata Jesús nānoax kaax judeofāfe āto ichanāti peXe mēra ikitoshini. ¹⁰ Nāno feronāfake āfe mēke yōshia ini. Nāskakē fariseofāfe Jesús yōkanifo afara chakafaito yōaxikakī. Iskafakī yōkanifo: “Maestro, pena tenetiā, ζnō yora sharafatiromē?” ixō yōkanifo.

¹¹ Askafaifono Jesús ato kemani iskafakī: “Mā ovejayaxō mātō oveja kini mēra pakeano, ζmā pena tenetiā mā ifirisafatiromamē?” ato fani. ¹² “Akka yorafo sharafinakōiafo, oveja

keskarafoma. Nāskakē yorafo nō shināki pena tenetiā nō ato sharafatiro. Nāskaxō nō afaa chakafaima. Na pena tenetiā yorafo nō sharafaki Epa Niospa ōia shara,” ixō Jesús ato yoini.

¹³ Nāskata a feronāfake mēke yōshiya Jesús yoini iskafaki: “Mēshafe,” faino, nā feronāfake mēke yōshiya mēshatanaino āfe mēke sharatani. Nā takai fetsa keskara shara ini. ¹⁴ Nāskata fariseofo mā tsekekanax yoinānifo: “¿Afesaxō nō Jesús ato achimatiromē retenōfo?” ikanax yoinānifo.

Epa Niospa shināmanaino Isaías keneni Jesúsnoa a inōpokoai yoiki

¹⁵ Jesús nānoax kani mā tāpiax retapaiyafono. Nāskakē anoax kaino yorafā rasichi chīfafainifo. Akka a isinī ikaifo Jesús ato sharafapani. ¹⁶ Akka ato sharafaxō ato yoini: “Ē Niospa Fakeki tsoa yoyimakāfe,” ato fani. ¹⁷ Nāskarakōi Isaías kirika keneni Niospa shināmanaino Jesúsnoa. ¹⁸ Iskafaki keneni:

Ōikapo. Nakīa ea yonoxomis ē katonī. Ē aō noikōi. Ē akiki inimakōi. Ēfe Yōshi Shara ē afe rafemamis. Nā maifotio ano ikafāfe āfe meka nikasharaifono ē āto chaka soaxotiro efe yora inōfo. ¹⁹ Nakai yora fetsafo fe feratenāxīma. Meka mitsisipato ato yoima. ²⁰ Akka tafa kerexma ē xatexīma. Askatari chii ketesharayamaito ē nokafaxīma. Askatamaroko ē ketefaxii. Nāskarifikā yorafāfe ēfe meka nikapaiifikāki nikasharayamaifono ē ato potaima. Ato potatamaroko ē ato axosharai ea Ifo sharafanōfo. ²¹ Nāskakē keyokōi maitio ano ikafāfe yoixikani iskafakakī: “Nā fistichi noko ifitiro nō aōnoax Epa Nios fe nīpaxanō,” ixō yoixikani.

Nāskara Isaías yoiki kirikaki keneni. Nāskarakōi nō ōi Isaías keneni.

Yora fetsafāfe, “Jesús niafakaxō ato sharafaira,” fanifo

(Mr. 3.20-30; Lc. 11.14-23; 12.10)

²² Askata Jesūsiki feronāfake fēxo efenifo. Askatari mekamisma ini. A mēra niafaka chaka naneano Jesús sharafanō akiki efenifo. Nāskakē Jesús a fēxo ōimasharani, askatari mekamasharani anā mekanō. ²³ Askafaito ōikani yoinānifo: “iKeel! Ōikapo. Jesús afama mīshti shara fatiro. Akka, ¿namē David āfe fena nā Epa Niospa katonī, nāmē na nō manai?” ikax yoinānifo.

²⁴ Askafaiifāfe nikakaxō fariseofāfe yoinifo: “Maa. Natokai Epa Niosxō niafaka chaka potatiro. Akka nā niafaka chakafāfe āto xanifo nā Beelzebūxō ato makinoa niafaka chaka potai,” ikax yoinānifo.

²⁵ Askafaiifono Jesús tāpini a shināifo keskara. Nāskaxō ato yoini: “Yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenāitirofo. ²⁶ Nāskarifiaki Satanās āfe niafaka chakafo potaxō anā afaa afeska fatiroma. ²⁷ Akka mā ea iskafai: ‘Nato niafaka xanīfoōxō niafaka chakafo ato makinoa potai,’ mā ea fai. Akka ea yoikapo, ¿tōaōxō mātō inafāfe niafaka chakafo potafomaki? Akka, ‘Niosxō nōko inafāfe niafaka chakafo potafo,’ ixō mā ea yoitiro. Nāskakē mā tāpitiro ēri Niosxō niafaka chakafo potaino. ²⁸ Akka ē niafaka chakafo Niospa Yōshi Sharaōxō ato makinoa potaino mā tāpitiro a Niospa matoki nīchiai mā nokoano. Nāskakē yorafāfe ea Ifo sharafaxii.

²⁹ “Ē anā mato yoinō, nikasharakāfe. Akka, ¿afesaxō yorafāfe feronāfake mitsisipakōi āfe pexe kene mēraoā āfe rapatifo fiatirofomē? Akka rapati fiakakī achixō metexkere akaxō āfe rapati fiatirofo. Askafakaxō fiatironokai ato afeska fatiroma.

³⁰ “Akka fetsa efe rafepaikima ea nikakaspitiro. Akka fētsa ēfe meka nikakaspai ea noikaspai. Nāskakē fetsafāferi ea Ifoifono fichikaspakani. Askakimaroko emakinoa ato paxkanāfapai Epa Nios Ifofayamanōfo.

³¹ “Nāskakē ē mato yoi. Fētsa afara fetsafo chakafakē Niospa āfe chaka soaxotiro. Askatari fētsa afara chaka yoiaino Niospa āfe chaka soaxotiro. Akka ēfe Yōshi Shara chakafakī mekafaito, Niospa āfe chaka soaxonakama. Āto chaka neepakenaka. ³² Askatari fētsa Niospa Fake yorakōi chakafaino Epa Niospa āfe chaka soaxotiro. Akka fētsa Epa Niospa Yōshi Shara mekafakī chakafaino, Epa Niospa āfe chaka soaxonakama. Āto chaka neepakenaka. Nā naitiari āfe chaka aō neepakenaka,” ixō Jesús ato yoini.

Ifi āfe fimioxō nō tāpitiro afe keskaramāki

(Lc. 6.43-45)

³³ Anā Jesús ato yoini iskafaki: “Akka shinākapo. Ifi shara āfe fimi sharakōi itiro. Akka ifi chaka āfe fimiri chaka itiro. Ififo āfe fimioxō nō tāpitiro afe keskaramāki. ³⁴ Akka māfi keyokōi chakakōi, nā rono pae keskarakōi mā. Nāskaxō meka shara mā yoitiro mā mā māi chakakōiō. Nā mātō shināmā mā shināi keskafakī chakai mā mekamis. ³⁵ Nāskarifikā yora sharapa meka shara yoitiro, āfe ōiti mēraxomāi shara shināki. Akka yora chakapari meka chaka yoitiro, āfe ōiti mēraxomāi chaka shināki. Nāskaxō nā āfe ōiti mēraxō shināi

keskara yoitiro. ³⁶ Akka ě mato yoinō. Fatora penata keyokōi Niospa ato ichanāfai tãpikōixō ato yoixiki fatofãfe chanĩmara faafomãkĩ, akka fatofãferi nikakaspakanimãkĩ. Nãskatari nã shinãtama chaka yoimisfori Niospa ato shinãmaxii kiki. ³⁷ Akka mã mãto mekaoxō mã Nios ispatiro mã isharamãkĩ, askayamai mã isharamamãkĩ. Nãskax ishara mã afe nipanaka. Askatari mã meka chaka yoimisno nã omiskōipakenakafo mēra mato potaxii. Mãto mekapa mato omiskōimaxii, ixō Jesús ato yoini.

Yora chakafãfe, “Tsōa atiroma keskara noko ispafe nõ mia chanĩmara fanō,” ixō yōkanifo (Mr. 8.12; Lc. 11.29-32)

³⁸ Askata fariseofo feta a Moisés yoikĩ kirika kenei keskara ato tãpimamisfãfe Jesús iskafanifo: “Maestro, nõ õipai tsōa atiroma keskara mĩ faito,” ixō yoinifo.

³⁹ Askafaifono Jesús ato kemani: “Mãfi afara chaka shinãyanã mã Nios kachikiri famis. Nãskakē, ‘A tsōa atiroma keskara noko ispafe,’ mã ea fai. Akka nã Jonás ini keskara nã fisti mã õixii. ⁴⁰ Akka nã Jonás ini keskai ěri askai. Jonás fafĩnōa xaki mēra tres nia ini. Nãskarifiã ěri mai mēra maiax tres nia ixii. ⁴¹ Akka fatora penata nã Niospa yorafo keyokōi ichanãfaitia ato yoixii fatofãfe chanĩmara faafomãkĩ, akka fatofãferi nikakaspakanimãkai. Nãskakē nã Nĩnive anoafãfe mato yoixikani iskafakãkĩ: ‘Jonáspa noko Niospa meka yoiaito nikaxō nõko chaka xatexō nõ Niospa meka chanĩmara fani. Akka mã Niospa Fake nikafikĩ mãto chaka mã xatemisma,’ ixō mato yoixikani. Akka ě Jonás finõfekēkai mã ea nikapaimisma. ⁴² Askatari okirinoax nã nafa kēro ãto xanĩfo ipaoni nõko xanĩfo Salomón õipai chai inoaxkōi oni. Afara sharafo tãpikōia nikaferani oni. ‘Afara shara ea tãpimanõ,’ ikax akiki oni. Akka ě nã Salomón ě finõfekē, mãkai ea nikapaima. Akka keyokōi mã mai keyoano Niospa noko yoixii fatofomãkĩ sharafo fatoforimãkĩ nikayospafo. Askatari nã kēromã mato yoixii iskafakĩ: ‘Mãfi chakakõifokĩ. ¿Afeskakĩ mã Niospa Fake nikakaspamismē? Mãto xanĩfo Salomón tãpikōia keskafakĩ nãato keyokōi tãpikõifiano. Akka ě Salomón nikaikai chaikōi ě kani. Akka mãkai nã Jesús mato fe ifiakē mã nikakaspamis nãato tãpikõifekē,’ ixō mato yoixii,” ixō Jesús ato yoini.

Anã niafaka chaka yoraki nanetiro (Lc. 11.24-26)

⁴³⁻⁴⁴ Anã Jesús ato yoini iskafakĩ: “Ē mato yoinō meka fetsafaxō. Niafaka chaka feronãfaka makinoax tsekeax kafãsatiro tsōa istoma ano fenafofãfofãitiro ano tsaoxō tenepaikĩ. Akka tsoa fichixoma niafaka chakata anã shinãtiro: ‘A ě anoax tsekeita ano ě anã kapai,’ itiro. Mã nokoxō õia nã feronãfaka nã pexe xaka mãtsomea keskara shara ini. ⁴⁵ Nãskakē nã niafaka afe niafaka siete efetiro nã chaka finakõiafo, nãfo nã feronãfaka mēra iki fetsenõ. Nãskakē nã feronãfaka chaka finakõi itiro a iypaoni keskarama,” ixō Jesús ato yoini.

Jesús õifekani ãfe afanõ ãfe extonõ fenifo (Mr. 3.31-35; Lc. 8.19-21)

⁴⁶ Jesús yorafo yoiaino ãfe afanõ ãfe extonõ akiki fenifo afe mekapaikani, pexe emãiti nikaxō mananifo. ⁴⁷ Fẽtsa yoini: “Mĩ efanõ mã extonõ emãiti niafo mefe mekapaikani,” fani. ⁴⁸ Askafaino kemakĩ: “¿Fatomē ěfe efa keskarrafo ěfe exto keskararofi?” ato fani.

⁴⁹ Nãskata a aõxõ tãpimisfo yoini mētoxõ: “Nafõ ěfe efafo keskarrafo, ěfe exto keskararofi ě ato õi. ⁵⁰ Akka nã ěfe Epa nai mēra ikato amapaiyai keskara akaifo nãfofi ěfe extofo ěfe chikofori ěfe efafori,” ixō Jesús ato yoini.

13

Jesús ato yoini meka fetsafaxõ fimi exe saamisnoa (Mr. 4.1-9; Lc. 8.4-8)

¹ Askata na pena fisti Jesús pexe mēranoax tsekekaini kaax, ãamãfã kesemē tsaoni. ² Nãno tsaono yorafã rasi akiki fenifo, ãfe meka nikai fekani. Akka Jesús kanõanãfã xaki mēra tsaoxõ ato yoiaino nikanifo, ãamãfã kesemēxõ. ³ Askata meka fetsafaxõ afama mĩshti Jesús ato yoini iskafakĩ: “Feronãfaka fistichi fimi exe saafoni ãfe nõxati mēra kēchoxõ fokĩ. ⁴ Fimi exe safoikaino ranãri fai nẽxpakãa pakeaino a kachikirixori peyafãfe pini. ⁵ Nãskata fimi exe ranãri makexfoki pakei fetseni mai shara anoma. Nãskakē samamakõi fimi exe foaipaini. ⁶ Akka mã foaipaiyaito xinĩ namani, yosipanã, ãfe tapokairoko mã mēra kasharakē. Foaikax, samama nani xinĩ tsasifaano. ⁷ Ranãri fimi exefo moxafo mēra pakei fetseni. Moxafo mēranoax moxafoya foaipaiyaito moxafãfe namani. ⁸ Akka fimi exe ranãri mai shara ano pakeni. Nãskax foaisharax fimi ichapayakõi ini. Fetsa cien fimiya ini, fetsari sesenta fimiya ini, fetsari treinta fimiya ini. ⁹ Mã pachoyakĩ ea nikasharakõikãfe,” ato fani.

Meka fetsafaxõ yorafo yoixõ a aõxõ tãpimisfo xafakãkõi ato yoini (Mr. 4.10-12; Lc. 8.9-10)

¹⁰ Nāskata Jesúski a aōxō tāpimisfo fēkaxō yōkanifo: “¿Afeskakī meka fetsafaxō mī yorafa yoimē? Meka xafakīa mī ato yoimisma,” ixō yōkanifo.

¹¹ Askafaiifāfe Jesús ato kemani: “Akka afeskaxō Epa Niospa afe yorafa ikināmākī ē mato fisti tāpimanō. ¹² Akka nā Niospa meka nikasharakōiaifo āfe Yōshi Shara āto mēra naneano nāato ato tāpimasharakōixii kiki. Nāskaxō mā tāpikī finasharakōi. Akka nā nikasharayamaifāfe tāpisharakanamax nāfo fenokōixikani. ¹³ Nāskakē meka fetsafaxō ē ato yoi. Akka ōifikakī tāpikanima. Askatari nikafikakī nikasharakanima. ¹⁴ Nānori a Niospa meka yoimisto Isaiās kirika keneni a inōpokoi yoikī. Iskafakī yoini:

Nikataifafāfikakī nikakanima. Ōifikakī tāpikanima. ¹⁵ Nā yorafa āto mapo kerekkōifo. Askatari āto pachō fēstokōifo. Askatari āto fero fepoa keskarāfo. Nāskaxō ēfe meka chanīmara fakanima. Nāskakē ē āto chaka soaxotiroma, ixō Niospa yoini keskara Isaiās kirika keneni.

¹⁶ “Akka mākai ato keskarama. Ē mato yoia keskara mā nikasharamis. Ē mato tāpimanai keskara mā tāpisharakōia. ¹⁷ Shinākapo. Mā ōimis keskara a Niospa meka ato yoimisfo feta a Nios Ifofamis fetsafāferi ōipaifakakī ōipaonifoma. A ē mato yoimis keskara nikasharapaifakakī nikapaonifoma,” ixō Jesús ato yoini.

*Jesús meka fetsafaxō fimi exe saamisnoa ato yoini ato tāpimasharakōixiki
(Mr. 4.13-20; Lc. 8.11-15)*

¹⁸ Anā Jesús ato yoini iskafakī: “Nā ē mato meka fetsafaxō yoiai nā fimi exe saamisfoōna ē mato yoikai. Nikasharakāfe tāpīxikakī. ¹⁹ Atiri fimi exe fai kesemē pakeaino peyafāfe pinifo. Nāskafakīri fētsa Nios Xanifoōna nikafikī Niospa meka nikasharayamaito, nā Satanās chakata Niospa meka fiatiro. ²⁰⁻²¹ Akka atiri fimi exe makex mēra pakeax, foaipafiaito xinī namanī, āfe tapo mai mēra likikēma. Nāskafakīri fētsa taefakī Niospa meka nikai inimayotiro. Akka afara chaka nokoaino anā inimatiroma, anā Nios Ifofayamaino Niospa meka anā āfe shinā mēra nanetiroma. ²² Akka atiri fimi exe moxāfo mēranoax foaikax yosinima. Nāskari fakī fētsa Niospa meka nikasharamax, nāskaxō afara fetsa shinākī, āfe shinā mēraxō shināchakakōitiro. Nāskaxō kori ichapakōi noikī, ‘Ē kori ichapayax ē inimatiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino, afaa Niospa axotiroma. ²³ Akka atiri fimi exe mai shara anoax foaikax mā yosiax fimi ichapaya ini, āfe fimi cien ini, fetsari āfe fimi sesenta ini, fetsari āfe fimi treinta ini. Nāskafakīri fētsa Niospa meka nikakōikī Niospa meka nanexō nikasharakōitiro. Akka fētsa Niospa meka nikakōisharakī nā fimi exe cien keskara itiro, fētsari nikasharakōi nā fimi exe sesenta keskara itiro, fētsari nikakōisharakī nā fimi exe treinta keskara itiro,” ixō Jesús ato yoini.

Meka fetsafaxō afara fetsa ato tāpimaxiki anā Jesús ato yoini

²⁴ Anā Jesús meka fetsafaxō afara fetsa ato tāpimaxii ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Ifokōi faafo afe keskaramākī ē mato anā yoinō. Nā yorafāfe Nios Ifokōi faafāfe fimi exe shara fana keskarāfo. ²⁵ Akka tare ifo āfe inafō fe oxano, a ato noikaspamis fakishi kaxō a fana shara ano fana chakafanafaini kani. ²⁶ Akka nā fana shara foaikī pei sharayakōi foaini. Askatari fana chakari foaini. ²⁷ Nāskata a tare ifokī āfe inafō fokaxō yoinifo: ‘Ifo, fana shara mī tarepa mī fanafiano, akka, ¿fanīax nā fana chaka foaikamē?’ ixō yōkanifo.

²⁸ “Askafaifono nā tare ifāfe ato yoini: ‘Nā noko noikaspamisfāfe fanafo rakikīa,’ ato faito āfe inafāfe yoinifo: ‘¿Na fana chaka nō tsekatiromē?’ fanifo. ²⁹ Akka a tare ifāfe ato yoini iskafakī: ‘Maa, fana chaka tsekapaikī fana sharari mā tsekatiro. ³⁰ Nāskanōki. Nā fana sharafoya yosiyonō nā fana shara āfe fimi topiaifotiā, ē mato yoixinō iskafakī: ‘Na fana chakafo xatekāfe. Xatexō mextexō koaxikakī. Nāskata nā fana sharafo ēfe tapas mēra ea faxoxikakī.’ ixō a tare ifāfe ato yoitiro keskafakī, nāskarīfakī Epa Niospa mato paxkanīfaxii ea Ifofafo ē ato ifixii. Akka ea Ifofayamafo chiifā mēra ē ato nichixii,” Jesús ato fani.

*Mostaza exeōnao yoikī meka fetsafaxō Jesús ato tāpimani
(Mr. 4.30-32; Lc. 13.18-19)*

³¹⁻³² Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko ikinā ē mato yoinō. Nā fimi exe mostaza yōra āfe tarepa fanatiro. Akka nā mostaza exe pishtakōi. Akka mā yosiax efapakōi itiro fana fetsafo keskarama. Nāskakē peyafāfe āfe teshpāfo ano naa faxō too fatiro. Nāskari fakī taefakī pishta mā Epa Nios Ifofayotiro. Nāskaxō fisti rasichi mā Ifofayotiro. Akka chipo ichapakōichi atirofo Nios Ifofakakī,” ixō ato yoini.

*Meka fetsafaxō pāa faraxika keskaraōnao Jesús ato yoini
(Lc. 13.20-21)*

³³ Askata anā Jesús meka fetsafaxō ato yoini iskafakī: “Afe keskaramāki Nios xanīfāfe noko İkinā ē mato yoinō. Nā kēromā pāa fakī levduraya arinā osixō kamosakano faraxitiro keskara. Nāskarifiakī nō ōitiroma. Yorafāfe Niospa meka āto shinā mēra naneano nō ōiyamafiaino āto ōiti fetsafakanax Nios keskara shara itirofo,” ixō Jesús ato yoini.

Afama mīshtikiri yoikī meka fetsafaxō Jesús ato yoipaoni
(Mr. 4.33-34)

³⁴ Askatari Jesús nā yorafā rasi yoini meka fetsafaxō afara fetsa ato tāpimaxii. Akka meka fetsafaxō Jesús mēxotaima ato yoipaoni. ³⁵ Akka nā Niospa meka yoimisto a inōpokoai yoikī kirika kenekī keskakōifakī Jesús nāskakōi fani. Iskafakī keneni Jesúsnoa yoikī:

È ato meka fetsafaxō yoixii. Niospa keyokōi onifanitīa nāskatari a nikamisfoma ē ato tāpimaxii, ixō Jesúsnoa yoikī keneni.

Jesús nā fana chakafoōnoa ato tāpimani

³⁶ Askata yorafā rasi makinoax Jesús pexe mēra ikikaini. Mā pexe mēra kaano, aōxō tāpimisfāfe anā yōkanifo ato yoisharanō. “Ifo, meka fetsafaxō mī noko yoia nā fana chakaōnoa nō tāpiama. Anā noko xafakīa yoife nō tāpisharanō,” ixō yoinifo.

³⁷ Askafaifono Jesús ato kemani: “A fana shara fanamisfo keskara ēkīa,” ato fani. ³⁸ “Akka a tare ē yoiai mā tāpitiro nā maitio ē yoi. Akka nā fimi exe shara ē yoiai nā Nios Ifofamisfo ē yoi. Akka nā fana chakafo ē yoiai nā Satanás ifofamisfo ē yoi. ³⁹ Akka nā noko noikaspamisto fimi chakafana ē yoiai, a Satanás ē yoi. Akka nā fimi exe topiaifo ē yoiaito mā nikai, mā mai keyoaino ē yoi. Akka a fimi exe topimisfo ē yoiaito mā nikai, nā Niospa āfe ājirifo ē yoi. ⁴⁰ Nā fana chakafo xatekaxō chīi koatirofo keskai, nāskarifiakikani nā omiskōiai nokoaitīa omiskōixikani mā mai keyoaino. ⁴¹⁻⁴² Nāskarifikā ēfe ājirifo ē nīchixii a afara ato chakafamamisfoya a afara chaka tāpimisfori ato chīi xoisai mēra ato potanōfo anoax oiayanā omiskōipakeanofo. ⁴³ Akka nā Niospa meka nikasharakōiafo, Epa Nios ika anoax nā xini chaxai keskara shara ixikani. Mā pachoyakī ēfe meka nikasharakī māto shinā mēra nanekāfe,” ato fani.

Afara sharakōi oneaōnoa yoikī meka fetsafaxō Jesús ato tāpimani

⁴⁴ Anā Jesús ato yoini iskafakī: “È mato yoinō nā Nios xanīfokōi ika anoax afe keskara ixikanimākai. Feronāfāke tare ano yonokī orokī afara sharafinakōia fichixō nā fichia ano anā oneni. Nāskaxō āfe afama mīshti keyokōi ato minixō kori fixō nā mai fini nā afara sharakōi āfenā inō. Nāskarifiakī mā Nios Ifokōifapaikī mā fichikōipaitiro,” ixō Jesús ato yoini.

Maxex oxo fakkai fakkaisai keskaraōnoa āfe ane perlaōnoa, meka fetsafaxō Jesús ato tāpimani

⁴⁵⁻⁴⁶ Anā Jesús ato yoini iskafakī: “È mato yoinō nā Nios xanīfokōi ika anoax afe keskara ixikanimākai. Yora fistichi fenafōfāfōfāimis perla ato ināxii. Akka nā perla sharafinakōia mā fichixō āfe afama mīshti keyokōi ato minixō kori fixō nā mai fini nā afara sharakōi fini. Nāskarifiakī nō Epa Nios Ifofasharapaikī nōko afama mīshtifo nō shināmakitiro Epa Niosmāi sharafinakōikē,” ixō Jesús ato yoini.

Anā meka fetsafaxō riniōnoa Jesús ato tāpimani

⁴⁷ Anā Jesús ato yoini iskafakī: “È mato yoinō nā Nios xanīfokōi ika anoax afe keskara ixikanimākai. Nā rini faka mēra potexō foe fetsa fetsatapofo fitirofo keskara ixikani. ⁴⁸ Akka nā rini mā foe fospikōiano, nā rinipa fimisfāfe faka ketokonō rini ninifotirofo. Faka ketokonō tsoaxō fofo katotirofo. Nā sharafo fēta mēra nanekaxō nā chakafo potatirofo. ⁴⁹ Nāskarifiakī nōko mai keyoaino. Nāskatari Niospa āfe ājirifāfe noko paxkanā faxii nā chakafōya nā sharafo. ⁵⁰ Akka nā chakafo nā chīi xoisai mēra ato potaxii. Nānoax oiayanā omiskōipakenakafo,” ato fani.

Afara fena sharakōi yafi afara shara xiniōnoa Jesús ato yoini

⁵¹ Nāskaxō Jesús ato yōkani: “İNā ē mato yoiai keskara mā mā nikaimē?” ato faito, “Èje, a mī noko yoiai nō nikai,” faifono anā Jesús ato yoini: ⁵² “Akka pexe ifāfe pexe xaki mēra āfe afara shara onekatsaxakī nā fena yafi nā xini ato ispatiro. Nāskarifiakī a Moisés yoikī kirika keneni keskara ato tāpimamisfāfe mā Nios Ifokōi faifono, Nios xanīfoōnoa ato yoitirofo. Akka meka xiniōxō meka fena sharari mā tāpitiro,” ato fani.

Jesús Nazarete anoaxō nikakaspanifo
(Mr. 6.1-6; Lc. 4.16-30)

⁵³ Askata Jesús mā meka fetsafaxō ato yoikī keyoax nānoax kani. ⁵⁴ Mā kaax āfe mai anokōi nokoni. A judeofāfe āto ichanāti pexe mēraxō ato yoikī taefani ano. Nānoxō yorafāfe iskafanifo: “İkee, nikakapo! İfanīxō iskara tāpixō yoimē askatari nā tsōa atiroma keskara

fai? ¿Fanixō iskara tāpiamē?” fanifo. ⁵⁵ “Nā mīsa famisto fakeki. Āfe afa María. Āfe extofo mā nō ōimis. Santiago ikaino, José ikaino, Simón ikaino, Judas ikaino, nāfo āfe extofo,” fanifo. ⁵⁶ “Āfe poifori nofe imisfo. Nōfi Jesús tāpia. Nākai afama. Akka, ¿afeskaxō afama mīshti fatiromē?” ikax yoinānifo.

⁵⁷ Nāskakē nikakaspanifo. Akka Jesús ato yoini iskafakī: “Keyokōi nā maitio anoxō Niospa meka yoisim nikatirofo. Akka nā āfe maikōi anoxō nikapaitirofoma. Nāskakē mā ea nikakaspanis,” ixō ato yoini.

⁵⁸ Nāskakē anoxō afama mīshti ato ōimanima tsōakairoko nikaito.

14

Juan Maotista nani

(Mr. 6.14-29; Lc. 9.7-9)

¹⁻² Nāskatari Galilea anoa nā xanīfo Herodes ini. A Jesús afama mīshti faito nikaxō āfe inafō yoini iskafakī: “Akka nā Juan Maotista ē ato textemayamea mā anā otoa. Mā otoxō tsōa atiroma keskara afama mīshtifo fai,” ixō shināni.

³⁻⁴ Akka Herodes Juan retyoamano Juan yōani iskafakī: “Xanīfo Herodes, mī exto Felipe mī āfe āfi Herodías mī fia. Askara chakakōi,” nāskafani. Nāskakē Herodes akiki ōitifishkini. Nāskaxō āfe sorarofo achimani karaxa mēra ikimaxii.

⁵ Akka Herodes Juan retepaifi yorafoki meseni yorafāfemāi chanimara faifono Juanmāi Niospa meka ato yoisiskē. Nāskakē Herodes shināni iskafakī: “Ē Juan retokē eari yorafāfe retetirofo,” ixō shināni. ⁶⁻⁷ Akka Herodes āfe cumpleaño ikaino, yorafo ato ichanāfani. Ichanāfono nā Herodías fake xomaya ares mairani yorafāfe ferotaifi ato inimamai. Nāskakē Herodes yoiikī iskafani nā xomaya yorafāfe ferotaifi, “Mī afara fichipaiyai keskara ea yōkafē ē mia inānō,” ixō yoini. ⁸ Nāskakē nā kēro xomayato āfe afa ano kaxō yōkani iskafakī: “¿Ē afara Herodes yōkatiromē?” faito āfa yoini iskafakī: “Juan Maotista āfe mapo textexō ea sapaki rataxō ea fexōfe fafe,” fani.

⁹ Askafaito nikai xanīfo Herodes shināmitsani. Shināmitsayanā āfe shinā mēraxō shināni iskafakī: “¡Ooa! Ē Juan ato textemapaima. Akka yorafāfe nikaifono mē na kēro xomaya yoi. Nāskakē ē Juan ato textemapaiyamafiki ē ato textemani,” ixō shināni. ¹⁰ Nāskaxō xanīfāfe āfe sorarofo yoini: “Juan textexō āfe mapo ea fixotakāfe,” ixō yoini. ¹¹ Ato askafaino fōkaxō sorarofāfe Juan textekaxō āfe mapo sapaki rataxō fenifo. Fēkaxō nā kēro xomaya inānifo. Nāatori āfe afa ināni.

¹² Nāskakē Juan inafō fēkaxō āfe yora fōkaxō maifanifo. Mā askafakaxō Jesúski nokokaxō yoinifo.

Jesús cinco mil feronāfakefo ato pimani

(Mr. 6.30-44; Lc. 9.10-17; Jn. 6.1-14)

¹³ Askata Herodes sorarofo Juan textemana nikai Jesús ares fisti kani kanōanāfānē tsōa istoma ano. Mā Jesús ato makinoax kaa nikakani pexe rasi anoax yorafā rasi fāi fonifo. ¹⁴ Mā kanōanāfā makinoax fotoxō akiki yorafā rasi foaito fichini. Ato ōikī ato shinākōini. Nāskaxō a isini ikaifo ato sharafapani.

¹⁵ Mā yātapakeino aōxō tāpimisfo akiki nokokaxō yoinifo: “Mā yātapakei kiki nono afaamakī yorafo nīchife a piaifo fitanōfo pexe rasi anoafō,” ixō yoinifo.

¹⁶ Askafaifono Jesús ato kemani: “Maa. Fokanima kiki. Māroko ato pimakāfe,” ato faito, ¹⁷ kemanifo: “Nō nono cinco pāaya, askatari foe rafes,” fanifo.

¹⁸ Askafaifono Jesús ato yoini: “Ea fixotakāfe,” ato fani.

¹⁹ Nāskaxō yorafā rasi yoini fasi ano tsaonōfo. Askata foe rafe yafi cinco pāa tsomaxō nai foisinīfofā Apa Nios kifini iskafakī: “Aicho, Epa, mīōxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo. ²⁰ Nāskax pikanax māyakōinifo. Akka nā chetefaafō doce fēta fospini. ²¹ Nā piaifo cinco mil feronāfakefos ini. Kērofāferi fakefo feta pinifo.

Jesús iamāfā femākīa kani

(Mr. 6.45-52; Jn. 6.16-21)

²² Mā cinco mil yorafo pimata Jesús aōxō tāpimisfo yoini iskafakī: “Kanōanāfānē nanekāfe, okiri iamāfā pokefaitaxikākī,” ixō ato yoini. Jesús kayoxoma yorafo nīchiaino aōxō tāpimisfo fonifo. ²³ Mā yorafo nīchita, māchi keya ari arese kani arixō Apa Nios kifikai. Mā fakishaino, ares fisti ano ini. ²⁴ Akka a aōxō tāpimisfo kanōanāfānē mā chai foafono, nēfefaino iamāfā poiikī ato katimafani. ²⁵ Akka mā penaino Jesús ia femākīa atokī kaito tsōa tāpinima. ²⁶ Nāskata tāpikanamax aōxō tāpimisfo Jesús iamāfā femākīa kaito fichikanax tai tai iyanā ratekōinifo, niafakara ikanax.

²⁷ Askaifono Jesús ato yoini: “Rateyamakāfe, ēki,” ato fani.

²⁸ Ato askafaino Pedro kemani: “Ifo, mīmākī eari kenafe ēri ĩamāfā femākīa kanō mia ari,” Pedro fani.

²⁹ “Ofe,” Jesús fani. Nāskakē Pedro kanōanāfā makinoax fotopakekafā ĩamāfā femākīa Jesús ari kani. ³⁰ Kapaifi nefeaifo ōi nefe kerexkōi mei mesekōini. Nāskakē ĩamāfā mēra ikipakekafakī fāsikōi kenani: “ĭfo, ea ifife!” fani.

³¹ Askaito Jesús koshikōi āfe mēke achixō yoini: “Mīkai ea chanīmara fasharama. ĩAfeskakī mā chanīmara faimamē?” ixō Jesús yoini.

³² Askata nā rafe kanōanāfā mēra naneinīfonaifono nefe nishpatani. ³³ Nāskakē nā kanōanāfā mēra naneafāfe Jesús nāmā ratokonō mai chachipakekofā yoinifo: “Chanīma, mīfi Niospa Fakeki,” ixō yoinifo.

Jesús Genesaret anoafo a isinī ikaifo ato sharafani
(Mr. 6.53-56)

³⁴ Akka ĩamāfā pokefaikani Genesaret mai ano nokonifo. ³⁵ Nāskata nā ano ikafāfe yorafāfe Jesús tāpirisafanifo. Nāskakē nā chai ikafori ato yoinifo akairi tāpinōfo. Nāskakē a isinī ikaifo Jesús efenifo. ³⁶ Nāskakē Jesús yōkanifo: “ĭNō mia tari kexa maikiri pishta ramākatirofō nō shaxaxiki?” fanifo. Nāskakē Jesús tari ramākanax sharai fetsenifo.

15

Jesús ato yoini afeskai yorafo chakafomakī
(Mr. 7.1-23)

¹ Askata fariseofo fe a Moisés yoikī kirika keneni keskara ato tāpimamiso Jerusalén anoax Jesúsiki fēkaxō yōkanifo: ² “ĭAfeskai na mīōxō tāpimiso a nōko xinifo ipaonifo keskakani-mamē? Akka a nōko xinifāfe yoinifo keskara tāpifikaxō pixikakī mechokomekeranafo,” ixō yoiaifāfe Jesús ato kemani:

³ “Akka, ĩafeskakī māri mātō xinifo ipaonifo keskara mā tanapaimē? Nāskaxō a Niospa yoini keskara mā nikatama nā mātō xinifāfe yoimiso keskara mā nikamis. ⁴ Akka Epa Niospa yoikī iskafani: ‘Mātō epa yafi mātō efa nikasharakāfe. Akka a āto apa yafi āto afa chakafaifo ato retemakāfe,’ ixō Niospa yoini. ⁵⁻⁶ Nānori Niospa yoifinikē māfi ato mēstekōi nofe yorafo mā ato tāpimamismaki. Akka mā ato yoimis iskafakī: ‘Mātō epa yafi mātō efa mā yoikī iskafatiro: ‘Epa, na kori ē mia inākerana. Nāskafixō mē kori keyoa ē Nios inākī. Nāskakē ē mia anā afaa inātiroma,’ ixō mā ato yoitiro. Nāskaxō mātō epafo mā shināmakīa keskara mā itiro,’ ixō mā ato yoimis parakī. Askafixō mā ato tāpimasharamisma. A kirikakī yoikī Niospa meka kenefifo anori mā yoimisma. Nā mātō xinifo ipaonifo keskara fisti mā tanamis. A Niospa yoini keskara mā akīma. ⁷ Māfi keparanāmiski. Matoōnoa yoikī Niospa meka yoimisto Isaiās kirika keneni chanīmakōi iskafakī:

⁸ Nā yorafāfe eōnoa yoisharafikakī āto shinā mēraxō ea shinākōiafoma. ⁹ Āa kaxpa ichanākanax fanāimiso ea kifīyanā. A ato tāpimanaifo yorafāfe shinā keskarafo. Akka askarakai Niospa shināma, ixō Isaiās keneni, Niospa shināmanaino.”

¹⁰ Nāskata Jesús yorafo kenaxō ato yoini iskafakī: “Ea nikasharakōikāfe tāpisharakōixikakī ē mato yoinō. ¹¹ Na mā piaito choshta keskara mato imatiroma. Askatamaroko yorafāfe āto shinā mēraxō chaka shinākani, askatari chakai mekaifono choshta keskara Niospa ato ōi,” Jesús ato fani.

¹² Askata aōxō tāpimiso fōkaxō Jesús yōkanifo: “Ifo, ĭmī tāpimamē fariseofo ōitifishikani nā mī yoiaito nikakani?” ikaxō yoinifo.

¹³ Askafaifono Jesús ato kemani meka fetsafaxō: “Tare ifāfe afara chakafo fanatiroma. Askatamaroko a chaka foaikaino tsexaxō potatiro. Nāskarifikā ēfe Epa nā nai mēra ikato afarafo fanayamaxō, āfe tapo tsexaxō potaxii anā afaa inōma. ¹⁴ Akka fariseofo nikayamākafe. Nā fēxo keskarafoki. Akka fēxo afe fēxo iyopai xato mēra paketiro. Nāskarifikā nā fariseofāfe Niospa meka tāpikaxoma fetsafo tāpimatirofoma. Nāskakē ato fe Nios ari nokotirofoma,” ixō Jesús ato yoini.

¹⁵ Ato askafaito Pedro Jesús yoini: “A na mī yoia keskara meka fetsafaxō noko yoisharafe nō tāpisharanō,” fani.

¹⁶ Askafaito Jesús kemani: “ĭAfeskakī māri mā nikasharaimamē? ¹⁷ Akka nō afara piano nōko ato mēranoax payokomeano nō aya safatiro. Nāatokai mato chakana fatiroma. ¹⁸ Akka a mātō shināmā shināxō mā afara chaka yoiaino nāto mato chakana fatiro. ¹⁹ Akka yorafāfe afara chakafakakī āto shinā mēraxō chaka shinātirofo, ato retetirofo, askatari āto āfima chotatirofo, askatari kēro fetsa kaxefatirofo, askatari yometsetirofo, askatari chanītirofo, askatari ato ĩchatirofo. ²⁰ Akka mechokomexoma mā piaino Epa Niospa choshta keskara mato ōima. Akka yorafāfe āa shināxaxō afara chakafatirofo. Nāskakē Epa Niospa ato ōi choshta keskara,” ixō Jesús ato yoini.

*Xotofake judeoyamafixō Jesús chanīmara fakōini**(Mr. 7.24-30)*

²¹ Askata Jesús aōxō tāpimisfo fe kani nā pexe rasi Tiro fe Sidón chaimashta ano. ²² Askata kēro fisti Canaan mai ano ikatsaxakī judeo kaifoma Jesús ano kani. Kaxō fāsikōi yoikī kenani iskafakī: “Ifo, mī David fenaki, ea shināfe. Ēfe fake xotofakeshta niáfaka chakata omiskōimamiski,” ixō yoini.

²³ Askafaito nikafikī Jesús kemanima. Nāskakē āfe inafāfe fōkaxō yoinifo: “Ifo, na kēro yoife katanō. Nocho okī noko fekaxtefafei kiki. Fāsikōi fiisiki kiki,” fanifo.

²⁴ Askafafono Jesús ato yoini: “Ēfe Epa Niospa ea nīchini judeofos ano, nāfo oveja fenoa keskarafō. Akka yora fetsafō ano ea nīchinima,” ato askafani.

²⁵ Akka nā kēro Jesús nāmā ratokonō mai chachipakefōfāyanā iskafakī yoini: “Ifo, ēfe fake ea sharafaxope,” fanifi.

²⁶ Askafaino Jesús kemani meka fetsafaxō: “A fakefāfe piāi fiāxō nō paxta inā, askarakai sharama,” fanifi.

²⁷ Jesús askafaito nā kēromā kemani: “Ēje, Ifo. Akka paxtafāfe pitirofo a ifāfe piāi āfe potofō mīsa nāmā keyo pakeaito,” fanifi.

²⁸ Askafaito Jesús yoini nā kēro: “Mī ea chanīmara fakōini fetsafō keskarama. Akka nā mī ea yoiai keskara ē mia axonō,” ixō Jesús nā kēro yoini. Askafaino āfe fake xotofake shararisatani.

Jesús yora ichapa sharafani

²⁹ Askata Jesús anoax aōxō tāpimisfo fe kaaxīa Galilea kesemē nokoni. Nāskata machi keya māpefainax tsaoni. ³⁰ Nāno yorafā rasi akiki fenifo. Nā isinī imisfo akiki efenifo Jesús ato sharafanō. Fetsa chāto ini, fetsari fēxo ini, fetsari mifi yōshia ini, fetsari mekamisma ini. Nāskakē fetsa fetsatapafo a isinī ikaifo Jesús keyokōi ato sharafani. ³¹ Ato sharafaino ōikani yorafō yoinānifo: “¡Kee! Ōikapo. Iskarakai nō ōimisma. Nā mekamisfoma mā mekakani. A mifi yōshiafori mā sharafo. Nā chatofori mā nisharakani. Nā fēxofāferi mā ōisharakani. Jesús afama mīshti fatiro. Akka nōfi israelifokī nōko Nios fāsi sharakōi,” ikanax yoinānifo.

*Jesús cuatro mil feronāfakefo pimani**(Mr. 8.1-10)*

³² Askata Jesús aōxō tāpimisfo kenaxō yoini: “Ē na yorafō shinākōi, nono tres nia mā efe ikafono, nonoxori afaa pikanima. A piāifo mā keyoa. Akka afaa pimaxoma āto pexe ano ē ato nīchiano fonāikani afaa pikanaxma fai nēxpakīa paketirofo,” ixō Jesús ato yoini.

³³ Akka ato askafaino aōxō tāpimisfāfe kemanifo: “Akka, ¿afeskaxō a nō piāi nō fichitiro mē na yorafō ato pimaxikī nono tsoa ikama?” fanifo.

³⁴ Askafafono Jesús ato yōkani: “¿Afe tii mā pāayamē?” ato faito, “Siete pāa pishta, foe ichapamashitari,” fanifo.

³⁵ Nāskata nā yorafō nāmā tsaonōfo Jesús aōxō tāpimisfo ato yoini. ³⁶ Nāskata Jesús siete pāa yafi foeri tsoanaxō Apa Nios kīfīni: “Aicho Epa, mīōxō ē ato pimaikai. Mī fāsi sharafinakōiakī,” fata, pāa kaxketa, foeri tekenāfaxō aōxō tāpimisfo ato ināni nā yorafā rasi ato miniketsanōfo. ³⁷ Nāskakē keyokōichi pikanax māyākōinifo. A pikī chetefaafo siete fēta fospikōia ini. ³⁸ Akka nā pāa piafo cuatro mil feronāfakefos inifo. Kērofāferi fakefoyaxori ato feta pinifo. ³⁹ Nāskata Jesús yorafō yoini fōtanōfo āto pexe ano. Nāskata Jesús kanōanāfā mēra naneinākfani aōxō tāpimisfo fe. Mā naneinākfāta aōxō tāpimisfo fe mai fetsa ano kani, Magdala ano.

16

Fariseofo feta saduceofāfe, “Tsōa atiroma keskara noko ispafe nō mia chanīmara fanō,” ixō Jesús yōkanifo

(Mr. 8.11-13; Lc. 12.54-56)

¹ Askata Magdala mai ano Jesús nokoano fariseo fe saduceofo Jesús ōifokani fonifo afara chakafamapaikani. Nāskakaxō yoinifo: “Mī Niospa Fakemākī tsōa atiroma keskara noko ispafe nō mia chanīmara fanō,” fanifo. Nāskakaxō Jesús afara chakafamapainifo.

² Askafafono Jesús ato kemani: “Mā yātapakeaino xini iki sharapakekōikai, ‘Penama oi ikima,’ mā famis. ³ Akka mā penaino nai choshtakōi ōikī, ‘Oī iki kiki,’ mā famis. Akka nai choshtakēma ōikī, ‘Oī ikima,’ mā famis. Nai foiskī mā tāpitiro oi feyamai feima rakikīa mā fatiro. Askafixokai nā Niospa mato yoiai keskara mā chanīmara faima. Nāskakē mā ea tsōa atiroma keskara fafe, nō ōinō mā ea famis. Akka, ¿afeskakī mā tāpiamamē Epa Niospa noko ikīfiano?” ato askafani yoikī. ⁴ “Na yora chakafāfe ea chanīmara faafāfema ōipaikani ē Niosxō afara shara ē ato ispanō. Akka ē ato ōimanima. Akka Jonás fafinōfānē xeaitano fafinōfānē

xaki mēra tres nia ini. Nāskakē Niospa Jonás kāimani fafīnōfānē xāki mēranoax tsekeinō. Nāskakē a tsōa atiroma keskara ē mato ispaima,” ato fata ato makinōax Jesús kani.

“Fariseofo feta saduceofāfe anorima yoyimisfoki ato nikayamakāfe,” Jesús ato fani (Mr. 8.14-21)

⁵ Nāskano Jesúsxō tāpimisfāfe okiri ĩamāfā pokefaini fōkakī a pii foaifo shināmakifainifo. Nāskakaxō shinānifo: “Kee, ĩnō afaa piikaimē? A nō piikai mā nō shināmakikerani,” ikanax yoinānifo. ⁶ Nāskakē Jesús ato yoini iskafakī: “Nā fariseofo feta saduceofāfe āto pāa faraxati keskara fiyamakāfe,” ixō ato yoini.

⁷ Ato askafaito nikakani aōxō tāpimisfo yoinānifo: “ĶAfeskakī Jesús noko yoyimē fariseofo feta saduceofāfe āto pāa faraxati fiyamakāfe noko fai? Akka nō pāa feama. Nāskakē pāanoa noko yoiraka,” ikax yoinānifo.

⁸ Akka mā tāpixō Jesús ato yoini: “ĶAfeskai nō pāayamara mā ikimē? Akka mā ea chanimara fasharama,” ato fani. ⁹ “Mākaei ea tāpisharama. Akka, Ķmā shināimamē cinco pāa kaxkexō cinco mil feronāfakēfo ē ato pimatī? Akka, Ķafe tū fēta pāa fospia ikitamē?” ato fani. ¹⁰ “Askatari, Ķmā shināimamē nō siete pāa kaxkexō cuatrom mil feronāfakēfo ē ato pimatī? Akka, Ķafe tū fēta texefako mā fitamē? ¹¹ Akka, Ķmā tāpimamē pāanoa ē mato yoyima? Nā fariseofoya saduceofoōnoa ē mato yoi,” Jesús ato fani.

¹² Nāskakē tāpinifo Jesús ato yoiāito. Akka nā pāa faraxitiōnoa Jesús ato yoinima. Nā fariseofāfe saduceofo feta ato anorima tāpimapaiyaito Jesús ato yoini.

“Mī Cristo mia Niospa ifni nokoki nīchixii mī nōko xanīfo finakōia inō,” ixō Pedro Jesús yoini (Mr. 8.27-30; Lc. 9.18-21)

¹³ Askata Jesús aōxō tāpimisfo fe mai fetsa ari nokoni, Cesarea Filipino mai ano. Nānoxō aōxō tāpimisfo yōkani iskafakī: “Yorafāfe, Ķafaa ea fakanimē ē tsoamē?” ato fani.

¹⁴ Ato askafaito kemanifo iskafakakī: “Fetsafāfe, ‘Juan Maotistara’ mia fakani. Fetsafāferi, ‘Eliasar’ mia fakani. Fetsafāferi mia iskafakani: ‘Nā Niospa meka ato yoyimis nā Jeremiasķia, askayamai nā Niospa meka ato yoyimis fetsa rakikīa,’ mia fakani,” fanifo aōxō tāpimisfāfe.

¹⁵ “Akka, Ķmā, ea tsoara faimē?” ato faito, Pedro kemani iskafakī: ¹⁶ “Mīfi Cristokī, nā Nios nīpanakato Fakekōi,” fani.

¹⁷ Askafaito Jesús kemani iskafakī: “Simón, mīfi Jonáspa fakeki. Niospa mia noixō mia sharafaxōa. Akka ē Niospa Fakekē tsōa mia tāpimanama. Ēfe Epa Niospa nā nai mēra ikato āa mia tāpimana. ¹⁸ Ē mia anā yoinō. Mīfi Pedroki,” ixō Jesús yoini. Akka israeli mekapa Pedro Tokirinīfā nō fatiro. Tsōa tokiri efapa pitsi itiro. Nāskaxō Jesús anā yoikī iskafani: “Mī ea yoya: ‘Mī Cristo, nā Nios nīpanakato Fakekōi,’ mī ea faa. Nā mī yoya keskaraōxō fetsafāfe arifi chanimara faxikani. Nāskāifāfe efe yorafo ē ato imaxii. Nāskax ichanāxikani ea fanākani ekeki inimakani. Yōshi chakafāfe Nios noikaspakakī ato namapayanā ato xatemapaifaifono tsoa xatetiroma. Nā ea Ifofaafō xatenakafoma ea fanākani. Tokiri efapanāfā pitsikiki tsōa tararatiroma keskara ixikani. ¹⁹ Akka fētsa chamisi fepoti fēpetiro yorafo pexe mēra ikimaxikī. Nāskarifiakī ē mia yoi mī yorafo eōnoa mī ato tāpimaxii ea Ifofanōfo. Akka mī ato yoiāito nikakōikanax efe yora itirofo Epa Nios fe ipaxakakī. Nāskai mī chamis keskara itiro. Nā mī ōiai fato sharakōimāki mī ato yoiitiro: ‘Nā sharakōi mā atiro,’ ixō mī ato yoiitiro. Nā sharakōi mī ōiai, Epa Niospari sharakōi ōi. Askatari mī ōikai fato chakamakī, mī ato yoiitiro: ‘Nā chaka mā atiroma.’ Nāskara mī yoiaino, Epa Niospari nā chaka ōitiro.”

²⁰ Nāskata Jesús aōxō tāpimisfo yoini: “Tsoa yoyimakāfe ēfi Cristokī,” ato fani.

“Chipo ea retexikani,” Jesús ato fani (Mr. 8.31-9.1; Lc. 9.22-27)

²¹ Akka anā meka fetsafaxō Jesús ato yoinima. Xafakīakōi a aōxō tāpimisfo ato yoini achiyoafomano: “Ē Jerusalem ano kai. Nānoxō a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāferi, askatari nōko kaifāfe āto xanīfofofāferi ea omiskōimaxikani. Ea ato retemafafono, tres nia oxata ē anā otōxii,” ixō ato yoini. ²² Askafaino Pedro Jesús ori iyoxō yoini iskafakī: “Ifo, askayamafe. Miakai retekanima kiki,” fani.

²³ Pedro askafaino Jesús texkeakekafāni. Nāskaxō iskafakī yoini: “Satanás, emakinoax katāfe. Mī ea xītipaikai a Niospa ea amapaiyai ē anōma. A Niospa shināi anori mī shināima. Akka nā yorafāfe shināi keskara mī shināi,” fani.

²⁴ Askafata Jesús aōxō tāpimisfo yoini: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiāi keskara nikakōitiro. Nāskakē iskatiro: ‘Ēfe Ifoxō ea retēfiaifono ēkai ēfe Ifo ē potapakenakama,’ ixō shinātiro. ²⁵ Akka fētsa āa shinātiro iskakī: ‘Ē Nios Ifofaito ea retetiromo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ĩpaxanō eamāi Ifofamiskē. ²⁶ Akka fatora fetsa nono mai anoax kori ichapaya ikatsaxakī mā naax aya

katiroma. Ea Ifofayamax koriya ifiyakatsaxakī Epa Nios ano katiroma. Nāskakē afama mšhtifoia iyopafinixakī nā omiskōipakenakafo mēra mā kaax anā aya itiroa. Nāskakē āfe afaraforikai Nios inātiroma afe ĩpaxakī. ²⁷ Akka ēfi Niospa Fakekī yorakōiri. Nāskakē sharafinakōia chaxapakefofāxii ēfe ājirifo fe nai mēranoax mai ano okī. Mē oax ē āto xanīfo finakōia ē ixii. Nāskakē nā afara shara famisfo ē ato ināsharakōixii ē atoki inimakōikī. Akka nā afara chakafamisfo afara shara ē ato ināsharakōima. Ē ato omiskōimaxii. ²⁸ Ē mato yoi ē xanīfo finakōia ixii. Akka mā atirito ea Ifofaxō nayoxoma mā ōiyotiro,” ixō Jesús ato yoini.

17

Jesús āfe femānā fetsa keskara ini, fafekōini. Āfe rapatiri oxokōi ini
(Mr. 9.2-13; Lc. 9.28-36)

¹ Askata seis nia mā finōano Jesús aōxō tāpimisfo tres iyoni. Pedro iyota, Santiago iyota, Santiago āfe exto Juanri iyoni. Ranāri ato nīchifaini. Nāskaxō māchi keya māmākia ato iyoini. ² Nānoax āto ferotaiñi Jesús fetsa keskara ĩtani. Āfe femānā fafekōini xini keskara. Āfe rapatiri oxokōi itani oa luzpa chaxa keskara. ³ Nāskakē nānoa Moisés yafi Elías ōinifo Jesús fe mekaifāfe. ⁴ Askaito Pedro Jesús yoini: “Īfo, sharakōi ano nō oa. Akka, ĩmī fichipaimē ē tres tapas fanō? Mia fetsafaxota, Moisés fetsafaxota, Elías fetsafaxota, ē fanō,” ixō Pedro yoini.

⁵ Akka Pedro askafaino kōinī ato keyokōi maipakefofāni. Nā kōi mēranoax Nios mekaito nikanifo iskaito: “Nafi ēfe Fakekī ē fichisharapaikōi. Ē akiki inimakōi. A nikakōikāfe,” ikaito nikanifo. ⁶ Nikakani Jesúsxō tāpimisfo ratekōiyānā feopakefofānifo. ⁷ Askaifono Jesús ato ano kaxō ato ramāyanā ato yoini: “Finikāfe. Ratekakima,” ato fani. ⁸ Nāskakē foinisfōfākakī anoa tsoa ōinifoma, Jesús fisti nikē ōinifo.

⁹ Nāskata machi keya ariax anā tisirimepakenifo mā fekani. Tisirimepakekī Jesús ato yoifeni: “A mā ōia keskara mā tsoa yoiki. Ē naax mē anā otoano mā ato yoitiroki,” ixō Jesús ato yoini.

¹⁰ Nāskakē a aōxō tāpimisfāfe Jesús yōkanifo iskafakakī: “A Moisés yoikī kirika keneni keskara ato tāpimamisfāferi iskafakī yoinifo: ‘Cristo oyoamano Elías rekē oi taexii kiki,’ ixō yoinisfo. Akka, ĩafeskakī iskara yoinimē?” fani.

¹¹ Askafaiifāfe Jesús ato kemani: “Chanīma, Elías rekē oi taei nāato keyokōi itipinīsharafaiyoi āto chaka xatenōfo. ¹² Akka ē mato yoinō mā Elías ifana māikai tāpiama. Nāskakē nā apaiyai keskafakakī chakafanifo. Nāskarifikī ea omiskōimakani,” ixō Jesús ato yoini.

¹³ Nāskakē aōxō tāpimisfāfe tāpinifo Juan Maotistaōnoa Jesús ato yoiaito.

Jesús feronāfake naetapa niafaka chaka pōtaxoni
(Mr. 9.14-29; Lc. 9.37-43)

¹⁴ Askata Jesús a aōxō tāpimisfo fe mā māchifā ariax fotoano yorafā rasi akiki fenifo. Akka feronāfake fistichi ratokonō mai chachipakefofā Jesús yoini: ¹⁵ “Īfo, ēfe fake shināfe. Ēfe fake niso omiskōimiski. Nāskakē chii naki pakeyanā faka mēra pakemiski. ¹⁶ Akka mī inafō ano ēfe fake ē efekē mī inafāfe ēfe fake ea sharafaxomisfoma,” fani.

¹⁷ Askafaito Jesús kemani: “Ooa. Māikai ea tāpisharama. Mā afara shināmis. Akka afetiakai ē matoki onima. ĩAfetiakai mā ea tāpimē? Niri nā fake efekāfe,” Jesús ato fani.

¹⁸ Nāskakē Jesús nā feronāfake naetapa makinoa niafaka chaka potani. Nāskax sharakōi itani nā feronāfake naetapa.

¹⁹ Nāskaxō aōxō tāpimisfāfe Jesús yōkanifo: “Akka, ĩafeskakīri nō niafaka yōshi chaka potatiromamē?” ixō yōkanifo.

²⁰ Askafaiyono Jesús ato yoini: “Akka mā ea nikaima. Ē mato yoinō, ea nikakapo. Akka mā ea pishta nikaxō mā na machi, ‘Nonoax tsekekainax mai fetsa ari katāfe, mā faino na machi tsekekaitiro. Ea nikakōixō nā mā apaiyai keskara mā atiro. ²¹ Akka na keskara niafaka chaka mā foni tenekī Nios shinākī mā Epa Nios kīfianā mā potatiro,” ixō Jesús ato yoini.

Anā Jesús ato yoini: “Chipo ea retexikani,” ixō
(Mr. 9.30-32; Lc. 9.43-45)

²²⁻²³ Askata aōxō tāpimisfo fe Galilea ano ichanāxō ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefafono tres nia oxata ē anā otōxii,” ixō Jesús ato yoini. Ato askafaito nikakani aōxō tāpimisfo shināmitsakōinifo.

Nā Nios kīfti pexefā ano yonomisfāfe ato kori yōkanifo

²⁴ Askata Jesús aōxō tāpimisfo fe Capernaúm ano nokoaino a Nios kīfti pexefā anoxō ato kori fiamisfāfe Pedro ōifokaxō yōkanifo: “ĩMī Ifāfe kopifaimamē na Nios kīfti pexefā nā ato kori fixomisfāfe?” Pedro fani. ²⁵ “Ēje, kopifai,” Pedro ato fani.

Askata Pedro pexe mēra ikikainaito Jesús yoini iskafakī: “Simón, ¿afe keskara mī shināimē? ¿Xanifāfe nā maitio anoa āfe kaifo kori fīaimē, askayamakī yora fetsafo ato fīairaka?” ixō Jesús Pedro yōkani.

²⁶ Askafaito Pedro kemani: “Yora fetsafo fīatiro,” fani. “Ēje, chanīma,” Jesús ini. “Akka āfe kaifāfe kopifatiroma. ²⁷ Akka nokoki ōitīfishkiyamanōfo ia ano kaxō mīshkimātāfe. Nā mī fafī mīshkimāna āfe axfa mēranao mī kori exe fichikai. Nāskakē nā Nios kīfīti pexefā kori fixomisfo nō ato kopifaikai,” ixō Jesús Pedro yoini.

18

*“Akka, ¿tsoakaimē sharafīnakōia?” inifo
(Mr. 9.33-37; Lc. 9.46-48)*

¹ Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, ¿fatomē finakōia?” ixō yōkanifo.

² Askata Jesús fake yome kenaxō ato nēxpakīa nīchini. ³ Nāskaxō ato yoini: “Ē mato pāraima. Iskara mā shinātiroma: ‘Ē keyokōi finōfakī,’ mā itiroma. Akka fake yome kakapaitiroma. Akka mā shinā fetsafaax na fake yome keskara mā itiro. Mā askayamaxō mā Nios Ifofatiroma. ⁴ Akka Nios Ifo sharakōi faax nā Nios nikakōiaifo fake yome keskarafō, askatari, ‘Nō tsoama,’ ixō shināifo nāskarafō sharafīnakōiafo. ⁵ Akka fatora fētsa ēfe aneōxō na fake yome noikī nāatori ea noisharakōi,” ixō Jesús ato yoini.

*Noko fētsa afara chakafamaino āfenā mesekōi itiro
(Mr. 9.42-48; Lc. 17.1-2)*

⁶ Jesús anā yoini iskafakī: “Akka nā ea rama Ifofai fetsafāfe ato afara chakafamaino ōikī, nā keskarafō ato achixō tokirinīfāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani. ⁷ Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorafo chakafamapaimisfo. Akka fētsa fetsafo chakafamax omiskōi finakōixikani.

⁸⁻⁹ “Akka mato mēkemā mato afara chakafamatiro, askayamākī mato tae mato afara chakafamatiro, askayamākī mato fēro mato chakafamatiro. Nāskaino mato chaka xatekōitakāfe anā chakafayamaxii. Oa mato mēke xateta pota keskara itaxikakī, oa mato tae xateta pota keskara itaxikakī, oa mato fero fetoshimea keskarakōi itaxikakī afaa mā chakafayamanō. Akka mā mā mēke fisti potax anā afaa chakafayamai mā Epa Nios fe isharpakenakaki. Nā keskara sharakōi. Nā mato mēke mā xateama keskaraxō mā aō chakafaino, nā omiskōipakenakafo mēra mā kanaka ari chiifā nokanakama mēra. Nā mātonā chaka finakōia ixii. Nāskatari mato tae fisti xatea keskara mā sharafīnakōia mā isharpakekōitiro. Nāskax, mā askayamaino nā omiskōipakenakafo mēra mā ipanakaki ari chiifā nokanakama mēra. Nāskatari mato fēro chakafaino, mā fetoshimeax mā isharpakenakaki. Mā askayamax fero rafeyax nā omiskōipakenakafo mēra mā kaxii nā chiifā nokanakama mēra,” ato askafani.

*Oveja fenoaōnoa Jesús meka fetsafaxō ato yoini
(Lc. 15.3-7)*

¹⁰ Anā Jesús ato yoini iskafakī: “Nā rama ea Ifofaōnoa fakefo keskara shinākī iskafayamakāfe: ‘Na rama Jesús Ifofaafokai afaafoma,’ ixō yoyiamakāfe. Ē mato mēstekōi yoinō. Epa Niospa āfe ājirifāfe nā rama ea Ifofafo ato kexesharafāimis. Nā ājirifo Epa Nios fe imisfo. Nāskakē āfe fakefo kexesharamis. ¹¹ Akka nā yorafo fenoafo ē āto chaka soaxoniyoī ē oni isharpakexanōfo.

¹² “Akka, ¿afaa mā shināimē? Feronāfake fetsa cien ovejaya itiro. Nāskakē fisti a makinoax fenoano nā noventa y nueve anā kāimatiroma nā fenoa fenakī. ¹³ Ē mato chanīma yoinō. Mā oveja fisti fichiax inimaifīnakōitiro. Akka nā fenoamafoki inimatama nā fenoitakī mā fichiax inimaifīnakōitiro. ¹⁴ Nāskarīfiai Epa Nios nā nai mēranoato nā rama Ifofaifo keyokōi ato noisharai ato ōikī. Askatari tosa pishta fenopaima āfe fakefo,” ato fani.

*Jesús chanīmara faa fētsa mia chakafaito mī raefatiro
(Lc. 17.3)*

¹⁵ Anā Jesús ato yoini iskafakī: “Akka meka fetsa ē mato yoinō. Ea chanīmara famis fētsa mia chakafakē mī yoitiro iskafakī: ‘Yamā, mī ea chakafaa,’ ixō mī yoitiro. Mī askafaito mia nikaxō, ‘Ēje. Ea mīa chakafa. Ea anā raefafe,’ ixō mia yoiaito mī afe rae faatanātiro. ¹⁶ Nā mī askafafaito mia nikakaspaito feronāfake fisti kenafe, askayamakī rafē kenafe nā rafetari nikanōfo mia chanīmara faimākai. ¹⁷ Nāskatari atori nikayamaito nā ea Ifofafo ichanāfo anoxō ato yoife mia tāpinōfo. Nā ichanāfo anoxō mī yoiaito mia nikayamaito mī iskafakī

yoitiro: 'Na feronāfāke Epa Nios Ifofafīax nā Nios Ifofaafoma keskara ika. Nāskatari nā ato pāraxō ato kori fīamisfo keskarakōi,' ixō mī yoitiro.

¹⁸ "Ē mato chanīma yoi. Nā mā ōiai fato sharakōimākī mā ato yoitiro: 'Nā sharakōi. Nāskara nō atiro,' ixō ato yoitiro. Nāskara mā sharakōi ōi Epa Niospari shara ōi. Askata mā ōikai fato chakamakī, mā ato yoitiro: 'Na chaka. Nāskara nō atiroma,' ixō ato yoitiro. Nāskara mā ōiki chakamakī, 'Na chaka nō atiroma,' ixō mā yoiaino, Epa Niospari nā chaka ōitiro.

¹⁹ "Askatari fetsari ē mato yoinō, ē nikakōikapo. Fatora mā rafeta nono mai anoxō mā shināsharaxō, mā Epa Nios afara yōkaiyanā mā kifīaito ēfe Epa nai mēranoato mato afara ināsharaxii. ²⁰ Akka rafe iyamakani tres yora ea shinākani eōnoax ichanākaxikani ēri ato fe ichanāxii," ixō Jesús ato yoini.

²¹ Askata Pedro akiki kaxō Jesús yōkani: "¿Ifo, oato ea noikaspakī ea chakafamis, afe tii fakī ē yoitromē ē raefaxiki? ¿Siete fakī ē yoitromē?" faito, ²² Jesús kemani: "Maa. Siete fakī mī yoitiro. Mēxotaima mī yoitiro," fani.

Jesús anā meka fetsafaxō ato yoini feronāfāke fētsa a afeta yonomis raefapainima

²³ Anā Jesús ato yoini: "Nō Epa Nios Ifofaxō nō fetsafo raefatiro, Epa Niospa mato raefamis keskafakī. Nā ē mato yoiāi keskara nikakapo mā tāpinō mā rae faatanāino. A xanīfāfe ato yonomamis kenani ato yoixii afe tii mā nimiamakī. ²⁴ Xanīfāfe taefakī afe rafea kenani ichapakōi nimiano. ²⁵ Akka a nimia koriya inima afaa kopifatiroma ini. Nāskakē xanīfāfe iskafani: 'Mī koriyama mī kori nokotiroma mī ea kopifapanā. Akka ē mia xanīfo fetsa ināi mī āfe ina inō ea kori inānō. Mia ināta mī āfi ināta mī fakefo ināta mī afama mīshīto keyokōi ea ināi mī ea aō kopifanō,' ixō xanīfāfe yoini. ²⁶ Nāskakē āfe inapa ratokonō mai chachipakefōfā yoini: 'Ifo, ea manayofe. A ē mia nimia ē mia chipo kopifaikai,' ixō yoini.

²⁷ "Askafaito nikakī xanīfāfe shinākōini. Nāskaxō yoini: 'Rateyamafe. A mī ea nimia ē anā shināima. Mī ea nimia ē keyokōi sofai mī anā ea nimirōma. Kasharatāfe,' ixō yoini. ²⁸⁻²⁹ Nāskakē xanīfāfe pexe mēranoax kakī, āfe yama fichini, nāato ichapama pishta nimia ini. Nāskakē fichixō testopa achixō temo temosayanā yoini: 'Mī ea nimia ea kopifarīsafāfe,' fani. Mā eneano ratokonō mai chachipafōfā yoini, 'Ea manayofe ē mia inānō,' fani. ³⁰ Askafaito nikakaspakī karaxa mēra ikimani a mēraxō kopifanō. ³¹ Nāskakē ranāri shināmītsakōikakī a ōiaiffo āto xanīfo yoifokani fonifo. ³² Nāskakē xanīfāfe kenaxō mā oano yoini: 'Mī chaka finakōia. Akka ē mia askafatima mī ea nimifiano, "A ē mia nimia ē mia kopifanō ea manayofe," mī ea faito, ³³ akka mīri mī yama mī shinākerana nā ē mia noikī shināti keskafakī,' ixō xanīfāfe yoini. ³⁴ Nāskax ōitīfishki finakōikī xanīfāfe nā āfe ina karaxa mēra ikimani anoax omiskōi finakōinō nā nimia kopifayanā.

³⁵ "Ēfe Epa nai ari ikato matori askafaxii fetsafo mā raefayamaito mato omiskōimaki," ixō Jesús ato yoini.

19

Feronāfāke āfe āfi fe enēnātirofoōnoa Jesús ato yoini

(Mr. 10.1-12; Lc. 16.18)

¹ Mā ato yoikī keyota Jesús aōxō tāpimisfo fe Galilea anoax kakī faka Jordán pokefainax Judea mai ano nokoni. ² Nāskakē yorafā rasichi chīfafāinifo. Nārixō nā isinī ikaifo ato sharafapani.

³ Nāskakē fariseofo akiki fēkaxō chakafakī mekamapainifo. Nāskaxō yōkanifo iskafakī: "Nōko xinīfāfe Niospa meka yoikī kenenifo keskafakī, ¿feronāfāke āfe āfi enepaikī enetiromē afeskaraito?" ixō yōkanifo. ⁴ Askafafono Jesús ato kemani: "¿A Moisés kirika kenenī mā ōimismamē? Iskafakī kenenī: 'Niospa keyokōi onifani. Feronāfāke yafi kēro onifakī taefani. ⁵⁻⁶ Mā askafaxō iskafakī yoini: "Feronāfāke mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo," ' ixō Niospa yoinino Moisés kenenī. Nāskakē anā yora rafema, yora fisti keskara ikani āfe āfi fe. Nāskakē feronāfāke āfe āfi enetiroma Niospamāi ato fianāmano," ixō Jesús ato yoini.

⁷ Ato askafaino yōkanifo: "Akka, ¿afeskakī Moisés yoinimē iskafakī? Feronāfāke āfe āfi eneyoxoma kirika kenexō yoitiro iskafakī: "Ē anā mia fipaima. Ē mia enei," ' ixō yoitiro Moisés fani," fariseofāfe Jesús fanifo.

⁸ Askafafono Jesús ato yoini: "Akka māri māto xinifo keskara mā Niospa meka nikakaspamis. Akka Moisés yoini nō kēro enetiroma. Akka Niospa taefakī anori shinānima. ⁹ Ē mato yoinō. Akka fētsa āfe āfi enetiroma fetsa fe chotanāyamafiano. Akka fētsa āfe āfi enexō kēro fetsa fia askara sharama, chakafai. Askatari a kēro fenē enea fētsa fia askarari sharama, chakafai," ixō Jesús ato yoini.

¹⁰ Askara nikakakī Jesús a aōxō tāpimisfāfe yoinifo: "Akka nā mī noko yoiāi keskara nikakanax, fianāfoma askara shara itirofo," ikaxō yoinifo.

¹¹ Askafaifono Jesús ato kemani: “Na ē yoiyai keskara atirifāfe nikasharatirofoma. Akka nā Niospa ato shināmanai tiitos shinākanax nāfo shara itirofo fianākanamax. ¹² Akka yōshikōi káiāx mā yosiāx āfiyatiroma. Akka fetsafori ato oxkofixotirofo āfiyanōfoma. Akka fetsafāferi Epa Nios fisti nikakōipaikakī, nā fisti nikakōitirofo. Nāskakē afo āfiyapakenakafoma,” ixō Jesús ato yoini.

Jesús fakefo chishtoḵō ato māmāyanā Epa Nios kīfixopakeni
(Mr. 10.13-16; Lc. 18.15-17)

¹³ Ato askafaino yorafāfe āto fakefo Jesúski efenifo ato māmāpakeyanā ato Nios kīfixonō. Akka a Jesúsxō tāpimisfāfe ato iskafaino: “Māto fakefo efexō nōko Ifo fekaxtefayamakāfe,” ato fanifo.

¹⁴ Ato askafaifono Jesús ato yoini: “Ato enekāfe nā fakefo ekeki fenōfo. Ato nētefayamakāfe. Ēfe Epa Nios xanifo ika ari na fakefo keskarakōifoki,” ixō ato yoini. ¹⁵ Nāskaxō fakefo māmāpaketa Jesús nānoax kani.

Feronāfake naetapa kori ichapayax Jesús fe mekani
(Mr. 10.17-31; Lc. 18.18-30)

¹⁶ Feronāfake naetapa fistichi Jesús ōikaxō yōkani: “Maestro, mī sharaki, ea yoife afaa shara ē afeska fatiromakī Nios xanifo fe ipaxaki,” ixō yōkaito, ¹⁷ Jesús kemani: “¿Afeskakī sharara mī ea faimē? Akka Nios fisti sharafinākōia. Nios xanifo fe mī ipaxapaikī a Moisés yoini keskara mī nikasharakōitiro,” faito, ¹⁸ “¿Fatomē ē nikanō?” faito, Jesús yoini iskafakī: “Nā Moisés yoini keskarakōi mī nikakōitiro. Iskafakī yoini: ‘Ato reteyamakāfe. Askatari māto āfima chotayamakāfe. Askatari atokī yometsoyamakāfe. Askatari chanī yoiyamakāfe. Askatari kaxpa ato parayamakāfe. ¹⁹ Askatari māto epa yafi māto efa nikasharakōikāfe, ato sharafakāfe. Askatari a mā chaima nikari noisharakōikāfe a mā mā noimeai keskafakī,’ ” ixō Jesús yoini.

²⁰ Askafaito a kori ichapayato kemakī iskafaini: “Nā mā yoiyai keskara mē nikakōimis. Akka, ¿afaa fetsari ē nikamamē?” faito, ²¹ Jesús kemani: “Mī isharakōipaikī, mī afama mīshifto ato mīnitāfe. Kori fixō nā afaamaisfo ato ināketsatāfe. Nāskakē nai mēranoax afama mīshiftoya mī ixikai. Mā mī kori ato ināketsata anā oxō ea Ifofasharafe,” ixō Jesús yoini.

²² Askafaito nikai nā feronāfāke shināchakakōi tooxinima kori ichapayamāiyaxō ato inākaspai. Nāskax Jesús makinoax kani.

²³ Nāskaxō Jesús aōxō tāpimisfo yoini: “Ē mato pāraima, fekaxkōi yora kori ichapayato Epa Nios Ifofapaia. ²⁴ Akka anā ē mato yoinō meka fetsafaxō. Camello akoja kini mēra ikipaiifi ikitiroma, fekaxkōi, epapamāiax. Nāskarari yora kori ichapayato Nios Ifofapai, fekaxkōi āfe afama mīshifomāi potakaspakī,” ixō Jesús ato yoini.

²⁵ Ato askafaito nikakakī a aōxō tāpimisfāfe tāpipainifo. “¡Keel! ¿Afesxax nō Nios fe ipaxatiromē?” ikanax yoinānifo.

²⁶ Askaifāfe ōikī Jesús ato yoini: “Yorafokai āa ifimetiropoma. Nios fistichi yorafa ifitiro. Niospa afama mīshifto fatiro, yorafāfe atiroma keskara,” ixō ato yoini.

²⁷ Ato askafaito nikakī Pedro yoini: “Ifo, nō mefe okī nōko afama mīshifto nō ōiferani nō mefe oni. Akka, ¿afaa nō fiimē?” fani.

²⁸ Askafaito Jesús ato kemani: “Ē mato pāraima. Keyokōi ē ato īkināno sharafinākōia ea ōixikani, ēfe Epa Nios keskara sharakōi ē ikaito. Akka māmāi ea Ifofasharakatsaxakī nai mēranoax mā efe xanīfofo ixii. Mā nōko kaifo israelifāfe āto xanīfori mā ixii. Nā doce nofe yorafa israelifo mā ato ikipakenakakī. ²⁹ Akka yora fētsa eōxō ēfe meka sharaōnoa ato yoikakī āfe pexe ōifaini, askatari āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe āfiri ōifaini, āfe fakefori ōifaini, āfe tareri ōifaini, akka nāato afama mīshifto fixii. Nāskatari mā naax Nios fe ipanaka. ³⁰ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

20

A yonomisfokiri yoikī meka fetsafaxō Jesús ato yoini

¹ Anā Jesús ato yoini: “Afe keskaramakī Epa Niospa keyokōi ato īkinā mā Ifosharafaino, ē anā meka fetsafaxō ē mato yoinō. Ea nikasharakāfe. Nā tare ifo mā fakishparikōi kani yorafa fenaikai āfe tare ano yonoxonōfo. ² Ato fichixō ato yoini iskafakī: ‘Ē mato pena fisti yonomapai. Akka nā ē ato kopifamis tii mā pena fisti yonoano ē mato kopifai, ¿nāskara sharamē?’ ato faito, ‘Ēje, shara,’ fanifo. Nāskaxō āfe tare ari ato nīchini. ³ Askata rama xini keyaino tare ifo anā kakī ōia plaza anoxō ranārīto manaifono yonopaikakī tsōa ato yonomayamaino. ⁴ Askaifono tare ifāfe ato yoini: ‘¿Māri ēfe tare ano yonopaimē nā ē ato kopifamis keskafakī ē mato kopifanō?’ ato faito nikakata atiri fonifo yonoi fokani. ⁵ Askata

tare ifo anā xini keya kaxō ōia ranārīto mananifo yonopaikakī. Nāskakē afori nīchini āfe tare ano. Askata mā xini kaino anā kaxō ōia ranārītori manaifono. Nāfori nīchini yonotanōfo. ⁶ Askatari yātapishatakōi plaza ano anā kaxō ōia nānoa ranārī ato fichitoshini yonopaiyāifāfe. Nāskaxō ato yōkani: ‘¿Afaa nonoxō mā afeskafaimē yonokima?’ ato faito kemanifo, ⁷ ‘Tsōa noko yonomayamaino nō iki,’ fanifo. Askafaifono ato yoini: ‘Māri ēfe tare ano yonotakāfe,’ ato fani.

⁸ “Nāskata mā fakishano nā tare ifāfe afe xanīfo yoini iskafakī: ‘Ea yonoxonaifo ato kenafe ato kopifanō. Nā rama ikiafo ato kopifakī taefafe. Askata nā iki taeafō chipo ato kopifaxiki,’ fani. ⁹ Akka yātapishatakōi ikikaxō yonoafo nāfo ato kopifani nā pena fisti yonoafo kopifamis keskafakī. ¹⁰ Akka nā yonoi iki taeafāfe shinānifo: ‘Nō kori ichapa fira,’ ikaxō, askafikaxō nā fetsafāfe fiaitiri finifo. ¹¹ Nāskakē mā ato kopifaino, nā tare ifo mekafakakī yōachēpenifo. ¹² Iskafakī yoinifo: ‘Akka nā rama fēkaxō yonoafo mā ato kopifaa nā mā noko kopifaa keskafakī. Akka nō xini pae meeyanā nō yonoa nīskayanā nā pena tii,’ fanifo. ¹³ Akka nā tare ifāfe fisti kemani: ‘Efe yorashta, ē mia chakafakī mekafaama. Akka mē mia kopifaa nā mī pena fisti yonoa. Nā pena fisti ē ato kopifamis tii ē mato kopifai ē mato faaki. Nā sharaki mā ea faaki,’ fani. ¹⁴ ‘Akka ē mia kopifanō, nakīa mī kori. Katāfe mī pexe ano. Akka nā rama ikikaxō yonoafo nā ē mia ināi keskafakī atori ē ināi. ¹⁵ Nā ē ināpaiyai keska fakī ē ato inātiro, ēfe korimāiyakē. Akka, ¿afeskai mī ekeki ōitifishkikimē ē fetsafo ināsharaino?’ ixō yoini. ¹⁶ Nāskarīfakī Epa Niospa nā taefakī chanīmara faafo ato ināi keskafakī nā rama chanīmara faifo nāfori ato ināsharaxii. Akka Epa Niospa yora ichapa kena a ika ano fonōfo. Nāskakē Epa Niospa ato kenafaito tsōa nikayamaito nā Ifofaafos ato ifixii,” ixō Jesús ato yoini.

*Anā Jesús ato yoini: “Mā chaima ea retekanira,” ixō
(Mr. 10.32-34; Lc. 18.31-34)*

¹⁷ Askata Jesús Jerusalén ari fāi kakī a aōxō tāpimisfo kenaxō ato yoini iskafakī: ¹⁸ “Ea nikakāfe. Mā mā ōikai iskaratīa Jerusalén ano nō māpei kaikai. Nānoxō ea achikaxō ea ato inākani, a Nios ato kīfixomisfāfe āto xanīfofo, askatari a Moisés yoikī kirika keneni keskara ato tāpimamisfo anori ea iyoixikani. Nānoxō, ‘Mā mī naikai,’ ixō ea yoixikani kiki. ¹⁹ Nāskakaxō yora fetsafo nōko kaifoma ea inākani ea kamaketsayanā ea koshaketsakani. Nāskakaxō ifi cruz ikaki ea mastakani. Akka ea askafafono tres nia oxata ē anā otoxii Epa Niospa ea otoaano,” ixō ato yoini.

*Āfa āfe fake rafe Jesús yoixoni
(Mr. 10.35-45)*

²⁰ Zebedeo fake rafe Juan fe Santiago ini. Nā rafe āto afa fe Jesús ano fonifo. Mā Jesúski nokoxō nā kēromā ratokonō mai chachipakefōfāni Jesús afara shara yōkapaikī. ²¹ Askafaito Jesús yōkani: ‘¿Afaa mī fichipaimē ē mia axonō?’ faito, nā kēromā yoini: ‘Ifo, nā mī xanīfo finakōia ikaitīa ēfe fake raferi mefe xanīfo inōfo ato xanīfo imafe. Nā xanīfāfe tsaoti ano mī tsaono ēfe fake rafe takairafe mefe ketaxamei tsaonōfo,” fani.

²² Askafaito Jesús nā kēromā fake rafe yoini: “Mā tāpiama a mā ea yōkai keskara. ¿A ē omiskōixiai keskara māri omiskōitromē?” Jesús ato faito kemanifo: “Ēje, nōri tenetiro,” fanifo.

²³ Askafaiifāfe Jesús ato yoini: “Chanīma, māri mā omiskōixii. Akka ēkai tsoa yoitiroma, ‘Efe ketaxamei tsaofe efe rafexii’ ixō. Akka ēfe Epa Nios fistichi yoitiro. Nā Niospa ato kataofos nāfo afe ketaxamei tsaotirofo efe rafexikakī,” ixō ato yoini.

²⁴ Nāskakē a aōxō tāpimis rafeta askafakī yōkaifāfe a aōxō tāpimisfo fetsafāferi nikakakī, “¿Afeskai oa iskaī rafe mekakanimē?” ikaxō a rafe meepainifo. ²⁵ Askaifono Jesús ato kenaxō ato yoini: “Mā mā tāpia yora fetsafāfe āto xanīfofo afe keskarafomākī. Nā xanīfāfe mitsisipakōixō ato yononamis. A xanīfo fe rafeafāferi ato yomimisfo iskafakakī: ‘Nōri māto xanīfo. Nō mato yoiaito mā noko afara axorisafatiro,’ ixō fāsikōi ato yomimisfo. ²⁶ Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro. ²⁷ Askatari fatora fetsari xanīfo ipaikī iskafakī shinātiro: ‘Ēkai afaama. Nāskakē ē fetsafo axosharapai. Nā apaiyaifo keskara ē ato axosharai,’ ixō shinātiro. ²⁸ Akka ēri anori shināima, ēfe Epa Nios ariax ē nāmā fotoni feronāfakēkōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē ato oñnoax naziki ē oni Satanás chaka āto ifo inōma,” ixō Jesús ato yoini.

*Jesús yora fēxo rafekōi sharafani
(Mr. 10.46-52; Lc. 18.35-43)*

²⁹ Askata Jericó anoax Jesús aōxō tāpimisfo fe kaino yorafā rasichi chīfafainifo. ³⁰ Akka fai kesemē fēxokōi rafe tsaonifo. Nānoxō Jesús fāi kaito nikakaxō nā rafeta kenanifo iskafakakī: “Ifo, David fenapa, noko shināfe,” fāsikōi fanifo.

³¹ Askafaifono nã yorafã rasichi ato iskafanifo: “Nõko Ifo fekaxtefayamakãfe,” ato faifono, akka nã fëxokõi rafe fãsikõi kenanifo: “Ifo, David fenapa, ¡noko shinãfel!” fanifo.

³² Askafaifono Jesús nêteakekafani. Ato kenaxõ ato yõkani nã fëxokõi rafe: “¿Afaa mã fichipaimê ê mato axonõ?” ixõ ato yõkani.

³³ Ato askafaito kemanifo: “Ifo, nõ fëro õisharapaikõi,” fanifo. ³⁴ Jesús ato shinãkĩ ãto fero mēeni. ãto fero mēeaino nã fëxokõi rafeta ãto fëro õirisafatanifo. Nãskakaxõ Jesús chãfafainifo.

21

Jesús nokoni Jerusalén ano

(Mr. 11.1-11; Lc. 19.28-40; Jn. 12.12-19)

¹ Nãskata mã Jerusalén chaima fokanax pexe rasi Betfagé ano nokonifo machi Olivos ano. Nãnoxõ Jesús a aõxõ tãpimis rafe nĩchini, ² ato iskafayanã: “Mêstekõi fotakãfe oa onõ pexe rasi ano. Nãnoa burro nexekê mã fichi kaikai ãfe fake fe nexekê. Nãskakê tẽpexõ ea efexotakãfe. ³ Anoxõ yora fetsa mato yõkaito: ‘¿Afeskakĩ mã burro tẽpeyoamê?’ mato faito, yoikĩ iskafakãfe: ‘Nõko Ifãfe fichipaiyaito nõ ifixoniyoa. Akka samama nõ mia nĩchixoniyoi, fakãkĩ,’ a aõxõ tãpimis rafe fani.

⁴ Nã Niospa meka yoimisto kirikaki kenekĩ yoini keskakõini Jesús. ⁵ Iskafakĩ keneni:

Peixe rasi Siõn anoafõ ato yoikãfe iskafakĩ: “Õikapo. Mãto xanĩfokõi mã matoki oi kiki. Xanĩfofiãx afama keskara oi kiki. Burro fake kamaki tsaõa na feronãfakakai kakapaimisma,”

ixõ Niospa meka yoimisto kirika keneni.

⁶ Nã Jesúsxõ tãpimisãfe mã fõkaxõ nã ato yoia keskara fanifo. ⁷ Nãskata burro fake yafi ãfe afa yonifo. Nãskaxõ burro kate kamaki ãto sama fanifo. Nãskakê Jesús a kamaki tsaõinãkãfãni. ⁸ Yora ichapakõi inifo. Nãfãfe ãto rapatifo kakafa fonifo fai nẽxpakã. Ranãritori epe pei xatekaxõ kakafanifo. ⁹ Akka nã rekê foaifo fe a acho foaifo fãsikõi mekafonifo. Tai tai fokani. “¡Aicho! ¡Nõko xanĩfo David ãfe fena nokoki oi kiki! ¡sharafinakõia nokoki oi kiki Niospa nĩchiano nai mẽraxõ! ¡Nõko Ifo Nios sharafinakõia!” ikanax tai taifonifo.

¹⁰ Nãskata Jesús Jerusalén ano kaito õikani yorafo ratei fetsenifo õiakefaikani. “¿Tsoamê na?” ikanax ãa ranã yõinã fetsenifo. ¹¹ Askaifãfe nã Jesús fe foafãfe ato kemanifo: “Nafi Jesúski Niospa meka ato yoimis. Nazarete anoã Galilea mai ano imis,” ixõ ato yoinifo.

Jesús a Nios kĩfiti pexefã mẽraxõ a ato inãifo ato potani

(Mr. 11.15-19; Lc. 19.45-48; Jn. 2.13-22)

¹² Mã fotoax Nios kĩfiti pexefã mẽra Jesús ikitoshini. Ikikaixõ õia a mẽraxõ yorafãfe ãto afama mĩstifõ ato miniketsakani inifo kori fikani. Askafaifãfe õikĩ Jesús ato põtaketani a ato afama mĩstifõ miniaifo, a ato fiaifori potani. A kori fianõnãifo anoari ãto mĩsa põtakĩ ato nãpakaketsani. Askatari a ato rifi miniaifori ãto tsaotifori ato põtaketani. ¹³ Askafata ato yoini iskafakĩ: “Niospa shinãmanaino Isaías Niospa meka keneni iskafakĩ: ‘Mã êfe pexefã mẽraxõ mã ea kĩfitiro,’ ixõ keneni. Akka nã yometsofãfe pexe keskara mã famis,” ixõ Jesús ato yoini.

¹⁴ Ato askafaino a Nios kĩfiti pexefã ano fëxofo, chatõfo Jesúski fenifo. Nãskakê anoxõ Jesús ato sharafani. ¹⁵ Jesús askarafa ato sharafaino õikani. Akka nã Nios ato kifixomisãfe ãto xanĩfofo feta a Moisés yoikĩ kirika keneni keskara ato tãpimamisãfe õinifo afama mĩstifõ Jesús akaito. Askatari fakefo Nios kĩfiti pexefã mẽranoaxri tai tai ikaifãfe nikanifo iskaifãfe, “¡Aicho! ¡Nã Jesús David ãfe fena sharafinakõia!” ikaifãfe nikakani õitifishnifo.

¹⁶ Nãskakakĩ Jesús yoinifo iskafakakĩ: “¿Oaiskai mĩ nikaimê yoiaifo keskara faifãfe?” Jesús ato kemani: “Êje, mẽ nikai,” ato fani. “Akka a kirika keneano, ¿mã õimismamê? Iskafakĩ kenenifo, Niospa ato shinãmanaino:

Fake yomefãfe mia fanãkani, mã ato fanãimaino,

ixõ kenenifo,” Jesús ato fani.

¹⁷ Askafakĩ ato yoita ato makinoax kani pexe rasi ano Betania ano. Nãno oxafistishini.

“Fana higuera, mã anã fimiyanakama,” Jesús fani

(Mr. 11.12-14, 20-26)

¹⁸ Mã penano Jerusalén ano anã okĩ Jesús meea fonãikõini. ¹⁹ Mã anã kakĩ Jesús õini a fana higuera fai kesemê nikê. Nãskakê akiki kaxõ ãfe fimi fenani pipaikĩ. Akka fimiya inima, ãfe pei fisti ini. Nãskakê yoikĩ iskafani: “Anã mã fimiyanakamakã,” faino koshikõi nã higuera xanarisatani.

²⁰ Askaito õikakĩ aõxõ tãpimisãfe yõkanifo: “Kee, ¿afeskai na ifi xanarisatanimê?” ikaxõ, ²¹ yõkaifono Jesús ato kemani: “Ê mato pãraima mã ea nikakõixõ mãri atiro na ê ifi higuera xanafaa keskafakĩ. Nãskarifikĩ na machiri mã yoitiro iskafakĩ: ‘Nonoax tsekekainax fakafã

mēra paketāfe, mā faino fakafā mēra paketiro. ²² Mā Epa Nios chanīmara fakōixō mā afara kifaiato mato inātiro, ixō ato Jesús yoini.

*“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī
(Mr. 11.27-33; Lc. 20.1-8)*

²³ Ato askafata Nios kīfiti pexefā mēra ikikaini. Nā Nios kīfiti pexefā mēraxō ato tāpimanaino, nā ato Nios kīfixomisfāfe āto xanīfofo fe judeo anifofo fonifo. Akiki fōkaxō yōkanifo iskafakakī: “¿Tsōa mia nīchinimē? ¿Tsōa mia yoiāmē mī iskafanō?” ixō yōkanifo.

²⁴⁻²⁵ Askafaifono Jesús ato kemani: “Ēri mato yōkanō. Ea yoikapo ē nikanō. ¿Tsōa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka. Akka mā ea kemaito, ēri mato yoikai tsōaōxō ē iskafaimākai.”

Ato askafaino, āa ranā mēenāpai fetsayanā. Shinānifo iskakakī: “Niospa Juan nīchini nō faito noko yoiki iskafatiro: ‘¿Akka afeskakī mā Juan nikamismamē?’ noko fatiroki,” ikanax yoinānifo. ²⁶ “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinākani Niospa shināmanaino Juan ato yoipaoni,” ikanax xanīfofo yoinānifo.

²⁷ Nāskaxō Jesús yoinifo iskafakakī: “Nō tāpiama,” faifono Jesúsri ato kemani iskafakī: “Ēri mato yoima tsōa ea nīchinimākī ē iskafanō,” Jesús ato fani.

Meka fetsafaxō feronāfake rafēōnoa Jesús ato yoini

²⁸ Jesús ato yoini: “Meka fetsafaxō ē mato yoinō. Feronāfake fisti fake naetapa rafeya ini. Nāskaxō āfe fake iyoa yoini: ‘Ēfe tare ano kaxō ea yonoxotāfe,’ fani. ²⁹ Askafaito āfe fāke kemani: ‘Ē kapaima,’ fani. Askafiax mā shināx kani.

³⁰ “Askata āfe fake chipokori yoini iskafakī: ‘Miri kaxō ēfe tare ano ea yonoxotāfe,’ fani. Askafaito nāato kemani iskafakī: ‘Ia, epa. Ē yonotanōkī,’ fafiax kanima. ³¹ Akka, ¿fatoto a āfe āpa fichipaiyai keskafakī axonimē?’ ato faito, ‘Iyoato axoni,’ fanifo. Nāskaxō Jesús ato yoini: “Ē mato pāraima. Nā xanīfo kori fixomisfo fe, nā kēro chotaferomafo āto chaka xatekanax mā Epa Nios Ifofakōikani. Akka mā afaa afeskafaxoma mā Epa Nios Ifofaama. ³² Akka Juan ato maotisafamis oni ato tāpimaxiki afeskax mā itiomākai, Niospa fichipai keskara. Akka māakai Juan nikamisma. Akka nā xanīfo kori fixomisfo feta nā kēro chotaferomafāfe nikakōinifo. Akka mātō chaka mā xateama mā afara fetsafo shināmis,” ixō Jesús ato yoini.

*Meka fetsafaxō Jesús ato yoini a ato yonoxomis chakafoōnoa
(Mr. 12.1-12; Lc. 20.9-19)*

³³ Anā Jesús ato yoini iskafakī: “Ea nikakapo ē mato meka fetsafaxō yoinō. Tare ifāfe āfe tare ano uva fanani. Fanaxō akiki keneakeni. Nāskaxō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō ato ināni nā uva tare kexenōfo. Nāskata mai fetsa ari kani. ³⁴ Akka nā fimimistia mā āfe fanafo pachiano, a yonoxomisfo nīchini a kexexonafo ato yōkaxō nā āfenā tiiri fixotanōfo.

³⁵ Akka nā tare kexexonafāfe a xanīfo yonoxomis achikaxō fisti seteketsanifo. Askatari fetsari retenifo. Askatari fetsari tokirinī tsakaketsanifo. ³⁶ Nāskakē tare ifāfe anā āfe inafō ichapakōi nīchini. Mā foafono nā tare kexemisfāfe ato askari fanifo.

³⁷ “Mā ato askafapaxō āfe fakekōi nīchini aōnoa shināchakatama, ‘Ēfe fake nikatirofokī,’ ixō. ³⁸ Akka mā āfe fake kaito fichikanax nā tare kexemisfo aa ranā yoinānifo: ‘Nato āfe apa naano na fanafo fixii kiki. A nari retekape na āfe fanafo nōkonā inō,’ inifo. ³⁹ Nāskakata achinifo. Mā achikaxō tare pasotai iyokaxō retenifo. ⁴⁰ Akka, ¿mā tare ifo oxō a tare kexemisfo ato afeskafatiromē?’ ixō Jesús ato yōkani.

⁴¹ Ato askafaito kemanifo: “Ato retetiro ato noitama yora chakafokē. Nāskaxō tare ifāfe yora fetsafo āfe tare inātiro, nāfāfe inānōfo nā āfenā tiiri mā āfe fana fimifo pachiano,” ixō yoinifo.

⁴² Nāskata Jesús ato yoini meka fetsafaxō: “¿Na kirika kenea anoa mā anemismamē? Iskafakī kenenifo:

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo. Nāskarifiakī xanīfofōfāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katonī nōko Ifo inō. Nāskakē nō akiki inimakōi,

ixō kirika ano kenenifo,” Jesús ato fani.

⁴³ “Nāskakē ē mato yoi, taeyoi Nios fe rafexō āfe meka mā ato yoiyomis. Askafixō mā ea nikakaspai. Nāskakē Epa Niospa fetsafo yoi āfe meka ato tāpimanōfo afeska faxō Nios Ifo sharakōifatiromakī. ⁴⁴ Akka tokiriki fetsa pakēki aō xao teketiro. Akka tokiri yoraki pakēki yamakōi fatatiro. Nāskarifiakī ē Niospa Fakekōixō a ea nikakaspafono ē ato omiskōimaxii,” ixō Jesús ato yoini.

⁴⁵ Akka nã Nios ato kîfixomisfo ãto xanîfofo feta fariseofãfe nikanifo Jesús meka fetsafaxõ ato yoiaito. Nãskakaxõ tâpinifo Jesús atoõnoa yoiaito. ⁴⁶ Nãskakaxõ achipainifo. Akka achipaifikani mesenifo yorafãfemãi chanîmara faifono Jesús Niospa meka ato yoimiskê. Nãskakê achinifoma achipaifikakî.

22

Meka fetsafaxõ Jesús ato yoini a feronãfake ãfiyaino inimayanã piaifoõnoa yoikî
(Lc. 14.15-24)

¹ Anã Jesús meka fetsafaxõ ato yoini iskafakî: ² “A Epa Nios xanîfo ika ano iskaraki ê mato yoinõ. Nikakãfe. Nã xanîfãfe ãfe fake ãfi fiaino fista axoxiki. ³ Akka xanîfãfe a yonoxomisfo nîchini ato yoitanofo fenõfo. Akka mã fõkaxõ ato yoiaino fekaspanifo. ⁴ Nãskaxõ anã a yonoxomis fetsafo nîchini ato iskafayanã: ‘Ato yoikî iskafatakãfe: “Mã xanîfãfe ãfe fãke ãfiyaino mã itipinîsharakõï faa pixiki. ãfe fakka efapa mã ato retemana. Askatari fakka fake xookõïari ato retemana. Mã keyokõï itipinîsharafakî, kookãfe pixikakî,”’ ato fani. ⁵ Akka ato askafaiyono ato fe fekaspanifo. Fetsa ãfe tare ari kani. Fetsari kani ãfe afama mîshiti minikai. ⁶ Atirifãfe nã xanîfãfe inafõ ato achikaxõ ato seteketsayanã ato retenifo. ⁷ Nãskakê xanîfo õitifishkifinakõïni. Nãskaxõ ãfe sorarofõ nîchini a retemîsamisfo ato reteyanã ãto pexefori ato kõakî mîtõkakõitanõfo. ⁸ Nãskaxõ xanîfãfe a yonoxomis fetsafo yoini ato iskafakî: ‘Mê itipinîshara faa êfe fãke ãfiyaino pixiki. Akka nã chakafo ê ato kenamanafo fekaspaõiafokî. ⁹ Akka mãri fotakãfe nã pexe rasi ano. Nãria ato fichixõ mã mã õiaifo ato yoikãfe fenõfo pii fenõfo, êfe fãke ãfiyaino,’ ixõ ato yoini. ¹⁰ Nãskakê a yonoxomisfo fai fêtsa fonifo. Mã fõkaxõ yora ichapafo fichikaxõ ato efenifo. Yora sharafo efeta yora chakafori efenifo. Nãskakê xanîfãfe ãfe fãke ãfiyaino yorafa pexe fospikõimifo.

¹¹ “Nãskakê xanîfo pexe mēra ikikaini yorafa feaito itipinîsharafaxõ ato rapati sharakõï ato inãketsani safenõfo ãfe fãke fista akaino. Xanîfo ikikaini ato õikai mã sharakõï safeket-safomakî. Akka fistichi rapati shara safea inima, chapokõï safea fichini. ¹² Akka a rapati shara safeama fichixõ yoini: ‘¿Afesakî mî rapati sharakõï safeax mî oamamê êfe fãke ãfiyafaino?’ Askafaino nã feronãfake tooxinima. ¹³ Nãskaxõ xanîfãfe a yonoxomisfo yoini: ‘Na feronãfake otexkere ata metexkeraxõ fakishifã mēra potakãfe, anoax omiskõïpakexanõ eaiyanã,’ ixõ ato yoini. ¹⁴ Nãskarifiã Epa Niospa yora ichapa kenai a ika ano fenõfo nã ãfe Fake Ifoiafo tii afe ipanakafo,” ixõ Jesús ato yoini.

“¿Xanîfo nõ kori inãtiromê nõko yõkaito?” ixõ Jesús yõkanifo
(Mr. 12.13-17; Lc. 20.20-26)

¹⁵ Nãskata mã Jesús ato yoiaito nikakata mã fokanax fariseofo yoinãnifo: “¿Afesakõ nõ Jesús afara chaka yoimatiromê? Afara chaka nõko yoiaito nõ yõaxiki,” ikanax yoinãnifo. ¹⁶ Nãskafakata ãto inafõ nîchinifo, Herodes ãfe inafõya iskafakî yoitanofo: “Maestro, mã nõ tâpia mî chanîmakõï yoimis. Nã Epa Niospa nõko shinãmapiyai keskarakõï mî nõko yoimis yorafãfe mîõnoa afara chaka yoifiaifono. Afara mî yoipai mî ranomisma. Keyokõï nãskarafos mî ato yoimis. ¹⁷ Nãskakê nõko tâpimasharafe. Akka chanîmamakî nõko yoife na romanõ xanîfo nõ kopifatiromakî askayamakî nõ kopifatiroma rakikîa,” fanifo. Jesús chakafamapaikakî askafanifo.

¹⁸ Askafaiãfe õikî Jesús tâpini feparapayiaifãfe. Ato yoini: “Feparamisfãfe, ¿afara chaka mã ea yoimapaime eõnoa afara chaka yoipaikî? ¹⁹ Akka mãto kori exe ea ispakãfe a aõ mã xanîfo kopifamis,” ato fani. Ato askafaito kori exe fisti fõxonifo. ²⁰ Nãskaxõ Jesús ato yõkani: “¿Tsõa femãnã na keskarãmê? ¿Tsõa aneri na kori exe ano keneamê?” ixõ ato yõkaito, ²¹ kemanifo iskafakakî: “Nõko xanîfo César keskara,” fanifo. Nãskakê Jesús ato yoini: “Akka na kori exe Césarnãkê César inãkãfe, akka Niosnãkê Niosri inãkãfe,” ixõ Jesús ato yoini.

²² Ato askafaito nikakani, ratekõïyanã. “Kee. ãfe mekakai tsõa finõtiroma,” ikanax a makinoax fonifo õifaikani.

“¿Yora naax anã otoax afeskatitromê?” ixõ Jesús yõkanifo
(Mr. 12.18-27; Lc. 20.27-40)

²³ Nãskatari afia pena fisti saduceofo fenifo Jesús õifekani. Nã saduceofãfe yoimisfo iskafakakî: “Yora naaxkai anã afeskax ototiroma,” ixõ shinãmisfo. Nãskakaxõ Jesús yõkai fekani fenifo iskafakakî: ²⁴ “Maestro, Moisés yoini iskafakî: ‘Feronãfake naano ãfe ãfi feta fake akamax, one fêtsa nã kēro fitiro, ãfe ãfi inõ. Mã fixõ afeta fake atiro ãfe õchi fake inõ,’ ixõ Moisés nõko yoikî kenenî. ²⁵ Akka nõ mia yoikî taefanõ. Noko nikafe chipo nõko yoixiki. Akka nã nane tii siete inifo, feronãfake. ãto ochi iyoa ãfiyai taeni. Mã ãfiyax afeta fake akamax nani. Mã ãfe ochi naano chipokoto fini. ²⁶ Nãskarifiã nã chipokori nani afeta fake akamax. Nãskatari chipoko fêtsari fini, nãri nani afeta fake akamax. Nãskakanax akikinoax nai keyonifo afeta fake akanamax. ²⁷ Nãskata mã nai keyoafono nã kērori chipo nani.

28 Akka, ¿a yorafo mā otokaxō nai mēraxō, fatoto nā kēro fixiimē, nā fistimāi fīpakaxō?” ixō yōkanifo.

29 Askafaifono Jesús ato kemani: “Mā kai afaa tāpiama. Nā kirika ano Niospa meka yoikī kenenifokai mā tāpiama. Nāskaxori Niospa akai keskara āfe sharaōxō ari mā tāpiama. Na mā ea fanīrira yoiyai,” ato fani. 30 “Akka yorafo nakanax anā otokanax anā āfiyatirofoma. Kērofori anā feneyatirofoma. Nāskakanax ājirifo keskara itirofo nai mēranoax. 31 Akka, ¿a yorafo naax otokiaifo Niospa yoini keskara, a kirika keneano mā ōimismamē? 32 Iskafakī Niospa yoini: ‘Ēfi mī xinifāfe āto Nioskōiki, Abraham ikaino Isaaca ikaino Jacobo ikaino,’ ixō Niospa yoini. Akka yorafo mā nafafono naafoma keskara Epa Niospa ato ōimis. Niospa yoini iskafakī: ‘Ēkīa āto Nioskōi,’ ixō Niospa yoini.” Nāskara Jesús keyokōi ato yoini.

33 Saduceofāfe nikanifo Jesús ato askafaito, “¡Aira! ¡Nikakapo! Jesús sharakōi yoi,” ikanax yoinānifo.

“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo

(Mr. 12.28-34)

34 Nāskakē saduceofo Jesús ato meka xatemanaito nikakaxō fariseofo ichanākanax Jesús ano fenifo. 35 Akka feronāfake fisti a Moisés yoikī kirika keneni keskara ato tāpimamis ini. Nāato Jesús fanīrira kemamapaikī yōkani, 36 “Maestro, ¿fato meka sharafinakōiamē, nā Niospa shināmanaino Moisés keneniraka sharafinakōia?” faito,

37-38 Jesús yoini iskafakī: “Moisés yoikī taefani iskafakī: ‘Nōko Ifo Nios noikōikāfe nōko ōitifoyaxō, nōko māpori shināsharakōita, nōko yōshi sharafoyaxori.’ Nā mekafi sharafinakōiakī nā Moisés yoini keskara. 39 Nāskatari nā ē mato taefakī yoi keskarakōiri nāno fetsari, a mia chaima nikari noisharafe a māia mī noimeai keskafakī ixō Moisés keneni. 40 Moisés noko yoini keskai afesakx nō shara itiomākī. Askatari a Niospa meka yoisifāfe yoinifo keskai afesakxri nō askatiromakī. Akka nō askasharapai nā meka rafe nikakōisharax nō askasharakōitiro,” ixō Jesús ato yoini.

“Akka, ¿tsōa fenamē Cristo?” ixō Jesús ato yōkani

(Mr. 12.35-37; Lc. 20.41-44)

41 Fariseofo afe ichanāyoafono, 42 Jesús ato yōkani: “Akka, ¿nā Niospa katoa nā Cristoōnoa, afaa mā shināimē? ¿Tsōa fenamē?” ato faito kemanifo: “David āfe fenakīa,” fanifo. 43 Nāskata Jesús ato yoini: “David Niospa Yōshi Sharapa shināmanaino nōko Ifo Cristoōnoa kirikaki keneni iskafakī Cristo oyoamano. Ē mato yoinō mā shinākōinō:

44 Epa Niospa ēfe Ifo yoini iskafakī: ‘Mī efe xanīfokōi īpanakaki. Akka nā mia noikaspaifo mī ato finōkōinō ē ato mīnāmā nīchikai,’ ixō Epa Niospa yoinino David kirika keneni.

45 “Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” Jesús ato fani.

46 Ato askafaino nikakakī tsōakai pishta kemanima. Nāskakē akiki ranokakī anā tsōa afaa pishta yōkanima.

23

Jesús ato yōani fariseofoya a Moisés yoini keskara ato tāpimamisfo

(Mr. 12.38-40; Lc. 11.37-54; 20.45-47)

1 Mā askafata Jesús yorafo yoini aōxō tāpimisfoya: 2 “A Moisés yoikī kirika keneni keskara ato tāpimamisfo feta fariseofāfe a Moisés yoini keskara mato tāpimakani. 3 Akka ato nikakāfe. Nā mato yoiāifo keskara akāfe. Akka nāfāfe nā yoiāifo keskara akanima. Nāskakē nā yoiāifo keskara akātama afara fetsafo amisfo. Nāskakē māri ato keskara iyamakāfe. 4 Āto patoronō ato yoitiro iskafakī: ‘Na efekōi pefexō fōtakāfe,’ ato fafiāxō ēri foyokanō ato fatiroma. Nāskarifiakī a Moisés keneni ato tāpimamisfo feta fariseofāfe mato afara fekaxkōi yoisiffo afesakx Epa Nios fe mā itiomākī Epa Nios matoki imanānō ikaxō. Nāskafikaxō mato afara axosharamisfoma. 5 Afama mīshti sharafo apaikani yorafāfe noko ōinōfora ikaxō kakapaiyanā. Niospa meka kirikaki kenekata koira kōfo pishta fakāta a mēra Niospa meka nanekaxō āto fishpi ano nētamisfo. Askatari āto pōya anori nētamisfo. Askatari tari kepanātia chainipa safemisfo sharakōira noko fanōfo ikaxō. 6 Askatari sharakōi anoxō pipaimisfo, askatari tsaoti sharakōi anori tsaopaimisfo ichanāti pexe anoax, keyokōichi noko ōinōfora ikanax. 7 Nāskakata nā yora ichapa rasi ano fopaikani noko finōkakī noko yoisharakakī, ‘Maestro noko fanōfora,’ ikanax.

8 “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka māto Maestro fisti finakōiaki. 9 Nāskakē iskaratīa nono mai anoxō tsoa Epa fayamakāfe. Akka nōko Epa Nioskōi nai mēra ikakī. Nā fisti Epa nō

fatiroki. ¹⁰ Askatari tsoa ifofayamakāfe. Akka nā Epa Niospa katoni fisti na Cristo fisti mā Ifofatiro. ¹¹ Nā fatora fetsa xanifo ipai nā ato yonoxomis keskara itiro. Nāskaxō ato afara axosharatiro. ¹² Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainifofā sharakōi nīchitiro,” ixō Jesús ato yoini.

¹³ Nāskata Jesús a Moisés yoikī kirika keneni keskara ato tāpimamisfāfe fariseofo yoini iskafakī: “Moisés meka ato tāpimamisfāfe, māri fariseofāfe ea nikasharakāfe. Māfi ato pārapiimiski. Mākai a mā yoia keskara mā ato yoimisma. Mā ato xītimis Epa Nios Ifofayamanōfo. Māri mā Nios Ifofamisma. Nā Nios Ifofapaiyaito mā ato xītimis. ¡Ooa! Epa Niospa mato fāsi omiskōimaxii.

¹⁴ “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakī: ‘Nō mato afara shara faxōira,’ ixō mā ato pārāmis. Akka kēro ifomafa mā pāraxō mā pexe fiamis. Nāskaxō mā Nios kīfikī mā chaikōi kīfimis yorafāfe sharakōi shinānōfora ixō. Nāskakē Epa Niospa mato fāsi omiskōimaxii.

¹⁵ “¡Ooa, a Moisés yoikī kirika keneni keskara ato tāpimamisfāfe, mā omiskōixii fariseofo fe! Akka mā judeofoma ari kafāsamis ato yoikai noko keskara inōfora ikax, nō mato Niospa meka tāpimanōra ixō. Askafixō mā ato yoisharamisma. Nāskakē mato nikakanax mato keskarari ikani kiki. Mā chakakōifo nāfori chakafinakōia ikani kiki. Nāskakē mā nakanax Epa Nios ari foxikanima. Mato fe nā omiskōipakenakafo mēra foxikani.

¹⁶ “¡Ooa! Niospa mato omiskōimaxii, mā ato mēstekōi yoimiskēma. Mā tāpimafixō mā ato paramiski ato tāpimapaikī. Mā fēxo keskarakī fēxo afe fēxo iyoikai nā rafe fenotirofo. Nāskarifiakī Niospa meka anoriyamafiano mā ato paramiski iskafakī mā ato yoikī: ‘Ē mato paraima. Nāskakē ē mato yoi, nā ē mato yoioya keskara ē ayamaito Nios kīfiti pexefānē ea omiskōimatiro,’ mā imis. ‘Akka nā Nios kīfiti pexefā aneōxō mā yoioya keskafakī mā ato axoyamaxō shināchakayamakāfe. Askafixō nā Nios kīfiti pexefā mēranoa oro aneōxō mā ato yoioya keskafakī ato axokāfe,’ ixō mā ato yoimis. ¹⁷ Mā tatimakōifo, askatari mā fēxo keskarakōifo. Akka, ¿fato sharafinakōiamē? Nā Nios kīfiti pexefā mēranoa oro raka sharafinakōia, askayamai Nios kīfiti pexefā raka sharafinakōia. Akka oro ares rakax shara itiro. Akka Nios kīfiti pexefā mēramāi rakax shara itiro.

¹⁸ “Nāskarifiakī, ‘Nā ē mato yoioya keskara ē ayamaito nā a kamakixō yoinā koati mīsamāfānē ea omiskōimatiro,’ ixō yoimisfo. Akka mā fariseofāfe, anorima mā ato yoikī iskafamis: ‘Nā mīsamāfā aneōxō mā ato yoioyomis keskafakī mā ato axoyamafixō shināchakayamakāfe. Askatari nā mīsamāfā kamakixō yoinā koaki nā yoinā aneōxō mā ato yoioyomis keskara akāfe,’ ixō mā ato yoimis.

¹⁹ “Akka mā fēxo keskarakōi. Akka, ¿fato sharafinakōiamē? Nā afarafo mā Nios ināi raka sharafinakōia, askayamai a kamakixō yoinā koati mīsamāfā raka sharafinakōia. Akka nā yoinā ina ares shara itiro. Askafax nā shara, māmāi mā Nios ināno mīsamāfā anoxō koakī. Nāskakē nā yoinā inapa nā koati mīsamāfā finōama. ²⁰ Akka nā koati mīsamāfā aneōxō afara yoiāito nā koati mīsafā fistiōnoa aneima. Akka nā mīsamāfā kamaki rakaōnoari yoi. ²¹ Akka nā Nios kīfiti pexefā aneōxō afara yoikī Nios kīfiti pexefā fistiōnoa yoima. Akka Niosri a mēra ikano mā yoi. ²² Akka nā nai aneōxori mā afara yoikī, nai fistiōnoa mā yoima. Nā Nios Xanifo nai mēra ika anoafori mā yoi.

²³ “¡Ooa, a Moisés yoikī kirika keneni keskara ato tāpimamisfāfe fariseofo feta! Ea nikakapo. Māfi ato parapiimiski. Māto afama mīstiffo mā Nios ināpaifikī a Niospa afara fetsa yoia keskara mā shināmisma. Mā māto fana mīstiffo nā korātorofo fana fetsa mīstifori mā Nios ināmisa. Akka fetsafo mā ato yonomaxō afara fichipaifaifāfe mā ato noikima mā ato afaa ināmisma. Epa Niospa yoini keskafakī mā ato noima. Akka a mā yoiai keskara tsōa māto meka chanīmara fatiro. Nāskaxō māto fana mīstiffo mā Nios ināfikī a Niospa yoia keskara mā shināima. ²⁴ Akka mā nā fēxo afe fēxo iyotiro. Nāskarifiakī māri mēstekōi shināsharaima yorāfo Niospa meka tāpimapaifikī. Nāskaxō afara sharakōifo mā ato tāpimasharamisma. Akka afara sharama mā ato tāpimisma. Akka nāpe pishta mato kecho mēra naneano, mā fixō mā potamiski. Akka nā camello efapakōi mā potakaspakī mā ayamis.

²⁵ “¡Ooa, a Moisés yoikī kirika keneni keskara ato tāpimamisfāfe fariseofo feta! Mā ato parapiimiskōi. Akka māto kecho yafi māto sapa femākīa fisti chokasharafikī, oke mērakai mā chokasharamisma, nachoshtax pisikōi itiro. Nāskarifiakī mā yorāfo ōimapai nafo sharafora noko fanōfora ixō. Akka māto shinā mēraxō mā shara shināyamafikī, oa choshta pisi keskaraxō. Nāskaxō afarafo mā ato fiamis fetsafo ratexō. Askatari mareskōi mā shinākī, ichapakōi fichipaikī mā icha icha famis. Nāskakē Epa Niospa mato omiskōimakōixii. ²⁶ Fariseofāfe, mākai mēstekōi shināsharamisma. Akka iskaratīa māto shinā

mēraxō shināsharakāfe, isharakōixikakī. Anā afaa chaka shinākakima. Nāskaxō mā yorafo ikisharakōitiroki.

²⁷ “jOoa, a Moisés yoikī kirika keneni keskara ato tāpimamisfāfe, fariseofo feta! Māfi ato parapaimiski. Māfi nā mafa kini keskarakī. Akka mafa kini femākīa oxo sharakōi nō ōifaiño oke mēra sharama. A namisfāfe āto xaofō fospikōia pisia fetsa fetsatapafo. ²⁸ Nāskarari shara keskara yorafāfe mato ōikani. Akka mātō shinā mēraxō mā shara shināima. Afara chakakōifo mā shināimis, ato mā parakōimis.

²⁹ “jOoa, a Moisés yoikī kirika keneni keskara ato tāpimamisfāfe, fariseofo feta! Mā ato parapaimis. Nāskakē Niospa mato omiskōimakī finakōixii. Nā mātō xinifo a Niospa meka yoimisfo fetsafāfe ato retenifo maiāfo ano mā tokiri famis a mātō xinifo namisfo ato shināxikī. Nāskaxori a maiāfo mānāo charofori mā famis yorafāfe ōikakī na mēra sharakōira fanōfora ixō. ³⁰ Nāskaxō mā yoimis iskafakī: ‘Nōko xinifāfe a Niospa meka ato yoimisfo retenifo keskafakī nōri niyoxō nō ato retekeranima,’ ixō mā yoimis. ³¹ Akka nā mā yoiāi keskara chanīma. Mātō xinifāfe ato chakafakī ato retenifo. Māri ato keskarakōifo. ³² Nā Niospa matoki nīchiari mā retexii. Akka nā mā apaiyai keskafakī ayotakāfe.

³³ “Mā afara chakafa fafafāini. Nāskakē mā rono keskarafo. Mā chakafa fafafāini. Mā rono paekapato fake keskarakōifo. Nāskakē mā omiskōipakenakāfo mēra mā kaxii. Akka afeskax mā faki ichotiroma. Askatari tsōakai mato nētefatiroma. ³⁴ Nāskakē a Niospa meka yoimis ē matoki nīchikai. Askatari a Niospa meka tāpisharakōixō shināsharakōimisno ē nīchikai. Nāskatari a Moisés yoikī kirika keneni keskara ato tāpimamisfōri ē matoki nīchixii. Nāskakē atiri mā ato retexii. Askatari fetsafori ifi cruz ikakī mā ato mastaxii nanōfo. Askatari fetsafori mātō ichanāti pexe mēraxō mā ato koshaxii. Nāskakī mā ato omiskōimakōixii. Nāskaxori fetsafori mā ato chīfafofāsa faxii ato omiskōimayanā. ³⁵ Nāskakē Epa Niospa motori omiskōimaxii nā mātō xinifāfe nā yora sharafo retenifono. Akka taefakī nā Abel sharafiano āfe ōchi reteni. Askatari fetsafori sharafianono ato retenifo. Chipori mā xini ichapa finōano nā Zacarias, Bereguas fake, mātō xinifāfe retenifo. Nā Zacarias feronāfake sharafiano Nios kīfiti pexefā chaimashtaxō koati mīsamāfā nakirafexō retenifo. Nāskakē Niospa atoōxō mato omiskōimaki finakōixii. ³⁶ Akka chanīma ē mato yoinō. Na yorafo iskaratīa niyoafo Niospa ato omiskōimaki finakōixii,” ixō Jesús ato yoini.

*Jesús Jerusalén anoafo ato shināi oiāni
(Lc. 13.34-35)*

³⁷ Anā Jesús ato yoini iskafakī: “jOoa, Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nīchiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifaiño mā ea nikakaspamis. Māfi ekeki omismakī ē mato ikipanā. ³⁸ Akka ōikapō, iskaratīa anā tsōa mato kexeima nā mā imis ano. ³⁹ É mato yoinō, iskaratīakai mā ea anā ōima. Nā ē oaitīa mā ea ōixii. Nā ē nai mēranoax ē oaitīa mā yoikī iskafaxii: ‘Nafi Niospa nokoki nīchia. Fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

24

*Jesús ato yoini: “Na Nios kīfiti pexefā pāōixii,” ixō
(Mr. 13.1-2; Lc. 21.5-6)*

¹ Nāskata Jesús Nios kīfiti pexefā mēranoax tsekekainaino, aōxō tāpimisfo akiki fēkaxō yoinifo iskafakakī: “Ifō, ōipo. Nōko Nios kīfiti pexefā sharakōi,” fanifo. ² Askafaifono Jesús ato yoini: “Na mā ōiai, akka ē mato pāraima anākai tokirifo petsanānēxima, keyokōi pāōixii. Na tokirifori maōi fetsexii,” ato fanī.

*Afaa afeskaximākai mā chaima nōko mai keyoaino Jesús ato yoini
(Mr. 13.3-23; Lc. 21.7-24; 17.22-24)*

³ Askata fonifo māchifā Olivos ano. Nāno Jesús tsaoni. Nāskakē aōxō tāpimisfo akiki fonifo yōkaxikakī iskafakakī: “Nō tāpipai mī noko yoinō afetīa iximē a mī yoiāi keskai. Afeskaxō nō tāpitromē a mī anā oxiai mā mai keyoaino noko yoife,” fanifo.

⁴ Askafaifono Jesús ato kēmani: “Kexemesharakani mā ato nikaino mato afara chakafamatirofoki. ⁵ Yora ichapa fēkaxō, ‘É Cristora,’ ixō mato paraxikani. ⁶ Nāskaxori mā nikaxii yorafo retenāifāfe chai inoax. Nāskatari nonoaxri askaxikani retenākani. Askara ōi, rateyamakāfe. Nā ē mato yoimis keskakōi kiki. Nāskafiax nōko mai fena keyoxima kiki, chīpo ixii. ⁷ Akka yorafo mai fetsa anoax mēnāpaiyafono yora fetsafori mai fetsa anoax retenāxikani. Askatari fonāiki finakōixikani afaa pikanima. Nāskatari nā mai fetsa anoax mai naya naya ixii. Askatari pae finakōia fetsa fetsatapafo nokoxii kiki. ⁸ Akka taei nā omiskōiaifo, askai fetsexii.

⁹ “Nāskata mato achikaxō fetsafo mato ināxikani mato omiskōimanōfo. Nāskaxō mato retenōfo. Nāskaxō keyokōi nā mai tio anoxō eōxō mato noikaspaxikani. ¹⁰ Nāskatari yora ichapafāfekai ea anā chanīmara fakanima. Nāskakanax āa ranā noikaspā faatanāxikani. Nāskakaxō yora fetsa yōsixikani ato achinōfo. ¹¹ Nāskatari yora ichapafo āa chanīxikani iskakani: ‘Ea Niospa shināmāni kiki ē Niospa meka mato yoinō,’ iki āa chanīxikani. Nāskaxō yora ichapafo ato pāraxikani. ¹² Nāskaxō ato chakakōi faxikani. Ato noimisfo keskakāi atirififāfe anā ato noisharaxikanima. ¹³ Akka nā ea shināmāxixoma ea shinākōia nāfi ēfe Epa Nios fe ipaxatiroki. ¹⁴ Nāskakē na meka shara Jesúsoa nikaxakani Jesús noko nāxonikē Epa Nios xanīfo anoax nō afe İpaxanō. Na maifo tii ano ato yoiaifono, chipo nōko mai keyoxii.

¹⁵ “Nā Niospa meka yويمisto Daniel a inōpokoai yoikī keneni iskafakī: ‘Nios kīfiti pexefā mēra afara chakakōi faxikani,’ ixō kirika keneni. Nāskakē na kirika kenea anexō tāpikāfe. ¹⁶ Nā chakafinākōia ōikanax, nā Judea anoafō machi keya ano ichorisatakāfe. ¹⁷ Askatari āfe pexe māmākia tsaoxō ato fichiax koshikōi fotopakekafā āfe afaa fiamax ichotiro. ¹⁸ Askatari a āfe tare ano yonoaito anā oxō āfe rapati fitiroma. ¹⁹ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinākōiaifono. ²⁰ Akka Epa Nios kīfikāfe iskafakī: ‘Epa Niosi, noko omiskōimayamafe nōko pena tenetitīa askayamāi yōtaino matsi meexikakīma,’ ixō yoikāfe. ²¹ Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. ²² Akka a omiskōiaifo nōko İfāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²³ “Akka fetsa mato yoikī iskafaino: ‘Ōikapo, nakīa Cristo,’ mato fayana, ‘Oa onokīa, ōikapo,’ mato faito nikayamakāfe. ²⁴ Akka nā chanīmisfo fekani, ē Cristora ixikani, nāfo nō Niosxō nō mato yora ikani. Nāskakaxō tsōa atiroma keskara fakani Satanās yōshixō mato parapaikakī. Nā Niospa ato katoafori nāfo ato parapaikani. ²⁵ Mē mato yoikai iyoamano shināsharakāfe. ²⁶ Nāskakē mato parapaikani: ‘Cristo mā tsōa istoma ano oa,’ ikaxō. Nāskakē ari foyamakāfe. Askatari mato iskafakani: ‘Ōikapo, na Cristo na pexe mēra,’ mato faifāfe ato nikayamakāfe. ²⁷ Akka nā kana peikī fafetanaito nō ōitiro keskara, nāskarifiai ē oxii xafakīkōi ea ōixikani ē oaito. ²⁸ Akka nā naafo ano ishpifo ichanātiro. Nāskari fakī keyokōichi ea tāpixikani ē oaito,” ato fani.

*“Niospa Fake fotoaino afe keskara iximākai,” ixō Jesús ato yoini
(Mr. 13.24-37; Lc. 17.26-30, 34-36; 21.25-33)*

²⁹ Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi İxii, ōxeri anā chaxaxima. Fishifori nai mēranoax pakei fetsexii, askatari nā nai mēranoafō naya naya iki fetsexii. ³⁰ Nāskatari ōixikani nai mēranoafō afara afeskaraito mā tāpinō ē fotoaitīa. Nāskatari keyokōi nā maitio anoax ratei fetseyanā oiaxikani. Nāskatari ea ōixikani ē nai mēranoax nai kōinī fotoiyoyaito. Ē sharafinākōia ēfe sharaŋoax ē fotoaito ea ōixikani. ³¹ Nāskatari ēfe ājirifori ē yoixii āto maneti fāsikōi manekakī chāi chāisafanōfo a nikakanax efe yorafo a ē ato katoa ichanānōfo. Chai inoax fisti rasi efe yorafo fexikani nāno fistiax ichanāxikakī.

³² “Akka shinākapo ē mato yoinō. Mā yōkkafaiaino mā tāpitiro āfe pei sirikiaito. Nāskakē āfe peifo keyopakeaito ōikī mā tāpitiro māmāi chaima xiniaito. ³³ Nāskarifiakī afarafo afeskaraito ōikī mā tāpitiro mē chaima oaino askai fetsexii. ³⁴ Ē mato pāraima ē mato yoikōi, na ē mato yoiai keskara nono mai anoxō yorafāfe nayokaxoma ōiyokani. ³⁵ Akka nai fe mai keyoi. Akka ēfe meka fisti keyonakama, nā ē mato yoiai keskakōi.

³⁶ “Afetīara nai mēranoax ē oxii tsōakai tāpiama. Nā ājirifāfe nai mēra ifiakaxō tāpiafoma. Ērikai tāpiama. Ēfe Epa Nios fisticchi tāpia. ³⁷ Akka nā Noé niyoano ini keskai, nāskarifiaxii ē anā oaino. ³⁸ Nāskata fakafānē ato maiyoamano, Noé kanōanāfā mēra ikini, yorafo pikāta, ayakāta fianākāta ikaifono. ³⁹ Akka tsōa shināyamaino mā faka faipafaxō keyokōi ato āsakī mitokōini. Nāskarifiaxii ē oaino ea shinātama afara chakafaifono. ⁴⁰ Nāskatari feronāfake rafeta āto tare ano yonokani. Fetsa ea ari kai yamarisatitiro. Akka fetsa nēteteri nā omiskōipakenakafo mēra kaxikī. ⁴¹ Nāskarifiiai kēro rafeta xiki renekani. Fetsa ea ari kai yamarisatanaino akka fetsa nēteteri nā omiskōipakenakafo mēra kaxikī.

⁴² “Nāskakē itipinīsharakāfe oa mā moinākafanai keskakāfe. Akka mā tāpiamakī afetīara ē anā oxikai. ⁴³ Nāskakē māri nā keskara tāpisharakāfe. Akka pexe ifāfe mā tāpixō afetīa yometso nokoimākai ixō āfe pexe itipinīshara fatiro mā moixō, a mēra ikiāx yometsoyamanō. ⁴⁴ Nāskarifiiai māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

*Ina shara yafi ina chakaŋnoa Jesús yoini
(Lc. 12.41-48)*

⁴⁵ Anā Jesús ato yoini iskafakī: “Ē mato yoinō afe keskaramākī a yonoxomis shara mā tāpinō. Xanifāfe mai fetsa ari kakī, a yonoxomis āfe pexe ano nīchifaini nānoxō a yonoxomis fetsafo a piaifo pena tii ato ināfafainō. ⁴⁶ Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax. ⁴⁷ Ē mato paraima. Nāskaxō āfe xanifāfe mā xanīfo imaxō āfe afama mīstifio kexexonō inātiro. ⁴⁸ Akka nā yonoxomis chakapa shinātiro: ‘Ēfe xanīfo fena oimara,’ ixō. ⁴⁹ Nāskaxō a yonoxomis fetsafari ato seteketsani. Askatari nā pāemisfo fe rafexō ato feta piyanā askatari ato feta ayayanā. ⁵⁰ Iskaratīa ēfe xanīfo oimara ixō manasharayamainā nā penata āfe xanīfo nokorisatani. ⁵¹ Mā oxō nā yonoxomis omiskōimaxii. Nā yora keparanāmisfo fomisfo mēra potaxii. Nāskakē anoax oiaiyānā omiskōipakenaka,” ixō Jesús ato yoini.

25

Meka fetsafaxō Jesús ato yoini diez xotofake xomayaōnoa

¹ Anā Jesús ato yoini iskafakī: “Ē mato yoinō meka fetsafaxō mā tāpinō ē anā oxii a Nios Ifoafafoōnoax afe keskara ixikanimākai. Akka nā diez xotofake xomayafāfe āto rāpari fifaikani fonifo. Feronāfāke rama āfiyaino afe fista mēra foxikakī manai fokani fonifo. ² Akka nā cinco xomayafāfe shināsharanifoma, itipinīnifoma. Akka nā cincofāferi shināsharanifo. ³ Akka nā shināsharaifāfema āto rāpari foiyakakī āto kiroisī fonifoma anā fospifaxikakima. ⁴ Akka nā shināsharakōiaifāfe āto manishomoki kiroisī fonifo. Askatari āto rāpari fonifo. ⁵ Akka feronāfāke fena nokoyamaino, mā fakishaino, oxakatsa ikani. Nā kēro xomayafo oxanifo. ⁶ Nāskakē yame nakekafanaino nikanifo kenaifāfe iskaifono: ‘¡Mā nā feronāfāke oi kiki! ¡Moinīfofākāfe, ifixikakī!’ ato faifono. ⁷ Nāskakē nā kēro xomayafo moinīfofākata itipinī fakī fetsanifo āto rāparifo ōtaketsakakī. ⁸ Nāskata nā cinco xotofake shināsharaifāfema nā cinco xotofake shināsharaifo āto kiroisī pishta yōkanifo: ‘Noko kiroisī pishta inākāfe. Nōko rāpari otasharaima kiki,’ ato fanifo.

⁹ “Ato askafaifono nā xotofake shināsharaifāfe ato kemanifo ato iskafakakī: ‘Maa. Nō mato inātiroma, nōri afaa otatiroma. Akka mā kaxō fitiro a kiroisī miniaifo anoa fitakāfe mātonā faxikakī,’ ato fanifo. ¹⁰ Akka nā cinco xotofakefāfe kiroisī fiifofāfono nā manaifo feronāfāke nokoni. Nāskakē nā cinco xotofakefo shara shināmisfo nā feronāfāke mā nokoaino afe pexe mēra ikinifo afeta fista ayanā pixikākai. Nāskaxō pexe fepoti feponifo. ¹¹ Nāskano nā xotofakefo kiroisī fitakani anā fenifo. Mā fēkaxō iskafakī yoitoshinifo: ‘Xanīfo, noko fepoti fēpexōfe nō ikikanō,’ faifāfe, ¹² ato kemani: ‘Maa. Ēkai mato ōimisma, ē mato ikimatiroma,’ ato fani.

¹³ “Nāskarifiakī māri isharakōixō ea manasharakōikāfe. Afetiāra ē anā matoki oxikai tsōa tāpiamaki,” Jesús ato fani.

Meka fetsafaxō koriōnoa Jesús ato yoini (Lc. 19.11-27)

¹⁴ Anā Jesús ato yoini iskafakī: “Ē anā mato yoinō Nios xanīfo iskaraki. Feronāfāke mā mai fetsa ari kakī a yonoxomis kenaxō yoini āfe kori kexexonō. ¹⁵ Akka a yonoxomis fetsa ināni cinco mil. A yonoxomis fetsari ināni dos mil, fetsari ināni mil. Akka nā kori kexekī tāpia ichapa ināni. Akka a kori kexekī tāpisharafomari ichapa ato inānima. Nāskax kani mai fetsa ari. ¹⁶ Akka āfe ina fetsa nā cinco mil fiato nā kōri afama mīsthi fini. Nāskaxō anā cinco mil fini āfe afama mīsthiōxō. ¹⁷ Nāskafakīri nā dos mil kori fiato nāatori nāskarifani afianā dos mil kori fikī. ¹⁸ Akka nā mil kori fiato nāato kori oneni āfe xanīfo mekexokī. Mai kini mēra maifani.

¹⁹ “Akka mā samarakax anā oni āto xanīfo. Mā oxō a yonoxomisfo nā tres ato yōkani afe tii kori fixofafomākī. ²⁰ Nāskakē nā cinco mil kori fini akiki oi taeni. Nāskaxō āfe xanīfo kori ināni iskafakī yoianā: ‘Xanīfo, mī ea cinco mil kori ināti. Akka ē finōmainīfofā anā cinco mil faxō ē fia. Ōipo. Nakīa mī kori,’ fani.

²¹ “Askafaifo āfe xanīfāfe yoini: ‘Aicho, mī ea yonoxomis sharakōi. Nā pishta ē mia ināoxō mī yonosharakōia. Nāskakē ēfe afama mīstifio ichapakōi ē mia anā ināni mī ea kexexonō. Nāskakē nā ē inimai keskariai mīri inimafe,’ ixō yoini.

²² “Nāskatari a yonoxomis fetsari chipo oni, nā dos mil kori fini. Oxō yoini iskafakī: ‘Xanīfo, mī ea dos mil kori ināni. Akka ē finōmainīfofā anā dos mil faxō ē fia. Nakīa mī kori,’ fani. ²³ Nāatori askafaifo āfe xanīfāfe yoini: ‘Aicho, mī ea yonoxomis sharakōi. Nā ē mia ināoxō mī yonosharakōia. Nāskakē ēfe afama mīstifio ē mia anā kexemani. Nāskax mīri nā ē inimai keskariai mīri inimafe,’ fani.

²⁴ “Nāskata a yonoxomis fetsari oni nā mil kori fini. Mā oxō āfe xanīfo yoini: ‘Xanīfo, ē tāpia mī feronāfāke mitsisipakōi. A mī fanama anoa mī fimis. Askatari a mī saakama

anoafori mī fimis. ²⁵ Nāskakī ē mesekī ē mia kori maifaxōa. Nakīa mī kori,' faito āfe xanīfāfe kemani: ²⁶ 'Mī ea yonoxomis chakakōi. Askatari mī xanikōi. Akka, ĵmī shināmē a ē fanama anoafō fita, a ē saakama anoafori ē fimis? ²⁷ Nāskakī nānori mī shinākī mī kori banco ano a fāxōama anā oxō ē kori ichapa fikerana mā ēfe kori ichapano ē anā fikerana,' fani. ²⁸ Nāskaxō nā anoafō ato yoini: 'Nā feronāfāke nā mil kori fīakāfe fetsa ināxikakī nā kori diez milya,' ato fani. ²⁹ Akka nā afara ichapaya ichapayakōi itiro. Nāskatori āfe afara ranāri anā meketiro. Akka nā afaa ichapayama āfe afara fīatiro anā afaa ichapaya iyamanō. ³⁰ Nāskata a yonoxomis chaka mā potaxō fakishifā mēra nīchini nā fakishi mēranoax oiayanā omiskōipakexanō," ixō Jesús ato yoini.

Mā mai keyoaino nā omiskōipakenakafoōnoa Jesús ato yoini

³¹ Anā Jesús ato yoini iskafakī: "Ē mato anā yoinō, ea nikakapo. Ē nai mēranoax oni. Ē Niosfiāx feronāfākekōi ē oni. Ē anā nai mēranoax fotoyoi, ē xanīfokōi oxii ēfe ājirifo fe keyokōi ē oxii, ea kemataima mapoi fetsexikani. Askatari ēfe xanīfāfe tsaoti ano tsaoxikani. Keyokōi sharafinakōia ōixikani. ³² Nāskatori yorafo keyokōi nā maitio anoafō ēfe ferotaifi ichanāxikani. Nāskakē ē ato paxkanā faxii nā oveja kexemisto āfe ovejafōya āfe cabrafo paxkanā fatiro keskakakī. ³³ Nā āfe inafō kexemisto āfe inafō paxkanā fakī āfe ovejafos āfe pōya kayakai aōri nīchixii. Askatari āfe cabrafori āfe pōya mishkiori nīchixii. Nāskarifiakī ē yorafo keyokōi ē paxkanā faxii. Nā ea Ifofaafos ēfe pōya kayakai aōri ē ato nīchixii, akka a ea Ifofaafomafori ēfe pōya mishkiori ē ato nīchixii. ³⁴ Nāskaxō mē xanīfoxō ē ato yoixii nā ēfe pōya kayakai aōrinoafō ekeki fekāfe, ēfe Epa Niospa mato inimamamiski. Nāskakē ēfe Epa Xanīfo ano mā afara fikai nā mai onifaitīa mato yoiyoni keskara. ³⁵ Akka ē fonāikaito mā ea pimamis; ē nōamāikaitori mā ea ayamamis; ē pexemaisax kafāsaitori, 'Nono ēfe pexe ano ofe nexo oxaxiki,' mā ea famis. ³⁶ Askatari ē rapatimaiskē mā ea ināmis; ē isinī ikaitori mā ea kexesharamis; ē karaxa mēra ikikēri kaxō mā ea ōimis.

³⁷ "Ē ato askafaito ea yōkaxikani iskafakākī: 'Ifo, ĵafetīa nō mia ōimismē mī fonāikaito, akka mī fonāikaito nō mia pimamis? Askatari, ĵafetīa nō mia ōimismē mī nōamāikaito, akka mī nōimāikaito nō mia ayamamis?' ³⁸ Askatari, ĵafetīa nō mia ōimismē pexemaisax mī kafasaito, akka nō mia pexe ināmis ano mī oxanō, askatari mī rapatimaiskē akka nō mia rapati ināmis? ³⁹ Askatari, ĵafetīa mī isinī ikaito nō mia ōimismē? Askatari, ĵafetīa karaxa mēranoax nō mia ōikamismē?" ixō ea yōkaxikani.

⁴⁰ "Ea askafaifono ē ato kemaxii: 'Ē mato paraima, nā fetsafo omiskōiaino mā tanaima ishaxō eōxō mā axomis.'

⁴¹ "Askatari na ēfe pōya mishkiorinoā ē ato yoikī iskafaxii: 'Na ēfe pōya mishkiorinoā emakinoax fotakāfe mā chakakōikī. Chii xoisai mēra fotakāfe anoax omiskōixikaki. Nā ē chii xoisai itipinī fani mēranoax Satanās chaka fe āfe yōshi chakafori anoax afe omiskōinakafo. ⁴² Akka ē fonāikaito mā ea pimamisma. Askatari ē nōamāikaito mā ea ayamamisma. ⁴³ Askatari ē pexemaisax kafāsaito, "Nono nōko pexe mēra ife," mā ea famisma. Askatari mā ea rapati ināmis. Askatari karaxa mēranoā mā ea ōikamisma. Askatari ē isinī ikaito mā ea ōikamisma,' ixō ē ato yoixii.

⁴⁴ "Ato askafaito yorafetsafāfe yōkaxikani iskafakākī: 'Ifo, ĵafetīa nō mia ōimismē mī fonāikaito, askatari a mī nōimāikaito, askatari mī pexemaiskē, askatari mī rapatimaiskē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?'

⁴⁵ "Ea askafaifono ē Xanīfokōixō ē ato kemaxii iskafakī: 'Ē mato paraima. Nā omiskōiaifo mā ato tanamisma nafokai afaafoma ixō askatari eari mā tanamisma,' ixō ē ato yoixii. ⁴⁶ Nāskakē nāfo nā omiskōipakenakafo mēra foxikani. Akka nā ea Ifofaafō efe nīpanakafo," ixō Jesús ato yoini.

26

"Ĵafeskaxō nō Jesús retetiro mē?" ixō shinānifo

(Mr. 14.1-2; Lc. 22.1-2; Jn. 11.45-53)

¹ Nāskata mā ato yoikī keyota Jesús aōxō tāpimisfo yoini: ² "Mā mā tāpiakī oxa rafeta Pascua fista ikiki. Nāskatori Pascua fistaia ea achikani fetsafāfe ea mastanōfo," ixō Jesús ato yoini.

³ Nāskakē a Niospa meka yoimis xanīfofo fe a judeo anifofo ichanānifo Caifās pexe anoax. Nā Caifās ato Nios kīfixomisfāfe āto xanīfo ini. ⁴ Nāno ichanākanax yoinānifo: "Ĵafeskaxō nō Jesús achitiro mē paraxō retexiki?" ikanax yoinānifo. ⁵ Nāskakanax yoinānifo: "Fistatīakai nō achitiro ma yorafī rasi mekai fetsekani nokoki ōitifishkitirofo," ikanax yoinānifo.

Kēromā Jesús shinākī āfe mapoki pirofomā nachini

(Mr. 14.3-9; Jn. 12.1-8)

⁶Nāskata Jesús Betania ano ini Simón pexe ano. Nā Simón “Rashkishiai” fapaonifo. ⁷Jesús nānoxō piaino kēro fisti akiki kani pirofomā manishomo sharakōiki foikai nā manishomo āfe ane alabastro. Akka nā pirofomā kopikōi ini. Jesús mīsa ano tsoaxō piaino, nā kēromā āfe mapoki pirofomā nachini. ⁸Askafaito ōikani Jesúsxō tāpimisfo ōitifishkianā iskanifo: “¿Afeskakī nā pirofomā shara mī nachimē? ⁹Mī ato minixō mī kori ichapa fixō a afaamaisfo mī ato inākerana,” fanifo.

¹⁰Askafaifāfe nikakī Jesús ato yoini: “¿Afeskakī na kēro mā fekaxtefaimē? Na ea iskafai sharaki,” ato fani. ¹¹“Akka nā afaamaisfori mato fe ipanakafo. Akka eakai mēxotaima mā ea anā ōima. ¹²Akka na kēromā ea iskafakī ēfe yorakī pirofomā nachia ea itipinīsharafakī ea iskafa ea maifasharaxinōfo. ¹³Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

Judaspa aōxō tāpifikatsaxakī Jesús ato achimani
(Mr. 14.10-11; Lc. 22.3-6)

¹⁴Nānori Jesús ato yoiaino a aōxō tāpimis fetsa, āfe ane Judas Iscariote, nā kani nā ato Nios kīfixomis xanīfofo ano. ¹⁵Mā kaxō ato yoini: “¿Afe tii mā ea kori inātiromē ē mato Jesús achimanō?” ato faito yoinifo: “Treinta nō mia inātiro,” fanifo. ¹⁶Nāskaxō Judaspa shināki taefani: “¿Afesxomāi ē Jesús ato achimanō?” ixō shināni.

Mā chaima reteaifono Jesús aōxō tāpimisfo feta yātapake pini
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷Akka nā Pascua fistaŋa pāa faraxatimais pipaonifo. Nāskata mā fista pakeano aōxō tāpimisfo akiki fokaxō yōkanifo: “¿Fanī mī fichipaimē ano kaxō nō itipinī fanō, anoxō Pascuatia yātapake pixiki?” fanifo.

¹⁸Askafaifono Jesús ato kemani iskafakī: “Oa pexe rasi ano fotakāfe. Nānoa feronāfaka fetsa fichixō yoitakāfe iskafakī: ‘Nōko Ifāfe noko yoia nō mia yoiyonō iskafaki: Mē chaima naikai. Nōko fistaŋa mī pexe anoxō eōxō tāpimisfo feta ē pii kaikai,’ ixō yoitakāfe,” ato faano, ¹⁹nāskafakī yoinifo nā āto Ifāfe ato yoia keskafakī. Nānoxō itipinī fanifo Pascua fistaŋa pixikakī.

²⁰Jesús mā fakishaino pexe ano nokoax mīsa ano tsaoni a aōxō tāpimiskōifo fe. ²¹Nānoxō piyanā ato yoini: “Ē mato pāraima, fatora mā fētsa ea mā ato achimafainaka,” ato fani.

²²Ato askafaito nikai shināmitsakōinifo. Nāskaxō yōkaketsanifo: “¿Ēraka, Ifo?” fakī fetsanifo.

²³Askafaifono Jesús ato kemani: “Nā efeta sapakinoa pāa momoxō piaito nāto ea ato achimaxii. ²⁴Ē Niospa Fakekōifiax ē yorakōi. Nā eōnoa yoikī kirika kenenifo keskakōi fakī ē asharakōitiro. Akka nā feronāfaka ea ato achimafiax akairi omiskōikōixii. Akka nā feronāfaka shara ikerana fakeyamanixakī,” ixō Jesús ato yoini.

²⁵Nāskakē Judaspa nā ato achimanaito yōkani: “Maestro, ¿ēraka?” faito, “Ēje, nā mī yoiai keskarakā,” Jesús fani.

²⁶Nāskakaxō piaifono Jesús pāa tsomainīfofā Apa Nios kīfīni. Mā Apa kīfita pāa kaxkeket-saxō aōxō tāpimisfo ināni ato iskafayanā: “Na ēfe nami keskara pikāfe,” ato fani.

²⁷Ato askafata kechokinoa fimi ene tsomainīfofāxō Apa Nios kīfīni. Nāskaxō aōxō tāpimisfo ato ayamani ato iskafayanā: “Na fimi ene ayakāfe,” ato fani. ²⁸Nāskaxō ato yoini: “Nafi ēfe imi keskaraki. Akka nā ē mato yoiyoni keskai mē nai. Nāskakaxō ēfe imi ōikaxō tāpitirofo Epa Niospa yoiyoni keskafakī yora ichapafo ē ato chaka soaxonō. ²⁹Akka anā ē mato yoinō ē anā mato feta fena na fimi ene ayāima. Mā mā nai mēra kano ē mato feta anā fimi ene ayaxii ēfe Epa xanīfo anoxō,” ixō Jesús ato yoini.

“Ē Jesús ōimisma,” Pedro ixaiino Jesús ato yoini
(Mr. 14.26-31; Lc. 22.31-34; Jn. 13.36-38)

³⁰Nāskakata mā fanāiki xatekata machi Olivos ano fonifo. ³¹Nānoxō Jesús ato yoini: “A na fakishi keyokōi mā ea shināmaki fetsei. Nānori kirika kenenifo iskafakakī: ‘Āfe ifo reteaifono, āfe ovejajo ichoi fetsetirofo,’ ixō kirika kenenifo,” ato fani. ³²“Akka ea retefiafono ē otox ē Galilea ano rekē kai mā kayoamano,” ato faino, ³³Pedro kemani: “Keyokōi shināmakifiaifono, akka ēkai mia shināmakima,” fani.

³⁴Askafaito nikakī Jesús yoini: “Ē mia pāraima na fakishi takara fene keofamano, ‘Ē Jesús ōimismara,’ mī ea fai tres fakī,” fani.

³⁵Askafaito nikakī anā Pedro kemani: “Maa. Mia retefiaifono ē mefe nai. Ē ōimismara ē mia faima,” fani. Pedro askafaito nikakakī keyokōichi aōxō tāpimisfāfe askafakī fetsanifo.

Getsemani anoxō Jesús Apa Nios kīfīni
(Mr. 14.32-42; Lc. 22.39-46)

³⁶ Nāskata Jesús kani aōxō tāpimisfo fe Getsemaní ano. Nānoxō ato yoini: “Nono tsaokāfe oní chaimashta kaxō ē Epa Nios kífiyotanō,” ato fani.

³⁷ Akka Pedro iyoní, Zebedeo fake rafe yafi. Nāskaxō āfe yora meeni shināmitsakōiyanā fekaxteaito. ³⁸ Anoxō ato yoini: “Ēfe yōshi shināmitsai napaiyaito ē meikai. Nono nētekāfe oxakakima māri efeta ōisharaxikākí,” ato fani.

³⁹ Ato askafata Jesús ares fisti ori chaimashta kani. Nānoax maikiri fepepakekafata āfe fishpi mai tiisani. Nāskaxō Apa kífini iskafakí: “Epa, na ē omiskōiāi ekeki nokoyamafe. Akka nā ē apaiyai keskafakima. Nā mī ea amapaiyai keskafafe,” fani.

⁴⁰ Nāskata anā anoris oní aōxō tāpimisfo ano. Oxō ato ōia oxafō inifo. Nāskaxō Pedro yoini: “¿Mā efeta pishta oxa tenetirōmamē?” ato fani. ⁴¹ Nāskafata anā yoini: “Moikaxō Epa Nios kífikāfe Satanás chakata mato chakafamapaiyai keskara axikakima. Chaníma, nā Epa Niospa mato amapaiyai keskara mātō shinā mēraxō mā apaifíkí mā atiroma. Akka mātō yora pachikōikí,” ato fani.

⁴² Ato askafata anā kani Apa Nios kífikāi iskafakí: “Epa, ea mīa omiskōimayamakí ea mīa omiskōimatiroma. Akka nā mī ea amapaiyai keskafafe,” fani.

⁴³ Nāskata anā oxō ato fichitoshini aōxō tāpimisfo oxafono, oxa paemei fetsoafono.

⁴⁴ Nānoa ato ōifaini kaxō anā Apa Nios kífini, afia yoitana keskafakí. ⁴⁵ Nāskata Jesús anā oní aōxō tāpimisfo ano. Mā oxō ato yoini: “¿Aimā oxamē tenekōiyanā? Akka iskaratía a ea ato achimaniyoai mā chaima oi kiki. Yora chakafāfe ea achifenōfo ato efei kiki. ⁴⁶ Fininifōfākāfe nō kanō. Mā chaima oi kiki a ea ato achimaniyoai,” Jesús ato fani.

Jesús achinifo

(Mr. 14.43-50; Lc. 22.47-53; Jn. 18.2-11)

⁴⁷ Jesús ato yoiaino Judas nokoni, nā Judaspa Jesúsxō tāpifikatsaxakí, yorafā rasifo fe oní. Nā yorafō kenofoya ifi xatefoya fenifo, a ato Nios kífixomisfāfe āto xanīfofo feta judeofāfe āto xanīfofōfāfe ato nīchiafōno. ⁴⁸ Judaspa nā ato efeaito ato yoiyoni iskafakí: “A ē kokoki tsoo akaito ōikí achirisafaxikākí,” ato fani.

⁴⁹ Mā Jesús ano nokoxō Judaspa iskafakí yoini: “Maestro, ¿mīmē?” fatishoni. Nāskaxō kokotoshini.

⁵⁰ Askafaito ōikí Jesús kemani: “Efe yora, nā mī apaiyai keska farisafafe,” fani.

Askafaito ōikakí nā Judas fe foafāfe Jesús achinifo. ⁵¹ Akka Jesús achiaifāfe ōikí a aōxō tāpimis fētsa āfe keno chainipa tsekainīfōfā a ato Nios kífixomisfāfe āto xanīfāfe ina paxteni.

⁵² Askaito ōikí Jesús yoini: “Mī keno fafe. Akka nō kenopa retenāino kenopari noko retetirofo. ⁵³ ¿Mī tāpīamamē Epa Nios ē yoiāito iskaratía āfe ājirifo ichapakōi ea nīchixotiro ea kexei fenōfo?” fani. ⁵⁴ “Ē iskaratía ājiri kenano ea kexeaifono ē naima. Akka nā Niospa meka yoikí kirika kenekí yoinifo keskaí ē naikai,” Jesús ato fani.

⁵⁵ Askaifono ōikí Jesús yorafō yōkani: “¿Afeskai kenofoya ifixatefoya mā oamē ea achiyoí oa ē yometso keskarakē? Pena tii ē mato fe itiani Nios kífiti pexefā mēraxō ē mato tāpimani, akka mākai ea achipaimisma. ⁵⁶ Akka nā eōnoa yoikí kenenifo keskafakí mā ea achi,” ixō Jesús ato yoini.

Ato askafaino aōxō tāpimisfo Jesús ōifaikani. Ichoi fetsenifo a makinoax.

Xanīfo finakōiafo ano Jesús iyonifo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Mā Jesús achikaxō a ato Nios kífixomisfāfe āto xanīfo Caifás āfe pexe ano iyonifo. A xanīfofo fe a Moisés yoikí kirika kenení keskara ato tāpimamisfo fe a judeo anīfofo fe nā tsoafofo ano Jesús iyonifo. ⁵⁸ Pedro chai ixō ōini faki Jesús iyoi fokanimākai. Nāskaxō ato chífafoni. Nāskata nā ato Nios kífixomisfāfe āto xanīfāfe pexe emāiti ano Pedro nokoni. Mā nokoax nāno tsaoni nā pexefā kexemisfo fe anoxō Jesús afeska fakanimākai ōixiki.

⁵⁹ Nā Nios kífixomis xanīfofo feta a ato fe rafeafāfe Jesús noikaspakakí, “¿Afaa nō fatiromē Jesús afaa chakakōi faamakí nō retexiki?” ixō shinānifo. ⁶⁰ Akka Jesús afaa chakafayamafiano, yora ichapafāfe āa chakafakakí mekafanifo parakí. Akka aōnoa afaa chaka nikanifōma. Nāskakē feronāfaka rafari mekafai fekaní fenifo. ⁶¹ Nā rafeta yoinifo: “Mā nō nikaita Jesús iskaito: ‘Ē na Nios kífiti pexefā ē pāo fatiro. Nāskata tres nia oxata ē anā pexefā fatiro; ikaito nō nikaita,” fanifo nā rafeta āa parakakí.

⁶² Askafaiyono a ato Nios kífixomis xanīfo fininīkafāta Jesús yōkani: “¿Mī kemamitsaimamē afamē na mīōnoa meka chaka yoiāifo?” ixō yoini.

⁶³ Akka Jesús tooxinima. Nā Nios ato kífixomis xanīfāfe yoini iskafakí: “Nā Nios nīpanakato mia ōi kiki mī yoikai chanīmākōi, noko yoife mīmākí Cristo Niospa Fake,” fani.

⁶⁴ Askafaito nikakí Jesús kemani: “Nā mī ea yoiāi keskarakía, ēkía Niospa Fake. Ē mato yoinō. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

⁶⁵ Ato askafaito nikakakī a Nios ato kīfixomisfāfe āto xanīfāfe āfe rapati faxteni yorafāfe tāpinōfo Jesús yoiaito nikakasapakī. Askafata yoini: “Na feronāfāke āfe meka chakakōi Nios chakafakī mekafai. Mā nōakōi nō nikakī noko anā tsōa yoitromaki nō tāpinō,” ato fani.

⁶⁶ “¿Afe keskara mā shināmē?” ato faito keyokōichi kemanifo: “¡Nanōki!” fanifo.

⁶⁷ Mā fenexkaxō āfe femānāki kemo mechoketsayanā koshaketsanifo. Atiritō fepasket-sanifo. ⁶⁸ Iskafakī yoianā: “Mīkai Cristomākī, noko yoife tsōa mia koshaketsamakī,” fanifo.

“Ē Jesús ōimisma,” Pedro ini

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedro nāno ato fe pexefā emāiti tsaono, nāno kēro xomaya a xanīfo yonoxomis akiki kaxō yoini: “Mīri Jesús fe kafāsamis Galilea anoax,” faito, ⁷⁰ Pedro kemani, yorafāfe ōiaifono iskafakī: “Ēkai Jesús ōimisma. Ēkai afaa tāpiama tsoaraōnoa mī yoi,” fani.

⁷¹ Nāskafata pexe fepoti ano kani. Nānoa kēro xomaya fētsari fichixō fetsafo yoini: “A nari Jesús fe Nazarete anoax kafāsamis,” fani.

⁷² Askafaino anā Pedro kemani: “Maa, nā mī yoiai keskara Niospa tāpia ē na feronāfāke ōimisma,” fani.

⁷³ Nāskafaino nā anoafāfe Pedro ano fōkaxō yoinifo: “Chanīma, mīri Jesús fe rafemis mā nō mia nikai mī mekaito, nā keskara,” fanifo.

⁷⁴ Nāskafaifono Pedro ato yoikī taefani iskafakī: “Ē mato paraima, Niospa ea ōi ē chanīkē Niospa ea omiskōimatiro. Niospa tāpia ē mato yoikōi nā feronāfāke ē ōimisma,” ixō ato yoini.

Pedro askaino takara keoinākfani. ⁷⁵ Nāskaino Pedro shināni nā Jesús yoita keskara. “Takara keoyoamano mī ato yoikī tres faxii: ‘Ē Jesús ōimismara,’ mī ixii,” ixō Jesús yoita keskara Pedro shinātani. Nāskata Caifās pexefā mēranoax kākainax oiāi finakōini.

27

Pilato ano Jesús iyonifo

(Mr. 15.1; Lc. 23.1-2; Jn. 18.28-32)

¹ Nāskata mā penaino keyokōi a ato Nios kīfixomis xanīfofo fe judeo anifofo yoinānifo: “¿Afeskaxō nō Jesús retetromē?” ikanax yoinānifo. ² Nāskakaxō metexkere akaxō Jesús iyonifo Pilato ano. Nā Pilato āto xanīfo yora fetsa Roma ano ini.

Judas nani

³ Judaspa Jesús ato achimaxō reteaifāfe ōikī shināmitsayanā ato treinta kori exe ināni, a ato Nios kīfixomis xanīfofoya judeo anifofo. ⁴ Ato iskafayanā: “Ē chakafaa, Jesús afaa chakafayamafiamiskē. Paraxō ē ato achimana retenōfo,” ato faito kemanifo: “Nōkai aōnoa afaa shināchakaima. Mīa mī shināchakakōi,” fanifo.

⁵ Askafaifāfe nikai nā Nios kīfiti pexefā mēraxō ato nāmā kori exe saafaini kaax āari tenexemeax Judas nani.

⁶ A ato Nios kīfixomis xanīfofōfāfe anā kori finifo iskayanā: “Na kori exe imi foano mā chakanaki. Nāskakē a kori fati mēra nō nanetromaki,” ikax yoinānifo.

⁷ Nāskakanax yoinānifo: “A na kōri nō mai finō ano yora fetsafo maifaxiki. Nā neo kesho fakakī neo fimisfo anoā nā mai nō finō,” ikanax yoinānifo. ⁸ Nāskakē nā mai anekī fetsafanifo. “Imi Mai,” fanifo. Akka iskaratīari, “Imi Mai,” famisfo. ⁹ Nāskakē nā Niospa meka yomisto Jeremias a inōpokoai yoikī kirika keneni keskakōini. Iskafakī yoikī keneni:

Kori exe treinta fixikani nā israelifāfe yoinifo keskafakī. ¹⁰ Nāskakē nā kōri kesho faxii mai fimisfo anoā nā mai finifo nā Niospa ea yoiyoni keskafakī, ixō Jeremias keneni.

Pilato xanīfāfe Jesús yōkani

(Mr. 15.2-5; Lc. 23.3-5; Jn. 18.33-38)

¹¹ Jesús iyonifo Pilato xanīfo ano. Mā iyoafono nānoxō yōkani iskafakī: “¿Mīmē judeofāfe xanīfo?” faito Jesús kemani: “Ēje, nā mī ea yoiai keskarakīa,” fani.

¹² Akka nā ato Nios kīfixomis xanīfofo feta judeo anifofofāfe, “Mī chakakōi famis,” pārakī fanifo. Askafaifono Jesús ato kemanima. ¹³ Nāskakē Pilato yōkani: “¿Mī nikaimamē mia chakafakī mekafaifāfe?” fani.

¹⁴ Askafaito nikakī, Jesús kai pishta kemanima. Nāskakē xanīfo Pilato, “Kee, ¿afeskai ea kemaimamē?” ixō shināni.

Pilato ato yoini Jesús retenōfo

(Mr. 15.6-20; Lc. 23.13-25; Jn. 18.38-19.16)

¹⁵ Akka Pascua fistatīa xanīfo Pilato yora fisti karaxa mēranoa kaimapaoni. Nā yorafāfe kaimapaiyaifo ato kaimaxopaoni. ¹⁶ Akka nā karaxa mēra ika feronāfāke chakakōi ini, āfe ane

Barrabás ini. ¹⁷ Nāskakē yorafo ichanāfono Pilato ato yōkani: “¿Fato mā fichipaimē ē mato kāimaxonō? ¿Barrabás iyamai Jesús nā Cristo nā Niospa nīchini ē kāimatiromē?” ato fani.

¹⁸ Akka mā Pilato tāpia ini judeo xanīfāfe shināchakaito nō anā xanīfo itiromara ixō, a ano Jesús iyoaifono.

¹⁹ Nā xanīfāfe tsaoti kamaki tsaoxō Pilato shināino, āfe āfinī āfe ina nīchini Pilato yoitanō: “Mī āfinī ea yoia ē mia yoinō iskafakī: ‘Na feronāfāke afaa chakafamismakī afeska fayamafe. Efe namapa aōxō chakakōi ē namakī, mia faa,’ āfe inapa fani.

²⁰ Akka nā ato Nios kīfixomisfāfe āto xanīfofo feta judeo anifofofāfe āfe yorafo ato yoinifo iskafakakī: “Jesús kāiyamanō. Akka Barrabás kāinō. Jesús ato retemanō Pilato yoikāfe,” ato fanifo. ²¹ Askaifāfe xanīfo Pilato anā ato yōkani: “Fato mā fichipaimē ē mato kāimaxonō ea yoikāfe,” ato faito, “Barrabás kāimafe,” fanifo.

²² Anā Pilato ato yōkani: “Akka, ¿ē Jesús nā Cristo famisfo ē afeska faimē?” ato faito, keyokōichi kemanifo: “¡Ifi cruz ikaki mastamafe!” fanifo.

²³ Askafaifāfe nikakī Pilato ato yoini: “Akka, ¿naato afaa chakafamē?” ato fani.

Ato askafaito nikakakī fāsikōi yoinifo: “¡Mastafe!” fanifo.

²⁴ Akka Pilato ōia tsoa nikakanima inifo. Yorafā rasi fāsikōi mekanifo. Nāskakē āfe ina faka fixotanō nīchini. Askata mechokomeni yorafāfe ferotaifi ōinōfo ato iskafakī yoianā: “Ēkai afaamaki na feronāfāke ē retepanā. Mā mā apaikai akāfe. Eōnoax naima kiki. Matoōnoax nai kiki,” ato fani.

²⁵ Ato askafaito yorafāfe kemanifo: “Akka nō akikai retakī nō tenetiroma nokoōnoax nai. Nōko fakefoōnoaxri nai,” fanifo.

²⁶ Nāskakē Pilato Barrabás ato kāimaxoni. Nāskata mā Jesús ato koshamata ifi cruz ikaki mastatanōfo ato yoini.

²⁷ Askata sorarofāfe Jesús iyonifo xanīfāfe pexefā ano. Nānoax sorarofa ichanākanax Jesús kemataima niakenifo. ²⁸ Nāskakaxō āfe rapati pēkakaxō, rapati ōshi nana safemanifo, xanīfāfe tari keskara. ²⁹ Nāskatari moxa chainipafo maiti fākaxō maimanifo. Āfe mēke kaiyakai aōiriri ifi chati tsoamanifo. Nāskakaxō āfe ferotaifi ratokonō mai chachipakefofā āto xanīfo feyakanakōi keskarakaxō kaxemetsamakōi fanifo, iskafakī: “Mī sharakōi. Mīfi judeofāfe āto xanīfo,” fanifo kaxefakakī. ³⁰ Nāskakata akiki kemo mechokata, afia ifi xate tsoma fiakaxō aō mapoki koshanifo. ³¹ Mā kaxemetsama fakaxō, tari ōshi fiakata, Jesús āfe rapatikōi safemakaxō iyonifo mā mastai fokakī.

Jesús ifi cruz ikaki mastanifo

(Mr. 15.21-32; Lc. 23.26-43; Jn. 19.17-27)

³² Anoax fōkakī, feronāfāke fisti fichinifo āfe ane Simón. Nā Simón Cirene anoa ini. Nāskaxō yoinifo: “Na Jesús ifi cruz ika foxōi afe,” fanifo.

³³ Nāskakata nokonifo machi āfe ane Gógota ano. (Nā āfe ane fetsa Mapo Xao fanifo.)

³⁴ Nānoxō fimi ene moka osia Jesús ayamapainifo. Akka Jesús mā meexō ayakaspani.

³⁵ Nāskata mā Jesús mastakaxō āfe rapati fianifo. Sorarofāfe makex tokoronō tsakaket-sakaxō nāskakaxō sakka sakka anifo kanānōnakakī. Nā kanāto Jesús tari fōani. Nāskaxō Jesús rapati fetsa fianifo. ³⁶ Mā Jesús mastakanax nāno tsaonifo anoxō kexexikakī. ³⁷ Nāskaxō āfe mapo mānāori tafarakī kenexō mastanifo. Mā retexō kenekī iskafanifo: “Jesúsfi judeofāfe xanīfoki,” ikaxō kenenifo.

³⁸ Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo. ³⁹ Nā ano finōfāifāfe Ichayanā āto mapo rafe rafeanifo. ⁴⁰ Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetriomākī mā ifimefe. Mī Niospa Fakemākī na ifi cruz ikakinoax fotopakekafāfe,” fanifo.

⁴¹ Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika kenenī keskara ato tāpimamisfo a judeofāfe āto xanīfofori āa ranā yoinānākani iskanifo: ⁴² “Naato fetsafo ifititroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano nō chanīmara fai. ⁴³ A naato Nios shināmis. Mēxotaima noko yoimis: ‘Epa Nios ēfe Epakōira,’ noko famis. Akka chanīmamakī Niospa noikī ifimākai nō ōinō,” ixō mekafakī chakafanifo.

⁴⁴ Nāskaxō nā yometso rafeya mastafono fētsa chakafakī mekafakī Ichani.

Jesús nani

(Mr. 15.33-41; Lc. 23.44-49; Jn. 19.28-30)

⁴⁵ Nāskata xini keya nā mai tio fakishifākōi itani. Nāskax mā xini kaino anā penani. ⁴⁶ Nāskata mā penano Jesús fāsikōi āfe mekapa kenai iskani: “Elí, Elí, ¿lema sabactani?” Nōko mekapa iskafakī yoini: “Ēfe Nios, Ēfe Nios, ¿afeskakī mā ea potamē?” fani.

⁴⁷ Nāskaito nā ano niāfāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

⁴⁸ Nāskaito nikafaini fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki aō nētaxō ayamapaini. ⁴⁹ Askafaito ranārīto yoinifo: “Enefe. Elías nai mēranoax fotoxō ifimākai nō ōinō,” fanifo.

⁵⁰ Anā Jesús fāsikōi ea ini. Nāskax nani. ⁵¹ Mā Jesús natanaino, sama nami Nios kīfiti pexefā mēranoax naki rafekōi faxtepakēkafāni fomākianoax. Nāskatari mai naya naya ini. Tokirinīfāfori kaxkei fetseni. ⁵² Nāskakē a maiafo anoax kini fepekemetani. Akka a Nios Ifofafo nakatsaxakakī otōinīfōfānifo. ⁵³ Nāskakata maiafo anoax fonifo. Mā Jesús otōitano, Jerusalén ano fonifo. Nānoxō yora ichapafāfe ōinifo.

⁵⁴ Nāskata soraro xanīfāfe a afeta Jesús kexeafo feta ōinifo mai naya naya ikaito afarafori afeskara ikaito. Nāskakē ratekōiyānā yoinānifo iskayanā: “Chanīma, na feronāfake Niospa fake ika,” fanifo.

⁵⁵ Kērofāferi chaimashta nikaxō ōinifo. Kēro ichapafāferi Jesús fe foponifo Galilea anoax ato afara axosharamisno. ⁵⁶ Nā tiixō Jesús ōinifo. Maria Magdalena ikaino Maria fetsari ikaino, nā Maria Jacobo feta José āto afa ini. Askatari kēro fetsari ini Zebedeo āfe āfi. Āfe fake rafe Santiago fe Juan ini. Keyokōichi Jesús ōinifo chaimashta nikaxō.

Jesús makex kini mēra maifanifo

(Mr. 15.42-47; Lc. 23.50-56; Jn. 19.38-42)

⁵⁷ Akka mā fakishaino feronāfake kori ichapaya fisti kani āfe ane José. Nā José Arimatea mai anoax ini. Nāatori Jesús Ifofamis ini. ⁵⁸ Nā José xanīfo Pilato ano kaxō Jesús āfe yora yōkani maifai axiki. Nāskakē Pilato ato yoini Jesús āfe yora inānōfo. ⁵⁹ Nāskata José mā Jesús yora fixō, sama oxosharakōipa rakoni. ⁶⁰ Nāskaxō makex kini a toa maiyomisma mēra ratani. Nā makex kini fakī José ayoni. Nāskata nā Jesús maifaa ano makex kini tokirinīfanē fepofaini kani. ⁶¹ Akka Maria Magdalena fe Maria fetsa nāno nētekanax a Jesús maia ano tsaokaxō ōinifo.

Sorarfāfe Jesús maia ano kexenifo

⁶² Mā askaitano, judeofo āfe pena tenetiā a ato Nios kīfixomisfāfe āto xanīfofo fe fariseofo fonifo Pilato ōifokani. ⁶³ Mā fōkaxō yoinifo iskafakakī: “Xanīfo, mā nō shināi na feronāfake chanīmisto nayoxoma yoikī iskafamis: ‘Ē naax tres nia oxata ē otōxii,’ ixō yoisim. ⁶⁴ Nāskakē mī sorarofo nīchife a maia ano kexeyonōfo tres nia aōxō tāpimisfo fakishi fēkaxō āfe yora fiyamanōfo. Fīakaxō yorafo yoitirofo iskafakī: ‘Mā Jesús otōaki,’ ato fatirofoki. Akka ē otōxira ikax a chanīmiskī. Nāskakē mā otōara ikaxō ato parakī finakōitirofoki,” fanifo.

⁶⁵ Askafaitono Pilato ato yoini: “Nakīa sorarofo. Ato iyotakāfe. Fokaxō mafa kini kexesharatakāfe nā mā apaiyai keskafakī,” ato fani. ⁶⁶ Nāskakanax fonifo. Mā fōkaxō itipinī fanifo nā mafa kini. Nāskata nā aō fepoa tokirinīfā sichopa marakka fanifo. Nāskakaxō ano sorarofo nīchitakani fenifo anoxō kexesharanōfo.

28

Jesús otōni

(Mr. 16.1-8; Lc. 24.1-12; Jn. 20.1-10)

¹ Judeofāfe āto pena teneti safaro mā finōano, nāskata nomīkonō fakishparikōi fonifo a Jesús maia ano. Maria Magdalenanō Maria fetsanō fonifo a Jesús maia ano ōifokani. ² Nāskata samamakōi fāsikōi mai naya naya ini, nōko Ifo Niospa āfe ājiri nai mēraxō fotomanaino. Mā fotota a Jesús maia ano kaxō, a aō fēpoita tokirinīfā feta a kamaki tsaoni. ³ Nā nōko Ifo Niospa āfe ājiri fafekōini, nā kana peeikai keskara. Āfe rapati oxofinakōi ini. ⁴ Askaito ōikani sorarofo choayanā ratekōinifo. Nāskakanax oa naa keskara nāmā pake pakefōfānifo. ⁵ Akka nā nōko Ifo Niospa āfe ājirinī nā kēro rafe yoini: “Rateyamakāfe. Mē tāpiakī mā Jesús fenaioyaki a mastaitafo,” ato fani. ⁶ “Nonomaki, mō otōaki a mato yoisim keskai. Ōifekapo, a rātaitafo ano. ⁷ Koshikōi fōkaxō aōxō tāpimisfo yoirisafatakāfe iskafakī: ‘Mā otōaki. Galilea ano kai kiki mā kayoamano. Nānoa mā ōikaikai ato yoitakāfe. Mē mato yoikai shināmakiyamakāfe,” ato fani.

⁸ Ato askafaito nikafaikani nā kēro rafe koshikōi fonifo nā Jesús maita anoax. Ratefīyanā āto shinā mēra inimakōinifo aōxō tāpimisfo chanifaifokani ichonifo. ⁹ Ichoaifono Jesús atoki nokorisatani nā kēro rafeki. Nāskaxō, “Mē oi,” ato fani. Ato askafaino nā kēro rafe Jesúski fōkaxō akiki inimakakī ratokonō mai chachipakefōfā āfe fitax ano achinifo. “Mī sharakōi,” fanifo. ¹⁰ Nāskaxō ato yoini: “Rateyamakāfe. Fokaxō ēfe extofo ē yoisim keska fakī ea ato yoixotakāfe Galilea ano fotanōfo. Nānoa ea fichifokani kiki,” ixō ato yoini.

Sorarfāfe ato yoinifo

¹¹ Mā nā kēro rafe foaifono, nā Jesús maia ano kexekanax soraro ranāri fonifo pexe rasi ano. Mā fōkaxō a ato Nios kīfixomis āto xanīfofo yoinifo nā ōiafo keskara. ¹² Nā xanīfo ano fonifo. Nā anifofo fe mekai fokani, ato fe yoināsharaxikaki. Nāskakaxō sorarofo kori ichapakōi inānifo. ¹³ Ato iskafanifo: “Ato iskafakakī yoitakāfe: ‘Nō fakishchāi oxano Jesús āfe inafo fēkaxō āfe yora yometsoanafo,’ ato fatakāfe. ¹⁴ Mā ato askafaito xanīfāfe nikaxō mato afara faito, nō yoisharanō mato afeska fanōfoma,” ato fanifo.

¹⁵ Nāskakaxō sorarofāfe mā kori fikaxō, mā fōkaxō nā ato yoiafo keskafakī ato yoinifo. Nāskakē nā maitio anoxō nikaketsanifo. Iskaratiari a keskara chanīmara famisfo judeofāfe.

*Jesús aōxō tāpimisfo yoini aōxō keyokōi yoifofāsafatanōfo
(Mr. 16.14-18; Lc. 24.36-49; Jn. 20.19-23)*

¹⁶ Nāskakanax Jesús aōxō tāpimisfo once fonifo Galilea ano, nā Jesús ato yoiyomis keskai fonifo māchifā ari. ¹⁷ Nāskakata Jesús ōikakī, “Aicho, mī nōko Ifo Jesús nō mia noikōi,” fanifo. Akka Jesús otoano ranārito chanīmara fanifoma. ¹⁸ Nāskaifono Jesús atoki kaxō ato yoini: “Ēfe Epa Niospa ea yoia nai mēranoafoya nono mai anoafori ē ato yoinō. ¹⁹ Akka nā maitio ano yorafoki fotakāfe ato yoixikakī ea Ifofasharanōfo. Nāskaxō ēfe Epa aneōxō ato maotisafapatakāfe. Ēfe aneōxori ato askafatakāfe, āfe Yōshi Sharaōxori ato askafatakāfe. ²⁰ Nāskaxō ato yoisharakāfe nikasharakōinōfo nā ē mato yoia keskara. Akka ē mato fe mēxotaima ipanakaki,” Jesús ato fani.

Marcos Jesú^snoa Yoikĩ Keneni

Juan Maotista tsōa istomaxō ato yoini

(Mt. 3.1-12; Lc. 3.1-9, 15-17; Jn. 1.19-28)

¹ Ĕ mato meka shara yoinō Jesucristoōnoa. Nā Jesucristo Niospa Fakekōi.

² Afetiama nā Isaías Niospa shināmanaino Jesucristoōnoa yoikĩ kirika keneni iskafakĩ:

Mĩ nai mēranoax nāmā fotoyoamano nā ěfe meka yoisim ē atoki rekē nīchixii mīōnoa ato yoinō, itipinīsharanōfo chipo mia nikasharaxikani kiki,

ixō Epa Niospa āfe Fakeōnoa yoinino Isaías keneni. ³ Askatari anā keneni iskafakĩ:

Tsōa istoma anoxō yorafo yoixii akiki feaifono iskafakĩ ato yoixii nā ěfe meka yoisim ato yoixii iskafakĩ: “Itipinīsharakāfe. Mā chaima nōko Ifo oi kiki. Māto chaka xatekāfe ishaxikākĩ,” ixō ato yoixii,

ixō Juanoa yoikĩ Isaías kirika keneni. ⁴ Nānorikōi Juan ato yoini tsōa istomaxō yorafo ato maotisafayanā. Ato iskafakĩ yoiyanā: “Anā Nios shinākāfe māto chaka xateyanā ē mato maotisafanō Epa Niospa māto chaka mato soaxonō,” ixō Juan ato yoini. ⁵ Nāskakē keyokōi Judea anoax feaifono, Jerusalén anoaxri fenifo, ato yoiaito nikai fekani. Nānoxō a afara chakafamisfo yoiaifono, Juan ato maotisafapani faka Jordán anoxō.

⁶ Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni. Nāskaxō tseo pipaoni, fonari apaoni. ⁷ Nāskaxō Juan ato mēxotaima yoipaoni: “Nā ea keskarama mā chaima oi kiki, nā sharafinākōia. Aato afama mīshti fatiro, ē atiroma keskara. Akka ē afaama,” ixō ato yoipaoni Jesú^snoa yoikĩ. ⁸ “Akka ē mato fāka mēra ikimpakea maotisafakĩ. Akka nā rama oaito āfe Yōshi Shara mato mēra naneyoi,” ixō Juan ato yoini.

Juan Jesú^s maotisafani faka Jordán anoxō

(Mt. 3.13-17; Lc. 3.21-22)

⁹ Nāskano Jesú^s kani Nazarete anoax, Galilea mai ano. Nānoxō faka Jordán anoxō Juan ato maotisafani. ¹⁰ Nāskafaino Jesú^s fakanakinoax fininākafā ōia nai fepekemeaito ōini. Akiki Niospa Yōshi Shara fotoiyoi oa rifi keskara oni. ¹¹ Nāskaino nai mēranoax mekaito nikani iskafakĩ yoiaito: “Mĩ ěfe Fakekōi, ē mia noikōi. Ĕ mikiki inimasharakōi,” ixō yoiaito nikani.

Satanás chakata Jesú^s afara chakafamapaini

(Mt. 4.1-11; Lc. 4.1-13)

¹² Nāskata Niospa Yōshi Sharapa Jesú^s iyoni tsōa istoma ano. ¹³ Nāri cuarenta nia ini, yoināfo mēra. Nārixō Satanás afara chakafamapaiyaito āfe ājirifāfe kexenifo.

Galilea anoxō Jesú^s ato yoikĩ taefani

(Mt. 4.12-17; Lc. 4.14-15)

¹⁴ Akka mā Juan karaxa mēra ikimaitafono Jesú^s kani Galilea ano Niospa meka shara yorafo yoikai. ¹⁵ Ato yoikĩ iskafani: “Nōko Ifo Nios mā chaima matoki oi kiki, xanīfofinakōi a ixii. Māto chaka xatekāfe anā Nios nikakōisharaxikākĩ. Āfe meka sharari nikakōikāfe chanīmara fayanā.”

Jesú^s cuatro feronāfake kenani tarafanāfānē foe fimisfono āfe inakōi inōfo

(Mt. 4.18-22; Lc. 5.1-11)

¹⁶ Ato askafakĩ yoita Jesú^s Galilea ĩa kesemē kani. Kakĩ fichini Simón yafi onefetsa Andrés. Nā rafeta tarafanā fimisfo inifo, āto tarafanāfā faka naki poteaifāfe. ¹⁷ Jesú^s ato yoini iskafakĩ: “Ĕfe fokāfe. Māfi tarafanāfānē fimiskĩ. Mā foe ichapa rasi tarafanāfānē fiati keskari fakĩ iskaratīari mā ekeki yora ichapa efexii ē āto Ifo inō,” ixō Jesú^s ato yoini.

¹⁸ Ato askafaino tarafanāfā fafaikani afe fonifo.

¹⁹ Anā orishta fāi katapaikĩ Jesú^s ōia Santiago onefetsa Juan fe nia ini. Nā rafeta āto apa feta kanōa nakixō tarafanāfā itipinī fanifo, kishifakākĩ. ²⁰ Nā raferi Jesú^s ato kenaino nā rafeta āto apa Zebedeo yafi āfe inafoya ato nīchifainifo. Āto kanōari ōifainifo Jesú^s fe fokākĩ.

Nā feronāfake niafaka nanea ini

(Lc. 4.31-37)

²¹ Jesú^s aōxō tāpimisfo fe kaax Capernaúm ano nokoni. Pena tenetitīa nā ichanāti pexe mēra Jesú^s ikikaixō ato yoikĩ taefani. ²² Ato yoiaito nikakĩ yorafā rasichi Jesú^s ōiketsanifo. “¡kee! Nikakapo. Nato tāpikĩ finakōia, a Moisés yoikĩ kirika keneni keskara ato tāpimamisfo keskarama, meka sharakōi nato yoi,” fanifo. ²³ Judeofāfe ichanāti pexe mēraxō yora mēra niafaka yōshi chaka nanexō Jesú^s fāsikōi mekafani.

²⁴ Iskafakī yoini: “¿Afeskakī mī noko fekaxtefaiyoamē, Jesús Nazarete anoato? ¿Mī noko a omiskōipakenakafa mēra mī noko potaiyoamē? Ē mia ōimisnō, mī sharakōinō Niospa mia nīchiano,” fani.

²⁵ Jesús niafaka yōshi chaka iskafakī yoini: “Askayamafe. Na feronāfake makinoax tsekekaitāfe,” faino, ²⁶ niafaka yōshi chakata feronāfake choamata, fāsikōi mekainākfata a makinoax tsekekaini. ²⁷ Askaito ōikani, yora rasi ratei fetseyanā āa ranā yoināi fetsenifo iskakani: “¿Tsoamē na? Na tāpisharakōixō ato yoiāi nā xanifāfe tāpisharakōixō ato yoiāi keskara. Nā niafaka yōshi chakafāferi nikakani ato yoiāito,” ikanax yoinānifo.

²⁸ Nāskakē keyokōichi nikaketsanifo Galilea mai anoxō nā Jesús aka keskara.

Jesús Simón Pedro rayos sharafani

(Mt. 8.14-15; Lc. 4.38-39)

²⁹ Nā ichanāti pexe mēranoax Jesús tsekekaini. Santiagonō, Juannō fonifo, Simón feta Andrés āfe pexe ano. ³⁰ Akka nāno Simón āfe rayos yōxāfo yonai raka ini. Nāno rakano Jesús yoinifo. ³¹ Jesús akiki kaxō āfe mīfi fininīfōfanaino a yonai koshikōi sharatani. Mā sharaxō pīchani ato pimaxii.

A isinī ikaifo Jesús ato sharafani

(Mt. 8.16-17; Lc. 4.40-41)

³² Mā xini kaino a isinī ikaifoya a niafaka chaka naneāfo Jesúski efenifo. ³³ Nāskakē nānoāfo keyokōi yorafo ichanānifo nā pexe fepoti anoax. ³⁴ Jesús ato sharafani yora ichapa pae fetsa fetsatapafāfe ikaifono. Niafaka chakafori ato mēra naneano ato makinoā pōtani. Akka Jesús niafakafo mekamanima māmāi tāpiafāfe Jesúsmai Niospa Fakekē.

Jesús ichanāti pexe mēraxō Apa Niospa mekasharaōnoa ato yoini

(Lc. 4.42-44)

³⁵ Mā chaima penaino, Jesús fininākfā pexe rasi mēranoax tsekekaini tsōa istomaxō Apa Nios kīfikai. ³⁶ Mā Jesús ato makinoax penaino kaano Simón āfe rafeāfo fe kani Jesús fenaikai. ³⁷ Mā fichikaxō yoinifo iskafakakī: “Keyokōichi mia fenakani,” fanifo.

³⁸ Askafaiifāfe nikakī Jesús ato kemani iskafakī: “Nō chaima fetsa ano kanō fokāfe, anoxori nō ato Niospa meka tāpimanō. Nāskakē ē oa,” ato fani.

³⁹ Nāskakē Jesús kafāsapaoni nā Galilea pexefo tū ano Niospa meka shara ato yoifofāsafai ichanāti pexe mēraxō. Fanīma müshtixō niafaka yōshi chakafo ato makinoā ato potafofāsafai.

Jesús yora rashkishiai sharafani

(Mt. 8.1-4; Lc. 5.12-16)

⁴⁰ Feronāfake fetsa isinī iki rashkishi fetseax Jesúski oni. Akiki oxō ratokonō mai chachipakefōfā yoini iskafakī: “Ea mīa sharafapaikī, ea mīa sharafatiro,” fani.

⁴¹ Askafaito nikakī Jesús shinākōini, omiskōiāito. Nāskaxō āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, ⁴² a rashkishi fetseai koshikōi sharatani. Nāskax sharakōi ini. ⁴³⁻⁴⁴ Mā sharano Jesús nīchini iskafakī yoiyanā: “Mī tosa yoiiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

⁴⁵ Jesús askafakī yoifiano, akka nā feronāfake mā kaxō ato yoifofāsafani. “Ōikapo, mā Jesús ea sharafaa,” ixō ato yoifofāsafani. Nāskakē Jesús anā pexe rasi ano ikixō ato yoitiroma ini. Xafakīa nini, tsōa istoma ano. Nāskafiaino pexe rasi anoāfo akiki fenifo ōifekani.

2

Jesús yora finimisma sharafani

(Mt. 9.1-8; Lc. 5.17-26)

¹ Mā samaraka pishtata Capernaúm ano anā oni Jesús. Mā nokoano, “Mā Jesús anā oa āfe pexe ano,” fanifo. ² Nāskakata Jesús fe anā ichanānifo pexe mēraxō. Jesús nikakani. Pexe ano fospikōikanax āfe emāiti ninifo āfe fepoti ano ikitiroxakākima. Nānoxō Jesús ato tāpimani Niospa meka. ³ Mā ato tāpimanaino feronāfake cuatro nokotoshinifo. Yora finimisma āfe xefapa efenifo. ⁴ Mā xītiafono ikitirofoma, Jesús ano nā yora finimisma efepaiyaifono ikitirofoma ini. A pexe sapa mānāoxori paitinī māpekaxō fotomanifo āfe xefapa rataxaxō. Risfi rafeta nexati fākaxō a mānāoxori kini fakaxō, nā finimisma fotomanifo, āfe xefapa. ⁵ Jesús ato ōikī tāpikōia ini. “Naato nōko yama noko sharafaxotiroki,” faifono Jesús tāpini. Nāskafaiyono a finimisma Jesús yoini iskafakī: “Efe yorashta, mī chaka mē mia soaxona,” Jesús fani.

⁶ A Moisés yoikī kirika keneni keskara ato tāpimamisfāfe ranārīto ano tsoaxō nikakī shinānifo. ⁷ Nānoxō shinānifo: “¿Afeskai Jesús mekaimē iskai? Tsōa noko chaka soaxotiroma. Nios fistichi noko axotiro. ¿Jesús āa shināimē Nios?” ixō shinānifo.

⁸ Askafaiāfāfe Jesús ato tāpini āto shinā mēraxō shināifāfe. Jesús ato yoini: “¿Afeskai mā iskara shināimē?” ato fani. ⁹⁻¹⁰ “Akka ea Niospa shināmani. Nāskakē ē mato ōimanō Niosxō na feronāfake ē sharafatiro. Tsōa iskara atiroma, Niospa shināmanai fistichi atiro. Nāskakē ē na feronāfake sharafa mā tāpinō Niosxō ēri āfe chaka soaxotiro,” ixō ato yoini. Nāskafata anā yoini feronāfake finimisma, ¹¹ “Fininākakāfāfe. Mī xefa fifaini, mī pexe ano katāfe,” fani.

¹² Askafaino fininākakafani. Fininākakafaxō āfe xefa fifaini, āfe pexe ano kaito keyokōichi ōinifo. Nāskakaxō, “¡Aicho, Nios sharakōi! Na keskara nō ōimisma, sharakōi,” fanifo.

Jesús Leví ifni aōxō tāpimis inō
(Mt. 9.9-13; Lc. 5.27-32)

¹³ Nāskax Jesús anā kani ĩa efapa ano. Anoxō yora ichapa rasichi ōinifo. Nānoax Jesúski ichanānifo. Nānoxō ato tāpimani. ¹⁴ Nānoax kakī Jesús finōfāikī Leví* ōini, a yonoai āfe tsaoti mīsa ano tsoaxō, ato keyokōi kori fiaito. Nā Leví āto kori fiamis ini āfe xanifo minixiki Roma ano. Leví Alfeo fake ini. Jesús ōiox yoini: “Leví, efe kafe ē mia tāpimanō,” fani. Askafaino Leví afe kani.

¹⁵ Nāskax Jesús aōxō tāpimisfo fe kani Leví ato kenano a anoxō pii fokani. Ato kori fiamisfo fe yora chakafori a Moisés keneni nikamismofafāferi Jesús feta pinifo. Yora ichapa Jesús fe foafōfānifo. Nāskakē yora ichapakōichi Leví pexe mēraxō pinifo. ¹⁶ Nāskakē a Moisés yoikī kirika keneni keskara ato tāpimamisfo nāfori fariseofo inifo. Afāfe Jesús ōinifo yora chakafo feta piaito. Nāskaxō a Jesúsxō tāpimisfo yōkanifo: “¿Afeskakī māto maestro na ato kori fixomisfo feta piimē? Yora chakafo fetari pii,” ato faifono, ¹⁷ Jesús nikaxō ato yoini: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani. Nāskakēri ē ato yora sharafos kenatapa ikerani ē oama. Nā yora chakafo ē ato tāpimaniyoi ē oanō,” ato fani.

Nā foni tenemisfofāfe Jesús yōkanifo
(Mt. 9.14-17; Lc. 5.33-39)

¹⁸ Juan Maotista āfe inafāfe āto feyafati ipaoni fisti rasi pikakī pipaonifoma foni tenemisfo ipaonifo Nios shara shinākakī. Nā fariseofo nāskarari ipaoni āto feyafati. Nāskakē yora fetsafāfe Jesús yōkanifo tāpīpaikakī, “Jesús, ¿afeskakī mī inafāfe mēxotaima piimē? Juan āfe inafāfe foni tenekaninō Nios shināsharakakī. Askatari fariseofāferi foni tenekaninō. Akka, ¿afeskai mīōxō tāpimisfo askaramamē?” fanifo.

¹⁹ Askafaiāfāfe anā Jesús ato yoini: “Feronāfake āfiyaino, yorafo ano fisti ichanākaxō afara fetsa fetsatapafo afeta pitirofo inimayanā, aicho fakakī akiki inimakakī. Akka feronāfake āfi fikī foni tenetiroma. Askafixō inimakī pitiro. ²⁰ Akka mā fene rēteafono āfe yorafāfe shinākakī foni tenetiromo,” Jesús ato fani. (“Nāskakē ē nono ikano inimakī eōxō tāpimisfāfe efeta pimisfo. Akka mē naano ea shinākakī tsōa pitiroma eō noikakī,” ato fani.)

²¹ Askata anā fetsa ato yoini: “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatari sama fenafe sama xini isharatiroma. Nāskakēri nā ē mato yoiai keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāskax mato yora fena keskara shara itiro. ²² Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyānō. Nāskakē nā māmā fata fe koiro pisha chakanatirofo. Akka nā māto xinifāfe mato yoimisfo keskara fe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a māto xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma. Nāskarifakī tsōa māmā fata koiro pisha xini mēra nanetiroma nā māmānō faraxakaino toxamāiyānō. Nāskakē nā māmā fata fe koiro pisha chakanatirofo. Akka nā māto xinifāfe mato yoimisfo keskarafe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a māto xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma.”

Nā judeofāfe pena tenetitā Jesúsxō tāpimisfāfe aros keskara metesfenifo
(Mt. 12.1-8; Lc. 6.1-5)

²³ Jesús aōxō tāpimisfo fe kani a judeofāfe tenetitā. Tarepa kakī āfe inafāfe aros keskara meteskaxō fikaxō pinifo. ²⁴ Nāskafaiāfāfe fariseofāfe ōikakī ato iskafanifo: “Ōipo, ¿afeskakī mī inafāfe na aros keskara metesfekanimē na pena tenetitā tsōa yonotiroma ixō Moisés noko yoifinino?” fariseofāfe fanifo.

* **2:14** Leví ane rafeya ipaoni. Āfe ane fetsa Mateo.

²⁵ Ato askafaifono Jesús ato kemani: “Akka, ¿a nõko xini Davidõnoa kirika kenenifo keskara mã õimismamê? ¿David afaa afeska fanimê áfe inafõ feta fonãikõikĩ? ²⁶ Nãskakê David Nios kĩfiti pexefã mēra ikikaini. Akka nã Nios kĩfiti pexefã anoax Abiatar nã ato Nios kĩfixomisfãfe áto xanifo ini. Akka nã Nios kĩfiti pexefã mēranoa David pãa pini a pãa tsõa pishta pifiatiromano. Akka nã ato Nios kĩfixomisfãfe arese a pãa pimisfo ini. Nãskafekê nã pãa David pini a áfe foafori ato pikĩni.

²⁷ “A Niospa taefakĩ feronãfake onifani. Askata teneni. Nã feronãfake Niospa tenemani, pena tenetifia yonoyamanõ. ²⁸ Nãskakê Niosxõ ã yoitiro na pena tenetifia emãi xanifõkõixõ afeskaimãkai ã yoitiro. Nãskakê ã mato yoi ãfe inafãfe afaa chakafakanima aros keskara meteskakĩ pena tenetifia fonãiki finakõikaxõ,” ato Jesús fani.

3

Feronãfake mēke yõshiya Jesús sharafani

(Mt. 12.9-14; Lc. 6.6-11)

¹ Jesús anã ikikaini judeofãfe áto ichanãti pexe mēra. Nãno feronãfake mēke yõshiya ini.

² Aas õinifo, judeofãferi. “Jesús sharafaimãkai nõ õinõ na pena tenetifia,” fanifo yõaxikakĩ.

³ Askata Jesús yoini nã feronãfake mēke yõshiya: “Fininãkafata ano nife nakirafe,” fani.

⁴ Askata yorafo yõkani: “¿Afaa nõ afeska fatiromē pena tenetifia? ¿Shara nõ atiromē? ¿Chaka nõ atiroraka? ¿Nõ ifitiromē? ¿Nõ retetiroraka?” ixõ ato yõkani.

Ato askafaito tsõa kemanima. ⁵ Ato feratexõ Jesús ato õini, yora fetsafõnoax shinãyamaifãfe. Askatari Jesús shinãmitsani. Shinãmitsaxõ yoikĩ iskafani feronãfake: “Mēshafe,” fani. Askata nikax mēshatani. Mēshatanaino sharatani. ⁶ Askaito õikani fariseofo õitifishkinifo. Tsekefainifo ichanãti pexe anoax. Taefakakĩ shinãnifo: “¿Afeskafaxõ na Jesús nõ retetiromē?” fanifo. Herodes áfe inafõ feta shinãnifo.

Yora ichapa ini ãmãfã ano

⁷ Askata Jesús anã kani aõxõ tãpimisfo fe ãmãfã kesemē ano. Nãskakê Galilea anoafõ yora ichapa rasi fonifo. Jesús chifafainifo. ⁸ Mã yorafãfe nikakanax fonifo, nã Jesús ato sharafaino nikafaikani fonifo Jesús ari. Judea anoafori, Tiro yafi Sidón anoafori fonifo. Jesús ano nokonifo.

⁹ “Kayakõi yorafo fei kiki,” ato fani aõxõ tãpimisfo Jesús. “Ea shoi aki fetirofoki, ea kanõa fexokãfe ã nanenõ,” ato fani. ¹⁰ Jesús ichapa yora rasi sharafaino, nãskakê na yora isinĩ ikani akiki fenifo Jesús shinãfãikani ramãpaikani ato sharafanõ. ¹¹ Nãskaino a niafaka chakafoyafãfe Jesús õinifo. Nãskakê Jesús fichikanax feopakefõfanifo Jesús nãmã. “Jesús mĩ Niospa Fakekõiki,” niafaka naneafãfe fãsikõi fanifo.

¹² Askata Jesús ato yoini: “Tsoa yoyimãkãfe ã Niospa Fakeki,” ato fani.

Jesús aõxõ tãpimisfo doce feronãfake ifni

(Mt. 10.1-4; Lc. 6.12-16)

¹³ Nãskata Jesús mãchi keya mãpeni. Ari kakĩ aõxõ tãpimisfo ichapa ato kenani ato yoixiki arixõ tãpinõfo. Askata Jesús ano fonifo aõxõ tãpimisfo. ¹⁴⁻¹⁵ Feronãfake doce faxõ ato ifni, áfe rafeafono ato nĩchixiki aõnoa áfe meka shara ato yoitanõfo, nãfãfe yorafo makinoa niafaka yõshi chakafo ato potaxotanõfo. Nãskata nãfo ato aneni, “Èfe meka yoimisfo” ato fakĩ. ¹⁶ Nã tii ato ifipakeni fisti rasi. Taefakĩ Simón ifni. Áfe ane fetsafaxoni, Pedro kenaxiki. Simón ikaino, ¹⁷ Jacobo yafi áfe onefetsa Juan kenani, áto apa Zebedeo ini. Jesús ato ane fetsa kenani Boanerges fakĩ. Nõ askafatiro, “Yora finakõia oa nai tiri ikai keskara” fakĩ. ¹⁸ Askatari Andrés kenani, Felipe ikaino, Bartoloméri ikaino, Mateori ikaino, Tomásri ikaino, Jacobo fetsari ikaino, Alfeo fake. Askatari Tadeori ikaino, Simón fetsari ikaino. Na Simón nãskara ipaoni nã yora xanifõ chakafapaikĩ, potapaikĩ fetsafo feta. Mã ato makinoax ota Jesús fe rafeni. ¹⁹ Askatari Judas Iscarioteri ifni. Nã Judás Iscariote Jesús fe iyopaoni. Nãskaxõ chipõ chakafakĩ ato achimani Jesús retenõfo. Nã tii Jesús ifni aõxõ tãpimiskõi inõfo.

Yora fetsafãfe, “Jesús niafakaõxõ ato sharafaira,” fanifo

(Mt. 12.22-32; Lc. 11.14-23; 12.10)

Nãskata mãchifã ariax fotota, áfe inafõ fe ikikaini pexe mēra. ²⁰ Anã yora rasi ichanãfatishoni. Askaito õikĩ, yora ichapa õikĩkakĩ, pitirofoma inifo. ²¹ Jesús áfe yorafãfe tãpinifo mã pexe mēra kaano fõkaxõ Jesús anoa ifipainifo. Yoiãfãfe nikakakĩ ifipainifo fõkaxõ Jesús anã shinãsharaima faifãfe.

²² Askatari a Moisés yoikĩ kirika keni kenenifo keskara ato tãpimamisfo Jerusalén anoax Jesús ano feafono ato yoini: “Na Jesús nã niafaka chakafãfe áto xanifõõxõ nã Beelzebú áfe shara miniano aõxõ áto niafaka põtã,” fanifo.

²³ Jesús nikakĩ ato kemani meka fetsafaxõ: “¿Afeskax Satanás ãa potametiromē? ãa itiro. ²⁴ Nãskakêri yorafo paxkanãkanax ãa ranã retenã keyotirofo. Askatari pexe rasi

anoax āa ranā retenāi keyotirofo. Nāskax isharatirofoma āa ranā retenātirofo. ²⁵Fetsari nā nofe yorafo mīshti paxkanātirofoma. Paxkanāx keyotirofo. ²⁶Nāskakēri Satanās āfe inafō fe paxkanātiroma. Paxkanāx keyotiro anā xanīfo itiroma.

²⁷“Askatari feronāfake mitsisipakōi taefakī metexkere akaxoma tsoa āfe pexe mēra ikitiroma āfe afama mīshti fīaxikakī. Nāskarifiakī nō yora nexaxō āfe afara nō fīatiro keskakakī, nāskarifikakī ē Satanās nexaxō Niospa Yōshi Sharaōxō ē Satanās āfe ina pōtatiro.

²⁸⁻²⁹“Chanīma ē mato yoikōi, keyokōi chaka Niospa soaxotiro. Askatari keyokōi meka chakari Niospa soaxotiro. Askafixō fētsa yoixō, ‘Jesús Niospa Yōshi Sharaōxō askara ato sharafatiroma, Satanās āfe yōshioxō ato sharafai,’ askafaito Niospa ato āfe chaka soaxotiroma, āto neepakexanō,” ato fani Jesús.

³⁰Anori yorafāfe yoini: “Jesús yōshi chakaya,” fanifo. Nāskakē Jesús ato yoini Epa Niospa Yōshi Sharaōxō ato sharafai.

Jesús ōifekani āfe afanō āfe extonō fenifo

(Mt. 12.46-50; Lc. 8.19-21)

³¹Jesús āfe afanō onefetsanō nokonifo a Jesús ano. Mā nokokanax pexe mēra ikinifoma. Xafakia ninifo pexe emāiti. Nānoxō yora fetsa nūchinifo Jesús yoitanōfo. ³²A Jesús foaketifaya kekanax tsoafāfe yoinifo: “Jesús, mā mī efanō mī extonō nokofo. Mīa yōkamekani,” fanifo.

³³Askafafāfe ato Jesús kemani: “Ēfe efanō, ēfe poinō, ē ato fistis shināima. Yora fetsafori ē ato shināi efe yora keskarāfo. ¿Tsoamē ēfe efa, ēfe extofori? ¿Mā tāpimamē tsoamāki ēfe efa, ēfe extofori? Ē mato yoinō,” ato fani.

³⁴Askafaxō Jesús ōini a tsoafo. Nāskaxō ato yoini: “Nā ea Ifofaifo, ea nikaifo efe yorafo. Nakīa ēfe extofo, ēfe efafo,” nāskafani. ³⁵“Nā Niospa fichipaiyai mā akaino Niospa mato fichipaiyai keskarifikakī nā ēfe extofo, ēfe chikofo, ēfe efa keskara,” ato fani Jesús.

4

Jesús ato yoini meka fetsafaxō fimi exe saamisnoa

(Mt. 13.1-9; Lc. 8.4-8)

¹Nāskata anā Jesús ato tāpimani ĩa kesemēxō. Nāskakē yora ichapa ichanānifo Jesús ano. Nāskaifono Jesús kanōa ĩa ketokonō rakano aō naneinīkafanax tsaoni. Akka yorafo ĩa ketokonō tsaonifo. ²Nāskaxō Jesús ato tāpimani afama mīshti meka fetsafaxō. Ato yoikī is kafani:

³“Ea nikakāfe ē mato yoinō,” Jesús ato fani. “Feronāfake fistichi fimi exe saafoni āfe nōxati mēra kēchōxō fokī. ⁴Fimi exe saafokaino ranāri fai nēxpakīa pakeaino a kachikirixori peyafāfe pini. ⁵Nāskata fimi exe ranāri makexfokī pakei fetseni mai shara anoma. Nāskakē samamakōi fimi exe foaipaini. ⁶Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano. ⁷Akka ranāri fimi exe moxafo mēra pakeni. Nāskakē moxafo foaikī namani. Nāskakē fimi exe foaikax fimiyamax nani. ⁸Akka fimi exe ranāri mai shara ano pakeni. Nāskax foaišharax fimi ichapayakōi ini. Fetsa treinta fimiya ini. Fetsa sesenta fimiya ini. Fetsari cien fimiya ini.”

⁹Nāskaxō Jesús ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini

(Mt. 13.10-17; Lc. 8.9-10)

¹⁰Mā yora ichapa rasi foaifono Jesús ares nēteni, akka nā foafāfema a aōxō tāpimisfo docefo fe nēteafāfe yōkanifo. “¿Afaa mī noko yoipaiamē meka fetsafaxō?” faifono, ¹¹⁻¹²Jesús ato kemani, “Epa Niospa a ĩka anoxō afe yorafo ato ĩkināi afe keskarāmākī ē mato xafakīa yoinō. Akka fetsafo meka fetsafaxō ē ato yoiaiki. Akka ōifikakī tāpikanima nikafifikāri nikasharakanima. Nios Ifofakaspakani. Nāskakē Niospari ato chaka soaxotiroma.”

Jesús meka fetsafaxō fimi exe saamisnoa ato yoini ato tāpimasharakōixiki

(Mt. 13.18-23; Lc. 8.11-15)

¹³Nāskata ato yoini: “¿Nā ē ato meka fetsafaxō yoiai mā tāpimamē? Akka, ¿afeskakī fētsa nikatiromē? ¹⁴Nā fimi exe fanamis, nā Niospa meka yoimis keskara. ¹⁵Akka ranāri yora fetsafo fimi exe fai nēxpakīa pakea keskarāfo Niospa meka nikafikani. Akka Niospa meka mā nikafiaifono Satanās ato xītitiro peyafāfe fimi exe pitiro keskakakī. ¹⁶Fetsafo nā fimi exe tokirifo mēra pakeax foaipaiyai keskarāfo. Niospa meka nikai akiki inimakōikī nikayotiro. ¹⁷Akka nā fimi exe foaikax āfe tapo mai mēra ĩkikēma xinī namatiro keskakakī. Nāskarifikakī fētsa taefakī Niospa meka nikai inimayotiro. Akka afara chaka nokoaino anā inimatiroma anā Nios Ifofatiroma, Niospa meka anā āfe shinā mēra nanekema. ¹⁸⁻¹⁹Akka atiri fimi exe moxafo mēranoax foaikax yositiroma keskarāfo. Nāskariatirofo Niospa meka shara nikasharakanaxma. Akka fētsa afarafo shinākī āfe shinā mēraxō shināchakakōitiro.

Nāskaxō kori ichapakōi noikī, 'Ē kori ichapayax ē inimakōitiro,' ixō shināki Niospa meka anā shināima. Nāskakē Niospa meka nikafikī afara fetsafo shināino afaa Niospa axotiroma. ²⁰ Akka atiri fimi exe mai shara anoax foaikax fimi ichaya ini. Āfe fimi treinta ini, fetsari afe fimi sesenta ini, fetsari āfe fimi cien ini. Nāskafakīri fētsa Niospa meka nikakōikī nikasharakōitiro. Akka fētsa Niospa meka nikakōisharakī nā fimi exe treinta keskara itiro, fetsari nikasharakōikī nā fimi exe sesenta keskara itiro, fētsari nikasharakōikī nā fimi exe cien keskara itiro," ixō Jesús ato yoini.

Meka fetsafaxō rāpariki Jesús aōxō tāpimisfo yoini
(Lc. 8.16-18)

²¹ Nāskatari ato yoini. "Akka tsōa rāpari otaxō kafo mēra nanetiroma, askatari a ika nāmā tsāotiroma chaikairoko chaxanō. Akka nō rāpari fomākīa tsōoafano chai chaxatiro. Nāskakē ōisharakōitirofo. ²² Nāskarifiakī nō afaa pishta onetiroma, nō onefano keyokōichi tāpitirofo. Nāskarifiakī a fomāyomisfo Niospa xafakīa faxii. ²³ Mā pachoyakī ea nikasharakōikāfe," ixō Jesús ato yoini.

²⁴ Nāskaxō anā ato yoini. "Nikakapo, ē mato yoinō. Akka a ea nikakī finasharakōiai, Niospa tāpimasharakōi. ²⁵ Akka nā tāpia nā Epa Niospa tāpimakī finasharakōi. Akka fetsa ē tāpisharakōia ifiaxō nikamiskēma, askara yora nā tāpia pishta Niospa anā fīatiro," ixō Jesús ato yoini.

Jesús meka fetsafaxō yoini, fimi exe yositiroōnoa

²⁶⁻²⁹ Nāskata Jesús anā ato yoini. "Epa Nios xanīfāfe noko ikinā iskaraki. Nā feronāfāke fimi exe mai shara ano fana keskaraki. Mā fanax oxatiro fakishi, akka penata yonotiro. Nāskakē ifāfe ōiyamaino ares fimi exe yositiro. Nāskakē mai mēranoax fimi exe āfe tapo foaikax yositiro. Mā yosiāx efapa itiro, nāskata chipo fimitiro. Nāskata mā fana fimi pachiano, ifāfe topitiro māmāi pachiano," ixō Jesús ato yoini.

Mostaza exeōnoa yoikī meka fetsafaxō Jesús ato tāpimani
(Mt. 13.31-32; Lc. 13.18-19)

³⁰ Askata anā Jesús ato yoini iskafo: "Afe keskaramākī Nios xanīfāfe noko ikinā ē mato yoinō. ³¹ Nā mostaza exe yōra āfe tarepa fanatiro. Akka nā fimi exe pishtakōi fetsafo keskerama. ³² Akka nā fimi exe fanax, mā yosiāx efapakōi itiro fana fetsafo keskarama. Nāskakē mā teshpapafai fetseano peyāfāfe āfe teshpafō ano naa fatiro. Nāskarifiakī taefakī ichapatoma Nios Ifofayotirofo. Akka chipo ichapafāfe Ifofakōitirofo," ixō Jesús ato yoini.

Afama mīstikiri yoikī meka fetsafaxō Jesús ato yoipaoni
(Mt. 13.34-35)

³³ Nāskatari meka fetsafaxō Jesús ato tāpimani Niospa meka shara keyokōi tāpikanimākai. ³⁴ Akka meka fetsafaxō Jesús mēxotaima ato yoipaoni. Akka nā aōxō tāpimisfo xafakīakōi ato yoipaoni.

Jesús nefe yafi iamāfā poo iki meseniaito nishpa fani
(Mt. 8.23-27; Lc. 8.22-25)

³⁵ Mā yātapakeaino nā pena fisti Jesús aōxō tāpimisfo yoini: "Nō okiri iamāfā pokefainikanō, fokāfe," ato fani.

³⁶ Nāskata nāno yorāfo nīchifainifo, Jesús iyoifokakī. Nāskakanax kanoānāfā mēra nane-fainifo. Mā foaifono kanōanāfā fētsari fokākī yorāfāfe ato chīfafainifo. ³⁷ Īamāfā poke-fainiafono nāno atoki nēfēfākōi nokoni. Atoki nēfēfākōiaino iamāfā pooiyanā kanōanāfā faka fospikōini. ³⁸ Akka Jesús oxano kanōanāfā chipo kamaki rakax, āfe tēkesati kamaki tēkesameax. Oxakē aōxō tāpimisfāfe mōinifo iskafo: "¿Ifo, mā noko shināimamē mā nō āsaikai?" faifono. ³⁹ Jesús fininīkafāta, "Nēfe, nishpafe," fata. "Īamā nishpafe," fani.

Nāskafaino nefe nishpani anā feroinima ĩa fe nefe. ⁴⁰ Nāskata chipo Jesús aōxō tāpimisfo yoini. "¿Afeskaī mā rateimē? ¿Mā ea chanīmara fasharamamē?" ato fani.

⁴¹ Ato askafaino, akka aōxō tāpimisfo ratekōiyanā āa ranā yoinānifo iskakani: "¿Keel! ¿Na feronāfāke afe keskaramē na nefe feta iamāfānē ato yoiaito nikaifo?" ikanax yoinānifo.

5

Gadara anoxō Jesús feronāfāke makinoā niafaka rasi potani
(Mt. 8.28-34; Lc. 8.26-39)

¹ Nāskata okiri iamāfā pokefaikanax nokonifo, Gadara mai ano. ² Nāskata Jesús kanōanāfā makinoax fotopakekafanaino, nā feronāfāke niafaka yōshi chaka nanea nāno akiki oni. Nā feronāfāke nā maiafo kinīfā mēranoax oni. ³ Mai kinīfā mēra ipaoni. Tsōa nexatiroma ipaoni kaninānā nexafiaifono. ⁴ Akka mēxotaima kaninānā otekere ata metekere ata fafiaifono, kaninā tesa tesa aki fetsapaoni. Tsōakai afeska fatiroma ipaoni. ⁵ Nāskata penata kafāsata

fakishchāiri kafāsapaoni, māchifā ariri māpepaoni mairafo anori kinīfā mēra kapaoni. Nāskata fiisiyanā tokirinī āa tsakamepaoni. ⁶ Akka chai ixō Jesūs fichiax, akiki farekekeranax aō ferotaifi ratokonō mai chachipakefōfāni. ⁷⁻⁸ Fāsikōi yoini fiisiyanā. “¡Ea afeska fayamafe, Jesūs! Mī Nios Sharapa Fakekī, ē mia yoi Niospa mia ōi kiki ea omiskōimayamafe,” fani. Nāskai mekani, akka Jesūsmāi iskafakī yoiano: “Niafaka yōshi chakata, na feronāfake makinoax tsekekaitāfe,” māmāi faano.

⁹ Askafaito Jesūs yōkani: “¿Mī afe anemē?” faito, nāato kemani: “Ēfe ane Legiōn nōmāi ichapax,” fani.

¹⁰ Nāskaxō nā niafaka Jesūs yoini iskafakī: “Mai fetsa ari noko nīchiyamape,” fani. ¹¹ Akka nā chaima māchifā mánānēxō kochifāfe pinifo. ¹² Nāskakē niafaka yōshi chakafāfe iskafanifo: “Kochifo mēra noko nīchife, kochifo mēra nō ikinō,” faifono, ¹³ kochifo mēra Jesūs ato nīchini. Nāskakē niafaka yōshi chakafo feronāfake makinoax tsekekainax kochifo mēra iki fetseni. Nā niafaka chakafo dos mil ini. Nā niafakafo kochifo mēra ikiano kochifo ichoax māfāfā ariax ĩamāfā mēra keyopakeax āsai fetsenifo.

¹⁴ Askaito ōikani nā kochifo kexeafō ichoi fetsenifo. Mā fokaxō a pexe rasi anoafō ato yoinifo, a pexe rasi pasotai ikafori ato yoinifo nā ōiafo keskara. Ato askafakī yoiaifono nikakani yōrafā rasi fenifo kochifo āsaito ōipaikani. ¹⁵ Mā nokokaxō ōiafo nā feronāfake tsaoa ini rapati shara safeax, mā shināsharai a makinoax mā niafaka yōshi chaka tsekeano. Nāskaito ōikani yōrafā rasi ratei fetsenifo. ¹⁶ Nā Jesūs niafakafo kochifo mēranoa potaito ōikaxō āto kaifo yoifokani fonifo. ¹⁷ Nāskakē yorafāfe yoinifo iskafakakī: “Jesūs, nonoax katāfe, nō mia ōipaimakai,” fanifo.

¹⁸ Mā Jesūs kanōanāfā mēra naneinākanaino, nā feronāfake niafakaya ikato, “Ēri mefe kapai,” fani. ¹⁹ Nāskafaino, “Maa, mī efe katiroma. Mī pexe ano katāfe. Mī kaifofo fe kaxō mefe yorāfo ato yoitāfe a nōko ĩfāfe mia sharafa, mīo noiķi mia sharafaki,” ixō Jesūs yoini.

²⁰ Askafaito nikafaini nā feronāfake kani. Kaxō nā pexe rasi anoafō ato yoini, nā Decápolis anoafō nā Jesūs sharafaa keskara. “Airra, nikakapo, ¿afeskax sharamē?” iki fetsenifo.

Jairo fake xotofake mā nakē Jesūs otofani. Askatari kēromāri Jesūs rapati mēeax sharani (Mt. 9.18-26; Lc. 8.40-56)

²¹ Askafata Jesūs mā kanōanāfānē ĩamāfā pokeferani oano yōrafā rasi ano ichanānifo. Akka Jesūs ĩamāfā ketokonō nēteni. ²² Akka nāno nā ichanāti pexe ano xanīfo fisti akiki oni, āfe ane Jairo. Jesūs fichiax a nāmā feopakekafani. ²³ Nāskaxō yoini iskafakī: “Mā ēfe fake xotofake nai kiki. Mī mēkemā ea rāmāxoniyofe, sharax ninō,” ixō yoiaino, ²⁴ Jesūs afe kani, yōrafā rasiri afe fonifo. Afe fokakī shoiakī fetsanifo.

²⁵ Nā yōrafā rasi mēra kēro foki ato fe kani, doce xinia aka ini isinī iki, imi nesemisma ini. ²⁶ Omiskōitiani sharapai notorofo mēra katiani, mā kori potakī mitotiani ini. Tsōa pishta sharafatiroma ini, askatamaroko isinī iki finakōini. ²⁷⁻²⁸ Nā kēromā Jesūsnoa yoiaifāfe nikani. Nāskakē yōrafā rasi foaifono ato acho kaxō āfe tari kexa ramākani. “Ē āfe tari kexa ramākax ē sharatorakax,” ixō āfe ōiti mēraxō shināni. ²⁹ Nāskaxō āfe tari kexa ramākaxō meea āfe imi koshikōi nesetani. Nāskaxō āfe yora meea mā sharakōia meeni. ³⁰ Jesūs mā tāpixō āfe sharaōnoax nā kēro mā sharano, yōrafā rasi mēra fesoakekafā ato yōkani: “¿Tsōa ea tari ramākamē?” ato faito, ³¹ a aōxō tāpimisifāfe yoinifo iskafakakī: “¿Mī meimamē yorafāfe nia shoiakifetsakaxō mia pitsikinaifāfe? ¿Afeskakī mī noko yōkaimē tsōa ea ramāmē?” ixō fanifo.

³² Askafaifono Jesūs aa kemataima ōiakani, tāpixiki tsōa ramāmākī. ³³ Nāskaino nā kēromā ratei choayanā a sharafaa mā tāpixō, akiki kaxō ratokonō mai chachipakefōfā yoini: “Ē mia tari kexa ramākax mē shara,” ixō yoita a isinī itianiri yoini. ³⁴ Nāskafaito Jesūs yoini: “Yōxashta, mā mī shara ea chanīmara faax. Nāskakē tanaima katāfe a mī isinī imis mā mī sharaki,” fani.

³⁵ Jesūs mekai xateamano nā xanīfo Jairo pexe anoax fetsafo akiki fēkaxō yoifekani fenifo. Iskafakī yoinifo: “Mā mī fake naaki anā nōko ĩfo fekaxtefayamafe,” faifono, ³⁶ akka Jesūs ato nikakama, iskafakī nā xanīfo Jairo yoini: “Ratekima, ea chanīmara fafe,” ixō yoini.

³⁷ Nāskaxō Jesūs, “Tsoa nofe kaima kiki,” ato fani. Pedro iyota, Santiago iyota, āfe exto Juan iyota ato fani. ³⁸ Nāskata mā Jairo pexe ano nokokaxō ōiafo yorāfo oiakani fiisinifo nā fake xotofake manokani mā naano. ³⁹ Nāskata pexe mēra ikikaixō ato yoini iskafakī: “¿Afeskai mā oiai fiisikimē? Na fakekai nakeroko oxanō,” ato fani.

⁴⁰ Ato askafaito yorafāfe Jesūs ōsaketsanifo. Askafaifono pexe kani mēranoa keyokōi Jesūs ato kāimani. Nāskaxō apa yafi afa iyonī, a afe foafori afe fonifo. Nāskakanax nā fake xotofake raka ano ikifainifo. ⁴¹ Nāskata Jesūs mēkemā mētsoinifōfā yoini: “Xotofakeshta, ē mia yoikai fininīkafāfe,” faino, ⁴² koshikōi fininīkafāni, nā xotofake doce xinia aka ini. Mā fininīkafānax kani. Nāskaito ōikani yorāfo ratei fetsenifo. “¡Kee, ōikapo! ¿Afeskaxō otofamē?” fanifo.

⁴³Nāskaxō Jesús ato yoini: “Mā tsoa yoiki na fake xotofake nakē ē otofakī,” ato fani. Nāskaxō, “Pimakāfe na fake xotofake,” ato fani.

6

Jesús Nazarete anoxō nikakaspanifo

(Mt. 13.53-58; Lc. 4.16-30)

¹ Nāskata Jesús nānoax kani āfe maikōi ano. A aōxō tāpimisfori afe fonifo. ² Nāskata pena tenetiāfa ichanāti pexe mēraxō ato yoikī taefani. Anoxō Jesús ato yoiatio nikakani yorafo āa ranā yoinākani iskanifo: “Aira nikakapo, ¿Fani xō iskara tāpikī finakōiamē? Tāpikī finakōixō afama mishtifo fai tsōa atioroma keskafai,” ikanax āa ranā yoinānifo. ³ “¿Akka namamē a mīsa famis? María fake Santiagonō Josénō Judasnō Simónnō āto ochi. ¿Akka mā ōimamē afe chikofori nono nofe ikafo? Nāskakē nō nikapaiyatoroko,” fanifo. ⁴ Askafaino Jesús ato yoini iskafakī: “Na mai tio anoxō a Niospa meka yoisimis nikakōitirofo aōnoa yoisharakōiyānā. Akka āfe maikōi anoxō nikatirofoma, āfe kaifofa feta afe yorakōifāfe.”

⁵ Nāskakē arixō afama mishti fapaifikī anima. Akka a isinī ikaifo fisti rasi ato ramāino sharai fetsenifo. ⁶ Nāskata Jesús shināni: “¿Afeskakī ea chanīmara fakanimamē?” ixō tsōa nikayamaino. Nāskakē pexe rasi chaima ano Jesús kafāsani ato tāpimafōfāsafai.

Jesús aōxō tāpimisfo nīchini Nios Xanīfoōnoa ato yoitanōfo

(Mt. 10.5-15; Lc. 9.1-6)

⁷ Nāskata aōxō tāpimisfo doce kenani. Ato kenaino akiki feafono rafe rasi faxō ato nīchini: “Eōxō niyafa yōshi chakafo ato makinoa pōtatakāfe,” ixō ato yoini. ⁸ Nāskaxō anā ato yoini: “Fāi kakī, mā afaa fokiki, akka māto mēsteti fisti mā fotiro. Māto pishari mā fokiki a mā piairi mā fokiki māto koriri mā fokiki. ⁹ Nāskax fotakāfe māto sapatato fistiya, māto rapati fetsari mā fokiki.” ¹⁰ Nāskaxō ato yoini: “Mā pexe fetsa mēra ikiax nāno nētekāfe, nā mā anox kaitīa. ¹¹ Akka fatora pexe rasi anoxō mato ifikaspayanā mato nikaspaifono anox tsekekāfe māto taekinoa mapo taa ayanā. Mā askafaino tāpinōfo Nios atoki inimayamaino. Ē mato parakima yoi. Nā pexe rasi Sodomā anoafō feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikaspaifō nāfo ato omiskōimaki finakōixii,” ixō Jesús ato yoini.

¹² Nāskakē Jesúsxō tāpimisfo anox fonifo yorafo yoifokani. “Māto chaka xatekaxō Nios Ifofakāfe,” ato fayanā. ¹³ Ato makinoa ichapa niyafa chakafo potanifo. A isinī ikaifoya ato sharafayanā xiniyaxō ato māmāyanā.

Juan Maotista nani

(Mt. 14.1-12; Lc. 9.7-9)

¹⁴ Xanīfo Herodes nikani Jesúsnoa yoiatifono aōnoa fanīma mishtixō yoifofāsafafono. Nāskakē Herodes shināki iskafani: “Mā Juan Maotista otōita, nāskakē āfe sharaōxō ato sharafai,” ixō shināni.

¹⁵ Akka fetsafāfe yoikī iskafanifo: “Nā ato Niospa meka yoisimis Eliaskīa,” faifono, fetsafāferi yoikī iskafanifo: “Nato Niospa meka ato yoisimis, nā afetiama Niospa meka ato yoipaonifo keskafakī,” ixō yoiatifono.

¹⁶ Nāskafakī yoiatifāfe nikai Herodes iskani: “Nākīa Juan, mē ato textemafaitano mā anā otoa,” ixō shināni.

¹⁷ Herodes Juan retyoamano yoikī iskafani: “Mī exto āfi fiayamafe,” faito nikakī, Herodes akiki ōitifishiki āfe sorarofa yoini achikaxō metexkere akaxō karaxa mēra ikimanōfo. Akka nā Herodías Felipe āfe āfi ini, nā Felipe Herodes āfe exto ini. Akka nā Herodes Herodías fe fianāni. ¹⁸ Akka Juan Herodes yoini: “Na mī exto āfi mī fiatiroma,” ixō yoiaino, ¹⁹ nāskakē Herodías Juan noikaspakōikī retepaini. Akka retepaifikī retetiroma ini. ²⁰ Akka Herodes Juanki rateni māmāi tāpiax Juanmāi feronāfake sharakōikē Nios Ifofasharakōia. Nāskakē kexesharakōini. Nāskakē āfe āfinī noikaspafaito nikafikī, “¿Ē afeskaimē?” ixō shināta, Herodes Juan nikakōini. ²¹ Akka Herodías mā ato Juan retematiro ini, Herodes āfe cumpleaños ikaino. Nāskakē Herodes fista akī afe xanīfofōya soraro xanīfofōya Galilea anoax yoifofori ato ichanāfani. ²² Nāskaifono Herodías fake xomaya fista ikaino ikikainax ares yorafāfe ōinōfo mairani. Mairaito ōikī Herodes inimani, a afeta piaifori inimanifo askafanifo. Nāskakē nā xanīfāfe nā fake xomaya iskafani: “Ea yōkafē a mī fichipaiyai, ē mia mininō,” fani. ²³ “Mā na yorafāfe ōikani ē mia pāraima a mī fichipaiyai keskara ea yōkafē ē mia mininō,” ixō yoini.

²⁴ Askafaino nā xomaya kāikaixō afa yoini iskafakī: “¿Ē afaa xanīfo yōkatiro mē?” faito āfa kemakī iskafani: “Juan textexō ea āfe mapo ināfe fafe,” fani.

²⁵ Nāskata nā xomaya anā ikikaixō xanīfo yoini iskafakī: “Iskaratīa sapaki rātaxō Juan Maotista textexō ea āfe mapo ināfe,” fani.

²⁶ Askafaito nikai xanifo shināmitsakōini, Juan shināi. “Akka na yorafāfe nikaifono mē na kēro xomaya yoiā. Nāskakē ē ato Juan textemapaiyamafikī ē ato textemani,” ixō shināni. ²⁷ Nāskakē āfe soraro nīchini, Juan textexō āfe mapo fixotanō. ²⁸ Nāskakē soraro karaxa mēra kaxō, Juan textexō āfe mapo sapaki feni. Nāskaxō nā kēro xomaya ināno, nāatori āfe afa ināni. ²⁹ Nāskakē Juan āfe inafāfe nikanifo mā texteaifono. Nāskakē āfe yora fonifo maifaxikakī.

Jesús cinco mil feronāfakēfo ato pimani

(Mt. 14.13-21; Lc. 9.10-17; Jn. 6.1-14)

³⁰ Mā askano a aōnoa yoimisfāfe afe ichanākaxō yoinifo a atanaifo keskara ato tāpimayanā. ³¹ Askafaifāfe nikakī Jesús ato yoini: “Niri fekāfe tsōa istoma ano nores kaxō nō teneyonō,” ato fani. Yorafo mēxotaima atoki feaifono, nāskakē pitirofoma inifo. ³² Nāskakē Jesús aōxō tāpimisfo fe kanōanāfānē tsōa istoma ano kani. ³³ Akka mā fōkaxō yorafāfe Jesús kaito ōikakī tāpinifo. Nāskakē nā pexe rasi anoafō nā aōxō tāpimisfo fe kai ari ichonifo. Jesús aōxō tāpimisfo fe nokoamatai nokoi taenifo. ³⁴ Mā nokoax Jesús kanōanāfā makinoax fotopakekafā ōia yorafā rasi ōini. Ato fichixō ato shinākōini, nā oa ovejafo ifomais keskara ato ōikī. Nāskaxō afama mīshtifo ato yoisharakōini. ³⁵⁻³⁶ Nāskakē mā yātapakeaino aōxō tāpimisfo akiki fōkaxō yoinifo: “Mā yātapakei kiki nono tsoa ikamakī. Na yorafo nīchife pexe rasi ari yafi a pexe pasotai ikafo ari fokaxō a piaifo fitanōfo,” faifono, akka Jesús ato kemani: ³⁷ “Askakakīma mārōko ato pimakāfe,” ato faito, kemanifo iskafakakī: “¿Mī shināimē na yorafo pimaxiki kaxō a piaifo dos cientos kori exenē pāa nō ato fixotanō?” faifono, ³⁸ Jesús ato yoini: “¿Afe tii mā pāayamē? Fokaxō ōiyotakāpo,” ato faito, mā fokaxō ōitakakī yoinifo iskafakakī: “Nāno cinco pāa yafi foe rafes,” fanifo.

³⁹ Nāskakē ato yoini: “Ichanāfaxō na yorafo yoikāfe fasi ano tsaonōfo,” ato fani. ⁴⁰ Ato yoikī askafaifono keyokōi tsaoi fetsenifo, fetsa ano cien ini, fetsa ano cincuenta ini. ⁴¹ Nāskata Jesús cinco pāa yafi foe rafe tsemainfōfā, nai foisnīfōfā Apa Nios aicho fani. Nāskata mā pāa kaxkeketsaxō aōxō tāpimisfo ināni, yorafori ato inānōfo. Askatari foe raferi keyokōi ato inānifo pinōfo. ⁴² Nāskakē mā keyokōichi pikanax māyākōinifo. ⁴³ Nāskakē a chetefafo pāa yafi foe doce fēta fospikōiya ini. ⁴⁴ A cinco pāa piaifo cinco mil feronāfakēfos inifo.

Jesús iamāfā femākīa kani

(Mt. 14.22-27; Jn. 6.16-21)

⁴⁵ Mā yorafo pimata Jesús aōxō tāpimisfo yoini iskafakī: “Kanōanāfānē nanekāfe okiri iamāfā pokefaitaxikākī Betsaida ano rekē nokotaxikakī. Ē fenakaimakai, ē na yorafo nīchyonō,” ixō ato yoini. ⁴⁶ Mā yorafo nīchita māchi keya ari arese kani arixō Apa Nios kifikai. ⁴⁷ Mā fakishaino iamāfā nakirafe kanōanāfā ini. Akka Jesús kanima, ares fisti nēteni. ⁴⁸ Jesús ōini aōxō tāpimisfāfe tōfeaiifāfe nēfefanē ato katima faino iamāfā poiki mesenikōiaino, mā penaino. Nāskakē Jesús atoki kani iamāfā femākīa. Akka iamāfā femākīa kakī oa ato finōfainai keskara ini. ⁴⁹⁻⁵⁰ Iamāfā femākīa kaito ōikakī niāfakara ixō shinākani. Tai tai inifo. Nāskakē keyokōichi ōikani rateaifono. Akka Jesús ato yoini iskafakī: “¿Afeskai mā rateimē? Ēki rateyamakāfe,” ato fani.

⁵¹ Nāskata kanōanāfā mēra naneināfāfā, nēfefā nishpafani. Nēfefā nishpafaito ōikakī a aōxō tāpimisfāfe, “¡Keel! ¿Afeskaxō nēfefā nishpafaimē?” fanifo. ⁵² Akka Jesúsnoa tāpiyonifoma, Jesús afama mīshti fatiroxakī cinco pāa cinco mil feronāfakēfo ato pimafiitano. Niospa Fake fiano āto ōiti mēraxō tsōa shinānima, tāpiyonifoma.

Jesús Genesaret anoafō a isinī ikaifo ato sharafani

(Mt. 14.34-36)

⁵³ Jesús aōxō tāpimisfo feta iamāfā pokefainax Genesaret mai ano nokoni. Nāno iamāfā ketokonō kanōanāfā nexanifo. ⁵⁴ Nā kanōanāfā mēranoax fotopakefōfānaifono, yorafāfe tāpinifo. ⁵⁵ Mā tāpikanax pexe rasi pasotai ichoi fetsenifo. Nāskakaxō a isinī ikaifo, rātati kamaki rātakaxō ato efenifo Jesús ano. ⁵⁶ Nā Jesús kai ari fanīma mīshtixō, a isinī ikaifo fai nēxpakīa ato rātanifo. Nāfāfe, “Noko ramāmafe nō mia tari kexa ramākanō,” fanifo. Nā ramāifo tii shari fetsenifo.

7

Jesús ato yoini afeskai yorafo chakafomakī

(Mt. 15.1-20)

¹ Nāskata fariseofo fe a Moisés yoikī kirika keneni keskara ato tāpimamisfo Jerusalén anoax Jesús ano fenifo. ²⁻³ Nāfāfe ōinifo Jesúsxō tāpimisfāfe mechokomexoma piaifāfe, a āto xinifāfe yoinifo keskayamaifono. Nāskakē ato mekafanifo. Akka fariseofāfe keyokōi judeofo āto xinifāfe yoipaoni keskapaonifo. Piamax taeyoi mechomepaonifo chipo pixakakī. ⁴ Akka a afarafo ato miniaifo anoax fekanax, a ato xinifāfe yoinifo keskai mechokomekaxoma

pitirofoma. Āto xinifāfe afarafo feyafapaonifo keskai nāfori askapainifo. Āto kechofoya, āto jarafoya āto ochamefetifo, āto rakoti chokapaonifo āto xinifāfe apaonifo keskara.

⁵ Nāskakē fariseofo feta a Moisés yoikī kirika keneni keskara ato tāpimamisfāfe Jesús yōkanifo: “¿Afeskakī na mīōxō tāpimimisfāfe a nōko xinifāfe yoinifo keskara nikakanimamē na mechokomexoma piaifofaifāfe?”

⁶⁻⁷ Jesús ato kemani iskafakī: “Nā Niospa meka yoimisto Isaías matoōnoa yoini iskafakī: Na yorafāfe afaa tāpiafoma ato feparapaimisfo. Na yorafāfe eōnoa yoisharafikakī, akka āto ōiti mēraxō ea shināsharafoma. Āakōi ichanākanax fanāikani ea kīfyanā. A yorafa tāpimanaifo keskarakai ēfe mekama. Āakōi shināxaxō ato yoikani, ixō Isaías Niospa meka keneni. ⁸ Nāskakē a Niospa yoini keskara mā shinākima, a mātō xinifāfe yoini keskara mā shināmis.

⁹ “Nā mā shināpaiyai keskara fisti mā shināpai. Nāskakē a Niospa mato yoini keskara mā anā nikapaima. ¹⁰ Akka Moisés yoini iskafakī: ‘Mātō epa yafi mātō efa nikasharakāfe. Akka a āto apa yafi āto afa chakafaifo ato retetekāfe,’ ixō yoini. ¹¹⁻¹² Anori kenekī yoifinino, akka mā yoikī iskafamisi: ‘Feronāfāke āfe epa yafi āfe afa yoikī iskafatiro: “Ē mato afaa inātiroma, nā ēfenāfo mē Nios inākī ixō yoitirofo,”’ mā famis. Nāskata a Niospa yoini anori mā ato yoimisma mātō epa yafi mātō efa kexeshakāfe ifiano. Akka mā ato yoimisi iskafakī: ‘Anā mātō epa yafi mātō efa mā afaa inātiroma,’ ixō mā ato yoimisi. Na shara. ¹³ Nāskakē a Niospa yoini anori yoitama, a mātō xinifāfe yoipaonifo anori fisti mā ato yoimisi. Nāskaxō afara fetsafo mā famis, Niospa mekakōi mā yoimisma,” ixō Jesús ato yoini.

¹⁴ Nāskaxō Jesús yorafa kenaxō ato yoini iskafakī: “Keyokōichi ea nikasharakōikāfe tāpisharakōixikakī ē mato yoinō. ¹⁵ Nā nō piatokai noko chakana fatiroma, akka nōko shinā mēraxō nō afara chakafo shināito noko chakanafatiro. ¹⁶ Mā pachoyakī nikasharakāfe,” ato fani.

¹⁷ Nāskata Jesús yorafa nīchifaini pexe mēra ikini, nānoxō a aōxō tāpimimisfāfe yōkanifo: “A mī yorafa yoia keskara nokori yoife nō tāpinō,” faifono, ato yoikī iskafani: ¹⁸ “¿Afeskakī māri mā nikasharaimamē? ¿Mā tāpimamē afara nō piato nōko xaki mēraxō noko chakafatiroma?” ¹⁹ Akka a nō piati nōko ōiti mēra kaima, nōko āto mēra kai, mā nōko āto mēranoax payokomeano chipo nō aya safatiro.”

“Akka a nō piati chakama, keyokōi shara,” ixō ato yoini. ²⁰ Nāskaxō anā ato yoini: “Akka mātō shināmā shināxō mā afarafo chakafatiro. ²¹⁻²² Nāskakē āto shinā mēraxō shinākakī, yorafāfe afara chakafo shināmisfo. Feronāfākefāfe āto āfima chotaifono, kērofāferi āto fenema chotamamisfo. Nāskata yometsokata, ato retemisfo. Askatari kēro fetsafo kaxefakāta, fetsafo chakafakī, mekafakāta; afara fetsafo chakafakāta, ato pārakāta, a afara apaiyafifo fisti akāta, a fetsafāfe fiati fipaikāta, āa chanikāta, āa kakapaikāta, askatari shināsharamisfoma. ²³ Nā afara chakafo āto shinā mēraxō shināifo keskakī nāato ato chakafaxii,” ixō ato yoini.

Xotofake judeoyamafixō Jesús chanīmara fakōini
(Mt. 15.21-28)

²⁴ Nāskata nānoax pexe rasi Tiro ano Jesús kani. Mā kaax pexe fetsa mēra ikini, ano ikikē tsōa tāpimanō. Akka nāno ikiax onetiroma ini. ²⁵ Nānoa koshikōi tāpinifo, nāskakē nā fake xotofake niafaka naneato āfe afa Jesús ano kaxō a nāmā ratokonō mai chachipakefōfāni. ²⁶ Nā kēro xoko fetsa Sirofenicia mai anoa ini. Nāskakē Jesús ano kani. Kaxō yoikai iskafakī: “Ēfe fake xotofake makinoax niafaka yōshi chaka potaxōfe,” fani.

²⁷ Askafafaiato nikakī Jesús yoini iskafakī: “Āa fakefāfe pikī taefayonōfo. Enefe, a fakefāfe piati fiāxō nō paxta inā, askarakai sharamaki,” faito, ²⁸ nā kēromā kemani iskafakī: “Eje Ifo, a mī ea yoiai keskara mē nikai. Akka paxtafāfe pitirofo a fakefāfe piati āfe potofō mīsa nāmā keyo pakeaito,” faito, ²⁹ Jesús yoini iskafakī: “Chanīma, mī ea kemasharakōia. Nāskakē mā mī katiro, mī fake xotofake makinoax mā niafaka yōshi chaka mā tsekeaki,” fani.

³⁰ Nā kēro mā āfe pexe ano nokoxō ōia āfe fake xotofake raka ini, a makinoax mā niafaka tsekeano.

Jesús feronāfake pāstokōi ita mekamisma sharafani

³¹ Jesús Tiro mai anoax tsekekainikakī, Sidón yafi pexe rasi Decápolis finōfaini kaax, Galilea iamāfā kesemē nokoni. ³² Nāno yorafāfe feronāfake mekamisma ita pāstokōi iyonifo. Mā iyokaxō yoinifo iskafakakī: “Mī mīfi māmāfe nikamismaki pāstokī,” faifono, ³³ Jesús a fisti ōri iyonī, yorafa makinoax. Nāskaxō āfe mīfi āfe pachō kini mēra meeini. Askafatari āfe mīfiki kemo mechota āfe ana ramākani. ³⁴ Nāskafata nai foisnīfōfā xakaita yoini iskafakī: “Efata,” fakī. (Akka nōko mekapa nō yoimisi iskafakī: “Papeita nikasharafe,” fakī.)

³⁵ Nāskafaino, nā pāsto āfe pācho nikasharakōini. Āfe anari sharakōitani, nāskax meka sharakōini. ³⁶ Nāskafata, “Mā tsoa yoikī,” Jesús ato fafaino, askatamaroko ato yoikī

finakōifofāsa fanifo. ³⁷ Nāskakē, “¡Kee, ōikapo! ¿Afeskaxō iskara sharafaimē?” ikata iskafakī yoinifo: “A pastofa ato sharafaino mā nikakani, a mekamisfomari mā ato sharafaino mā mekakani,” ikanax yoinānifo.

8

Jesús cuatro mil feronāfakefo pimani (Mt. 15.32-39)

¹ Nāskata pena fetsa yorafā rasi anā Jesúski fenifo āfe meka nikai fekani. Nāskata a piaifori ano afaa inima. Nāskaifono Jesús aōxō tāpimisfo kenaxō yoini iskafakī: ² “É na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. ³ Akka afaa pimaxoma āto pexe ano ē ato nīchiano, fonāikani afaa pikanaxma fai nēxpakīa paketirofo. Atiri chai inoax feafoki,” ato faino, ⁴ a aōxō tāpimisfāfe kemanifo: “Akka, ¿afeskaxō nō ato pimatiromē? ¿Fañia nō afaa fitiromē, nonokai tsoa ikama?” faifono, ⁵ anā Jesús ato yōkani: “Akka, ¿afe tii mā pāayamē?” ato faito, “Siete pākīa,” fanifo.

⁶ Nāskakē Jesús, “Yōrafā rasi nāmā tsaokāfe,” ato fata, siete pāa tsomainifōfā. Apa Nios aicho fata, pāa kaxke pakexō aōxō tāpimisfo ināni. Nāfāferi nā yorafo inānifo pinōfo. ⁷ Nāskata foe ichapama ranāri ini. Nāskakē atoōxō Jesús Apa Nios aicho fata, aōxō tāpimisfo foe ināni a yorafori ato inānōfo. ⁸ Nāskakē keyokōichi pikanax māyakōinifo. A pikī chetefaafo siete fēta fospikōia ini. ⁹ A piafo yorafo ichapakōi inifo, cuatro mil inifo. Nāskaxō Jesús ato nīchini fotanōfo. ¹⁰ Nāskata Jesús a aōxō tāpimisfo fe kanōanāfā mēra naneinākanax Dalmanuta mai ano kani.

Fariseofāfe, “Jesús, tsōa atiroma keskara noko ispafe nō mia chanīmara fanō,” ixō yōkanifo (Mt. 16.1-4; Lc. 12.54-56)

¹¹ Nāno fariseofo akiki fenifo afe yoināi fekani, feparaxō yōkapaikani. Iskafakī yoinifo: “Tsōa atiroma keskafakī afama mīshiffo fakī noko ispafe nō mia chanīmara fanō mī Nios ariax oamāki,” faifono, ¹² Jesús fāsi xakainākanā ato yoini iskafakī: “¿Afeskakī na yorafāfe tsōa atiroma keskafakī noko ispafe ea fakanimē? É mato pāraima a Nios fistichi atiro keskara ē mato ispaima,” ixō ato yoini.

¹³ Ato askafata mā ato makinoax kai kanōanāfā mēra naneinākanā okiri iamāfā pokefaini kani.

“Fariseofo feta saduceofāfe anorima yoimisfoki ato nikayamakāfe,” Jesús ato fani (Mt. 16.5-12)

¹⁴ Akka mā fōkakī, a pifofaifo shināmaki fainifo. Akka nā kanōanāfā mēra pāa fisti ini. ¹⁵ Askaifono Jesús ato yoini: “Ōisharakāfe. Fariseofāfe Herodes feta pāa faraxakafō piyamakāfe,” ato fani.

¹⁶ Ato askafaino, a aōxō tāpimisfo āa ranā yoinānifo iskakani: “¿Afeskakī noko iskafaimē? Nōkai pāa yama,” ikanax yoinānifo.

¹⁷ Nāskaifono mā tāpiox Jesús ato yoini iskafakī: “¿Afeskai nō pāayamara mā ikimē, mātō ōiti mēraxō mā shināsharaimamē? ¹⁸⁻¹⁹ Feroyafioxō mā ōi sharaima, pachoyafioxori mā nikasharaima. ¿Akka mā shināimamē? A cinco pāa cinco mil yorafo ē ato pimaita akka, ¿a chetefaafo afe tii fēta fospia mā fiitamē?” ato faito kemanifo: “Doce fēta ikita,” fanifo.

²⁰ “Askatari a siete pāa cuatro mil yorafo ē ato pimaita, akka, ¿afe tii fēta fospia mā fiitamē?” ato faito, “Siete ikita,” fanifo. “Askatari, ¿nā siete pāa ē kaxkeketsaxō ē ato minita cuatro mil feronāfake, afe tii fēta texefafo mā fiitamē?” ato fani. “Sietekīa,” fanifo.

²¹ Askafaifono ato yoini iskafakī: “¿Ai mā tāpiamamē?” ato fani.

Jesús yora fēxo Betsaida anoxō sharafani

²² Nāskata mā Betsaida ano nokoafono, yora fēxo Jesús ano iyonifo. Mā iyokaxō iskafakī yoinifo: “Jesús, na feronāfake ramāfe,” faifono, ²³ Jesús āfe mēkemā nā fēxo mētsoinifōfā pexe rasi pasoatai iyoni. Nārixō āfe kemō āfe fero mechanafayanā āfe mēkemā ramāni iskafakī yōkayanā: “¿Mā mī afara ōitiromē?” faito, ²⁴ nā fēxo mā ōisharakī iskafakī yoini: “É ōi na feronāfakefo oa ififo kafanai keskara,” faito, ²⁵ Jesús anā āfe mēkemā fero ramākani. Nāskafaano nā fēxo mā sharaxō ōisharakōini. Nāskaxō keyokōi xafakīakōi ōisharakōini. ²⁶ Nāskakē Jesús āfe pexe ano nīchini iskafakī yoivanā: “Mī anā pexe rasi ano kakiki, mī pexekōi ano katāfe, mī tsoa yoikī,” fani.

“Mī Cristo mia Niospa ifini nokoki nīchixi mī nōko xanīfo finakōia inō,” ixō Pedro Jesús yoini (Mt. 16.13-20; Lc. 9.18-21)

²⁷ Nāskafata Jesús a aōxō tāpimisfo fe pexe rasi Cesarea Filipo pasoato fonifo. Fāi kakī Jesús ato yōkani: “¿Ea afaa yorafāfe faimē?” ato faito, ²⁸ aōxō tāpimisfāfe kemanifo iskafakakī:

“Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi nā ato Niospa meka yoipaoni fetsa rakikia mia fakani,” ixō yoinifo.

²⁹ “Akka, çmā ea tsoara faimē?” ato faito, Pedro kemani iskafakī: “Mī Cristo mia Niospa ifini nokoki nīchixii mī nōko xanīfo finakōia inō,” faito, ³⁰ Jesús yoini iskafakī: “Eōnoa tsoa yoyiamakāfe,” fani.

“Chipo ea retexikani,” Jesús ato fani
(Mt. 16.21-28; Lc. 9.22-27)

³¹ Nāskata Jesús ato yoikī taefani iskafakī: “Ē chipo omiskōi finakōixii. Askatari ea ōikaspakakī ea potaxikani, judeofāfe āto xanīfofo feta a Nios ato kīfixomis xanīfofāfe a Moisés yoikī kirika kenenī keskara ato tāpimamisfāfe. Askatari ea retexikani, akka ea retefiafono tres nia oxata ē anā otoxii,” ato fani. ³² Nāskakē xafakīakōi ato yoini. Ato yoikī askafaito ori iyoxō Pedro yoini iskafakī: “Ifo, askayamafe mia retekanima kiki,” faito, ³³ anā Jesús fesoakekafā aōxō tāpimisfo ōiyanā iskafakī Pedro yoini: “Emakinoax katāfe, Satanás. A Epa Niospa shināi keskara mī tāpiamaki. Akka nā yorafāfe shināifo keskara mī shināikai,” fani.

³⁴ Nāskata Jesús aōxō tāpimisfoya yorafo kenaxō ato yoini iskafakī: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiyai keskara nikakōitiro. ‘Ēfe Ifoxō ea retefiaifono ēkai ēfe Ifo ē potapakenakama,’ ixō shinātiro. ³⁵ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, ēfe meka yoiyai askayamāki eōxō reteafono ē ifixii ēfe İpaxanō eamāi İfofamiskē. ³⁶ Akka fatora fetsa afara ichapayakōi ikatsaxakī, anā āfenā itiroma. Mā naax omiskōipakenaka. ³⁷ Akka, çnīpaxakī yorafāfe afe tii kopifatirofomē? Maa, afaa kopifatirofoma. ³⁸ Akka fatora fetsa eō rāfikī, ēfe meka sharari yoikaspai yora chakafāfe ferotaifi ēri aō rāfikī yoikī iskafaxii: ‘Ē na yora ōimisma,’ ē faxii ēfe Ēpa sharafoya fotoxō, ēfe ājiri sharafori efe fotopakefofāxikani,” ixō ato yoini.

9

¹ Askatari anā Jesús ato yoini iskafakī: “Ē mato pāraima, fatora fētsa nono efe iyoxō nayoxoma ēfe Epa xanīfo finakōia ōiyoxikani āfe sharaōnoax oaito,” ixō ato yoini.

Jesús āfe femānā fetsa keskara ini, fafekōini. Āfe rapatiri oxokōi ini
(Mt. 17.1-13; Lc. 9.28-36)

² Nāskata mā seis nia finōta, Jesús māchi keyakōi ari māpekī āfe ina tiis ato iyonī. Pedro iyota, Santiago iyota, Juan iyota ato fani. Nāriax āto ferotaifi Jesús fetsa keskara ini. ³ Āfe rapati fafekōini oxo finakōia ini, mā patsasharafakakī tsōa askafatiroma ini. ⁴ Nānoa Elías yafi Moisés ōinifo Jesús fe mekaifono. ⁵ Nāskaifono Pedro Jesús yoini iskafakī: “Ifo, sharakōi ano nō oa. Nono nō tres tapas fanō, fetsa mia axota, fetsa Moisés axota, fetsa Elías axota, nō fanō,” fani.

⁶ Akka aōxō tāpimisfo ratekōinifo. Nāskakē Pedro tāpinima a yoiyai keskara, shināyamaino yoini. ⁷ Nāskaifono kōinī ato maipakefofāni. Nā kōi mēranoax mekai iskaito nikanifo: “Nafi ēfe Fakekōiki ē aō noikōi. Nāskakē nikasharakōikāfe,” ikaito nikanifo.

⁸ Askaito nikafīkakī, a kemataima ōiafo ano ato fe tsoa inima, Jesús fisti ares ato fe ini.

⁹ Nāskata mā māchi keya ariax fotoxō, “A mā ōia keskara mā tsoa yoiki. Ē naax mē anā otoano mā ato yoitiro,” ixō ato yoini. ¹⁰ Nāskakē tsoa yoitama. Ares fisti āto ōiti mēraxō shinānifo mā tāpifikaxō. Naax ē anā otoxira nokofaito nō tāpiama ikanax yoinānifo.

¹¹ Nāskaxō Jesús yōkanifo, iskafakakī: “çAfeskakī a Moisés yoikī kirika kenenī keskara ato tāpimamisfāfe iskafakī yoimisfomē Elias rekē oi taexii?” ixō yoimisfo faifono, ¹² ato kemakī iskafani: “Chanāna, Elías rekē fotoi taexii, nāato ato yoisharaxii itipinīsharanōfo. Akka, çafeskakī kirika ano kenenifomē, a ē omiskōixiai yorafāfe ea chakafakakī eo potaifono? ¹³ Akka ē mato yoinō mā Elías ifana. Nāskakē nā apaiyai keskafakakī chakafanifo. Nānori aōnoa yoikī kirika kenenifo,” ixō ato yoini.

Jesús feronāfake naetapa niafaka chaka pōtaxoni
(Mt. 17.14-21; Lc. 9.37-43)

¹⁴ Nāskata mā Jesús fe fōtakakī a Jesúsxō tāpimis fetsafo ano nokokaxō ōitoshinifo yōrafā rasifo fe a Moisés yoikī kirika kenenī keskara ato tāpimamisfo fe ato fe feratenāifāfe. ¹⁵ Nāskaifono Jesús oaito fichikanax akiki keyokōi farekefaikaxō, “Kee, mā Jesús oi kiki,” ikaxō yoisharanifo.

¹⁶ Askaifono Jesús ato yōkani iskafakī: “çAfeskai mā ato fe feratenāimē?” ato faino, fētsa kemani iskafakī: ¹⁷ “Maestro, ēfe fake ē mikiki efea, niafaka chaka a mēra nanexō mekamamismano. ¹⁸ Nā kapaiyai arixō, niafaka chakata achiano paketiani. Āfe axfapa fākox keyopaketiani, askatari āfe piti yeyexamis, askatari charishi fetsemis. Mē mī inafō yoiya a makīnoa niafaka yōshi chaka pōtanōfo. Akka mī inafāfe atirofoma,” faino, ¹⁹ Jesús

kemani: “Mā kai ea chanīmara faima. Mā afara shināmis. Akka afetiakai ē nono mato fe itianima. ¿Afetīakai mā ea nikaimē? Niri nā fake efekāfe,” faino, ²⁰ nāskakē Jesús ano nā fake iyonifo. Akka nā nīafaka mā Jesús tāpixō, nā feronāfake anā choamanaino anā nāmā pakeni. Nāskakē tarame tarame iyanā āfe axfapa fākox keyopakeni.

²¹ Nāskaxō Jesús apa yōkani iskafakī: “¿Afetīa fichinimē?” iskaifaito, apa yoini iskafakī: “Afetīa fichinima. Yomeax fichini. ²² Mēxotaima na niafaka chakata iskafaino, chiinaki paketa fakanaki pakemis, retepaikī iskafaino. Nāskakē mī sharafatiromakī sharafafe, noko shinākī ēfe fake ea sharafaxōfe,” faino, ²³ Jesús yoini: “¿Afeskakī ēfe fake mia ea sharafaxotiromamē mī ea faimē? Ea chanīmara faifono ē ato afama mīshti faxotiro,” fani.

²⁴ Nāskakē nā fake āpa fāsikōi mekani iskafakī yoini: “Ē mia chanīmara fai, ea axōfe ē mia chanīmara fakī finakōinō,” ixō yoiaino, ²⁵ yōrafā rasi ichanāfono Jesús ōini, Jesús feronāfake makinoa niafaka potaito ōipaikani. Nāskakē Jesús niafaka iskafakī yoini: “Niafaka yōshi chakata, na fake mī mekamatama, mī nikamamismaki, ē mia yōikai na fake makinoax tsekekaitāfe, nāskax mī anā a mēra ikiki,” faino, ²⁶ niafaka yōshi chaka fāsikōi fiisini. Nāskakī nā fake anā choamani. Nāskata mā fake makinoax tsekekaikī oa naa keskara fafāini. Nāskakē iskafakī yoinifo: “Mā naa raka,” faifono, ²⁷ akka Jesús āfe mēkemā mētsota fininīfofanaino nā feronāfake niināka fāni.

²⁸ Nāskafata Jesús pexe mēra ikikainano, anoxō a aōxō tāpimisfāfe a fisti yōkanifo: “Akka, ¿afeskakīri nō niafaka yōshi chaka potatiromamē?” ixō yōkaifono, ²⁹ Jesús ato kemani: “Na keskara niafaka mā potakī Epa Nios kīfita foni teneyanā Nios shinākī mā potatiro. Akka mā askayamaxō mā potatiroma,” ato fani.

*Anā Jesús ato yoini: “Chipo ea retexikani,” ixō
(Mt. 17.22-23; Lc. 9.43-45)*

³⁰⁻³¹ Nāskata Jesús nānoax a aōxō tāpimisfo fe kakī Galilea finōfaini. Akka Jesús ato tāpimakaspani, “Ea tāpiyamanōfora,” ixō. A aōxō tāpimisfoosmāi ato tāpimakī iskafakī ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ato faito, ³² tsoā tāpinima a ato yoi ai keskara. Yōkapai akiki ranonifo.

*“Akka, ¿tsoakaimē sharafinakōia?” inifo
(Mt. 18.1-5; Lc. 9.46-48)*

³³ Nāskata pexe rasi Capernaúm ano nokonifo. Nā pexe anoxō Jesús ato yōkani: “¿Afeskai fai anoax mā feratenāmē?” ato faino, ³⁴ tsoa tooxinima, akka fai nēxpakīanoax feratenāi iskananax: “¿Tsoakai sharafinakōiamē?” ikanax.

³⁵ Nāskakē Jesús tsoaxō a aōxō tāpimisfo doce kenaxō ato yoini: “Fatora fētsa ato finōpai nā yorafāfe āto ina keskara itiro, nāskakē keyokōi ato axosharakōitiro,” ixō ato yoini.

³⁶ Nāskata ato nēxpakī fake yome nīchita, chishtoinīfofā ato yoini: ³⁷ “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiriri noisharai,” ixō Jesús ato yoini.

*Fētsa noko noikaspatama noko sharafai
(Mt. 10.42; Lc. 9.49-50)*

³⁸ Ato askafaito Juan yoini: “Maestro, mā nō ōia oa feronāfake fistichi mī aneōxō niafaka chaka potaito. Nāskakē mī nofe rafemismakī, askafayamafē mī yorafo makinoa niafaka potatiromaki nō faa,” faito, ³⁹ Jesús kemani iskafakī: “Askafayamakāfe. Akka nā ēfe aneōxō afama mīshtifo faxō chipo ea chakafakī mekafatiroma. ⁴⁰ A noko chakafakī mekafaima, nofe rafesharai. ⁴¹ Akka fētsa mato shinākī, nato Cristo Ifofaki ixō mato faka ayamanaito, askara Niospa afara ināsharatiro. Chanīmakōi ē mato yoi,” ixō ato yoini.

*Noko fētsa afara chakafamaino āfenā mesekōi itiro
(Mt. 18.6-9; Lc. 17.1-2)*

⁴² Anā Jesús ato yoini iskafakī: “Na fakefāfe ea chanīmara faifono, fatorafāfe ato afara chakafamaino, tokirinīfaya tenextifaxō fakafā nōafā mēra mā ato potatiro ato anā afaa chakafamanōfoma. ⁴³⁻⁴⁴ Akka māto mēkemā mato afara chakafamaino mextemekāfe. Akka mā mā mextemeax Epa Nios ari mā katiro afe nīpaxakī. Akka mifi rafeyaxō mā afara chakafaax chiifā xoisai mēranoax mā omiskōipakenaka, a chiifā nokanakama anoax. Anoax xenafo nayamaino, chiiri nokanakama anoax. ⁴⁵⁻⁴⁶ Askatari mī tae mia afara chakafamaino oxteme fe. Akka mā mī oxtemeax Epa Nios ari mī katiro afe ipaxakī. Akka mī oxtemeamax tae rafeyax chiifā mēranoax mī omiskōipakenaka, anoax xenafo nayamaino, chiiri nokanakama anoax. ⁴⁷ Askatari mī fero mia afara chakafamakē tsekafe. Nāskax mī fero fistiax Epa Nios xanīfo ano mī katiroki. Akka mī fero rafeyax chiifā mēranoax mī omiskōipakenaka. ⁴⁸ Anoax xenafo nayamaino chiiri nokanakama anoax.

⁴⁹ “Nāskakē chiifā mēranoax keyokōi omiskōipakenakafo. ⁵⁰ Akka tashi shara. Akka mā namī tashiya ayamaxō, afeska faxō mā anā sharafatiromē, mā anā sharafatiroma,

chakanatiro. Nāskakē oa tashi keskara ikāfe isharakōiax. Fetsafo ato yoisharaxikakī anā afaa chakafanōfoma.”

10

Feronāfake āfe āfi fe enenātirofoōnoa Jesús ato yoini
(Mt. 19.1-12; Lc. 16.18)

¹ Nāskata Jesús Capernaúm anoax tsekekainax Judea mai ano kani. Nā Jordán faka ketokonō, nānoxō anā yorafo ichanāfaxō anā ato yoini, ato yoimis keskafakī. ² Ato yoikī askafaino fariseofo Jesús ano fenifo. Akiki fēkaxō chakafakī mekamapaikani. Nāskaxō yōkanifo iskafakī: “Nōko xinifāfe Niospa meka yoikī kenenifo keskafakī, ¿feronāfāke āfe āfi enepaikī enetiromē?” ixō yōkaifono, ³ Jesús ato kemani: “Moisés mato kirika kenexokī, ¿fanīri mato yoinimē?” ato faito, iskafakī yoinifo: ⁴ “Moisés kenekī iskafani: ‘Fētsa āfe āfi enepaikī taefakī kirika kenexotiro iskafakī: “Ē mia anā fiima, mī anā ēfe āfi ikima,”’ ixō mā yoitiro noko fani,” ixō yoaifono, ⁵ Jesús ato kemani iskafakī: “Moisés iskafakī mato yoini: ‘Mā kai afaa tāpiama mātō ōiti kerexkōi,’ ixō mato yoini. ⁶ Akka taekōifakī, Niospa feronāfake yafi kēro onifani. ⁷⁻⁸ Nāskakē feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo. Nāskakē anā yora rafema, yora fisti keskara ikani āfe āfi fe. ⁹ Nāskakē feronāfāke āfe āfi enetiroma Niospamāi ato fianāmano,” ixō ato yoitā, ¹⁰ mā pexe mēra ikiano, anā a aōxō tāpimisfāfe yōkanifo: “A mī yorafo rama yoiāi keskara nokori yoife,” faifono, ¹¹ Jesús ato yoini iskafakī: “Akka fētsa āfe āfi enexō kēro fetsa fixō afe ikī a filī taefani chakafai. ¹² Askatari feronāfake āfe āfi enexō fetsa fixō fetsa fe ikī āfe āfi chakafai,” ixō Jesús ato yoini.

Jesús fakefo chishtoxō ato māmāyanā ato Epa Nios kifixopakeni
(Mt. 19.13-15; Lc. 18.15-17)

¹³ Askatari yorafāfe āto fakefo Jesúski efenifo ato māmāpakeyanā ato Epa Nios kifixonō. Akka a Jesúsxō tāpimisfāfe ato iskafanifo: “Mātō fakefo efexō nōko Ifo fekaxtefayamakāfe,” ato faifono, ¹⁴ nikakī Jesús ato iskafani: “Ato enekāfe na fakefo ekeki fenōfo, ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

¹⁵ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios xanīfo ika ari mā katiroma,” ixō ato yoitā, ¹⁶ fakefo chishtoinīfōfā ato māmāpakeyanā: “Epa Niospa, na fakefo sharafafe,” fani.

Feronāfake naetapa kori ichapayax Jesús fe mekani
(Mt. 19.16-30; Lc. 18.18-30)

¹⁷ Mā askafata mā Jesús kaino feronāfake fetsa ichoax akiki nokoni. Mā akiki nokoxō ratokonō mai chachipakefōfā yōkani iskafakī: “Maestro mī sharaki, ea yoife ē afaa afeskatiro-makī Nios xanīfo fe ipaxakī,” ixō yōkaito, ¹⁸ Jesús kemani: “¿Afeskakī sharara mī ea faimē? Akka Nios fisti shara. ¹⁹ Niospa shināmanaino a Moisés yoini keskara mā mī tāpia. Iskafakī yoini: ‘Ato reteyamakāfe, askatari mātō āfima chotayamakāfe, askatari kēromāri mātō fenema chotamayamakāfe, askatari atoki yometsoyamakāfe, askatari chanī yoiyamakāfe, askatari mā kaxpa ato pārayamakāfe, askatari mātō epa yafi mātō efa nikasharakōikāfe,’” ixō Jesús yoini.

²⁰ Askafaito nā feronāfake kemani iskafakī: “Maestro, nā mīa yoiāi keskara mē nikamis yomexō,” faito, ²¹ nikakī Jesús ōiyanā aō noiyanā iskafakī kemani: “Nāno afara fisti mī tāpiama. Kaxō mī afaarafo minixō kori fixō nā afaamaisfo ato ināketsatāfe. Nāskakē nai mēranoax afama mīshitifoya mī ixikai. Mā mī kori ato ināketsata anā oxō ea Ifofasharafe,” ixō yoini.

²² Askafaito nikai nā feronāfake shināchakakōi tooxinima kori ichapayamāiyaxō ato inākaspa. Nāskax Jesús makinoax kani.

²³ Nāskaito Jesús aa kemataima ōiakexō, aōxō tāpimisfo yoini iskafakī: “A yora afama mīшти ichapaya Nios xanīfo ano katiroma, fekax pishta,” ixō ato yoiāito, ²⁴ nikakakī āfe inafāfe: “Kee, āfe meka nō tāpitiro,” ixō tāpipainifo. Askaifono anā Jesús ato yoini iskafakī: “Ēfe fakefāfe, fekax pishta afama mīshitifoya ikatsaxakī mā Nios Ifofapaia. ²⁵ Māraki camello akoja kini mēra ikipaifi ikitiro, fekaxkōi efapamāiax. Nāskarari yora afama mīшти ichapayato Nios Ifofapai, fekaxkōi āfe afama mīshitifomāi potakaspakī,” ixō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Keel! ¿Afeskax nō Nios fe ipaxatiromē?” ikanax yoinānifo.

²⁷ Askaifāfe ōikī Jesús ato yoini: “Yorafokai āa ifimetiromā. Nios fistichi yorafo ifitiro. Niospa afama mīshitifō fatiro, yorafāfe atiroma keskara,” ixō ato yoini.

²⁸ Ato askafaito nikakī Pedro yoini: “Ifo, nō mefe okī nōko afama mīshitifō nō ōiferani nō mefe oni,” faito, ²⁹ Jesús kemani iskafakī: “Ē mato paraima, fētsa eōxō ēfe meka sharaōnoa

ato yoikakī āfe pexe ðifaini, āfe onefetsafori ðifaini, āfe poifori ðifaini, āfe apari ðifaini, āfe afari ðifaini, āfe fakefori ðifaini, āfe tareri ðifaini,³⁰ nāato niyoxō afama mīštifo fitiro, Niospa ināino, pexefoya ita, onefetsafoya ita, poifoya ita, afafoya ita, fakefoya ita, tarefoya ita itiro. Nāfo Niospa ināsharafiano omiskōixii. Nāskafīax chipo Epa Nios fe ipanaka. ³¹ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

*Anā Jesús ato yoini: “Mā chaima ea retekanira,” ixō
(Mt. 20.17-19; Lc. 18.31-34)*

³² Askafakī ato yoita Jerusalén ari kani. Jesús rekē kaino aōxō tāpimisfo acho fonifo. “Kee, ¿afeskai nōko Ifo Jerusalén ano kaimē?” ikanax ratekōinifo. Nāskaifono a aōxō tāpimisfo tūi ato kenaxō Jesús ato yoini iskafakī: “Iskaratīa afaa afeskaimākai ē mato yoinō. ³³ Mā mā ðikai, iskaratīa Jerusalén ano nō māpei kaikai. Nānoxō ea achikaxō a ato Nios kīfixomis xanīfofo yafi a Moisés yoikī kīrika keneni keskara ato tāpimamisfo ea ato inākani kiki. Anoxō ea iskafakani: ‘Na Jesús ato chakafamiskī retēkēfē, ixō ea yoikāta, yora fetsafo ano ea iyokani afāfe ea retenōfo. ³⁴ Nāfāfe ea kaxemetsama fayana, ekeki kemo mechoketsayanā ea koshaketsakata ea retekani. Akka ea askafafīafono tres nia oxata ē otōxii,” ixō ato yoini.

*Santiago feta Juan Jesús yōkanifo afe xanīfo ipaikakī
(Mt. 20.20-28)*

³⁵ Santiago fe Juan, Zebedeo fake rafe ini. Nā rafeta Jesús ano fōkaxō iskafakī yoinifo: “Maestro, na nō mia yoiai keskafakī noko axōfē, nō mia yōkakai,” faifono, ³⁶ ato yōkani: “¿Ē mato afaa afeska faxotiomē?” ato faito, ³⁷ anā yoinifo iskafakakī: “Mī xanīfokōiki nokori xanīfo imafe, nō mefe xanīfo inō. Takai fetsa ē tsaofaino, takai fetsari ēfe ochi tsaonō,” faifono, ³⁸ Jesús ato yoini iskafakī: “Na mā ea yōkai keskara mā tāpiama. ¿Na ē omiskōiari keskai māri mā omiskōitromē?” ato faino, ³⁹ kemanifo iskafakakī: “Ēje, nōri nō tenetiro,” faifono, Jesús ato yoini iskafakī: “Chanīma, nā ē teneai keskafakīri, mā tenetiro omiskōifinakōifiki. ⁴⁰ Akka efe ketaxamei tsaopai tsoa efe ketaxamei tsaotiroma. Ēfe Epa Nios fistichi tāpia. Nā Epa Niospa katoafo ano efe tsaotirofo,” ixō ato kemani.

⁴¹ Askafaifāfe nikakani a aōxō tāpimisfo diez atoki ðitifishkinifo, Santiago yafi Juan mepaikani.

⁴² Askafifono akka Jesús ato kenaxō ato yoini iskafakī: “Mā mā tāpia, yora fetsafo xanīfokaxō fāsikōi mekayanā ato yonomamisfo. A xanīfo fe rafeafāferi ato yoimisfo iskafakakī: ‘Nōri mato xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. ⁴³⁻⁴⁴ Akka mā ranā askayamakāfe. Askatamaroko fatora fetsa mā xanīfo ipai, ato yonoxomis keskara mā itiro. ⁴⁵ Akka ēri anori shināima, ēfe Epa Nios ariax ē nāmā fotoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoñoax naxiki ē oni. Satanás chaka āto ifo inōma ē oni,” ixō Jesús ato yoini.

*Jesús Bartimeo fēxokē sharafani
(Mt. 20.29-34; Lc. 18.35-43)*

⁴⁶ Nāskata Jericō pexe rasi ano nokonifo. Nānoax mā Jesús tsekekainaino, aōxō tāpimisfo fe yōrafā rasi afe fonifo. Fokākī yora fēxo fai ketokonō tsaoca fichinifo, āfe ane Bartimeo, Timeo fake ini. Nāno fai ketokonō tsaoxō ato kori yōkatiani ini. ⁴⁷ Nāno fai ketokonō tsaoxō nā fēxo nikani Jesús Nazarete ano kafani faifāfe. Nāskafaifāfe nikai nā fēxo fāsikōi fiisini, iskafakī yoini: “¡Jesús mīfi David fenaki, ea shināfel!” fani.

⁴⁸ Askafaito, “Nōko Ifo fekaxtefayamafe,” fanifo. Askafafīafono fāsikōi fiisini, iskani: “¡David fenapa, ea shināfel!” faito nikai.

⁴⁹ Nāskakē Jesús nēteakekafā ato yoini iskafakī: “Ea kenaxokāfe,” ato faino, kenanifo iskafakī yoianā: “Inimayanā fininākakāfe, Jesús mia kenakī,” ixō yoiaifono, ⁵⁰ nikakī āfe tari rashkita potata koshikōi niinākakāfe ichotiri ichotiri ita Jesús ano oni.

⁵¹ Mā akiki oano Jesús yōkani: “¿Ē mia afeska fanō ea mīa yōkamē?” faito, nā fēxo kemani: “Maestro, ēfe fero ē sharafapai,” faino, ⁵² Jesús yoini iskafakī: “Mā mī katiro, ea chanīmara faax, mā mī sharaki,” fani. Nāskafaino nā fēxo ðisharakōitani. Mā sharaxō Jesús fāi kaino chīfafaini.

11

*Jesús nokoni Jerusalén ano
(Mt. 21.1-11; Lc. 19.28-40; Jn. 12.12-19)*

¹ Nāskata Jesús fe fokakī Jerusalén chaima fonifo. Nāno pexe rasi Betfagé fe Betania chaima ini, machi Olivos ano. Nānoxō Jesús a aōxō tāpimis rafe nīchini. ² Ato iskafakī yoianā: “Mēstekōi fotakāfe oa ono pexe rasi ano. Nāno mā nokoxō mā fichi kaikai burro

fake nexekē tsoa aō nimisma. Tēpexō ea efexotakāfe. ³ Anoxō mato yōkaifono iskakafakaki: ‘¿Afeskakī mā burro tēpeimē?’ mato faifono, iskakafakī ato yoikāfe: ‘Nōko Ifāfe fichipaiyaito nō ifixonioya, samama mato nīchixonī kiki,’ ixō ato yoikāfe,” Jesūs a aōxō tāpimis rafe fani.

⁴ Askata mā fōkaxō fichitoshinifo burro pexe fepoti ano nexekē emāiti fainaki fichixō tēpexō efenifo.

⁵ Nā ano ikafāfe ato iskakafanifo: “¿Afaa mā afeskafaimē? ¿Afeskakī mā burro tēpeimē?” ato faifono, ⁶ nā Jesūs ato yoia keskafakī ato kemanifo: “Ia. Iyoxotakāfe,” ato fanifo. ⁷ Nāskata Jesūs ano burro efekāta, āfe kate kamakī āto rapati kakafanifo. Nāskafafono a kamakī Jesūs tsoainākafāni. ⁸ Akka mā Jesūs kaino yorafāfe āto rapatifoya epe peifo xatekaxō kakafaxō fonifo akiki inimakakī.

⁹ Akka nā rekē foaifāfe a acho foaifo fāsikōi tai taifonifo. Iskafa fonifo: “¡Aicho, nā sharafinakōia nokoki oi kiki, nōko Ifo Niospa nokoki nīchiano! ¹⁰ Nōko xini David xanīfo ipaoni keskai, mīri nōko xanīfo ixiki oa. ¡Aicho! ¡Nios sharakōi!” ixō yoinifo.

¹¹ Nāskata Jesūs mā Jerusalén ano nokoax, Nios kīfiti pexefā mēra ikixō, a mēranoafo ōifofāsafani. Nāskata nānoax tsekekaini kaax a aōxō tāpimisfo docefo fe Betania ano kani, mā yātapakeaino.

*“Fana higuera, mī anā fiminakama,” Jesūs fani
(Mt. 21.18-19)*

¹² Pena fetsa mā Betania anoax okī Jesūs mea fonāikōi fini. ¹³ Nāskakē chai ixō fana higo nikē ōini, peifoya ini. Kaxō ōini fimiyamakī, akka kaxō ōia fimiya inima āfe peifos ini. Nā fimiyamaitia ōini. ¹⁴ Nāskakē Jesūs fana higo yoikī iskakani: “Anā tsoa mī fimi pinakama,” faito, āfe inafāfe nikanifo.

*Jesūs a Nios kīfiti pexefā mēraxō a ato ināifo ato potani
(Mt. 21.12-17; Lc. 19.45-48; Jn. 2.13-22)*

¹⁵⁻¹⁶ Nāskata anā Jerusalén ano nokonifo. Nānoax Jesūs anā Nios kīfiti pexefā mēra ikitoshini. Ikitoshixō ōia a mēraxō afafo ato miniaifono xafakīa ato kāimani, a ato fīaifori askafani xafakīa kāimakī. A ato kori ināifo anoari mīsafo ato pōtaketsani, askatari a ato rifi miniaifo anoari āto tsaotifori ato pōtaketsani. “Nā Nios kīfiti pexefā mēraxō tsoa afaa ato ināitroma,” ixō fāsi mekainākafā ato yoini. ¹⁷ Ato tāpimakī iskakafakī ato yoini: “Niospa meka yoikī iskakafakī kirikakī kenenifo: ‘Na ēfe pexefā anoxō keyokōichi nā maitio ano ikafāfe ea kīfitirofo,’ ixō kenefinifono, akka nā yometsōfāfe pexe keskara mā famis,” ixō ato yoini.

¹⁸ Ato askafaito, a ato Nios kīfixomis xanīfofo feta, a Moisés yoikī kirika keneni keskara ato tāpimamisfāfe nikanifo. Nāskakē afeskaxoma Jesūs retepainifo, retepaifikanī mesenifo, yorafāfemāi nikakōiafona a yoiai keskara, “Aira, na keskara meka nō nikamisma, āfe meka sharakōi,” ikaxō. ¹⁹ Akka mā fakishaino Jesūs a aōxō tāpimisfo fe Jerusalén anoax anā kani.

*Fana higuera xanani
(Mt. 21.20-22)*

²⁰ Askano anā pena fetsa finōfāikakī ōinifo, nā fana higuera mā xanano āfe tapofoya. ²¹ Nāskakē Pedro shināki Jesūs yoini iskakafakī: “Maestro, ōipo na higuera mī kamafofāita mā xana,” faito, ²² Jesūs kemakī iskakafakī: “Nios nikakōikāfe,” ato fani. ²³ “Akka ē mato pāraima. Māto ōiti mēraxō mā Nios nikakōixō na māchifā mā yoikī iskakafaito: ‘Nonoax tsekekainax fakafā mēra paketāfe,’ mā faino fakafā mēra paketiro. Nā mā yoiai keskai nāskakōitiro. ²⁴ Nāskakē ē mato yoī, afara mā fichipaikī mā Epa Nios chanīmara faxō mā kīfīaito mato ināitiro, mātonā inō. ²⁵ Akka mā Epa Nios kīfikī, fetsaki mā ōitifishki iyoxō īkisi raefayokāfe, Epa Nios nai mēranoato māto chaka mato soaxonō. ²⁶ Akka mā fetsafo raefayamaito, matori Epa Niospa nai mēraxō māto chakafo mato soaxotiroma,” Jesūs ato fani.

*“¿Tsoa mia nīchinimē mī xanīfo inō?” ixō Jesūs yōkanifo anoxō achipakakī
(Mt. 21.23-27; Lc. 20.1-8)*

²⁷ Nāskata Jerusalén ano anā fenifo. Nānoax Nios kīfiti pexefā mēra Jesūs kafāsaino, nāno akiki fenifo. A ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīforori fenifo. ²⁸ Anoxō yōkanifo iskakafakakī: “¿Tsoa aōxō mī iskakafaimē, tsoa mia yoiamē mī iskakafanō?” ixō yōkaifono, ²⁹⁻³⁰ Jesūs ato kemanī iskakafakī: “Ēri mato yōkanō ea yoikapo ē nikanō. Ea mā yoiaito ē mato yoikai tsoa aōxō ē iskakafaimākai. Akka, ¿tsoa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka ea yoikapo,” ³¹ ato faino āa ranā mēnāpaiyanā iskanifo: “Nō kemakī iskakafaino: ‘Niospa nīchini,’ nō faino noko yoikī iskakafai: ‘Akka, ¿afeskakī mā Juan nikamismamē?’” ³² Akka nō iskakafakī yoitroma: ‘Yorafāfe Juan nīchinifo,’ ixō nō yoitroma, yorafoki nō mesei nokoki ōitifishki itirofo.” Akka yorafāfe keyokōichi tāpiafo Niospa shināmanaino Juan ato yoipaoni.

³³ Nāskakē yoikī iskafanifo: “Nō tāpiana tsōara Juan nīchini,” faifono, Jesúsri ato yoikī iskafani: “Ēri mato yoitiroma tsōaōxō ē iskafaimākai,” ixō ato yoini.

12

Meka fetsafaxō Jesús ato yoini a ato yonoxomis chakafoōnoa
(Mt. 21.33-46; Lc. 20.9-19)

¹ Anā Jesús ato yoini meka fetsafaxō iskafakī: “Feronāfake fētsa āfe tare ano uva fanani. Fanaxō akiki keneakeni. Akiki keneakexō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō a ano yonofaifo ato ināyoni. Nāskafata mai fetsa ari kayoni. ² Nā fimimistīa mā āfe fana pachiaino, āfe ifāfe a yonoxomis nīchini, a kexexonafo ato yōkaxō āfe fana fimifo fixotanō nā āfenā tiiri. ³ Akka āfe kaifo fichikaxō nā fana kexeafāfe achikaxō seteketsakaxō, afaa inākaxoma afaamaiskōi nīchinifo. ⁴ Nāskata nā tare ifāfe anā a yonoxomis fetsa nīchini. Akka nāri īchaketsayanā tokirinī mapoki tsakakī imi tofeketsafono oni. ⁵ Nāskano afianā fetsari nīchiano nāa retenifo. Mā reteafono ranāfaxō ato nīchini, nāfori ato seteketsayanā, ranāri ato retenifo.

⁶ “Mā ato askafafono, nāno āfe fake fisti ini, nā aō noikōiai. Nāskakē chipokōi fakī āfe fake nīchini: ‘Ēfe fake nikatirofokī,’ ixō. ⁷ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki, a nari nō retenō na tare nōkonā inō,’” ikanax yoinānifo. ⁸ Nāskakē achikaxō mā retakaxō tare pasotai potanifo.

⁹ Nāskakē Jesús ato yōkani: “Akka, ¿a tare ifāfe ato afeska fatiromē? Kaxō a tare kexemisfo ato retēkī mitoxō fetsafo āfe tare inātiro afāfe kexxonōfo,” ixō Jesús ato yoini.

¹⁰⁻¹¹ “Akka, ¿a kirika kenekī iskafanifo mā anemismamē?:

Tokiri pexe fapaakakī nā pexe famisfāfe na tokiri chakara ixō potafono, fetsafāfe fichixō na tokiri sharakōi ikaxō akiki pexe fatiromo. Nāskarifiakī xanīfofōfāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katonī nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

¹² Nāskakē Jesús achikaxō karaxa mēra ikimapainifo, mā tāpikaxō meka fetsafaxō atoōnoa yoiatio. Akka achipaifikanī yorafoki mesekani a makinoax fonifo.

“¿Xanīfo nō kori inātiromē noko yōkaito?” ixō Jesús yōkanifo
(Mt. 22.15-22; Lc. 20.20-26)

¹³ Nāskakē chipo fariseofāfe Herodes feta afe yorafo Jesús ano nīchinifo, fanīrira Jesús ato yoiatio afāfe yōanōfo āto xanīfofo yoikakī. ¹⁴ Nāskakē mā akiki fēkaxō nāfāfe yōkanifo iskafakakī: “Maestro, mā nō tāpia a mī yoiati anori chanīmakōi mī yoimis. Epa Niospa noko shināmapaiyai anorikōi mēstekōi mī noko yoimis. Afara yoipai mī ranomisma, afarikai mī fomāmisma, na yorafāfe yoiatio anori mī nikatama, a shināifo anori mī shināmisma. Askatamaroko Epa Niospa meka shara mēstekōi mī yoimis. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikīa,” ixō yōkaifono, ¹⁵ Jesús tāpini feparapaiyāifāfe, nāskaxō ato yoini iskafakī: “¿Afeskakī mā ea feparapaimē?” ato fata, “Ea kori exe fisti fēxokāfe, ē ōinō,” ato faino, ¹⁶ kori exe fisti fēxofafono, nā kori exe ōiyānā Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ato faino, kemanifo iskafakakī: “Nōko xanīfo César keskara,” faifono, ¹⁷ Jesús ato yoini iskafakī: “Akka na kori exe Cēsarnākē César inākāfe, akka Niosnākē Niosri inākāfe,” ato faino, “¡Keel! ¡Nikakapo! Āfe meka finakōia tsōakai finōtiroma,” ikanax rateyanā yoinānifo.

“Yora naax anā otoax, ¿afeskatiromē?” ixō Jesús yōkanifo
(Mt. 22.23-33; Lc. 20.27-40)

¹⁸ Nāskakē saduceofo Jesús ōifokani fonifo. Nā saduceofāfe yoimisfo iskafakakī: “Yora naaxkai anā afeskakax ototiroma,” ixō yoimisfo. Nāskakē mā fokaxō yōkanifo iskafakakī:

¹⁹ “Maestro, Moisés noko kirika kenexoni iskafakī yoikī: ‘Feronāfake fetsa āfiyax natiro afeta fake akamax, akka nā kēro ifomafa onefētsa fitiro, afeta fake axiki nā fake nā onefetsa naitanā inō.’ ²⁰ Akka nā nane tii siete feronāfake inifo. Āto ochi iyoa āfiyai taeni, mā āfiyax afeta fake akamax nani. ²¹ Nāskata nāa chipoko fētsa nā kēro ifomafa fini. Nāskarifiāfi nāari nani afeta fake akamax. Afianā chipoko fētsari fini, nāari nani afeta fake akamax. ²² Nāskakē nā siete feronāfakefāfe nā kēro fīpakanax, afeta fake akanamax nai keyonifo. Chipokōitani nā kērori nani.

²³ “Nāskakē mā otokaxō, ¿fatoto nā kēro fiximē, nā fistimāi fīpakaxō?” ixō yōkaifono, ²⁴ Jesús ato kemani: “Mākai afaa tāpiana. Na Niospa meka yoikī kenenifokairoko mā ōikatsaxakī. Niospa āfe sharaōnoari mā ōimisma. ²⁵ Yorafo nakanax mā anā otokanax, anā āfiyatirofoma, anāri āto āfi feta fake atirofoma. Askatamaroko nā ājiri nai mēranoafo keskara itirofo. ²⁶⁻²⁷ Akka, ¿a yorafo nakanax anā ototoxifoōnoa yoikī Moisés kirika kenekī yoiniōnoa mā

anemismamê? Niospa fana koofai mēraxō Moisés yoini iskafakī: “Ēfi mī xinifāfē āto Nioskōi, Abraham ikaino, Isaaca ikaino, Jacobo ikaino,” ixō Niospa yoini. Akka Niospa naafoma keskara ato ōi, aōnoax keyokōi niafono. Akka mākai afaa tāpiama mā mā chanīmis,” ixō Jesús ato yoini.

“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfē Jesús yōkanifo (Mt. 22.34-40)

²⁸ A Moisés yoikī kirika keneni keskara ato tāpimamis Jesús ano nokoni, Jesús anoax ato fe yoināino māmāi tāpixō Jesúsmāi ato kemasharakōiaino. Nāskaxō akairi yōkani: “Akka, ¿fato meka sharafinakōiamē, nā Niospa shināmanaino Moisés keneniraka sharafinakōia?” ixō yōkaito, ²⁹ Jesús kemani iskafakī: “Niospa yoini iskafakī: ‘A sharafinakōia ē mia yoinō nikapo. Nā israelifo nikasharafe, nōko Ifo Nios fisti nōko Ifokī anā ano fetsamaki. ³⁰ Nōko Ifo Nios noisharakōikāfē nōko ōitifoyaxō, nōko yōshi sharafoyaxori noikāfē. Nōko mapo mēraxori shināsharakāfē, nōko kerex sharafoyaxō,’ ixō nā meka shara Moisés keneni. ³¹ Nā ē mato tafekī yoia keskarari nāno fetsari. ‘Nā mato chaima nikari noisharakōikāfē a mā mā noimesharakōiai keskafakāfē.’ Na meka rafe sharafinakōia Niospa yoini,” ixō Jesús ato yoini.

³² Naskafaito a Moisés yoikī kirika keneni keskara ato tāpimamisto yoini iskafakī: “Mī yoikōi. Maestro, chanīmakōi mī yoimis. Nāno Nios fisti, anā ano a keskara fetsama. ³³ Askatari iskafakī mī yoia, māto ōitifoyaxō Nios noikōikāfē, māto shinā sharafoyaxori askafakāfē, māto yōshi sharafoyaxori askafakāfē, māto kerexfoyaxori askafakāfē, a mato chaima nikafori noisharakōikāfē, a mā mā noimeai keskafakī askatari a afarafo nō Nios inā, nāfo nō finōinīfofana sharakōikī. A nō afara koakī nō Nios ināfori nāfori nō finōinīfofana nōko ōitifoyaxō nō Nios noikōikī,” ixō mī yoia fani.

³⁴ Askafakī yoisharaito nikakī Jesús yoini iskafakī: “Epa Niospa afe yorafo imasharai keskara mūri mī tāpiax mī afe nīpanaka,” ixō yoiaito, nikakakī tsoa anā tooxinima. Askata anā tsōa yōkanima.

“Akka, ¿tsōa fenamē Cristo?” ixō Jesús ato yōkani (Mt. 22.41-46; Lc. 20.41-44)

³⁵ Jesús kīfiti pexefā mēraxō ato tāpimayanā ato yōkani iskafakī: “Akka, ¿afeskakī a Moisés yoikī kirika keneni keskara ato tāpimamisfāfē na Cristo David āfē fenara fakanimē? ³⁶ Akka Niospa Yōshi Sharapa shināmanaino nā David yoini iskafakī:

Epa Niospa ēfē Ifo yoini iskafakī: ‘Mī efe xanīfokōi īpanakaki. Akka nā mia noikaspaifo mī ato finōkōinō ē ato mī nāmā nīchikai.’ ixō Niospa yoinino David keneni.

³⁷ “Akka, ¿afeskai Cristo David āfē fena itiomē, nā David Cristo ēfē Ifora fafiapaonino?” Nāskakē yōrafā rasi inimanifo Jesús ato yoiaito nikakani.

Jesús ato yōani a Moisés yoikī kirika keneni keskara ato tāpimamisfāfē anorima ato yoiaifono (Mt. 23.1-36; Lc. 11.37-54; 20.45-47)

³⁸ Nāskano Jesús ato yoianā iskafakī ato yoini: “Ōisharakakī a Moisés yoikī kirika keneni keskara ato tāpimamisfo tari chainīpa safekanax fofāsamisfoki, askatari nafāfē tāpikōiara noko fanōfora ipaikani. Yora ichapafano ano fofāsapaimisfo noko yoisharakōinōra ikanax, nāfo kakapaimisfo. ³⁹ Nāfāfē ichanāti pexe mēraxō tsaoti sharakōi fenamisfo noko ōinōfora ikaxō. A piaifo anoaxri ano tsaopaikakī sharakōi ano tsaopaimisfo. ⁴⁰ Nāskarafāfē kēro ifomafafano ato pexe fiamisfo, nō mato Nios kīfixonira ikaxō chaikōi Nios kīfimisfo atoki kaxemetsamapaiyanā. Nāfo omiskōi finakōixikani Epa Niospa ato omiskōimanaino,” ixō Jesús ato yoini.

Kēro ifomafa afaamais fixō Epa Nios ināsharakōini (Lc. 21.1-4)

⁴¹ Nāskata Jesús tsaoxō ōini yorafāfē a kori naneti mēra kori naneaifāfē Nios kīfiti pexefā mēraxō. Akka nā afama mīshti ichapayafāfē kori naneti mēra kori ichapa nanenifo. ⁴² Nāskafaiyono nāno kēro ifomafa nokoni. Nā kēro ifomafa afaamais fixō āfē kori exe rafe nā kori naneti mēra āfē kori nanekī mitofaito Jesús ōini.

⁴³⁻⁴⁴ Nāskafaito ōikī Jesús aōxō tāpimisfo kenaxō iskafakī ato yoini: “Chanīma ē mato yoikōi, nā kēro ifomafa afaamaisfixō fetsafo finōmainīfōfā āfē kori exe rafe nā kori naneti mēra nanea. Akka nā kori ichapayafāfē nā kori naneti mēra mā āto kori nanefikakī tsōa keyo naneama. Akka nā kēro ifomafa afaamaisfixō nā kori naneti mēra āfē kori nanekī mitokōia. Nāskakē a piat anā afanā fitiroma,” ixō Jesús ato yoini.

13

Jesús ato yoini na Nios kífiti pexefā pãoixii ixō

(Mt. 24.1-2; Lc. 21.5-6)

¹ Mā Jesús a Nios kífiti pexefā mēranoax tsekeano, a aōxō tāpimis fētsa yoini iskafakī: “Maestro, ōipo, nōko Nios kífiti pexefo tokirifo petsanāmeakea sharashtakōifo,” ixō yoiaito, ² Jesús kemani iskafakī: “¿Mā mī ōimē na Nios kífiti pexefo? Akka, ¿na tokirifo anā petsanamexima chipo maoi fetsexii anāka na tokirifo petsanānemixima?” ixō Jesús ato yoini.

Afaa afeskaximākai mā chaima nōko mai keyoaino Jesús ato yoini

(Mt. 24.3-28; Lc. 17.22-24; 21.7-24)

³ Nāskakata machi Olivos ano fonifo, anoxō ōiafo Nios kífiti pexefā chaima ini. Nāno Jesús tsoano, Pedro ikaino, Santiago ikaino, Juan ikaino, Andrés ikaino one yōkanifo tsōa ato nikayamanō iskafakakī:

⁴ “Nō tāpipaikai noko yoife. Na mī yoiai keskaī afetīa iximākai, afeskaxō nō tāpitiromakī. Askayoamano afaa nō ōitiromakī noko tāpimafe,” faifono, ⁵⁻⁶ Jesús ato kemani iskafakī: “Kexemesharakani mā ato nikaino mato afara chakafamatirofokī. Yora ichapafo fekanı kiki, ēfe aneōnoa mato yoikī iskafakani kiki. ‘È Cristoki,’ ikaxō yora ichapafo ato pārapaikani kiki.

⁷ “Akka yorafo retenāifāfe nikai rateyamakāfe. Nā ē yoiai keskaī nāskakōixii. Akka fena nōko mai keyoima, chipo ixii. ⁸ Akka yorafo mai fetsa anoax mēenāpaiyafono, yora fetsafori mai fetsa anoax retenāixikani. Nāskaifono mai fetsa anoax mai naya naya ixii. Askatari fonāiki finakōixikani afaa pikanima. Askatari mekaī finakōixikani. Nāskaī omiskōi taexikani.

⁹ “Akka māroko kexemesharakāfe. Mato achikaxō xanīfofo mato inākanı kiki, nēskakaxō mato koshakani kiki ichanāti pexe mēraxō. Xanīfofofāfe ferotaifi mato iyoxikani. Eōxō mato askafaifono, mā ato yoisharakōixikai. ¹⁰ Akka a omiskōiaifo nokoyoamano ēfe ipaxanōfo ēfe mato sharaōnoa ato yoikāfe, nā mai tio anoafō. ¹¹ Akka mato achikaxō mato iyoxikani, xanīfofo mato ināxikakī. Shināchakayamakāfe nō ato afaa faikaimē iyamakāfe. Mā afaa shināpaimakai, nā Niospa mato shināmapaiyai anori mā ato yoikai. Akka mā mekaimakai Niospa Yōshi Shara mekaī kiki. ¹² A yorafāfe āto extofo yora fetsafo ato achimaxikani ato retenōfo. Ato apafāferi āto fakefo yora fetsafo ato achimaxikani. Nāskarifiakī āto fakefāfe āto apakōifo ato chakafakī mekafaxikani, yora fetsafāfe ato retenōfo. ¹³ Akka eōxō keyokōichi mato noikaspaxikani. Akka mato noikaspafiaifono mā eōnoax omiskōifiki mā ēfe meka nikasharakōiaito ē mato kexesharakōixii Epa Nios fe mā isharapakexanō.

¹⁴ “Nā Niospa meka yomisto Daniel a inōpokoai yoikī kirika kenei Nios kífiti pexefā mēra afara chakakōi faxikani kiki ixō yoikī. (Nāskakē na kirika kenea anexō tāpikāfe.) Nā chakafinakōia ōikanax, nā Judea anoafō machi keya ano ichorisatakāfe. ¹⁵ Askatari āfe pexe māmākiā tsoaxō ato fichiax koshikōi fotopakekafā āfe afaa fiamax ichotiro. ¹⁶ Askatari a āfe tare ano yonoaito anā oxō āfe rapati fitiroma. ¹⁷ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono. ¹⁸ Askatamaroko mā Epa Nios kífikāfe mato kexesharanō ichoxō yōtaino matsi mexikakīma. ¹⁹ Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. ²⁰ Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²¹ “Akka fētsa mato yoikī iskafaino: ‘Ōikapo nakīa Cristo,’ mato fayana: ‘Oa onokīa, ōikapō,’ mato faito nikayamakāfe. ²² Akka nā chanīmiso fekanı, ē Cristora ixikani, nāfo nō Niosxō nō mato yoira ikani. Nāskakaxō tsōa atiroma keskara fakani Satanās yōshioxō mato pārapaikakī. Nā Niospa ato katoafori nāfo ato pārapaikani. ²³ Akka ōisharakāfe afetīama keyokōi mē mato yoyiomiski,” Jesús ato fani.

Niospa Fake fotoaino afe keskara iximākai ixō Jesús ato yoini

(Mt. 24.29-35, 42-44; Lc. 21.25-36)

²⁴⁻²⁵ Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, oxeri anā chaxaxima. Fishifori nai mēranoax pakei fetsexii, askatari nā nai mēranoafō naya naya iki fetsexii. ²⁶ Askatari ea ōixikani nai mēranoax nai kōifoya ē fotoaito sharafinakōia ēfe sharafoya ē fotoxii. ²⁷ Nāskatari ēfe ājirifo ē nichixii a ē ato katoafo ato ichanāfatanōfo, a chai ikafo ekeki efenōfo.

²⁸ “Akka shinākapō ē mato yoinō. Mā yōkkafiaino mā tāpitiro āfe pei sirikiaito. Nāskakē āfe peifo keyopaito ōikī mā tāpitiro māmāi chaima xiniaito. ²⁹ Nāskarifiakī afarafo afeskaraito ōikī mā tāpitiro mē chaima oaino askai fetsexii. ³⁰ È mato pāraima ē mato yoikōi, na ē mato yoiai keskara nono mai anoxō yorafāfe nayokaxōma ōiyokani. ³¹ Akka nai fe mai keyoi. Akka ēfe meka fisti keyonakama, nā ē mato yoiai keskakōi.

³² “Afetīara nai mēranoax ē oxii tsōakai tāpia. Nā ājirifāfe nai mēra ifiakaxō tāpiafoma. Ērikai tāpia. Ēfe Epa Nios fisticū tāpia.

³³ “Nāskakē mā itipinīsharayanā kexemesharakāfe Epa Nios kīfīyanā. Mā tāpiamaki afetīara ē oxikai. ³⁴ Akka feronāfakē fētsa fakira chaikakī, akka kayoxoma a yonoxomisfo yoini āfe pexe kexexonōfo. Nāskaxō ato yono ināketsani yononōfo, akka fētsa āfe pexe fepoti anoxō kexesharayanā mananō yoini. ³⁵⁻³⁶ Nāskarīfīai māri kexemesharakāfe, mā tāpiamaki fatora penata ē matoki nokorisatanikai. Xini kaino nokoyamata, yamenakefanaino iyamata, takaranā akaino iyamata, fakishparikōi ē matoki nokotiroki. Iskaratīa oimara ea faax mā oxakē ē mato fichitoshitiroki, nāskakē itipinīsharaxō ea yonoxosharakāfe isharakōixō. ³⁷ Nā ē mato yoiāi keskafakī, keyokōi ē yorafo yoi itipinīsharakāfe ixō ē ato yoi,” Jesūs ato fani.

14

*“¿Afesaxō nō Jesūs retetiromē?” ixō shinānifo
(Mt. 26.1-5; Lc. 22.1-2; Jn. 11.45-53)*

¹ Mā chaima oxa rafeta āto fista Pascua ikaino, nā fīstatīa pāa faraxatimais pipaonifo, nā Niospa ājirinī Ejipto anoxō āto fake iyoafo rētenima shinākakī. Nāskafono a ato Nios kīfīxomisfāfe āto xanīfofo feta a Moisés yoikī kirika kenenī keskara ato tāpimamisfāfe, afesaxoma Jesūs pārapainifo pāraxō retexikakī. ² Akka achixō retepaifīkani, iskanifo: “Fīstatīakai nō achitūroma yorafā rasi mekai fetsekani nokoki ōitīfishkitirofo,” ikanax yoinānifo Jesūs retepaifīkani.

*Kēromā Jesūs shinākī āfe mapoki pīrofomā nachini
(Mt. 26.6-13; Jn. 12.1-8)*

³ Akka Jesūs Betania ano ini, Simón pexe ano. Nā Simón “Rashkishiai” fapaonifo. Nāato pexe ano Jesūs mīsa kamakī tsaonano, nāno akiki kēro fīsti oni manishomo “alabastro” foikai. Na manishomo mēra xinia pīrofomā osia nanea nakas sharakōi ini, āfe ane “nardo.” Nā pīrofomā kopipaekōi ini, na manishomo āfe fepoti fepexō maneakefōfā Jesūs āfe mapoki nachini, nā kēromā. ⁴ Askafaito ōikani nā anoafo ōitīfishkiyanā āa ranā yoinānifo iskakani: “¿Afesakī na kēromā na pīrofomā sharakōi chakanafaimē? ⁵ Ato minixō, aōxō kori ichapa fīxō a afaamaisfo ato inākerana,” ikaxō nā kēro feratenifo.

⁶ Askafaiāfe ōikī Jesūs ato yoini iskakakī: “Enekāfe. ¿Afesakakī na kēro mā fekaxtefaimē? Na ea iskakai sharakī,” ato fani. ⁷ “Akka nā afaamaisfori mato fe ipanakafa, fatora penata mā ato sharafaxopaiakī mā ato sharafaxotiro. Akka eakai mēxotaima mā ea anā ōima. ⁸ Akka na kēromā ea iskakakī ea sharafa. Ē nayoamano taefakī ēfe yoraki pīrofomā nachia. ⁹ Ē mato pāraima, fanīxōra na meka shara eōnoa yoikakī nā mā tio anoxō na kēromā ea iskafoānoa yoixikani. Askatari na kēroānoa shināpakenakafa, shināmakiyamaxikakī,” ixō Jesūs ato yoini.

*Judaspa aōxō tāpīfīkatsaxakī Jesūs ato achimani
(Mt. 26.14-16; Lc. 22.3-6)*

¹⁰ Nāskafakī Jesūs ato yoiaino nā afe rafemis fetsa nā docefo ano, nā Judas Iscariote a ato Nios kīfīxomis xanīfofo fe mekaikai kani. Mā kaxō ato yoini iskakakī: “¿Afe tii mā ea kopifatiromē ē mato Jesūs achixonō?” ato faito, ¹¹ nikakani inimakōiyanā yoikī iskafanifo: “Nō mia kori ichapa ināikai,” faifono, nāskakē Judaspa shināni: “Afesaxomāi ē Jesūs ato achimanō,” ixō shināni.

*Mā chaima reteafono Jesūs aōxō tāpimisfo feta yātapake pini
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

¹² Akka nā fīstatīa pāa faraxatimais pipaonifo. Afia penatari Pascua fīstatīa ovejanā fake retexō pīnifo. Nāskano aōxō tāpimisfāfe Jesūs yōkanifo. “¿Fanī mī fichipaimē ano kaxō nō itipinī fanō, anoxō Pascuatīa yātapake pixiki?” ixō yōkaifono, ¹³ nāskakē Jesūs aōxō tāpimis rafe nīchini, iskakakī ato yoīyanā: “Pexe rasi ano fotakāfe. Nānoa feronāfake fīsti mā fichikaikai keshoki faka tetsaomexō foikaino, nā feronāfake fe fōtakāfe. ¹⁴ Akka nā feronāfake ikiai ano afe ikixō, nānoa pexe ifo yōkakāfe iskakakī: “Nōko Maestro noko yoikī iskafaa: “Nā pexe ifo yōkakāfe, ¿Fato kene mēraxō Pascua fīstatīa eōxō tāpimisfo feta yātapake ē pītiromākī?” ixō yōkakāfe. ¹⁵ Mā askafakī yōkaito pexe kene efafo fomākianoa mato ispai kiki mā itipinīkōia. Nāno noko itipinīsharafaxokāfe,” Jesūs aōxō tāpimisfo rafe fani.

¹⁶ Ato askafaino aōxō tāpimis rafe fonifo. Mā fokanax pexe rasi ano nokonifo. Mā nokokaxō nā Jesūs ato yoiāi keskarakōi fichitoshinifo. Nānoxō itipinī fanifo Pascua fīstatīa pixikakī.

¹⁷ Mā fakishaino Jesús aōxō tāpimis docefo fe nokonifo. ¹⁸ Mā fokaxō mīsa ano tsaoxō piaifono Jesús ato yoini. “Ē mato pāraima fatora na mā efeta piāi fētsa mā ea ato achimafainaka,” ato faino, ¹⁹ nikakani shināmitsakōiyanā maikiri fepepakefōfānifo. Nāskakanax āa ranā yoinānifo iskakani: “¿Tsoamē, ēraka?” Fetsari iskani: “Ōitsai, ēraka,” iki fetsenifo.

²⁰ Askaifono Jesús ato kemani: “Nā mā docefo anoafāfe, nā mā efeta sapaki piāi fētsa mā ea yōaikai ea achinōfo. ²¹ Nā Niospa meka yoiki, eōnoa yoikī kenenifo keskai ē askakōi. Akka na feronāfāke ea ato achimafax akairi omiskōikōixii. Akka na feronāfāke shara ikerana fakeyamanixakī,” ixō Jesús ato yoini.

²² Piaifono Jesús pāa tsomainifōfā. Apa Nios kīfiki aicho fata, mā kaxkepaxexō ato ināni, iskakakī ato yoiyanā: “Na ēfe nami keskaraki pīkāfe,” ato fani.

²³ Nāskata mā Apa Nios aicho faxō, kecho tsomainifōfā ato ināni. Nāskakē mā ato ināno keyokōichi ayanifo. ²⁴ Nāskaxō ato yoikī iskakani: “Nafi ēfe imi keskaraki. Mē naino ēfe imi foxii. Keyokōi yorāfāfe afara chakafamisfono ē atoōnoax naikai. Ē askaino Niospa ato potapakenakama. Ē ato naxōi āto chaka ato soaxoxiki. ²⁵ Ē mato pāraima. Ē mato yoikōi ē anā mato feta na fimi ene ayaima. Mē nai mēra kai. Nā ēfe Epa Nios xanīfokōi ika anoxō ē anā mato feta na fimi ene shara ayaxii,” ixō ato yoini.

*“Ē Jesús ōimisma,” Pedro ixaino Jesús ato yoini
(Mt. 26.30-35; Lc. 22.31-34; Jn. 13.36-38)*

²⁶ Nāskata mā fanāiki xatekata machi Olivos ano fonifo. ²⁷ Nāskata Jesús ato yoini iskakakī: “A na fakishi keyokōi mā ea shināmakī fetsei. Akka kirika ano kenekī iskakakī yoinifo: ‘Āfe ifo reteaifono, āfe ovejalo ichoi fetsetirofo,’ ixō kirika ano kenenifo,” ato fani. ²⁸ “Akka ea retefiafono mē otaox Galilea ano ē nokoi taexii mā nokoamano,” ixō ato yoini.

²⁹ Ato askafaito nikakī Pedro kemani. “Akka keyokōi shināmakifiaifono ēkai mia shināmakima,” ixō yoiāito, ³⁰ nikakī akka Jesús yoini iskakakī: “Ē mia pāraima na fakish fistichi takara keoi rafeyamano, ‘Ē Jesús ōimismara,’ mī ato fai tres fakī.”

³¹ Askafaito nikakī anā Pedro kemani. “Maa. Mia retefiaifono ē mefe nai. Ē ōimismara ē mia faima,” fani.

Pedro askafaito nikakakī keyokōichi askafakī fetsanifo.

*Getsemaní anoxō Jesús Apa Nios kīfīni
(Mt. 26.36-46; Lc. 22.39-46)*

³² Nāskakata nā ifi mapoa āfe ane Getsemaní ano nokonifo. Nānoxō Jesús aōxō tāpimisfo yoini iskakakī: “Nono tsaokāfe. Ē Epa Nios kīfiyotanō,” ato fani.

³³ Akka Pedro iyota, Santiago* iyota, Juan iyota ato fani. Nāskaxō āfe yora meeni shināmitsakōiyanā fekaxtekōiāito, ³⁴ nāskakī ato yoini: “Ēfe yōshi shināmitsakōi napaiyaito ē meikai. Nono nētekāfe, akka mā oxaki,” ato fani.

³⁵ Nāato askafata ori chaimashta Jesús ares kani. Nānoxō ratokonō mai chachipakefōfā Apa Nios kīfiki iskakani: “Epa, ea mīa kexetiromakī ea kexefe ea reteaifono ē omiskōinōma. ³⁶ Epa, mī keyokōi tāpiakī. Ea mīa ifiipaiki ea mīa ifitiro ē omiskōinōma. Akka nā ē apaiyai keskafakīma nā mī ea amapaiyai keskafafe,” Apa fani.

³⁷ Nāskata mā aōxō tāpimisfo ano oxō ōia oxafo ato fichitoshini. Nāskaxō Pedro yoini: “Simón, ¿mā mī oxamē? ¿Afeskakī mī pishta oxa tenetiromamē? ³⁸ Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apaifikī mā atiroma. Akka mātō yora pachikōikī,” ixō Jesús Pedro yoini.

³⁹ Ato askafata anā kani Apa Nios kīfikai a yoitana keskafakī. ⁴⁰ Nāskata anā oxō ato fichitoshini aōxō tāpimisfo oxafono, oxa paemei fetsoafono, a Jesús ato yoiāi keskara tāpikaxoma tsōa kemanima. ⁴¹ Nāato askafata anā ato makīnoax kani orishtaxō Apa Nios kīfikai. Mā Apa Nios kīfitani oxō ato yoitoshini iskakakī: “¿Ai mā oxamē tenekōiyanā? Moikāfe. Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efe ikiki. ⁴² Fininifōfākāfe nō kanō. Mā chaima oi kiki a ea ato achimaniyoai,” Jesús ato fani.

*Jesús achinifo
(Mt. 26.47-56; Lc. 22.47-53; Jn. 18.2-11)*

⁴³ Jesús ato yoiaino Judas nokoni, nā Judaspa Jesúsxō tāpifikatsaxakī, yorāfā rasifo fe oni. Nā yorafo kenofoya ifi xatefoya fenifo, a ato Nios kīfixomisfāfe āto xanīfofo feta a Moisés yoikī kirika kenenī keskara ato tāpimamisfāfe, a xanīfo fetsafāferi ato nīchiafono. ⁴⁴ Judaspa nā ato

* 14:33 Santiago āfe ane fetsa Jacobo ini.

efeaito iskafakī ato yoiyoni: “A ē kokoki tsoo akaito òikī koshi achirisafaxikāki metexkere axō iyotaxikāki,” ixō ato yoini.

⁴⁵ Nāskata Judas mā Jesús ano nokoxō iskafakī yoini: “¿Maestro, mīmē?” ixō kokotoshini.

⁴⁶ Nāskafaito òikakī nā Judas fe foafāfe Jesús achinifo.

⁴⁷ Akka Jesús achiaifāfe òikī a aōxō tāpimis fētsa āfe keno chainipa tsekainifōfā, a ato Nios kīfixomisfāfe āto xanīfāfe ina paxteni. ⁴⁸ Nāskakē Jesús yorafo yoini iskafakī: “¿Afeskai kenofoya ifi xatefoya mā oamē ea achiyoi oa ē yometso keskarakē? ⁴⁹ Pena tii ē mato fe itiani Nios kīfiti pexefā mēraxō ē mato tāpimani, akka mā kai ea achipaimisma. Akka nā eōnoa yoi kī kenenifo keskakakī mā ea achi,” ixō Jesús ato yoini.

⁵⁰ Ato askafaino aōxō tāpimisfo Jesús òifaikani. Ichoi fetsenifo a makinoax.

⁵¹ Akka naetapa fistichi sabanānā rakoxō Jesús chīfafainaito òikakī achinifo. ⁵² Akka achiaifono āfe sabanā potafaini chitoria ichoni.

Xanīfo finakōiafo ano Jesús iyonifo

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Nāskakē Jesús achikaxō iyonifo a ato Nios kīfixomisfāfe āto xanīfāfe pexe ano. Nāskakē keyokōi anofistiax ichanānifo a ato Nios kīfixomisfāfe āto xanīfofo fe a judeofāfe āto xanīfofo a Moisés yoi kī kirika keneni keskara ato tāpimamisoro ato fe inifo. ⁵⁴ Akka Pedro acho kakī chai ixō òifoni. Nāskata a ato Nios kīfixomisfāfe āto xanīfāfe pexe emāiti nokoni. Nānoax a Nios kīfiti pexefā kexemisfo fe chii ketefax ato fe yoini.

⁵⁵ A ato Nios kīfixomis xanīfofōfāfe a āto xanīfofinakōiafo fe is kai yoinānifo: “Afeskomāi nō pāranō na Jesús afara chakafara ixō retexiki. Akka afaakai chakafa nō nikaima,” inifo.

⁵⁶ Nāskaifono yora ichapafāfe, “Na Jesús afara chakafaito nō òia,” ixō pāraketsanifo. Askafafakakī anoris yoi ketsanifoma. Āa chanī fetsenifo. ⁵⁷ Askafafono ranāri fininifōfākāta āa mekakafakī chakafakī fetsanifo iskafakakī: ⁵⁸ “Nō nikaino na feronāfake iskaita: ‘Na Nios kīfiti pexefā yorafāfe akafo ē pāofaxii. Nāskata tres nia oxata ē anā fetsafaxii, anā yorafāfe efeta akanima, eres fisti ē aki,’ ixō yoiāito nō nikaita.”

⁵⁹ Askafakī yoi fīkakī tsōa anoris yoinifoma, āa chanī fetsenifo.

⁶⁰ Nāskafafono a ato Nios kīfixomisfāfe āto xanīfāfe ato nēxpakīa niinākafā iskafakī Jesús yōkani: “¿Mī kemamitsaimamē afamē na mīōnoa meka chaka yoiāifo?” ixō yoini.

⁶¹ Askafaino akka Jesús tooxinima, pishtakai kemanima. Afianā a ato Nios kīfixomisfāfe āto xanīfāfe iskafakī yōkani: “¿Mīmē Cristo? ¿Nā Nios nipanakato āfe Fakemē, mī?”

⁶² Askafaito nikakī Jesús kemani: “Ēje, ēkīa Niospa Fake. Akka mā ea òixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea òixii nai kōi mēranoax ē anā fotofaito,” Jesús ato fani.

⁶³ Askafaito nikakī a Nios ato kīfixomisfāfe āto xanīfāfe āfe rapati faxteni fetsafāfe tāpinōfo nā xanīfo òitifshkikaito. Nāskaxō ato yoini iskafakī: “Mā nōakōi nō nikakī noko anā tsōa yoitromaki nō tāpinō. ⁶⁴ Mā mā nikakī na feronāfake āfe mekapa Nios chakafakī mekafaito. Akka, ¿nō afeskaifaimē?” ato faito keyokōichi, “Nanōki,” fanifo.

⁶⁵ Nāskakata mā fenexkaxō āfe femānāki kemo mechoketsayanā koshaketsanifo iskafakī yoiyanā: “Tsōa mia koshamakī tāpipō noko yoi xiki,” faifono, a Nios kīfiti pexefā kexemisfāferi fepasketsanifo.

“Ē Jesús òimisma,” Pedro ini

(Mt. 26.69-75; Lc. 22.56-62; Jn. 18.15-18, 25-29)

⁶⁶⁻⁶⁷ Pedro pexefā emāiti ato fe tsaano, nāno akiki a xanīfo yonoxomis xomaya nokoni. Nāno ato fe chii ketefaax tsaoox yooaito òikī, iskafakī yoini: “Mīri Nazarete anoax Jesús fe kafāsamis,” faino, ⁶⁸ akka Pedro iskafakī kemani: “Ēkai Jesús òimisma. Ēkai afaa tāpiama tsoaraōnoa mī yoi,” fata, pexefā kāiti ano Pedro nasteinifōfānaino, takara keonākafāni.

⁶⁹ Afianā nā xanīfo yonoxomis xomayato Pedro òiki, nānoafo iskafakī ato yoini: “A na feronāfake Jesús fe rafemis òikapo, a nā Jesús Nazarete ano a fe kafāsamis,” fani.

⁷⁰ Akka Pedro anā iskanī: “Maa, ēkai Jesús fe rafemisma,” ini. Nāskaino nā anoafāfe anā Pedro yōakakī iskafanifo: “Chanīma, mīri Jesús fe rafemis. Mīri Galilea anoakī mī mekai nā Jesús mekai keskarakī,” faifono, ⁷¹ akka Pedro ato yoi kī iskanī: “Ē mato pāraima, ē chanīaito ea Niospa omiskōimatiro. Niospa tāpia chanīmākōi ē mato yoi. Ēkai na Jesús òimisma tsoaraōnoa mā yoi,” Pedro ato fani.

⁷² Pedro nāskaino anā takara keoinākafāni. Nāskaino Pedro shinātani nā Jesús iskafakī yoi ta keskara: “Taeyoi takara keofi rafeamano, ‘Ē Jesús òimismara,’ mī ea faxii tres fakī,” ixō yoitano, nā shinātani Pedro shināmitsai oiakōini.

15

*Pilato ano Jesús iyonifo**(Mt. 27.1-2, 11-14; Lc. 23.1-5; Jn. 18.28-38)*

¹ Mā penaino a ato Nios kifixomisfāfe āto xanifofo ichanānifo, a judeofāfe āto xanifofo fe, a Moisés yoikī kirika keneni keskara ato tāpimamisori ato fe inifo. Nā xanifo fetsafori a ato rafeafori ato fe inifo. Nāskakaxō Jesús metexkere akaxō iyokaxō Pilato inānifo. ² Mā iyoxō ināfono Pilato yōkani iskafakī: “¿Mīmē judeofāfe xanifo?” askafaito, Jesús kemani: “Ēje, nā mī ea yoiai keskarakīa,” Jesús fani.

³ Nāskaino nā ato Nios kifixomisfāfe āto xanifofofāfe āa pāarakakī yōaketsanifo. ⁴ Nāskafaifono anā Pilato yōkaxō iskafakī yoini: “¿Mī ato kemaimamē mīōnoa afara chakafo yoifiaifono?”

⁵ Askafaito nikakī Jesús tooxanima. Nāskakē Pilato shināni iskafakī: “Kee, ¿afeskakī ea kemaimamē?” ixō shināni.

*Pilato ato yoini Jesús retenōfo**(Mt. 27.15-31; Lc. 23.13-25; Jn. 18.38-19.16)*

⁶ Akka Pascua fistatīa Pilato karaxa mēranoa nā xinia tii fisti rasi ato kāimapaoni māmāi askafakī feyafakatsaxakī. Nā yorafāfe kāimapaiyaifo ato kāimaxopaoni. ⁷ Akka nā karaxa mēra feronāfake āfe ane Barrabás ika ini. Nāato fetsafo feta yora retemis ini nā āto xanifo ato pōtapaikī. ⁸ Akka yorafo fenifo. Mā fēkaxō Pilato yōkanifo māmāi askafakī feyafakatsaxakakī.

⁹ Askafaifono Pilato ato kemani: “¿Mā fichipaimē judeofāfe āto xanifo ē kāimanō?” ato fani.

¹⁰ Akka Pilato tāpini a ato Nios kifixomisfāfe āto xanifofofāfe Jesús chakafakī mekafaifono anā yorafāfe noko nikakanimara ikaxō, nāskakaxomāi akiki efekaxō ināfono. ¹¹ Akka a ato Nios kifixomis āto xanifofofāfe fāsikōi yorafo mekamanifo: “¡Noko Barrabás kāimaxōfel!” ikaxō Pilato yoinifo.

¹² Askafaifono Pilato ato yōkani: “Akka, ¿na judeofāfe āto xanifora mā fai ē afeska fatiromē?” ato faito, ¹³ kemakakī fāsikōi iskafanifo: “¡Mastafe!” fanifo keyokōichi.

¹⁴ Askafaifono Pilato ato yoini iskafakī: “Akka, ¿na feronāfake afaa chakafamē?” ato faino, anā fāsikōi mekanifofānifo: “¡Mastafe!” fanifo.

¹⁵ Nāskafaifono yorafāfe sharakōi fanōfo Pilato ato Barrabás kāimaxoni. Nāskata mā Jesús ato koshamata, ato nīchixonī ifi cruz ikaki mastatanōfo.

¹⁶ Nāskakē sorarofāfe xanifāfe pexe emāiti Jesús iyonifo, nānoax sorarofa ichanānifo. ¹⁷ Nāskakaxō āfe rapati pēkakaxō, rapati ōshi nana safemanifo, moxa maiti fakaxori maimanifo. ¹⁸ Nāskakaxō fāsikōi mekafanifo iskafakakī: “¡Aicho, mīfi judeofāfe āto xanifo!” ikaxō kaxemetsama fanifo.

¹⁹ Nāskatari tafa xatenē mapoki koshaketsayanā akiki kemo mechoketsanifo. Nāskakata akiki ratokonō mai chachipakefōfā kaxemetsama fanifo. ²⁰ Nāskai mā akiki kaxemetsamakaxō a rapati ōshi nana safemanifo fīakaxō āfenākōi safemanifo. Nāskakaxō iyonifo mā ifi cruz ikaki mastafokakī.

*Jesús ifi cruz ikaki mastanifo**(Mt. 27.32-44; Lc. 23.26-43; Jn. 19.17-27)*

²¹ Mā Jesús iyoifokakī feronāfake Cirene anoa fichinifo, āfe ane Simón. Alejandro feta Rufo āto apa ini. Pexe rasi pasotai inoax oaito, fichikaxō yoinifo iskafakakī: “Na Jesús āfe cruz foxōikafe,” fanifo.

²² Nāskaxō Jesús iyonifo āfe ane Gólgota ano. Āfe ane fetsa Mapo Xao fanifo. ²³ Nānoxō fimi ene osia mokakōi Jesús ayamapainifo. Akka Jesús ayakaspani. ²⁴ Nāskafakaxō mastanifo. Mā mastakanax sorarofa makex tokoroya kaxenifo. Nā potakī kanāto āfe rapati fiani. Nāskafakaxō keyofīanifo.

²⁵ Rama xini keyaino Jesús mastanifo. ²⁶ Mā mastakaxō a mānāo tafaraki keneniifo iskafakakī: “Judeofāfe āto Xanifokōi,” ikaxō a mānāo keneniifo. ²⁷ Nāskakaxō Jesús yafi yometso raferi mastanifo, fetsa āfe pōya kayakai aōri ata, fetsari āfe pōya mishkiori anifo. ²⁸ Afetiama aōnoa yoikī keneyonifo iskafakī yoinifo: “Nā yora chakakōifo keskarakōi ixō aōnoa yoixikani,” ikaxō keneniifo. Chanīmākōi. Nāskakōi fanifo aōnoa yoikakī.

²⁹ Nā ano finōfāifāfe īchayanā āto mapo rafe rafe ayanā iskafanifo: “Iskafakī mī yoisim: ‘Nā anoxō Nios kīfīti pexefā ē pāo axii. Nāskaxō tres nia oxata ē anā axii,’ ixō mī yoisim. ³⁰ Mī ifimetiromakī mā ifimefe na ifi cruz ikakinoax fotopakekafāfe,” faifono, ³¹ nāskarifakī a ato Nios kīfīxomisfāfe āto xanifofo feta a Moisés yoikī kirika keneni keskara ato tāpimamisfāfe askafanifo akiki kaxemetsamapaikakī. Nāskax āa ranā yoinākani iskanifo: “Nato fetsafo ifīfikatsaxakī, akka aakai ifimeima. ³² A na Cristo israelifāfe āto xanifo, iskaratīa nō ōipanā

afeskai ifi cruz ikakinoax fotopakekafanimamē, nāskaito nō chanīmara faikai,” ikaxō, nā ayafi mastafori Ichaketsanifo.

Jesús nani

(Mt. 27.45-56; Lc. 23.44-49; Jn. 19.28-30)

³³ Nāskata xini keya nā mai tio fakishifākōitani. Nāskax mā xini kaino anā penani. ³⁴ Nāno xini rakano fāsikōi Jesús kenani isikai: “Eloi, Eloi, ¿lema sabactani?” fani. Nōko mekapa iskafakī yoini: “Ēfe Nios, ēfe Nios, ¿afeskakī mī ea potaimē?” fani.

³⁵ Nāskaito nā ano niāfāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

³⁶ Nāskaito nikafaini nānoa fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki nētaxō ayamapaini, iskafakī ato yoiyanā: “Enekāfe nō ōinō Elías oi kiki fotomaniyoi,” ixō ato yoini.

³⁷ Nāskakē Jesús fāsikōi eaita nani. ³⁸ Nāskakē sama nami Nios kīfiti pexefā mēranoax naki rafekōi faxtepakekafāni fomākīanoax. ³⁹ Nāskaito ōikī nā soraro xanīfāfe Jesús eaita naito ōikī chaimashta nīxō iskafakī yoini: “Chanīma, na feronāfake Niospa Fake ika.”

⁴⁰ Askatari kērofāferi chai nikaxō ōinifo. Nāno ato fe María Magdalenari ini, María fetsari ini, Jacobo feta José āto afa ini. Saloméri ato fe ini. ⁴¹ Nā kērofāfe Jesús chīfamisfo inifo, pimaxikakī Jesús Galilea ano ikano. Nānori kēro fetsafo inifo, Jerusalén anoax afe foitaxakakī.

Jesús makex kini mēra maifanifo

(Mt. 27.57-61; Lc. 23.50-56; Jn. 19.38-42)

⁴² Penama safaro ikaino judeofāfe itipinīfapaonifo, nā safaromāi āto teneti penakē, nā yātapake ⁴³ José oni, nā Joséri judeofāfe āto xanīfo. Nāato Nios xanīfo manapaoni, nā José finakōixō Pilato ano ikikaixō Jesús āfe yora yōkani. ⁴⁴ Askafakī yōkaito nikai Pilato rateni, “¿Mā Jesús naamē?” ikax. Nāskaxō soraro xanīfo kenani yōkaxiki mā Jesús naamakī.

⁴⁵ Nāskafaito soraro xanīfāfe yoini: “Mā naakīa,” faito, Pilato Jesús āfe yora José ināni.

⁴⁶ Nāskakē José sama sharakōi fixō nā samapa Jesús āfe yora rakoni. Nāskaxō a makex kini fanifo mēra rātani. Nāskaxō makexefanē nā kini feponi. ⁴⁷ Akka María Magdalena feta María José āfe afa nā maifaafano anoxō ōinifo.

16

Jesús otoni

(Mt. 28.1-10; Lc. 24.1-12; Jn. 20.1-10)

¹ Mā pena teneti finōano María Magdalena ikaino, María fetsa Jacobo āfe afa ikaino, Salomé ikaino, nā tiito pirofomā fonifo, Jesús āfe yora raish akī foxikakī. ² Fakishparikōi fonifo mā pena teneti finōano nāskanax a Jesús maia ano nokonifo, mā xini keyaino. ³ Mā nokokanax āa ranā yoinākani iskanifo: “¿Tsōa na kini anoax tokiri noko fēpexotirōmē?” ikanax yoinānifo.

⁴ Akka ōiafo a kini aō fepoitafo a tokirinīfā, mā fepekemea ini, anā fepoa inima. ⁵ Nāskakē nā kini mēra ikifaikakī ōiafo. Nā kini mēra naetapa tsaao ini, nā nōko pōya kayakai aōri. Rapati chainīpa oxokōi safeax, nāskaito ōikani ratekōinifo. ⁶ Nāskaifono nāato ato yoini iskafakī:

“Rateyamakāfe, Jesús Nazarete anoax mā fenaikai nā ifi cruz ikaki mastaitafo mā otoaki anā nonomakī. Ōikapo a rātaitafo ano. ⁷ Fokaxō aōxō tāpimisfo yoitakāfe, Pedrori yoikakī mā nokoamano nā Galilea ano nokoi taei kai kiki. Nā mato yoifafaina keskara nārixō mā ōikaikai,” ixō ato yoiaino, ⁸ nāskakē nā kērofo fonifo nā kini anoax ato yoiaino nikafaikani. Ratei choayanā ato yoinifomo, mesemāiakaki.

Jesús María Magdalenaki nokoni

(Jn. 20.11-18)

⁹ Mā pena nomikonō fakishpari Jesús otoi taxakī, María Magdalenaki nokoi taeni, nā María makinoa siete niāfaka yōshi chakafo Jesús pōtani. ¹⁰ Nāato kaxō a afe rafemisfo ato yoikai kani a ōia keskara. Kaxō ato ōia shināmitsakani oiaifāfe ato ōini. ¹¹ “Mā nōko Ifo Jesús otoakī mē ōiaki,” ixō ato yoiaino, tsōa chanīmara fanima.

Jesús aōxō tāpimis rafeki nokoni

(Lc. 24.13-35)

¹² Mā askata fetsa keskarax Jesús aōxō tāpimis rafeki nokoni fāi foaifono. ¹³ Nā rafetari a afe rafemisfo yoifokani fonifo. “Mā nō Jesús ōiaki,” ato faifono, tsōa ato nikanima.

Jesús aōxō tāpimisfo yoini aōxō keyokōi yoifofāsafatanōfo

(Mt. 28.16-20; Lc. 24.36-49; Jn. 20.19-23)

¹⁴ Nāskata chipo Jesús aōxō tāpimis oncefoki nokoni, mīsa ano tsaōxō piaifono. Mā atoki nokoxō iskakakī ato yoini: “¿Afeskakī mā ato chanīmara famamē mē otofiano nā ea ōiafāfe mato yoiāifono?” ¹⁵ Nāskaxō ato yoikī iskakani: “Nā mai tio ano fokaxō na meka shara eōnoa keyokōi ato yoitakāfe mē otoakī āto chaka ato soaxoxiki efe īpaxanōfo. ¹⁶ Akka na meka shara chanīmara fakanax, faka mēra iki maotissimeax ēfe Epa Nios fe nīpanakafo. Akka na meka shara eōnoa chanīmara fayamakanax, nāfo omiskōipakenakafo. ¹⁷ Akka nā ea chanīmara faifāfe, ēfe aneōxō ato makinoa niāfaka yōshi chakafo potatirofo. Nāskakanax meka fena sharapa mekatirofo. ¹⁸ Nāskakaxō rono tsomatirofo nāskakaxori rao paekōi ayakanax afeskatirofoma. A isinī ikaifori ato ramāifono sharatirofo,” ixō Jesús ato yoini.

Jesús nai mēra kani
(Lc. 24.50-53)

¹⁹ Nāskakakī ato yoita, nōko Ifo Jesús ronoinākakāni nai mēra kai. Mā nai mēra kaax Apa Nios ketaxamei tsaoni afe xanīfokōi ixiki. ²⁰ Mā Jesús nai mēra kaano aōxō tāpimisfo fonifo. Nā mai tio anofo aōnoa meka shara yoifokani afe nīpaxanōfo. Nōko Ifāfe ato axōfaino aōxō aōnoa meka shara yoikōinifo, tsōa atiroma keskakakī aōxō afama mīshtifori fanifo. Nā tii.

Lucaspa Jesúsnoa Yoikĩ Keneni

Lucaspa kirika keneni Jesús nõko mai ano ipaonino

¹⁻⁴ Teófilo, ẽ mia kirika kenexõ manamani, mĩ tãpinõ. Mã mĩ tãpia Jesús nõko mai ano ipaoni. Nõko mai ano ikano yorafãfe õipaonifo. Akka nã fakenitĩa õiaifono yosini. Nãfãferi õikaxõ yora fetsafo yoipaonifo akairi Jesúsnoa tãpinõfo. Ato yoiãifãfe nikakakĩ akairi kirika kenepaonifo afeskai nofe Jesús ikimamẽ ikaxõ. Nãskarifiãkĩ ẽ mia kirika kenexoni, nã Jesús tãpiafo yõkaxõ. Efe yorashta Teófilo, nãskakẽ ẽ mia kirika kenexõ manamani, nã mia Jesúsnoa yoiãifono nikakĩ mĩ chanĩmara fanõ.

Ãjirinĩ yoini, Juan Maotista kãiyooamano

⁵ Jesús fakeamano Zacarías iyopaoni Judea mai ano ãfe kaifo fe. Ari ikano Herodes ãto xanĩfo finakõia ipaoni. Nã Zacarías ãfe xini ane ipaoni Aarõn. Nã Aarõn ãfe fena Zacarías ipaoni. Akka ãfe ãfi Elizabetri Aarõn fena ipaoni, ãto xinimãi Aarõnkẽ. Nã Aarõn ãfe fenãfãfe ato Nios kĩfixopaonifo ãto kaifofo. Zacaríasri ato kĩfixopaoni Aarõn ãfe fenamãi axõ. Nã Zacarías ãfe kaifo feta yonopaoni, Nios kĩfiti pexefã mẽraxõ Abíasfo feta. ⁶ Zacarías ãfe ãfi feta Niospa meka nikasharakõipaonifo, nã Niospa meka yoikĩ kenenifo keskafakĩ. Akka nã Niospa yoiãi keskafakĩ nikasharakõiaifono Niospa ato õini, shara shinãi ikafono. ⁷ Akka Elisabet fake fimisma ipaoni. Nãskaxõ mã yõxãfoxõ fake fipaonima fene feta. Nãskax fene anifoaino nãri askani yõxãfoi.

⁸ Nãskakẽ ãto xanĩfãfe ato yoini, Abías yorafo: “Nã Nios kĩfiti pexefã mẽra yonomisfo mã tsekefaini fokani kiki. Mãri ikiferakãfe,” ato fani. Ato askafaino a mẽra ikifaikaxõ yononifo. Zacaríasri a mẽra ato fe ikikaixõ ato feta yononi. ⁹ Nios kĩfiti pexefã mẽra ikifaikanax yoinãnifo iskakani: “¿Iskaratĩa tsõa na pirofomã shara koofaimẽ nõ õinõ?” inifo. Askãifono ãfe xanĩfãfe Zacarías yoini: “Mĩ koofafe na nakas Niospa xeteax inimanõ,” fani. Akka nãskara feyafapaonifo, pirofomã nakas shara koofapaonifo. ¹⁰ Zacarías pirofomã shara koofaino yorafãfe emãiti nikaxõ Nios kĩfinifo. ¹¹ Yorãfãfe emãitixõ Nios kĩaifono, Zacarías pexefã xãki mẽraxõ pirofomã koofaino ãjiri nĩtani, pexe xaki mẽra pirofomã koofai kesemẽ ãfe põya kayakai aõri. ¹² Nãskakẽ ãjiri nikẽ fichiãx Zacarías mesta itani. ¹³ Rateaino Niospa ãfe ãjirinĩ yoini: “Zacarías, rateyamafe. Mã Niospa mia nikakĩ mĩ kĩaifaito mã mĩ ãfinĩ fake feronãfãfe fii kiki. Mĩ fake kãiano anekĩ Juan mĩ faxikai. ¹⁴ Mã mĩ fakeyax mĩ inimaxikai. Yorãfori akiki inimakõixikani. ¹⁵ Niosri akiki inimasharakõixii. Fãsi finakõia Niospa õixii, Niospa Yõshi Sharapa shinãmanaino. Nãskakẽ afaa pae pishta ayaxima. ¹⁶ Nãskaxõ mã yosixõ Niospa meka ato yoixii ãfe kaifo israelifo ãfe fenafo, Niospa meka ato yoiaino ãto chaka xatenõfo. ãto chaka xatekaxõ Nios fisti nikakõinõfo. ¹⁷ Nõko Ifo oyoamano taeyoi Niospa Juan nĩchixii ãfe meka ato yoinõ. Akka Juan ãfe shara nã Eliãsnã ipaoni keskara ixii Niospa Yõshi Sharapa shinãmanaino. Afe yorafo ato tãpimaxii. Nãskaino ãto apãfo fe ãto fakefo anã noinãxikani. Askatari nã Niospa meka nikakaspamisfãfe akairi ãto chaka xatekaxõ Nios Ifofaxikani shinãsharaxikakĩ. Nãskakẽ Juanoax ãfe kaifo itipinĩsharaxikani Niospa Fake atoki nokoaitĩa ifisharaxikakĩ,” ixõ ãjirinĩ yoini.

¹⁸ Askafaito nikakĩ yoini: “¿Afeskai ẽ fakeyatiromẽ? Ëkai anã fake atiroma ẽ anifokõi. Ëfe ãfiri nãskarari yõxãfokõi. Afeskaxõ afeta nõ anã fake fitiroma,” fani.

¹⁹ Askafaito nikakĩ ãjirinĩ kemani: “Ëkĩa Gabriel, ẽ Nios fe ika. Ea nĩchiano ẽ oa. Nikapo, ãfe meka shara ẽ mia yoinõ. Mã mĩ ãfinĩ fake feronãfãfe fii kiki. ²⁰ Akka, nã ẽ mia yoiãito mĩ ea nikakaspax mĩ anã mekaima. Mã mĩ fake kãiano mĩ mekaxii. Nãskax mĩ mekamais iyoi. Akka Niospa ea fake fimatiroma emãi anifokẽ mĩ ifiaito Niospa mia fake fimatiro. Nã ẽ mia yoiãi keskafakĩ Niospa mia askafaxii. Nã Niospa mia apaiyãitĩa mia askafaxõi kiki,” ãjirinĩ fani.

²¹ ãjiri fe Zacarías pexe xaki mẽranoax yoinãino yorafo pexe emãiti nikanax yoinãnifo, Zacarías fena kãiyamaino pexe xaki mẽranoa. “¿Afeskai Zacarías samarakaimẽ pexe mẽranoax? Afetiãkai ikiyama,” faifono ²² Zacarías kainãkafani Nios kĩfiti pexefã xaki mẽranoax anã mekanima yõkapaifãifono. “¿Afaa pexefã mẽranoa õiax mĩ iskaimẽ?” fanifo. Askãifaifono ato yoiãipãfi mekaino. Mekapaikĩ ãfe mĩfis ato yoini a õia.

²³ Nãskai anã mekaĩma Zacarías ãfe xanẽnẽ kani mã yonokĩ keyoax. ²⁴ Nãskata mã Zacarías ãfe pexe ano nokoano ãfe ãfinĩ chipo fene naneni. Mã fake naneax faki kafãsapãonima nã ãfe xanẽnẽ fisti ipaoni cinco oxe anĩ ãfe xanenẽxõ. ²⁵ Nãskaxõ mã postoxõ yoini: “Aicho, mã Niospa ea sharafakĩ ẽ fake finõ ẽ yõxãfofiãkẽ. Niospa ea fake fima. Aicho, iskaratĩa ẽ anã yorafoki rãfinakamaki mẽ fakeyaki,” Elizabet ini.

Ãjiri fotopakekãfãni, María yoiyoi

²⁶ Elisabet mā fake nanekī seis oxe akano Galilea mai ano Niospa anā nīchini āfe ājiri Gabriel, Nazarete pexe rasi ano. ²⁷ Nāskakē Niospa āfe ājiri María ano fotopakekafāni yoiyoi. Fotopakekafaxō yoini. Nā María fenemais ini. Feronāfake fetsa fe oxamisma. María fenemais ikano José apa yōkani, María fixiki. Nā José āfe xini David ipaoni. Nā David āto xanīfo finakōia ipaoni. Akka José María fiyoamano ājiri fotopakekafāni, María ano. ²⁸ Fotopakekafāxō María yoini: “Mē oi mia yoiyoi, Nios mikiki inimai mefe ika,” fani.

²⁹ Askafaino María shināpaini: “¿Afaa ea yoipaimē, na ea iskafai?” ixō shināpaini. ³⁰ Shināpaiyaito anā ājirinī yoini: “Rateyamafe. Mia Niospa noisharai kiki mia sharakōi ōi kiki, mikiki inimasharai kiki. ³¹ Mā mī fake feronāfake fikai. Mā mī fake kāixō anekī Jesús mī faxikai. ³² Mī fake xanīfo finakōia Niospa imaxii. Āfe xini David keskara ixii. Nios nā nai mēra ikato āfe Fakekōi faxii. ³³ Nāskakē mī Fake xanīfo finakōia ixii. Mī kaifāfe xanīfo ipanaka. Anā xanīfoi xatenakama,” fani.

³⁴ Askafaito María kemani: “¿Feskakī ē fake fitiromē ē feneyaxoma, ea tsōa tanamismano?” María ini.

³⁵ Askafaito ājirinī kemani: “Niospa āfe Yōshi Shara mikiki oxō mia fake nanemaxii. Nāskax nā fake kāiax Niospa Fakera faxikani. Akka na fake kāiax sharafinakōia fisti ixii.

³⁶ Nā mī yaya Elisabet ‘Fake fitiromara’ fafiamisfono mā fake nanea seis oxe aka yōxafxiaxō. ³⁷ Nāskakē nā apaiyai keskara fakī Niospa afama mīshti fatiro. Miari fake fimatiro mī fenemaisfikē,” ājirinī fani.

³⁸ Ājirinī askafaino, “Nāskafinō, ē fake finō, ē Nios nikamiskī. Nā ea amapaiyai keskafanō ē Nios itixomafamiskī,” nāskafani.

María askafaino ājiri anā nai mēra kani.

María kani Elisabet ōikai

³⁹ Nāskata nā pena fisti mā Niospa ājiri kaano María itipinī fata koshi kani āfe yaya ōikai Judea mai ari. Judea mai ari māchifāfo mēra kaax pexe rasi ano nokoni. ⁴⁰ Mā nokoax Zacarias āfe pexe mēra ikitoshini. Mā nokoxō María āfe yaya yoitoshini. “Yaya, ē oi mia ōiyoi,” fatishoni. ⁴¹ Āfe rare askafatishonaito Elisabet nikani. Āfe rare askafaito nikakī Elisabet xakī mēraxō āfe fake tokko tokko ani. ⁴² Nāskata Niospa Yōshi Sharapa shināmanaino Elisabet onāni mā María fake naneano. Nāskakē fāsi yoini iskafakī: “María, Niospa mia inimamasharakōi. Fato xotofake fetsakai iskafaima mia fisti inimamakōi. Mī fake feronāfake chipo kāiano Apa Niospa akiki inimakōi kī kexesharakōi. ⁴³ Nōko Ifokōi mī fake ixii. Akka, ¿mī ea ano oamē, nōko Ifāfe afafiax ēkai afaakeroko ēakōi ē ikano? ⁴⁴ Akka mī ea yoiaito nikakī ēfe xakī mēraxō ēfe fake ea tokko tokko aka, mikiki inimakī. ⁴⁵ Niospa meka nikakōi kī, ‘Nē askanōki,’ ixō mī yoita. Nāskakē Niospa meka nikai mī inimasharakōi,” ixō Elisabet yoini.

⁴⁶ Nāskafaito María kemani:

Ēfe ōiti mēraxō ē shinākī iskafai, nōko Ifo tsoa keskaramākī. Nōko Ifo Nios fāsi sharakōi. ⁴⁷ Akiki ē inimakōiaino ea anā potanakama, ē afe ipanaka, ea kexepakenaka, ea ifixii ē afe ipaxanō. ⁴⁸ Ē nā yonoxomis, ē afaa tāpamafekē nā Niospa ea noikōi. Nāskakē yorafāfe yoipakenakafo: “Nā María Niospa inimamakōia,” ixō yoipakenakafo. ⁴⁹ Nios fāsi sharafinakōia. Afaa pishta fayamatiroma. Afama mīshti fatiro, ea sharakōi faxōa. Niosfi sharakōi kī. Afaa chakafamisma Niosfi nāskarakōi. ⁵⁰ Nāskara yorafāfe yoitirofo: “Ē Nios nikasharapaikōiaino, ē nikakaspaitori ea chakafatiro. Nāskax ē akiki mesetiro. Akiki mesekī ē Nios nikasharakōi,” ixō yoiaito nā keskara yorafo Niospa ato noikī ato shināpakenaka. ⁵¹ Akka Nios nikakaspaikī āto ōiti fekaxtefakani, “Tsōa afaa tāpikeroko ē akai keskafakī,” ixō āto ōiti fekaxtefatirofo. Nāskafono Niospa ato fenomatiro. Nāskara ato ōimatiro afaa tāpiamafāfe. Akka Niospa āfe shināmā afama mīshti famiskī. Afaa pishta Niospa fayamatiroma. Nāfi mitsisipakōi kī tsoa keskarama. Nāato afara mīshti fatiro. ⁵² Nāato xanīfofo potano anā tsoa xanīfo itiroma. Akka nā afaayamafo Niospa ato sharakōi imatiro. ⁵³ Akka fetsafāfe Nios shināifono Niospa ato kexesharatiro. Āfe shināmā āto ōiti mēra ato shināmatiro inimanōfo. Akka fētsa shinākī iskafai: “Ē iskaratīa shara ē afara fetsa anā shināima Niospa afara fetsa ea anā shināmanima ē anā Nios fe rafepaima,” ixō shināito askara yora Niospa anā tanaima. Afaa pishta tāpikanamax yorafo askatirofo. ⁵⁴ Niospa noko kexesharapakenaka nōko kaifo israelifāfemāi yonoxomisfono. Noko shināmakinakama mēxotaima noko noipakenaka nā yoini keskafakī. ⁵⁵ Niospa nōko xini Abraham yoi kī iskafani: “Mī kaifo efe yorafo ipanakafo. Askatari mī fenafō ē ato kexesharapakenaka,” ixō Niospa nōko xini Abram yoini, ixō María fani.

⁵⁶ Nāskax María Elisabet ano ipaoni tres oxe ani anoxō. Tres oxe ata anā María āfe xanēnē oni.

Juan Maotista kāini

⁵⁷ Mā Mariā āfe xanēnē oano Elisabet fake feronāfake kāini. ⁵⁸ Mā fake kāiano āfe kaifāfe a chaima nikafāfe tāpinifo. “Mā Elisabet fake kāia nōko Ifo Niospa mā Elisabet aō noikī fake fimismano mā fake fima,” nāskafanifo. Askafakanax akiki inimanifo. ⁵⁹ Mā fake kāitaxakī ocho nia oxano Zacarías pexe ano yorafo fonifo. Fake ōikai fokani āfe foshki repa xateyanā nāskaramāi feyafakatsaxakakī. Fokaxō yoinifo: “Āfe apa anekiriri nō anenō Zacarías fakī,” fanifo. ⁶⁰ Nāskafaifono āfa ato yoini: “Maa, ē aō aneima, Zacarías ē faima. Afeskakīkai apa anekiri ē anetiroma. Ēa ē anei Juan fakī,” ato fani.

⁶¹ Ato askafaito yoinifo: “¿Tsōa anekiri mī aneimē? Anokai āfe xinifo Juanma. Āfe apa nō yōkanōki,” fanifo.

⁶² Akka nā fāke apa mekamais ita pastori ini. Nāskakaxō apa yōkanifo. Mēkemā ato yoini: “¿Āfe ane mī fake mī faimē?” fanifo. ⁶³ Askafaifono ato yoini mēkemā: “Ea kirika inākāfe, ē mato kenexonō,” ato askafani. Kirika ināfono kirikakī kenekī: “Ē āfe ane Juan fai,” ixō kirikakī keneni. Mā kirikakī keneano ōikaxō yoinifo: “Ōikapo. Mā anea Juan fakī. Āfe ane Juan ixii,” fanifo, apa feta āfe āfa aneaito shināpainifo. ⁶⁴ Nāskata āfe fake ane keneta Zacarías mekani. Anā mekamais inima, mā mekaya ini. Mā mekayaxō ato yoini: “Nios sharakōi,” ato fani. ⁶⁵ Mā Zacarías mekaito ōikani ratenifo. Mā ratekanax fokani yoināi fetsenifo. Nāskakanax mā fokani Judea mai ari fokani yoināfonifo: “Mā Zacarías āfe fake ane ane mā mekai. Mā āfe āfinīri fake fikatsaxakima, mā fake fia,” ikanax yoināi fetsenifo. ⁶⁶ Yoināi fetsekaxō shinānifo: “Nā fake afeskaimākai nō ōinō shināya iki kiki, Niospamāi shināmasharaino,” ikaxō shinānifo.

Zacarías fanāini

⁶⁷ Niospa Yōshi Sharapa shināmanaino Juan āfe apa Zacarías yoini:

⁶⁸⁻⁶⁹ Ēfe kaifo israelifāfe nōko Niosfi sharakōikī, nāfi nōko Ifokōikī. Nōko chaka noko soaxoxii. Nōko xini David āfe fena finakōia ixii. Nā David nōko xinifāfe āto xanifo ipaoni. Nā āfe fena Niospa nīchia noko ifipakexanō āfe nō ipaxanō. Nāskakē noko shināmakinakama. ⁷⁰ Nāskakaxō ato yoipaonifo, nā ato Nios yoixomisfāfe Judea mai anoafō. ⁷¹ Niospa ato shināmanaino yoipaonifo noko kexesharano afanā noko afeskafanōma noko ōikaspafono ixō yoinifo. ⁷² Nā noko yoiaifāfe nō ato nikapaoni keskakakī noko Niospa kexesharapakenaka noko noikī. Nā noko yoipaonifo keska Nios noko shināmakimisma. ⁷³ Nāskaxō nōko xini Abraham Niospa yoini iskafakī: “Mī kaifo efe yorafo ipanakafō. Nāskakē mī fena ē ato nīchixonī āto xanifo finakōia inō. Nāskaxō keyokōi ato ifixii afe ipaxanōfo. ⁷⁴ Nāato nā mato ōikaspafō ato paxkaxii anā mato afeskafanōfoma,” ixō Niospa yoini. Noko askafaino nō āfe inafōax nō anā mesetiroma nokomāi nōko Ifāfe īkikē. ⁷⁵ Nō āfe ina kayakōikē nōko ōiti noko shara faxoxii aa noiax nō isharakōipakexanō, ixō Zacarías ato yoini.

⁷⁶ Nāskata Zacarías āfe fake yome pishta yoini:

Anifoshta, nōko Nios finakōia nō mánāo nikōina. Akka mī yosixō Niosnoa mī ato yoixoxii. Taefakī mī ato yoixonano chipo nā nōko Ifo finakōia oxii. Nāskakē itipinīkāfe mā nōko Ifo oi kiki mī ato faxii. ⁷⁷ Nāskakē mī ato tāpimaxii mā nōko Ifo oaino afe yorafo ato chaka soaxoniyo. ⁷⁸ Akka Niospa noko shināino āfe Fake finakōia nai mēranoax nokoki oi nōko ōiti noko sharafaxoxiki. Oa fakishpari xini koshi kafanai keskakakī nōko ōiti xafakīa sharakōi noko faxoxiki, ⁷⁹ anā fakish keskara nōko ōiti inōma. Nāskax nai nō mesetiroma noko shināmasharaino,

ixō Zacarías ato yoini.

⁸⁰ Nāskax Zacarías āfe fake yosini Niospa āfe shināmā shināmasharaino. Nāskax ares tsōa istoma ano ipaoni, nā Niospa meka israelifo ato yoikī taefaitā.

2*Mariā Jesucristo kāini
(Mt. 1.18-25)*

¹ Nā Jesús kāiyaitā romanō āfe xanifāfe César Augusto āfe yorafo nīchini nā maitio anoafō ato tanākaxō āto anefo kenenōfo afe tii yorafomakī. ² Taefakīkōi kirika kenenifo āto anefo keyokōi. Akka Siria mai anoafāfe āto xanifāfe ane Cirenio ipaoni. ³ Nāskakē keyokōi fonifo āto mai anoxō āto ane kenei fokani. ⁴ Nāskaifono Mariā feri José kani Belén ari. Nazarete ano ikanax. Nā Nazarete pexe rasi Galilea mai anoafāfe ini. Nānoax José fe Mariā fonifo, José āfe xini Davidmāi Belén anoax kāinino. Nā Belén Judea mai anoafāfe ini. ⁵ Nāskakē Mariā fe José fonifo āto ane kenei fokani. Mariā fe José mā yoināfo ini fianāxikakī. Fianāyokanamax Mariā fe José kani. Nā Mariā tosa pishta tanamisma ini, akka Niospa Yōshi Sharapa fake nanemani. ⁶ Mā Mariā Belén ano nokoano fāke pāe fani mā kāiki. ⁷ Mā fake kāiax fakeyai taeni. Āfe fake

feronāfake ini. Akka āto fakka inafāfe piai mēra fonifo. Anoaax María fake kāini. Mā fake kǎixō sama faxte pishta rakoni. Askata āfe fake rātani a fakkafāfe piai kamaki.

Ājirifo oveja kexemisfoki nokoni

⁸ Nā María fakishi fake kāiano oveja kexemisfāfe fasifo mēraxō āto ovejafo kexeshinifo pexe rasi pasotaixō. ⁹ Āto ovejafo kexeshinaifono Nios ariax āfe ājiri atoki fotokī chaxapakefōfāni. Niospa nīchiano chaxapakefōfāni. Mā Niospa ājiri nīchiakī inifo chaxatanaito fichikanax ratekōinifo. ¹⁰ Nāskaifono ājirinī ato yoini: “Rateyamakāfe. Ē mato meka shara yoiyoaki nikax mā inimai finakōinō. Askatari yorafāferi nikakanax akairi keyokōi inimakōinōfo. ¹¹ Iskaratīa fotoxō ē mato yoiyoa. Nā fakishi mā mato Ifo Cristo mā kāia mato Ifokōi mato ifixiki mā afe ĩpaxanō. Nā mato xini David kāini anoaxri kāia mato Ifokōi. ¹² Ē mato yoinō nikakapo afeskaxō mā tāpitiromakī nā fake āfe afa rapatinī rakoxō rāta fakkafāfe piai ano fichixō mā tāpitiro nā mato Ifo finakōia,” ixō ājirinī ato yoini.

¹³ Ato yoikī xatetanaino atiri Niospa āfe ājiri ichapakōifo atoki fotopakefōfāni. Fotopakefōfākata inimakōi Nioski fanāinifo. Inimakata iskafakī yoinifo:

¹⁴ Nios sharakōi nai mēra ika. Nā ato fichipaiyai tii nono mai anoax ikafo ato shināmasharai inimanōfo, ixō yoinifo.

¹⁵ Mā yoikanax anā nai mēra fonifo. Mā nai mēra ājirifo foafono, “Nō ōinō,” inifo, “Chanīmamakī nō ōinō, fokapo Belén ano na nōko Ifo Niospa āfe ājirifo nīchiano noko yoiafo keskara nō ōinō fokapo,” ixō yoinifo.

¹⁶ Nāskata nā oveja kexemisfo fonifo. Mā fokakī ichokaxō fichitoshinifo María yafi José. Nāno āto fake yome rātafono fakkafāfe piai mēra fasi mēra rakakē ōinifo. ¹⁷ Nā fake yome ōiafo tiito ato yoifofāsafanifo. ¹⁸ Nā oveja kexemisfāfe ato yoiāifāfe nikakakī, “Airā, ¿afeskakī ishara shara noko yoikanimē?” inifo. ¹⁹ Nāskakē Mariā nā nika keskafakī āfe ōitinī fāsi shināfāfāni. ²⁰ Nāskakata nā oveja kexemisfo ato yoitakani anā ato ovejafo ano fenifo. “Aicho, Nios sharakōikī nā noko yoia keskafakī mā nō ōitanikai,” ikanax āa ranā yoinānifo.

Nios kīfiti pexefā mēraxō apa feta āfa āto fake Jesús Nios ispanifo

²¹ Mā ocho nia oxano Jesús foshki repa xatenifo. Nāskafakaxō anenifo Jesús fakakī, nā ājirinī yoiyoni keskafakī María fake naneyoamano.

²² Moisés israelifo yoini iskafakī: “Kēro fake kāiax fena faki kafāsatiroma. Askatari Nios kīfiti pexefā mēra fena ikitiroma cuarenta nia oxa finōaxma,” ixō ato yoini. Akka mā cuarenta nia oxa finōano José fe Mariā fonifo. Jerusalén ano iyoifokani āto fake Nios kīfiti pexefā mēraxō Apa Nios ispaxikakī. ²³ Nānori Niospa shināmanaino Moisés kirikaki keneni iskafakī: “Fake kāi taexō feronāfakē mā Nios ispatiro āfenā inō,” ixō ato yoipaonino, José feta Mariā āto fake Jesús yionifo Jerusalén ano. ²⁴ Nāskakē José fe Mariā mā fokaxō a Moisés yoini keskafakī a Nios ato kīfixomis rifi rafe iyamai nopoxpoiki rafe inānifo retexō Nios kīfixonō nānorimāi Moisés yoipaonino.

²⁵ Nā Jerusalén anoa feronāfake Nios Ifokōi faa ini, āfe ane Simeón. Nāato Nios Ifo sharakōi faxō kīfitaifapaoni. Niospa Yōshi Sharapa Simeón ĩkināno, nāato Cristo manapaoni, āfe kaifo israelifo ifinō Niospa Yōshi Sharamāi afe ikano. ²⁶ Niospa Yōshi Shara āto mēra naneano a mēraxō tāpimani iskafakī: “Mī fena naima na Niospa nīchiai nōko Ifo Cristo mī ōiyoi mā mī ōiax mī naxii,” ixō tāpimani, Niospa Yōshi Sharapa Simeón. ²⁷ Nāskata Niospa Yōshi Sharapa shināmanaino Nios kīfiti pexefā mēra ikikaini. Nānori José fe Mariā āto fakeya ikifainifo, Moisés yoini keskafakī āto fake ispaxakakī. Mā ikiafono, ²⁸ Simeón atoki oxō inimayanā Jesús yome pishtakē chishtoinīfōfāni, mā tāpixō. Nāskafaxō Nios yoisharani iskafakī:

²⁹⁻³¹ Ifo, ea mīa yoinis keskafakī mē ōi. Aicho, mē akiki inimakōiax mē naikai ēfe Ifo ōiax. Nāatofi noko ifixii kiki nō afe ĩpaxanō. Keyokōichi nō Ifofanō mī nokoki nīchia.

³² Nāskata mī nōko kaifo yamafano mia shinākatsaxakakima mī fākeoxō mia tāpikōikani. Akka nō israelifo mefe yorafo nō tāpikōixii, nā fakeōnoa Niospa nokoya rafemanano. Aōxō nā noko yoinis keskafakī noko axoxii,

Simeón fani.

³³ Ato askafaito nikakī Mariā feta José āto ōitinī shinānifo: “Airā, nōkai nafa meka nikamisma,” ixō shinānifo. ³⁴ Akka Simeón Niospa Yōshi Sharapa shināmanaino ato yoisharani. Nāskaxō āfe afa yoini: “Nā mī fake chanīmara fakanax nōko kaifofo israelifo inimatirofo. Aōnoax isharapakexakakī. Akka nōko kaifo fetsafari afe rafeyamakanax omiskōipakenakafo. Nāskakē yora ichapafāfe chanīmara fakani. Akka fetsafāferi chanīmara fakaxō mā shinākani. ³⁵ Akka a āto ōitinī shināifo keskafakī onetirofoma. Akka fētsa āa shinākī a shināi keskara onetirofoma. A shināyamafori onetirofoma. Xafakākōi ato ōitiro. Nāskakē mī fake aa noikaspaxō chakafaxikani. Askafaiāfe ōi aōnoax mī omiskōixii shināi. Nā kenopa mī ōiti xatea keskara mī meexii omiskōikī,” Simeón fani.

³⁶ Nānori kēro fistiri ini, āfe ane Anā. Nāatori Niosnoa yoini, a inōpokoai yoikī. Akka nā Anāmā apa Fanuel ini. Āfe kaifo Aser nafafo ini. Akka nā Anā yōxafokōi ini. Xomayakōi feneyayoni, siete xinia afeta akax fene nani. Nāskakē anā Anā feneya ipaonima. ³⁷ Ares ikax yōxafokōi ini ochenta y cuatro xinia ani feneyaxoma. Nāskakē Anāmā mēxotaima Nios kifipaoni, pena fisti foni teneyanā. Nios kīfiti pexefā mēranoax Anā askapaoni. ³⁸ Nāskata María fe José Simeón fe yoināifono Anāri atoki oni. Oxō nānoa Jerusú fichini. Fichita akiki inimani. Inimayanā Epa Nios iskafani: “Aicho Epa Niosi, iskaratā mī Fake mī nokoki nīchiaki nofe rafemis ĩpaxanō,” ixō yoini. Mā òixō Anāmā Jerusalén anoafo ato yoini a na manamisfoki israelifo ato ifinō. “Mē nōko Ifo òiaki mā nokoki nokoaki,” Anāmā ato fani.

Nazarete ano anā fenifo

³⁹ Nāskata María feta José Jesús Nios ispatakani, nā Niospa yoipaoni keskai anā āto mai ano fenifo, Nazarete pexe rasi ano. ⁴⁰ Nānoax Jesús mitsisipakōi yosini María fake. Afama mīshti tāpiakōi ini. Niospa aō noikī shināmasharani.

Jesús Nios kīfiti pexefā mēra ikini yomeax

⁴¹ Nāskax nā xinia tii Jesús āfe afa fe apa Jerusalén ano fopaonifo. Pascua fista aki fokani. ⁴² Jesús mā doce xinia akano apa feta āfa iyonifo, amisfo keskakakī fista akifokakī. ⁴³ Mā fista keyoano María fe José fenifo, āto pexe shināferakani. Akka Jesús nēteaito apa feta āfa tāpinifoma, māmāi ato fe kaira ikaxō tsōa tāpinima. ⁴⁴ Mā ato fe kaira ikanax tāpiamax fāi fonifo. Fāi fokāta shinānifo akka nōko fake akka inifo. Nāskata apa feta āfa fenani. Fenayanā afe yorafoya a afe rafemisfo yōkani: “¿Mā nōko fake òimamē?” ato fani. ⁴⁵ “Maa, nō mī fake òima. Nīri oama,” fanifo. Ato askafaiyono āfe apa fe āfe afa anā anori nētefaikani anā fonifo. Afianā nōtanifo Jerusalén ari. Mā nokokaxō fenafofāsafanifo.

⁴⁶ Nāskata mā tres nia oxakata fichinifo nā judeofāfe Nios kīfiti pexefā mēranoa nā ato tāpimamisfo fe tsoxō nikaino. Ato nikayanā ato yōkapakani a ato tāpimamisfo. ⁴⁷ Ato askafaino nikakakī, “Nikakapo, ¿na fāke yomefixō afeskakī mekakī tāpisharakōiamē? Ato kemasharakōi,” fanifo. ⁴⁸ Ato askafaino afa feta āpa fichinifo. “Nono tsofekē nō fenai nōko fake,” fanifo. Nāskata āfa kenatoshini: “Kōkaishta, ¿afeskai mī nēteamē? Mā mī noko ratekōia epa yafi. Afeskara ikara nō mia faa. Nāskakē nō mia fenafei nono ato fe tsoxō mī yoifiaino,” fanifo.

⁴⁹ Askafaiyono ato kemani apa yafi afa: “¿Afeskakī mā ea fenaime? ¿Ea mā tāpimamē nā ēfe Epa Niospa pexe mēra ē ikikē nā ēfe Epa ea yoiai keskara ē faito?” ixō Jesús ato yoini.

⁵⁰ Ato askafaito apa feta āfa tāpinima.

⁵¹ Nāskata apa feta āfa iyonifo Nazarete pexe ari ato xanēnē. Nāskata mā nokoxō María shināni āfe fakeōnoa. Nāskaxō Jesús apa feta āfa yoiaito ato nikakōisharapaoni ato shinākōikī.

⁵² Nāskata Jesús yosikōini, āfe òiti sharakōia. Mā āfe māpo afama mīshti shinākōi ini. Nāskax yosini. Nāskaito òikani yorafo akiki inimakōinifo. Niosri akiki inimakōi ini.

3

Juan Maotista tsōa istomaxō ato yoini

(Mt. 3.1-12; Mr. 1.1-8; Jn. 1.19-28)

¹⁻³ Akka mā yosixō Zacarías fāke ato Nios yoipaoni tsōa istoma anoxō. Tsōa istoma ano yora ichapa akiki fonifo nikaxikakī, nāskakē Zacarías fāke ato Nios yoiaino. Nānori Tiberio xanīfo finakōia ipaoni, Roma anoax. Nāskakē aa ranā ikanax āto pexefo anoax xanīfo ikaxō ato ikīpaonifo. Pexe fisti rasi anoax xanīfo iki fetsepaonifo. Judeofāfe āto xanīfo ini pexe fetsa anoax āfe ane Poncio Pilato. Askata pexe fetsa anoaxri āto xanīfo fetsa Galilea anoax Herodes ato xanīfo ini. Akka Feliperi xanīfoxō pexe rasi anoax rafe kexepaoni. Itoria ano kexeta Traconite ano kexeta fapaoni. Akka nā Felipe āfe exto ipaoni Herodes. Nāskatari pexe fetsa anori xanīfo fetsa ipaoni āfe ane Lisaniab Abilinia anoax. Akka āto xanīfo finakōia ipaoni Tiberio. Nāato keyokōi kexepaoni. Mā xanīfokī catorce xinia akano Zacarías fake Juan tsōa istoma ano ixō Niospa meka yoipaoni. Askatari judeofo yoipaoni āto mai ano ixō, yorafāferi ato Nios kifixopaonifo. Akka Anás fe Caifás āto xanīfo ipaonifo. Nāskakē nā Zacarías āfe fake Juan Judea mai ano ipaoni. Akka mā yosiax tsōa istoma ikē Niospa yoini aōxō ato yoinō iskafakī: “Māto chaka xatekāfe, a mā afara chaka shināi keskara anā shināyamakāfe. Niospa mato yoiai keskara nikakōikāfe. Mā nikakōiaito Niospa mato chaka soaxotiro. Mā askaito ē mato maotisafatiro, faka mēra ikimapakekī māto chaka mā xatenō ato ispagiki ixō ato yoitāfe,” ixō Niospa nīchiano Juan ato yoifofāsafani faka Jordán arixō. ⁴ Afia Isaías ato yoipaoni keskakakī Juan yoifofāsafani. Nānorikōi Isaías kirika kenei a Juan mekanōpokofai yoikī:

Tsōa istoma ixō yorafo yoixii akiki feaifono. Iskafakī ato yoixii: “Mā nōko Ifo oi kiki. Nāskakē itipinīsharakāfe, āfe fai sharafaxokāfe. Māto chaka xatekāfe. ⁵ Nā xexa naxpe

chakafo ano mai forosharakōi fanōfo. A machifo anori sapa sharakōi fanōfo. Nāskatari āfe fai mēstesharakōi faxonōfo. A xexa naxpefo ano mai forosharafaxonōfo sapa sharakōi inō nōko Ifofai. ⁶ Mā nōko Ifo Niospa nīchiano oxō a shināifo ato ifiyoi afe ipaxanōfo. Nāskakē keyokōichi ōixikani,”

ixō yoinōpokoi kiki nā yōra, ixō Isaías kirika keneyoni, Juannoa yoikī.

⁷ Nāskakē nā Isaías ato yoipaoni keskafakī Juan ato yoipaoni, mā chaima Jesús oaino. Ato Juan yoikī iskafapaoni, a nikakani akiki yora ichapa feafono: “Noko Juan maotisafanō faka mēra ikimakī nō chiifā mēra kayamanō,” ikanax akiki feafono Juan ato yoini iskafakī: “¿Afesakai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara mato ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafax ixō mato pārano mā chiifā mēra katiro fētsa afaa tāpiamato mato pārano. Askara Niospa mato iftiroroma mākaikōro shināito, ēroko mato maotisafaano. ⁸ Māto chaka xatekāfe, Nios shinākāfe. Mā Nios shināito ē mato maotisafapanō. Ē mato anā yoinō nikakapo. Mā shinātiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka mato ōitini mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōiki Nios shinākanax. Akka mā kai anori shināima mā mā chanī, ‘Abraham shināpaoni keskara nō shināira’ ikax. Askara shināyamafi Satanás fisti ifofafai. ⁹ Akka fana fimiyamaito ifāfe reratiro. Āfe tapori tsekaxō kooatiro anā niyamanō. Nāskari fakī mā Nios nikakaspaito a omiskōipakenakāfo mēra Niospa mato potaxii mā chaka xateaxma mā isharyamaito,” ixō Juan ato yoini.

¹⁰ Ato Juan askafaito nikakakī kemanifo: “¿Chanīmamē? ¿Na mī yoiai keskara tāpiaxma nō afeskatiromē? ¿Afeskakō a keskara shara nō shinātiro? Mē? faifāfe anā ato yoini: ¹¹ “A yora omiskōiāito afaamais oxō mato rapati yōkatoshiāito mā inātiro mā rapati rafeyaxō. Askatari yora fonāiki oaito mā pimatiro,” ato Juan faito nikanifo.

¹² Xanīfo kori fixomisfāferi Juan yōkanifo: “Maestro, ¿nō afeskatiromē, mī noko maotisafanō?” fanifo.

¹³ Askafaifono ato yoini: “Māto xanīfāfe a tii mato yoiyamafiano finōmainīfōfā mā kori fitiroma,” ato fani.

¹⁴ Nāskatari sorarofāferi yōkanifo: “Akka, ¿nō afeskatiromē?” ixō yōkanifo. Askafaifono ato yoini: “Ato kori fīapiakī shināyamakāfe. Askaxori ato ferateni mitsisipayamakāfe. Ato askafayamakāfe. Māto xanīfori pārāyamakāfe. Nā xanīfāfe mato inā tiya inīmakāfe,” ixō ato yoini.

¹⁵ Nāskata yorafāfe ōinifo Juan mekaito. “¿A naamē Cristo?” ixō āto ōiti mēraxō shinānifo. ¹⁶ A shināifo keskara mā tāpixō Juan ato yoini: “Ē kai Cristoma. Nāskakē ē mato maotisafapai. Akka nā chipo oaito āfe Yōshi Shara mato mēra naneyoi. Nā sharafinakōia, ea keskarama. Aato afama mīshiti fatiro, ē atiroma keskara. Akka ē afaama,” ixō Juan ato yoini. Mā chaima Jesús oaito yoikī ato askafani. ¹⁷ Nāskaxō ato yoipakeni: “Mā Nios shināito mato ifixii. Akka a shināyamaifo ato ifixiima. Afāfekairoko ifofaifono nāfo chiifā mēra ato potano anoax omiskōipakenakāfo” ato fani.

¹⁸ Nāskatari meka shara ato yoini, āto ōiti mēra ato nanemapalkōini āto chaka xatenōfo. “Mā nōko Ifo Jesucristo chaima oi kiki, shināsharakōikāfe,” ixō ato yoitaifapaoni. ¹⁹⁻²⁰ Askatari xanīfo Herodes yoini: “¿Afeskakī mī exto āfi fīaitamē? Askatari mī ato chakafafōfāsafai,” fani Juan. Askafaito nikakī Herodes akiki ōitifishixō achixō karaxa mēra ikimani.

*Juan Jesús maotisafani faka Jordán anoxō
(Mt. 3.13-17; Mr. 1.9-11)*

²¹ Akka Herodes karaxa mēra nīchyoamano Juan ato maotisafapani. Jesúsri mā yosiaito nāri maotisafani. Mā maotisafaano fininākafāta Apa Nios kīfani. ²² Apa kīfaiino nai mēranoax oa rifi keskara āfe Yōshi Shara fotopakekafāni akiki. Fotopakekafanaino nai mēranoax mekaito nikani iskaito: “Mī ēfe Fakekōi ē mia noikōi. Ē mikiki inīmasharakōi,” ixō Apa Jesús yoiaito nikani.

*Jesucristo āfe xinīfāfe anefo
(Mt. 1.1-17)*

²³ Jesucristo mā treinta xinia axō taefakī ato yoini Apa Niospa meka. Yorafāfe José fakera fafiaifono Niospa Fake ini. Nāskafax nāato chata ipaoni Elī. ²⁴ Elī apa Matat ini. Matat apa

Leví ini. Leví apa Melqui ini. Melqui apa Jana ini. Jana apa José ini. ²⁵ José apa Matatías ini. Matatías apa Amós ini. Amós apa Nahúm ini. Nahúm apa Esli ini. Esli apa Nagai ini. ²⁶ Nagai apa Maat ini. Maat apa Matatías ini. Matatías apa Semei ini. Semei apa Josec ini. Josec apa Judá ini. ²⁷ Judá apa Joanán ini. Joanán apa Resa ini. Resa apa Zorobabel ini. Zorobabel apa Salatiel ini. Salatiel apa Neri ini. ²⁸ Neri apa Melqui ini. Melqui apa Adí ini. Adí apa Cosam ini. Cosam apa Elmadam ini. Elmadam apa Er ini. ²⁹ Er apa Josué ini. Josué apa Eliezer ini. Eliezer apa Jorim ini. Jorim apa Matat ini. ³⁰ Matat apa Leví ini. Leví apa Simeón ini. Simeón apa Judá ini. Judá apa José ini. José apa Jonam ini. Jonam apa Eliaquim ini. ³¹ Eliaquim apa Melea ini. Melea apa Mena ini. Mena apa Matata ini. Matata apa Natán ini. ³² Natán apa David ini. David apa Isai ini. Isai apa Obed ini. Obed apa Booz ini. Booz apa Sala ini. Sala apa Naasón ini. ³³ Naasón apa Aminadab ini. Aminadab apa Admín ini. Admín apa Arni ini. Arni apa Esrom ini. Esrom apa Fares ini. Fares apa Judá ini. ³⁴ Judá apa Jacobo ini. Jacobo apa Isaaca ini. Isaaca apa Abraham ini. Abraham apa Taré ini. Taré apa Nacor ini. ³⁵ Nacor apa Serug ini. Serug apa Ragau ini. Ragau apa Peleg ini. Peleg apa Heber ini. Heber apa Sala ini. ³⁶ Sala apa Cainán ini. Cainán apa Arfaxad ini. Arfaxad apa Sem ini. Sem apa Noé ini. Noé apa Lamec ini. ³⁷ Lamec apa Matusalén ini. Matusalén apa Enoc ini. Enoc apa Jared ini. Jared apa Mahalaleel ini. Mahalaleel apa Cainán ini. ³⁸ Cainán apa Enós ini. Enós apa Set ini. Set apa Adán ini. Nāskanifo āto xinifo. Akka āto fenafo mā kaiafo. Adán āfe apa Nios ini, nāatomāi onifakē.

4

Satanás chakata Jesús afara chakafamapaini

(Mt. 4.1-11; Mr. 1.12-13)

¹ Mā Juan Jesús maotisafaano Niospa Yōshi Sharapa iyoaino faka Jordán anoax kani. Tsōa istoma ano kani, Niospa Yōshi Sharapa iyoaino māmāi Niospa Yōshi Shara āfe ōiti mēra naneano. ² Nāskata Jesús ares kafāsani, tsōa istoma ano cuarenta nia oxax afaa pishta piaxma. Nāskakē Satanás akiki kani. Mā akiki nokoxō ifofamapaini. Nāskaxō afara chakafamapaini. Nāskata mā cuarenta nia oxax Jesús fonāikōini, afaa pishta piaxma. ³ Nāskaito ōiki Satanás yoini iskafakī: “Mī Niospa Fakemāki na tokiri pāa fapo,” fani.

⁴ Nāskafaito Jesús kemani: “Maa, na mī ea yoiāi keskara ē akima. A nō piāi fisti nō shināima nipaiki. Akka Epa Niospa āfe meka shararoko nō shinā tiro. Nāskara Niospa meka yويمisto kenenī,” Jesús fani.

⁵ Nāskata Jesús fe Satanás yamaris iakekēfōfānifo. Māchifā māmānē fokani. Nārixō Satanás Jesús nā maitio ispani. ⁶⁻⁷ Nāskaxō Satanás yoini: “Ōipo, ea mīa ifofaxō mī ea yonoxonaito na mī ōiaifo keyokōi sharashtakōifo ē mia inā tiro. Nāskakē keyokōichi āto ifo mī itiro. Nafo ēfenākōifo. Ōipo, na maitio ē ato ināpaiki ē ato inā tiro atonā inō,” Satanás fani.

⁸ Nāskafaito Jesús kemani: “Maa, ē mia ifofaima. Nios fisti nōko Ifokōi. Nāskakē nō ratokonō mai chachixō nō yoitiro aato noko shināmanō. Nāskaxō nō yoitiro iskafakī: ‘Mīfi nōko Ifoki nō mia shināi,’ ixō nō yoitiro. Nāskarafi kirika ano keneaki,” Jesús fani.

⁹ Jesús askafaito Satanás anā Jesús iyoni a Nios kīfiti pexefā māmākīaxō yoiixiki iskafakī: “Mī Niospa Fakekōiaxroko mī niriāx ichopakekafanikai. ¹⁰ Mī ichopakekafānax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoiixi mia kexenō.’ ¹¹ Askatarī kirika keneano iskaki: ‘Mī āto mīfiki pakeaito mia achixikani kiki mī tokiriki pakenōma,’ kirika kenea iskakī,” Satanás Jesús fani.

¹² Satanás askafaito afanā Jesús kemani: “Nōa nō meka fetsafaxō nō yoitiro, ‘Ē afara afeskarafaito, ea Niospa kexei,’ ixō nō shinā tiro. Akka, ‘Niospa ea amapaiyai keskara nā fisti ē atiroki Niospa ea kexenō,’ ixō shinākāfe, ikaki na kirika keneano,” Jesús fani. ¹³ Jesús askafaito nikai Satanás kani, Jesús afeskatiro ma mei. Anā oxō Satanás Jesús afara chaka shināmaniyoxiki ikaini kani. Jesús afara chakafamapafiki chakafamanima. Akka Jesús finakōia ini Satanás māmānō nia.

Galilea anoxō Jesús ato yoiāi taefani

(Mt. 4.12-17; Mr. 1.14-15)

¹⁴ Nāskata Jesús Galilea ano anā kani, Niospa Yōshi Sharapa shināmanino. Mā nokokē Galilea anoxō yorafāfe nikanifo mā Jesús nokoa ikaxō. ¹⁵ Nāskata mā nokoxō judeofāfe ichanāti pexe mēraxō ato yoini. Nāskaito ōikani, akiki inimasharakōinifo. “Na feronāfake āfe meka sharakōi,” fanifo.

Jesús Nazarete anoxō nikakaspanifo

(Mt. 13.53-58; Mr. 6.1-6)

¹⁶ Nāskata nā yosini ano kani Nazarete ano. Nāskax safaronō judeofāfe ichanāti pexe mēra ikini māmāi askai feyakatsaxakī. Ikikainax tsaoni. Nāskata niinākāfā kirika fita aneni.

17 Nāskata afia Niospa shināmanaino Isaiás kirika keneni inānifo anenō. Nā kirika fepexō aneni iskafakī:

18 Niospa Yōshi Shara emēra naneano ea nīchini ē ato yoinō āfe meka shara a afaamaisfo, “Niospa mato noišharai,” ixō, “A Satanás chaka ifofaafō a chaka potakāfe, mato mēra nanepaiyaito anā a chaka nikayamakāfe isharakōixikakī,” ixō ē ato yoinō; askatari nā fēxofori ē ato fero sharafaxonō aō ōisharanōfo: nāskatari nā omiskōikakī afaa shināifoma nāfōri ē ato shināmasharanō; 19 askatari ē ato yoisharanō afetiā Epa Niospa afe yorafo ifimākai,

ixō Jesūs aneni. 20 Niospa meka mā yoikī xatexō kirika fēpoxō feronāfake fetsa ināni, tsaopakekafāxō ato yoixiki.

Ato askafaito aas ōiketsanifo. 21 Nāskata ato yoini: “Ē fakeyoamano Isaiás eōnoa yoipaoni keskafakī iskaratīa mē mato kirika anexona,” ato Jesūs fani.

22 Ato askafaito nikakakī: “¡Aira! Nikakapo, āfe meka sharakōi. José fakefixō ¿afeskakī iskara yoimē?” fanifo.

23 Askafaifono Jesūs ato yoini: “Mā ea iskafairaka: ‘Mī ato Capernaúm anoa sharafaito nō nikamiski mīa anoi sharamefe. Nāskakēri nā mī yoiai keskafakī nonoafori ato sharafafe mia ōixō nō mia chanīmara fanō, ixō mā ea yoipairaka,” Jesūs ato fani.

24 Anā Jesūs ato yoini: “Chanīma ē mato yoikōi. Āto pexekōi anoxō noko iskafatirofo mā nō na ōimis koshikai afaa tāpiama na Niospa meka yoipaiyai aa chanī noko fatirofo.

25 Chanīma ē mato yoikōi. Kirika kenekī nō anetiro iskafakī. Elías nōko mai ano ipaoni. Israel mai ano ari ikano akiki oi inima. Arixō tres xinia ata seis oxe ani, oi manakī. Nāskakē israeli yorafo fonāiki finakōinifo, afaa pikanima. Ari kēro ifomafa fenemais ichapa inifo omiskōikani. 26 Nāskafixō Epa Niospa nōko xini Elías ato ano nīchinima. Askatamaroko Sarepta pexe rasi Sidón mai ano nīchini kēro ifomafa fisti nīchini pimano. Niospa nīchiano chai kani. 27 Askatari yora fetsafo israelifāfe mai anoax ichapakōifo rashkishikani inifo. Akka Elías Niospa meka yoimisto aa rashkishiaifo ato sharafapaonima. Askatamaroko nā Siria mai anoa fistikōi sharafani. Āfe ane Naamán. Nā Naamán Siria mai anoa ini, israeli inima,” Jesūs ato yoini.

28 Jesūs ato askafaito nikakani yorafo ichanāti pexe anoax akiki ōitifishkinifo. Akiki ōitifishkikaki achinifo. 29 Achikaxō iyonifo Nazarete pasotai mafa keyakōi ano Jesūs iyopainifo arixō potapaikakī. 30 Potapaifaifono Jesūs ato rāiferani. Nāskax ato makinoax kani.

*Nānori feronāfake niafaka chaka nanea ini
(Mr. 1.21-28)*

31 Jesūs Capernaúm ano kani, Galilea mai ano. Nānoxō pena tenetitīa Apa Niospa meka ato yoini. 32 Ato yoiaito nikai iskanifo: “¡Keel! Nikakapo. Nato tāpikī finakōia, meka sharakōi nato yoi,” ikanax aa ranā yoinānifo.

33 Judeofāfe ichanāti pexe mēraxō yora mēra niafaka yōshi chaka nanexō Jesūs fāsikōi mekafani. 34 Iskafakī yoini: “¿Afeskakī mī noko fekaxtefaiyoamē, Jesūs Nazarete anoato? ¿Mī noko a omiskōipakenakafo mēra mī noko potaiyoamē? Ē mia ōimismō, mī sharakōinō Niospa mia nīchiano,” fani.

35 Nīafaka askafaino Jesūs yoini: “Mekayamafe. Na feronāfake makinoax tsekekaitāfe,” ixō mitsisipakōikai Jesūs niafaka nīchini.

Jesūs askafaino nīafaka yora fia kekēfōfā potafaini yorafāfe ferotafi nāskax tsekekaiķi afeskafanima.

36 Askafaito ōikakī yorafāfe iskafanifo: “Chanīma, Jesūs afama mīshti fatiro. Iskarakai nō tsōa ōimisma. ¿Afeskaxō iskafaimē, na feronāfake makino niafaka potai? Meka finayakōikē nīafaka nikafainikai,” yorafāfe fanifo.

37 Askafaito ōikaxō yorafāfe pexe tii anoafō yoifōfāfōfāinifo Jesūs yora makino niafaka potaito ōikaxō.

*Jesūs Pedro rayos sharafani
(Mt. 8.14-15; Mr. 1.29-31)*

38 Askakaini Jesūs judeofāfe ichanāti pexe anoax tsekekainax Simón pexe mēra ikini. Nānoax Simón rayos yōxafo yonai finakōini. Nāskaito ōikakī Jesūs yoixonifo: “Na yonai sharafafe,” fanifo. 39 Askafaifono nā kēro yōxafo yonai mánāo kātā Jesūs kātīpakekafāta yoini iskafakī: “Mī yona nishpafe,” faino samamakōi āfe yona nishpatani. Nāskata mā yonai nishpata, fininīkafāta itipinīshara fani ato pimaxiki.

*A isinī ikaifo Jesūs ato sharafani
(Mt. 8.16-17; Mr. 1.32-34)*

⁴⁰ Akka mā xini kaino nā isinī ikaifo fetsa fetsatapafo Jesús ano efenifo. Nāskakē Jesús āfe mēkemā ato māmāpakeaino sharai fetsenifo. ⁴¹ Ranāri nā isinī ikaifo mēranoano niafaka chakafo tsekeni. Fāsikōi mekayanā iskafanifo: “Mīfi Niospa Fakekī,” fanifo. Niafakafāfe askafaifono kerekkai Jesús ato pōtapakeni. Nāskaxō ato mekatima fani māmāi tāpiafāfe nāmāi Cristokē.

Jesús ichanāti pexe mēraxō Apa Niospa mekasharaōnoa ato yoini
(Mr. 1.35-39)

⁴² Mā penaino Jesús tsekekaini, pexefā rasi anoax tsōa istoma ano kai. Nāskaino yorafāfe fenanifo. Nāskakanax akiki nokokaxō nētefapainifo ato makinoax kayamanō. ⁴³ Askafaifono Jesús ato yoini: “Akka, ē Niospa meka shara ato yoifofāfōfāni pexe fetsafo ano afe keskaramākī Epa Nios xanīfāfe noko ikinā. Nāskakē Epa Niospa ea nīchini, ē ato yoinō.”

⁴⁴ Nāskakē kafāsakī Jesús Niospa meka ato yoifofāsafani, ichanāti pexe mēraxō Judea mai anoxō.

5

Jesús foe rasi tarafanāfā mēra ato fospi faxoni, tsōa atiroma keskakī
(Mt. 4.18-22; Mr. 1.16-20)

¹ Pena fetsa Jesúsxō foe rasi finifo iamāfā ketokonōxō Genesaret anoxō. Askafaito ōikani yora rasi akiki fenifo. Niospa meka niakai fekeni. ² Jesús nānoa kanōanāfā rafe rakakē fichini, nā kanōanāfā mēranoano mā fotokaxō ifofāfe ato tarafanāfā chokaifono. ³ Nāskakē nā kanōanāfā fetsa mēra Jesús naneinākfani, nā Simonā mēra. Nāskaxō yoini: “Eaya fenāmāshta kanōanāfā pitsikife,” fani. Nāskata kanōanāfā mēra tsoaxō yorafo yoikī taefani. ⁴ Mā ato yoikī xatexō Simón yoini: “Nā ia noa ano kanōanāfā fotakāfe. Anoxō māto tarafanāfā potaxō foe fixikakī,” fani.

⁵ Askafaito Simón kemani: “Maestro, fakishchāi nō yonoshina tarafanāfānē fipaikī. Akka nō fiama. Akka mī noko yoikai ē tarafanāfā potenō,” fani.

⁶ Mā āto tarafanāfā potekaxō foe ichapakōi finifo. Oa tarafanāfā faxteai keskara meenifo. ⁷ Nāskakaxō nā ato fe rafeafo ato kenanifo, kanōanāfā fetsaōnoa, ato feta fi fenōfo. Nāskakaxō nā kanōanāfā rafe foe rasi fospiōi faafono nā kanōanāfā rafe faka fospiōiax foefoya ikikerani. ⁸ Nāskara ōikī Simón Pedro Jesús nāmā ratokonō mai chachipakefōfā yoini: “Ifo, emakinoax katāfe, ē feronāfake chakakī,” fani.

⁹ Simón askaito ōi a āfe rafeafori ratakōinifo Jesús foe ichapa tarafanāfā mēra ato nanexonano. ¹⁰ Akka nā Simón fe rafeafo inifo, Santiago fe Juan āto apa Zebedeo ini. Nāskakē Jesús Simón yoini: “Rateyamafe. Iskaratīa yorafo ēfe Yōshi Sharaōxō mī ekeki efeikai,” fani.

¹¹ Nāskakata āto kanōanāfā fōkata iamāfā kesemē nexakata mā Jesús fe fōkakī āto afama mīshti ōifainifo.

Jesús yora rashkishiai sharafani
(Mt. 8.1-4; Mr. 1.40-45)

¹² Pena fisti pexe rasi ano Jesús ikano nāno feronāfake isinī iki rashkishi fetseax akiki oni. Mā akiki oxō ratokonō mai chachipakefōfā yoini: “Ifo, ea sharafapaikī mī ea sharafatiro,” faito, ¹³ Jesús āfe mēkemā ramāyanā yoini iskafakī: “Ē mia sharafano. Iskaratīa mī sharaikai,” faino a rashkishi fetseai koshikōi sharatani. ¹⁴ Mā sharano Jesús nīchini iskafakī yoianā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

¹⁵ Jesús askafaito aōnoa mēxotaima nikakī finakōinifo. Nāskakanax yora kaya akiki fenifo nikakani, a isinī ikaifori ato sharafapanō. ¹⁶ Nāskax Jesús ato makinoax kani, a tsōa istoma anoxō Apa Nios kīfikai.

Jesús yora finimisma sharafani
(Mt. 9.1-8; Mr. 2.1-12)

¹⁷ Pena fetsa Jesús ato yoianō nāno fariseofo tsoafo inifo. A Moisés yoikī kirika kenenī keskara ato tāpimamisfori inifo. Pexe rasi Galilea anoax fekāta Judea anoax fēkata Jerusalén anoax fēkata inifo. Nānoxō Niospa āfe shara Jesús ato ōimani, a isinī ikaifo ato sharafapakī. ¹⁸ Nāskakata feronāfakefo nokonifo. Feronāfake finimisma ratatinī rataxō iyoifokani. Nāskakata pexe mēra ikimapainifo, Jesús ano iyopaikakī. ¹⁹ Akka afeskaxma ikitiroma inifo, yorafo ichapakōimāiyakē ikipanāfāfe. Nāskakanax pexe fomākīa inanifo. Nārixō nā finimisma ratatinī rataxō fotomapakefōfānifo, yorafāfe ferotaiifi Jesús nia nāmā. ²⁰ Jesús ōini shinīfāfe iskakakī na finimisma Jesús sharafai kiki ikaxō. Nāskakē a finimisma Jesús yoini: “Efe yorashta, mē mia chaka soaxona,” fani.

²¹ Nāskafaito ðikakī, a Moisés yoikī kirika keneni keskara ato tāpimamisfo feta fariseofāfe shinānifo iskakakī: “Akka, ¿na tsoamē na chanīai Nios chakafakī mekafayanā? Akka Nios fistichi ato chaka soaxotiro,” fanifo.

²² Akka Jesús tāpini askafaifono. Nāskaxō ato yōkani: “¿Afeskakī iskara mā shināimē? ²³ Akka, ¿ē afaa fatiromē? Mē mia chaka soaxona ē fatirotiraka, askayamakī mē mia sharafaa ē fatirotiraka,” ixō ato yoini. ²⁴ “Akka ē mato tāpimanō Niosxō ē ato chaka soaxotiroki nono mai anoxō,” ato fani. Nāskaxō a finimisma yoini: “Ē mia yoi, fininīkafāta mī rakati fifaini mī pexe ano katāfe,” fani.

²⁵ Nāskafaino a finimisma fininākfani yorafāfe ferotaifi. Nāskaxō a kamaki rakamis āfe rakati fifaini āfe pexe ano kani. Epa Nioski inimayanā. “Aicho, Epa Nios sharafinakōia,” faafoni. ²⁶ Finikainaito ðikani ratei fetsenifo. Nāskakanax, “¡Aicho, Epa Nios sharafinakōia!” inifo. Ratekōiyanā iskakakī yoinifo: “Akka mā nō ði afama mīshti shara fai,” fanifo.

Jesús Levī ifni aōxō tāpimis inō

(Mt. 9.9-13; Mr. 2.13-17)

²⁷ Mā askafata Jesús tsekekaikī ðini, a āfe xanīfo Roma anoa kori fixomis. Nā āfe xanīfo kori fixomisto āfe ane Levī* ini. Akka nā ato kori fixomis ano tsaona ini. Nāskakē Jesús yoini: “Efe kafe,” fani.

²⁸ Nāskafaino Levī fininākfāta āfe afama mīshtifo ðifaini Jesús fe kani. ²⁹ Nāskata chipo Levī āfe pexe anoxō fista efapa ani Jesús noisharakōiyanā. Yora ichapa rasiri afe inifo. Nā xanīfo Roma anoa kori fixomisfo. Yora fetsafori afe inifo. Nāno ato fe mīsa ano tsaonifo. ³⁰ Akka nā fariseofo feta a Moisés yoikī kirika keneni keskara ato tāpimamisfāfe Jesúsxō tāpimisfo mekafakī taefanifo. Ato iskakafanifo: “¿Afeskakī ato feta pita ato feta ayata mā faimē? Na ato kori fixomisfo feta na yora chakafo fetari mā pii,” ato faifono, ³¹ Jesús ato kemani: “A sharafāfe notoro fenakanima, a isinī ikaiāfemari notoro fenakanima. Akka nā isinī ikaiāfāfe notoro fenakani. ³² Akka a yora sharafoñnox ē onima. Nā afara chakafakanax shināmitsaifoñnox ē oni, ato chaka soaxoxiki Epa Nios Ifofanō,” ato fani.

Nā foni tenemisfofāfe Jesús yōkanifo

(Mt. 9.14-17; Mr. 2.18-22)

³³ Iskakakī Jesús yoinifo: “Akka Juan inafāfe, fariseofāferi foni tenekōiyanā Epa Nios kīfikī chai yoimisfo. Akka mī inafāfe mēxotaima piyanā ayakani,” faifono,

³⁴ Jesús ato kemani: “Akka yorafo matokī feafono mā ato foni tenematiroma, feronāfake āfiyai. Nā feronāfake mato fe ikano inimakōikī mā ato feta pitiro. ³⁵ Akka nā feronāfake ato makinoa iyoafono āfe yorafāfe shinākakī foni tenetirofo. Nāskarifiakī eōxō tāpimisfāfe inimakakī pitirofo. Akka mē ato makinoax kaano ea shinākakī tsōa pitirofo,” ixō Jesús ato yoini.

³⁶ Nāskafata afianā Jesús ato yoini iskakakī, meka fetsafaxō: “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatari sama fena fe sama xini isharatiroma. Nāskakēri nā ē mato yoiyai keskara mā nikakōixō a mā ipaoni keskai anā mā itiroma māmāi ea nikakōiax. A mā ipaoni keskara shināmakita nāskax mato yora fena keskara shara itiro. ³⁷ Nāskarifiakī tsōa māmā fata koiro pisha xini mēra nanetiroma nā māmānō farax akaino toxamāiyanō. Nāskakē nā māmā fata fe koiro pisha chakanatirofo. Akka nā mato xinifāfe mato yoimisfo keskara fe nā ē mato yoiyai keskara osinātiroma. Nā ē mato yoiyai keskara Niospa meka sharakōi. Akka a mato xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifikī mā shināsharatiroma. ³⁸ Nāskarifiakī tsōa māmā fata koiro pisha xini mēra nanetiroma nā māmānō farax akaino toxamāiyanō. Nāskakē nā māmā fata fe koiro pisha chakanatirofo. Akka nā mato xinifāfe mato yoimisfo keskara fe nā ē mato yoiyai keskara osinātiroma. Nā ē mato yoiyai keskara Niospa meka sharakōi. Akka a mato xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifikī mā shināsharatiroma. ³⁹ Akka māmā pae ayatiakaxō anā tsōa fata ayapaitiroma. Nāskariai iskatirofo: ‘Nā ē ipaoni keskara afianā ē askapai, ēfe xinifāfe ea yoimisfo keskara shara nā fisti ē shināi. Akka meka fetsa chaka ē nikapaima. Askatari meka fena chaka ē shināima,’ ixō shināmisfo fariseofāfe,” Jesús fani.

6

Nā judeofāfe pena tenetitā Jesúsxō tāpimisfāfe aros keskara metesfenifo

(Mt. 12.1-8; Mr. 2.23-28)

¹ Nā pena tenetitā Jesús aōxō tāpimisfo fe tarepa kani. Kakī aōxō tāpimisfāfe aros keskara meteskaxō fonāikakī piifonifo. ² Nāskakē fariseofāfe ato yōkanifo: “¿Afeskakī mā na

* **5:27** Levī ane rafeya ipaoni. Āfe ane fetsa Mateo.

aros keskara metesfeimē na pena tenetiſa tsōa yonotiroma ixō Moisés noko yoifinino?" fariseofāfe ato fanifo.

³ Ato askafaifono Jesús ato kemani, "Akka, ɛa nōko xini Davidōnoa kirika kenenifo keskara mā ōimismē David afaa afeska fanimē āfe inafō feta fonāikōi?" ⁴ Nāskax a Nios kīfiti pexefā mēra ikikaini. A mēra ikikaixō pāa fichixō pini, nā pāa Nios ināmisfo. Nāskaxō āfe inafori ināni akairi pinōfo, akka nā Nios ato kīfixomisfāfe ares nā pāa pifiamisfono. Akka fonāikī finakōikī David nā pāa pini āfe inafō feta. ⁵ Akka ēfe Epa Niospa ea katonī. Nāskakē eres fisti ē yoitiro a nō atiro keskara na pena tenetiſa," ixō Jesús ato yoini.

Feronāfake mēke yōshiya Jesús sharafani
(Mt. 12.9-14; Mr. 3.1-6)

⁶ Pena fetsa pena tenetiſa Jesús ikikaini judeofāfe ichanāti pexe mēra anoxō ato yoixiki. Anoxō ato yoiaino, nāno ato fe feronāfake āfe pōya kayakai aōri āfe mēke yōshiya ini. ⁷ A Moisés yoikī kirika kenenī keskara ato tāpimamisfo feta fariseofāfe ōinifo, na pena tenetiſa na mēke yōshiya Jesús sharafaimākai ikaxō, afara chakafaira ixō yōpaikakī.

⁸ Akka Jesús mā tāpia ini a shināifo keskara. Nāskaxō a feronāfake mēke yōshiya yoini: "Fininākafāta ato nēxpakīa nife," faino, nā mēke yōshiya fininākafāta niini. ⁹ Nāskaxō Jesús ato yoini: "Ēri mato yōkanō. Akka, ɛpena tenetiſa afaa nō afeskafatiromē, shara fayamakī nō chakafatiroraka? Askatari ato ifiyamata, nō ato retetiroraka," ato fani. ¹⁰ Nāskaxō keyokōi ato ōiakeni, a kemataima tsaoafo. Nāskata a feronāfake mēke yōshiya yoini: "Mēshafe," faino nā mēke yōshiya meshatani. Nāskax mēke sharakōia ini. ¹¹ Akka nā fariseofo fe a Moisés kenenī tāpimisfo akikī ōitifishkinifo. Nāskax āa ranā yoinānifo: "ɛNō Jesús afeskafatiromē?" ikanax.

Jesús aōxō tāpimisfo doce feronāfake ifini
(Mt. 10.1-4; Mr. 3.13-19)

¹² Pena fetsa Jesús kanī māchi keya ano Apa Nios kīfikai. Arixō fakishchāi Apa Nios kīfifihini. ¹³ Mā penano a aōxō tāpimisfo ato kenani. Nānoxō doce faxō ato katonī, aōnoa ato yoimisfo inōfo. ¹⁴ Nā feronāfake docefāfe āto anefo fetsa Simón ini, āfe ane fetsa Jesús faxoni Pedro fakī; fetsari Andrés ini, nā Simón exto; fetsari Santiago ini; fetsari Juan ini; fetsari Felipe ini; fetsari Bartolomé ini; ¹⁵ fetsari Mateo ini; fetsari Tomás ini; fetsari Santiago ini, nā Alfeo fake; fetsari Simón ini. Nāato āfe kaifo feta romanōfo potapaipao, anā israelifo yonomanōfoma. ¹⁶ Fetsari Judas ini, nā Santiago fake; fetsari Judas Iscariote ini, nāato Jesús ato achimani. Nā tii Jesús ifini doce faxō aōxō tāpimisfo inōfo.

Jesús yora ichapafō tāpimani
(Mt. 4.23-25)

¹⁷ Jesús māchi keya ariax ftoni, aōxō tāpimisfo fe a mai sapa shara ano. Nānoax aōxō tāpimisfo mā ichanāfo inifo. Yora fetsafori ato fe inifo, Judea mai anoax, Jerusalén anoaxri feafo ini fākafā kesemēnoaxri. Tiro anoax fekāta Sidón anoaxri fenifo. Āfe meka nikaxikakī Jesúski fenifo, aa isinī ikaifori ato sharafapanō. ¹⁸ A niafaka chakata ato fekaxtefai to ato makinōa Jesús potano sharai fetsenifo. ¹⁹ Nāskakē yorafāfe Jesús ramāpaikani, āfe sharaōxomāi Jesús ato sharafapaino.

Nā inimaifo yafi a inimaifoma Jesús ato yoini
(Mt. 5.1-12)

²⁰ Jesús aōxō tāpimisfo ōikī yoini iskafakī: "Afaamaisfiāx mā inimakōitiro. Nios Ifofaax afe mā ipaxatiro nōko xanīfokōimāiyakē. Nāskakē mā inimatiro.

²¹ "Nā yorafāfe fonāikī pipaiyaifo keskafakī māri mā Nios Ifofasharakōipaiyaifo mātō ōiti mēra āfe meka shara nanetiro, mā inimasharakōinō. Iskaratīari omiskōi mā oiafiāx chipo mā inimai fitsakōitiro Nios fe ipaxakī," ixō Jesús ato yoini.

²² Anā Jesús ato yoini: "Inimakōikāfe yorafāfe mato noikaspaifono mato potayanā. Askatari mato ichaifono, askatari mato ōikaspaifono askatari mato anekī chakafaifono. nāskakē inimakāfe eōxō mato askafakani kiki. ²³ Nāskakē mato askafaifono inimai finasharakōikāfe. Nāskaxō a nai mēraxō Niospa afara sharafo mato mekexona mā fixikai. Akka nā mato chakafaifo keskafakī āto xinifāferi nā Nios ato yoixomisfo chakafapaonifo ato omiskōimayanā," ixō Jesús ato yoini.

²⁴ Akka nā kori ichapayafo Jesús ato yoini iskafakī: "Ooa. Iskaratīa mā kori ichapayax mā inimakōi. Akka chipo naax mā omiskōipakenaka, Nios Ifofamax kori fisti shinākatsaxakī.

²⁵ "Ooa. Iskaratīa afara ichapayax mā inimakōiyoi; akka chipo mā fonāixii. Askatari iskaratīa mā fitsakōiyoi; akka chipo shināmitsai mā oiaxii.

²⁶ "Yorafo sharakōira mato faifono, mā inimakōimis. Mātō xinifori nāskapaonifo, nō Niospa meka tāpikōikē noko yoisharakōikanira ikanax āa chanīfikani," Jesús ato fani.

*“Mato noikaspaifaifono mārōko ato noikāfe,” Jesūs ato fani
(Mt. 5.38-48; 7.12)*

²⁷ Nāskata anā Jesūs ato yoini: “Akka mā ea nikaito ē mato yoi. A mato noikaspaifo ato kopikima ato noikāfe. Askatari ato axosharakāfe. ²⁸ Mato chakafaifāferi ato yoisharakāfe. Askatari a mato omiskōimamisfo Epa Nios ato kifixokāfe. ²⁹ Akka fētsa mato tapasaito, ‘Takai fetsari ea afe,’ fakāfe. Askatari fētsa mato tari fiaino āa fotanō inākāfe, rapatiri mato fiaito inākāfe āa fotanō. ³⁰ Akka fētsa mato afara yōkaito inākāfe. Askatari fētsa mato afara fiaito ferateyamakāfe. ³¹ Nā mā fichipaiyai keskafakī fetsafāfe mato axosharaifono, nāskarifiakī māri fetsafori axosharakāfe.

³² “Akka mā ato noikī nā mato noiaifos mā ato noia, askarakai sharama. Yora chakafori nāskariakani; nā ato noiaifos ato noikani. Mā askainokai, ‘Mā afafo shara faa,’ ixō Niospa mato yoima. ³³ Askatari mā ato afara axoshara nā mato afara axosharaifos, askarakai sharama. Nāskariakani yora chakafori. ‘Mā afara sharafo shara faa,’ ixō Niospa mato yoima. ³⁴ Akka mā ato kori ināxō mā ato shinākōimis nokomāi kopifakōikanira ixō; akka na yora fetsafāfe ea afaa kopifatirofoma. Nāskakē ē ato afaa ināpaima ixō mā shinākī mā afaa ināma, askara sharama. Nāskarifiakani yora chakafo kori inānōnāmisfo nokomāi kopifasharakōikanira ikanax. ³⁵ Akka ē mato yoinō, nikakapo. A mato noikaspaifāfe mārōko ato noikāfe, ato shara fakāfe. Afara ato ināxō ea kopifafe iyamakāfe. Mā askai Epa Nios ari mā nokoaito matoki inimayanā afara sharafo mato ināxii. Nāskax mā Nios Sharapa fake mā iki. Nāfi tsoa keskaramāki sharafinakōiaki. Epa Nios sharakōi tsōa fayamafiaino ato noikōi. Nā yora chakafori ato noi. ³⁶ Nāskakē māri ato noikōikāfe, nā Epa Niospa ato noikōiai keskafakī,” ixō Jesūs ato yoini.

*“Fetsafo mekafakī chakafayamakāfe,” ixō Jesūs ato yoini
(Mt. 7.1-5)*

³⁷ Anā Jesūs ato yoini iskafakī: “Mēxotaima fetsafo mekafayamakāfe iskafakī yoikī: ‘Nato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma. Akka yorafo fe rafesharaxō ato raefakāfe. Mā askaino Epa Niospa matori raeshara faxii mā yorafo fe rafesharano. ³⁸ Fetsafo afara ināsharakōikāfe. Mā fetsafo afara ināsharakōikē, matori Niospa afara ichapa sharakōifo ināxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma,” Jesūs ato fani.

³⁹ Jesūs meka fetsafaxō ato yoini iskafakī: “Akka yora fēxo afe fēxo iyopaikī iyotiroma, mai xato mēra paketiro. Nāskari fakī fētsa Niospa meka tāpixoma mato yoitiroma. Askara yorafo yoiyamakāfe, mato anorima yoitirofoki. ⁴⁰ Akka a aōxō tāpimisfāfe a ato tāpimamis finōtirofoma. Akka mā tāpisharakōikanax āto maestro keskara itirofo.

⁴¹ “¿Afeskakī ifi pasta pishta fetsa feronaki ikano mā ōimē, mārōko ifi pasta efapa feostamefixō? ⁴² Akka, ¿mā shināimamē a mā ifi pasta efapa feostamea? Akka afeskakī mā fetsa iskafaimē: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Mākai afaa tāpiama. Akka a mā ifi pastafā feostamea mā tsekayokāfe. Nāskaxō mā mā ōisharakī a fetsa feronaki ika mā fixosharatiro. Nāskari fakī mā chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro,” ixō Jesūs ato yoini.

*“Ifi āfe fimioxō nō tāpitiro afe keskaramākī
(Mt. 7.17-20; 12.34-35)*

⁴³ Anā Jesūs ato yoini iskafakī: “Ifi shara fimi chakaya itiroma. Ifi chakari fimi sharaya itiroma. ⁴⁴ Akka ififo āfe fimioxō nō tāpitiro afe keskaramākī. Moxaya ōikī nō tāpitiro. Na keoimara nō fatiro. Nāskari fakī nō tāpitiro moyaya ōikī, nari uvamara nō fatiro. ⁴⁵ Nāskari fakī yora sharapa meka shara yoitiro, āfe ōiti mēraxomāi shara shinākī. Akka yora chakapari meka chaka yoitiro, āfe ōiti mēraxomāi chaka shinākī. Nāskaxō nā āfe ōiti mēraxō shināi keskara yoitiro.”

*“Pexe rafeōnoa Jesūs ato yoini
(Mt. 7.24-27)*

⁴⁶ Nāskaxō anā Jesūs ato yoini: “Akka, ¿afeskakī mā ea Ifofafiakī, a ē mato yoiai keskara mā akimamē? ⁴⁷ Ē mato yoinō afe keskarafoamākī nā ea nikaifo, nāfāfe nā ē ato yoiai keskara amisfo. ⁴⁸ Nā yōra pexe fai keskara, pexe fakī mai chai pōkixō mai teiki nokoxō pexe kishi nīchiano. Mā faka faikī faka poikōikī pexe afeskafatiroma pexemāi kerexkōikē. Nāskarifiakī yōra ea Ifofasharakōixō afara afeskara afiatio shināchakatiroma. ⁴⁹ Akka nā ē yoiaito ea nikaito nā ē yoiai keskara akima, nā yora tatimato pexe fai keskara. Pexe fakī tāpixoma pexe kishi nīchisharamano, a nāmā faka faikī potatiro. Nāskax mā pexe pāoikax chakanakōitiro.

Nāskarifiakī fētsa ēfe meka nikafikī ea nikasharaima. Nāskakē omiskōipakenakafō,” ixō Jesús ato yoini.

7

Jesús sharafani romanō xanīfāfe āfe ina yonaito
(Mt. 8.5-13)

¹ Mā Jesús yorafo yoikī xateax Capernaúm ano kani. ² Nāno soraro xanīfo romanō ini. Nāato a yonoxomis fichisharapaikōimis yonaifinakōi nakerani. ³ Nānoxō nā soraro xanīfāfe nikani Jesúsnoa yoaifono. Nāskaxō judeo anifofo nīchini Jesús yoixotanōfo a yonoxomis sharafaxoyonō.

⁴⁻⁵ Ato askafaino mā fokaxō Jesús yoinifo iskafakakī: “Oa soraro xanīfāfe nofe yora yamafixō noko axosharamis ikaxō chikishta,” fanifo. “Noko keyokōi noikōimis nāato ichanāti pexe noko faxoni. Nāskakē āfe ina mī sharafaxotiro,” judeofāfe Jesús fanifo.

⁶ Askafaifono Jesús ato fe kani. Akka Jesús mā pexe chaima faikaino, nā soraro xanīfāfe afe rafeafo nīchini yoitanōfo iskafakī: “Ifo, ē mia fekaxtefaima. Ēkai afaama. Akka mī tsoa keskarama. Mī finakōiakī ēfe pexe ano kayamafe. ⁷ Akka ēkairoko afaax nāskakē ē mikiki kaama. Akka mī mekapa a ea yonoxomis ea sharafaxōfe nonoxō. ⁸ Akka eari ēfe xanīfāfe yonomamis. Ēri sorafofo yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomisri afara ea axōfe ē faino ea axotiro. Akka mī afama mīshti fatirokī. Mī mekapa a ea yonoxomis ea sharafaxōfe,” ixō yoini.

⁹ Askafaito nikakī a afe foafo Jesús ato yoini: “Kee, nikakapo. Na feronāfake israeli yamafixō ea chanīmara fakī finakōi, fetsafo keskarama. Akka Israel anoafāfe ea iskafamisfoma chanīmara fakakī,” ato fani.

¹⁰ Ato Jesús askafaino a sororo xanīfo fe rafeafo mā āto pexe ano fokaxō ōiafo a yonaito ōifaino mā shara fichitoshinifo.

Jesús otofani kēro ifomāfa fake

¹¹ Mā askafata Jesús kani pexe rasi āfe ane Nain ano. Āfe inafō fe kaino yora ichapafori afe fonifo. ¹² Mā pexe rasi chaima fāi kakī ōini a naa iyoifofaifono maifaifokakī. Kēro ifomafa nā āfe fake fisti ini. Nā kēro ifomafa fe yora ichapafō afe fonifo. ¹³ Nā kēro ifomafa oiaito ōikī, Jesús shinākōikī yoini iskafakī: “Oiyamafe,” fata, ¹⁴ Jesús kaxō a kamaki rataxō iyoifofaifo ramāni. Akka nā iyoifofaifo nāno nētenifo. Nāskata nā naita Jesús yoini: “Naetapa, ē mia yoi, fininīkafāni,” faino, ¹⁵ fininīkafāni. Nāskakē a naita fininīkafāni tsaota mekani. Nāskaxō Jesús afa yoini: “Nakīa, mī fake,” fani. ¹⁶ Nā naita Jesús otoa ōikani. Yorafo ratei fetsenifo. Nāskakaxō Nios yoisharakōinifo iskafakakī: “Epa Niosfi finakōiakī āfe meka yoisim nokoki nokoa,” fanifo. Nāskatari yoikī iskafanifo: “Epa Nios nokoki nokokōia, afe yorafo kexesharaxiki,” fanifo. ¹⁷ Nāskakē Judea anoxō keyokōi nikaketsanifo, aa kematai ixori nikaketsanifo a naita Jesús otofakē.

Juan aōxō tāpimisfo Jesúski nīchini
(Mt. 11.2-19)

¹⁸ Juan karaxa mēraxō nikani Jesús ato sharafaito Apa Niosxō. Nāskaxō āfe ina rafe kenani. ¹⁹ Nāskaxō ato nīchini Jesús ano fotanōfo mā ato nīchia fokaxō yoinōfo iskafakī: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yoitanōfo Juan ato nīchini. ²⁰ Mā Juan ato nīchia fokaxō Jesús yoinifo: “Juan Maotista noko nīchia nō oa mia yōkaiyoi, mīmākī a Niospa nokoki nīchia, askayamakī fetsa nō manairaka,” fanifo. ²¹ Jesús anoxō yora ichapa sharafapani, a isinī ikanaifo sharafata, a omiskōifinakōiafo sharafata, a niafaka chaka ato mēra nanea ato makinoa potata, a fēxōfo ato fero sharafaxōaito ōinifo.

²² Nāfo askafata Jesús ato kemani iskafakī: “Fokaxō Juan yoitakāfe a mā ōiyanā a mā nikafori. Yoitakāfe, mā fēxōfāfe sharakaxō ōisharakani kiki, askatari nā chatofori mā sharakanax niafokī, a rashkishiaifori mā sharafokī, a pastofāferi mā nikasharakani kiki, a namisfori mā otafokī, a afaamaisfāferi Niospa meka shara nikakani kiki afesaxō Epa Niospa noko ifitiromakī. ²³ Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

²⁴ Nā Juan ato nīchia rafe mā foaifono Jesús yorafo yoikī taefani Juanoa, iskafakī ato yoikī: “¿Afskakī tsoa istoma anoa Juan ōifokani fonifomē? Juankai nā nēfe tafa pei takka takka akai keskarama. Nāskarifiakī mā mā tāpia Juankai ōiti ranāyama. ²⁵ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfōfōfāfe āto pexe anoxō rapati sharakōi safetirofo. ²⁶ Akka, ¿tsoa ōikai mā kamismē? Nā Niospa meka yoisim ōikai mā kamisraka. Akka chanīma, nā

Juan Niospa ina finakōia fetsafo keskarama. ²⁷ Akka nā Nioano yoikī Isaías kirika keneni iskafakī:

Mī nai ariax mai ano fotoyoamano nā ēfe meka yoimis ē nīchiki taefai mīōnoa ato yoiaino itipinīsharakāō mia nikakōinōfo, ixō keneni. ²⁸ Akka ē mato yoi, ē mato pāraima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimis. Akka fetsafāferi afayamafikaxō ea Ifofaifono Nios atoki inimakōi. Nāskakē Juan finōkōiafo Niospa ato ōimis.”

²⁹ Keyokōichi Juan nikanifo, a xanīfo Roma anoa kori fixomisfāferi nikanifo. Nāskakē Juan ato maotisafapani māmāi tāpikōiafē Nioskairoko chanīmiskē. ³⁰ Akka nā fariseofo fe a Moisés yoikī kirika keneni keskara ato tāpimamisfo afo maotisakaspanifo Juan yorafo maotisafapaino. Nā Niospa ato yoipaiyai keskara nikakaspanifo.

³¹ Nāskaxō anā ato yoini: “Iskaratīa na niyoafo afe keskarafoamākī ē mato yoinō mā tāpinō. ³² Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyifo keskai tsoa kaxesharayamaino ato yoitirofo iskafakakī: ‘Nō nōko xaiti maneaino akka mā mairamisma. Askatari shināmitsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki inimamisma. ³³ Akka Juan Maotista oni. Atokai pikī finapaimisma, askatari afaa pae ayamisma. Akka mā yoimis iskafakī: ‘Juan niafaka yōshi chakaya,’ mā famis. ³⁴ Akka ē Niospa Fakekōi oni. Piyanā ē ayamis. Akka ea mā iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fixomisfo ferī rafemis,’ mā ea famis. ³⁵ Akka ē shara imis Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,’ ixō Jesús ato yoini.

Jesús Simón pexe ano kani. Nā Simón fariseo ini

³⁶ Fariseo fistichi pikīxiki Jesús iyonī. Afe Jesús kani āfe pexe ano nāno mīsa ano tsoaxō piaino. ³⁷ Nānoa nā kēro chotaferomato nikani nāno ato fe ixō. Nā fariseo pexe anoxō Jesús pii ano, nāno nā kēro nokoni, manishomo oxokōiki pirofomā foikai. ³⁸ Mā nokoax oiayanā Jesús āfe tae resotai nitishota tsaopakafāni. Tsoax oiaino Jesús āfe tae pichiki āfe fēotoshini. Nāskaxō āfe fōo otekere ayanā āfe tae tsōokakata akiki pirofomā nachini. ³⁹ Nā fariseo a Jesús iyoato na kēro askaito ōikī āfe ōiti mēraxō shināni: “Na feronāfake Niospa meka yoikatsaxakitsi tāpi kiki na kēro afe keskaramakī na āfe tae ramākai, nā kēro chakakōi,” ixō āfe ōiti mēraxō shināni.

⁴⁰ Nāskara āfe ōiti mēraxō shināito Jesús yoini nā fariseo: “Simón, afara fetsa ē mia yoipai,” faito nā Simón fariseo kemani: “Ea yoife, Ifo,” fani.

⁴¹ Askafaito nikakī Jesús yoini feronāfake rafeōnoa meka fetsafaxō: “Nā feronāfake rafeta a ato kori minimis niminifo. Fētsa nimini quinientos nā kori ano denarios. Fētsari nimini cincuenta. ⁴² Afesakxoma kopifatiroma inīfo. Akka nā ato kori minimisto ea kopifakāfe ato fanima. Ato shara fani nā rafe. Akka ea yoife fatoto noikī finasharakōimākai,” faito, ⁴³ Simón kemani: “Ētsa, nā ichapa nimiatō noikī finakōi rakikīa,” faito, Jesús yoini: “Ēje, mī yoisharakōiaki.”

⁴⁴ Nāskaxō nā kēro ōiyanā Jesús Simón yoini: “¿Mā mī na kēro ōimē? Akka ē mī pexe mēra ikikē mī ea faka ināma, ē aō ochokomepanā. Akka na kēromā oiayanā ēfe taeki āfe fēo tosiyanā ea ōchoa. Nāskaxō āfe fōo ea otekere aka. ⁴⁵ Akka mā nō feyai askafimismo, mī ea tamoki tsoo akama. Akka na kēromā ikitoshixō ēfe tae pemākīa tsoo akī xateama. ⁴⁶ Akka mā nō feyai askafimismo mīkai xinī ēfe mapoki yōshi chaka matekere akama. Akka na kēromā ēfe taeki pirofomā nachia. ⁴⁷ Akka ē mia yoi, na kēro chaka finakōikē mē āfe chaka soaxona, ea noikōiaito. Akka fētsari afaa chakafai finamano mē āfe chaka pishta soaxofiano ea noisharaima,” ixō Jesús yoini.

⁴⁸ Nāskaxō a kēro yoini: “Mē mia chaka soaxona,” fani. ⁴⁹ A ato feta piaifori nāno ato fe inifo. Nāskax aa ranā yoinānifo. “¿Tsoamē na ato chaka soaxonai?” ikanax yoinānifo.

⁵⁰ Nāskaxō afianā Jesús nā kēro yoini iskafakī: “Ea mia chanīmara faito ē mia chaka soaxonaki, kasharatāfe,” ixō Jesús yoini.

8

Kērofāfe afara Jesús axosharapaonifo

¹ Mā askafata pexe rasi mēra Jesús kafāsapaoni. Afe keskaramakī Apa Nios xanīfoōnoa ato yoifofāsafai. Mā doce feronāfake aōxō tāpimisfo afe fofāsapaonifo. ² Kēro ranāri Jesús fe fofāsapaonifo, māmāi ato sharafaano ato makinoa niafaka yōshi chaka potakī, a isinī ikaiferi ato sharafani. Nānori ato fe ini āfe ane María Magdalena. Nā María Magdalena makinoa Jesús siete niafaka potani. ³ Nāskata Juanāri ato fe ipaoni, Cuzapa āfi. Nā Cuzapa Herodes yonoxopaoni. Susanāri ato fe ipaoni. Nāskatari nā kēro fetsafāferi Jesús yafi aōxō tāpimisfo ato kori ināpaonifo.

Jesús ato yoini meka fetsafaxō fimi exe saamisnoa
(Mt. 13.1-9; Mr. 4.1-9)

⁴ PeXe rasi anoax yora rasi fenifo, Jesús òifekani. Nāskakē yora kaya ichanāfono meka fetsafaxō Jesús ato yoipakeni iskafakī: ⁵ “Feronāfake fistichi fimi exe saafoni āfe nōxati mēra kēchoxō fokī. Āfe tarepa āfe fimi exe saakaino ranāri fai nēxpakīa pakeaito peamanifo, ranāri peyafāfe xēani. ⁶ Akka mā foaipaiyaito xinī namani, yosipanā, ēfe tapo airoko mai mēra kasharakē. Foaikax samama nani xinī tsasifaano. ⁷ Ranāri fimi exe fofo moxafo mēra pakei fetseni. Moxafo mēranoax moxafoya foaipaiyaito moxafāfe namani. ⁸ Akka fimi exe ranāri mai shara ano pakeni. Nāskax foaisharax fimi ichapayakōi ini fetsa cien ini,” ixō Jesús ato yoini. Nāskaxō anā fāsi ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini
(Mt. 13.10-17; Mr. 4.10-12)

⁹ A aōxō tāpimisfāfe Jesús yōkanifo: “Noko yoisharafe, nō mia nikasharamakī afaa mī yoiāmāki meka fetsafaxō,” faifāfe ¹⁰ ato yoini: “Ē mato yoinō Epa Nios xanīfāfe afesaxō afe yorafo ikināmāki, ē mato tāpimasharai afe keskaramāki. Akka fetsafo meka fetsafaxō ē ato yoi. Nā ē ato yoiāi òisharafikakī òisharafoma. Nikafikakīri nikasharafoma,” ixō Jesús ato yoini.

Jesús meka fetsafaxō fimi exe saamisnoa ato yoini ato tāpimasharakōixiki
(Mt. 13.18-23; Mr. 4.13-20)

¹¹ Anā Jesús ato yoini iskafakī: “Na meka fetsafaxō ē mato yoiāi iskarakī nikakapo. Na fimi exeōnoa ē mato yoiāi, fimi exeōnoa ē mato yoima. Niospa mekaōnoa ē mato yoi. ¹² Akka na fai nēxpakīa fimi exe pakea peamatirofo keskafakī, nāskarifiakī Niospa meka nikapaiyāifono Satanás chakata ato nikatima fatiro afe iyamapakexanofo. ¹³ Akka nā fimi exe makex mēra pakeax foaitiro keskariakī, nāskarifiakī fētsa Niospa meka nikapaisharakōiyotiro. Akka nā fana tapo foaisharama keskaraxō nikafikī nikasharaima. Nāskaxō afara afeskaraino samamashta kachikiri fatiro. ¹⁴ Akka nā moxafo mēra fimi exe pakea keskarafori a ea nikaifo. Akka ea nikafikani, nā moxafāfe fanafo namai keskarafō, āto shinā mēraxō afara sharafo shinākakī. Nāskakakī a Niospa ato amapaiyai keskara shinākanima. Nā fimi exemais keskarafō. ¹⁵ Akka nā fimi exe mai shara ano pakea keskara. Nāskarifiakī yora òiti sharayato itipinīsharaxō ea nikasharai, Niospa meka chanīmara fakōini, nā fimi exe ichapaya keskarakōixō. Nāskasharakōikaxō fetsafo Niospa meka nikamasharakōikani fetsafāfe chanīmara fanōfo,” ixō Jesús ato yoini.

Meka fetsafaxō rāpariki Jesús aōxō tāpimisfo yoini
(Mr. 4.21-25)

¹⁶ Anā Jesús ato yoini iskafakī: “Akka rāpari òtaxō tsōa kēsho fepotiroma, askatari a ika nāmāri tsōa tsāotiroma. Askakimaroko fomākīa tsāotirofo, chai chaxasharakōikē fetsafāfe ikikaxō òisharakōinōfo. ¹⁷ Nāskarifiakī a afara oneyomis chipo xafakīakōi òixikani. Nāskatari a afara fomāyomisfo Niospa xafakīakōi ato faxoxii keyokōichi òinōfo. ¹⁸ Nāskakē nikakōisharakāfe. Akka a ea nikakī finasharakōiāi Niospa tāpimasharakōi. Akka fetsa ē tāpisharakōia ifaxō nikamiskēma, askara yora nā tāpia pishta Niospa anā fiatiro,” ixō Jesús ato yoini.

Jesús òifekani āfe afanō āfe extonō fenifo
(Mt. 12.46-50; Mr. 3.31-35)

¹⁹ Jesús yorafo yoiaino āfe afanō āfe extonō akiki fenifo afe mekapaikani. Akka akiki fotirofoma inifo, yora ichapa fospikōimāiyafono. ²⁰ Nānoa fētsa Jesús yoini: “Mī efanō mī extonō emāiti niafo mia òipaikani.” ²¹ Askafaino Jesús kemani: “Akka nā ēfe Epa Niospa meka nikakōiaifo nāfofi ēfe efafo ita ēfe extofokī,” ixō ato yoini.

Jesús nefe yafi iamāfā poo iki meseniaito nishpa fani
(Mt. 8.23-27; Mr. 4.35-41)

²² Pena fetsa Jesús kanōanāfānē naneinīkafā aōxō tāpimisfo yoini: “Nō okiri iamāfā pokefainō fokāfe,” ato faino afe fonifo. ²³ Mā iamāfā pokefainaifono kanōanāfā xaki mēra rakax Jesús oxani. Nāno atoki nēfefakōiyanā iamāfā poo ini. Nāskaino kanōanāfā faka fospikōini mesekōi ini mā kanōanāfā ikikerani. ²⁴ Nāskakē aōxō tāpimisfāfe Jesús mōimifo iskafayanā: “Ifō, mā nō natarameikai, moife,” faifono, Jesús fininākafā nefe yafi iamāfā poo ikaito āfe mekapa nishpa fani. Nāskax anā iamāfā poo inima, sharakōi itani.

²⁵ Askafaino aōxō tāpimisfo yoini: “¿Afeskai mā rateimē? ¿Mā ea chanīmara faimamē?” ato faino, akka aōxō tāpimisfo rateyanā āa ranā yoinānifo iskakani: “¡Kee! ¿Na feronāfake afe keskaramē na nefe feta iamāfānē ato yoiāito nikaifo?” ikanax yoinānifo.

Gadara anoxō Jesūs feronāfake makinōa niafaka rasi potani
(Mt. 8.28-34; Mr. 5.1-20)

²⁶ Nāskata Gadara mai ano nokonifo, nā ĩamāfā Galilea okiri. ²⁷ Mā nokoax Jesūs kanōanāfā makinōax fotopakekafanaino, pexe rasi makinōax feronāfake niafaka yōshi chaka nanea akiki oni. Rapati safekatsaxakima. Pexe mērari ikatsaxakima. Akka nā maiafo mafa kini mēra ano ika ini. ²⁸ Nāskakē Jesūs fichita a nāmā ratokonō mai chachipakefōfā fāsikōi fiisiyanā yoini: “ĵEa afeska fayamafe, Jesūs! Mī Nios Sharapa Fakeki ē mia yoi mī ea omiskōimayamafe,” fani. ²⁹ Nāskafakī yoini māmāi Jesūs a makinōa niafaka yōshi chaka potaino, mēxotaimamāi a mēra niafaka yōshi chaka nanemisno. Nāskaito yorafāfe kaninānā metexkere ata otxekere axō kexefiafono, nāfo tesaketsafaini ichopaoni. Nāskakē niafaka yōshi chakata nā feronāfake tsōa istoma ano iyopaoni.

³⁰ Nāskaito Jesūs yōkani: “ĵMī afe anemē?” faito, nāato kemani: “Ēfe ane Legiōn,” fani, a mēramāi niafaka yōshi chaka ichapa nanekē. ³¹ Nāskaxō niafaka yōshi chakafāfe Jesūs yoinifo: “A omiskōipakenakafo kinifā mēra noko potayamafe,” fanifo.

³² Akka nāno māchi keya anoxō kochifāfe pinifo. Nāskakē niafaka yōshi chakafāfe Jesūs yoikakī iskafanifo: “Noko kochifo mēra nīchife,” faifono Jesūs kochifo mēra ato nīchini. ³³ Nāskakē niafaka yōshi chakafo feronāfake makinōax tsekefaini kochifo mēra iki fetseni. Kochifāfe pifiai ĩamāfā mēra keyopakei fetseax āsai fetseni, keyokōi.

³⁴ Askaito ōikani a kochifo kexeafo ichoi fetsenifo, a pexe rasi ano ato chanifai fokani. Askatari a pexe rasi pasotai ikafori ato chanifanifo. ³⁵ Askaito nikakani yōrafā rasi fenifo kochifā rasi āsaito ōifekani. Nokokaxō ōiafo Jesūs nāmā a feronāfake niafaka yōshi chaka nanea tsaōa ini, mā a makinōa Jesūs niafaka yōshi chakafo pōtano. Rapati safeta mā shināsharakōia ini. Nāskakē yorafo ratei fetsenifo. ³⁶ Nā feronāfake makinōa Jesūs niafaka yōshi chaka potaito, ōiafāfe ato yoinifo afeska sharamākī a feronāfake niafaka yōshi chaka nanea. ³⁷ Keyokōi yorafāfe nā Gerasa anoafāfe nikakaxō ratekōiyanā. “Nonoax katāfe,” faifono, Jesūs kanōanāfā mēra naneinākanafanax kani. ³⁸ Nā feronāfake a makinōax niafaka yōshi chakafo tsekeato, “Ēri mefe kapai,” faito, akka Jesūs, “Mī efe katiroma. Nono mī nētetiro. ³⁹ Akka mī pexe ano kaxō a mia Niospa axōa keskara yorafo yoifotāfe,” fani.

Nāskafaino nā feronāfake kaxō nā pexe rasi anoafō ato yoifofāsafani nā Jesūs axōa keskara.

Jairo fake xotofake mā nakē Jesūs otofani. Askatari kēromāri Jesūs rapati mēeax sharani
(Mt. 9.18-26; Mr. 5.21-43)

⁴⁰ Nāskafaferani Jesūs anā oni ĩamāfā pokeferani. Jesūs nokoaito fichikaxō akiki ini-makōiyanā yorafāfe ifinifo keyokōichimāi manakakī. ⁴¹ Akka nāno feronāfake āfe ane Jairo akiki nokoni. Nā Jairo Niospa meka yoimis xanifo ipaoni nā judeofāfe ichanāti pexe sināgoga anoax. Nā Jairo Jesūs nāmā ratokonō mai chachipakefōfā fāsikōi yoini āfe pexe ano kanō, ⁴² āfe fake xotofake napaiyaino. Akka nā Jairo fake xotofake fisti ini, doce xinia aka. Nā xotofake mā nakerakōini. Jesūs Jairo fe kakī meea yorafāfe shoiakī fetsafo meeni afe fokakī.

⁴³ Nānori kēro ato fe kani. Na kēro imi nesekima, doce xinia amis. Notoro kopifakī āfe kori keyotiani. Tsoa pīshta sharafatiroma ini. ⁴⁴ Nā kēromā aa kachikiri kaxō āfe tari kexa Jesūs ramākani. Tari kexa ramākaino koshikōi āfe imi nesetani. ⁴⁵ Nāskakē Jesūs ato yōkani: “ĵTsōa ea ramāmē?” ato faito, keyokōichi yoinifo: “Nō mia ramāma,” fanifo. Ato askafaito Pedro yoini: “Īfo, yorafāfe mia shoiakī fetsakaxō mia pitskinafo,” faito, ⁴⁶ afianā Jesūs ato yoini: “Fatora mā fētsa ea ramā. Akka mē tāpia fatora fetsa ēfe sharaōnoax mā shara,” ixō ato yoiaino, ⁴⁷ nikai nā kēro ratekōini. “ĵMā ea tāpiaromē?” ikax ratekōiyanā Jesūs ano kaxō ratokonō mai chachipakefōfā yoini yorafāfe ferotaiifi nāatomāi āfe tari kexa ramākaxō. “Ē mia tari kexa ramākata mē shara,” ixō yoini.

⁴⁸ Askafaito Jesūs yoini: “Yōxashta, mā mī shara mīmāi ea chanīmara faax. Nāskakē tanaima kasharatāfe,” fani.

⁴⁹ Jesūs nā kēro yoiaino, yora fistichi oxō Jairo yoini: “Mā mī fake xotofake naaki. Anā nōko Īfo fekaxtefayamafe,” faito, ⁵⁰ nikakī Jesūs yoini: “Ratekima. Ea chanīmara fāfe mī fake naamakī otoi kiki,” fani.

⁵¹ Mā pexe ano nokoxō, tsoa Jesūs ikikinima. Akka Pedro kaino Santiago kaino Juan kaino inifo nā fāke apa fe fokani, nā fāke afari ato fe kani. ⁵² Pexe mēra ikifaikaxō ōiafo keyokōi oiakani fiisinifo shinākani nā fake xotofake mā naano. Akka Jesūs ato yoini: “Oiyamakāfe. Na fake xotofake naamakī oxaki,” ato faino, ⁵³ keyokōichi ōsaketsanifo, tāpifikaxō nā fake xotofake mā nafiano. ⁵⁴ Nāskaxō Jesūs mēkemā mētsoinifōfā fāsikōi yoini: “Xotofakeshta, fininākafe,” faino, ⁵⁵ mā otoax nā xotofake koshikōi fininākafani. Nāskaxō ato yoini nā xotofake pimanōfo. ⁵⁶ Nāskakē apa fe afa ratekōinifo. “ĵKeel! ĵAfeskaō otoamē?” ikanax inimakōiyanā. Nāskaifono ato yoini: “Tsoa yoiyamakāfe nā mātō fake xotofake nakē mē otoaki,” ixō ato yoini.

9

Jesús aõxõ täpimisfo níchini Nios Xanifoõnoa ato yoitanõfo
(Mt. 10.5-15; Mr. 6.7-13)

¹ Jesús aõxõ täpimisfo doce ichanãfani. Nãskaxõ ato yoini iskafakî: “Èfe sharaõxõ ato makinoa niafaka fetsa fetsatapafõ põtatakãfe, a isinî ikaifo ato sharafayanã. ² Askatari Nios xanifoõnoa ato yoitakãfe, a isinî ikaifori ato sharafayanã. ³ Afaa mã fokiki, mãto mēstetiri mã fokiki, mãto pishari mã fokiki, a mã piikairi mã fokiki, koriri mã fokiki, rapati fetsari mã fokiki. ⁴ Akka nã mã ðiai pexe fetsa anoxõ mato ifiaifono, nãno iyokani, nã mã anoax kaitĩa. ⁵ Akka fatora pexe rasi anoxõ mato ifikaspafono, anoax tsekekaikî mãto taekinoa mã mapo taa taa atiro ato õimaxiki. Mã askafaino täpitirofo Nios atoki inimayamaino,” ixõ Jesús ato yoini. ⁶ Nãskata Jesúsõ täpimisfo fonifo, pexe fetsafo mēra ato yoifokani. Fokaxõ ato yoisharakõinifo. Nios nikasharakõikãfe ato fayana a isinî ikaifo ato sharafanifo.

Juan Maotista nani
(Mt. 14.1-12; Mr. 6.14-29)

⁷ Xanifo Herodes nikani Jesúsnoa yoiaifono afama mīshti akaito. ¿Tsoamē a feronãfake? ixõ shinãni. Akka yoinifo: “Mã Juan afianã mã otoa,” fanifo. ⁸ Fetsafãferi yoinifo: “Nã ato Niospa meka yoipaonikĩa Elias,” fanifo. Fetsafãferi yoinifo: “Nã nõko xinifo ato Niospa meka yoipaonikĩa afianã mã otoa,” ixõ yoinifo. ⁹ Askafaifono Herodes ato yoini: “Maa, akai Juanma. Mē Juan ato textemayamea. Akka na nõ nikai tsoamē na aõnoa yoiaifo afama mīshti faito,” ixõ Herodes Jesús õipaikõini.

Jesús cinco mil feronãfakafõ ato pimani
(Mt. 14.13-21; Mr. 6.30-44; Jn. 6.1-14)

¹⁰ Nã Jesúsnoa yoimisfãfe mã fēkaxõ yoitoshinifo a atanaifo keskara. Askafaifãfe nikakî ato tiis iyoni, pexe rasi ãfe ane Betsaida chaima tsõa istoma ano. ¹¹ Akka mã yorafãfe täpikanax Jesús kaino, nãskakē chifafainifo. Akiki foafono Jesús ato ifini. Apa Nios xanifoõnoa ato yoiyanã a isinî ikaifori ato sharafapani.

¹² Mã yãtapakeaino, aõxõ täpimisfo doce akiki fēkaxõ yoinifo: “Yorafo níchife fokaxõ tenetanõfo a piaifo fenayanã fonãikani kiki, pexe rasi ano fokãta a chaima ikafo anori fotanõfo. Akka nono afaamaki,” faifono, ¹³ Jesús ato yoini: “Ato pimakãfe,” ato faito kemanifo: “Nõko pãa cinco pishta foe raferi,” fanifo. “Akka, ¿mî shinãimē na yorafo pimaxiki a piaifo nõ ato fixotanõ?” ixõ yoinifo. ¹⁴ Akka nãno cinco mil feronãfakafõ inifo. Akka Jesús aõxõ täpimisfo yoini: “Cincuenta faxõ ato tsãoketsakãfe,” ato fani.

¹⁵ Ato askafaifono keyokõ: tsaõi fetsenifo. ¹⁶ Askata Jesús cinco pãa tsoamainifõfãni foe rafeya. Nãskaxõ nai fõisnifõfã Apa Nios kĩfini iskafakî: “Aicho Epa, mĩoxõ ãto pimai. Mĩ sharakõi,” fata, pãa kaxketa foe rafeya osixõ aõxõ täpimisfo inãni a yorafo ato inãketsanõfo. ¹⁷ Nãskakē yorafãfe pikanax mãyakõinifo. Akka nã chete faafo doce fēta fõspini.

“Mĩ Cristo mia Niospa ifini nokoki níchixii mĩ nõko xanifo finakõia inõ,” ixõ Pedro Jesús yoini
(Mt. 16.13-19; Mr. 8.27-29)

¹⁸ Pena fetsa Jesús Apa Nios arese kĩfini. Akka aõxõ täpimisfo afe inifo. Nãskaxõ ato yõkani: “¿Yorafo afaa ikanimē ã tsoamãki?” ixõ ãto yõkani.

¹⁹ Ato askafaito kemanifo iskafakakî: “Fetsafãfe Juan Maotistara, mia fakani. Fetsafãferi Elíasra mia fakani. Fetsafãferi mia iskafakani: ‘Nã nõko xinifo ato Niospa meka yoipaonikĩa mã otoa,’ mia fakani,” aõxõ täpimisfãfe fanifo. ²⁰ “Akka mã, ¿ea tsoara faimē?” ixõ ato yõkani. Ato askafaito Pedro kemani iskafakî: “Mĩ Cristo nã Niospa mia níchini mĩ nõko Xanifo finakõia inõ,” fani.

“Chipõ ea retexikani,” Jesús ato fani
(Mt. 16.20-28; Mr. 8.30-9.1)

²¹ Nãskata Jesús aõxõ täpimisfo yoini: “Tsoa yoiyamakãfe ãfi Cristoki,” ato fani. ²² Nãskata aõxõ täpimisfo yoini iskafakî: “È chipõ omiskõifinakõixii. Askatari ea õikaspakakî ea potaxikani, judeofãfe xanifofo feta a Nios ato kĩfixomis ãto xanifofofãe a Moisés yoikî kirika keneni keskara ato täpimamisfãferi. Askatari ea retexikani. Ea retefiafono, tres nia oxata ã anã otõxii,” ato fani.

²³ Nãskata keyokõ ato yoini iskafakî: “Fatora fetsa ãfe inakõi ipaikî ãakõi apaiyai keskara anã atiroma. Nã ã yoiai keskara nikakõitiro. Pena tii iskatiro, ea Ifofapai: ‘Èfe Ifoxõ ea retefiaifono ãkai ãfe Ifo ã potanakama,’ ixõ shinãtiro. ²⁴ Akka fētsa ãa shinãtiro iskakî: ‘È Nios Ifofaito ea retetirofo. Nãskakē ã Nios Ifofaima,’ ixõ shinãtiro mesekî. Askara yora naax ãfe Epa ano katiroma. Akka nã ea Ifofaa, eõxõ reteafono ã ifixii efe ipaxanõ eamã Ifofamiskē. ²⁵ Askatari fatora fetsa nõko mai anoax afara ichapayakõi ikatsaxakî mã naax aya katiroma. Ea Ifofayamax koriya ifiakatsaxakî Epa Nios ano katiroma. Akka afama

mšhtifoya iyopaofinixakī nā omiskōipakenakafo mēra kaax anā aya itiroma. Āfe afarafori Nios inātiroma afe ipaxakī. ²⁶ Akka fatora fetsa eō rāfikī ēfe meka sharari yoikaspaito, ēri aō rāfikōixii ē yoikī iskafaxii: ‘Ē na yora ōimisma,’ ē faxii. Ēfe sharafoya mē oax ēfe Epa sharafoyari ē oxii, ēfe ājiri sharafori efe fotopakefōfāxikani. ²⁷ Ē mato pārāima, fatora mā fetsa nayoxoma nono efe iyoxō ēfe Epa xanifo finakōia mā ōiyoxii,” ixō Jesūs ato yoini.

Jesūs āfe femānā fetsa keskara ini, fafekōini. Āfe rapatiri oxokōi ini
(Mt. 17.1-8; Mr. 9.2-8)

²⁸ Askata ocho nia mā finōano ato yoikī keyota, Jesūs māchi keya māpefaini arixō Apa Nios kīfikai. Āfe ina tres iyoni. Santiago iyota Juan iyota Pedro iyota ato fani. ²⁹ Apa Nios kīfiaino, āfe femānā fetsa keskara itani. Āfe rapati oxokōi ini fafekōiyanā. ³⁰ Akka nāno feronāfāke rafe akiki nokokanax afe mekanifo. Mā nafianixakī Moisés fe Eliás inifo. ³¹ Nā rafeta chaxapakefōfānifo. Mā fotokanax Jesūs fe ketaxamei nikaxō yoinifo nā Jerusalén anoax Jesūs omiskōixiai reteafono. ³² Nāskata Pedronō Santiagonō Juannō oxapaifikakī oxatenekōinifo. Jesūs fafekōiaito ōinifo nā feronāfake raferi ōinifo Jesūs fe niafāfe. ³³ Mā Moisés fe Eliás Jesūs makinoax foaifono, Pedro yoini: “Ifo, sharakōi ano nō oa. Nono nō tapas fanō, tres fakī. Mia fetsafaxota Moisés fetsafaxota Eliás fetsafaxota nō fanō,” fani. Akka Pedro tāpinima a yoiai keskara shināfenokōini. ³⁴ Pedro mekai askaino ato kōinī maipakefōfāni. Ato kōinī maipakefōfānaito ōikani ratekōinifo. ³⁵ Nā kōi mēranoax mekai iskaito nikanifo: “Nafi ēfe Fakekōikī ē aō noikōi. Nāskakē nikasharakōikāfe,” ixō yoiaito nikanifo. ³⁶ Mā mekai askai nishpatanaino, Jesūs ares nikē ōinifo. Akka tsoa yoitama ares fisti āto ōiti mēraxō shinānifo. Nāskaxō tsoa yoinifoma nā ōiafo keskara.

Jesūs feronāfake naetapa niafaka chaka pōtaxoni
(Mt. 17.14-21; Mr. 9.14-29)

³⁷ Pena fetsa māchi keya ariax mā Jesūs aōxō tāpimisfo fe fotoano, yōrafā rasi akiki fenifo ōipaikani. ³⁸ Nānoxō yōrafā rasi mēraxō yora fistichi fāsikōi Jesūs yoini: “Ifo, ēfe fake ea ōixoniope. Nā fisti ēfe fakeki. ³⁹ Niafaka chaka a mēra nanexō, fāsikōi fiisimamiski, mesta mesta imayanā āfe axfapari fākoax potamamiski. Chakakōi famis a makinoax tsekeaspayanā. ⁴⁰ Akka mī inafō mē yoia ēfe fake makinoa niafaka yōshi chaka potakāfe ē ato fafiaino akka tsōa atiroma,” fani.

⁴¹ Askafaino Jesūs kemani: “jōoa! Mākai ea tāpisharama. Mā afara shināmis. Akka afetiakai ē matoki onima. Āfetiakai mā ea tāpimē?” Jesūs ato fani. Nāskaxō yoini: “Niri mī fake ea efexōfe,” Jesūs apa fani. ⁴² Nāskata āpa Jesūs ano efeaino, nā fake niafaka fia kekēfōfā anā nāmā potani, anā ea ea imapaikī. Akka Jesūs fāsi mekainānkāfā iskafani: “Niafaka mī chaka chakakōikī, nā feronāfake makinoax tsekekaitāfe,” fani. Nāskax nā feronāfake sharakōi itani. Nāskaxō apa ināni. “Nakīa mī fake,” fani.

⁴³ Askafaito ōikani āa ranā yoinānifo: “Airā, Niospa afama mīshti atiro,” ikanax āa ranā yoinānifo.

Anā Jesūs ato yoini: “Chipo ea retexikani,” ixō
(Mt. 17.22-23; Mr. 9.30-32)

Jesūs nā feronāfake sharafaito ōikaxō shināifono, Jesūs aōxō tāpimisfo yoini, ⁴⁴ “Ē mato yoiaito nikakōisharakāfe, shināmakikākīma. Fetsafāfe ea ato achimaxikani kiki,” ixō ato yoini. ⁴⁵ Akka tsōa tāpinima a ato yoiai keskara Niospamāi ato shinā mēraxō ato shinātima faino. Nāskai ranonifo Jesūs yōkapaikani ato xafakīa yoipanā.

“Akka, ĵtsoakaimē sharafinakōia?” inifo
(Mt. 18.1-5; Mr. 9.33-37)

⁴⁶ Nāskata chipo aōxō tāpimisfo āa ranā feratenānifo, “Akka, ĵfato nō fetsa sharafinakōimē?” ikanax. ⁴⁷ Nāskaxō a aōxō tāpimisfāfe shināifo keskara mā Jesūs tāpixō fake yome ifixō chishtoinīfōfāni. ⁴⁸ Nāskata aōxō tāpimisfo yoini: “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai. Akka fatora mā fetsa āto ina keskaraxō mā yorāfo shara faa, nāfi sharafinakōiakī,” ixō Jesūs ato yoini.

Fētsa noko noikaspatama noko sharafai
(Mr. 9.38-40)

⁴⁹ Ato askafaito Juan yoini: “Ifo, mā nō ōia oa feronāfake fistichi mī aneōxō niafaka chaka potaito. Nāskakē, ‘Askafayamafe,’ nō faa. ‘Mī nofe rafemismakī mī niafaka chaka yorāfo makinoa potatiroma,’ ixō nō yoia,” fani.

⁵⁰ Askafaito Jesūs kemani: “Askafayamakāfe, noko chakafatama, noko sharafai askara sharaki,” fani.

Jesūs Santiago yafi Juan mekatima fani

⁵¹ Mā chaima Jesús Apa Nios ari nai mēra kaino tsōakai nētefatiroma ini māmāi tāpikē a Jerusalén anoax noko nāxoxiai Apa Niospa yoiyoni keskai. ⁵² Nāskaxō fetsafo rekē nīchini, mā fokaxō pexe rasi Samāria anoxō itipinīsharafaxonōfo a nokoikai anoxō. ⁵³ Akka samāritanōfāfe ato ifikaspanifo, māmāi tāpikaxō Jerusalén anoamāi foaifono. ⁵⁴ Ato askafaiāfe a aōxō tāpimisfo rafeta Santiago feta Juan ōinifo. Nāskaxō yoinifo: “Ifo, mī noko yoife nō atoōxō Epa Nios kīfinō na pexe rasi anoafō nai mēranoax chii pakēki ato kooakī mitonō,” ixō yoinifo. ⁵⁵ Akka Jesús anā ato yoini: “Anori shināyamakāfe. Mā shināi keskara ē shināimakai,” ixō ato yoini. ⁵⁶ Askafata pexe rasi fetsa ari fonifo.

A afe fopaimisfoōnoa Jesús ato yoini
(Mt. 8.19-22)

⁵⁷ Fāi foaifono feronāfake fistichi Jesús yoini iskafakī: “Ifo, ēri mefe kapai nā mī kai ari ēri mefe kafāsaxiki,” faito, ⁵⁸ Jesús kemani iskafakī: “Maxoteneroa kiniya, peyafori naayafo. Akka ēkai pezeyama,” fani. ⁵⁹ Nāskaxō Jesús anā feronāfake fetsa yoini: “Efe kafe,” faito, akka nāto kemani iskafakī: “Ifo, ea manayofe ēfe epa naito ē maifayotanō,” faito, ⁶⁰ Jesús kemani: “Askakima ea Ifofafe. Akka nā ea Ifofaafāfema yora nakē maifatirofo. Akka mī efe koofe ēfe Epa Nios xanifoōnoa ato yoifofāsafaxiki,” fani. ⁶¹ Akka anā fētsari yoini iskafakī: “Ifo, ē mefe kapai, akka ea manayofe ēfe pexe ano kaxō ē ato yoisharayotanō,” faito, ⁶² Jesús kemani iskafakī: “Akka fētsa ea yonosharaxofiakī a apaoni keskara anā aki, askara yorakai itipinīsharama. Nāskakē ēfe Epa Nios xanifo ano katiroma,” ixō Jesús yoini.

10

Jesús setenta y dos yorafo nīchini pexe rasi ano fotanōfo

¹ Nāskata Jesús anā setenta y dos yorafo katoni. Nāskaxō rafe rasi faxō ato nīchini nā pexe rasifo mēra fanīma mīshti fotanōfo chipo akairi atoki kaxiki. ² Nāskaxō ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo. ³ Akka mā fotakāfe, ē mato nīchikai yora chakafo mēra nāfāfe mato chakafapaikani. Oa chaxo poomānā pipaitiro keskafakī, matori askafapaikani eōnoax mā isharaifiakē yora chakafāfe mato chakafapaikani. ⁴ Ato mēra kakī mato forosa foyamakāfe, mato koriri foyamakāfe, mato sapatori foyamakāfe. Fokākī yorafo finōfāikakī nēteax ato fe mekakākīma. ⁵ Pexe fetsa mēra ikixō taefakī ato yoisharakāfe iskafakī: ‘Niospa mato sharafanō mā isharakōinō; ixō ato yoikāfe. ⁶ Akka nā pexe mēra ika fetsa isharakōikē nā Niospa shara fakōini. Akka a mā ato yoiāi keskara nikakaspaiyono Niospa ato inimamaima. Nāskakē fenokani. Akka mā ato yoiāi keskarakōinoax mā afaa fenoima. Epa Niospa mato sharafakōini. ⁷ Nāskata pexe rasi mēra nokoax pexe fetsa mēra oxayamakāfe. Nā mā nokoax anoxō mato pimayanā mato ayamanaifono pikāfe. Akka Niosxō yonomisfo nā afara yopaifo ato inātirofo. Nāskakē pexe fetsafo mēra iki foa foayamakāfe. ⁸ Mā nokoaito pexe rasi anoxō mato ifiyanā mato pimaifono pikāfe. ⁹ Nānoxō a isinī ikaifo eōxō ato sharafakāfe, iskafakī yoivanā: ‘Epa Nios xanifo finakōi afe yorafo ikixiki mā chaimashta oi,’ ixō ato yoikāfe. ¹⁰ Akka pexe rasi ano mā mā nokoano anoxō mato ifikaspaifono, anoax tsekekākīki ato iskafakāfe: ¹¹ ‘Nā mato pexe rasi anoax nōko tae ano mapo neano, nō taa taa akano anā nōko neima. Nāskarifiakī mā noko nikakaspaino mato chaka nōko neima, mato nei. Akka shināsharakāfe Nios xanifo mato Ifo ipai mā chaimashta matoki oi kiki,’ ixō ato yoikāfe. ¹² Akka ē mato yoi, nā omiskōiai nokoaitīa, na pexe rasi ano ato omiskōimaniyoi nā Sodoma anoafō ani keskafakī finōmainifōfā ato omiskōimakī finakōiyoi,’ ixō Jesús ato yoini.

Pexe rasi anoxō Jesús nikakaspaino
(Mt. 11.20-24)

¹³ Anā Jesús ato yoini iskafakī: “¡Ooa! Corazin anoafāfe Betsaida anoafō fe mā omiskōifinakōixii. Akka Tiro anoxō Sidón anoxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘¡Ooa! Nō afara chakafamiskī iskaratīa nō anā Nios Ifofai,’ iyanā rāfikaxō āto rapatī chapo safekaxō chii māpo raish akerafō fetsafāfe ato ōinōfo. ¹⁴ Akka Niospa Tiro anoafō yafi Sidón anoafōri ato omiskōimafiakī ato omiskōimasharaima, akka matoroko omiskōimakī finakōixii. ¹⁵ Akka, ¿nō Capernaum anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii,” ixō Jesús ato yoini.

¹⁶ Nāskata Jesús anā aōxō tāpimisfo yoini: “Nā mato nikaiāfāfe, eari nikasharakani. Akka nā mato nikakaspaiāfe, eari nikakaspakani. Nā ea nikakaspaiāfāfe nā ea nīchiniri ēfe Epari nikakaspakani,” ixō Jesús ato yoini.

Anā fenifo setenta y dos feronāfakefo Jesús ato nīchitano

¹⁷Nā setenta y dos feronāfakefo anā fenifo, inimakōiyanā. Mā fēkaxō iskafakī yoinifo: “Ifo, niafaka chakafāfe noko nika mī aneōxō yorafo makinoa nō notaino,” faifono, ¹⁸Jesús ato kemani: “Ēje, mē ōia Satanás nai mēranoax pakeaito oa kana piishikai keskara. ¹⁹Ē mato ēfe shara inā, ēfe sharaōnoax mā kaito rono feta nīfo mato chachiyamanō. Nāskaxō nā noko noikspamis Satanás chaka mā finōkōinō, mato afeskafanōma. ²⁰Akka inimayamakāfe niafaka yōshi chaka potax. Akka mā nai mēraxō Epa Niospa māto anefo āfe kirikaki keneaki, nā sharafinakōia,” ixō Jesús ato yoini.

*“Ekeki fekāfe ē mato shināmasharanō,” ixō Jesús ato yoini
(Mt. 11.25-27)*

²¹Ato askafata, Jesús Apa Yōshi Sharaōnoax inimakōikī yoini iskafakī: “Epa Niosi, keyokōi nai mēranoafoya nono mai anofo mī āto Ifo. Mī sharafinakōia. Akka atirifāfe kirika kene tāpifikaxō mia Ifo fakaxoma. Iskafakī shināmisfo: ‘Tsoa fetsakai ea tāpikōia. Nāskarifiakī tsōa nō tāpikōia,’ ixō shināmisfo. Akka nāfo mī meka mī ato tāpimani. Akka nā kirika kene tāpikaxoma mia Ifofaifono nāfo mī meka shara mī ato tāpimani, nā mī fichipaiyai keskafakī. Nāskakē ē mia aicho fai,” ixō yoini. ²²“Ēfe Epa Niospa a tāpia keskara eari keyokōi tāpimani ēmāi āfe Fakekē. Akka tsōakai ea tāpia, ēfe Epa fisticchi ea tāpikōia. Nāskarifiakī tsōa ēfe Epa tāpia, akka eres fisti ē tāpia. Akka nā fetsafori ē ato tāpimanaino nāfāferi Epa Nios tāpitirofo,” ixō Jesús ato yoini. ²³Anā aōxō tāpimisfoki oxō ato fisti yoini: “Nā mā ōiai keskara ōikanax fetsafori inimakōikani. ²⁴Akka ē mato yoi, Niospa meka yoisiffo feta xanīfofōfāfe nā ē mato yoiyai keskara ōipaifikakī ōipaonifoma. Nā mā nikai keskarari nikapaifikakī nikapaonifoma.”

Meka fetsafaxō samāritanō sharaōnoa Jesús ato yoini

²⁵Feronāfake fisti a Moisés yoikī kirika kene ni keskara ato tāpimamis Jesús fe mekaikai kani. Jesús ea kemaimākai ixō yōkaikai: “Ifo, ¿ē afeskatiromē Nios fe ipaxakī?” ixō yōkaito, ²⁶Jesús kemani: “Akka, ¿a Moisés kene ni ano aneox mī ōimismamē afaa ikamākī?” faito, ²⁷a Moisés kene ni tāpiato kemani iskafakī: “Nōko Ifo Nios noikōikāfe nōko ōitifofoxō nōko yōshi sharafoyaxori nōko kerex sharafoyaxō nōko māpori shināsharakōikāfe, askatari a mia chaima nikari noisharafe a mā mī noimeai keskafakī ixō Moisés kene ni,” faito, ²⁸Jesús kemani: “Mī ea kemasharakōia, mī askafai mī Nios fe ipaxatiro,” ixō Jesús yoini.

²⁹Akka nā Moisés kene ni ato tāpimamisto shināni, mī isharakōimisra ea Jesús fanōra ixō. Nāskaxō Jesús yōkani: “Akka, ¿tsoamē ea chaima nika?” faito, ³⁰Jesús yoini: “Ē mia yoinō mī tāpinō. Feronāfake fisti Jerusalén anoax Jericó ari fāi kaito, yometsofāfe achikaxō rapati fīanifo. Nāskakē seteketsakata nasharakēma fai kesemē rātafainifo. ³¹Nāskano nā ato Nios kifixomisri nā fai fisticchi kani. Akka kakī ōia fai kesemē rakakē ōifikī tanafainima. ³²Nāskano feronāfake fetsa levita arifi okī ōia rakakē ōini, nāatori kakī finōfaini. ³³Akka feronāfake fisti Samāria anoax nā fai fisticchi akairi chipo kakī, mā fichixō aō noikōikī shināōini. ³⁴Nāskata akiki kaxō, a āfe tsefeso ano xini yafi uva ene osixō aō terekai fetsani. Nāskaxō taxta fakī fetsaxō, āfe kamayo kamaki tsoainifofā yoni, pexe mēraxō kexeshiyoni. ³⁵Nāskata pena fetsa nā feronāfake samāritanō āfe kori exe rafe tsekaxō nā pexe ifo kopifani iskafakī yoianā: ‘Na feronāfake ea kexexōfe. Mī kexesharakē ē mia anā kopifaiyoxikai,’ ixō yoini. ³⁶Akka na feronāfake tresnoa ē mia yoipai. Akka, ¿fato aō noikōinimē na feronāfake omiskōiai, a noko chaima nika nō noitiro keskafakī?” ixō yoikaito, ³⁷a Moisés kene ni tāpiato kemani iskafakī: “Nā noikōiaito akiki kaxō sharafani,” ixō yoiaito, Jesús iskafani: “Mīri ato noikī askafafe,” fani.

Marta feta María pexe ano Jesús kani

³⁸Nāskata Jesús fāi kai pexe rasi mēra nokoni, nāno kēro āfe ane Marta ika ini nāato āfe pexe ano ifini. ³⁹Akka nā Marta āfe chiko fisticchi ini, āfe ane María. Nā María Jesús nāmā tsaoni a Jesús yoiai keskara nikakōixikī. ⁴⁰Akka Martakai nikanima. Pīchani Jesús pimapaikī. Nāskakē Jesúski kaxō yoini: “Ifo, ¿ea mā shināimamē eres fisti ē pīchai ēfe chikokai efeta akima? Ea yoixōfe efeta anō,” faito, ⁴¹akka Jesús kemani: “Marta, mī fekaxtei afafo shināi. ⁴²Akka nā sharafinakōia María nikakōisharai. Nāskakē ēfe meka shara nikaito tsōa xītitiroma,” ixō Jesús yoini.

11

*“Epa Nios kīfikī iskafakāfe,” ixō Jesús ato yoini
(Mt. 6.9-15; 7.7-11)*

¹Pena fetsa Jesús Apa Nios kīfīni. Mā kīfikī xateano aōxō tāpimis fisticchi yōkani: “Ifo, afeskaxō Epa Nios nō kīfītiromakī noko tāpimafe, Juan aōxō tāpimisfo tāpimani keskafakī,” faito,

²Jesús yoini: “Akka mā kīfikī iskafatiro:

Epa Niosi, mī fisti sharafinākōia. Keyokōichi mia Ifofanōfo mī āto xanīfo finakōia inō ato ikisharakōipakexakī. ³ Nā pena tii a nō piāi noko ināfafāife nō afaa yopayamanō. ⁴ A noko chakafaifo nō ato raefa keskafakī nōko chakari noko soaxōfe. Satanās noko afara chakafamapaifaito nokoki kematimafafe, ixō kīfikāfe,” Jesūs ato fani.

⁵ Nāskafata anā Jesūs ato yoini: “Ōitsai, fatora mā fetsa mā yamayano, mato yama yame-nakē kafanano mātō pexe ano kaxō mātō yoikī iskafaino: ‘Yamā, tres faxō ea yoa ināpe. ⁶ Mā ēfe yama rama noi kiki chai inoax ēfe pexe ano, ē afaayamaki afaa ē pimatiroமாகী,’ ixō mātō yōkaito, ⁷ kemakī mātō pexe mēraxō mā iskafatiroma: ‘Ea fekaxtefayamafe. Ēfe pexe fepoti fetaoxikakī ēfe fakefo fe ē oxaki. Finixō ē mia afaa inātiroma,’ ixō mā yoitiroma. ⁸ Ē mātō yoi, fininākafā afara āfe yama ināskaspakī inātiroma fekaxtefaito nā fichipaiyai tii.

⁹ “Nāskakē ē mātō yoi, afara fichipakī Epa Nios yōkakāfe mātō ināi kiki. Fena fenakākīma manakāfe nā Epa Niospa mātō ināitīa. Nāskakē Epa Nios kīfifāikāfe mā kīfifaito mātō ināi kiki. ¹⁰ Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfifaito ināsharakōixii.

¹¹ “Akka, ħfatora fētsa mā āto epaxō mātō fakefo mā rono ato inātiromē mātō foe yōkaito? Maa. Mākai mātō fake mā askafatiroma. ¹² Mātō fake mātō takaranā too yōkaito, ħnifo mā inātiromē? Maa. Mākai mātō fake mā askafatiroma. ¹³ Akka, mā chakafixō mātō fakefo kexesharaxō afara sharafo mā ato inātiroma. Nāskarifiakī Epa Nios nai mēra ikato āfe Yōshi Shara mātō ināsharakōixii mā yōkaito,” Jesūs ato fani.

*Yora fetsafāfe, “Jesūs niafakāōxō ato sharafaira,” fanifo
(Mt. 12.22-30; Mr. 3.20-27)*

¹⁴ Nāskata Jesūs niafaka yōshi chaka potani feronāfake makinoa mekamamismano. Mā a makinoax niafaka tsekeano, nā mekamisma mekainīkafani. Mā mekaito ōikani, “jKeel Ōikapo, mā mekai,” yorafo iki fetsenifo. ¹⁵ Akka atirifāfe yoinifo iskafakakī: “Na Jesūs nā niafaka chakafāfe āto xanīfoōxō nā Beelzebúxō* ato makinoa niafaka yōshi chakafo potai,” ikanax yoinānifo.

¹⁶ Fetsafāferi chakafamapai kakī yoinifo iskafakakī: “Nios feta nai mēraxō afara fetsafo noko ōimafe,” faifono, ¹⁷ akka Jesūs tāpini a shināifo keskara. Nāskaxō ato yoini: “Keyokōi mai tio anoax āa ranā retenākani keyotirofo. Nāskarifiāi pexe fisti mēra ikanax āa ranā noikaspa faatanākani paxkanātirofo anā ano fistikai tsoa itiroma. ¹⁸ Nāskarifiakī Satanās āfe yōshi chakafo potaxō anā afaa afeskafatiroma. Akka āfe yono keyoano anā āfe yōshi chaka afe itiroma. Nā ē mātō yoi, akka mā yoikī iskafai: ‘Satanās yōshi chakāōxō niafaka potai,’ mā ea fai. ¹⁹ Akka askafiano, akka, ħtsōa āfe shara mātō ināfo ināno niafaka chakafo potamisomē? Nāskakē atoōxō mā tāpitiro akka mā eōnoa shināsharamisma. Akka Niosxō mātō ināfāfe niafaka potamisfo. ²⁰ Akka ē niafaka yōshi chakafo potatiro Niospa Yōshi Sharaōxō ato makinoa. Nāskakē mā tāpitiro a Niospa atokī nīchiai mā nokoano. Nāskakē yorafāfe ea Ifofasharakōixikani.

²¹ “Akka feronāfake mitsisipakōichi marayaxō āfe pexe kexekōiano tsōa āfe afaa fiatiroma. ²² Akka fetsa nā mitsisipa finakōia oxō achixō metexkere axō āfe afarafo fiaitokai anā afeskafatiroma. Nāskax paxkanāi fetsetirofo.

²³ “Akka fetsa efe rafekaspakī ea chakafai. Nāskakē nāfāfe fetsafo ea Ifofamakaspakani ato paxkanā fakani Epa Nios Ifofayamanōfo,” ixō Jesūs ato yoini.

*Anā niafaka chaka yoraki nanetiro
(Mt. 12.43-45)*

²⁴ Anā Jesūs ato yoini iskafakī: “Ē mātō yoinō mā tāpinō. Niafaka chaka feronāfake makinoax tsekeax tsōa istoma ano kafāsatiroma anoxō tenepai. Akka anoxō tsoa fichiamax niafaka chakata anā shinātiroma iskakī: ‘A ē anoax tsekeita ano anā kapa,’ ixō shinātiroma. ²⁵ Mā kaxō ōia nā feronāfake nā pexe xaki mēra mātsomea keskara sharakōi ōitiro itipinīsharakōia. ²⁶ Nāskakē nā niafaka afe niafaka siete efetiro nā chakafinakōiafo, nāfo nā feronāfake mēra iki fetsenō. Nāskakē nā feronāfake chakafinakōia itiro a iyopao ni keskarama.”

Niospa meka nikakani inimasharakōitirofo

²⁷ Nāskata Jesūs anori ato yoiaino kēro fistichi yorafā rasi mēraxō fāsikōi yoini iskafakī: “Mī efa mikiki inimakōi mia fake fixō mī yome pishtakē mia chocho amayanāmāi mia pexkoax,” ixō fāsikōi yoiaino, ²⁸ Jesūs kemani: “Akka nā Niospa meka nikasharakōiai nāfi inimai finasharakōi kiki,” ato fani.

* 11:15 Satanās āfe ane fetsa Beelzebú.

Yora chakafāfe Jesús yōkanifo: “Tsōa atiroma keskara noko ispafe nō mia chanīmara fanō,” ixō yōkanifo

(Mt. 12.38-42; Mr. 8.12)

²⁹ Yorafā rasi Jesúski feafono anā ato yoini iskafakī: “Na keyokōi yorafo chakakōifo. Tsōa atiroma keskafakī ē afara afeskarafanō ōipaikani ea Niospa nīchiamākī tāpīxikakī. Akka a keskara ōipaifikakī ōikanima. Nā Jonás ini keskara fisti ōixikani. ³⁰ Akka Epa Niospa Jonás Nínive pexe rasi ano nīchini āfe meka shara ato tāpīmatanō Epa Nios Ifofanōfo mā āto chaka xatekaxō. Nāskarifiakī Epa Niospa ea nīchia na yorafā rasi āfe meka shara ē ato tāpīmanō. ³¹ ¿Mā shināimamē nā kēro xanīfo chai inoax kani Salomón tāpīsharakōiano nikaikai? Akka mā kai ea nikamisma ē Salomón finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofa afe ipanakafomakī, fatofori a omiskōipakenakafo mēra fokanimākai. Nāskaifono nā kēro xanīfo Salomón nikaikai chai inoax kanito mato yoikī iskafaxii: ‘Mā chakakōifo mā Jesús nikakaspamis,’ ixō mato yoixii. ³² ¿Mā shināimamē nā Nínive anoafāfe Jonás Niospa meka ato yoiaito anā Nios nikakōinifo? Akka mā kai ea nikamisma ē Jonás finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofa afe ipanakafomakī, fatofori a omiskōipakenakafo mēra fokanimākai. Nāskaifono nā Nínive ano ipaonifāfe mā āto chaka xatekaxō mato yoikī iskafaxikani: ‘Mā chakakōifo mā Jesús nikakaspamis,’ ixō mato yoixikani,’ Jesús ato fani.

“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini

(Mt. 5.15; 6.22-23)

³³ Anā Jesús ato yoini iskafakī: “Akka tsōa rāpari otaxō tsōa istoma tsāotiroma. Askatari tsōa kesho fepotiroma. Askatamaroko fomākīa tsāotirofo chai chaxasharakōikē a mēra ikiaifāfe ōinōfo. ³⁴ Akka mātō afama mīshitifo noikī mā shināfāfāini. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīa ōisharatiroma. Nāskatari nō isharakōitiro. Akka nōko fero chakakē nō ōisharatiroma, fakishkōi itiro. ³⁵ Akka ōisharakāfe mā Epa Nios shināi xafakīa ifiaxō āfe meka kachikiri faxō mā anā shināsharatiromaki, fakish keskara mā itiro. ³⁶ Akka mā xafakīa isharakōiano, mātō ōiti mēra oa fakish keskara itiro. Mā xafakīa shināsharakōitiro rāpari otaxō mato xafakīa chaxa keskara shara mā itiro,” Jesús ato fani.

Jesús ato yōani fariseofoya a Moisés yoini keskara ato tāpīmamisfo

(Mt. 23.1-36; Mr. 12.38-40; Lc. 20.45-47)

³⁷ Mā Jesús ato yoikī xateano fariseo fistichi iyoni āfe pexe ano pikīxikī. Nāskakē Jesús āfe pexe mēra ikikainax mīsa ano tsaoni. ³⁸ Akka nā fariseo shināni Jesús mechokomeyamaito āto xinifāfe yoipaonifo keskai. Akka taeyoi mechokomepaonifo, chipo pixikakī. ³⁹ Akka nōko Ifāfe Jesús mā tāpīxō yoini askara shināito: “Mā fariseofo mechokomesharafixō, akka mātō shinā mēraxō afara sharafo mā shināima. Yora fetsafo mā noima, afara fetsa fetsatapafo noikī mātō shinā mēraxō afara chakafo mato mēra fospikōia. ⁴⁰ Akka mā anorima shināmis. ¿Mā tāpīmamē tsōa nōko yora femākīa onifata, nōko ōiti mērari onifanimē? ⁴¹ Nāskaxō a yora afaamaisfo afara ato inākāfe. Mā askafakī yorafo mā ōimatiro mātō ōitinī mā Nios shinākī. Nāskax mā isharakōitiro, Nios matoki inimanō. Nāskaxō a Niospa mato amapaiyai keskara mā atiro.

⁴² “¡Ooa, fariseofāfe! Mātō afarafo atiri mā Nios ināmis. Mātō fanafori atiri mā ināmis. Askafixō mā fetsafo mā ato shināmis, askatari mā ato sharafamisma. Askatari mā Nios noikōiama. Akka nā mātō fanafo mā Nios ināmis keskafakī fetsafori noikōikāfe Niosri noikōiyanā.

⁴³ “¡Ooa, fariseofāfe! Ichanāti pexe anoax tsaoti sharakōi ano mā tsaopaimis noko ōisharanōfora ikax. Askatari yorafāfe noko finōkakī noko yoikōisharanōfora ikax.

⁴⁴ “¡Ooa! Māfi nā yora naa keskarafokī. Nā yora maia ano kaxō nō pisi xetetiroma keskarafo mā oke mēra pisifiano. Nāskarifiakī mātō ōiti chakafiano mato ōikakī sharara mato famisfo,” ixō fariseofo Jesús yoini.

⁴⁵ Jesús ato askafaito, a Moisés yoikī kirika keneni keskara ato tāpīmamisto kemani iskafakī: “Maestro, anori mī yoikī nokori mī Ichayanā yoi,” faito, ⁴⁶ akka Jesús yoini: “¡Ooa a Moisés yoikī kirika keneni keskara ato tāpīmamisfāfe! Akka mātō kaifofo yoikī mā iskafamis: ‘Moisés keneni keskara nikakōikāfe,’ ixō mā ato yoifikī akka māri nikasharakōimisma. Askatamaroko a Moisés yoini keskara finōmainīfōfā mā ato yoimis mato nikakanax askanōfo. Nā mā ato yoiai keskara apaifikakī tsōa atiroma. Akka māri mā ato afaa axomisma.

⁴⁷ “¡Ooa! Māfi nā Niospa meka yoimisfo maiafo anoxō mā afarafo onifamiski ato shināxikī. Akka nāfo mātō xinifāfe retepaonifo. ⁴⁸ Akka mā mā nikakī tāpikōia a mātō xinifāfe aponifo keskara. Akka mātō xinifāfe ato retepaonifo. Akka a maiafo anoxō mā

afarafo onifamis yorafāfe òinòfo. Nāskarāfo mā ato òimani nā māto xinifāfe apaonifo keskara, māri ato fe ixò mā ato feta askafakerana.

⁴⁹ “Nāskakē Niospa ato ònoa tãpixò iskakafī yoini: ‘A ēfe meka yoimisfo yafi eòxò yonomisfo fetsa ē ato nìchixii. Akka ranāri ato reteyanā ranāri ato omiskòimakani.’⁵⁰⁻⁵¹ Nāskakē na yorafo iskaratīa niyoafo Niospa ato omiskòimaxii ato òxò. Nā Niospa mai onifaki taefanitiā Abel sharafiano āfe òchi reteni. Nāskatari xinia fetsa finòmata a Niospa meka yoimisfo ato retepaonifo. Nāskata chipokòi fakakī Zacaríasri retenifo. Nā Niosp kīfiti pexefā chaimashtaxò koati mīsamāfā nakirafexò retenifo. Akka ē mato yoi na yorafo iskaratīa niyoafo Niospa ato omiskòimaxii ato òxò.

⁵² “jOoa a Moisés yoikī kirika keneni keskara ato tãpimamisfāfe! Niospa meka shara oa onea keskara mā faa yorafāfe tãpinòfoma. Mākai Niospa meka tãpisharama. Nāskaxò fetsafāfe nikapaifiaifono mā ato nikatimafai. Nāskakē Niospa mato omiskòimakī finakòixii,” ixò Jesús ato yoini.

⁵³ Ato Jesús askafakī yoaino, a Moisés yoikī kirika keneni keskara ato tãpimamisfo fe fariseofo akiki òitifishkiki finakòinifo. Nāskakaxò fekaxtefayanā afara ichapakòi yòkanifo, ⁵⁴ afara ato yoiaito nikakaxò yòaxiakī. Nāskakaxò yòkanifo xanìfofo yoipaikakī.

12

Jesús ato yoikī iskakani: “Ato feparapaimis iyamakāfe,” ixò ato yoini

(Mt. 10.26-27)

¹ Nāskakē yorafā rasi akiki fekanax ichanānifo. Shoiki fetsenifo yora ichapakòi māiyakanax. Nāskakē Jesús aòxò tãpimimisfo yoikī taefani, ato iskakafī: “Òisharakāfe fariseofāfe nāfo sharafora noko fanòfora ikaxò mato anorima yoimapaikani kiki sharafoyamafikaxò. Nāfo feparamitsapaimisfokī. Nāskakē māri ato keskara iyamakāfe.

² “Akka nā afara one yoifimifono Niospa ato xafakīa kãimaxoxii, afarari fomāpaimisfono nāfori Niospa ato xafakīa kãimaxoxii.

³ “Nāskakē a yora fetsafo fomāfai ares shināmisfo, nāfori Niospa xafakīa faxii. Nā pexe kene mēraxò pexe fepoti tserexò afara one yoimisfori, nāfori Niospa pexe kachiori ato xafakīa kãimaxoxii keyokòichi tãpinòfo,” ixò Jesús ato yoini.

Akka Nios fistiki nò mesetiro

(Mt. 10.26-31)

⁴ Anā Jesús ato yoini iskakafī: “Efe yorafāfe, ē mato yoi. Mato retepaifiaifono rateyamakāfe. Akka māto yora nafaiino māto fero mēsho naima kiki. ⁵ Akka ē mato yoi, tsoaki mā mesetiroma, atoki mesetamaroko Nios fistiki mesekāfe. Nāato noko retexò nòko fero mēsho nā omiskòipakenakafo mēra potatiroki. Nāskakē akiki mesekāfe.

⁶ “Akka ē mato yoi mā tãpinò. Na cinco peya mīstiffo minixò mā kori ichapa fiima. Āfe exe rafes mā fii. Askatamaroko Niospa keyokòi peya mīstiffo noi. Atokai shināmakīnakama. Peya mīstiffo afaamafiakē Niospa ato noi. Keyokòi Niospa ato shināpakenaka. ⁷ Akka ē mato yoi, Epa Niospa māto foo fisti rasi mato tãpikakòia. Nāskakē rateyamakāfe. Nā peya mīstiffo kexesharamis keskafakī matori Epa Niospa kexesharakī finakòiakī,” ixò Jesús ato yoini.

Akka atiri yorafāfe, “Jesús ēfe Ifora,” ea famisfo yorafāfe ferotaifi. Akka atirifāferi, “Jesús ēfe Ifomara,” ea famisfo

(Mt. 10.32-33; 12.32; 10.19-20)

⁸ Anā Jesús ato yoini iskakafī: “Akka ē mato yoi yorafāfe ferotaifi, ‘Jesús ēfe Ifora,’ ea faifono, ēri, ‘Nāfo efe yorafo,’ ē ato faxii Epa Niospa āfe ājirifāfe ferotaifi. ⁹ Akka nā yorafāfe ferotaifi, ‘Jesús ēfe Ifomara,’ ea faifono, ēri Niospa āfe ājirifāfe ferotaifi, ‘Nāfo efe yorafomara,’ ē ato faxii.

¹⁰ “Akka Niospa Fake chakafakī mekafaifono Niospa ato chaka soaxotiro. Akka Epa Niospa āfe Yōshi Shara chakafakī mekafaifono Epa Niospa ato chaka soaxonakama.

¹¹ “Nāskata ichanāti pexefo ano mato iyoaifono, askayamakī xanìfofo ano mato iyoaifono, shināchakayamakāfe afesaxò mā ato kemaimākai afaa mā ato faimākai. Epa Niospa mato shināmasharai kiki. ¹² Akka a mato chakafakī mekafaifono Epa Niospa Yōshi Sharapa mato shināmasharaino mā ato kemasharai,” ixò Jesús ato yoini.

Yora afama mīsthi ichapayax mesekòixii

¹³ Nānoa fētsa Jesús yoini: “Ifo, ēfe ochi ea yoixòfe āfe afama mīstiffo ea paxkaxonò,” faito, ¹⁴ Jesús kemani: “Efe yorashta, tsòakai ea nìchima ē ato yoinò āto afama mīsthi paxkanānòfo,” ixò yoita. ¹⁵ Nāskaxò anā yoini: “Mā kexemesharakāfe afarafo ato fichipaiyamakāfe, ayafixò finòmāfai fipaiyamakāfe. Nā nò yopaifo shināyamakāfe, afama mīsthiònoaxkai nò isharatiromaki. Nòko afama mīstifāfekai nòko òiti noko inimamaxotiromaki,” ixò Jesús ato yoini.

¹⁶ Nāskaxō anā meka fetsafaxō ato yoini: “Feronāfake fetsa afama mīshti ichapaya ini. Āfe tare ano yonosharaxō afama mīshti fanano ichapakōi ini. ¹⁷ Nāskakē nā feronāfake afama mīshti ichapayato iskafakī shināni: ‘ĶĒfe yonofo ē afeskafaimē? Fanīkai ēfe yonofo ē fatiroma,’ ixō shināni. ¹⁸ Nāskaxō anā shināni: ‘Ēje, mē shinā ē afeskafaimākai. Nā ē ano afama mīshtifo famis ēfe pexe nasaxō anā efapafai, nāno ēfe fana fimifo mekexiki ēfe afama mīshtifoya. ¹⁹ Nāskaxō ēfe shināmā ē shināi iskafakī: “Nē afama mīshti mekekōia nā xiniai tii rakakōikai pixiki, ayayanā inimasharakōiyanā.”’

²⁰ “Nāskaito Niospa iskafakī yoini: ‘Mīkai afaa tāpiama. A na fakishi mī nai, akka, Ķna mī mekeafō tsoanā ikimē?’ fani. ²¹ Nāskariatiro a yora afama mīshti ichapaya ikatsaxakī Nios shinātama. Akka Niospa ōiaino anā afaya itiroma,” ato fani Jesūs.

*“Epa Niospa āfe fakefo kexesharamis,” ixō Jesūs ato yoini
(Mt. 6.25-34)*

²² Nāskata chipo Jesūs aōxō tāpimisfo yoini iskafakī: “Ē anā mato yoisharanō. Ea nikasharakāfe. Shināchakayamakāfe. ²³ Akka a nō piaitokai noko imasharatiroma. Askatari a nō safeatori nōko yora noko imasharaxotiroma. ²⁴ Shinākapo. Nā peyāfāfekai afaa fanamisfoma, afarikai topimisfoma. Askatari afari mekemisfoma. Nāskafekē Epa Niospa ato pimamis. Akka Niospa nā peyāfo finōmainīfōfā matoroko kexesharakōimis. ²⁵ Nāskakē, Ķafeskakī mā shināchakaimē? A nō shināchakaitokai pena fisti noko anā nimatiroma. ²⁶ Akka afaa shināyamakāfe. A nō shināitokai noko nimatiroma. Nāskakē afaa shināyamakāfe.

²⁷ “Akka shinākapo afeskax charofo foaikamakī. Na charofāfe yonokanima. Askatari xapo toro atirofoma rapati faxikakī. Nāskakē ē mato yoi, na charofo sharaḡiano xanīfo Salomōn rapati sharaḡinakōi safefixō na charofo finōama. ²⁸ Akka Niospa nafefo shara mīshti onifasharaḡiano nō sepakī xateano natiro. Nāskaxō nō koofatiro. Akka charofo finōmainīfōfā Niospa mato noikī mato rapati shara safematiro, mato kexesharaxō. Akka mā shināchakakī mā Nios chanūmara fasharaima. ²⁹ Nāskakē shinākī iskafayamakāfe: ‘Ooa, ē afaa piimēti a ē piāi keyoano, askatari ē afaa ayaima,’ ixō shināyamakāfe. ³⁰ Akka nā Nios Ifofaiḡfema iskara shināmisfo. A piāi fisti shinākata, a safepaiyaifori shināmisfo. Akka Epa Niospa mā mato tāpia afafo mā yopaito. ³¹ Nāskakē mīros xanīfoōnoa shināḡafāikāfe. Mā askaito afara shara Niospa mato ināxii kiki,” ixō Jesūs ato yoini.

*“Epa Nios ika anoxō afara sharakōifo mato mekexona,” ixō Jesūs ato yoini
(Mt. 6.19-21)*

³² Anā Jesūs ato yoini iskafakī: “Efe yorāfāfe, rateyamakāfe, Epa Niospa mato kexesharāikiki. Akka Epa Niospa āfe afama mīshti mato ināsharai inimakōikai mato ināsharai. ³³ Māto afama mīshtifo minixō kori fiyokāfe. A yora afaamaisfo ato ināxikakī. Mā askaino Niospa nā ika anoxō mato afama mīshti mekexona. Nāfokai keyonakama, tsoarikai yometsoitiroma. Askatari nakaxari mato pīatiroma, Epa Niospamāi mato mekexonano. ³⁴ Akka māto afama mīshti shinākī nā fisti mā shināi. Akka mā Nios fisti shinākī nō fistiri mā shinākōitiro māmāi noikōikī. Nāskax mā afe isharaḡapakexatiro,” ixō Jesūs ato yoini.

Īkisi itipinīsharakāfe

³⁵ Anā Jesūs ato yoini iskafakī: “Nāskakē itipinīsharakāfe māto rapati safesharakōita māto rāpariri ōtasharakōikāfe. ³⁶ Nā āfe ifo yonoxomisto āfe ifo manatiro keskakāfe pexe fetsa ari kaax, āfiyatani oaino. Mā nokoaito āfe feptōi koshi fepeboxiki, mā nokoxō feptōi ramātooshiaino. ³⁷ Nāskaifono āto ifo atoki inimasharakōitiro, manasharakōiaifono. Akka ē mato yoikōi āto ifāfe mīsa ano ato tsāotiro atoki inimayanā. Nāskaxō ato pimatiro atoki inimasharakōiyanā. ³⁸ Nāskakē inimasharakōitirofo āto ifomāi manasharakōikanax, yamenake kafanaino nokoaino, askayamai penanāi kafanaino nokoainori akiki inimasharakōitirofo. ³⁹ Nāskakē māri nā keskara tāpisharakāfe. Akka pexe ifāfe mā tāpixō afetiā yometso nokoimākai ixō āfe pexe itipinīshara fatiro, a mēra ikiax yometsoyamanō. ⁴⁰ Nāskarīfai māri itipinīsharakāfe. Akka oimara ixō mā ēa manayamaino ē matoki nokorisanatani,” ixō Jesūs ato yoini.

*Ina shara yaḡi ina chakaōnoa Jesūs yoini
(Mt. 24.45-51)*

⁴¹ Nāskaito Pedro yōkani: “Ifō, Ķnoko fisti meka fetsafaxō mī yoiamē, askayamakī keyokōi mī noko yoiamē?” ixō Pedro yoikaito, ⁴² Jesūs kemani: “Mā tāpinō ē mato yoi afe keskaramākī ina shara āfe xanīfāfe āfe afama mīshti kexemafaini mai fetsa ari kakī nā āfe pexe anoafō ato kexesharaxonō ato pimasharayanā, nā āfe xanīfo fena oyamaino. ⁴³ Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisiri inimakōini māmāi yonoxosharakōiax. ⁴⁴ Ē mato pāraima. Nāskaxō āfe xanīfāfe mā xanīfo imaxō āfe afama mīshti kexexonō inātiro. ⁴⁵ Akka nā āfe xanīfo yonoxomisto, ‘Ēfe xanīfo fena oimara,’ ixō shinākī, a yonoxomis fetsafo sēteketsani, kĒrofoya.

Nā pāemisfo fe rafexō ato feta piyanā, askatari ato feta ayayanā, askatari ato fe pāeyanā. ⁴⁶ Iskaratīa ēfe xanīfo oimara ixō manayamaino, nā pena fistichi āfe xanīfo nokofiaino mā nokoxō a yonoxomis omiskōimatiro, nā yora chakafo fomisfo mēra potakī.

⁴⁷ “Akka a yonoxomisto mā tāpia āfe ifāfe fichipaiyai keskara, nāskakē mā tāpifiax itipinīsharama, nāskakēri nikasharaima, nāskakē āfe ifāfe omiskōimayanā koshaketsatiro. ⁴⁸ Akka a yonoxomis fētsa āfe ifāfe yoya keskara tāpixoma afara chakafakē āfe ifāfe omiskōimafiakī, omiskōimasharanima. Nāskarifiakī Niospa fetsa ichapa tāpimaxō ichapari yōkaxii. Iskafakī a ē mia yoya keskafakī, ¿fetsafo mā mī ato tāpimasharamē? ixō yōkaxii. Akka fetsafo tāpimasharamano Niospa omiskōimakī tāpimaxii,” ixō Jesús ato yoini.

“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini (Mt. 10.34-36)

⁴⁹ Anā Jesús ato yoini iskafakī: “Ē keyokōi maifo tii anoā āto chaka xatemaniyoi ē oa. Atirifāfe ea chanīmara faifono, fetsafāferi ea chanīmara fakanima. Nā chanīmara faamafo Niospa ato omiskōimaxii. Ēfe Epa Niospa ea mai ano yonomanai keskara iskaratīa keyokōi shara ikerana. ⁵⁰ Akka matoōnoax naxii ē oni. Akka ē nayoamax ē omiskōixii. Nāskakē ē omiskōifinākōita ē naxii. ⁵¹ Akka, ¿mā shināimē ē oni nono mai anoax eōnoax inimanōfo? Maa. Askarakaima. Akka ē mato yoi nā ea chanīmara faafāfe shara shināifono, akka a ea chanīmara faafāfema shara shinākanima, afara chaka shinākani. ⁵² Akka iskaratīa nā pexe fisti mēra cinco yorafo ikaxō anorisfo shinākanima, paxkanātirofo. Trespatō nā rafe noikaspaino, nā rafetari nā tres noikaspatirofo. ⁵³ Apa āfe fake noikaspaino āfe fakefāferi āfe apa noikaspatiro. Āfe āfari āfe fake xotofake noikaspaino āfe fake xotofāferi āfe afa noikaspatiro. Askatari āfe fāfa yōxafāfe āfe fāfa naetafa noikaspaino āfe fāfa naetafari āfe fāfa yōxafo noikaspatiro.”

Nai foiskī nō tāpitiro (Mt. 16.1-4; Mr. 8.11-13)

⁵⁴ Nāskata Jesús yorafo yoini iskafakī: “Nai foiski nai kōi oiki nai choshtakē oi feira mā faino oi itiro. ⁵⁵ Akka nā xini oaima anorinoax nēfēfā oaino, mā xiniaira mā fatiro. Chanīma, nāskatiro. ⁵⁶ Akka mā kai afaa tāpiama, mākōi mā kakamepaimis a mā yoi ai keskara mā yoi fikī mā chanīmara famisma. Mā nai foiskī mā yoisim oi feira mā famis. Askara tāpifixō mā kai a Niospa mato yoi ai keskara mā chanīmara fapaima. Iskaratīa afara afeskarafaitokai mā tāpiama,” ixō Jesús ato yoini.

Fētsa mia chakafaito raefarisafafe (Mt. 5.25-26)

⁵⁷ Anā Jesús ato yoini iskafakī: “Akka, ¿afeskakī mā shara shināimamē a sharafinākōia? ⁵⁸ Akka fētsa mato yoi kī iskafaino: ‘Mī ea chakafaa. Ē xanīfo yoi kai,’ ixō mato yoiaino, xanīfo ari kayoamano koshi raefakāfe. Akka mā askafayamaino nā xanīfāfe āfe sorarofō yoi tiro nā sorarofāfe mato karaxa mēra ikimanōfo. ⁵⁹ Ē mato paraima. Fētsa mato karaxa mēra ikimanano mā fena tseketiroma. Akka nā mā nimia kopifātīa mā tseketiro,” ixō Jesús ato yoini.

13

Nōko chaka xatexō nā Jesús noko amapaiyai keskara fisti nō atiro

¹ Nāskaino yorafo Jesúski fokaxō yoinifo iskafakī: “¿Mā mī tāpiamē na Pilato yorafo ato retemanita Galilea anoāfo yoinā retexaxō Nios kīfiti pexefā mēraxō Epa Nios ināifono āto imifo yoinānā imifoya osita?” ixō yoinifo. ² Askafāifāfe Jesús ato yoini iskafakī: “¿Mā shināimē na Galilea anoax na feronāfakefo naitafo? ¿Yora chakakōifo keskarakanax āto kaifo keskarakanaxma chakafinākōiax naitafo ixō mā shināimē? ³ Maa. Askarama. Akka māri māto chaka xateyamaxō mā Nios Ifofayamax nā ikaifo keskai māri mā narisatiro mato reteafono. ⁴ ¿Akka mā shināimē nā feronāfake diociochonoa atoki pexe keya āfe ane Siloé atoki pakeano nanifo? ¿Mā shināiraka: ‘Nāfo chakafinākōia nanifo Jerusalén anoāfo keskaraxma,’ ixō mā shināimē? ⁵ Maa. Askarama. Chanīma ē mato yoi. Akka māto chaka mā xateyamaxō mā Nios Ifofayamax, māri mā omiskōipakenaka.”

Meka fetsafaxō higuera fimimaisnoa Jesús ato yoini

⁶ Jesús meka fetsafaxō ato yoini iskafakī: “Feronāfake fistichi āfe tarepa higuera fana ini. Nāskax oikai kani mā fimiyamākī, kaxō ōimi fimimais ini. ⁷ Nāskakē yoini a tare kexemis. ‘Ōipo mā tres xinia afix na fana higuera fimiyama. Ē āfe fimi fichipafaiaino fimiyama. Ichakanō rerafe, ano fimi fetsa nō fananō; fani.

⁸ “Akka ifāfe askafaino a tare kexexomisto kemani: ‘Ifo, na xinia fisti manayofe. Ē a nāmā orosharata ē mai tatsisifo sharayonō. ⁹ Ōitsai, ē askafaano fimisharatirokī. Akka fimiyamaito mī ea reramanō,’ ixō a tare kexemisto yoini.”

Jesús pena tenetiſiā kēro petoko sharafani

¹⁰ Nāskano pena tenetiſiā ichanāti pexe mēra kaxō Jesús ato yoini. ¹¹ Nānori kēro ini isinī itiani dieciocho xinia amis, niafaka chakata isinī imamis nā kēro sharamisma ini petoko itiani. ¹² Nānoa Jesús ōikī kenaxō yoini iskafakī: “Yōxafoshita, mā mī shara isinī itiyanaxakī,” fani.

¹³ Nāskaxō āfe mēkemā ramāino, koshikōi nā kēro sharakōitani. Nāskaxō, “Epa Nios fāsi sharakōi,” nā kēromā fani. ¹⁴ Nāskakē Jesús pena tenetiſiā kēro sharafaino, nā ichanāti pexe anoa xanīfo ōititfishikī yorafo yoini iskafakī: “Seis nia nō yonotiro, akka na pena tenetiſiā tsōa yonotiroma. Nāskakē seis nia otafe sharaxiki, akka na pena tenetiſiā tsōa mato sharafatiroma,” xanīfāfe ato fani.

¹⁵ Askafaito nōko Ifo Jesús kemani iskafakī: “Mā kai afaa tāpiama, mākōi mā kakapaimis, akka pena tenetiſiari mā yonomis mātō yoinā inafō mā tēpemis ato faka ayamanikakī.

¹⁶ Akka na kēro Abraham āfe fena Satanás chakata finitima famis isinī imayanā dieciocho xinia amamis. ¿Akka afeskakī na pena tenetiſiā na kēro ē sharafatiromamē?” ixō Jesús ato yoini.

¹⁷ Nikakani a Jesús noikaspamisfo rāfipainifo. Akka yorafo inimakōinifo nā kēro Jesús sharafaito ōikani.

Mostaza exeōnoa yoikī meka fetsafaxō Jesús ato tāpimani

(Mt. 13.31-32; Mr. 4.30-32)

¹⁸ Nāskata Jesús anā ato yoini iskafakī: “Afe keskaramakī Nios xanīfāfe noko ikinā ē mato yoinō. Nikakapo iskarakī: ¹⁹ Oa mostaza exe feronāfāke āfe tarepa fana keskarakī. Mā foaixax efapakōiax ifi tio itiro. Mā efepakōiano peyafāfe āfe pōyamā naa fatirofo. Nāskarifiakī mā taefakī fisti rasichi mā Epa Nios Ifofayotiro. Akka chipo ichapakōichi mā Epa Nios Ifofatiro,” ixō Jesús ato yoini.

Meka fetsafaxō pāa faraxika keskaraōnoa Jesús ato yoini

(Mt. 13.33)

²⁰ Afianā Jesús ato yoini: “Afe keskaramakī Nios xanīfāfe noko ikinā ē mato yoinō. ²¹ Nā kēromā pāa fakī lewaduraya harina osixō kamosakano faraxitiro keskara. Nāskarifiakī nō ōitiroma. Yorafāfe Niospa meka āto shinā mēra naneafono nō ōiamafiaino āto ōiti fetsafakanax Nios keskara shara itirofo,” ixō Jesús ato yoini.

Fepoti pishtaōnoa Jesús ato yoini

(Mt. 7.13-14, 21-23)

²² Jerusalén ano fāi kakī, Jesús pexe rasi anoafō ato yoini a pexe rasi pasotai ikafo anoafori ato yoifoni. ²³ Ato askafaito fistichi yōkani: “Ifo, ¿fisti rasi Niospa ato ifimē?” faito Jesús kemani,

²⁴ “Pexe fepoti atsokē ikipaifikani tsoa ikitiroma. Akka ē mato yoi yora ichapakōi ikipaifikani ikitirofo. Nāskarifiāi ēfe Epa ika ano ikipaifikani ikitirofoma. Nāskakē āfe meka tāpisharakāfe a mēra ikisharaxikakī. Akka yora ichapato ēfe Epa nikafikatsaxakakī, tsōa Ifofamax a ika ano ikipaifikani tsoa ikitiroma. ²⁵ Nāskakē pexe ifo fininākaāfe āfe pexe fepoti fepotiro. Nāskakē mā pexe emāiti nixō mā kenakī iskafatiro: ‘Ifo, noko fepoti fepexōfe,’ mā faino mato kemakī iskafatiro: ‘Ēkai mato ōimisma mā kai efe yorama tiiri fakiranoax mā oa,’ ixō mato yoitiro.

²⁶ “Nāskakē mā yoikī taefakī iskafaxii: ‘Nō mefeta pita nō mefeta ayamis, askatari mī noko yoiaito nō nikamis,’ mā faxii.

²⁷ “Mā askafaino mato kemakī iskafaxii: ‘Mē mato yoi ē mato ōimisma fakiranoax mā oa. Emakinoax fotakāfe mā yora chakafō mato faxii.’ ²⁸ Mato askafaino anoax mā oiayanā mā omiskōi fetsexii, Abrahamnō Isaacanō Jacobonō a Niospa meka yomimisfonō ato ōi Nios xanīfo ika anoa ato ōi. Nāskakē ato makino a Niospa mato potaxii. ²⁹ Akka yorafo nā mai ano keyokōi ikanax fetsa fetsatapafō fexikani Nios xanīfo anoxō afe tsoaxō pixikakī. ³⁰ Nāskakē fetsafo iskaratīa Nios nikafikani afe rafeafoma, akka a chipo nikaifo Ifofakanax afo afe rafetirofo. Akka fetsafāfe nikakī taefafianixakakī Ifofakanamax a rama nikaifo keskarakanax afe ipaxatirofoma,” ixō Jesús ato yoini.

Jesús Jerusalén anoafō ato shināi oiani

(Mt. 23.37-39)

³¹ Nāskata fariseofo Jesús ano fēkaxō yoinifo iskafakakī: “Nonoax katāfe Herodes mia retapai kiki,” faifono,

³² Jesús ato kemani: “Fokaxō ea Herodes yoixotakāfe aato ato pāramiski. Ē fena nonoax kaimakai. Iskaratīa na yorafo sharafayanā penamari ē ato makinoa niáfaka chakafo ē ato pōtaikai. A isinī ikaifori ē ato sharafapaikai. Mā ato askafakī keyota nā ē kapaiyai ari ē kaikai. ³³ Akka iskaratīa ē yonoyoi, pena fetsari ē yonoi, akka a Niospa meka ato yoimis Jerusalén makinoax na sharama.

³⁴ “¡Ooa Jerusalén ano ikāfāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nīchiafōri mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifiatio mā ea nikakaspamis. Māfi ekeki omismakī ē mato ikipanā. ³⁵ Akka ōikapo, iskaratīa mato anā tsōa kexeima na mā imis anoa. Ē mato yoi anā mā ea ōima. Akka nā ē anā oiaitīa mā ea ōixii. Mā yoikī iskafaxii: ‘Nafi Niospa nokoki nīchia fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

14

Jesús a isinī imis sharafani pōya rafe faraxita kishi raferi faraxikē

¹ Nāskakē pena tenetitīa Jesús kani nā fariseo xanīfāfe āfe pexe anoxō pikai. Akka nānoxō fariseo fetsafāfe ōinifo Jesús afaa afeska faimākai nō ōinō ikaxō. ² Nāskano nānori āfe ferotaifi feronāfake fisti isinī imis ini pōya rafeki faraxika ita kishi rafeki faraxika ini. ³ Nāskakē Jesús ato yōkani, a Moisés yoikī kirika keneni keskara ato tāpimamisfoya fariseofo: “¿Na pena tenetitīa a isinī ikaifo nō ato sharafatiromē, askayamakī nō ato sharafatiromaraka?” ixō ato yōkaito, ⁴ akka tsōa tooxanima. Nāskakē Jesús a isinī ikai mētsoinīfofā sharafani. Nāskaxō yoini: “Mā mī sharakī, katāfe,” fani. ⁵ Nāskaxō fariseofo Jesús ato yoini iskafakī: “Akka, ¿fatora mā fētsa, māto fake iyamāi māto yoinā ina kini mēra pakeano mā koshi ifirisa fatiromamē pena tenetitīa?” ato faino, ⁶ tsōa kemanima.

Feronāfake āfiyaino fista ayanā pitirofoōnoa Jesús ato yoini

⁷ Nāskata Jesús ōini mā fēkaxō tsaoti sharakōi fikanax mīsa ano tsaofaifāfe. Nāskaifāfe ōikī Jesús meka fetsafaxō ato yoini iskafakī: ⁸ “Akka fētsa fista ayanā kēro fikī mato kenano, tsaoti sharakōi ano tsaoyamakāfe. Akka mato keskarama nā feronāfake sharafinakōia pexe ifāfe kenano oax nā tsaoti sharakōi ano tsaotiroki. ⁹ Akka pexe ifāfe fetsa fe oxō mia yoikī iskafatiro: ‘Na feronāfake tsaoti ināfe,’ mia faino mī rāfikōiyānā kaax chikayakōi mī tsaotiro. ¹⁰ Akka askatamaroko mia fētsa kenamana kaax ori chikayakōi mī tsaoyotiro. Akka nā mia kenamanato mā oxō mia yoinō iskafakī: ‘Efe yorashta, na tsaoti sharakōi ano tsaoyofe,’ mia faino, nāskakē mī inimasharakōitiro yorafāfe ferotaifi a mefe mīsa ano tsaofafāfe mia ōiaifono. ¹¹ Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

¹² Ato askafata a ato pimairi Jesús yoini iskafakī: “Mī ato pimakī mī yamafoos ato pikīyamafe, mī extofoosri ato pikīyamafe, mī kaifoosri ato pikīyamafe, a mia chaima nikafori kori ichapayafōri ato pikīyamafe. Akka afāferi kopikiri mia pikītirofo, nāskakē mā pimanāsharakōitiro. ¹³ Askatamaroko mī fista ayanā a yora afaamaisfoya a nipaikī ranāifo chātofoya a fēxofori ato pikīfe. ¹⁴ Nāskakē mī ato askafaax mī inimakōitiro. Akka afāfe mia kopifatirofoma, akka mī ato askafaito Niospa mia inimamasharaxii naax mī anā otokē,” ixō Jesús yoini.

Meka fetsafaxō Jesús ato yoini feronāfāke mā a piyai mā itipinīsharakōi faxō ato pimapaiyāiōnoa yoikī

(Mt. 22.1-10)

¹⁵ Ato askafaito nikakī fētsa a mīsa ano tsaoto Jesús yoini iskafakī: “Ifo, inimasharayanā Epa Nios xanīfāfe keyokōi yorafo ikināi anoax ato fe ikanax fāsi inimasharakōitirofo,” ixō yoiaito, ¹⁶ Jesús yoini iskafakī: “Feronāfake fistichi a piyai sharakōi faxō yora ichapa kenamani afeta pī fenōfo. ¹⁷ A piyai mā itipinīshara faxō a yonoxomis nīchini ato yoitanō iskafakī: ‘Kookāfe pixikakī. Mā ēfe xanīfāfe itipinīshara faki,’ ixō ato yoitanō.

¹⁸ “Ato askafaino, akka keyokōichi yoinifo iskafakakī: ‘Nō kayotiroma,’ ixō yoinifo. Akka a yoikī taefato yoini iskafakī: ‘Ē rama mai fiaki ē ōiyotanō. Ē mia yoikai ē mefe kayotiroமாகী,’ ixō yoini. ¹⁹ Fētsari yoikī iskafani: ‘Ē rama diez faxō fakka fiaki yonomaxii ē ōiyonō sharamakī. Nāskakē ē mefe kayoi kaimakai,’ ixō yoini. ²⁰ Fētsari yoikī iskafani: ‘Ē rama kēro fia. Ē mefe katiroma,’ ixō yoini.

²¹ “Nāskakē a yonoxomisto oxō nā yoiafo keskafakī āfe ifo yoini, a yonoxomisto yoiaito nikai ōitīfishkikōini. Nāskakē afianā a yonoxomis yoikī iskafani: ‘Nā mī kapaiyai ari kaxō pexe rasi pasotaino ato ifitāfe a afaamaisfoya, a nipaikī ranāifo ifita fēxofori ifita chatofori ifita ato fatāfe,’ ixō nīchini.

²² “Mā āfe ifāfe nīchia katani. Okī yoitoshini, iskafakī yoini: ‘Ifo, nā mā yoya keskafakī mē ato yoitani. Akka mā fekani, mā fefiakanax mī pexe fospikanima,’ faito, ²³ afianā āfe ifāfe yoini iskafakī: ‘Na fāi kaxō ato yoirisafafe a chaima ikafoya, nāskaxō ato yoikī iskafafe: “Ēfe ifāfe pexe mēra ikikāfe afeta pixikakī,” ato fafe ēfe pexe fospikōinōfo. ²⁴ Akka ē mato yoi nā yorafo taefakī ē ato pimapaiyoya ēfe pexe anoxō efeta pinōfo akka afāfe anā efeta pinakafoma,’ ixō pexe ifāfe yoitiro,” ixō Jesūs ato yoini.

Jesūs Ifofai omiskōifikani isharakōitirofo
(Mt. 10.37-38)

²⁵ Yora ichapafāfe Jesūs chīfaifono atokiri fesoakekafā ato yoini: ²⁶ “Fētsa ea Ifofapaikī ea noikī finakōitiro. Āfe apanō āfe afanō āfe āfinō āfe fakefonō āfe extonō āfe chikonō ato noifikī earoko noikī finakōiama, askatari āa anoi noimei ea noisharakōitama nāskakē a keskara eōxō tāpimis itiro. ²⁷ Akka ē cruznoax mato nāxoxii. Nāskakē ea tsōa yoikī iskafaima: ‘Iskaratīa ē Jesūs Ifofai. Nāskakē ē nai omiskōifikī ē shināchakaima,’ ixō tsōa anori yoiaxma, nāskakē ēfe ina itirofoma.

²⁸ “Akka fatora fētsa mā pexe fapaikī ikisi mā shināyotiromamē afe tii xepa peimāki ōixiki aō pexe fakī mitoxiki. ²⁹ Akka mā pexe fapaikī mā xepa pei ichapama fixō mā mitotiroma. Nāskakē nā ōiaifāfe mato kaxemetsama fatirofo.

³⁰ “Mato iskafakī yoianā: ‘Kee, ōikapo, na feronāfāke pexe fafiakī akka pexe fakī mitoama.’ ³¹ Nāskarifiakī xanīfo fētsa afe xanīfo fetsa fe retenāpaikī shinātiro a diez mil soraroyato a veinte mil soraroya retetiromakī. ³² Nāskakē afe retenātiro ma meekī, xanīfo fetsa oyoamano meka fomatiro iskafakī yoikī: ‘Nō retenāimakai, nō raenānō,’ ixō yoitiro. ³³ Nāskarifiakī fatora mā fetsa mātō afarafo mā potayamax ēfe ina mā itiro.,” ixō Jesūs ato yoini.

Akka tashi sharakēma nō pitiroma
(Mt. 5.13; Mr. 9.50)

³⁴ Anā Jesūs ato yoini iskafakī: “Akka shinākāpo. Tashi sharakē nō tsopeitiro. Akka tashi sharayamakē nō tsopeitiro, paispa chakakē. ³⁵ Askarakai tsōa fichipaima. Potatirofo. Nāskariakakī ea Ifofayamakakī ea tsōa Ifofasharakanima chakakōi ea fakani. Akka mā pachoyakī ea nikasharakāfe,” ixō Jesūs ato yoini.

15

Oveja fenoaōnoa Jesūs meka fetsafaxō ato yoini
(Mt. 18.10-14)

¹ Nāskakē nā xanīfo Roma kori fīxomisfo fe yora chakafo Jesūsiki fenifo āfe meka nikai fekani. ² Nāskaifono fariseofo feta a Moisés yoikī kirika keneni keskara ato tāpimamisfāfe Jesūs mekafakakī iskafakī yoinifo: “Ōikapo nato yora chakafo ifimis, askatari ato feta pimis,” ixō yoinifo.

³ Askafaifono Jesūs ato yoini meka fetsafaxō mā tāpixō iskafakī: ⁴ “Fatora mā fetsa cien oveja inayano fisti ato makinoax fenoano, nā noventa y nueve mā anā fasifo mēra nīchitiro. Nāskaxō nā oveja fenoa fisti mā fenatiro shināmitsakōiyanā. Nā mā fichiatiā fetsafo kāimaxiki. ⁵ Mā fichiāx āfe oveja fenoaki akiki inimakī tepapiinīfōfā tepokomexō iyotiro. ⁶ Nāskax mā āfe pexe ano nokoxō āfe yamafoya a chaima nikafo yoitiro iskafakī: ‘A ēfe oveja fenoa. Mē fichiakī efe inimakāfe,’ ixō ato yoitiro. ⁷ Nāskakē ē mato yoi, nāskarifiakī inimakōikani nā nai mēra ikafo fētsa āfe chaka xatekōiano Jesūs Ifofakī. Akka nā noventa y nueve yorafokiri nai mēranoax atokiri inimakani, afomāi isharakōipaonifono nono mai ano ikanax. Akka nā feronāfāke chakafinakōi iyopaonixakī āfe chaka xatekōiano akiki inimaifinakōikani nai mēranoax,” ixō Jesūs ato yoini.

Meka fetsafaxō Jesūs ato yoini kēromā āfe kori exe fenoa ftaoxō

⁸ Anā Jesūs ato yoini iskafakī: “Nāskarifiakī kēro kori exe diezyaano fisti pakeano āfe pexe mēra rāpari otaxō fenakī ōisharata mātsoḱī fichitiro. ⁹ Nāskata mā fichixō, āfe yamafoya a chaima ikafoya ato ichanāfatiro. Nāskaxō ato yoikī iskafatiro: ‘¡Aicho! A ēfe kori exe fenoa mē fichiakī efe inimakāfe,’ ixō ato yoitiro. ¹⁰ Nāskarifiakī ē mato yoi. Nāskarifiakani Epa Niospa āfe ājirifo inimakani fētsa āfe chaka xateax a anā ipaoni keskara iyamaito ōikani,” ixō Jesūs ato yoini.

Meka fetsafaxō Jesūs ato yoini apa āfe fake rafatiroōnoa yoikī

¹¹ Jesūs afianā ato yoini iskafakī: “Feronāfāke fisti fake rafeya ini. ¹² Akka nā chipokoto apa yoikī iskafani: ‘Epa, mā mī chaima nakī a mā ināxiai ikisi ea ināfe,’ fani. Nāskakē āpa āfe afama mīshti ato paxkaketsaxoni.

¹³ “Nāskano pena fetsa āfe fake chipokoto āfe afama mīshti ato ināketsani kori fixiki. Mā kori fiax chaikōi kani mai fetsa ari. Nārixō āfe kori potakī mitoni mēxotaima pāekī kēro chota feromafo fe ikī. ¹⁴ Akka mā āfe kori potakī keyoano, nā mai anoaxri fonāikōinifo. Nāskakē nā mai anoax nā feronāfakēri chipo omiskōini afaamaisax. ¹⁵ Nāskakē kaxō nā mai anoax feronāfake fetsa yono yōkani yonoxopai, iskakakī yoini: ‘Ē mia yonoxopai,’ ixō yōkaito āfe tarepan nīchini āfe kochifo pimaxonō. ¹⁶ Nāskata fonāikōifiki a kochifāfe piari maropei xaka pisharapaikōini tsōakairoko afaa pimaino.

¹⁷ “Nāskakī iskakakī shināni: ‘Ēfe epa yonoxomisfāfe ēfe ēpa pexe anoxō pikī finasharakōiyānā texefamisfo. Akka ē nonoax fonāiki finakōi mē nairokomē; ixō shināta, ¹⁸ ‘Mia iskaratīa afianā ēfe ēpa pexe ari kapa. Mē kaxō iskakakī ēfe epa yoi kaikai, ‘Epa, ē Nios chakafata miari ē chakafamis. ¹⁹ Nāskakē iskaratīa ēfe fakera mā ea fatiroma. Mia yonoxomisfo keskara mī ea fatiro,’ ’ ixō shināta, ²⁰ āfe āpa pexe ari fāi kani. Nāskakē chai inoax oaito āfe āpa fichini shināmāi fakī. Nāskax akikī koshi farekekāi akikī nokota chishtoinīfofā kokoketsani.

²¹ “Nāskafaito āfe fāke āfe apa yoi kī iskakani: ‘Epa, ē Nios chakafata miari ē chakafamis. Nāskakē ēfe fakera mā fatiroma,’ ixō apa yoini.

²² “Apa askafaino akka āfe āpa a yonoxomis yoini ato iskakakī: ‘Koshikōi rapati fenasharakōi fixokāfe ēfe fake ea safemaxokāfe, askatari anīcho sharari safemakāfe, askatari sandalia sharari safemakāfe,’ ato fata, ²³ ‘Fākka fake xoakōiari ifitakāfe retexikakī nō pinō fista ayanā. ²⁴ Akka na ēfe fake mā nani keskara ikatsaxakī mā anā ekeki nokoaki. Mā fenofinino mā nō anā fichiaki,’ ixō akiki inimakī fista axoni.

²⁵ “Akka āfe fake iyoato āfe tare ano yonofai okī nikaferani pexe chaima nokoiyokī mōsika maneyanā mairairfono. ²⁶ Nāskakē a yonoxomis fetsa kenaxō yōkani āfe āpa pexe anoxō afaa afeskakanimākai. ²⁷ Askafaito a yonoxomisto yoini: ‘Mā mī exto nokoaki. Nāskakē āpa fakka fake xoa sharakōia ato retemana afeskaxma mī exto sharakōi nokoano,’ ixō yoini.

²⁸ “Akka āfe ochi iyoa akiki ōitifishkiki finakōini. Nāskakē pexe mēra ikinima. Nāskaino āfe apa āfe pexe mēranoax kāinākfani āfe fake yoiyoi mā āfe fake chipoko nokoano, ‘Mā mī exto nokoaki. Nōko pexe mēra ikikofe,’ fani. ²⁹ Āpa askafaino apa kemani iskakakī: ‘Shināpo epa, ē mia yonoxomis keskarakō, ĵafe tii xinia ē mia yonoxomisē? Ea mia yoiaitokai ē mia nikakaspamisma, akka eakai cabranā fakeshta mā ināmisma retexō piyanā ēfe yamafo feta ē fista apanā. ³⁰ Akka mī fake mā nokoā nā mī kori ināni kēro chotaferomafokī potakī keyotani. Nāskafikē mī fākka fake xoashara retexona,’ faito, ³¹ āpa kemani: ‘Anifoshta, mīkai ea potamisma, mī efe itiani. Akka na ēfenāfo mīnā, keyokōi iki kiki. ³² Akka iskaratīa nō fista aki mī extoki inimayanā. Akka mī exto naa keskara ikatsaxakī, mā anā ekeki nokoā afeskaxma, mā afetiama fenofinino anā oaito nō fichia,’ ixō āpa āfe fake iyoa yoini,’ ixō Jesús ato yoini.

16

Meka fetsafaxō Jesús ato yoini, xanīfokōichi afe xanīfo yōaniōnoa yoi kī

¹ Jesús afianā aōxō tāpimisfo yoi kī iskakani: “Feronāfake fetsa afama mīshti ichapayato feronāfake fetsa afe xanīfo inō yoini. Nāskaxō nikani āfe afama mīshti āfe inapa kexesharax-okēma. ² Nāskakē āfe xanīfāfe kenaxō yoi kī iskakani: ‘Ĵafamē a mīōnoa ea mā yoi ai? Akka a mī yonofaiōnoa ea yoi fe. Akka iskaratīa mī anā efe xanīfo ikima,’ ixō yoini.

³ “Askafaito nikakī āfe inapa shinākōini: ‘ĴĒ afeskaimē? Iskaratīa ēfe xanīfāfe ea anā yonomanimo, mā ea potai. Ēkai afeskaxō anā yonotiroma kerexkai ē tarepan. Nāskatari ē anā afaa yōkapaima ē rāfitiro. ⁴ ĴChool! Mē shināi. Nā ēfe ifo nimiyāfo ē ato xekaxopakefōfāni anā ichapa niminōfoma. Ē ato askafaino āto pexe anoxō ea ifinōfo ēfe ifāfe ea potano,’ ixō shināni.

⁵ “Nāskaxō fisti rasi ato kenapakeni afe tii āfe ifo nimiafomāki ato yoixiki. Nā akiki kai taea yōkakī taefani: ‘ĴAfe tii mī ēfe xanīfo nimiamē?’ ixō yōkaito, ⁶ kemani iskakakī: ‘Ē nimia xini ene cien galon,’ faito, a xanīfo fētsa yoini iskakakī: ‘Nā mī nimia potaxō nono tsaoxō fetsa arisafafe cincuenta faxō kenefe,’ fani.

⁷ “Nāskaxō fetsari yōkani: ‘Akka mīri, ĵafe tii nimiamē?’ faito, atori yoini iskakakī: ‘Cien saco de trigo ē nimia,’ faito, ari yoini iskakakī: ‘A mī nimia potaxō fetsa arisafafe ochenta faxō kenefe,’ fani.

⁸ “Nāskakē a āfe ina chakapa āa shināxō akai keskara āfe xanīfāfe tāpikōini. Nāskakē yoini iskakakī: ‘Mī tāpikōia, nāskakē fetsafāfe mia sharara fakani,’ ixō yoini. Nāskarifikāi a Nios Ifoafaafema tāpikī finakōiafo ato pārakīki, āa shināxō. Akka a Nios Ifoafafo askarafoma, ato pāratirofoma. Chanīma fisti yoi tīrofo.

⁹ “É mato yoinō, mā afama mīshti ichapayaxō a afaamaisfo ato inākāfe, mā ato askafakē mato yoisharanōfo. Nāskakē mā mā naxō mā anā kori yopatiroma mā Nios ari nokoaito nā mā kori ināmisfāfe mato yoikī iskafatirofo: ‘Aicho, mī noko shara famis. Iskaratīa nono Nios ano mī nofe ipanaka,’ ixō mato yoitirofo.

¹⁰ “Akka nā isharakōixō afara ichapama kexesharakōimis nō tāpitiro afara ichapa kexe-sharakōitirokē. Akka nā isharaxoma afara ichapama kexesharamisma nāri nō tāpitiro afara ichapa kexesharakōitirokēma. ¹¹ Akka nono mai anoxō āto afarafo kexesharayamaifono, Niospa ato afara sharakōifo ināpaifikī anā ato afaa inātiroma. ¹² Nāskarifiakī Niospa mato afara shara ināpaifikī mato inātiroma.

¹³ “Nāskarifiakī tsōa āfe ifo rafe yonoxosharatiroma. Akka fetsa noikaspata fetsa noisharatiro, nā yoiāi keskarakōi axotiro, akka a fētsa amapaiyai keskara axotiroroma noikaspatiroma. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

¹⁴ Akka nā fariseofāfe kori noikōimisfono Jesús atoōnoa yoiāito nikakani akiki kaxemet-samanifo. ¹⁵ Askafaifono Jesús ato yoini: “Māfi nō sharafora imiski yorafāfe ferotaifi, akka mā askafaiato Epa Niospa mato tāpikōia. Akka yorafo mā pāratiro nafo sharafoki mā ato fatiro, mā ato askafaino Niospa mā mato tāpixō mato iskafai: ‘Nafo chakakōifo,’ ixō mato yoi,” Jesús ato fani.

A Moisés yoini keskara sharaflano Nios xanīfāferoko ato finōkōinīfōfana

¹⁶ Anā Jesús ato yoini iskafakī: “Moisés Niosxō yoini keskafakī, a Niospa meka yoisfāferi yoinifo keskara Juan mato yoini. Nāskakē meka shara Nios xanīfōōnoa Juan ato yoini iskafakī: ‘Māto chaka xatekāfe anā a mā ipaoni keskara iyamakāfe Nios xanīfo ari ikixakakī.’

¹⁷ “Akka chanīma, maife nai koshikōi keyotiro. Akka a Moisés yoini keskakōi, Niospa meka shara keyonakama,” ixō Jesús ato yoini.

*Feronāfake āfe āfi fe enēnātirofoōnoa Jesús ato yoini
(Mt. 19.1-12; Mr. 10.1-12)*

¹⁸ Anā Jesús ato yoini iskafakī: “Akka fētsa āfe āfi enexō, fetsa fia sharama. Chakafai. Askara sharama. Askatari mā fenē enea feronāfake fētsa fiari sharama. Nāatori chakafai āfe āfimakōi fe ikī,” ixō Jesús ato yoini.

Feronāfake fetsa afama mīshti ichapaya ikaino akka Lázaro afaamais ini

¹⁹ Nāskata afianā Jesús ato yoini iskafakī: “Feronāfake fetsa afama mīshti ichapaya ini, rapati sharakōi safea. Nāskaxō pena tii fista apaoni pisharakōiyanā inimakōikī. ²⁰⁻²¹ Nānori feronāfake afaamais ini āfe ane Lázaro, yorafoki koyoi fetseax tsaoni a yora afama mīshti ichapayato āfe pexe fepoti ketokonō. Nā feronāfake afaamaisyato shināni iskafakī: ‘Na feronāfake afama mīshti ichapayato a piāi ea ināpainōra,’ ixō shināni. Nāskaino paxtafo akiki kaxō āfe koyofō tāxoketsani.

²² “Nāskax Lázaro nani. Mā nakē ājirifāfe āfe fero mēsho iyonifo Abraham fe ikikanō Nios xanīfo ano. Nāskatari a yora afama mīshti ichapayari nani. Nāri nakē maifanifo. ²³ Nāskakē a yora afama mīshti ichapaya omiskōikōini chiifā mēranoax a yorafo naax fomisfo anoax. Nānoxō foisnīfōfā chai inoa Abraham yafi Lázaro fichini. ²⁴ Nāskakē fāsikōi Abraham kenani iskafakī: ‘¡Epa Abraham, ea shināfe! Ea Lázaro nīchixōfe āfe mifi rechoko fāka mechanafaxō ea ana mechana faxoyonō. Nonox ē omiskōi finakōikai na chiifā mēranoax,’ ixō yoiāito, ²⁵ akka Abraham kemakī iskafani: ‘Ēfe fāke, žmī shināimamē nayoamax mī isharakōiyopaoni inimakōiyanā? Akka Lázaro isharakōiipaonima. Omiskōiipaoni. Nāskakē iskaratīa nonox isharakōia inimasharakōiyanā, akka mī omiskōikōi. ²⁶ Nāskakē afeskax mia ari tsoa katiroma, mīrikai afeskax noko ano otiroma. Na mafa kinīfā mesekōi afeskaxō nō finōtiroma. Māri afeskaxō arixori finōtiroma,’ ixō yoiāito, ²⁷ nā afama mīshti ichapayato anā yoini iskafakī: ‘Ē mia yoi epa Abraham mī Lázaro nīchinō ēfe ēpa pexe ano ²⁸ a ēfe exto cinco ikafo ano, anoxō Niospa meka ato yoinō nikakōinōfo akairi nono feyamanōfo nonox omiskōi fetirofoki,’ ixō yoini.

²⁹ “Askafaito Abraham yoini iskafakī: ‘Afāfēfi mā kirika kene oiafoki a Moisés feta a Niospa meka yoisfāfe kenenifo. Nā oikaxō tāpisharakōinōfo,’ ixō yoiāito, ³⁰ a afama mīshti ichapayato anā kemani iskafakī: ‘Mē tāpia, Epa Abraham, akka a yora naax otoato atoki oxō ato yoiāito nikakōitirofo,’ ixō yoiāito, ³¹ anā Abraham yoini iskafakī: ‘Akka a Moisés feta Niospa meka yoisfāfe yoinifo keskara nikakaspakakī. Nāskarifiakī tsōa nikatiroma a yora otoato ato yoiāito,’ ixō Abraham yoinino,” Jesús ato fani.

17

Noko fētsa afara chakafamaino āfenā mesekōi itiro
(Mt. 18.6-7, 21-22; Mr. 9.42)

¹ Jesús aōxō tāpimisfo yoini iskafakī: “Mēxotaima a ea Ifoafaafema yorafo afara chakafamapaimisfo. Akka fētsa fetsafo afara chakafamax omiskōifinakōixii. ² Akka ato askafamayoamano, tokiriya tenexti faxō fakafā nōfā mēra potatirofo a ea rama Ifoafaifo ato afaa chakafamayamanō. Nāskara shara,” ato fani.

³ “Kexemesharakāfe. Fētsa mia chakafaito yoisharafe anā mia chakafanōma. Mī yoiaito nikakī iskafakī shināno: ‘Chanīmarokomē ea yoisharakōi ē anā askanōma,’ ixō shināito raefaxō yoisharafe. ⁴ Akka anā mia chakafakī mekafaxō, ea raefafe ixō mēxotaima mia yoiri faito akiki ōitifishkikīma mī yoisharaxō mī raefatiro,” ixō Jesús yoini.

Nō chanīmara faito Niospa noko afama mīshti faxotiro

⁵ Nāskata a aōnoa yoimisfāfe Jesús yoinifo iskafakakī: “Ifo, nō mia chanīmara fai finōmainīfofā noko yoisharafe nō mia chanīmara fakōinō,” ixō yoiaifono, ⁶ Jesús ato kemani: “Akka mā ea nikakōixō na ifi efapa mā yoikī iskafakerana: ‘Mī tapofoya tsekekainax fakafā mēra pakeax anā foaife,’ mā faino anā foaitiro.”

Āfe xanīfāfe yoiai keskafakī a yonoxomisto axosharakōitiro

⁷ Nāskaxō anā ato Jesús yoini iskafakī: “Na meka fetsari ē mato yoinō nikakakī. Fatora fetsa mā inayaxō mato inapa mato tare ano yonoxotani oaino askayamakī fakkafo kexetani oaino akka, ŷmā iskafakī yoitiro: ‘Pexe mēra ikikerafe tsaoxō pixiki,’ mā fatiromē? ⁸ Maa, mā askafatiroma. Askafatamaroko mā yoitiro iskafakī: ‘Ea pīchaxōfe ē pinō, mā nafakē ea yoixii ē pikī taefanō, mī chipo axiki,’ ixō mato ina mā yoitiro. ⁹ Nāskatari āfe inapa nā āfe xanīfāfe yoia keskafakī mā axosharakōiano iskafakī yoima: ‘Aicho, ea mīa axosharakōia,’ ixō yoima. ¹⁰ Nāskarifiakī māri a Niospa mato yoia keskarakōi fakī iskafakī yoikāfe: ‘Nōkai afama, nōa shināxō nō afaa akima. Nōko Ifāfe noko yoia keskafakī nō aki,’ ixō yoikāfe,” Jesús ato fani.

Jesús diez feronāfake sharafani rashkishi fetseaito

¹¹ Jerusalén ano fāi kakī Jesús Samāria yafi Galilea xatsokama rafe finōfaini. ¹² Nāskax Jesús pexe rasi pasotai nokoni. Nāno mā nokoano chai ixō diez feronāfake nā rashkishi fetseiaifāfe ōikakī kenanifo fāsikōi. ¹³ Akka iskafakī fāsikōi yoinifo: “Jesús, Maestro, noko shināfe,” faifono, ¹⁴ Jesús ato ōikī ato yoini iskafakī: “A ato Nios Kīfixomisfo ano fotakāfe, a mā shara ato ispaxiki,” ato faino, mā fokani koshikōi a isinī ikaifo sharai fetseifono.

¹⁵ Akka fistichi āfe yora sharakōi meekī anā akiki oxō fāsikōi yoikī iskafani: “‘Aicho, fāsi Nios sharakōi! Mā ea sharakōi faki,’ ixō yoini. ¹⁶ Nāskafata Jesús ferotaifi ratokonō mai chachipakefōfā maikiri fepopakefā. “‘Aicho Jesús, mī ea sharafaa! jMī fāsi sharakōi!’” ixō yoini. Akka nā feronāfake Samāria ano ini.

¹⁷ Askafaito Jesús yoini: “ŷAkka diez feronāfake ikafomamē a ē ato sharafa isinī ikaifono? ŷAkka fakimē ranāri a nueve feronāfake? ¹⁸ ŷAkka na feronāfake fisti efe yora yamafixō ekeki oxō Nios aicho faiyomē?” ixō Jesús yoini. ¹⁹ Nāskaxō nā feronāfake yoini iskafakī: “Fininīkafāfe kātaxiki. Mī ea chanīmara fakōinax mā mī sharakī,” ixō Jesús yoini.

Nios xanīfāfe keyokōi yorafo ikināino afe keskara iximē

²⁰ Nāskano fariseofāfe Jesús yōkanifo iskafakakī: “ŷAfetīa nono mai anoax yorafāfe ato xanīfo iximē Nios?” ixō yōkaifono, Jesús ato kemani: “Nios xanīfāfe ato ikināino nō ōitiro. ²¹ Tsōakai yoima iskafakī: ‘Nakīa, ōikapo,’ askatari, ‘Oa onokīa, ōikapo,’ mato faima. Akka Nios xanīfo mato mēra ixō mā mato shināmani nō ōiyamafaino,” ixō ato yoini.

²² Nāskaxō āfe ināfo yoini iskafakī: “Ē samama mato makinoax kai. Mē mato makinoax kaano anā mā ea ōima. Ea ōipaifikī mā ea shinākōixii iskayanā, ‘Nōko Ifo nofe imis keskara nō ōipaikōi,’ ixō mā ea yoifikī a keskara mā anā ōima. ²³ Akka mato fetsafāfe pārakī iskafakani: ‘Nakīa Cristo,’ mato fata, ‘Oa onokīa,’ mato faifāfe, akka ato nikayamakāfe āa mato pārakani kiki. ²⁴ Akka ē nai mēranoax oi oa kana peiki fafetanaito nō ōitiro keskara, nāskarifiāi ē oaito mā ea ōixii ē chaxaferanaito. ²⁵ Akka ē taei omiskōifinayoxii yorafāfe ea ōikaspafono nā ea ōikaspafotā. ²⁶ Akka nā Noé niyoano ini keskai nāskarifiāxii ē anā oaino. ²⁷ Akka yorafo pikāta ayakāta fianākāta ikaifono, mā Noé kanōanāfā mēra ikiano faka faipafāino, keyoi āsai mitokomenifo. Nāskarifiāxii ē oaino ea shinātama afara chaka shināifono.

²⁸ “Nāskarifiāni nā feronāfake Lot niyoano, yorafo pikāta, ayakāta, afarafo fikāta, afarafo ato minikāta āto tarepa afarafo fanakāta pexe fakāta ikaifono, ²⁹ akka Lot mā Sodoma anoax tsekeano, oa oi ikai keskara nai mēranoax atoki chiifā pakeaino keyokōi koofi mitokomenifo.

³⁰ “Nāskarifiāxii ē oaino, ea shinākātama nā ipaiyai keskara shināifono. ³¹ Nāskarifiakī ē oaino fetsa āfe pexe fomākīa tsoaxō anā āfe afara fipai āfe pexe mēra ikitiroma āfe afara fixiki. Askatamaroko ichtiromo. Nāskarifiāi a āfe tarepa yonofai anā āfe pexe ano katiroma āfe afara fixiki. ³² Akka nā Lot āfe āfiōnoa shinākāfe. Nā kēromā āfe afarafo shināi ifiakēkafā ōipai narisatani keskai māri askatiroki. Askayamakāfe. ³³ Akka fētsa shinākī iskafai: ‘Ē Jesús Ifofaito ea omiskōimakaniraiti,’ ixō shinākī ēfe meka kachikiri fai. Nā keskara yora naax omiskōipakenaka. Akka aa eōnoax omiskōiai naax efe isharakōipakenaka.

³⁴ “Akka ē mato yoi, yora rafe nā fakishi mishkitiro fistichi oxakanax ē oaino fetsa efe kaino fetsa nētetiro. ³⁵ Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki. ³⁶ Nāskatari feronāfake rafeta āto tare ano yonokani, fetsa ea ari kai yamarisatanaino, fetsa nētetiro nā omiskōipakenakafo mēra kaxiki,” ixō ato yoiaino, ³⁷ yōkanifo iskafakāki: “Ifo, ¿faki fokanimē?” ixō yōkaifono ato kemani iskafakāki: “Mā tāpitiro a afara naa ano ishpifo fotofaifāfe. Nāskarifiāxii ē fotofaino a ea Ifofamisfo ekeki ferisaxakani,” ixō Jesús ato yoini.

18

Meka fetsafaxō kēro ifomafaōnoa yafi xanīfo Jesús ato yoini

¹ Jesús anā ato yoini meka fetsafaxō ato tāpimaxiki, Epa Nios mēxotaima kīfikani xonenāyamanōfo. ² Ato yoikī iskafani: “Nā pexefā rasi anoxō xanīfāfe Nios shinātama yorafori noimisma. ³ Nā pexefā rasi anori kēro ifomafa ika ini. Nāskakē nā kēro ifomafa mēxotaima a xanīfoki kapaoni yoikī iskafaikai: ‘A ea noikaspamisto ea chakafai kiki ea yoixōfe ea anā chakafayamanō,’ ixō yoifiaito, ⁴ nā xanīfāfe nikakaspayanā tooxanima. Nā kēro ifomafa fekaxtefaiaino akka nāskaxō xanīfāfe shināni iskakī: ‘Ē Nios shināima, yorafori ē noima. ⁵ Akka na kēro ifomāfa ea fekaxtefai kiki, ē yoisharaxonō anā a chakafaito fekaxtefayamanō, mē yoixonano anā ea fekaxtefaima kiki,’ ixō xanīfāfe yoini.”

⁶ Iskafakī Jesús ato yoini: “A xanīfo chakapa yoini keskara nikasharakāfe. Chakāfixō nā kēro ifomafa fekaxtefaiato axosharaniki. ⁷ Akka Nioskai nā xanīfo chaka keskarama. Akka, ¿Niospari āfe yorafo ato afara axosharatiromamē? Noko nikaikai fekaxtetitroma penachāi yafi fakishchāi kīfiaifono ato nikakaspatiroma. ¿Askayamakī, ‘Ea manayokāfe,’ ixō ato yoitiromē? ⁸ Maa. Akka ē mato yoi mā manamiskē koshi mato afara shara faxoxii. Akka a mato chakafamisfo ē ato omiskōimaxii. Akka, ¿ēfe Epa ariax anā ē nāmā fotoaitūa ea chanīmara faifāfe ē ōitoshiximē?” ixō Jesús ato yoini.

Meka fetsafaxō fariseofoya a ato kori fiamisfo Jesús ato yoini

⁹ Jesús meka fetsafaxō ato yoini ato tāpimaxiki. “Ēfi sharaki, ēkai afaa chakafamisma yora fetsafokai ea keskarama,” ixō shināmisfoōnoa Jesús ato yoini iskafakī: ¹⁰ “Feronāfake rafe fonifo Nios kīfiti pexefā mēra anoxō Nios kīfi fokani. Fetsa fariseo ini. Fetsari āfe xanīfo kori fixomis ini. ¹¹ Nā fariseo arese nīxō kīfikī iskafani: ‘Epa Niosi, ē fetsafo keskarama. Akka fetsafo yometsomisfo, chakakōifo, askatari ato āfima chotamiffo. Akka ēkai nā āfe xanīfo kori fīxomis keskarama. Nāskakē ē mia aicho fai. ¹² Na semānā tiifi ē foni tenekī rafefa fafafāini mia shinākī. Akka nā ē fiāiri ē mia paxkaxō fafāini,’ ixō fariseo Epa Nios kīfīni. ¹³ Akka a āfe xanīfo kori fīxomis ori chai nīni. Nāri chai nīxokai nai foispainima. Askatamaroko shināmitsayanā Epa Nios yoini iskafakī: ‘jooal Epa Niospa, ē mia chakafamiski. Eō noikī ea sharafafe ē chakakī,’ fani. ¹⁴ Ē mato yoi nā āfe xanīfo kori fīxomis āfe pexe ano oni mā Niospa āfe chaka soaxonano. Akka nā fariseo āfe chaka soaxonima. Nāskarifiāi fetsa āa anoi yoimesharai: ‘Ē sharara,’ imiskē chipo Niospa afaa imatiroma. Akka fētsa shinākī iskafai: ‘Ēfi afarafo chakafamiski,’ ixō shināito nā keskara yora Niospa chaka soaxotiro afe īpaxanō,” ixō Jesús ato yoini.

Jesús fakefo chishtoxō ato māmāyanā ato Epa Nios kīfixopakeni

(Mt. 19.13-15; Mr. 10.13-16)

¹⁵⁻¹⁶ Nāskatari yorafāfe ato fake mīshti Jesúski efenifo ato māmāpakeyanā ato Epa Nios kīfixonō. Akka nā Jesúsxō tāpimisfāfe ato iskafanifo: “Māto fakefo efexō nōko Ifō fekaxtefayamakāfe,” ato fanifo. Ato askafaifono Jesús ato yoini: “Ato enekāfe na fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini. ¹⁷ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios ika ari mā katiroma,” ixō Jesús ato yoini.

Feronāfake naetapa kori ichapayax Jesús fe mekani

(Mt. 19.16-30; Mr. 10.17-31)

¹⁸ Xanīfo fetsa Jesús ano oxō yōkani iskafakī: “Maestro, mī sharaki, ea yoife ē afaa afeska fatiromāki Nios xanīfo fe ipaxaki,” ixō yōkaito, ¹⁹ Jesús kemani: “¿Afeskakī sharara mī ea

faimē? Akka Nios fisti shara. ²⁰ A Niospa yoini keskara mā mī tāpia. Iskafakī yoini: ‘Mī āfima chotayamafe; askatari yora reteyamafe; askatari yometsoyamafe; askatari chanīyamafe mā kaxpa ato pārayamakāfe. Nāskaxō māto epa yafi māto efa nikasharakāfe,’ ” ixō yoiaito, ²¹ nā feronāfake yoini iskafakī: “Nā mia yoiailfo keskara mē nikamis naetapaxō,” faito, ²² askafakī yoiaito nikakī Jesús kemani iskafakī: “Nāno afara fetsa fisti mī tāpiama. Akka mī afarafo minixō kori fixō nā afaamaisfo ato minife. Nāskax nai mēranoax mī afama mīshifofya ixikai. Nāskafata efe koofe,” ixō yoiaino, ²³ akka nā feronāfake Jesús askafaito nikai, shināchakakōi tooxinima, afama mīshiti ichapayax.

²⁴ Shināmītsaito òikī Jesús ato yoini: “A yora afama mīshiti ichapaya Nios xanīfo ano katiroma, fekax pishta. ²⁵ Māraki camello akoja kini mēra ikipaifi ikitiro fekaxkōi efapamāiax. Nāskarari yora afama mīshiti ichapayato Nios Ifofapai fekaxkōi āfe afama mīshitifomāi potakaspakī,” ixō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Kee! ¿Afesax nō Nios fe ipaxatiromē?” ikanax yoinānifo. ²⁷ Jesús ato kemani: “Akka yorafokai āa ifimetiroma, Nios fistichi yorafo ifitiro. Niospa afama mīshiti fatiro. Tsōakai afama mīshiti fatiroma, Nios fistichi atiro,” ato faito, ²⁸ Pedro yoini: “Ifo, nō mefe okī nōko afama mīshitifo nō òiferani nō mefe oni,” faito, ²⁹ Jesús kemani iskafakī: “Ē mato yoikōi, fētsa Nios xanīfoōxō ato yoikakī āfe pexe òifaita ipe apa yafi āfe afa òifaita āfe onefetsafo òifaita āfe āfi òifaita āfe fakefo òifaita ixō. ³⁰ nāato afama mīshitifo fixii. Nāskatari mā naax Nios fe ipanaka,” ixō Jesús ato yoini.

*Anā Jesús ato yoini: “Mā chaima ea retekanira,” ixō
(Mt. 20.17-19; Mr. 10.32-34)*

³¹ Jesús aōxō tāpimis tūis doce kenani. Nāskaxō ato yoini iskafakī: “Iskaratīa mā nō Jerusalēn ano kaikai. Nānoax nā Niospa meka yoimisfāfe eōnoa yoikī kenenifo keskakōi kaikai ē. ³² Nānoaxō yora fetsafo ea ato achimakani kiki. Nāfāfe ea kaxemetsama fayana ea ichakani kiki ekekī kemo mechoketsayanā. ³³ Ea koshaketsakata ea retekani. Akka ea askafafiaifono tres nia oxata ē ototxi,” ixō ato yoini.

³⁴ Ato askafakī yoiaitokī tsōa tāpinima. Mā nikafikakī tsōa tāpisharanima, Niospa Yōshi Sharapa ato shināmayoamano.

*Jesús yora fisti fēxokōikē Jericó anoxō sharafani
(Mt. 20.29-34; Mr. 10.46-52)*

³⁵ Mā chaima Jesús Jericó ano nokoi kakī, yora fēxo fai ketokonō tsaokē fichini, anoxō ato kori yōkaito. ³⁶ Nānoxō nā fēxo fai ketokonō tsaoxō nikakī yorafā rasi fofānaifāfe ato yōkani: “¿Afaa afeskafakanimē?” ato faito, ³⁷ yoinifo: “Jesús Nazarete ano kafani,” fanifo. ³⁸ Askafafiaifono nikai fāsikōi kenani iskai: “Jesús mīfi David fenakī, ea shināfe,” fani.

³⁹ Askafaito nā rekē foaifāfe iskafanifo: “Nōko Ifo fekaxtefayamafe,” fafiaifono, akka nā fāsikōi kenai iskani: “¡David fenapa, eō noife!” faito nikai, ⁴⁰ Jesús nēteakekafā ato yoini iskafakī: “Ea ifixotakāfe oaiskai kenariai,” ato faito ifixotanifo. Mā oano Jesús yōkani iskafakī: ⁴¹ “¿Ē mia afeskafatiromē?” faito, nā fēxo kemani iskafakī: “Ifo, ē oisharapai afeskaxō ē oisharatiroma,” faito, ⁴² Jesús yoini iskafakī: “Ea mia chanīmara faax mā mī shara. Nāskaxō mā mī oisharai,” fani.

⁴³ Nāskafaino nā fēxo oisharakōitani. Nāskax Jesús fe kakī, “Aicho mā ea Niospa sharafakī, Nios fāsi sharakōikī,” ikax afe kaino yorafāfe òikakī akairi, “Nios fāsi sharakōi,” ikanax akiki inimakōinifo.

19

Jesús fe Zaqueo

¹⁻² Nāskano Jesús Jericó pexe rasi ano finōfaini. Akka nāno feronāfake afama mīshiti ichapaya ika inī, āfe ana Zaqueo. A ato kori fixomisfāfe āfe xanīfo inī. Nāatori āfe xanīfo kori fixomis inī. ³ Nāato Jesús òipaifiki òinima, yora ichapafāfemāi nakifafono Zaqueo mā mīsto pishtamāi axō. ⁴ Nāskakē fāi rekē ichoni Jesús kaito òixiki. Nāskata ifiyya inani nā Jesús kafanai anori. ⁵ Jesús anori finōfāikī fomākā naiskī fichixō yoini iskafakī: “Zaqueo, fotopakekafāfe. Iskaratīa mī pexe ano ē nēteyoikaikai,” faino, ⁶ koshikōi Zaqueo fotopakekafāni. Nāskakē akiki inimasharakōiyanā āfe pexe ari yoini.

⁷ Nāskaito òikakī yora rasichi iskafakī yoinifo: “¡Kee, òikapol! ¿Afeska na yora chakapa pexe ano Jesús iki kaimē?” fanifo. ⁸ Askafafiaifono Zaqueo fininākafā Jesús yoini iskafakī: “Ifo, òipo. Nā afaamaisfo na ēfenāfo ē ato paxkaxonikai. Nā ē atoki yometsomisfo cuatro veces faxō ē ato ināi,” ixō yoini.

⁹ Askafaito Jesús yoini iskafakī: “Iskaratīa mē mia chaka soaxona mī Niospa fake iki mī afe ipanaka,” ixō yoini. Nāskaxō nānofo ato yoini: “Na feronāfake Abraham āfe fena. Abraham Nios nikakōipaoni keskafakī natori Nios nikakōi. ¹⁰ Akka ē oni ēfe Epa Nios anoax a fenofo ato fenayanā ato ifiyoi,” ixō ato yoini.

*Meka fetsafaxō koriōnoa Jesús ato yoini
(Mt. 25.14-30)*

¹¹ Nā yorafāfe nikanifo Jesús ato yoiaito māmāi Jerusalén chaima faifokakī, “Mā Nios xanīfo chaima nokoira,” ixō shināifono. Nāskara shināifono mā tāpixō Jesús meka fetsafaxō ato yoini. ¹² Iskafakī ato yoini: “Nāno feronāfake fetsa xanīfo keskara ini. Nā feronāfake chai kani mai fetsa ari, nāriax mā xanīfo ikax opai. ¹³ Akka kayoxoma a yonoxomisfo diez kenani. Nāskaxō ato kori ichapa ināketsayanā ato yoini iskafakī: ‘Na kōri afara ichapa mā fikāfe nā ē oaitiā,’ ixō ato yoini. ¹⁴ Akka yorafāfe āfe mai anoxō noikaspanifo. Nāskaxō acho yora rafe nīchinifo iskafakī ato yoitanofo: ‘Na feronāfake nō fichipaima nōko xanīfo inō,’ ixō ato yoitanofo.

¹⁵ “Akka askafafiaifono mā xanīfo itani anā anoris oni āfe mai ano. Mā nokoxō a yonoxomisfo kenamani nā ato kori ināfaini tii, tāpixiki afe tii kori fiafomākī. ¹⁶ Nāskano fetsa akiki oitaexō yoikī iskafani: ‘Ifo, a ea mīa kori ināfainitima finōmainīfōfā kori exe diez faxō mē mia fixōa,’ fani. ¹⁷ Askafaino āfe xanīfāfe kemani: ‘Aicho, mīfi ea yonoxō sharamiski. Ē mia afaa ichapa ināyamafiano finōmainīfōfā mīa fixosharakōia. Nāskakē pexe rasi diez anoa ē mia xanīfo imai,’ ixō yoini. ¹⁸ Nāskatari āfe ina fetsari akiki oxō yoikī iskafani: ‘Ifo, a ea mīa kori ināfainitima finōmainīfōfā kori exe cinco faxō mē mia fixōa,’ fani. ¹⁹ Nāskafaino nāri kemakī iskafani: ‘Mīri cinco pexe rasi anoa xanīfo ikikai,’ fani. ²⁰ Akka a yonoxomis fetsari akiki oxō iskafakī yoini: ‘Ifo, nakīa mī kori ē mia mekexona samapa rakoxō. ²¹ Ē mikiki mesekī, mīmāi feronāfake mitsisipakōikē, mīnāyamafekē mī fimis, askatari a mī fanama anoafori mī fimis. Nāskakē ē mikiki mesekī ē mia kori mekexona, nakīa mī kori,’ ixō yoini.

²² “Askafaito nikakī āfe xanīfāfe yoini iskafakī: ‘Mī ea yonoxosharamisma, mī chakakōi, askatari mī xanikōi. Mī mekaōxō ē mia omiskōimani. Mī ea iskafakē, na feronāfake mitsisipakōi āfenāyamafekē fimis, askatari a fanama anoafori fimis mī ea fakē. ²³ Akka, ¿afeskakī banco ano mī ea kori faxōfamamē mā ēfe kori ichapano ea ināxikima, mē anā ēfe pexe ano ē oano?’ ²⁴ Nāskata nā anoafō ato yoini iskafakī: ‘Na feronāfake kori fiakāfe nā diez faxō finōmainīfōfā ea kori fixōa ināxikakī,’ ato faito, ²⁵ kemakī iskafanifo: ‘Ifo, akka nāatoroko mā diez faxō finōmainīfōfā fia,’ faifono, ²⁶ anā xanīfāfe ato kemani: ‘Akka ē mato yoi nā afara ichapaya nō afara ichapa inātiro. Akka a afaa ichapayama, āfe afara nō fiatiro anā afaa ichapaya inōma. ²⁷ Askatari a ea noikaspakakī a ea xanīfo fakaspafo, fitakāfe ato retexikakī ēfe ferotaiifi,’ ixō xanīfāfe ato yoini,” Jesús ato fani.

*Jesús nokoni Jerusalén ano
(Mt. 21.1-11; Mr. 11.1-11; Jn. 12.12-19)*

²⁸ Nāskara ato yoita Jesús kani Jerusalén ano a aōxō tāpimisfo fe. ²⁹ Mā chaima Betfagé fe Betania ano nokoxō machi Olivos anoxō a aōxō tāpimis rafe nīchini. ³⁰ Ato iskafakī yoiyanā: “Mēstekōi fōtakāfe oa ono pexe rasi ano. Mā nokoxō nānoa burro fake nexekē mā fichi kaikai tosa aō nīmisma. Tēpexō ea efexotakāfe. ³¹ Anoxō mato yōkaifono iskafakī: ‘¿Afeskakī mā burro tēpeimē?’ mato faifono ato yoikī iskafakāfe: ‘Nōko Ifāfe fichipaiyaito nō ifixonioya,’ ato fakakī,” Jesús ato fani. ³² Ato nīchia fōkaxō ōiafo nā Jesús ato yoiā keskarakōi fichitoshinifo.

³³ Mā burro tēpeaifono, nā burro ifofāfe ato yōkanifo: “¿Afeskakī mā noko burro tēpekaimē?” ato faifono, ³⁴ ato kemanifo iskafakakī: “Nōko Ifāfe fichipaiyaito nō ifixonioya,” ato fanifo. ³⁵ Nāskaxō burro kateki āto rapati kakafakaxō efenifo Jesús ano. Nāskaxō a kamaki Jesús tsoainīfōfānifo. ³⁶ Nāskakē Jesús tanaima kani. Akka yorafāfe āto rapatifo fai nēxpakīa kakafafonifo. ³⁷ Mā chaima machi Olivos tisiri mekani keyokōi a aōxō tāpimisfāfe fāsikōi yoinifo iskafakakī inimayanā: “¡Aicho, Nios fāsi sharakōi! ¡Niosxō afama mīshiti mī akaito nō oia!” fanifo. ³⁸ Iskafakī yoinifo akiki inimakakī: “¡Aicho, nōko xanīfo nokoki oakī! ¡Niospa nai mēraxō shara famafafāini! ¡Niospa yoini Jesús nōko xanīfo inō, aōnoax yorafa Nios fe nīpaxanōfo! ¡Aicho, Nios fāsi finakōial!” ixō fāsikōi yoinifo.

³⁹ Nāskafaifono fariseofāfe yorafā rasi mēraxō yoinifo iskafakakī: “Maestro, mī inafō yoife iskanōfoma,” faifono, ⁴⁰ akka Jesús ato kemani: “Ē mato yoi nafāfe ea yoisharayamaifono, na tokirifāfe fāsikōi eōnoa meka shara yoikeranafo,” ixō Jesús ato yoini.

⁴¹ Mā chaima Jerusalén ano nokoax nā pexe rasi anoafō ato ōi, atoōnoax Jesús oiani. ⁴² Iskafakī ato yoiyanā: “Ea chanīmara faax mā isharapakenakakī. Akka mākai tāpiama iskaratīa Niospa Fake mā noko. Eakai mā xanīfo fapaima ē mato imasharapaihaito, mā ea nikakaspai. Iskaratīa ē mato afeskafatiroma. Mā mā fenoa. ⁴³ Fatora penata mato noikaspakani nā mato noikaspaifāfe. Nāskaxō mato chetekaxō mato mēra ikiferakaxō mato retekī mitokani. ⁴⁴ Māto pexefori pāoiki fetsexii, mī kaifofoya mato retekī mitoxikani tsoa pishta ichoxima, mā ea nikakaspamis Niospa ea matoki nīchifiano,” ixō Jesús ato yoini.

Jesús a Nios kífiti pexefā mēraxō a ato ināifo ato potani

(Mt. 21.12-17; Mr. 11.15-19; Jn. 2.13-22)

⁴⁵ Nāskata Nios kífiti pexefā mēra Jesús ikikaixō oia a mēraxō afarafo ato miniaifāfe oikī ato kāmiani. ⁴⁶ Naskafata ato yoini iskafakī: “Niospa meka yōra kenekī iskafani: ‘Mā ēfe kífiti pexefā mēraxō mā ea kífitiro,’ ixō yoifinino, akka nā yometsofāfe pexe keskara mā famis,” ixō Jesús ato yoini.

⁴⁷ Nāskata Nios kífiti pexefā mēraxō pena tii Jesús ato yoini. Ato yoifaino a ato Nios kífixomisfāfe āto xanīfofo feta a Moisés yoikī kirika keneni keskara ato tāpimamisfāfe judeofāfe āto xanīfofofāferi afeskaxoma Jesús retepaikakī shinānifo. ⁴⁸ Akka afeskaxō retetiroma inifo, yorafāfemāi nikasharapaikōiaifono a Jesús ato yoiiai keskara.

20

“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī

(Mt. 21.23-27; Mr. 11.27-33)

¹ Pena fetsa Nios kífiti pexefā mēra Jesús ikikaini anoxō yorafo tāpimani afeskax Nios fe ĩpaxatirofomāki. Anoxō ato yoiaino a ato Nios kífixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīfofori fenifo. ² Iskafakī yōkanifo: “¿Tsōaōxō mī iskafaimē? ¿Tsōa mia yoiāmē mī iskafanō?” ixō yōkanifo.

³ Askafaifono Jesús ato kemani: “Ēri mato yōkanō ea yoikapo. ⁴ ¿Tsōa Juan nīchiamē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka.”

⁵ Ato askafaino āa ranā mēenāpai fetseyanā shinānifo iskakakī: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afeskakī mā Juan nikamismamē?’

⁶ Akka nō iskafakī yoitiroma: ‘Yorafāfe Juan nīchinifo,’ nō fatiroma yorafāfemāi tokirinī tsakakakī noko retenōfo. Akka keyokōichi shinānani Niospa ato shināmanaino, Juanmāi Niospa shināmanaino ato yoiaino,” ikanax yoinānifo. ⁷ Nāskaxō kemanifo: “Nō tāpīama tsōara Juan nīchini ato maotisafakī ato faka mēra ikimapakenō,” faifono, ⁸ akka Jesúsri ato kemani iskafakī: “Ēri mato yoima tsōaōxō ē iskafaimākai,” ixō ato yoini.

Meka fetsafaxō Jesús ato yoini a ato yonoxomis chakafōdnoa

(Mt. 21.33-44; Mr. 12.1-11)

⁹ Nāskata taefakī Jesús yorafo yoini. Meka fetsafaxō ato yoikī iskafani: “Feronāfake fētsa āfe tare ano uva fanaxō fētsafāfe kexexonō ato ināfaini chai kayoni. ¹⁰ Nā āfe fana fimimistīa ifāfe a yonoxomis nīchini a kexexonafo ato yōkaxō āfe fana fimifo fixotanō nā āfenā tiiri. Akka nā fana kexeaāfe seteketsakaxō afaamais nīchinifo. ¹¹ Nāskata tare ifāfe anā a yonoxomis fetsa nīchini. Akka nāari ĩchaketsayanā seteketsakaxō afaamais nīchinifo. ¹² Nāskaxō afianā fetsari nīchini. Akka mā kaano nāri imi tofeketsakaxō tarepaxō potanifo.

¹³ “Nāskata tare ifāfe shināni: ‘¿Ē afeskafaimē? Ēfe fakekōi a ē aō noiai mia nīchīpa, oĩtsai ēfe fake nikakōitirofoki,’ ixō nīchini. ¹⁴ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato ēfe apa naano na fanafo fixi kiki. A nari nō retenō na tare nōkonā inō,’ ikax yoinānifo. ¹⁵ Nāskakata achikaxō tare pasotai iyokaxō retenifo. Akka, ¿afaa mā shināimē ato afeska faimē a tare ifāfe? Ē mato yoinō. ¹⁶ Kaxō a tare kexemisfo ato retetekī mitoxō, fetsafo āfe tare ināxii afāfe kexexonōfo,” Jesús ato fani.

Ato askafaito nikakani iskanifo: “Askayamapainōra,” inifo.

¹⁷ Akka askaifāfe oikī Jesús ato yoini: “Akka, ¿afeskakī Niospa meka iskafakī kenenifomē? Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo, ixō kirikaki kenenifo. ¹⁸ Akka tokiriki fetsa pakekī aō xao teketiro. Akka tokiri yoraki pakekī renekōitatiro.”

¹⁹ Nā ato Nios kífixomisfāfe āto xanīfofo feta a Moisés yoikī kirika keneni keskara ato tāpimamisfāfe Jesús achipainifo karaxa mēra ikimapaikakī. Atoōnoa meka fetsafaxō yoiaino nikakakī akiki oitifishkikaki. Akka achipaifikakī tsōa achinima yorafoki mesekakī.

“¿Xanīfo nō kori inātiromē noko yōkaito?” ixō Jesús yōkanifo

(Mt. 22.15-22; Mr. 12.13-17)

²⁰ Nāskakaxō a ato feparamisfo nīchinifo Jesús fe yoinātanōfo fanīrira Jesús ato yoiaino nikakakī āto xanīfofo yoixikakī Jesús achinōfo. ²¹ Nāskakē nāfāfe yōkanifo: “Maestro, mā nō tāpia a mī yoiiai anori chanīmakōi mī yoimis. Nā mī ato yoiiai anoriri, nokori yorafāfe yoimisfo. Chanīmakōi mī yoimis nā Niospa fichipaiyai keskarakōi. Afara yoipaiikai mī ranomisma, mēstekōi mī ato yoimis. ²² Akka chanīmamakī noko yoife na romanō xanīfo nō kopifatiromāki askayamakī nō kopifatiroma rakikīa,” ixō yoinifo.

²³ Akka Jesús tāpini feparapaiyāifāfe. Nāskaxō mā tāpixō ato yoini, ²⁴ “Ea kori exe fisti ispakāfe ē oinō,” ato faito ispaifono ato yoini iskafakī: “¿Tsōa femānā na keskaramē? ¿Tsōa

aneri na kori exe ano keneamē?” ixō ato yōkaito kemanifo iskakakā: “Nōko xanīfo César keskara,” faifono, ²⁵ Jesús ato yoini: “Akka na kori exe Césarānkē César inākāfe, akka Niosnānkē Niosri inākāfe.”

²⁶ Ato askafaito nikakani, rateyanā yoinānifo: “Kee, na yoiāi keskarakai tsōa finōtirioma. Tāpikī finakōia,” ikanax āa ranā yoinānifo. Nāskakē yorafāfe ōiaifono Jesús fanīrira mekamapaifaifono fanīrira mekatirioma ini. “Kee, finakōia,” ikanax anā tsoa tooxinima.

*“Yora naax anā otoax ¿afeskatiromē?” ixō Jesús yōkanifo
(Mt. 22.23-33; Mr. 12.18-27)*

²⁷ Nāskata saduceofo Jesús ōifokani fonifo. Nā saduceofāfe yomisfo iskakakā: “Yora naaxkai anā afeskax ototirioma,” ixō yomisfo. Akka nāfāfe Jesúski fōkaxō yōkanifo ²⁸ iskakakakā: “Maestro, noko Moisés kirika kenexoni iskakakā yoiikī: ‘Feronāfaka fetsa āfiyax afeta fake akamax naano one fētsa nā kēro ifomafa fitiro āfe āfi inō. Mā fixō afeta fake atiro āfe ōchi fake inō,’ ixō Moisés keneni. ²⁹ Akka nō mia yoinō, nā naneti siete feronāfaka inifo. Āto ochi iyoa āfiyai taeni. Mā āfiyax afeta fake akamax nani. ³⁰ Mā āfe ochi naano chipokoto fini. ³¹ Nāskata nā chipoko fētsari nā kēro fini. Nāskarīfiai nāari nani afeta fake akamax. Nāskakanax akikinoax nai keyonifo nā siete feronāfaka afeta fake akanamax. ³² Nāskata mā nai keyoafono nā kērori chipo nani. ³³ Akka, ¿fatoto mā otokaxō na kēro fixikanimē, nā fistimāi fīpakaxō?” ixō yōkaifono, ³⁴ Jesús ato kemani: “Yorafo nono mai ano niyokanax feronāfakēfo fe kērofo fianāyokani. ³⁵ Akka fatorafāfe Niospa meka chanīmara faafono Niospa ato imofamarito afe ipaxanōfo. Akka nāfo mā otokanax feronāfakēfo fe xotofakēfo anā fianātirioma Nios ika ari nokokanax. ³⁶ Nāskakē anā tsoa natiroma. Ājirifo keskara ixikani Niospa fakekōifori ixikani mā otokanax. ³⁷ Akka Moisés nikani oa fana kooai xoisai keskara mēranoax mekaito, yoiikī askafaito: ‘Mā nāfanixakakī mā anā otoafō, ēfi Abraham ikaino Isaca ikaino, Jacobo ikaino, ē āto Nioskōiki. Iskaratīa efe niafo,’ ixō yoiāito Moisés nikani. Nāskakē nō tāpitiro naax nō anā ototiro. ³⁸ Akka Epa Niospa naafoma keskara ato ōi Epa Niosnoax keyokōi niafo,” ixō Jesús ato yoini.

³⁹ Nā Moisés yoiikī kirika keneni keskara ato tāpimamisfāfe ranārito iskakakā yoinifo: “Maestro, mī ato yoišharakōi,” fanifo. ⁴⁰ Nāskakē anā tsoa yōkapainima, atomāi kemasharakōiaito akiki rāfikakī.

*“Akka, ¿tsōa fenamē Cristo?” ixō Jesús ato yōkani
(Mt. 22.41-46; Mr. 12.35-37)*

⁴¹ Nāskata Jesús ato yōkani: “Akka, ¿afeskakī Cristo David āfe fenara mā faimē? ⁴² Nā David Niospa Yōshi Sharapa shināmanaino fanāiti kirika keneni iskakakī:

Epa Niospa ēfe Ifo yoini iskakakī: ‘Mī efe xanīfokōi İpanakakī. ⁴³ Akka nā mia noikaspaifo mī ato finōkōinō ē ato mī nāmā nīchikai,’ ixō yoini. ⁴⁴ Akka, ¿afeskai Cristo David āfe fena itiriomē, nā David Cristo ēfe Ifora fafiapaonino?” ixō Jesús ato yoini.

Jesús ato yōani a Moisés yoiikī kirika keneni keskara ato tāpimamisfāfe anorima ato yoiāifono

(Mt. 23.1-36; Mr. 12.38-40; Lc. 11.37-54)

⁴⁵ Keyokōichi yorafāfe nikaifono Jesús aōxō tāpimisfo yoini, ⁴⁶ “Ōișharakakī. A Moisés yoiikī kirika keneni keskara ato tāpimamisfāfe mato pārāpāikani kiki. Akka nāfo rapati chainipa safekanax fofāsapaimisfo. ‘Noko yoișharakōinōfora,’ ikanax tsaoti șharakōi fenamisfo ičanāti pexe anoxō, a piaifo anori șharakōi ano tsaopaimisfo, ‘Noko ōișharanōfora,’ ikanax. ⁴⁷ Nāskakaxō kēro ifomafa pexe fīamisfo. Nāskatari Epa Niospa ato omiskōimāki finakōixii,” ixō Jesús ato yoini.

21

*Kēro ifomafa afaamaisfixō Epa Nios ināșharakōini
(Mt. 12.41-44)*

¹ Jesús ōini a kori ichapayafāfe kori naneti mēra kori naneāifāfe Nios kīfitti pexefā mēraxō. ² Nāskatari ōini a kēro ifomafa afaamaisfixō āfe kori exe rafe kori naneti mēra āfe kori nanekī mitofaito. ³ Nāskata ato yoiikī iskakani: “Chanīma ē mato yoiikōi, na kēro ifomāfa afaamaisfixō ato finōmainīfofā inākōia. ⁴ Akka na kori ichapayafāfe mā Nios ināfikakī tsōa keyo ināma, texe faafo. Akka na kēromā omiskōifikī āfe kori rafe potakī mitokōia. Anā afanā a piāi fitirioma,” ixō Jesús ato yoini.

*Jesús ato yoini na Nios kīfitti pexefā pāoixii xō
(Mt. 24.1-2; Mr. 13.1-2)*

⁵ Nāskata a afe rafea fetsafāfe Nios kīfiti pexefāōnoa yoinifo iskafakāki: “Nōko Nios kīfiti pexefā sharafinākōia. Tokiri petsanāmeax nā kori ichapayafāfe afara sharafofikaxō nētakeafo,” ikaxō yoiaino, Jesús ato yoini: ⁶ “Akka na mā ōiai anākai tokiri petsanāmexima, keyokōi pāoixii. Na tokirifori maoui fetsexii,” ixō Jesús ato yoini.

Afaa afesaximākai mā chaima nōko mai keyoaino Jesús ato yoini

(Mt. 24.3-28; Mr. 13.3-23)

⁷ Nāskakē yōkanifo iskafakī: “Maestro, ǀna mī yoiyai keskai afetīa iximē? ǀAfesaxō nō tāpitiromē na ixiai keskara?” ixō yōkanifo.

⁸ Askafaifono Jesús ato kemani: “Kexemesharakani mā ato nikaino mato afara chakafamatirofoki. ǀEfi Cristokī. Mē oa māto xanīfo ixiki,” ixō mato pārapaikani kiki. Nāskakaxō afāfe yoiyani kiki a ē yoisim keskara. Akka yoiāifāfe ato nikayamakāfe. ⁹ Akka yorafo retenāifāfe nikai rateyamakāfe. Askatari a fetsafāfe āto xanīfofoti potapaiyāifāfe nikairi rateyamakāfe. Nā ē mato yoisim keskakōiyoxii kiki. Nāskafax nōko mai fena keyoxima, chipo ixii.

¹⁰ “Akka yorafo mai fetsa anoax mēenāpaiyāifono, yora fetsafori mai fetsa anoax retenāixikani. ¹¹ Nāskāifono nā mai fetsa anofo mai naya naya ixii. Askatari fonāiki finakōixikani, afaa pikanima. Askatari pae finakōia ixii nā mai fetsa anofo. Askatari nā nai mēranoafori a ōimismafo ōixikani. Ratekōixikani.

¹² “Akka askayoamano, mato achikaxō fāsi mato omiskōimaxikani. Mato achikaxō judeofāfe āto ichanāti pexe mēra mato iyokani xanīfofōfāfe mato yōkanōfo. Nāskakaxō mato karaxa mēra ikimakani xanīfofōfāfe. Eōxō mato askafakani. ¹³ Mato askafaifono mā eōnoa ato yoitiro. ¹⁴ Akka kayoxoma shināchakayamakāfe. Ē mato shināmanikai mā ato yoisharanō. Afaa nō ato faimē iyamakāfe. ¹⁵ Akka ē mato ato kemamasharai kai fanīrira mato mekafaifono mā ato kemasharanō. Nāskakē nā mato noikaspaifāfe mato kemakanima, fanīrira mā noko yoi tsōa mato faima. ¹⁶ Akka māto epafāfe māto efafo feta mato ato achimaxikani. Māto ochifāfe, māto kaifofōfāfe mato fe rafemisfāferi mato askafaxikani. Akka ranāri mato retexikani. ¹⁷ Akka eōxō yorafāfe keyokōichi mato noikaspaixikani. ¹⁸ Akka mato noikaspaifāifono Epa Niospa mato kexesharai mato retēfāifonokai māto fero mēsho fenonakama. ¹⁹ Akka afara afeskara ifaino ea shināmakiyamakāfe. Nāskax mā efe isharpakenakaki.

²⁰ “Jerusalén anofo sorarofāfe ato cheteafono mā ōikī mā tāpitiromē mā chaima ato reteafono, āto pexefori pāo iki keyoi. ²¹ Nāskakē a Judea ano ikafo māchi keya ari ichotanōfo. A Jerusalén ano ikafori nā pexefā rasi mēranoax tsekenōfo. A Jerusalén pasotai ikafori anā Jerusalén ano feyamanōfo. ²² Nā Niospa meka yoiiki kenenifo keskakōi fakī Jerusalén anofo Niospa ato omiskōimani. ²³ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono. Nāskakē nā Judea mai anofo omiskōifinakōixikani, Niospa ato omiskōimanaino. ²⁴ Ranāri ato kenopa retekani. Akka ranāri ato achikaxō karaxa mēra ato ikimakani mai fetsafo ano. Ato askafaifono nā judeofoma Jerusalén ano iyokani. Akka nā Niospa ato omapaiyāitīa judeofo Jerusalén ano anā fexikani,” ixō Jesús ato yoini.

Niospa Fake fotoaino afe keskara iximākai ixō Jesús ato yoini

(Mt. 24.29-35, 42-44; Mr. 13.24-37)

²⁵ Anā Jesús ato yoini iskafakī: “Nāskakē xini fe oxe fishifori a nō ōimis keskara anā iki fetseima. Fetsa keskara iki fetsei. Askaito ōikani nono mai anofo ratekōixikani. Fākafāri poo iki mesenaiito nikakani. Ratekōixikani nōkai iskara afaa ōimisma ikanax. ²⁶ Nāskaito ōikani yorafo ratekani shinā fenoyotaxikani. Afarafo afeskaraito ōikani a ōiyomisfoma keskara ōikani. ²⁷ Nāskatari ea ōixikani ē nai mēranoax nai kōinī ē fotoiyoiito. Shara finakōia ē fotoaito ea ōixikani. ²⁸ Nāskakē nā ē mato yoiyai keskai taei afarafo afeskaraino, inimayanā ea manasharakāfe, ea chanimara fayana. Mē chaima okī ē mato ifirisa fatanō,” ixō ato yoini Jesús.

²⁹ Nāskaxō anā meka fetsafaxō ato yoini iskafakī: “Akka shinākāpo yōkka fiyafi ifi fetsaōnoa. ³⁰ Āfe pei siri ikaito ōikī mā tāpitiromē māmāi chaima xiniaito. ³¹ Nāskarifiakī mā tāpitiromē nā ē mato yoisim keskara afarafo afeskaraito ōikī mā chaima Nios Xanīfo oi kiki xanīfo ikiyoi nono nāmānoax.

³² “Akka ē mato pāraima. Na afarafo ē mato yoiyai keskaito na yorafāfe nayokaxoma ōiyokani. ³³ Akka nai fe mai keyoi. Akka ēfe meka fisti keyonakama na ē mato yoiyai keskakōi.

³⁴⁻³⁵ “Nāskakē kexemesharakāfe māto ōitinī afaa chaka shinākakīma. A mā pāepaiyai fisti shināyamakāfe. Afaa fetsafori shināyamakāfe. Anori shinākī a ikaifo keskakī mā ea chanimara fatiromakī. Akka afo itipinīsharafomano ē nokorisataxii. Māraki poomānā tanasharaxma tarapa faafo mēra ikiyamatiro. Māri nāskatiro ea shināxma. Nāskata afarafo afeskara iki fetseaino nā mai tio anoax omiskōi fetsexikani. ³⁶ Nāskakē itipinīsharakāfe,

Epa Nios mēxotaima kīfifafāikāfe afara afeskaraino omiskōixikakima. Nāskax mā ekeki chipo nokoaino ē matoki inimaxikai.” ixō Jesús ato yoini.

³⁷ Nāskata Jesús pena tii Nios kīfiti pexefā mēraxō ato yoini. Akka fakish tii machi āfe ane Olivos ano oxatai apaoni. ³⁸ Nāskakē yorafā rasi pena tii akiki fepaonifo Nios kīfiti pexefā ano. Anoxō ato yoiāito nikai fevani.

22

*“¿Afeskaxō nō Jesús retetiromē?” ixō shinānifo
(Mt. 26.1-5, 14-16; Mr. 14.1-2, 10-11; Jn. 11.45-53)*

¹ Mā chaima fista ikaino a Niospa ājirinī Egipto anoxō āto fake iyoafo retenima shinākakī pāa faraxatimais pipaonifo, Pascua fistaṭia. ² Afia penata a ato Nios kīfixomisfāfe āto xanīfo feta a Moisés yoikī kirika keneni keskara ato tāpimamisfāfe afeskaxoma Jesús pāraxō retepaikani yorafoki ratenifo.

³ Nāskaifono Judas mēra Satanās ikini. Nā Judasri Jesús āfe ina ini. Āfe ane fetsa Iscariote ini. ⁴ Nā Judas kani a ato Nios kīfixomis xanīfofo yafi a anoxō Nios kīfiti pexefā kexemisfo xanīfofo yoikai. Anoxō ato yoini iskafakī: “¿Afeskaxō ē mato Jesús achimatiromē?” ixō ato yōkani. ⁵ Akiki inimayanā yoikī iskafanifo: “Aicho, nō mia kori ināi mī noko ato Jesús achimaxonō,” ixō Judas yoiāifono, ⁶ “Ia. Ē mato achixonō,” ixō ato yoini. Nāskaxō Judaspa shināni afetia ē ato Jesús achixotiromē ini. Yorafā rasichimāi naki faafono afeskaxō achitiroma ini.

*Mā chaima reteafono Jesús aōxō tāpimisfo feta yātapake pini
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

⁷ Akka nā fista Pascuatia pāa faraxatimais pinifo. Afia penatari oveja fake retexō Nios ināpaonifo āto xinifāfe anifo keskafakī. Akka mā fista pakeano, ⁸ Jesús Pedro yafi Juan nīchini ato yoikī iskafayanā: “Fokaxō itipinīsharafatakāfe fistaṭia nō pinō,” ato faito, ⁹ kemanifo: “¿Faniāxō nō itipinīsharafaikaimē?” faifono, ¹⁰ Jesús ato kemani: “Mā mā pexefā rasi ano nokoxō feronāfake fisti mā fichi kaikai keshoki faka tetsaomexō foikaino. Nā chīfafaitakāfe fato pexe mēra ikikaimākaī ōixikakī. ¹¹ Nānoxō nā pexe ifo yoikī iskafaxikakī: ‘Nōko Ifāfe noko yoikī iskafakī: ‘Fato pexe kene mēraxō eōxō tāpimisfo feta fistaṭia ē pitiro māki ixō yōkatakāfe nōko Ifāfe noko faa,’ mā faito, ¹² nāato mato ispai kiki pexe keya kene efapaya itipinīsharakōia. Nāno itipinīsharafakāfe anoxō nō pinō,’” Jesús ato fani.

¹³ Nāskata mā fokaxō fīchinifo nā Jesús ato yoiā keskarakōi. Nāskaxō itipinī fanifo Pascua fistaṭia pixikakī.

¹⁴ Mā itipinīshara faafono, Jesús a aōxō tāpimisfo fe kaax, mīsa ano tsaoni. ¹⁵ Nāskaxō tsaoafono Jesús ato yoini: “Ē mato feta pipaitiani na fista Pascuatia ē nayoxoma. ¹⁶ Akka ē mato yoikōi ēkai anā mato feta Pascua fistaṭia pifainakama. Akka nā mā Epa Nios xanīfo ano nokoaitia ē mato feta pixii inimayanā.”

¹⁷ Nāskata kecho tsoainifofā Apa Nios kīfikī, “Aicho,” fata, ato yoikī iskafani: “Na mato tiito ayakāfe. ¹⁸ Ē mato yoikōi ē anā mato feta na fimi ene ayaima. Akka nā ēfe Epa Nios fe ē xanīfo ixō keyokōi ē yorafa ikixō na fimi exe ē anā ato feta ayaxii,” ixō ato yoini.

¹⁹ Nāskaxō anā pāa tsoainifofā, Apa Nios kīfikī aicho fata, ato pāa kaxkexopakeyanā ato yoikī iskafani: “Nafi efe nami keskarakī. Matoōnoax ē nai. Nāskakē nā mā piatīa ea shināfafāikāfe,” ixō ato yoini.

²⁰ Nāskarifiakī kecho tsoainifofā nā pixō ato yoini iskafakī: “Na ayatiōxō ē mato afara fenashara yoi iskafakī: Ēfe imi foaino ē matoōnoax nai mā ēfe Epa Nios fe ipaxanō.”

²¹ “Akka nā efe mīsa ano tsoa fetsa ea ato achimani. ²² Akka nā eōnoa yoikī kirika kenenifo keskakōi ē naikai. Akka nā ea ato achimani akairi omiskōi finakōi,” ixō Jesús ato yoini.

²³ Ato askafaito nikakani āa ranā yoināi fetsenifo: “¿Fatotokai nō achimanimē?” ikanax āa ranā yoinānifo.

Akka, ¿tsoa sharafinakōiamē?

²⁴ Nāskakē aōxō tāpimisfo feratenānifo fatokai sharafinakōiamē ikanax. ²⁵ Nāskaifono Jesús ato yoini iskafakī: “Nā yora fetsafo xanīfokaxō ato ferateyanā ato yonomamisfo. Ato askafafiakakī nōko xanīfo noko afara shara faxō fafāini ixō nokoōnoa yoikāfe, ato famisfo.

²⁶ “Akka māri askayamakāfe. Askatamaroko nā sharafinakōia mato exto chipoko keskara ikāfe. Nā chipokofāfe āto iyoafo ato yonoxosharatirofo keskara ikāfe. Akka xanīfo ipaikakī fetsafo sharafakāfe ato axosharaxikakī. ²⁷ Akka, ¿fatokaimē sharafinakōia, nā mīsa ano tsoaxō pimirsaka, askayamai nā ato pimamsraka? Akka nā mīsa ano tsoaxō piāi nā sharafinakōia. Akka ē mato fe ixō ē mato yonoxomis keskara ē imis.

²⁸ “Akka mā efe itiani mā ea potamisma, na afara chakafāfe ea chakafafiaino. ²⁹ Nāskakē ēri mato xanifo imaxii, ēfe Epa Niospa eari xanifo imaino. ³⁰ Akka mā efeta pita efeta ayata mā faxii ēfe mīsa ano tsaoxō. Nāskakē mā mā xanifo xō nā doce nōko kaifo israelifāfe mā ato ikixii,” ixō Jesús a afe rafeafo yoini.

“*Ē Jesús ōimisma, Pedro ixiaino, Jesús ato yoini*
(Mt. 26.31-35; Mr. 14.27-31; Jn. 13.36-38)

³¹ Nāskata nōko Ifāfe Simón yoini iskafakī: “Simón, ōipo Satanás Nios yōkaxō mato afara chakafamapai, mā ea potanō. ³² Akka ē mia Epa Nios kīfixoni mī ea nikakī xateyamanō. Akka mā mī paxkafixō mī ea anā Ifofakōixō a mefeta ea Ifofaafō ato yoisharafe ea Ifosharafanōfo,” ixō yoiāito, ³³ Simón kemani: “Īfo, ē mia potanakama. Mia karaxa mēra ikimanaifono ēri mefe kai. Mia reteaifonori ēri mefe nai,” faito, ³⁴ Jesús kemani: “Pedro, ē mia yoi iskaratīa takara fene keoyoamano mī ato yoi iskai: ‘Ē Jesús ōimisma, ixō mī ato yoi kī tres fai,’ Jesús fani.”

“*Mē samamashta omiskōikai, Jesús ato fani*

³⁵ Nāskafata Jesús anā ato yoini iskafakī: “Ē mato nīchiyamea pishamais koriri mā foyameama, sapatori mā fotima. Akka ē mato nīchia kaxō ĵmā afaa yopatimē?” ato faito kemakakī iskafanifo: “Maa. Nōkai afaa yopatima,” fanifo.

³⁶ Nāskata ato yoini iskafakī: “Akka iskaratīa nā pishayato āfe pisha foikanō, āfe koriyaifi. Akka nā keno yamato āfe rapati minixō kori fixō, nā kōri keno fetša finō. ³⁷ Akka ē mato yoi nā eōnoa yoi kī kirika kenenifo keskai mē askakōi. Ē askarayamafiano ea pārakani yora chakafāfe, ‘Nato ato chakafamis,’ ea fakani. Nāskakē nā eōnoa yoi kī kirika kenenifo keskara nē askakōi,” ixō ato yoiāito, ³⁸ a aōxō tāpimisfāfe yoinifo: “Īfo, nono keno rafe,” faifono, ato kemani: “Nā rafe inōkī anā nō yopaimakai. Nāskanō,” ixō ato yoini Jesús.

“*Getsemani anoxō Jesús Apa Nios kīfini*
(Mt. 26.36-46; Mr. 14.32-42)

³⁹ Nāskata Jesús kani nā kamis keskai machi Olivos ano. Aōxō tāpimisfori afe fonifo. ⁴⁰ A kamis ano mā nokoxō ato yoini: “Epa Nios kīfikāfe Satanás mato afara chakafamapaiyai keskara axikakīma,” ixō ato yoini.

⁴¹ Ato askafata ato makinoax orishta kaxō Apa kīfini ratokonō mai chachipakefōfā. ⁴² Apa kīfikī iskafani: “Epa, ea ifipai kī ea ifife ē omiskōinōma. Akka nā ē apaiyai keskafakīma, nā mī ea amapaiyai keskafafe,” Apa faino, ⁴³ āfe ājiri nai mēranoax akiki nokorisatani mitsisipakōi imaxikī. ⁴⁴ Shināmitsai finakōiyānā, Jesús Apa kīfini nā omiskōiai shināyanā. Nāskaino āfe nīskaya āfe imi mai ano tosinī.

⁴⁵ Mā Apa kīfita fininākfāta, aōxō tāpimisfo ari kani. Kaxō ōia oxafo inifo shināmitsai finakōikani āto Īfo omiskōiaino. ⁴⁶ Nāskaxō ato yoini: “ĵAfeskai mā oxaimē? Fininifōfākāfe Epa kīfixikakī Satanás chakata mato afaa chakafamayamanō,” ato fani.

“*Jesús achinifo*

(Mt. 26.47-56; Mr. 14.43-50; Jn. 18.2-11)

⁴⁷ Jesús ato yoiaino yorafā rasi nokotoshinifo. Nā āfe ane Judas, nāri Jesúsxō tāpimis iyopaoni, nā Judas rekē oaino aho yorafā rasi fenifo. Nā Judas Jesús ari kani kokoikai. ⁴⁸ Askafaito Jesús yoini iskafakī: “ĵJudas, ea mīa kokoxō mī ea ato achimanimē?” fani.

⁴⁹ Askafaito ōikakī a aōxō tāpimisfāfe Jesús yōkanifo: “ĵĪfo, nō ato kenopa rerapaketiromē?” ixō yōkanifo.

⁵⁰ Nāskata fētsa nā ato Nios kīfixomisto āfe xanīfāfe ina āfe pacho kayakai aōri paxteni. ⁵¹ Askafaito ōikī Jesús yoini iskafakī: “Enefe. Nāskanō,” fata afianā koshikōi xanīfāfe āfe ina āfe pacho ramākaxō pacho tichixotani. ⁵² Nāskaxō ato yoini a Nios kīfixomis xanīfofo yafi a Nios kīfiti pexefā kexemis xanīfofo, nā anifo tiiri mā ifi feafono ato yōkani: “ĵAfeskai kenofoya ifixatefoya mā oamē ea achiyofo oa ē yometso keskarakē?” ⁵³ Pena tii ē mato fe itiani Nios kīfiti pexefā mēraxō ē mato tāpimani, akka mākai ea achipaimisma. Akka na fakishi mā ekeki oa Satanás māto ifono,” Jesús ato fani.

“*Ē Jesús ōimisma, Pedro inī*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Jesús achixō iyonifo a ato Nios kīfixomis xanīfāfe pexe ano. Akka Pedro aho chipo kani. ⁵⁵ Akka pexe emāiti chii ketefaax tsaoox yoaifono Pedrori nāno ato fe tsaoox yooni. ⁵⁶ Nāno ato fe tsaoox yooaino xanīfo yonoxomis xomayato fichixō yoini iskafakī: “A nari Jesús fe imiskī,” faito,

⁵⁷ Akka Pedro iskani: “Ēkai Jesús ōimisma. Mī ea pārāi,” faito, ⁵⁸ fētsari tāpīxō yoini iskafakī: “Mīfi na Jesús fe imiskī,” faito, Pedro kemani: “Maa. Ēkai Jesús fe imisma,” fani.

⁵⁹ Mā askafaafu samaraka pishtano, fetsari anā iskafani: “Chanīma, a nafi Jesús fe imiski. A na feronāfake Galilea anoa,” fairo, ⁶⁰ Pedro yoini iskafakī: “A mī yoiaīnoa ē tāpīama tsoaraōnoa mī yoi ē tāpīama,” Pedro faino takara keoinākfāni.

⁶¹ Pedro askaito Jesús texkeakekafā festani. Festanaino Pedro shinātani nā āfe Ifāfe yoia keskara. “A takara keoyoamano, ‘Ē Jesús ōimismara,’ ixō mī ato yoi tres fakī,” Jesús faa nā Pedro shinātani. ⁶² Nāskakē nānoax tsekekaini kaax Pedro shināmitsai oiai finakōini.

Jesús kaxemetsama fanifo
(Mt. 26.67-68; Mr. 14.65)

⁶³ Nāskakē nā kexeaafāfe Jesús kaxemetsama fanifo koshaketsayanā. ⁶⁴ Nāskata feopokaxō yōkanifo: “Noko yoife tsōa mia koshamakī.”

⁶⁵ Nāskakata īchaketsanifo afara fetsa yōkaketsayanā.

Xanīfo tiito Jesús yōkanifo
(Mt. 26.59-66; Mr. 14.55-64; Jn. 18.19-24)

⁶⁶ Mā penano a judeofāfe āto xanīfofo ichanānifo. Nā ato Nios kīfixomisfāfe āto xanīfofonō, a Moisés yoikī kirika keneni keskara ato tāpimamisfori ato fe ichanānifo. Nāskakaxō Jesús iyonifo xanīfo finakōia ano. Nārixō yōkanifo iskafakakī: ⁶⁷ “Noko yoife mīmākī Cristo.”

Askafaifono ato Jesús kemani: “Ēje, ē mato faitokai mā ea chanīmara faima. ⁶⁸ Ēri mato yōkaito mā ea kemaima. ⁶⁹ Akka iskaratīa ēfe Epa Nios ketaxamei ē tsaosharakōi. Nāmāi fasi finakōikē afama mīshti atiro,” ixō ato yoiaito, ⁷⁰ keyokōichi yōkanifo: “Akka, ūmīmē Niospa Fake?” ixō yōkaifono Jesús ato kemani: “Nā mā yoiai keskarakīa ē,” ato fani.

⁷¹ Ato askafaifo nikakakī anā yoinifo iskafakakī: “īNikakapo! Nōkai anā aōnoa meka fetsa nō nikapaima. Mā nōakōi nō nika noko yoiaito,” ikanax yoinānifo.

23

Pilato ano Jesús iyonifo
(Mt. 27.1-2, 11-14; Mr. 15.1-5; Jn. 18.28-38)

¹ Nāskakata keyokōi fininīfōfākāta Jesús iyonifo Pilato xanīfo finakōia ano. ² Nāskakata judeofāfe Jesús chakafakakī yōanifo iskafakakī: “Na feronāfāke nōko kaifofo ato chakafamai iskafakī yoiki: ‘Na romanō xanīfokōichi mato kori yōkaito ināyamakāfe,’ ato faa. Nāskatari, ‘Ēkīa Cristo, ea Niospa nīchia ē mātō xanīfo inō. Ē Niospa Fake,’ noko faa,” ixō Pilato yoinifo.

³ Askafaifono Pilato yōkani: “Ūmīmē judeofāfe xanīfo?” ixō yōkaito Jesús kemani: “Ēje, nā mī ea yoiai keskarakīa,” fani.

⁴ Nāskafaino Pilato nā ato Nios kīfixomis xanīfofo yafi nā ano niafo yoini iskafakī: “Na feronāfākekai afaa chakafaa ē ōima,” ato fani.

⁵ Ato askafaifo fāsikōi mekainīfōfā yoinifo iskafakakī: “Na feronāfāke ato tāpimayanā pexefo tii anoa ato chakafakī mekafamafōfāsafai. Galilea anoxō ato taefamati, iskaratīa nono Judea anoxori ato askafamai,” ixō yoinifo.

Jesús Herodes ano iyonifo

⁶ Askafaifāfe nikakī Pilato ato yoini: “ŪChanīmamē na feronāfake Galilea anoamē?” ato faino, ⁷ “Ēje, nānoa,” fanifo. Nāskaxō xanīfo Herodes ano nīchini, nā Herodesmāi Galilea anox xanīfokē. Nāskafaifono Herodes Jerusalén ano oni. ⁸ Jesús ōi Herodes inīmakōini, mēxotaimamāi ōipaikatsaxakī, aōnoa yoiaifāfe nikakatsaxakī afama mīshti fairo ōipaikī. ⁹ Nāskaxō afama mīshtifo yōkaketsani. Akka Jesús kai pishta kemanima. ¹⁰ Nāskano nānori inifo, a ato Nios kīfixomisfāfe āto xanīfofo fe a Moisés yoikī kirika keneni keskara ato tāpimamisfo, nāfāfe Jesús mekafakī chakafanifo. ¹¹ Nāskakē Herodes āfe sorarofu feta chakakōifayanā kaxemetsama fanifo. Nāskakaxō rapati nana safemanifo nā rapati xanīfonā. Nāskaxō Herodes anā Pilato ano Jesús nīchini. ¹² Nāskatari Pilato fe Herodes rafe fatanānifo. Akka taeyoi chakafatanāyopaonifo.

Pilato ato yoini Jesús retenōfo
(Mt. 27.15-26; Mr. 15.6-15; Jn. 18.39-19.16)

¹³ Nāskaxō Pilato ato ichanāfani a ato Nios kīfixomis xanīfofo yafi xanīfo fetsafo, askatari a ano ikafori ato īchanāfani. ¹⁴ Nāskaxō ato yoini iskafakī: “Mā ekeki na feronāfake efea iskafakī yoianā: ‘Nato yorāfo chakafakī mekafa,’ ixō. Akka mātō ferotaifi mē yōka. Natokai afaa chakafa ē ōima, askatarikai ato chakafakī mekafaama a mā yoiai keskafakī. ¹⁵ Akka Herodesri aōnoa afaa chaka nikama. Nāskaxō nokoki anā nīchia. Mā mā ōi natokai afaa chakafaama napanā. ¹⁶ Akka ē omiskōimākī tāpimani, chipo anā nīchixiki katanō,” ixō ato yoini.

¹⁷ Akka Pascua fistatīa Pilato ato inīmamapaoni yora fisti karaxa mēranōa tsekakī. ¹⁸ Akka keyokōi fāsikōi mekainīfōfānifo. “īNa chaka retefe, Barrabās noko kāimaxokī!” fanifo.

¹⁹ Nā Barrabás karaxa mēra ikimanifo pexefā rasi anoxō romanōfāfe āto xanīfo nō potanō fāsikōi mekainīfofākāfe ato faito. Askatari ato retekē karaxa mēra ikimanifo. ²⁰ Akka Pilato Jesús nīchipaikī, afianā yorafo yoini. ²¹ Ato askafaito nikakakī yorafāfe fāsikōi mekafainīfofānifo: “¡A chaka mastafe!” fanifo.

²² Askafaiyono afianā Pilato ato yoini: “Akka, ¿afaa chakafamē? Natokai afaa chakafa ē ōima. Afeskaikai natiroma. Akka ē omiskōimakī finata ē nīchi katanō,” ato faito, ²³ akka afo mēxotaima mekarianifo. “¡Mastafe!” faria fanifo. Askafaria faifono, “Māa akāfe,” ato fani. ²⁴ Ato iskafakī, yoiyanā, “Nā mā apaiyai keskafakāfe” ato fata, ²⁵ nāskaxō nā Barrabás karaxa mēranao kāimani, “Noko kāimaxōfe,” faifono. Nā Barrabás karaxa mēra ipaoni xanīfofo potapaita ato retekatsaxakī. Nāskaxō Jesús ato ināni nā apaiyai keskafanōfo.

Jesús ifi cruz ikaki mastanifo

(Mt. 27.32-44; Mr. 15.21-32; Jn. 19.17-27)

²⁶ Mā Jesús mastafokakī iyokakī, feronāfake fisti fichikaxō yoinifo cruz foxōikanō. Nā feronāfake Cirene anoa ini, āfe ane Simón. Oriax oaito fichikaxō cruz iyamanafono Jesús acho cruzya kani.

²⁷ Nāskakē yorafā rasi kērofo fe oiakani, fiisi fonifo. Acho fokani, shināmitsakani āto Ifo shinākani. ²⁸ Nāskaifono Jesús ato ōikī ato yoini iskafakī: “Kērofo Jerusalén anoafofāfe, eōnoax ōiyamakāfe, eōnoax ōiakīmaroko māa ranā oia faatanākāfe, māto fakefoōnoaxri oiakāfe. ²⁹ Akka chipo a mā omiskōiai nokoxii, nāskakē mā yoiikī iskafaxii: ‘Inimakāfe a fake fimisfoma, mā nofe omiskōikeranaki,’ ixō mā yoixii. ³⁰ Nāskakē yorafāfe machi yoiikī taefakī iskafaxikani: ‘Nokoki māchifā mafakerafe noko fepoxiki nō narisanō omiskōixikima,’ ixō yoixikani. ³¹ Ē afaa chakafayamafiamiskē ea iskafakani. Akka nā afara chakafakī xateyamaifo omiskōimakī finakōikani,” ixō Jesús ato yoini.

³² Nāskata yora chaka raferi iyonifo Jesúsya mastafokakī. ³³ Nāskata a mastaifo ano nokonifo āfe ane Mapo Xao ano. Nānoxō Jesús mastanifo. Yora chaka rafeya fetsa takaifetsa ata, fetsari takaifetsa anifo. ³⁴ Nāskaxō mā mastafono Jesús Apa kifini: “Epa, ato raefafe na ea iskafaifo tsōa tāpiamakī,” Apa fani.

Nāskano sorarofa ato xaketiyā kaxenifo mā kanākanax Jesús rapati paxkanāxikakī. ³⁵ Nānoxō yorafāfe ōinifo. Nā xanīfofōfāfe kaxemetsamafaiyono iskafayanā: “Nō ōinō nato yorafo ifimiski, iskaratīa āari ifimeimākai. Niospa Fakeaxroko āa ifimeī kiki a Niospa katonino,” fanifo.

³⁶ Sorarofori Jesúski kaxemetsamanifo. Nāskaxō akiki fokaxō fimi ene kacha ayama-painifo. ³⁷ Iskafakī yoiyanā: “Mī judeofāfe āto xanīfomākī mīari ifimefe,” fanifo.

³⁸ Nāskaxō āfe mapo mānāori tafara kenekī iskafanifo: “Nafj judeofāfe āto Xanīfoki,” fanifo.

³⁹ Nāskano nō aya mastafō fētsa Jesús chakafakī mekafani iskafakī: “Mī Cristomākī mīa ifimeta nokori ifife,” faito, ⁴⁰ akka fētsa yoiikī iskafani: “Askafayamafe. ¿Mī Nioski meseimamē a mī afara chakafaax omiskōiai?” fani. ⁴¹ “Akka nō omiskōikōi chanīmakōi nōmāi afara chakafakatsaxakī. Akka na feronāfakekai afaa chakafama na omiskōiai,” fani.

⁴² Nāskaxō nāto Jesús yoini iskafakī: “Ifo, xanīfo finakōixō ea shināfe,” faito, ⁴³ Jesús kemani: “Ē mia pāraima iskaratīakōi mī efe kai nā sharafinakōia ari mī efe inimakōipakenaka,” fani.

Jesús nani

(Mt. 27.45-56; Mr. 15.33-41; Jn. 19.28-30)

⁴⁴ Nāskata xini keya nā mai tio fakishifākōitani. Nāskax mā xini kaino anā penatani. ⁴⁵ Nāskakē xini peinima. Nāskaino sama nami Nios kifiti pexefā mēranoax nakirafekōi faxtepakēfāni. ⁴⁶ Nāskaino Jesús fāsikōi Apa kenani: “Epa, ea ifife ē mia ano kanō,” fata, nāskax nani.

⁴⁷ Nāskaito soraro xanīfāfe ōikī, Epa Nios aicho fayana iskafakī yoini: “Chanīma, na feronāfake afaa chakafamisma,” ixō yoini.

⁴⁸ Nā ano niafāfe ōinifo Jesús naito. Nānoax fokani, oiai finakōi fonifo Jesús shinākani.

⁴⁹ Akka nā Jesús ōimisfāfe ano nētekaxō chai nikaxō ōinifo. Kērofāferi ōinifo, Galilea anoax afe foitaxakakī.

Jesús makex kini mēra maifanifo

(Mt. 27.57-61; Mr. 15.42-47; Jn. 19.38-42)

⁵⁰⁻⁵¹ Nāno feronāfake sharakōi fisti ini. Nāato Nios Ifofasharapaikōini. Āfe ane José, Arimatea anoa ini judeofāfe āto xanīfo. Nā José Nios xanīfokōi manapaoni. Nāatokai xanīfo fetsafāfe shināifo keskara shināpaonima. ⁵² Nā José Pilato ano kaxō Jesús yora yōkani maifai axiki. ⁵³ Mā yōkatani oxō cruz anoa fotomaxō sabanā fena sharakōipa rakoxō iyoxō mafa kini mēra rātani, a tsoa maiyomisma mēra. ⁵⁴ Nā penata itipinīshara fanifo, mā chaima safaro faino, ⁵⁵ kērofo Jesús fe Galilea anoax foitaxakakī. Nāfāfe José chífafainifo

afeskaxō kini mēra Jesús rātamākai ōifokakī. ⁵⁶ Mā āto pexe ano fēkaxō, pirofomā yafi a aō tereati itipinīsharafanifo. Akka kērofāfe judeofāfe pena tenetiā teneyonifo nā Moisés yoini keskafakī.

24

Jesús otomi

(Mt. 28.1-10; Mr. 16.1-8; Jn. 20.1-10)

¹ Akka nā pena teneti safaro mā finōfaano nomīkonō fakishparikōi fonifo a Jesús maia ano. Pirofomā foifokani mā itipinīshara fakaxō. ² Mā nokokaxō ōiafo a kini a aō fepoitafo tokirinifā mā fepekemea ini. ³ Akka ikifaikakī ōiafo āto Ifo Jesús āfe yora ano inima. ⁴ Nāskai ratekōiyanā afeskamē ikaxō shināpaiyafono, feronāfake rafe ato ketaxamei nītani, āto rapati fafekōiyanā. ⁵ Nāskaifono kērofo ratekōiyanā maikiri fepepakefōfānifo. Nāskaifono nā ājiri rafeta ato yoini: “¿Afeskakī nā yora nia mā fenaimē na yora nakē maifamisfo mēranoa? ⁶ Anākai nonoma, mā otokaina. Akka shinākapo a Galilea ano iyoxō mato yoisim keskara. ⁷ ¿A yora chakafāfe ea achikaxō ea mastafono tres nia oxata ē anā otoxira, mato faito mā nikamismamē?” ixō ājiri rafeta ato yoini.

⁸ Ato askafaino a Jesús ato yoisim anori shinānifo. ⁹ Nāskakata nā Jesús maita anoax anā fekakī, nā once aōxō tāpimisfoya nā fetsafori ato yoitoshinifo nā ōitanaifo keskara. ¹⁰ Akka nā Jesúsnoa ato yoisimiski chanifōfāifo tii, María Magdalena ikaino Juana ikaino Santiago āfe afa María ikaino kērofo fetsafori inifo. ¹¹ Akka a aōxō tāpimisfāfe, “Āa chanīkanira,” ato fanifo. Ato nikakaspanifo.

¹² Ato askafaifono nikai Pedro fareke kaini, a Jesús maita ano ōikai. Kaxō ōia kini mēra a aō rakoita sabanā fisti mania ini. Nāskax anā Pedro pexe ano oni, “Kee, ¿afeskaitamē?” ikax.

Jesús Emaús ano fāi kani

(Mr. 16.12-13)

¹³ Afia pena fistichi Jesús fe rafemisfo rafe pexe rasi āfe ane Emaús ano fonifo. Jerusalén fe Emaús once kilometro ini. ¹⁴ Fokakī yoifonifo a Jesús reteitafo. ¹⁵ Yoinäfōfāifono Jesús atoki nokoax ato fe fāi kani. ¹⁶ Akka mā ōifikakī tsōa tāpinima, Niospa ato onātimafaino. ¹⁷ Askafofāifono Jesús ato kemani: “¿Tsoaōnoa mā yoifokaimē fāi kakī?” ato faino tsoa tooxinima nāno nētenifo shināmitsakōiyanā.

¹⁸ Nāskaito nā āfe ane Cleofās kemani: “¿Meres fisti mī Jerusalén ano ixō, mī tāpitamamē na rama iskaita?” faito, ¹⁹ Jesús kemani: “¿Afaa afeskaitamē?” ato faito yoinifo: “Jesús Nazarete ano nō yoi, nāatofi Niospa meka yoisimiskī. Nāskakē yorafo akiki inimakōimisfo, Niosri akiki inimakōimis. Niospa āfe sharaōxō noko yoisim Niosxō afama mīshti noko faxomis. Āfe mekapa yorafo sharafata afara sharafo noko axomis. ²⁰ Nāskafaiato a ato Nios kīfixomis xanīfofo feta nōko xanīfofōfāfe achikaxō ato ināitafo retexaxō mastanōfo. ²¹ Akka nā nōko kaifo israelifo romanōfo ano a ifimis ipainōra nō famis nōko xanīfo ixiki romanōfāfe anā noko afeskafanōfoma. Akka mā tres nia finōa a naita. ²² Akka nā kērofo nofe ikafāfe noko yoikakī noko ratekōiafo. Fakishparikōi a maia ano ōifokaxō ōiafo āfe yora ano ikama. ²³ Ano āfe yorakēma ōitakani pexe ano anā feafo. Nāskaxō yoiafo a āfe ājiri rafeta atoki nokoxō ato yoiafo keskara iskafakī: ‘Jesús naama, iskaratīa nia,’ ato faafono. ²⁴ Nāskakē nofe yora rafe chipo a maia ano fokaxō ōiafo nā kērofāfe yoiafo keskarakōi ika. Akka Jesús āfe yora ano ikama.”

²⁵ Nāskafaifono Jesús ato yoini iskafakī: “Kee, māakai afaa tāpiama, mā tatimakōi. Akka a Niospa meka yoisimfāfe yoinifo keskarakai mā chanīmara faima. ²⁶ Akka kenenifo iskafakī: ‘A Niospa nīchia Cristo omiskōikōifīax, chipo Apa Nios fe xanīfokōi ixii,’ ixō aōnoa kenenifo,” Jesús ato askafani.

²⁷ Nāskaxō ato yoikī taefani a aōnoa yoikī kenenifo, a Moisés aōnoa yoikī keneni yoita, a Niospa meka yoisimfāfe aōnoa yoikī kenenifori; nāfo ato fe kakī ato yoifoni.

²⁸ Mā chaima pexe rasi ano nokokakī nā rafeta shinānifo: “Noko finōfainikaira,” ikaxō. ²⁹ Akka nā rafeta nētefanifo iskafakī yoianā: “Kayamafe. Nono nofe nētefe mā yātapakei kiki. Mā fakishaki,” faifono Jesús nāno ato fe nēteni. ³⁰ Nāskata mā mīsa ano tsoaofono pixakakī Jesús pāa tsoainīfōfā, Apa Nios kīfikī. “Aicho,” fata, nāskaxō pāa kaxkepaxō ato ināni pinōfo. ³¹ Ato askafaito nāskakē koshikōi Jesús tāpinifo. Akka mā tāpiafono ato makinoax yamarisatani. Nāskakē anā tsōa ōinima. ³² Nāskakē āa rafe yoinānifo: “No fe fāi okī a Niospa mekaōnoa yoikī kenenifo keskara noko yoifeaito nō mea nōko ōiti fepeisharakōia. Āfe meka sharakōi,” ikanax yoinānifo.

³³ Nāskakanax Jerusalén ano anā fenifo. Mā fēkaxō ato fichitoshinifo, nā Jesúsxō tāpimisfo once a ato fe rafeafo fe īchanāxaxō, ³⁴ iskafakī yoiaifono: “Chanīma, mā nōko Ifo otoa, mā Simón ōimana,” ixō yoinifo.

³⁵ Nāskaifono nā rafetari ato yoinifo nā Jesús ato fe fāi kaito òitanaifo: “Mā nō òia noko pāa torexopakeaito,” ixō ato yoinifo.

Jesús aōxō tāpimisfoki nokoni

(Mt. 28.16-20; Mr. 16.14-18; Jn. 20.19-23)

³⁶ Nā ato yoiainifo, Jesús ato nakirafekōi nirisatani. Nāskaxō ato yoisharakōini iskafakī: “Inimakōikāfe,” ato fani.

³⁷ Ato askafaino ratekōinifo, “Niafaka chaka nokoki nokoara,” ikanax. ³⁸ Askaifono Jesús ato yoini: “¿Afeskai mā rateimē? ¿Afeskakī māto òiti mēraxō mā chanīmara fatiromamē?

³⁹ Òikapo ēfe mēke yafi ēfe tae. Ēkīa. Ea ramākapo. Akka òikapo na rāfo tsefefe. Akka niafakakai namiyata xaoyama, nā mā ea òiai keskara,” ixō ato yoini.

⁴⁰ Ato askafakī yoiyanā, āfe mēke toa yafi āfe tae toa ato ispani. ⁴¹ Ato askafakī yoiaino āto òiti mēraxō shinānifo: “Jesús mara,” ikaxō. Nāskaxō chanīmara fakeratama akiki inimakōinifo. Nāskaifono Jesús ato yōkani: “¿Nono mā afaayamamē ē pipanā?” ato faito, ⁴² foe xoia pishta inānifo. ⁴³ Mā fixō āto ferotaifī pini.

⁴⁴ Nāskaxō afianā ato yoini: “Mēfi mato yoiyomiskī mato fe iyoxō eōnoa yoikī Moisésnō nā a Niospa meka yoisfonō, eōnoa fanāiti kenenifo keskai nē askakōi,” ixō Jesús ato yoini. ⁴⁵ Nāskakē āfe shināmā a kenenifo keskara ato shināmanaino tāpikōinifo. ⁴⁶ Ato yoikī iskafani: “Eōnoa yoikī kenekī iskafanifo: ‘Cristo a Niospa nīchia mā naflax tres nia oxata anā otoxii,’ ixō eōnoa yoikī kenenifo. ⁴⁷ Akka ēfe aneōxō ato yoikāfe. Jerusalén anoxō ato yoikī taefakāfe. Nāskaxori nā maniafo tii anoafori ato yoifofāsafakāfe āto chaka xatekaxō anā Nios nikasharakōinōfo, nāskaifono āto chaka ē ato soaxonikai. ⁴⁸ Akka nā ē mato yoiaito, mā òiai a mā nikaifori fetsafo yoipakexakāfe. ⁴⁹ Akka ēfe Yōshi Shara ē matoki nīchi ēfe Epa yoiyoni keskafakī. Akka mā nono Jerusalén ano nēteyokāfe, ēfe shara matoki nīchionō nai mēraxō nā ē mato yoiiai keskafakī mā fetsafo eōnoa mā ato yoinō,” ixō Jesús ato yoini.

Jesús nai mēra kani

(Mr. 16.19-20)

⁵⁰ Nāskaxō Jesús ato iyoni Jerusalén anoxō Betania pasotai. Nānoxō Jesús mēshainākāfā Apa Nios yoini iskafakī: “Epa Niospa, eōxō tāpimisfo ato kexesharapakexafe.” ⁵¹ Nāskafakī yoiyanā ato makinoax Jesús Apa Nios ari kani. ⁵² Akka a aōxō tāpimisfāfe iskafakī yoinifo: “Jesús, mī nōko Ifo sharakōi, nō mīo noikōi,” ixō yoikanax chipo Jerusalén ano fonifo inimakōiyanā. ⁵³ Nāskakē mēxotaima Nios kīfiti pexefā mēraxō Nios yoisharapaonifo. Nā tii.

Juan Jesúsnoa Yoikĩ Keneni

Jesucristoõnoa Juan keneni

¹ (Èkĩa Juan. Iskaratĩa Jesucristoõnoa ã mato yoi mã tâpinõ. Cristo ãfe ane ipaoni, Meka. Nãato Niosnoa noko tâpimani.)

Afaa oniataima na Meka aneya iyopaoni. Apa Nios fe iyopaoni. Nãrifi Nioski. ² Taefenakõi Nios fe iyopaonixakĩ, iskaratĩari afe ika. Afaa oniamatai nã Meka aneya Apa Nios fe iyopaoni. ³ Aõxõ Epa Niospa keyokõi onifani. Akka Jesúsmaisxõ afaa onifanima. Nãskaxõ Jesús feta Niospa afama mishti onifani. ⁴ Aõnoax keyokõi niafo. Niospa yorafo tii shinãmapaiyai keskafakĩ Jesúsxõ ato shinãmatiro ãto õiti xafakĩakõi inõfo. ⁵ ãfe õiti xafakĩakõifiax yora chakafo mẽra Jesucristo ipaoni. Yora chakafãfe ãto õiti fakish keskara, shara shinãkanima. Askafiano yora chakafãfe Jesucristo xĩtitirofoma yorafo shara shinãmanaino ãto õiti anã fakish keskara inõfoma.

Niospa Juan Maotista nĩchini ato yoinõ

⁶⁻⁷ Epa Niospa Juan nĩchini Jesucristoõnoa yorafo yoinõ iskafakĩ: “ãfe õiti xafakĩakõi. Epa Niospa mato shinãmapaiyai keskara aõxõ mato shinãmatiro,” ixõ Juan ato yoini Jesús chanĩmara fanõfo.

⁸ Juankai Cristoma, Niospa nĩchini Jesucristoõnoa ato yoinõ. ⁹ Cristo fistichi yorafo shinãmatiro ãto õiti xafakĩakõi inõfo. “Mã oi,” ixõ Juan ato yoini. ¹⁰ Oaito yorafãfe tâpinifoma. Niospa Jesúsxõ ato onifafiano tsõa tâpinima Jesús. ¹¹ Nã mai onifani ano nokoni. Nãno nokofiaito ãfe yorafãfe, nãfãfe ifikaspanifo. ¹² Askafafiafono a ifipaiyaiãfe Jesús ato yoini iskafakĩ: “Mã ea noikĩ chanĩmara faa. Nãskakẽ ãfe Epa Niospa fakefo mã itiro ea chanĩmara faax,” ixõ Jesús ato yoini. ¹³ Niospa fakefo yorafãfe fakefo keskarama. Yorafãfe fakefo yora keskara, yõramãĩ ato fake faano. Akka Nios fistichi ato fake fatiro. Yõrakai Niospa fakefo fake fatiroma. Nã Jesús chanĩmara faafo tii Epa Niospa ãto shinã ato fetsafaxotiro ãfe fakefo inõfo.

¹⁴ Nãskakẽ na Meka aneya Apa Nios ika anoax mai ano oni yorakõi ixikĩ. Nonoax nofe iyopaoni. Apa Nios keskara sharakõi mã nõ õipaoni. Nãato yorafo noikõimis. ãfe meka chanĩmakõi. Nã fisti Epa Niospa Fakekõi. Apa Nios imis keskara nãskakõiriai sharakõi imiski.

Juan Maotista Jesucristoõnoa ato yoini

¹⁵ Jesúsnoa Juan ato yoini iskafakĩ: “Ea nikakãfe, õikapo. Nãõnoa ã mato yoisimis. Iskafakĩ ã mato yoisimis: ‘Mã oi. Ë taeyoi ofiano ea finõkõia ã fakeamano amãĩ Apa Nios fe iyopaonixakĩ;’ ixõ Juan ato yoini.

¹⁶ Jesús keyokõi noko shara famiski. Noko noikõixõ noko sharafa fafafaĩni. Akka keyokõichi nõko õiti inimasharakõiaito nõ meemis. ¹⁷ Epa Niospa noko amapaiyai keskara Moisés yoini. Nãskakẽ Niospa noko yoini keskara Moisés noko tâpimani. Nãskakẽ Niospa noko õimapai noko noikõi afi chanĩmakĩ. Nãskaxõ Jesucristo nokoki nĩchini. Jesucristo noko keyokõi noimis. Nãskaxõ noko õimatiro Nios chanĩmakõi. Askatari Epa Niospa noko noi. ¹⁸ Tsõakai Epa Nios õimisma. Askafiax ãfe Fakekõi nã afe rafemis, arifi Nioskõi. Apa Niosnoa noko yoisimis. Aõxõ nõ tâpitiro afe keskaramãki Epa Nios.

Juan Maotista judeofãfe ãto xanĩfofo yoini

(Mt. 3.11-12; Mr. 1.7-8; Lc. 3.15-17)

¹⁹ Nã judeofãfe ãto xanĩfofãfe Jerusalén anoxõ nã ato Nios kĩfixomisfo nĩchinifo, Juan ano. Akka nã Levifori ato nĩchinifo Juan yõkatanõfo: “¿Mĩ tsoamẽ?” fatanõfo.

²⁰ Askafaifono Juan ato kemani: “Èkai Cristoma. A nõ manai nõko xanĩfo ãkai aama,” ato faito, ²¹ “¿Akka mĩ Cristoma, mĩ tsoamẽ? ¿Mĩmẽ Elias?” faifãfe, “Èkai Eliãma,” ato faito, “¿Akka mĩ Eliãmaax mĩ tsoamẽ? ¿Mĩmẽ nã nõ manamis Niospa meka yoisimis, nã nokoki oai?” faifãfe, “Maa, ãma,” ato fani.

²² Ato askafaino anã yõkanifo: “¿Akka mĩ tsoamẽ? Noko yoife a noko nĩchiafo nõ ato yoitano. Mĩ tsoamãki noko tâpimafe,” fanifo.

²³ Askafaifono Isaias kirika keneni keskara nãnorikõi Juan ato yoini iskafakĩ: “Niospa mato yoipaiyai keskara ã mato yoinõ. Tsõa istoma anoxõ ã fãsikõi mekaikai: ‘Nõko Ifo nokoki oxii. Iksii itipinĩsharakãfe. Mã ipaoni keskara afianã iyamakãfe. Keyokõichi mãto chaka potakãfe, mẽstekõishara isharaxikakĩ,’ ixõ Juan ato yoini.

²⁴⁻²⁵ Nikakata judeofãfe nã fariseofo a Juanki nĩchinifo yõkatanõfo iskafakakĩ: “Mĩ Cristomamamãki, mĩ Eliãmamamãki nã nõ manamis Niospa meka yoisimis mĩmaraka, akka, ¿afeskakĩ mĩ yorafo faka mẽra ikimapakeimẽ maotisafakĩ?” ixõ yõkakãfe ato fanifo. ²⁶ Juan

ato kemani: “Ēfi ato maotisafapaikai. Ē ato askafafiaino nono fetsa nokoki nokoi. Mākai tāpiama. ²⁷ Ē iskaratīa mato Niospa meka yoifafāini. Askafaino aato chipo mato yoixii. Fāsi ea finōkōia. Ē afaa tāpiama ē sharakeroko ē āfe zapato risfi nexaxopanā,” ixō Juan ato yoini.

²⁸ Nā pexe rasi Betania faka Jordán okirishtaxō Juan ato faka mēra ikimapakekī maotisafani. Nānoax ato fe yoināni.

Niospa āfe oveja fake keskara, Jesús

²⁹ Askata pena fetsa Juanki Jesús kani. Jesús fichixō Juan yorafo yoini iskafakī: “Ōikapo. Nā Niospa āfe oveja tetomashta keskara oa. Nato keyokōi yorafo chaka soaxonō Epa Niospa nīchia nokoōnoax naxō nōko chaka noko soaxonō. ³⁰ Ē mato aōnoa yoimis. Ē mato yoia iskafakī: ‘Chipo oi ea keskarama finakōia, nāmāi ē fakeamano iyopaonixakī.’ Nakīa mā oa. ³¹ Ērifi Cristo tāpixoma yorafo maotisafapai a nōko kaifo judeofāfe tāpinōfora,” ixō Juan ato yoini Cristoōnoa yoiki.

³² Ato yoixō anā Jesúsnoa Juan ato yoini: “Niospa Yōshi Shara nai mēranoax rifi keskara Jesúsiki fotopakekafanaito ē ōia. ³³ Ēri ōiyamano Epa Niospa ea yoiti iskafakī: ‘Fatofāfe ea chanīmara faimākai mī faka mēra ato ikimapaketiro maotisafakī. Akka mikiki fetsa nokoano ēfe Yōshi Shara nā feronāfakeki fotopakekafāxii. Afe nūtaxii. Nā mī ōiki mī tāpixii nāato ēfe Yōshi Shara matoya rafemaxii āfe shinā shara māto shinā mēra nanenō, ixō ea yoia. Epa Niospa ea anori yoiyamakē Jesús nā Niospa Fake ēri tāpikeranama. ³⁴ Askafixō mē ōia. Askaxō ē mato chanīmakōi yoi nafi Niospa Fakeki,” ixō Juan ato yoini.

Jesúsxō tāpikī taefanifo

³⁵ Pena fetsa nāno Juan aōxō tāpimisfo rafe ini. ³⁶ Afe niafono Jesús ato finōfaini. Ato finōfainaito Juan ato yoini: “Ōikapo. Oa Niospa ina oveja fake keskara,” ixō Juan ato yoini.

³⁷ Juan ato yoiaito nikakata Jesús chīfafāinifo. ³⁸ Jesús ifiakekafā ato ōiki ato yōkani: “¿Tsoa mā fenaime?” ato faito, “Maestro, ¿fanī mī ikamē?” faifāfe, ³⁹ “Ono ōifokāfe, ē mato ispanō,” ixō ato yoini. Askata afe fokakī ōiafo nā ika ano afe nokoni. Mā nokoafono mā xini kai ini. Nāno afe yātapakenifo.

⁴⁰ Nā rafe Juan ato yoia keskara nikakata Jesús chīfafāinifo. Fetsa āfe ane Andrés. Nā Andrés Simón Pedro āfe exto ini. ⁴¹ Jesús ika ano nokokata Andrés āfe ochi Simón fenaikai kani. Akiki nokoxō yoini: “A Niospa nokoki nīchia Mesías mā nō fichia. Nā Cristora nō famis. Ōiyotāfe,” fani. ⁴² Askata Andrés Simón Jesúsiki nokokini. Akiki nokoaino Jesús Simón yoini: “Mī Simón, Jonáspa fake. Iskaratīa ē mia ane fetsafaxonō. Nō mia Cefas fanō,” fani. (Cefas nāfa mekapa yoimis Pedro fakī.)

Jesús Felipe yafi Natanael kenani afe fonōfo

⁴³ “Ē Galilea ano kaira,” ixō Jesús shināni. Kapaikī Felipe fichixō yoini: “Efe kafe, eōxō tāpisharakōixikī,” fani. Askafaino afe kani. ⁴⁴ Felipenō Andrésno Pedronō pexe rasi āfe ane Betsaida ano imisfo.

⁴⁵ Askata Felipe Natanael fichixō yoini: “Moisés Niospa yoini keskara kenekī iskafani: ‘Ē māto xanīfokōi Cristo matoki nīchixira,’ ixō Niospa yoini anori Moisés keneni. Nānorikōi Niospa meka yoimisfāfe kenenifo. Nākai mā nō fichia. Jesús José fake Nazarete ano ika. Nāōnoa Moisés feta Niospa meka yoimis fetsafāfe kenenifo,” faito, ⁴⁶ “¿Afaa shara Nazarete anoax oimē?” ixō yōkaito, “Ofe, ōixikī,” Felipe fani.

⁴⁷ Natanael akiki nokoaino Jesús ōixō aōnoa yoini: “Nafi israelifāfe fakeki. Nato afaa chaka yoimisma. Chanīmakōi fisti shināfafāimiskī. Tsoakai pāramisma,” ixō Jesús aōnoa yoini.

⁴⁸ Askafaito nikakī Natanael kemani: “¿Afeskaxō mī ea ōiyamafikatsaxakī mī ea tāpiamē?” faito, “Mia Felipe fichiyoamano ē mia ōikī taefaita ifi higuera nāmānoa ē mia ōita,” Jesús fani. (Akka Jesús Natanael chai ixō tāpini ōiyamafikī.)

⁴⁹ Askafaito, “Maestro, mīfi Niospa fakeki. Askatari mīfi israelifāfe āto xanīfokī,” faito, ⁵⁰ Jesús kemani: “‘Mī ifi higuera nāmā tsaōa ē mia ōia,’ ixō ē mia yoia, ¿nā nikaxō mī ea chanīmara faamē? Afara shara fetsa finakōia mī ōixii. ⁵¹ Chanīmakōi ē mia yoia. Ēfi yōra fakefax ē Niospa Fakekōi. Nai fepekemeano mī Niospa ājirifo ōixii. Epa Nios ika anoax āfe ājiri ekeki fotota, māpeinīfōfā fotota, māpeinīfōfā ikaito mī ōixii,” ixō Jesús fani.

2

Jesús āfe mekapa fakakōifekē fimi ene onifani

¹⁻² Tres nia oxakata Canā pexe rasi anoxō Galilea mai anoxō feronāfāke kēro fiaino yorafo ano fisti ichanānifo. Jesús ikaino afa ikaino Jesúsxō tāpimisfori nāfo ato kenamanafono fenifo. ³ Fimi ene mā netsoafono, āfa Jesús yoini iskafakī: “Nafokai fimi eneyama,” fani.

⁴ Āfa askafaito Jesús kemani: “Efa, ¿afeskakī mī ea yōkaimē afara fetsa afeskarafanōra ixō? Iskaratīa ē afara fetsa fena ayoima. Tsōa atiroma keskara ē fena akimakai,” fani. ⁵ Askafaito

Jesús áfe áfa a yonoxomisfo ato yoikī iskafani: “Nā Jesús mato yoiai keskara faxokāfe,” ato fani.

⁶ Nāno tokiri kesho seis efapafo chaimashta tsoa ini. Treinta galon a mēra ikitiro ini. Nāskata nā kesho mēra faka fikaxō, judeofāfe āto chokati mēraxō chokaketsanifo. Nāskakī judeofāfe chokasharaifāfe Niospa ato ōi nafo sharara ato fanō, āto xinifo ipaonifo keskara.

⁷ Nāskata Jesús a yonoxomisfo yoini: “Nā keshofo mēra faka fospifakāfe,” ato faito, faka fospikōi fanifo keshofo mēra. ⁸ Askata Jesús ato yoini: “A ichanāifono ato kexemis na faka ayamatakāfe,” ato faino, nāskata a ato kexemis faka foxonifo. ⁹ A ato kexemisto ayaxō mea faka inima fimi enekōi ini. Nāskakē tāpinima Jesús faka fetsafaano. (Akka nā yonoxomisfāfe ōinifo Jesús faka fetsafaito. Nāskakē tāpinifo.) Nāskakē tāpixoma a ato kexemisto a Jesús faka fetsafaa a rama kēro fiaf foxoni. ¹⁰ Nāskaxō yoini: “Fistatīa nā fimi ene sharakōi taefakī nō ato ayamamis. Akka nā fimi ene sharakōi mā mitoxō, nā fimi ene sharama chipo nō ato ayamamis. Akka iskaratīa fimi ene sharakapakōi mī ato ayamani,” fani.

¹¹ Jesús nā pexe rasi Caná anoxō tsōa atiroma keskara taefaito ōinifo Jesúsmai finakōixō tsōa afama mīshti atiroma keskara atiro. Nāskakē ōikaxō aōxō tāpimisfāfe chanīmara fanifo.

¹² Askata Jesús afanō áfe extofonō aōxō tāpimisfonō nā pexe rasi áfe ene Capernaúm ano fonifo. Nāno oxa ranāyonifo.

Jesús a Nios kīfiti pexefā mēraxō a ato ināifo ato potani
(Mt. 21.12-13; Mr. 11.15-18; Lc. 19.45-46)

¹³ Mā judeofāfe āto fista Pascua mā chaima ikaino Jesús nā pexe rasi Jerusalén ano kani. ¹⁴ Nānoxō Nios kīfiti pexefā mēraxō fakkafo, ovejafo, riffifo afo ato minikaxō kori finifo. Nānori a kori kāmiafamisfori tsoafono Jesús ato fichini. ¹⁵ Jesús ato fichita risfi koshati fata ato koshapaita a ato inafō ato pōtaketsani. Ovejafo potakī, fakkafo potakī fani. Askata yorafori potani. Mīsa kamaki āto kori māchiafo saakī fetsani. Mīsari kekafaya kekēfōfā potani. ¹⁶ Nā riffāfe āto ifofo ato yoini: “Na māto inafoya ēfe Epa Niospa pexe mēranoax fotakāfe. ¿Afeskakī ēfe Epa pexe mēraxō mā afarafo ato miniketsaimē kori fixikī? Afianā ēfe Epa pexe mēranoax afarafo inānōnyamakāfe kori fixikī. Na ēfe Epa áfe pexe mēranoax mā afarafo minimitsaima,” ixō Jesús ato yoini.

¹⁷ Ato askafaito nikakata aōxō tāpimisfāfe shinānifo iskakakī: “Chanīma, Niospa meka nānorikōi Jesúsnoa kenenifo iskafakakī: ‘Epa Niosi, ē mī pexe kexesharapai a mēraxō mia fisti shinānōfo. Afara fetsa a mēraxō anōfoma. Afara fetsakai mī pexe mēranoa ē ōipaima,’ ixō kenenifo Jesúsnoa yoikī.”

¹⁸ Jesús askafaito judeofāfe āto xanīfofōfāfe yōkanifo: “¿Afeskakī Nios kīfiti pexefā mēraxō mī ato potaimē? Niospa mia yoiaito afara tsōa atiroma keskara noko ōimafe nō mia chanīmara fanō,” ixō yōkaiāfe ¹⁹ Jesús ato yoini: “Mā na pexe pāoikano afianā tres nia oxata ē anā pexe faxii,” ixō Jesús ato yoini.

²⁰ Ato askafaino, “Kee. Nōko xinifāfe cuarenta y seis xinia anifo Nios kīfiti pexefā fakakī. Akka, ¿mī koshikōi tres nia pexe faimē?” fanifo. ²¹ Askafafiakakī tsōa tāpinifoma Jesús Niospa pexeōnoa yoinima. Aafi anofi yoimeni. ²² Askata Jesús nafiax oxa rafeta tres nia ita otoano aōxō tāpimisfāfe shinānifo: “Chanīma, a Jesús ato yoita keskara, nā pexefā pāoikaikiri keparanākī, ‘Ēfi tres nia otoxii,’ ixō yoita. Iskaratīa mā nō tāpia aafi anofi yoimeita,” ixō aōxō tāpimisfāfe shinānifo Jesús otoano. Nāskakē Niospa meka kenenifo keskara chanīmara fanifo. Nāskata nā Jesús ato yoini keskara shinākakī: “Chanīmakoī Jesús noko yoini,” fanifo.

Jesús keyokōi yorafō tāpini

²³ Askata tsōa atiroma keskara afama mīshti Jesús fani Jerusalén anoxō fista Pascuatīa. Nāskara ōikaxō yorafā rasichī, “Na Cristo,” ixō chanīmara fanifo. ²⁴ Askafiaifono a yorafāfe āto shinā mēraxō shināifo keskara Jesús ato tāpini. (“Iskaratīa ea chanīmara fakani. Askafikaxō chipo, āa chanīra, ea fakani,” ixō Jesús ato tāpini.) ²⁵ Yorafāfe āto shinā mēraxō shināifo keskara tsōa Jesús tāpimatiroma. Areskōi Jesús onātiro a āto shinā mēraxō shināifo Jesús tāpikōia. Chanīmara fayoiāfāfe Jesús ato onāni nāskax koshi shināmākī fetsenifo.

3

Jesús Nicodemo tāpimani

¹ Nā feronāfake fariseo ini, áfe ane Nicodemo. Nāri judeofāfe āto xanīfo ini. ² Nāato fakishi oxō Jesús yōkani: “Maestro, nō tāpia mī noko tāpimanō mia Niospa nīchini. Mā nō tāpia Nios fe rafexoma tsōa afara fetsa atiroma nā mī akai keskara fakī tsōa atiroma,” faito, ³ Jesús kemani: “Ēfi chanīmakoī mia yoikai. Tsoari oa fake yome rama kāia keskaraxma Nios xanīfo ano nokotiroma,” fani.

⁴ Askafaito afianā Nicodemo Jesús kemani: “¿Afeskax afianā feronāfake yometatiromē? ¿Mā anifofiax afeskai afianā āfa xaki mēra nanetiromē, fake yomeax anā kāixiki?” ixō Nicodemo Jesús yōkani.

⁵ Askafaito afianā Jesús kemani: “Fake yome rama kāi fakaya kāitiro. (Nāskax yōra fake itiro. Nāskariakī āfe Yōshi Sharaōxō Niospa mato ōiti fetsafaano mā āfe fake itiro.) Akka Niospa Yōshi Sharapa māto ōiti fetsafayamano mā Nios xanifo ano nokotiroma. ⁶ A yōra fake fia nā keskara itiro. Nāskarifiakī Niospa Yōshi Sharapa mato fake fiano māri a keskara itiro. ⁷ Ē mia yoiaino mī ea nikax, ‘Mīri oa fake yome rama kāia keskara mī itiro,’ ē mia yoiانو, ‘Aira, ¿afeskax nō afianā yometatiromē?’ iyamafe. ⁸ Nefeaito tsōa tāpitiroma fakirinoax oimākai. A nefe kai ariri tsōa tāpiama fakiri nefe kaimākai. Nāskari fakī Niospa yorafo āfe Yōshi Sharapa āto shinā fetsafaano tsōa tāpitiroma,” Jesús faito, ⁹ anā Nicodemo kemani: “¿Afeskax nō askatiromē?” ixō fani.

¹⁰ Askafaito afianā Jesús kemani: “Mī israelifo tāpimamis, ¿afeskakī na ē mia yoiaino mī tāpiamamē? ¹¹ Ē mia chanīmakōi yoi. Nā nō nikafo nā nō ōiafo nāfo nō mato yoi. Nāskafekē nō mato yoiaino mā noko chanīmara faima. ¹² Nono mai anoafao afarafo afeskaraito ē mia yoiaino mī ea chanīmara faima. Askatari nai mēranoafori afeskaraito ē mia yoiaino mī ea chanīmara faima.

¹³ “Tsoakai nai mēra kaax anā fototiroma. Akka ē fisti ē nai mēranoax fotoa yora fakekōi ikiyoi. Ē afianā chipo kaxii. ¹⁴⁻¹⁵ (Nōko kaifo israelifo tsōa istomanoax chaka iyopaonifo. Nāskakē Niospa rono atoki nīchini ato chachinō. Nāskaxō Niospa Moisés yoini iskafakī: ‘Na rofetaxō rono faxō nīchinifofāfe ifiki ratāfe yorafāfe ōikanax sharanōfo, a ato chachia tii.’) Nāskari fakī ifi cruz ikakī ea mastakaxō ea nīchinifofāxikani. Nāskakē nā ea chanīmara faafo tii eōnoax Nios fe nipanakafō,” ixō Jesús ato yoini.

Epa Niospa keyokōi yorafo noi

¹⁶ Anā Jesús ato yoini iskafakī: “Epa Niospa keyokōi yorafo noikī āfe Fake fisti ato nīchixonī nai mēraxō nono mai anoax atōōnoax naiyonō. Nāskakē nā chanīmara faafo tii omiskōīpakenakafoma afe nīpanakafō. ¹⁷ Niospa āfe Fakekōi mai ano nīchini ato omiskōīmatama āto chaka soaxoniyonō aōnoax isharapakexanōfo,” ixō Jesús ato yoini.

¹⁸ Askata anā Jesús ato yoini iskafakī: “Nā Niospa Fake chanīmara faifokai omiskōīpakenakafoma. Akka nā nikakaspaifo ato Niospa omiskōīmāxii. Niospa Fake nikakaspakanax omiskōīpakenakafō. ¹⁹ Pena fe fakish osinātiroma. Nāskarifiā afara chaka fe Niospa fake rafetiroma. Nāskakē Niospa āfe fake nāmā nīchini nā yorafo pena keskara shara inōfo āto chaka xatekanax. Akka yorafāfe āto chaka potakaspakani. Niospa āfe fakeki fekaspakani. Nāskax isharakaspakani, chaka fisti shinākani. Niospa fake ōikaspakani āto chaka xateax isharaxikakima. Nāskakē Niospa ato omiskōīmani. ²⁰ Afara chaka fichipaiyaito Niospa Fake ōikaspai. Nā chakafaifo fisti fichipaikani. ²¹ Nā shara nipaiyaifo Niospa Fakeki fekani. Ato ōimasharaxikakī Niospa ato imasharanō,” ixō Jesús ato yoini.

Jesús Judea mai ari kani

²² Nāskata Jesús fe aōxō tāpimisfo Judea mai ari fonifo. Nāno ato fe iyoni. Nānoxō āto chaka potapaiyaiāfe ato maotisafapani. ²³⁻²⁴ Juan karaxa mēra ikimayofafomano nāatori yorafo maotisafapani. Nā Enón nā Salim chaimashta nika ini. Nāno faka noa ini. Nāskata nānoxō ato maotisafapani. Nāno yorafo akiki feaifāfe ato maotisafapani.

Juan Maotista Jesúsnoa anā ato yoini

²⁵ Nāskata Juan aōxō tāpimisfo āto kaifo judeo fetsafo fe feratenānifo. Afeskaxō mā chaka soatiromē ikanax feratenānifo. ²⁶ Nāskaxō Juan ano fōkaxō Juan yoinifo: “Maestro, nō mia yoiyai. Faka Jordān okixori mī Jesús fichita. Fichixō mī noko yoiya: ‘Nā Cristo Niospa noko nīchixonā nā nō manamis,’ mī noko feita. Nāatori iskaratīa yorafo maotisafapai. Oa yorafo keyokōi akiki fokani,” fanifo. ²⁷ Askafaifono nikakī Juan ato kemani iskafakī: “Nios fistichi yonomatiro a yonoxonō. Akka Niospa axoyamaino afaa afeska fatiroma. ²⁸ Akka ēkai Cristoma. Epa Niospa ea yoiya ē Cristoōnoa yorafo tāpimanō āto chaka xatenōfo, Cristo nokoaito chanīmara fanōfo. Nānori ē mato yoiaino mā nikamis. ²⁹ Afianā ē mato yoinō ea nikapo. Mā mā tāpia feronāfake āfe yama yoiikī iskafatiro: ‘Aicho. Na kēro mī ea yoiyona iskaratīa ēfe āfi iki,’ ixō yoiaino āfe yamari aōnoax inimatiro. Nāskarifiā ē Cristoyamafix fetsafāfe nā Cristo Jesús chanīmara faifono ēri fāsi akiki inimakōi. ³⁰ Akka nā Cristo finakōia. Ēkai Cristoma. Ē afaa tāpiama, Cristo finakōia. Akka ē afianā afaa yoitiroma ea tanatamaroko, Cristo fisti nikakōimōfo,” ixō Juan ato yoini.

Jesús nai mēranoax fotoni

³¹ Anā Jesús ato yoini iskafakī: “A nai mēranoax nāmā fotoato nāato nāmānoafo ato finōa. Akka nā nāmānoax fakeafāfe nāmānoa fisti yoitirofo. Akka nā nai mēranoax fotoato nāatofi keyokōi finōa. ³² Nāato noko yoitiro a ōiafo, a nikafori. Nāskakē fisti rasichi chanīmara fakani.

³³ Niospa meka chanĩmara fakĩ nõko õiti mẽraxõ nõ tãpisharakõitiro Niospa noko pãramisma, ãfe meka chanĩmakõi.

³⁴ “A Niospa nõchiato Niospa meka yoi Niospa ãfe Yõshi Shara a mẽra naneano. Nãskaxõ tãpikõia. ³⁵ Epa Niospa ãfe Fake noikĩ nõchini nai mẽra ikafãfe ãto Ifo inõ, nãmãnoãfãferi ãto Ifo inõ. ³⁶ Nãskakẽ Niospa Fake chanĩmara faax nõ afe nipaxatiro. Akka tsõã chanĩmara fayamakẽ Niospa ato omiskõĩmapakenaka. Akka Jesũs nikayamakanax nakanax afe nĩpanakafoma fakishifã mẽranoax omiskõĩmapakenakafõ.”

4

Jesũs kẽro samãritanõki nokoni

¹⁻³ Fariseofãfe nikanifo Juan yorafo maotisafapaito. Akka yora ichapa Jesũs maotisafapaito fariseofãfe nikanifo. Akka Jesũskai ato maotisafapanima, nã aõxõ tãpimisfãfe ato maotisafapanifo. Aõnoa yoinifo keskai mã Jesũs tãpiax aõxõ tãpimisfo fe Judea anoax Galilea ano kani. ⁴ Judea mai anoax Galilea ano kakĩ Jesũs Samãria finõfaini.

⁵ Askata Samãria ano Jesũs nokoni. Nãno nã pexe rasi ãfe ane Sicar ano nokoni. Nãno chaimashta Jacobo ãfe tare ipaoni. Nã tare ãfe fake Josẽ inãni mãmãni anifoxõ. ⁶ Nãnori Jacobo kini fani nã kini mẽranoa faka fixikĩ. Nã faka fiti ano xini keya Jesũs nokoni. Chai inoaxmãĩ oax xokenãĩ Jesũs nãno tsaoni. ⁷⁻⁸ Jesũs teneyoaino, a aõxõ tãpimisfãfe a piaifo pexe rasi ano fiifokani fonifo. Mã foafono nãno kẽro samãritanõ akiki nokoni faka fiyoi. Faka fiti ketokonõ Jesũs tsaono akiki nokoni. Nãskaxõ Jesũs a kẽro yoini: “Ea faka fexõfe ãfe ayanõ,” fani.

⁹ Judeofo fe samãritanõfo õikaspa faatanãmisfo. Ato fetakai pimisfoma. Nãskakẽ nã kẽromã Jesũs yoini: “Mifi judeoki. Ëfi samãritanõki. ¿Afeskakĩ mĩ, ‘Ea faka fexõfe,’ mĩ ea faimẽ?” faito, ¹⁰ Jesũs kemani: “Niospa mia inãpaiyai mĩ tãpiama mĩ eari tãpiama. Akka mĩ ea yõkaito ãfe mia faka shara inãkerana. Nã faka sharapa yorafo nimasharatiro,” Jesũs fani. ¹¹ Nãskafaito kẽromã Jesũs kemani: “Mĩ keshoyata mĩ risfi yama. Kini chaikõĩ, ¿afeskafaxõ mĩ faka kini mẽranoa fiimẽ a noko nimasharatiro a mĩ ea yoiyai keskara?” kẽromã fani.

¹² Nãskata anã kẽromã yoini: “Nõko xini Jacobo kini faxõ faka fixõ ayapaoni. ãfe fakefãferi ayapaonifo. ãto inafori ayamapaonifo. Nõri nã faka ayai. ¿Mĩ nõko xini Jacobo finõamẽ?” kẽromã fani.

¹³ Askafaito Jesũs kemani iskakakĩ: “Na faka kini mẽranoa ayax chipo afianã mã nõamã iki. ¹⁴ Nãskafixõ na faka ãfe ato ayamanĩ anã nõamãkiyamanõfo. Chanĩmakõĩ, nã faka ayakanax isharpakexanõfo,” fani.

¹⁵ Askafaito kẽromã kemani: “Mĩ feronãfake shara. Na faka shara ea inãfe ãfe ayax anã ãfe nõamãkiyamanõ ãfe afianã nonoa faka fiyamanõ,” fani. (Jesũs fakakiri keparanãkĩ yoiãito nã kẽromã tãpinima.)

¹⁶ Nãskaxõ Jesũs yoini: “Mĩ fene ifitãfe afianã nẽtekaini kaxõ mĩ fene ifitãfe afe oxikĩ,” faito, ¹⁷ “Èkai feneyama,” faito, “Mĩ chanĩmakõĩ yoi. Mĩkai feneyama,” Jesũs fani. ¹⁸ “Mĩ fene cincoya mia fimisfo mĩ fenefo. Akka iskaratĩã mĩ fetsa fe ika a mĩ fenema fe. Ea mãã yoiikõĩ mĩ feneyama,” ixõ Jesũs yoiaino, ¹⁹ “È iskaratĩã ãfe mia tãpia mĩ Niospa meka ato yoisimis. ²⁰ Nõko xinifãfe na machi anoxõ Nios kifipaonifo. Akka mĩ kaifo judeofãfe yoisimisfo iskakakĩ: ‘Jerusalén anoxõ nõ Nios kifitiro,’ ixõ yoisimisfo,” faito, ²¹ “È mia yoinõ, ea chanĩmara fafe. Na machi fisti anoxos nõ Nios kifitiro. Jerusalén fisti anoxori nõ Nios kifitiro. Akka fanĩma mĩshtixõ nõ Nios kifitiro. ²² Mãfi samãritanõfoki. Nios kififikĩ nõko Epa Nios mã tãpisharama. Akka nõfi judeofofi. Nõ nõko Epa Nios tãpikõia. Niospa noko tãpimani afeskaxõ yorafãfe ãto chaka soatirofomãki Epa Nios fe ipaxakakĩ. ²³ Chipõ afetiãra nõ Nios kifikõikẽ, ãfe Yõshi Shara fistiche noko tãpimatiro nõ kifisharanõ. ãfe Yõshi Sharaõxõ nõ Epa Nios kifikõiaito nãskara Niospa fichipai. ²⁴ Nios yorama. Niosfi fero mẽsho keskara sharaki. Nãskakẽ ãfe Yõshi Sharaõxõ nõ Nios kifitiro,” Jesũs fani.

²⁵ Askafaito kẽromã kemani: “Mẽ tãpia a Niospa nõchia chipo nokoki nokoxii. Nã ãfe ane Cristo. Nãato afama mĩshti noko tãpimaxii,” faito, ²⁶ “Èfi Cristoki, ãfe mefe mekai,” ixõ Jesũs yoini.

²⁷ Askata Jesũs kẽro fe mekaino aõxõ tãpimisfo fenifo. Fẽkaxõ õiafo Jesũs a kẽro samãritanõ fe mekaito õikani ratenifo. Nãskax yoinãnifo: “¿Afeskai mĩ na kẽro fe mekaimẽ?” nõ Jesũs faima,” fanifo. Nãskata shinãnifo: “Nã kẽro samãritanõ mĩ yoiã keskarrari nokori yoiãfe, nõkai faima,” inifo.

²⁸⁻²⁹ Askata nã kẽromã ãfe kesho potafaini ãfe pexe rasi ano kakĩ. ãfe pexe ano kaxõ ãfe yorafo yoini: “Oa feronãfake ekeki nokoxõ ea yoiã. Nã ãfe afama mĩshti ãfe chakafamis mã ea kãimaxõã. Nãraka Cristo, õifokãfe,” ixõ ato iyoni. ³⁰ Nikakata nã pexe rasi anoax Jesũski fenifo.

³¹ Mā kēro kaano aōxō tāpimisfāfe Jesús yoinifo: “Maestro, piyofe,” faifono, ³² “Ē aya a ē piāi. Nā ē piāi mā tāpiama,” ato fani. ³³ Ato askafaito nikakani yoinānifo: “Kee. ¿Tsōa a piāi ināfanamē?” ikanax yoinānifo.

³⁴ Askata Jesús ato yoini: “Ēfe Epa Niospa ea nīchini ē āfe yono shara yonoxonō. Nāato ea amapaiyai keskara ē apai. Nā ē piāi keskara,” Jesús ato fani. (“Mā nō piāx nō anā fonāikima, nō shara iki. Nāskarifiāi Niospa noko amapaiyai keskara nō iki nōko ōiti sharakōi iki. Nāskara noko amapaiyai nō aki, a nō piāi keskara,” ato fani.)

³⁵ Anā Jesús ato yoini: “Māfi iskamiski: ‘Mā nōko tarepanoax mā nōko xiki choshiaki. Mā cuatro oxe akaki nō finō,’ mā imis. ¿Nāskarifiāki mā shināimē? ‘Nō Jesúsnoa yorafo Niospa meka yoiano chipo chanīmara faxikani,’ ixō mā shināimē? Akka ē mato yoi: ‘Ōikapo, mā iskaratīa itipinīsharakōiafo Nios Ifofaxikakī,’ ato fani. ³⁶ Akka fētsa āfe yama āfe tare kexexotiro, āfe xiki topixoxiki. Chipo kopifaxinō, tare ifāfe. Nāskarifiāki fētsa taefakī yorafo Niospa meka yoitiro. Ato yoifaino chanīmara fayokanima. Askatari chipo fetsa oxō ato yoiaito chanīmara fakani. Nā rafe Niospa ato shara imapakenaka nā rafetamāi Niospa meka ato yoimisfono. ³⁷ Nāskakē chanīkima mā yoimis iskakī: ‘Fētsa xiki fanano chipo fētsa nā xiki fimi fitiro.’ Nāskarifiāki fētsa Niospa meka yoikī taefaano fētsari chipo rama oxō nāatori ato chanīmara famatiro. ³⁸ Akka mā taefakī ato yoimisma iskaratīa ē mato nīchia mā ato chanīmara famanō. Taefakī fetsafāfe Niospa meka ato tāpimani, mā ato tāpimayomano. Mā ato tāpimayoxoma koshikōi mā ato chanīmara famatiro māmāi taefakī ato yoiyomisfono,” ixō Jesús ato yoini.

³⁹ Nāskata Jesús aōxō tāpimisfo yoiano nā kēro samāritanō āfe kaifo yoikai kani pexe rasi ano. Kaxō ato yoini: “Oa feronāfāke mā ea tāpixō ea yoia nā ē afara amis keskara. Ea ōiyamafikatsaxakī mā ea tāpia,” ato fani. Ato askafaino Jesús fisti rasichi chanīmara fanifo.

⁴⁰ Askata nā kēro nikakanax Jesúski fonifo āfe meka nikakani. Akiki nokoxō yoinifo: “Nofe nono iyofe,” fanifo. Askafaifono nikata Jesús ato fe oxa rafeyoni. ⁴¹ Āfe meka nikakaxō yora ichapato chanīmara fanifo. ⁴² Askata chanīmara fakaxō yorafāfe nā kēro yoinifo: “Mī Jesúsnoa noko yoia fisti nō chanīmara faima. Nōakōi mā nō āfe meka nikakōia. Nāskakē iskaratīa nō chanīmara fai. Nāato na yorafo ikafo tii ato ifitiro afe ipaxanōfo.”

Jesús sharafani xanīfo yonoxomisto fake

⁴³ Askata mā oxa rafeta Jesús nā samāritanōfo anoax Galilea ano kani. ⁴⁴ Jesús Galilea anoax yosini, nānoxori yonopaoni. Afe yorafo nāno inifo. Askata Jesús ato yoini iskafakī: “A afe pexkonifāfe a ato Nios yoixomis yoikakī iskafatirofo: ‘Akai tsoama, afi nofe pexkoniki,’ fatirofo,” ixō ato Jesús yoini.

⁴⁵ Askata Jesús Galilea ano nokoni. Jerusalén anoax Galilea ano Jesús nokoamano yorafo Galilea anoax Jerusalén ano fonifo fista aki fokani. Nānoxō tsōa atiroma keskara Jesús Niosxō ani. Nā afama mīshti Jesús anoxō akaito ōinifo. Nāskakē Galilea ano Jesús atoki nokoano akiki inimanifo: “Aicho, mā mī oakī,” Galilea anoxō fanifo.

Jesús xanīfāfe fake sharafani

⁴⁶ Askata nā pexe rasi āfe ane Canā ano Jesús nokoni nā Galilea mai ano. A āfe mekapa faka fetsafani ano fimi ene keskara fakī nāno Jesús nokoni. Nānoa xanīfo fētsa Jesús ōiyoi oni. Nā pexe rasi āfe ane Capernaum anoax oni. Nānoax xanīfāfe fake isinī ini.

⁴⁷ Askata xanīfāfe nikani Jesús Judea anoax oano Canā ano nā Galilea mai ano. Nikata akiki oxō yoini: “Xanīfo, ēfe fake isinī iki nai kiki. Ēfe fakeshta ea ōixoni ope ēfe fake ea sharafaxoxikī,” ixō iyopaini. ⁴⁸ “¡Ooa! Tsōa atiroma keskara ē fayamakē mā ea chanīmara fakeranama,” ixō Jesús ato yoini. ⁴⁹ Afianā nā xanīfāfe Jesús yoini: “Xanīfo, efe kayoikape ēfe fake nayamanō,” ixō iyopaini. ⁵⁰ Askafaito Jesús kemani: “Mī fake namaki. Katāfe. Iskaratīa mī fake niaki,” Jesús fani.

Jesús askafaito nikafaini kani. ⁵¹ Mā nokoi kaino āfe inafō akiki nokokaxō yoinifo: “Mī fake mā shara, anā isinī ikima,” fanifo. ⁵² Askafaifāfe ato yōkani: “¿Fanī xini rakano ēfe fake sharamē?” ixō ato yōkaito, “Xini keya mī fake āfe yona makte,” fanifo. ⁵³ Yoiaifāfe nikata āpa shināni: “Chanīma, Jesús ea yoita xini keya, ‘Mā mī fake sharaki katāfe,’ ea Jesús faita,” ixō xanīfāfe shināni. Nāskata na xanīfonō āfinō afe yorafoyaxō Jesús chanīmara fanifo.

⁵⁴ Nāskata Jesús Judea anoax Galilea ano nokoxō afianā tsōa atiroma keskara fakī ato ōimani. Ato ōimakī rafe fani.

5

Jesús feronāfāfe isinī imis Betesda anoxō sharafani

¹ Askata Jesús Galilea anoax Jerusalén ano kani āfe kaifo judeofo feta fista akikai. ² Nāno Jerusalén ano ovejafāfe āto kāiti ano īa ini. Judeofāfe yoimisfo a īamā āfe ane Betesda. Nā īa kesemē pexe kafāshara mīshti tsaofafāina ini, cinco pexe. ³⁻⁴ Nāno yora isinī imisfo ichapa

rasi inifo nāno rakafafāinafo. Fēxofo, chātofo, sifitianifo nāfo isinī imisfo nā pexe kafāshara mīshiti mēra rakafafāinafo inī. Akka Niospa āfe ājiri nā ĩa ano nokomis nā ĩa fecha fecha axiki. Nā ĩa fecha fecha akaino nā isinī ikaifo nā nashi taea nashi axoshi sharamisfo. Nāskakē nā isinī ikaifāfe Niospa āfe ājiri manamisfo ato ĩa fecha fecha axoyonō nā nashi nā taea koshi sharaxikakī.

⁵ Jesūs nāno nokoxō feronāfake fichini treinta y ocho xiniya amis finipaikī ranāmis. ⁶ Feronāfake finimisma fichixō Jesūs tāpini nā feronāfake treinta y ocho xiniya amis isinī itiani. Nāskaxō yōkani: “¿Mī sharapaimē?” ixō yōkani. ⁷ Askafaito kemani: “Niospa ājirinī ĩa fecha fecha akaino tsōakai ea ĩa ano iyomisma. Akka ē nashipaifiaino ea xītimisfo. Ĕkai fena nashitiroma. Nono tsōama ea ĩa ano iyoikaxikī,” faito, ⁸ Jesūs yoini: “Fininākfā, mī rakati fifaini kasharatāfe,” Jesūs fani. ⁹ Askafaito nikai fininākfāta āfe rakati fifaini kani.

Nā pena safaronō finimisma Jesūs sharafani. ¹⁰ Nāskano nā judeofāfe āto xanīfofofāfe ōinifo nā feronāfake finimismato āfe rakati fifaini kaito yōkani: “¿Afeskakī mī rakati safaronō mī foikaimē? ¿Mī tāpiamamē nōko xinifāfe yoipaonifo safaroino nō afaa metiroma? Akka mī rakati na safaronō mī fotiroma,” fanifo. ¹¹ Askafaifono ato kemani: “Oa feronāfāke ea sharafaxō ea yoia iskafakī: ‘Mī rakati fotāfe,’ ea faa,” ato faito, ¹² “¿Tsōamē a feronāfāke anori mia yoia?” fanifo. ¹³ Finimismatokai tāpinima tsōa sharafaamāki Jesúsmāi a finimisma sharafafāini koshikōi a makinoax yorafā rasi mēra kaano. Nāskakē finimismato anā ōinima.

¹⁴ Askano chipo Jesūs a feronāfake sharafaa Nios kīfiti pexefā mēraanoa fichixō yoini: “Anā mī isinī ikima. Mā mī shara. Anā a mī chakafapaoni keskafakī afianā chakafayamafe. Mī chaka xatefe. Mī chaka mī xateyamakē afaranā mia anā omiskōimatiroki,” ixō Jesūs yoini. ¹⁵ Nāskax nā feronāfake Jesūs makinoax kani judeofo yoikai, “Oa Jesūs ea sharafaa,” ato fani. ¹⁶ Nā Jesūs safaronō yora sharafaa nikakanax judeofo āto xanīfofo Jesúski ōitifishkinifo. Ōitifishkikakī Jesūs mekafakī chakafanifo. ¹⁷ Askafaifono Jesūs ato yoini: “Ĕfe Epa pena tii yonofafāini. Iskaratīari yonoi. Ĕri ēfe Epa yonoai keskafakī Ĕri yonoi,” ixō ato yoini.

¹⁸ Nāskakē fakirira shinānifo. Nāskara shinānakī Jesūs mekafanifo: “Nōko xinifāfe yoini keskara nō safaronō afaa metiroma, akka Jesūs yonoi yorafo sharafakī. Nāskaxō noko yoia: ‘Nios ēfe Epakōi,’ noko faa. Nāskax Nios keskarakōi ipai,” fanifo. Nāskax a ranā yoinānifo: “¿Afeskakō nō Jesūs ato retematromē?” ikanax yoinānifo judeofo āto xanīfofo.

Jesūs Niospa Fakexō nā Niospa akai keskara fai

¹⁹ Nāskara shināifāfe Jesūs ato tāpini. Nāskaxō Jesūs ato yoini iskafakī: “Chanīma ē mato yoinō. Ea nikakapo. Ĕ Niospa Fakekōikī ēa ē afara afeskarafaima. Ĕfe Epa Niospa akai keskara ōixō Ĕri aki. Nā fisti ē aki. ²⁰ Ĕfe Epa Niospa ea noikōi. Nāskakī nā akai keskara ea tāpimani Ĕri anō. Akka afara fetsa finakōia ea ispaxii. Askaino mā ea iskafakī yoixii: ‘Aira ōikapo. ¿Afeskakī iskara shara akimē?’ mā ea faxii. ²¹ Epa Niospa yora naano anā otofatiro. Nāskaxō anā nimasharatiro. Ĕri āfe Fakekōi nāskari fakī ē ato nīmapaikī ē ato nimatiro shara ĩpaxanōfo. ²² Epa Niospa ato yoima fatora yora shara nīpanaka, akka fatorari omiskōipakenaka. Ĕfi Niospa Fakeki. Ea nīchini ē yorafo yoinō fatofomāki a fe nīpanakafo, akka fatoforimāki a omiskōipakenakafo. ²³ Nāskaxō yorafāfe Epa Nios yoixikani: ‘Mī fāsi shara. Tsōa mia finōtiriroma,’ ixō yoixikani. Nāskarifiakī eari yoixikani Ĕmāi āfe Fakekē. Ea nīchini. Akka iskaratīa ea tsōa yoisharaima. Ĕfe Epa Niosri askari fakani yoisharakima.

²⁴ “Ĕ mato chanīmakōi yoinō. Fatoto ēfe meka nikasharaimāki, akka nā ea nīchiniri, fatotori chanīmara faimāki nāfi ēfe Epa Nios fe nīpanakakī. Akka iskaratīa yorafo oa naa keskara ikafo Nios Ifofoamax. Akka Epa Nios chanīmara fakanax afe ipanakafo. Nafix afianā otoxikani.

²⁵ “Ĕ afara fetsa chanīmakōi mato yoinō. Yorafāfe āto ōiti mēra shināsharakōiafoma oa naa keskarakōi ikafo. Akka ē Niospa Fakeki. Iskaratīa ē ato yoiaito ea nikakanax anā naa keskara ikanima, efe isharapakenakafo. ²⁶ Akka tsōa Epa Nios onifanima. Akōi ika. Nāskarifiakī Epa Niospa yoia keskara āfe Fakeri tsōa onifanima. Ĕakōi ē ikaki. ²⁷ Ĕfi Niospa Fakeki. Nāskakē ea yoia iskafakī: ‘Mī yorafo yoitiro fatofomāki efe nīpanakafo, akka fatoforimāki omiskōipakenakafo,’ ixō ea nīchini. ²⁸⁻²⁹ Nāskara ē mato yoiaino rateyamakāfe. Akka nā namisfāfe ēfe meka nikakani otoxikani. Afara shara famisfo nīkasharakōimisfo nāfo Nios ano nīpanakafo. Akka nā afara chakafamisfo afo otokanax omiskōipakenakafo,” ixō Jesūs ato yoini.

Niospa Jesūs nīchini a apaiyai keskara famaxikī

³⁰ Anā Jesūs ato yoini iskafakī: “Akka Ĕakōi ē yorafo omiskōimanima. Epa Niospa ea yoiaino ē aki. Epa Niospa keyokōi tāpia. Akka ea mēstekōi yoia keskara ē yorafo yoitiro fatofo omiskōipakenakafomāki. Ĕ ato kaxpa omiskōimanima. Eres fistikai ē apaiyai keskara ē

shināima. Ēfe Epa Niospa ea nīchini a apaiyai keskara ea famaxiki. ³¹ Ēakōi ē yoimesharaito tsōa ea tāpitiroma ē afe keskaratiromakī. ³² Akka nāno yora fētsa eōnoa yoisharamis. Nāato ea chanīmara fakē māri a nikasharakōitiro. ³³ Akka mā yorafo Juan Maotistaki nīchimis eōnoa nikanōfo. Juan eōnoa meka shara yoimis nā yorafāfe mato tāpimakani. 'Jesúsfi Cristokī,' Juan ato famis. Nā nikakaxō mato tāpimamisfo.

³⁴ "Ēfi tsōa atiroma keskara fakē mā mā ōimiski. Akka tsōa eōnoa mato yoiamaito nāfo ōixō mā tāpitiro ē mato chanikima yoimis. Nāskafekē Juan eōnoa mato yoimis keskara ē afianā mato shināmani māto chaka mā xatenō omiskōitamaroko Epa Nios fe mā isharapakexanō. ³⁵ Juan feronāfake fāsi sharakōi. Oa rāpari fafeai keskara shara. Fakishikakī nō rāpari ōtano fai chaxasharano nō fāi katiro. Oa rāpari fafeai keskara shara mato Juan tāpimanano mā māto chaka xateax mā Nios fe mā isharapakexatiro. Mato yoimis keskara mā shināmis iskafakī: 'Aicho, Juan noko mēstekōi Niospa meka yoimis. Nō nikashara,' ixō mā shināmis. ³⁶ Juan eōnoa yoikōimis; akka ēfe Epa Niospa Juan finōkōia. Ēfe Epa ea nīchini a apaiyai keskara ē anō. Iskaratīa a ea yonomanai keskara ē aki. Akka a ē akai keskara ōixō mā tāpitiro Epa Niospa ea nīchini a ea yonomanai ē mitonō. ³⁷ Epa Niospa ea matoki nīchini. Nāatori eōnoa yoimis. Mākai Epa Niospa āfe meka nikamisma, askatari mā ōimisma. ³⁸ Niospa ea nīchifinino mā ea chanīmara faima. Nāskax āfe meka shara māto shinā mēra naneama.

³⁹⁻⁴⁰ "Moisés feta a Niospa meka yoimis fetsafāferi kenenifo keskara mā mā ōisharai māmāi shināki iskafakī: 'Ē Niospa meka anekī ē tāpitiro afeskax ē Nios fe isharapakenakamāki,' ixō mā shināi. Nāskaxō a Niospa meka yoikī kenenifo mā anefafāimis. Akka Moisés feta a Niospa meka yoimisfāfe eōnoa kenenifonono mā ekeki opaima ē mato imasharapanā.

⁴¹ "Epa Niospa ea yoikī iskafaino: 'Ēfe fake shara,' ea faino ē inimatiro. Akka yorafāfe, 'Jesús sharaki,' ea faifono ē askafamapaima. ⁴² Ē mato tāpikōia. Mākai Epa Nios noima. ⁴³ Epa Niospa ea nīchini ē matoki onō. Ē matoki ofiakē mā ea ifipaima. Akka yora fetsa āakōi matoki oaito mā ifitiro. ⁴⁴ Akka mā yora fetsafo, 'Na yorafo sharafora, noko fanōfora,' ixō mā ato yoimapai. Akka Niospa mato yoisharaino mā fichipaima. Nāskakī mā Niospa meka mā nikakaspai.

⁴⁵ "Mā ea chanīmara fayamakē ēfe Epa Nios ē yoima. Nāskakē, 'Nā Jesús noko chakafai,' ixō shināyamakāfe. Mā shināmis iskakī: 'Moisés meka nikai nō Epa Nios fe nūpanaka,' ixō mā shināmis. Anori mā shināfiaino Moisés Epa Nios yoixii mākairoko āfe meka nikakōimiskē. ⁴⁶ Moisés eōnoa yoikī kenenī. Nāskaxō Moisés āfe meka chanīmara faxō eari mā chanīmara fakerana. ⁴⁷ Nāskafixō a Moisés kirika kenenī mā chanīmara faima. Nāskaxō eari mā chanīmara faima," ixō Jesús judeofāfe āto xanīfofo yoini.

6

*Jesús cinco mil feronāfakefo ato pimani
(Mt. 14.13-21; Mr. 6.30-44; Lc. 9.10-17)*

¹ Askata Jesús anā ĩamāfā āfe ane Galilea pokefaini. Āfe ane fetsa Tiberias. ² Nāskaxō Jesús isinī imisfo āfe mekapa ato sharafaito ōikani yorafā rasichi chīfafainifo. ³⁻⁴ Nāskaifono judeofāfe āto fista Pascua mā chaima pakeaino Jesús māchi keya ano nokoax aōxō tāpimisfo fe tsaoni. ⁵⁻⁶ Nāno tsaofonono yorafā rasi Jesúski fenifo. Akiki feaifāfe atokiri fesoxō Jesús ōini. (Ato ōikī Jesús shināni oa yorafo fonāikani rakikīa. Nāskaxō Jesús āa tāpini afeskaxō ato pimaimākai.) Nāskaxō Jesús Felipe tāpimapaikōini a āfe mekapa afama mīshti atiro. Nāskaxō Jesús Felipe yōkani: "¿Faniā afaa ato pimaxikī nō fimē?" ixō Jesús Felipe yōkaito, ⁷ nikaxō Felipe kemani: "Kee, Ifo, nō dos cientos nia oxata yonoxō nō kori fitiro akka a tiikai nokotiroma na yorafā rasi nō ato pimapanā," Felipe fani. ⁸ Nāskafekē Jesúsxō tāpimis fetsa Andrés nā Pedro ēxto yoini: ⁹ "Ōipo. Na fāke cinco pāa fea. Foe rafeya fea. Akka yora ichapato pitirofoma. Fisti rasichi pitirofo. Nono yora ichapa rasi. Na pāa pishta tsoa nokotiroma," fani.

¹⁰ Askafaito Jesús yoini iskafakī: "Ato yoikāfe tsaonōfo," ato fani. Nāno fasi ichapa ini. Nā Jesús ato yoiai keskai fasi mēra tsaoni fetsenifo. Cinco mil feronāfakefo tsaoni fetsenifo. Kērofori, fakefori tsaonifo. ¹¹ Nāskax tsaofafono Jesús nā cinco pāa fita Apa Nios yoini: "Aicho, Epa," ixō Apa Nios yoita pāa yafi nā foe rafe kaxkepaketa aōxō tāpimisfo ato ināni, afāferi ato inānōfo. Fikaxō pikani māyakōimifo. ¹² Nāskax keyokōi yorafo māyakōiafono Jesús ato yoini: "Nā pāa yafi foe texefafo fikāfe fēta mēra nanekāfe afaa pishta fenoyamanō," ato fani. ¹³ Ato askafaito nikakaxō nā pāa yafi foe texefafo finifo. Doce fēta fospifanifo.

¹⁴ Nāskata Jesús āfe mekapa foe rafe yafi cinco pāa ato pimaito ōikanax yoinānifo: "Chanīmakōi Jesús Niospa meka yoimis. Nā Epa Niospa aōnoa yoipaoni. Nokokī nīchini,"

ikanax yoinānifo. ¹⁵ Askafaifono Jesús tāpixō āfe ōiti mēra shināni: “Na yorafāfe ea kerexkai āto xanifokōi ea imapaikani,” ixō tāpini. Askata ato makinoax machi fetsa ari kani.

Jesús iamāfā femākia kani
(Mt. 14.22-27; Mr. 6.45-52)

¹⁶⁻¹⁷ Askata mā xini kaino aōxō tāpimisfo kanōanāfā mēra nanefainifo iamāfā pokefainifo nā pexe rasi Capernaúm ano fokani. Nokoafomano mā fakishaino Jesús atokī nokonima. ¹⁸ Nēfefaino iamāfā pooitifikōini. ¹⁹ Iamāfā chai naisti nēxpakīaxō nēfefānē ato akaino iamāfā pooitifikōini. Jesús iamāfā kamakī kaitokai tsōa tāpinima mā fichifikaxō. Tāpiamax ratekōinifo. ²⁰ “Ēkīa. Rateyamakāfe,” Jesús ato fani. ²¹ Nāskaxō yoinifo: “Aicho. Kanōa mēra naneyofe,” fanifo. Mā Jesús naneano nāskax iamāfā kesemē nokorisanifo.

Yorafā rasichi Jesús fenanifo

²² Nāskaino mā penano yorafā rasi okiri iamāfā kesemē nētenifo. “A aōxō tāpimisfo fe Jesús kaito nō ōiama. Nonokai kanōa fetsama. Akka Jesús nonokī,” ikanax yoinānifo.

²³ Nāskatari Tiberias chaimaxō kanōa rasi fenifo. A Jesús yorafā rasi ato pimaita ano fenifo. ²⁴ Askatari Jesúsxō tāpimisfo ano inifoma. Jesúsri ano inima. Nāskaxō yora rasichi Jesús fenaifokani fonifo kanōanāfānē Capernaúm ano.

Jesúsfi a nō pi ai keskaraki. Akka nō pi axma nō nitiroma. Nāskarifiakī nō Jesús chanīmara faaxma nō afe nīpaxatiroma

²⁵ Mā fichikaxō Jesús yoinifo: “Maestro, ¿afetīa mī nono oamē?” ixō yōkanifo. ²⁶ Askafaifono ato kemani: “Chanīmakōi ē mato yoi. A yōra atiroma keskara ē mato ispafekē mā ea fenaima. Akka ē mato pimaino keyokōi mā māyākōita. Nāskakē mā ea fenai. ²⁷ Shinākapo. a pi ai fisti mā shināfāfāini. Akka a mā pi ai pisiax payokometiro. Nāskaxō mā yonofafāini a mā pi ai fixiki. Akka a mā pi ai fisti shināyamakāfe. A ē mato inātiro shinākāfe. A mā pi ai ē mato inātiro a keyonakama. Nā pi ax mā efe isharapakenaka. Ēfi yōra fakekōiki. Ēfe Epa Nios ekeki inimai ea katoxō matoki ea nīchini ē mato imasharapakexanō,” ato faino, ²⁸ nikakakī yoinifo: “¿Nō afeskatiro mē Nios nokoki imanānō?” ixō yoinifo. ²⁹ Askafaifāfe Jesús ato kemani: “Epa Niospa ea matoki nīchini. Akka mā Epa Nios inimamapaikī ea chanīmara fakāfe,” Jesús ato faino, ³⁰ kemanifo: “A tsōa atiroma keskara fakī noko afama mīshti ispafe nō mia chanīmara fanō. ³¹ Akka Niospa meka kenenifo iskafakī: ‘Tsōa atiroma keskara Moisés a piaifo ato ināpaoni. Nā pena tii nai mēranoax pakepaoni a piaifo,’ ixō kirika kenenifo. A nōko xinifāfe pipaonifo tsōa istoma anoxō āfe ane mātā. Nāskakē mīri a Moisés aka keskara fafe, nō mia chanīmara fanō,” ixō yoinifo.

³² Askafaifono Jesús ato yoini: “Ē mato pāraima na Moiséskai a nōko xinifāfe pi ai ato inānima, nai mēraxō Epa Niospa ato ināni. Akka Epa Niospa mā iskaratīa mato mēra nīchia a mā pi ai keskara nai mēraxō mātō ōiti mēra nananō. ³³ Nā fistichi yorafo nimapakekōixatiro. Epa Niospa nāmā nīchini yorafo ato imasharapakexanō,” ato faito, ³⁴ “Īfo, a nō pi ai noko ināfāfāife a mī noko yoiai,” fanifo. ³⁵ Jesús ato kemani: “Ēfi nā mā pi ai keskarakī. Ē yorafo nimasharapakexatiro. Mā nō pi ax māyatiro. Nāskax nō anā fonāitiro. Nāskarifiakī ea shināifāfe ē ato shināmāfāfāini. Ē ato potanakama. Nāskakē āto ōiti mēra inimakōitirofo. Askatari mā nō faka ayax nō anā nōamāitiro. Nāskarifiakī ea shinākanax efe isharapakenakafo. ³⁶ Nāskafekē ē mato yoiaito mā ea nikakī mā ea chanīmara faima. ³⁷ Akka nā ea Ifofafo Epa Niospa ea atoya imasharapakenaka nāfāfēmāi ea Ifofakōiafono. Akka fatorafāferi ea Ifofaifāfe nāfo ē ato kexesharapakenaka. Ē ato potapakenakama. ³⁸⁻³⁹ Epa Niospa ea nīchikī ea yoini iskafakī: ‘Nā mēfe ipaikani mēfe ipanakafo tsoa pishta fenonakama. Nāfo mā nafiamisfono mī anā fotoxō mī ato ōtofaxii nofe nīpaxanōfo. Nāskara ē fichipai,’ ixō ea nīchini. Nāskakē nā ēa ē apaiyai keskara faxiki ē mai ano onima. Akka nā ea nīchiato ea amapaiyai keskara faxikī ē mai ano fotoni.

⁴⁰ “Ēfi Niospa Fakeki. Ea chanīmara fakanax nāfo ēfe Epa Nios ari efe isharapakenakafo. Nafiafāfe ē afianā mai ano fotoxō ē ato ōtofaxii isharapakexanōfo. Nāskara ēfe Epa Niospa fichipai,” ixō Jesús ato yoini.

⁴¹ “Ēfi nai mēranoax onikī a mā pi ai keskaraxō yorafo imasharaxikī,” Jesús ato faito nikafikaxō chanīmara fatama judeofāfe Jesús mekafakakī yōachepenifo: ⁴² “Kee, nikakapo. Na Jesús, āfe apa Josē yafi āfe afa María nō ōimis. Nakai afaama. Akka, ¿afeskakī noko yoi mē: ‘Ēfi nai mēranoax Nios ika ariax onikī?’ Nāskakē na meka nō chanīmara faima. Iskara meka nō nikapaima,” ikanax yoinānifo. ⁴³ A āto ōiti mēraxō shināifo keskara Jesús ato onāxō ato yoini: “Ekeki yōachepeyamakāfe. ⁴⁴ Ē chanīma. Epa Niospa ea nīchini. Nāskafekē Epa Niospa āto ōiti mēra ato shināmayamaino ea tsōa chanīmara fatiro. Akka nā ea chanīmara faax nakē ē anā nai mēranoax fotoxō ē ato ōtofaxii efe ipaxanōfo. ⁴⁵ Niosnoa yoi misfāfe kirika

kenenifo iskafakakī: ‘Epa Niospa keyokōi ato tāpimaxii,’ ixō kirika kenenifo. Fatora yorafāfe ēfe Epa Nios nikaifono ato tāpimaxii. Nāskaxō afāferi ea chanīmara faxikani.

⁴⁶ “Tsōakai Epa Nios ōmisma. Eres fisti ē Epa Nios ōimis, ēmāi a makinoax onixakī. ⁴⁷ Ēfi mato chanīmakōi yoikai. A ea chanīmara fai ēfe Epa Nios fe ipanaka.

⁴⁸ “Ēfi nā mā piāi keskarakī. Nā ea chanīmara faafō tii Epa Nios fe isharapakenakafo. ⁴⁹ Nōko xinifo Moisés fe tsōa istoma ano ipaonifo. Nā pipaonifo, āfe ane mǎnā. Akka mǎnā pipaofinixakī mā nai mitokomenifo. ⁵⁰⁻⁵¹ Ē nai mēranoax ēfe Epa Nios ika anoax oni. Ēfi nā mā piāi keskarakī. Nā ea chanīmara fai nāfi efe nīpanakakī. Nā nōko xinifāfe pipaonifo nai mēranoax pakeaito aatokai ato nimasharamisma. Iskaratīa afianā Epa Niospa nai mēraxō mato ināi a mā piāi. Nā piāx yorafo isharapakenakafo anā nanakafoma. Ēfi nā mā piāi keskarakī. Nāskakē ē keyokōi yorafo ē ato nāxoxii nisharapakexanōfo,” ixō Jesūs ato yoini.

⁵² Nikakani judeofo fochishpanā faatanānifo. “¿Afeskaxō na feronāfāke āfe nami noko ināitromē nō pinō?” ikanax yoinānifo. ⁵³ Jesūs āfe namikiri keparanākī ato yoini: “Ē mato pāraima. Ēfi yōra fakekōiki. Mā ēfe nami piyamata ēfe imi ayayamata ikax mā nīpaxatiroma. ⁵⁴ Fatorafāfe ēfe nami pikani ēfe imiri ayakani isharapakexikakī. Nāskakē ē afianā nai mēranoax fotoaitīa a namisfo ē ato otofaxii Epa Nios ari nisharapakexanōfo. ⁵⁵ Ēfe nami na mā piāi keskara. Ēfe imiri a mā ayatiro keskara. ⁵⁶ Fatorafāfe ēfe nami pikani, ēfe imiri ayakani, nāfo efe rafesharapakenakafo. ⁵⁷ Akka ēfe Epa nīpanakato nāato ea nīchini. Nāskai ēri aōnoax nīpanaka. Nāskakē efe rafesharakanax eōnoax nīpanakafo.

⁵⁸ “Afianā ē mato yoi. Nōko xinifāfe a pipaonifo āfe ane mǎnā. Nā piflakanax mā nai keyonifo. Akka ēfi Epa Nios ariax ē matoki oni. Ēfi a mā piāi keskarakī. Ea pikanax eōnoax nisharapakenakafo,” ixō Jesūs ato yoini. ⁵⁹ Judeofāfe āto ichanāti pexe mēraxō Capernaum anoxō āfe meka Jesūs ato yoini.

Jesūsnoax yorafo nīpaxatirofo

⁶⁰ Jesūsxō tāpimisfo a ranā yoinānifo: “A Jesūs noko yoia keskara fekaxkōi. Tsōakai tāpitiroma. Nōkai na keskara meka nikamisma,” ikanax yoinānifo. ⁶¹ Jesūs ato onāni a ranā yoināifāfe. Akka atirifāfe Jesūs nikapainifoma. Nāskaxō ato yoini: “¿A ē mato rama yoia keskara mā nikapaimamē? ¿Anā mā ea chanīmara faimamē? ⁶² Ē yōra fakekōi fiāx a ē ipaoni ano nai mēra ē anā kaito mā ea ōiki, ¿mā ea chanīmara faimamē? ⁶³ Akka Niospa Yōshi Sharapa nā fistichi yorafo nimasharapaketiro. Yorafokai yōra nimapaketiroma. Akka ēfe Epa Niospa Yōshi Sharaōxō ē mato yoimis. Nāskakē ēfe meka chanīmara faax mā nisharapakexatiro. ⁶⁴ Nāskafekē fetsafāfekai ea chanīmara fakanima,” ixō Jesūs ato yoini. Jesūs taefakī ato ifini. “Fatotokai ea chanīmara fatama ea ato achimaximē,” ixō Jesūs tāpiyoni. ⁶⁵ Askaxō anā ato yoini: “Ē mato yoia iskafakī, Epa Niospa āto ōiti mēra ato shināmamayaino ea chanīmara fatirofoma,” ixō ē mato yoia.

⁶⁶ Nāskaxō Jesūs ato yoiai keskara nikaxaxō a chīfamisfāfe Jesūs potakaxō anā tananifoma. ⁶⁷ Akka Jesūs a aōxō tāpimis doce ato ifini. Afetīama ato ifiyoni aōxō tāpimisfo inōfo. Nāskaxō ato yoini iskafakī: “¿Māri emakinoax kapaimē?” ato faino, ⁶⁸ Pedro kemani: “Ifo, nō fato fetsakai Ifofatiroma. Mī fistichi mī noko yoitiro afeskax nō isharapakexatiromākī. ⁶⁹ Mīfi mī Nios ariax nokoki oniki. Mīfi sharakōi Cristokī. Nios nā nīpanakato nāato āfe Fakekōi mī. Nā nō chanīmara fai,” askafaito, ⁷⁰ “Ē mato doce feronāfake ifini mā eōxō tāpimis inō. Akka ē mato ififinino a mato fe rafea fetsa mā a mēra Satanās chaka nanea,” ixō Jesūs ato yoini. ⁷¹ Nā Simón Iscariote āfe fake Judas ini. Nā Judasnoa Jesūs ato yoini. Jesūs nā Judasri ififinino nāato Jesūs ato achimani fetsafāfe retenōfo.

7

Jesūs āfe extofāfe chanīmara fanifoma

¹ Askata Jesūs Galilea ano kafāsani ato tāpimafōfāsafai. Judea ano kayopainima judeofāfe āto xanīfōfēmāi retepaiyaifono. ²⁻⁵ Judeofāfe āto xinifāfe tapas fapaonifo shinākakī fista anifo. Askata judeofo ichapa rasi Judea mai ari Jerusalén anoxō fista aki fokani fonifo. Mā fista chaima ikaino Jesūs Judea mai ari kayotama, Galilea ano nēteni. Āfe extofori nā Galilea ano afe inifo. Āfe extokōifofiakaxō Jesūsikai nafi Cristokī Niospa nīchini ixō tsōa chanīmara fanifoma. Nāskaxō yoinifo iskafakakī: “Nonoax Judea mai ano katāfe nā mia Ifofamisfāfe nā mī ato axomis keskara ōinōfo. Nā mī amis keskara mī ato ōimanamano fetsafāfekai mia tāpitirofoma. Nā mī afama mīshti akaifo ato ispatofāfe,” faifāfe ⁶ ato kemani: “Ē iskaratīa ari katiroma. Ēfe Epa ea nīchiyoima. Akka afetīara kapai mā katiro,” ato fani. ⁷ “Na yorafāfekai Epa Nios yafi ea chanīmara faafoma. Nāfāfe ea noikaspakani. ‘Māfi afarafo chakafamis,’ ē ato famis. Nāskakē ea noikaspakani. Akka mato noikaspakanima. ⁸ Akka māri fista axilki

Jerusalén ano fotakāfe. Ē kayoikaima. Ēfe Epa Niospa ea nīchiyoima,” ixō Jesús āfe extofo yoini.

⁹ Mā ato yoita Galilea ano Jesús nēteni.

Jesús kani fista akikai

¹⁰ Nāskata mā āfe extofo fista akikai, Jerusalén ano foafono Jesúsri chipo kani. Tsōa tāpiamano onekōi Jerusalén ano kani. ¹¹ Nānoxō nā judeofāfe āto xanīfofōfāfe Jesús fenakani yoinānifo: “¿Fanīmē nā feronāfake?” fanifo. ¹² Nāno yora ichapa rasi inifo. Atirifāfe iskafanifo: “Jesús feronāfake sharakōi,” ikaxō yoinifo. Askafafiaifāfe atirifāfe yoikī iskafanifo: “Maa. A feronāfakeai sharama. Yorafa pāramis,” ikaxō yoinifo. ¹³ Nāskax a ranā yoinānifo judeofāfe ato nikayamanōfo judeo xanīfofoki mesekakī.

¹⁴ Fista mitokomeamano Jesús Nios kīfiti pexefā mēra ikikaini a mēraxō ato yoixikī. ¹⁵ Judeofāfe āto xanīfofōfāfe nikaxō yoinifo: “Aira. Nikakapo. ¿Afeskakī na feronāfake kenekī tāpikī finayamafixō tāpifinakōiamē?” ikanax yoinānifo. ¹⁶ Nā yoiaifo keskara onāxō Jesús ato yoini: “Ēfe shināmā shinākōixō ē mato yoima. Epa Niospa ea nīchini nā ea shināmanai keskara ē mato yoi. ¹⁷ Fatotora a Niospa yoiai keskara apaikī tāpitiro akka ēā ē shināxō ē mato yoima, Epa Niospa ea shināmanaino ē mato yoi. ¹⁸ Fatora yora fētsa āfe shināmā shināxō āakōi ato yoi. Nāato yorafa shināmapai iskafakī: ‘Nā feronāfake mekakī tāpikōia, ea fanōfora,’ ixō anori ato shināmapai. Akka yōra fētsa āa āfe shināmā shināx mekaima. A nīchinito shināmanaino mekai, a nīchini fisti yoisharanōfo. Nāskakē nā yōra ato chanīkima yoi, ato pāraima. ¹⁹ Nōko xini Moisés Niospa meka mato kenexoni. Akka mā nikasharamisma. Nāskakē pena tenetiā ē feronāfake sharafaino mā ea retepai,” ato faino, ²⁰ “Kee. Tsoakai mia retepaime. Mī mēra niafaka yōshi chaka nanea,” faifāfe ²¹ ato kemani: “Ē feronāfake pena tenetiā sharafaino akka mā ea yoikī iskafamis: ‘¿Afeskakī Jesús pena tenetiā feronāfake sharafaimē?’ ixō mā eōnoa yoimis. ²² Ē pena tenetiā afara shara fāa keskafakī māri pena tenetiā afara memis. Moisés kirika kenekī yoini keskafakī māri mato fake feronāfakefo rama kāikē mā ocho nia oxano māto fake feronāfakefo mā foshki repa xatemis. (Akka Moisés kai askara noko yoinima, nōko xinifāfe askara yoinifo.) Akka iskaratiā pena teneti ikaino mā mato fake feronāfakefo mā foshki repa xatemis.

²³ “Moisés yoini keskara nikakī pena tenetiāri mā mato fake feronāfakefo mā foshki repa xatemis. Akka, ¿afeskai mā ekeki ōitifishkikimē na pena tenetiā ē na feronāfake sharafaano? ²⁴ Nāskakē a yōra afara shara fakē ōixō yoikī iskafayamakāfe: ‘Nāto afara chakafai kiki,’ fayamakāfe. Mēstekōi yoisharakāfe,” ixō Jesús ato yoini.

“Ē ēfe Epa Nios ariax ē oni,” Jesús ato fani

²⁵ Askata yora rasi Jerusalén ano ikanax yoinānifo: “¿A na feronāfake mē xanīfofōfāfe retepaiyāifo?” ikanax yoinānifo: ²⁶ “Ōikapo, yorafā rasichi ōifaifono mā ato yoi. Akka tsōakai afaa faima. Mā xanīfofōfāfe mā tāpiafo rakikīa nā Cristo, a Niospa nokoki nīchini. ²⁷ Ētsa, aama rakikīa Cristo. Cristo oaito nō tāpitiroma fakiranoax oi. Akka na feronāfake mā nō tāpia fakiax oamāki,” ixō yoinifo.

²⁸ Askafaiifāfe nikaxō Nios kīfiti pexefā mēra ikixō Jesús ato yoini iskafakī: “Chanīma, mā mā ea tāpia ē fakiax oamē,” ato fani. “Akka ēā ēfe shināmā shināx ē oama. Akka ēfe Ēpa ea nīchini. Nāfi chanīmismaki. Akka māfi ēfe Epa mā tāpia. ²⁹ Ē ēfe Epa ariax oni. Nāato ea nīchini. Nāskakē ē a tāpikōia,” ixō Jesús ato yoini.

³⁰ Ato askafaito nikakanani akiki ōitifishki ikakī achipainifo karaxa mēra ikimapaikakī. Akka a reteaifo āfe pena nokoamano achipainifo. Tsōakai Jesús afeska fanima. ³¹ Nā yorafā rasichi Jerusalén anoafāfe yoinifo: “Tsoa fētsa atiroma keskara fakī Jesús Niosxō afama mīshti noko ispa. Nā Jesús afama mīshti fai tsōa atiroma keskara fakī. Akka yora fetsa oax āa iskai yoi: ‘Ēkīa Cristo,’ iki yoi. Akka atokai afama mīshti fakī Jesús finōtiroma,” ikanax yoinānifo. Nāskakī Jesús chanīmara fanifo.

Fariseofāfe āto inafo nīchinifo Jesús achitanōfo

³² Nā yorafā rasichi Jesúsnoa meka shara yoiaifāfe fariseofāfe nikanifo. Nāskaxō judeofāfe āto xanīfofo feta fariseofāfe a Nios kīfiti pexefā kexemisfo nīchinifo Jesús achitanōfo karaxa mēra ikimaxikakī.

³³ Askata Jesús ato yoini: “Ē anā nono mato fe samarakaima. Ē samamashta kai a ea nīchini shināfāini. ³⁴ Ē mato anoax kaino mā ea fenakī mā ea fichitiroma. A ē kai arikai mā katiroma,” ixō Jesús ato yoini.

³⁵ Ato askafaito nikakanax judeofāfe āto xanīfofo yoinānifo: “¿Faki na feronāfake kaimē nō fichitiroma? Nā nōko kaifo griegofo nā pexe rasi anoax paxkafainifo nāno kai rakikīa. Nānoxō griegofo tāpimaxikī kai rakikīa,” fanifo. ³⁶ “¿Afaa noko yoipaimē iskafakī? ‘Mā ea

fenafikikai mā ea fichitiroma. Ē ika arikai mā katiroma, 'ixō noko yoiai. ¿Afaa noko yoipai iskaime?' ikanax yoinānifo.

Niospa Yōshi Sharapa yorafa nimapaketiro

³⁷ Askata mā fista mitokomeaino Jesús nā yorafā rasi mēraxō niinākafā fāsi mekainākafā ato yoini iskafakī: "Nikakapo. Nā mā nōamā iki faka ayapaiyai keskai ekeki fekāfe. ³⁸ A ea chanimara faafāfe Niospa meka kenenifo keskara yora āfe xaki mēra faka poyo poyo iki netsotiroma keskara shara itiro ea Ifofaax," ixō āfe Yōshi Sharaki keparanākī Jesús ato yoini. ³⁹ Akka faka ato yoinima, Niospa Yōshi Sharaōnoa ato yoini iskafakī: "A ea chanimara fai ēfe Epa Niospa āfe Yōshi Shara fe rafepakenaka," ixō Jesús ato tāpimani Apa Nios ari kayoxoma yorafāfe āto xanifokōi ixikī. Nāskakē Jesús kayoamano Niospa āfe Yōshi Shara ato fe rafeama.

Jesúsnoa yoinifo. Askafikaxō anoris shinānifoma

⁴⁰ Jesús nikakaxō atirifāfe yoinifo: "Chanimākōi nā feronāfake Niospa meka yoimis a nō manai," ikanax yoinānifo. ⁴¹ Atirifāferi yoinifo: "Nāfi Cristoki," ixō yoinifo. Akka fetsafāfe yoini: "Maa, nakai Cristoma. Cristokai Galilea anoax kāitiroma. ⁴² Niospa meka kenenifo keskara, 'David āfe fena inō Cristo. Nā David ipaoni Belén ano. Nānoaxri Cristo kāixira,' ixō kirika kenenifo. Akka Cristokai Galilea anoax kāitiroma," ixō yoinifo. ⁴³ Nāskakē nā yorafāfe Jesúsnoa nikakaxō anoris shinānifoma. Fetsafāfe Jesús chanira fanifo, fetsafāferi chanimara fanifo. ⁴⁴ Atirifāfe Jesús achipainifo karaxa mēra ikimapaikakī. Achipaifkikakī tsōa Jesús afeska fanima.

Judeofo āto xanifofāfe Jesús chanimara fanifoma

⁴⁵ Askata fariseofāfe āto Nios kīfiti pexefā kexemisfo fenifo. Āto xanifofoki feaifono ato yōkanifo: "¿Afeskakī mā Jesús achiamamē noko efexoxikī?" ixō ato yoinifo. ⁴⁶ Ato askafaifono ato kemanifo: "Na feronāfake āfe meka sharakōi, tsōa anori yoimisma," ato fanifo. ⁴⁷ Ato nikakaxō fariseofāfe ato yoinifo: "Kee, Jesús mā matori pāra. ⁴⁸ Akka nōfi mātō xanifofo feta a Moisés kirika kenenī nō tāpikōiakī. Akka nō fatotokai nō Jesús chanimara faima. ⁴⁹ Akka nā yorafāfe mā rama Jesús nikafo nāfāfe a Moisés kirika kenenī tsōa tāpiafoma. Niospa ato omiskōimaxiki," ikaxō ato yoinifo.

⁵⁰ Askafafiaifono Nicodemo taeyoi nāato pena fetsa Jesúski kani fakishi afara yōkaikai. Nārimāi fariseoax nāskaxō afe rafeafo yoini: ⁵¹ "Efe yora mishtichi, ē mato yoinō. Nōko xinifāfe āto xanifofāfe yoinifo keskara nō fatora feronāfake nikasharayamaxō, 'Afara chakafaira,' nō fatiroma iskafakī: 'Nāto afarafo chakafai kiki nō omiskōimanō,' ixokai nō askafatiroma," ato askafaino kemanifo: ⁵² "Mī noko yoi Galilea anoxō yoiaifo keskara. Galilea anoxō Niospa meka tāpiafoma. Shināpo. Fato feronāfakekai a Galilea anoxō Niospa meka yoimis oama. Akka nono fistixō Niospa meka noko yoitirofo," ikaxō Nicodemo kemanifo.

⁵³ Nāskax yoinākanax āto pexe rasi ano fonifo.

8

Kēro āfe fenema fe ikaito xanifofāfe retepainifo

¹ Nāskata Jesús machi āfe ane Olivos ano kani. ² Penaino Jerusalén ano nokoax anā a Nios kīfiti pexefā mēra Jesús oni. Nāno yorafā rasi afianā akiki fenifo nikai fekani. Askata tsaoxō ato yoini.

³ Ato yoiaino a Moisés yoikī kirika kenenī keskara ato tāpimamisfo fe fariseofo fenifo. Kēro āfe fenema fe ikaito fichikaxō Jesúski efenifo. Yorafā rasi nēxpakīa kēro nīchinifo keyokōichi ōinōfo. ⁴ Askafakaxō Jesús yoinifo: "Maestro, na kēromā afarafo chakafaa. Āfe fenema fe ikaito nō fichia. ⁵ Moisés iskafakī noko yoini: 'Kēro āfe fenema fe ikaito ōikī nō tokirinī tsakakī retetiro,' ixō Moisés noko yoini. Akka, ¿mī noko afaa faimē?' fanifo.

⁶ Nāskaxō Jesús kemamapainifo, "Fakiri noko yoimākai," ikaxō āto xanifofo yoipaikakī. Askafaifono Jesús āfe mēkemā mai kenenī. ⁷ Yōkarifaifono Jesús atoki fininākafā ato yoini iskafakī: "Fatotokai mā afaa chakafamismamē na kēro mā tokirinī tsakakī taefai," Jesús ato fani.

⁸ Mā ato yoixō afianā āfe mēkemā mai kenenī. ⁹ Nāskano mā ato yoiaito nikakaxō a Jesús mai keneai ōikanax nā kēro mekafakī chakafamisfo fisti rasi tsekefaifainifo. Nā anifo tii foi taenifo. Chipō naetapafo fonifo. Mā foafono Jesús fisti nāno kēro fe nēteni. ¹⁰ Nāskax Jesús fininākafā nā kēro yōkani: "¿Nā feronāfakefo mia yōafo mā foafomē? ¿Tsoa fisti nēteamamamē anā mia yōaxikakīma?" ixō Jesús yōkaito, ¹¹ "Īfo, tsoa pishta nēteamā," faito, "Ērikai mia mekafakī chakafaima. Iskaratīa mī katiro. Afianā mī chaka ipaoni keskara anā askayamafe," ixō Jesús nā kēro yoini.

Jesús pena xafashara keskara

¹² Askata mā kēro kaano Jesús yorafā rasi yoini. Ato yoini iskaafakī: “Ēfi pena keskarakī. Ē nā yorafo tii imasharatiro shara Īpaxanōfo, anā fakish keskara inōfoma. A ea Ifofai fenotiroma,” ixō Jesús ato yoini. ¹³ Nikakakī fariseofāfe yoinifo: “Na mī noko yoiāi anorikai tsōa mīōnoa noko yoima. Mīa mī yoimeī. Akka a mī noko yoiāikai tsōa mia nikatiroma,” faifāfe ¹⁴ Jesús ato kemani: “Ē fakiax oamē fakiri ē kaimē mē tāpia. Akka ēa ē yoimeai ēfe meka chanīmakōi. Askafiax fakiax ē oamē ē fakiri ē kaimē mākaī tāpīama. ¹⁵ Mā ea tāpixoma, mā ēfe meka chanīmara faima. Ea tāpixoma mā ea shināi oa chanīai keskara ē mekaito. Mā askara shināi Niospa mato askara anori shināmanainoma. Ēkai tsoa mekaafakī chakafaima. ¹⁶ Akka, ‘Na yorafāfe afara chakafamisfo,’ ēa ē mato faima. Ēfe Epa shināi keskara nānorikōiri ē mato yoi. Askaxō chanīmakōi ē yoimis. Ēfe Epa nāato ea nīchini, nā ea tāpimanai ē yoimis. ¹⁷ Moisés mato yoini iskaafakī: ‘Feronāfaka rafeta nānoris mato yoiāito mā nikatiro, iō mato Moisés yoini. ¹⁸ Akka ēakōi ē yoimeī. Akka nā ea nīchinito ēfe Ēpari eōnoa nānorikōi yoimis,’ ato faito, ¹⁹ nikakakī yōkanifo: “¿Fanīmē mī Epa?” faifāfe, “Mākaī ēfe Epa yafi mā ea tāpīama. Ea tāpixō ēfe Epari mā tāpikerana,” ixō ato Jesús yoini. ²⁰ Nios kīfiti pexefā mēraxō ato yoini. Nāno nā kene mēra judeofāfe āto kori naneti ini. Niospa meka yoisifo ato ināmisfo. Jesús ato yoiaino judeo xanīfofofāfe achipainifo. Askafixō tsōa achinima āfe penakairoko nokokē achipanāfāfe.

Jesús yorafo yoini: “Ē kai arikai mā katiroma,” ato fani

²¹ Askata Jesús afianā judeofo āto xanīfofo yoini: “Ē chai mē kai. Ē kaano mā ea fenafikī mā ea fichitiroma. Māto chaka soaxoma nāskax mā nai. Ē kai arikai mā nokotiroma,” ixō Jesús ato yoini. ²² Jesús ato askafaito nikakaxō yoinifo: “¿Akōi retemeimē? Nā noko yoiāi: ‘A ē kai ari mā nokotiroma,’ noko fai,” ikanax judeofo xanīfofo yoinānifo.

²³ Jesús ato tāpixō ato yoini: “Māfi na mai anoakī. Akka ēfi nai mēraanoakī. ²⁴ Nā ēa ē yoimeā keskara māto chaka potaxma mā nai eakairoko mā ea chanīmara faax. Nāskakē afara chakafaxō māto chaka soaxma mā naax Epa Nios ari mā nokotiroma. Mā mā naano māto chaka mato fe ipanaka.”

²⁵ Ato askafaito kemanifo: “¿Mī tsoamē?” ixō yōkaifāfe, “Nā ē mato yoitaifamis ēkīa. ²⁶ Matoōnoa afama mīshti ē yoitiro. A mā afara chakafamis ē yoitiro. A ea nīchinito ea yoiāito ē nikai. Nāskakē nā ē mato yoifafāini. A ea nīchinito yoiāi chanīmakōi,” Jesús ato fani.

²⁷ Apa Niosnoa ato yoifiaitokai tsōa tāpinifoma. ²⁸ Nāskaifāfe Jesús ato yoini: “Ēfi yōra fakekōiki. Mā ea ifi cruz ikakī mastaxō mā ea fininifofāxō mā ea ōixii ē tsoamāki mā ea tāpitiro. Nāskatari eōnoa mā tāpitiro ēa ē mato yoimisma. Epa Niospa ea yoiā keskara ē mato yoimis. ²⁹ Nā ea nīchini efe ika. Eres ē ikama. A ea amapaiyai keskara ē amiski. Nāskax ekeki inimasharamiski,” ixō ato Jesús yoini. ³⁰ Yoiāito nikakaxō yora ichapato chanīmara fanifo.

Niospa fakefāfe Nios āto Ifo, akka afara chakafamisfāfe afara chaka āto ifo

³¹ Nāskaxō Jesús a chanīmara faafo yoini: “Ē mato yoiāito mā ea nikasharakōiax mā eōxō tāpimiskōifo mā itiroki. ³² Ēfe meka nikakōixō mā Nios tāpitiro, Nios chanīmisma. Askax mā isharatiro. Afara chanī māto ifo itiroma.”

³³ Ato askafaito kemanifo: “Nōfi Abraham āfe fenaki. Fato fetsa nōko ifo imisma. Nōkai tsōa yonomatifoma. ¿Afeskakī ‘Afara chanī māto ifo itiroma’ noko Jesús faimē?” fanifo.

³⁴ Askafaiāfe anā Jesús ato yoini: “Chanīmakōi ē mato yoi. Nā afara chakafamisfāfe nā chaka āto ifo ixii. ³⁵ Mā mā tāpia pexe ifāfe āfe yonomati āfe pexe mēra Īpaxatiroma. Akka āfe fake fisti āfe pexe mēra Īpaxatiro. ³⁶ Nāskarari Niospa Fāke mato chaka soaxonano afara chaka māto ifo itiroma. Niospa mato fakekōifai, mā āfe isharakōipakenaka. ³⁷ Mē mato tāpia māto xini Abraham. Āfe fenafofiāxō ēfe meka mā nikakaspai. Nāskaxō mā ea retepai. ³⁸ Ēfe Epa amis keskara mē ōimis. Nāōnoa ē yoimis. Māri a māto epa mato yoimis keskara māri yoimis,” ato faito, ³⁹ kemanifo: “Akka nōko xini Abraham,” faifāfe, “Akka mā Abraham āfe fenafokī ¿afeskaī mā Abraham apaoni keskara mā amismamē? ⁴⁰ Epa Niospa ea yoimis keskara chanīma ē mato yoifiaino mā ea retepai. Abrahamkai mato keskara ipaonima. ⁴¹ Māto epa akai keskara māri mā amiski,” ato faito, “Nōkai Epa ichapayama. Nōko Epakōi fisti Nios. Nōfi āfe fakekōifoki,” faifāfe ⁴² Jesús ato yoini: “Ēfi Nios fe imiski. Ē Nios ariax oni. Ēa shināx na mai ano ē onima, ēfe Ēpa ea nīchini. Akka māto Epa Nioskē mā ea noikerana. ⁴³ ¿Afeskakī ēfe meka mā nikaimamē? A ē mato yoiāito mā nikakaspai. ⁴⁴ Akka māto epa Satanás. Mā āfe fakekōifo. Nāskaxō māto epa apaiyai keskara māri mā apai. Nāfi taeyoi retemitsamis iyopaoni. Afi iskaratīa nāskara. Atokai afara shara yoimisma, chanīkōi. Āfe shinā mēraxō chanī fisti shināmis. Nāskaxō chanī fisti yoimis. Nā chanīai shināifāfe nā chanīmis nāfi āto apaki. ⁴⁵ Nā keskara chanī ē mato yoiyamafaiito mā ea chanīmara famisma. ⁴⁶ Ē afaa chakafaito mā ea ōimisma. Ēkai afaa chakafamisma. Ramashara ē

chanīmisma. Ē askafaito mā ea chanīmara famisma. ⁴⁷ Nā Nios fe rafeafāfe Niospa meka nikatirofo. Mākai Nios fe rafeama. Nāskaxō mā āfe meka mā nikaima,” ixō Jesús ato yoini.

Abraham fakeamano Cristo Apa fe iyopaoni

⁴⁸ Judeofāfe Jesús kemanifo: “Chanīma nō yoimis. Mīfi samāritanō chakaki. Askatari mī mēra niafaka chaka nanea,” faifāfe, ⁴⁹ “Niafaka chaka ē mēra naneama. Ē ēfe Epa Niosnoa meka shara ē yoimis. Akka māfi eōnoa meka chaka yoimis. ⁵⁰ Askafixō, ‘Ea yoisharakāfe,’ ē yorafo famisma. Ēfe Epa Niospa meka shara eōnoa ato tāpimapai. Nāato ato yoitiro fatofomāki yora sharafo, fatoforimāki yora chakafo. ⁵¹ Chanīmakōi ē mato yoinō. Nā ēfe meka nikaifo nakanamax nīpanakafo,” ato faito kemanifo, ⁵² “Iskaratīa mā nō mia tāpikōi mīfi niafaka chakaya. Akka mā Abraham nani, Niospa meka yoimisfori mā nanifo. Nāskafikē mī noko yoiā: ‘Nā ēfe meka nikakōiaifo nātamaroko nīpanakafo,’ ixō mī noko yoi. ⁵³ Mā nōko xini Abram nani. Niospa meka yoimisfori mā nanifo. ‘Akka mī Abram finōkōiamē? ‘Mī shināmē ‘Ē ato finōara’ iki?’ faifāfe, ⁵⁴ Jesús ato kemani: “A ēa ē yoimesharai ēfe meka sharama. Akka ēfe Ēpa eōnoa yoisharai. Mā a yoimis: ‘Nōko Epa Nios,’ fakī. ⁵⁵ Mākai ēfe Epa Nios tāpimisma. Akka ēfi ēfe Epa tāpikōia. Akka ē mato keskaraxō, ‘Ēfe Epamara,’ ē fakerana mato keskara chanīmis ē ikerana. Askatamaroko ēfe Epa Nios ē tāpikōia. Ea yoiāi keskara ē amis. ⁵⁶ Māto xini Abram yoini: ‘Cristo oaito ē ōixii,’ ixō yoi inimani. Mā ē oaito ea ōini askax fāsi inimani,” ato faito, ⁵⁷ “Mīkai cincuenta xiniya akama. Mīkai nōko xini Abram ōimisma. Afetīakai nanima. Akka, ‘afeskaī, ‘Ē Abram ōimis,’ ixō mī noko yoiāmē?” faifāfe, ⁵⁸ “Chanīmakōi ē mato yoinō. Abram fakeamano ēfi iyopaoniki,” ixō Jesús ato yoini.

⁵⁹ Askaito nikakani nā judeofāfe āto xanīfofo ōitifishkikaxō tokiri fikaxō Jesús tsakapainifo. Askafapaiiaifono Jesús ato makinoax yamarisatani, Nios kīfiti pexefā mēranoax. Kaitokai tsōa ōinima.

9

Feronāfake fēxo kāini Jesús sharafani

¹ Jesús kakī feronāfake fēxo nāskarapa kāini fichini. ² Ōikakī aōxō tāpimisfāfe yōkanifo: “‘Maestro, afeskai na feronāfake fēxo kāinimē? Afara chakafakatsaxakī ikaraka, apa feta āfa afara chakafamisfono ikaraka,” ixō Jesús yōkanifo. ³ “Afara chakafayamifikatsaxakī nāskarapa fēxo kāini. Apa feta āfari afara chakafamismano nā feronāfake fēxo kāini. Nāskarapa kāini. Akka Niospamāi afama mīshti fatirokē nāskax fēxo kāini ato ōimasharaxikī. ⁴ Niospa ea nīchini ē yonoxonō. Nā ē akaitīa ē yonoxotiro. Akka fakishikai nō yonoxotiroma. Nāskarifiakī mā nō naxō nō anā Nios yonoxotiroma. ⁵ Ē nono mai ano iyoax ē pena keskara. Ē ato ōimayoi afeskax isharakanimāki,” ixō Jesús yoini.

⁶ Nāskara yoiā maiki kemo mechota a mai kemō mechanafaxō a feronāfake fēxo aō fetekere ani. ⁷ Askafata, “Īamā fechokometāfe,” fani. Nā Īamā āfe ane Siloé, āto mekapa anemisfo na Siloé āfe ane “Nīchia” famisfo.

Nāskata fēxo Īamā kaax fechokomeni. Fechokomexō ōiakefaini. Nāskax oni. ⁸ Nāskata nā chaima nikafāfe a ōimisfāferi yoinifo: “Nā fēxo tsoax afara yōkakameaito nō ōimis. ‘Nāmē?’ faifāfe ⁹ atirifāfe, “Nākīa,” fanifo. Atirifāfe yoinifo: “Akerokōi,” fanifo. Nāskafikaxō yoinifo: “Nā keskarakōi,” faifāfe, ato yoini: “Ēkīa. Ēfi fēxo iyopaoniki. Nāskafixō iskaratīa mē ōisharai,” ato faito, ¹⁰ “‘Afeskaxō mī iskaratīa ōisharaimē?’ faifāfe, ¹¹ “Nā feronāfake ‘Jesúsra’ faifāfēfi āfe kemō mai mechanafaxō ea fetekere axō: ‘Nā Siloé Īamā fechokometāfe,’ ea faano, Siloé Īamā fechokomexō ē ōishara,” ato fani. ¹² Ato askafaito nikakaxō, “‘Fānimē a feronāfake Jesús?’ faifāfe, “Ētsa ē tāpiama. Mā fakira kaa,” ato fani.

Nā fēxo kāinito ōisharaino fariseofāfe a yōkanifo.

¹³ Askaito yorafāfe nā feronāfake fēxo iyopaoni fariseofo ano iyonifo. ¹⁴ Jesús nā feronāfake pena tenetiā sharafani. ¹⁵ Fariseofāfe nā feronāfake anā yōkanifo: “‘Afeskax mī fero sharamē?’ faifāfe, “Ea Jesús sharaāfa āfe kemō mai mechanafaxō ea aō fetekere akano. Ē Īamā fechokomexō ē ōisharakōia,” ato fani.

¹⁶ Nikakakī fariseo fetsafāfe yoinifo: “Akai Nios fe rafeama. Moisés kirika kenexō noko yoini iskaīfakī: ‘Pena tenetiā nō yonotiroma,’ ixō yoini. Nāskakē nō yora sharafatiroma pena tenetiā,” faifono, fetsafāfe ato kemanifo: “Akka yora chakapa fēxo sharafatiroma. Yora chakapakai nāato akai keskara fatiroma,” ikanax fariseofo fochishpanā faatanānifo. Atirifāfe fariseofāfe yoinifo: “Jesúskaī sharama,” faifono, atirifāferi, “Jesús sharaki,” fanifo. ¹⁷ Nāskata afianā fariseofāfe a yora fēxo ipaoni yōkanifo: “Mī noko yoiā, ‘Nāto ea fero sharafaxō,’ fakī. ‘Akka afaa mī shināmē tsoamāki?’ faifāfe, “Nā Nios ato yoixomisto ea sharaāfa,” ato fani.

¹⁸ Ato askafaito nikakakī judeo fetsafāfe, “A chanīra,” fanifo. “Na fēxo ipaonima,” ixō. Nāskaxō fariseofāfe apa yafi afa kenaxō yōkanifo. ¹⁹ “¿Namē mī fake fēxo ipaoni? Akka, ¿afeskakī iskaratīa ōimē?” faifāfe, ²⁰ “Nākīa nōko fake, nā fēxo kāini. Mā nō tāpia nōko fake. ²¹ Tiiri afeskara axora mā ōi nōkai tāpiama. Akka fakefomaki, xiniki mato yoitiroki afeskax sharamāki. Yōkakāfe,” afa feta āpa ato fani. ²² Judeofoki mesekakī nānori yoinifo. Akka judeo xanīfāfe yoiyoni iskafakī: “Tsōa yoitiroma: ‘Epa Niospa Jesús nīchini nōko Ifo Cristo inō,’ ixō yoitiroma. Akka askara yoixō anā nōko ichanāti pexe ano ikitiroma,” judeo xanīfāfe anori ato yoiaino nā fēxo ipaonito āfe afa fe āfe apa mesenifo. ²³ Nāskaxō ato yoinifo: “Xiniki fakefomaki. Yōkakāfe,” ato fanifo.

²⁴ Nāskata fariseofāfe nā feronāfake fēxo ipaoni yōkanifo: “Noko yoikī iskafafe: ‘Niospa ea sharafaa,’ ife,” fanifo. “Jesūsikai sharama. ‘Niosfi sharaki,’ ife. ‘Jesús sharara,’ fayamafe. Nō tāpia Jesús chakaki,” fanifo.

²⁵ “Ētsa. Ē tāpiama chaka iyamai shara rakikīa. Ē tāpia ē fēxo iyopaoni ē iskaratīa ōisharai. Nā fisti ē tāpia,” ato faito, ²⁶ “¿Afeskafoxō mia sharafaamē?” ixō yōkaifāfe, ²⁷ “Ē mato yoiaito, ¿mā ea nikamamē? ¿Afeskakī mā afianā ea yōkaimē? ¿Māri aōxō tāpimis mā ipaimē?” ato faito, ²⁸ nikakakī īchaketsanifo. Nāskaxō yoinifo: “Mīfi a Ifofaikai. Akka nōfi Moisés meka nikamiskī. ²⁹ Nō tāpia Moisés Nios fe mekapaoni. Nōkai na Jesús tāpiama. Fakira anoax oa afe keskarara a feronāfake nō tāpiama,” faifāfe anā ato kemani: ³⁰ “¿Mā tāpiamamē fakira anoax oxō ea sharafaa ē fēxokē? ³¹ Nō tāpia yōra chakafamisfokai Niospa ato nikapaitiroma. Fatorato Nios Ifofasharapai isharatiro. Nāskara Niospa nikapai. ³² Nā Niospa mai onifani chāikai nō afaa nikayomisma yora fēxo kāini tsōa sharafai. Akka iskaratīa mā ea Jesús sharafaa. ³³ Na feronāfake Niospa nīchiyamanokai afaa afeskafakeranama,” ato faito, ³⁴ nikakani akiki ōitifishkinifo. “Mīfi chakakōi kāini. ¿Afeskakī mī noko tāpimaimē mī chakafixō? Anā nōko ichanāti pexe mēra mī ikitiroma. Nonoax kariskatāfe. Nōkai anā mia ōipaima. Anā nōko ichanāti pexe mēra ikiyamafe,” fanifo.

Fatorafāfe Jesús chanīmara fayamakanax nā yora fēxo keskarakōifo

³⁵ Nāskano nā fēxo imis āto ichanāti pexe mēraxō potaifāfe nikafaini Jesús kani. Nāskaxō fenakī a fēxo imis fichini. Fichixō yōkani: “¿Mī Niospa Fake chanīmara faimē?” ixō yōkaito, ³⁶ “¿Fatomē ē chanīmara fanō?” faito, ³⁷ “Nā mī ea ōi. Ēkīa,” Jesús fani. ³⁸ Askafaito ratokonō mai chachipakefōfā yoini: “Ifo, ēfi mia chanīmara faikai. Mī fāsi sharakōi. Ē mia Ifofai. Mī Niospa Fakeki,” ixō yoini.

³⁹ Askata chipo afianā yorafo akiki feafāfe Jesús ato yoini iskafakī: “Ēfe Epa Nios ika anoax ē nono mai ano oni. Fato yorafomāki a ea nikayamaifo, fatoforimāki a ea nikaifo ē ato ōiyoi oni. Fatotora shināi iskaito: ‘Mē afara chakafamiskī. Ea chaka soaxope,’ ixō anori shināito ē āfe chaka soaxotiro afianā afara chakafayamanō. Ē na fēxo fero sharafaxōa keskafakī ē yorafo āto chaka soaxotiro shara inōfo. Akka fetsafāfe shināi iskakani: ‘Ē afaa chakafamisma, ē yora sharakōi. Ē tāpikōia,’ ixō shinākani. Askarafōfi yora fēxo keskarafokī, a ato sharafamis ano fopaikanima ato sharafapanā. Nāskarafāfekai yoipaikanima āto chaka soapaikanima. Nāskarafo fenopakenakafo,” ixō Jesús ato yoini. ⁴⁰ Fariseofāfe a Jesús yoiyai nikakaxō yōkanifo: “Kee. ¿Mī noko yoimē nōmē fēxo?” faifāfe ⁴¹ Jesús anā ato yoini: “Mā ea yoikerana: ‘Nō fēxo keskarafō. Mā nō afara chakafamis,’ ixō mā ea yoiaito ē mato chaka soaxokerana. Akka mākai ea askafamisma. Mā yoimis: ‘Nō ōisharatiro. Nōkai fenoama. Nō sharakī. Nōkai chakama,’ ixō anori mā yoimis. Akka māto chaka soaxma, mā fenokōia Epa Nios ika ano mā nokopakenakama,” ixō Jesús ato yoini.

10

Oveja keneaki keparanākī Jesús ato yoini

¹ (Askata Jesús ato tāpimani nāatomāi āto kexekatsaxakī. Oveja kexemisto āfe ovejafo kexemis keskarī fakī nāskarifiakī Jesús ato kexemis.) Nānori Jesús ato yoini iskafakī: “Chanīmakōi ē mato yoinō. Yōra ovejafo kenexotiro āfe kene mēra inōfo, faki fofāsanōma. Nāskata yora yometsopai ovejafo āfe kāiti ano ikitiroma, fomākīari ikitiro. ² Akka nā ovejafo kexemis nā oveja kāitiñi ikikaitiro. ³ Kāiti ano nokoano feronāfake nā kāiti kexemisto fepoti fēpexonano oveja kexemis ikitiro. Nā oveja kexemis ikiano āfe ovejafāfe āfe oi tāpikatirofo. Nāskaxō āfe ovejafo āfe anē ato kenaito āfe ovejafāfe chīfafāitirofo. ⁴ Nā ovejafo kexemis rekē kaino āfe ovejafo āfe kene mēranoax kāiferatirofo. Māmāi āfe oi tāpikanax nāskaxō chīfafaitirofo. ⁵ Akka a kexeamatokai iytirofoma, āfe oi tāpikatiro, a ato kexemisto āfe oikairoko askarakē. Nāskakē a makinoax ichotiurofo,” ixō Jesús ato yoini. ⁶ Jesús nā ovejafokī keparanākī ato yoini. Ato yoiaito tsōa tāpinifoma.

Jesús noko kexesharamis

⁷ Nāskano Jesús afianā ato yoini: “Ē chanīmākōi mato yoinō. Nā ovejafo kene mēra ikikani nā kini fisti mēra ikitirofo. Ēfi nā oveja kini keskarakī. Nā Epa Nios ano ikipaikani eōnoax fisti ikitirofo. ⁸ Ē matoki nokoamano fetsafāferi mato yoikī iskafakani: ‘Ēfi Cristoki. Ē mato tāpimatiro afeskax mā Epa Nios ari nokotiomākī afe ipaxakī,’ ixō anori yoikani āa chanimisfo. Yometso keskarakōifo. A Nios chanīmara faifo ato pārapaikani: ‘Noko fisti nikanōfora,’ ikaxō. Nāskakē Niospa fakefāfe ato nikakanima, ‘Noko fisti nikanōfora,’ ixō ato pārapaiyafono. ⁹ Akka Ēfi nā kini kāiti keskarakī. Nā Ēfe Epa Nios ika ano ikipaikani eōnoax ikitirofo afe ipaxakakī. Nāskatari eōnoax isharatirofo anā fekaxtetirofoma. ¹⁰ Akka fetsafāfe efe yorafo ato pārapaikani: ‘Ea ifofakāfe. Ē mato tāpimasharanō,’ ixō ato yoifikakī anorima ato pārakani. Nāskakaxō emakinoa ato ifpaikani. Yometso keskarakōifo. A ea chanīmara faafo ato kexesharapaikani. Ato chakafata ato retapaikani. Akka ē askarama. A ea Ifofamisfo ē ato kexesharai efe isharapakexanōfo, nono nāmānoaxri isharapakexanōfo. Nāskax ē nono nāmā oni ato kexesharaxikī.

¹¹⁻¹³ “A ea chanīmara faifo ovejafo keskarrafo. Ēfi nā oveja kexesharamis keskarakī. Nāskakē ē efe yorafo ē ato nāxoxii. Oveja ifāfe feronāfake fetsa kori inātiro āfe oveja kexexonō. Nāskaxō mā kori ināno nā feronāfake oveja kexesharatamaroko, kori fisti shinātiro. Nāskakē poomā oaito fichiāx ovejafo kexetama ichotiro. Nāskaxō shināi iskakī: ‘Na poomā mesekōi. Na ovejafo ēfenākōima, aa poomānā pinō ēfenākōimākī. Nāskakē ē ichoikai ea poomānā afeska fanōma,’ ixō shinātiro. Akka ovejafāfe ifokōi askarama. Āfe oveja kexesharai. Poomā oaito fichixō ato kexesharatiro, poomānā ato afeska fanōma. Nāskaxō shinātiro iskakī: ‘Ēfe ovejafōnoax ē natiro afokai afeskatiroma,’ ixō shinātiro.

¹⁴⁻¹⁵ “Ēfi nā ovejafāfe ifo keskara sharakī. Ovejafo āfe ifāfe ato tāpia atomāi kexesharakat-saxakī. Ēri nā ea chanīmara faafo ē ato kexesharamis. Ēfe Epa Niospa ea tāpikōia. Ēri ēfe Epa ē tāpia. Nāskarifiakī a ea chanīmara faafo ē ato tāpia. Afāferi ea tāpiafo. Nāskax ē atoōnoax naxii. ¹⁶ Yora fetsafāferi ea chanīmara faxikani. Afokai nono ikafoma. Mai yetsa ano ikafō. Nāfāfe ea nikasharaxikani. Nāfo ēfe Epa ika ano ē ato iyotiro. Akka nā yora fetsafāfe a nono ikafāferi ea chanīmara fakanax yora fisti keskara ixikani. Nāskax Epa Niospa yorakōifo ixikani. Eres fisti ē ato kexesharai. ¹⁷ Ē ato kexeax ē atoōnoax naxii. Nāskaito ēfe Epa Niospa ea noi. Naax ē anā otoxii. ¹⁸ A ea chanīmara faafoōnoax ēakōi ē nai, ea tsōa retekeranama. Ēfe Ēpa ea yoini keskara ē atoōnoax naikai. Ēfe Epa Niospa ea yoini keskara ē atoōnoax nafiax ē anā otoxii,” ixō Jesús ato yoini.

¹⁹ Nīkakaxō judeofāfe chanīmara fanifo. Akka atirifāfe chanīmara fanifoma. ²⁰ Atirifāfe yoini iskafakakī: “Nīafaka yōshi chaka a mēra nanea. Afaa tāpia. Noko yoiai nō tāpitiroma. Āfeskakī na feronāfake nō nikatiromē?” ixō yoinifo. ²¹ Akka atirifāfe yoinifo: “Nīafakakai a mēra naneama. Nīafaka a mēra naneanokai iskara meka shara yoikeranama. Nīafakakai feronāfake fēxo ōimatiroma,” ixō yoinifo.

Judeofāfe āto xanīfofōfāfe Jesús chanīmara fanifoma

²²⁻²³ Askafafono Jesús kani judeofāfe āto Nios kīfiti pexefā mēra Jerusalén ano mā mechakaino. Nāno tapas keskara ini pexe kachiori. Ano Jesús kani. Nā tapas āfe ane Salomón. Nāskatari judeofāfe āto fista anifo. Nā fistaſiā shinānifo a Niospa pexe onifani.

²⁴ Judeofāfe āto xanīfofo Jesúski fenifo yōkai fekani: “ĀMīmē Cristoki? Noko yoife. Āfeskakī mī noko yoisharaimamē? Āfetīakairoko mī noko xafakīa yoimē?” faifāfe, ²⁵ “Ē mato yoifimiskē mā ea chanīmara faima. Ēfe Epaōxō a yorafāfe atiroma keskara fakī mē mato ispa ēmāi Niospa Fakexō. ²⁶ Akka māikai ea chanīmara faima mākairoko Ēpa Niospa yorafoxō. ²⁷ A ea chanīmara faifāfe ea nikasharatirofo. Mē ato tāpia a ea Ifofakōinafo. ²⁸⁻³⁰ A ea Ifofafoma omiskōipakenakafo mēra fokani. Akka a ea Ifofamisfokai ri fokanimo. Askatamaroko ē ato imasharapakenaka. Epa Niospa atoya ea rafemani. Epa Niospa keyokōi ato finōkōia. Ē ēfe Epa Nios fe nā yora fisti keskara. Nāskakē a ea Ifofamisfo emakinoa tsōa ato ifitiroma, ēfe Epa makinoari tsōa ato ifitiroma,” ixō Jesús ato yoini.

³¹ Nīkakaxō judeofāfe āto xanīfofōfāfe anā tokiri fikaxō aō Jesús tsakapainifo retapaiyanā. ³² Nāskafaiifāfe Jesús ato yoini: “Epa Niosxō afama mīshti ē mato ispa tsōa atiroma keskafakī. Akka, Āfaōxokai mā ea tokirinī tsakaimē?” ato faito, ³³ “Akka na afama mīshti mī noko ispaōxokai nō mia tokirinī tsakaima. Akka nā mī meka chakaōxō nō mia tokirinī tsakapai, ē Nios keskara mī ikaito. Anā ano Nios fetsama. Mīri noko keskara yora. Akka mī noko yoia: ‘Ēri Nios keskara,’ iki. Akka mī Nios chakafai. Nāskakē nō mia tokirinī tsakai,” faifāfe, ³⁴ Jesús ato kemani iskafakī: “Mā iskai: ‘Anā ano Nios fetsama,’ mā imis. Akka nā Niospa meka yoimisto kirika keneni iskafakī: ‘Ē mato yoi māfi Nios keskarakōifokī. Niospa mato nīchia,’ ixō kirika keneni, Niospa meka yoikī. Akka nā meka tsōa chanīra fatiroma. ³⁵⁻³⁶ Akka Niospa anori yoifiano Āfeskakī mā ea yoimē ē Nios chakafai? Akka Niospa ea nai

mĕraxō nāmā nĕhini. Nāskakē ē mato yoitiro ēfi Niospa Fakeki. ³⁷⁻³⁸Mā kai ea nikapaima. Ēfe Epa Niospa aka keskara ē ayamakē, āa chanĭra mā ea fakerana. Akka ēfe Epa akai keskara ēri akaito mā yoikerana: ‘Chanĭma Epa Niospa atiro keskara Jesús aki,’ ixō mā yoikerana. Nāskakē a ē afama mĭshti akaōxō ea chanĭmara fakāfe. Ēfe Ēpa akai keskara ēri akaito mā ea tāpitiro ēfe Epa fe ika,” ixō Jesús ato yoini.

³⁹Nikakaxō anā Jesús achipaifiaifono, ato makinoax kaitokai tsōa tāpinima. Nāskakē tsōa achinima.

⁴⁰Ato makinoax kai, faka Jordán ari kani nā Juan yorafo maotisafapaoni ano. Nāno chaimashta Jesús nĕteni faka kesemē. ⁴¹Nāskakē yorafo akiki fĕkaxō yoinifo iskafakakī: “Jesús Niosxō afama mĭshti fakī noko ispa. Juankai askafapaonima. Askafixō Juan Jesúsnoa noko yoini chanĭmakōi,” ikanax yoinānifo. ⁴²Nāskakaxō yora ichapato Jesús Niospa fakera fakaxō Jesús chanĭmara fanifo.

11

Lázaro mā nani

(Mt. 12.46-50; Lc. 8.19-21)

¹Askata feronāfake Lázaro isinī ini. Nā Lázaro Betania ano ikax isinī ini. Poi rafe fe ikax María ikaino, Marta ikaino, nā rafe ato fe ikax. ²Nā María pirofomā sharakapa Jesús āfe tae pemākia nachiyoni. Nāskaxō āfe fōo otekere ani.

³María feta Marta iskafakī Jesús yoitanōfo ato nĕhini: “Ifo, mĭ yamakōi Lázaro isinī iki kiki,” ikaxō yoitanōfo. ⁴Kenamanaifāfe nikaxō Jesús aōxō tāpimisfo ato yoini iskafakakī: “Nā Lázaro isinī ikai naima. Akka yorafāfe ōikani ē afara afeskarafaito. Nāskakē ea tāpikani ĕmāi Niospa Fakekē. Nāskaxō yorafāfe yoikani: ‘Epa Nios fāsi sharakōi,’ ikaxō yoinōfo,” ixō Jesús ato yoini.

⁵Jesús poi rafeya Lázaro noikōini. ⁶Lázaro isinī ikaito nikafi Jesús oxa rafeyoni. ⁷Nāskata a aōxō tāpimisfo Jesús yoini: “Nō Judea mai ano nō anā kanō,” ixō Jesús ato yoini. ⁸Ato askafaito kemanifo: “Maestro, nōko xanĭfōfāfe Judea anoxō mā mia retekeraitafo. ¿Afeska mĭ afianā ari kapaimē?” ixō yoaifono. ⁹Jesús anā ato kemani: “Penata nō ōisharatiro. Xinĭ chaxaino nō ōisharatiro. Nāskax nō otisikax nō paketiro. Nāskarifiakī pena tii Niospa ea amapaiyai keskara ea tāpimani. Nāskaxō ea kexeano ē mesetiroma. ¹⁰Akka fakishi yora kai xafasharayamano otisikax paketiro. Nāskarifiakī Nios fe rafeamato tāpisharatiroma afeska xisharatiromāki. Askax fenotiro,” ixō Jesús ato yoini.

¹¹Nānori ato yoita anā Jesús ato yoini iskafakī: “Nofe yora Lázaro mā oxakē ē mōikai,” ato faito, ¹²a aōxō tāpimisfāfe nikakaxō yoinifo: “Ifo, akka oxakōiax naima. Chipō sharatiro,” fanifo. ¹³“Nofe yora Lázaro mā oxakī,” Jesús ato fani. Mā Lázaro nafiakē ato tāpimapainima. Nāskakē shinānifo: “Lázaro oxara,” ikaxō tsōakairoko tāpixō. ¹⁴⁻¹⁵Nāskaxō Jesús ato xafakīa yoini mā Lázaro nakōinano: “Mā Lázaro naki. Nāskax ē inimaikai ē ano ikamano Lázaro naki. Akka mā ea chipō ōitiro ē afara afeskarafaito. Nāskaxō mā ea chanĭmara fai. Nāskakē iskaratĭa nō Lázaro ano kanō,” ixō Jesús ato yoini. ¹⁶Ato askafaito nikakata Tomás nā Rafe Naneni nāato Jesúsxō tāpimis fetsafori ato yoini: “Nō kanō nōri afe naxikī,” ixō ato yoini.

Jesús fistichi naafo ato otofatiro

¹⁷Askata Betania ano nokoxō Jesús nika: “Mā Lázaro naa,” nikani. Mā cuatro nia oxa nikani a maifaitafo mafa kini mĕra, Betania ano. ¹⁸Betania fe Jerusalén chaima ini. ¹⁹Judeofo ichapa María fe Marta ika ano fenifo ato ferarafai fekani, mā āto poi naano.

²⁰Nāskata Marta Jesús oaito nikai akiki nokoikai kani María pexe mĕra nĕchifaini. ²¹Marta Jesúski nokoxō yoini: “Ifo, mĭ nono ikanokai ēfe exto nakeraitama. ²²Ē tāpia mĭ iskaratĭa afara fetsa mĭ Nios yōkaito mia axorisafatirokī,” faito, ²³“Extofi anā otoi kiki,” faito, ²⁴“Ē tāpia nā namisfo mā mai keyoaino afianā ototixani. Ēfe extori ototii,” ixō Marta yoaino, ²⁵Jesús kemani: “Eōnoax nā nāfo tii otokani. Akka eōnoax niafori. Nā ea chanĭmara faax nafiax anā ototii kiki. ²⁶Nāskakē ea chanĭmara faax anā nanakama. ¿Nāskakē mĭ ea chanĭmara faimē?” faito, ²⁷“Ēje, Ifo, ē mia chanĭmara fai mĭmāi Cristokē, Niospa fake. Nō mia manamis. Akka nōko xinĭfāferi Cristo manapaonifo. ¿Afetĭa na mai ano Cristo oimē?” ikaxō noko xinĭfāfe mia manapaonifo,” Marta fani.

Lázaro mafa kini mĕra maia ōi Jesús oiani

²⁸Nāskata mā yoikī xateta, Marta āfe chiko María yoikai kani. Kaxō ōia a María fe rafeafo oiyakani inifo. Nāskata Marta āfe chiko María one mĕshanāxō yoini: “Mā nōko Ifo oaki. Mia kenamana, ōikofē,” fani. ²⁹María nikata finināfāta kani Jesúski nokoikai. ³⁰Jesúskai pexe rasi ano nokoama ini. Nā Marta akiki nokoano Jesús nĕteni. ³¹Mā María ato fe oiafai kaino a afe oiafaiyaiāfe ōinifo. “María poi maia mĕnāonoax oiai kai kiki,” ikaxō chĭfafaifainifo.

³² María Jesúski nokota ratokonō mai chachipakefōfā yoini: “Ifo, mī nono ikanokai ēfe exto nakeraítama,” María fani. ³³ María oiaito Jesús ōini. Judeofori a María fe feafori oiaifāfe Jesús ato ōini. Nāskaxō ato shinākōini. ³⁴ Nāskaxō ato yōkani: “¿Fanī mā maifaitamē?” ato faino, yoinifo: “Ifo, ono nō akitakīa ōiyopo,” fanifo. ³⁵ Askafafono Jesús oiani. ³⁶ Oiaito ōikakī judeofāfe: “Ōikapo. Lázaro manoi oiai,” fanifo. ³⁷ Nāskaxō fetsafāfe yoinifo: “Nā fēxo sharafaita keskafaxō, ¿afeskafakī nonoxō Lázaro sharafaitamamē?” fanifo.

Jesús Lázaro otofani

³⁸ Nāskata Jesús anā shināmítsani Lázaro maia ano nokoax. Nā Lázaro maia ano nā kini tokiri efapato fepoafo ini. ³⁹ Nāno nokoxō Jesús ato yoini: “Na tokiri aō fepoa fepekāfe,” ato faito, nikakī Marta yoini: “Iskaratīa mā pisiaki,” faito, ⁴⁰ nikakī anā Jesús yoini: “¿Ē mia yoiāito mī ea nikaimamē? Ea mia nikaino Niospa afara shara faito mī ōitiro,” fani. ⁴¹ Askafaito nikakakī fēpexonifo. Fēpexonaifono nai foisnīfōfāta Apa yoini: “Epa, ē mia kīfīaito mī ea nikai. Ē mia aicho fai. ⁴² Ē tāpiaki ea mā nikafafāimiskī. Nāskakī ē mia kīfi na yorafāfe mia chanīmara fanōfo. Nāskakaxō ea tāpinōfo ea māa nīchiniki.”

⁴³ Apa kīfīkī askafata fāsikōi Lázaro kenani: “Lázaro, kini mēranoax kākerafe,” faino, ⁴⁴ Lázaro kākerafe nā aō rakoitafoya. Nāskaxō ato yoini: “Na mā aō rakoita pekakāfe kāisharanō,” ato fani.

*“¿Afesaxō nō Jesús retetiromē?” ixō shinānifo
(Mt. 26.1-5; Mr. 14.1-2; Lc. 22.1-2)*

⁴⁵ Nāskata judeofo a María fe feafāfe Jesús Lázaro otofaito ōikakī Jesús chanīmara fanifo. ⁴⁶ Nāskafaito ōikani atiri fariseofokī chanīfokani fonifo. ⁴⁷ Ato yoiāifāfe nikakanax fariseofo fe a Nios ato kīfixomisfāfe āto xanīfofo ichanānifo. Ichanākanax yoinānifo: “¿Nō Jesús afeska faimē? Tsōa atiroma keskara fai kiki. ⁴⁸ Nō afeskafayamaino keyokōichi chanīmara fakani kiki. Romano xanīfokōifo fēkaxō noko yoitirofo iskakafakī: ‘Mā kai anā xanīfoma,’ noko fatirofo. Nāskaxō nōko kīfīti pexefā noko pōtatirofo,” ikanax yoinānifo. ⁴⁹ Nāskafāfe Nios ato yioxomis xanīfokōichi Caifās ato yoini: “Māfi tatimakōiki,” ato fani. ⁵⁰ “¿Mā tāpiamamē? na feronāfike fisti a yorafoñnoax naxiai. Nāfi sharaki. Ares fisti natiro nō nanōma, nōko kaifo fetsafori nanōfoma,” ixō ato yoini. Chanīmakōi Caifās ato a ixiai keskara yoiakī.

⁵¹ A Caifās yoiāi āa shinākī yoinima. Niospa āfe shināmā shināmanaino yoini. Nios kīfixomisfāfe āto xanīfokē Niospa āfe shināmā shināmanaino, “Jesús judeofonoax naxira,” ixō yoini. ⁵² Jesúskaui judeofo fistiñnoax naima. Mai fetsa ano ikafāferi chanīmara faafono ato nāxoxii. Nāskata Niospa fake ixikakī noinākōikanax, nā yora fisti keskara ixikakī.

⁵³ Nāskata nā penata judeo xanīfofōfāfe shinānifo: “¿Afesaxō nō Jesús retetiromē?” ikaxō pena tii shināpaonifo. ⁵⁴ Mā retepaiyafono tāpiax judeofo ano anā Jesús kanima. Yorafā rasi ano katamaroko pexe fisti rasi ano kani, nā pexe āfe ane Efraín ano, tsōa istoma ano. Nā aōxō tāpimisfo fe nāno iyoni.

⁵⁵ Judeofāfe āto fista Pascua mā chaima ikaino, yora rasi Jerusalén ano fonifo, Pascua fista akīfokani. Moisés āto xinifo yoipaoni keskai akairi āto chaka soapaikani Nios kīfīti pexefā mēra ikīfokani, fista ikamano fonifo. ⁵⁶ Nāskafono judeofāfe Jesús fenanifo. Nāskakanax Nios kīfīti pexefā mēra ikīfoni. Nānoax yoinānifo: “¿Fanīmē Jesús?” ikanax yoinānifo. “ ‘Nonox Jerusalén anoxō Jesús fista akiyoirā,’ ¿mā ikimē?” ikanax aa ranā yoinānifo. ⁵⁷ Askakaxō judeofo āto xanīfofo feta fariseofāfe ato yoinifo iskakafakī: “Jesús fichixō noko tāpimakāfe nō achinō,” ato fanifo.

12

*Kēromā Jesús shinākī pirofomā āfe tae pemākīa nachini
(Mt. 26.6-13; Mr. 14.3-9)*

¹ Nāskano seis nia Pascua fista mā chaima ikaino Jesús aōxō tāpimisfo fe Betania ano kayoni. Nāno Lázaro ika ini. Nā Lázaro nakē Jesús otofani. ² Nānoxō Jesús pimaxikakī pīchanifo, a Jesús fe foafāferi pīnifo. Lázarori ato feta pini. Nā Marta ato pimani. ³ Mā piafona María Jesúski oni āfe pirofomā sharaya. Oxō nā pirofomā āfe tae pemākīa nachini. Nāskaxō āfe fōo otekere ani. Nāskafaano yorafāfe nā pexe mēra ikafāfe nā pirofomā sharakōi xetenifo. ⁴ Nā Jesúsxō tāpimis fētsa nā Judas Iscariote, Simón fake, nā ato achimaxiaito yoini, ⁵ “Kee. ¿Afesakī na kēromā pirofomā shara potaimē? Ato minixō kori ichapa fixō noko inākerana a afaamaisfo nō ato ināpanā. Nāskax shara ikerana,” Judaspa fani. ⁶ Anorī Judaspa yoiāfīkī ato kori inākeranama. Nā Judasfi yometsokōi iniki. Nā Judaspa āto kori kexexopaoni. Yometsofixō nāskakē tsōa tāpiapanima. Nā kori fixō a afaamaisfo ato inākeranama, nā a kori onekerana. ⁷ Nāskafaito nikakī Jesús Judas yoini: “María fekaxtefayamafe. Ē samamashta naito mā tāpixō ekeki pirofomā nachia,” fani. ⁸ “Nā yora afaamaisfo mato fe ipanakafa.

Nāskakē mā ato mēxotaima afarafo inātiro. Akka ēkai mato fe nono mai ano ipanakama, ē mato yoi. Akka na María iskaratīa ea shara faa,” ato Jesús fani.

Judeofāfe āto xanīfofāfe Lázaro retepainifo

⁹ Nāskata judeofo ichapa rasi Jesúski fenifo, Betania ano ikano mā tāpikanax Jesús fistikai ōifekani fenifoma. Lázarori ōifekani fenifo. Nā Lázaro Jesús otofaita nikakaxō ōipainifo. ¹⁰⁻¹¹ Nā Lázaro Jesús otofaita nikakaxō judeofāfe ranārīto anā āto xanīfofo tananifoma Jesús fisti chanīmara fakakī. Nāskaifono nā xanīfofo ōitifishkikanax yoinānifo: “Jesús yafi Lázaro nō retenō. Jesús fistima. Lázarori nō retenō,” ikanax yoinānifo.

Jesús nokoni Jerusalén ano

(Mt. 21.1-11; Mr. 11.1-11; Lc. 19.28-40)

¹² Nāskano pena fetsa judeofāfe āto fistatīa yorafā rasi Jerusalén ano fenifo. Jesús nokoaito nikakani nāskax akiki fenifo. ¹³ Epe pei tsoamakanax akiki fekani. Nāskakanax fāsikōi tai tai ifenifo iskakani: “¡Sharafinakōi nokoki oi kiki Niospa nīchiano! Israelifo mā nōko xanīfo oi nokoki. ¡Sharafinakōial!” ikaxō fāsikōi yoinifo. ¹⁴⁻¹⁵ Askafaifono Jesús burro fakeshta kamakī tsaoax oni. Niospa meka fētsa keneni iskafakī Niospa shināmanaino:

Jerusalén ikafāfe, rateyamakāfe. Māto xanīfo matoki oxii burro fakeshta kamakī tsaoax,

ikaxō kirika keneni. ¹⁶ Nāskafikē Jesúsnoa yoikī kirika keneni keskara aōxō tāpimisfāfe tāpiyonifoma. Akka mā reteafono otoax Apa ari kaano nāskakē aōnoa tāpinifo. Iskakakī shinānifo: “Nā Jesús nono mai anoxō a afama mīshti axiai aōnoa yoikakī kirika keneyoni. Nōko xinīfāfe Jesús fakeyoamano a inōpokoi aōnoa yoikakī kirika keneni,” ikaxō Jesúsxō tāpimisfāfe āto ōiti mēraxō shinānifo.

¹⁷ Jesús Jerusalén ano nokoaino nikakakī yorafā rasichi a mananifo ōipakakī. Atirifāfe mā Lázaro nakē Jesús otofaitano ōinifo. Nāskakē mā Lázaro Jesús otofaita ōikanax fetsafoki chaninifo akairi tāpinōfo. ¹⁸ Jesús Lázaro mā nakē otofaita nikakaxō nāfāferi ōipainifo. Nāskaxō fai nēxpakīaxō mananifo. ¹⁹ Nāskakē fariseofo yoinānifo: “Kee. Shinākapo. Nōkai na yorāfo afeska fatiroma anā Jesús tanayamanōfo. Tsōakai noko anā tanapaima keyokōichi yorafāfe Jesús nikakōipaikani,” ikanax yoinānifo.

Griegofāfe Jesús fenanifo

²⁰ Nāskata Jerusalén ano nā yorafā rasi mēra griegofori ato fe inifo judeofāfe āto fista akaifono. ²¹ Nānoax Felipe ano fonifo, Felipe yōkai fokani. Nā Felipe Galilea mai anoax fakeni, nā pexe rasi āfe ane Betsaida anoax. Felipe ano fokaxō griegofāfe Felipe yōkanifo: “Nō Jesús ōipai noko efexōfe nō āfe yoinānō,” Felipe fanifo.

²² Askafaifāfe nikaxō Felipe Andrés yoini: “Na griegofo Jesús fe mekapaikanikiki. Nō Jesús ato yoixonō,” fani. ²³ Yoiaifāfe nikakī Jesús ato kemani: “Ēfi samamashta ēfe Epa ari ē kaikai afe xanīfo ikikai. Akka ēfe Epa ari kayotama ē yorafonoax nayoxii. ²⁴ Akka ē mato tāpimani mā tāpinō. Xiki fero fisti nō fanayamano kāitiroma. Akka nō fanasharano foaix āfe fimi ichapa itiro. Nā nō fana āfe exe fisti payokometiro, akka āfe kaya yositiro. Nāskarīfiai ē matōōnoax nayamakē mā efe ipaxatiroma. Eres fisti ē ipaxatiro. ²⁵ Akka āa fētsa shināi iskai: ‘Niospa ea amapaiyai keskara ē shināima, ēa ē apaiyai keskara ē shināi,’ ixō anori shināi fenotiro. Akka nā iskakī shināi: ‘Ē nono mai ano niyoxō ē apaiyai keskara ē shināpaima, Niospa ea amapaiyai keskara fisti ē shināpai,’ ixō shināi afi Epa Nios fe nīpanakakī. ²⁶ Akka a ea yonoxopaikī ēfe meka nikakōixō a ē yoiai keskara atiro. Ea Ifofax a ē ika ano nāri efe ipaxatiroki. Ea yonoxomis a ē yoiai keskara ea axōaito ēfe Epa Niospa yoixii iskafakī: ‘Aicho. Mī ēfe Fake Jesús nikasharamiski. Mī fāsi sharakōiki,’ Epa Niospa yoikī iskafaxii a ea Ifofamis.

²⁷ “Iskaratīa ēfe ōiti mēra ē shināmitsai. ¿Ē afeskaimē? Akka, ‘Epa, ea ifife ea omiskōimayamanōfo,’ ē faima. Akka ēfe Ēpa ea nīchini ē ato omiskōixonō,” ato Jesús fani. ²⁸ Nāskaxō Jesús Apa yoini: “Epa, eōxō ato ispafe mī fāsi sharaki,” ixō Jesús Apa yoini. Askafaito nikakī nai mēraxō fāsikōi Niospa kemani: “Ē mīōxō mē ato ispa ēmāi afama mīshti shara fakī afianā afama mīshti ē ato ispai,” ixō yoini.

²⁹ Nā yorafā rasichi anoxō nikakani yoinānifo. Atirifāfe yoinifo: “Mā nai tiri ika,” fanifo. Atirifāfe yoinifo: “Epa Niospa ājirinī Jesús yoia,” ikanax yoinānifo. ³⁰ Nāskaifono Jesús ato yoini: “Na meka nai mēranoa mā nikai ea tāpimatata, mato tāpimaxikī yoia,” ato fani. ³¹ “Iskaratīa nā ea Ifofaifoma Niospa ato omiskōimani. Āto ifori nā yōshi chaka Satanás nāri ēfe Epa Niospa potaxii anā xanīfo inōma. ³² Akka ēfi yōra fakekōi. Ea retexakō ifi cruz ikakī ea mastakaxō ea fininīfofāxikani. Ea askafaifono ē yorāfo ē ato ifi efe rafenōfo,” ixō Jesús ato yoini. ³³ Nānori ato yoini nā ifi cruz ikakī mā mastaxiaifono ato tāpimani.

³⁴ Nikakaxō yorafāfe nāno nixō yoinifo iskafakakī: “Niospa meka sharaōnoa kirikakī kenekī yoikī iskafanifo: ‘Cristo, nā Niospa nīchia nīpanaka nanakama,’ fanifo. Akka,

¿afeskakī mī noko yoimē iskafakī?: ‘Na yōra fakekōi retexaxō ifi cruz ikakī mastakaxō fininifofāxikani,’ mī noko fai. ¿Akka tsoaōnoa mī noko yoimē?’ fanifo. ³⁵ Askafaifono Jesús ato yoini: “Ē nono ika pena keskara shara. Nāskakē ē anā mato fe nono ifāinakama. Ē mato yoiaito nikasharakāfe fenoxikakima. Pena yamaino fakish itiro. Nāskakē yora fenotiro. Tsōa fakish mēra ōitiro, fāi kai fenotiro. Nāskarifai a chaka shināmis fenotiro. Fenokī tāpitiroma afeskax Nios fe rafetiro māki. ³⁶ Ē mato fe iyoano ea Ifo shara fakāfe fenoxikakima. Mā ea nikasharaino ē mato pena keskara shara fatiro, xafakīa mā inō. Ēfi pena keskarakī. Ea Ifo shara fakaxō māri fetsafo pena keskara shara fatiro mātōxō eari Ifo sharafanōfo,” ato Jesús fani. Mā ato yoikī senēfax, nāskax ato makinoax kaitokai anā tsōa ōinima.

Judeofāfe Jesús nikanifoma

³⁷ Yorafāfe ferotai fi tsōa atiro ma keskara Jesús fafiaino tsōa chanīmara fanima nā Niospa Fakekōi fiano. ³⁸ Nā Isaiās Niospa meka ato yoipaoni. Nāato kirika keneyoni a inōpokoai yoikī. Iskafakī yoini:

Ifo, nō mī meka nō ato yoifiainokai tsōa noko chanīmara faima. Yōra atiro ma keskafakī mī ato ispaifiaino tsōa tāpiama, ixō Isaiās a inōpokoai yoikī kirika keneyoni.

³⁹ Nāskakē tsōa Jesús nikanima. Askatari afianā Isaiās kirika keneni a inōpokoai yoikī iskafakī:

⁴⁰ A nikaiyamaifo Epa Niospa fēxo keskara ato imapakenaka Niospa meka chanīmakōi mā tāpifikaxō tsōa nikayamaito. Niospa ato shinātimafai anā shināsharanōfoma. Nāskakē Niospa meka ōifikakī tsōa shināima āto ōiti kerexkōi fakani mā nikafikaxō. Āto chaka xateaxma ekeki fekanima ē ato fetsa keskara shara fapanā, ixō Niospa ato yoini. Nānori a Jesús inōpokoai yoikī Isaiās kirika keneyoni.

⁴¹ Isaiās Niospa shināmanaino Jesús tāpini xanīfo sharakōi ikiyoai. Nāskaxō Isaiās Jesúsnoa yoini.

⁴² Judeofāfe xanīfofo atirifāfe Jesús chanīmara fanifoma. Akka atirifāfe chanīmara fanifo. Akka afaa tsōa yoinifoma fariseofoki mesekakī noko potayamanōra ikanax āto ichanāti pexe mēraxō. ⁴³ Yora fetsafāfe ato yoiaito nafo sharakōifora nā yorafāfe atoōnoa meka shara yoiainono nikapaimisfo. Akka Niospa atoōnoa nafo sharakōira ixō yoiaino fichisharapainifoma.

Jesús mekaōxō nō tāpia nō chakakōifo

⁴⁴ Nāskata Jesús fāsikōi mekainīkafā ato yoini iskafakī: “Nā ea chanīmara faito ea fisti chanīmara fatama nā ea nīchiniri chanīmara fai. ⁴⁵ Nāskafakīri mā mā ea ōia nā ea nīchiniri mā mā ōia. ⁴⁶ Nono mai ano fakish keskara. Nāskakē ēfe Epa Nios ariax ē nono mai ano ē oni pena keskara ikiyoai. Fakishi tsōa ōitiro. Akka nā ea chanīmara faito Epa Nios Ifo sharakōifatio pena keskara shara ixikī.

⁴⁷ “Mā ēfe meka nikafikaxō ea nikayamaifono ēkai ato omiskōimanima. Akka ē mai ano oni yorafo omiskōimatama ato ifiyoi ē oni efe ipaxanōfo. ⁴⁸ Akka nā iskakī shināi: ‘Ēkai Jesús Ifofapaima, askatari āfe mekari ē nikapaima,’ ixō shināi nā ē mato yoimis keskara nikayamax Nios ari katama omiskōipakenakafo mēra kaxii. Nāskakē ē mato yoiaito mā ea nikayamax mā mai keyoaino mā omiskōipakenaka. ⁴⁹ Ēfe Epa Niospa ea yoiā keskara nānorikōi ē mato yoimis. Ēa ē mato yoima. Ēfe Epa Nios nā ea nīchinioxō ē mato yoimis. ⁵⁰ Mē tāpia Epa Niospa yoiā keskara chanīmara faax mā nīpaxatiro. Nāskakē, ‘A ē ato yoimis keskara nānori ato yoife,’ Ēfe Epa Niospa ea famis,” ixō Jesús ato yoini.

13

Jesús aōxō tāpimisfo āto tae chokapakeni

¹ Mā judeofāfe āto Pascua fista chaima ikaino Jesús tāpini a mai anoax Apa ari kaxiai. A Ifofaafō nā nono mai anoafō ato noini. Mā atoōnoax nakī ato noikōini.

² Jesús aōxō tāpimisfo feta mā xini kaino ato feta pipaini. Nāskaino nā Judas Iscariote mēra Satanās yōshi chaka nanetani. Nā Simón fetsa āfe fake Judas Iscariote. Nā Judas mēra niafaka nanexō shināmani iskafakī: “Ato tāpimafe afeskaxō na Jesús achitirofomāki,” ixō Satanās shināmani.

³ Akka Epa Niospa āfe Fake yoini: “Nā nai mēranoafōya nā mai anoafori mī ato yonomatiro. Mī āto xanīfo,” ixō Epa Niospa anori yoiaito Jesús tāpini. Epa Nios ariax onixakī mā anā akiki kakī Jesús tāpini. ⁴ Nāskata pikī keyotama Jesús fininākfā āfe rapati pekata āfe rakotinī pinixemeni. ⁵ Nāskata faka tasoki manexō a aōxō tāpimisfo ato fāka ochopakeni. Mā ato ochopakexō ato otekere apani āfe rakotinī.

⁶ Ato askafapakī Pedrori āfe tae chokapaiyaito yoini: “Ifo, ¿afeskakī mī ēfe Ifo fixō mī ea fāka ochopaimē?” faito, ⁷ Jesūs kemani: “Na ē mato fāka ochofai mī tāpiama. Akka mī chipo tāpixii,” faito, ⁸ anā Pedro kemani: “Maa, Ifo, mīakai ea fāka ochopakenakama,” Pedro faito, anā Jesūs kemani: “Ē mia ochoyamainokai mī efe rafetiroma,” fani. ⁹ Askafaito nikakī Pedro yoini: “Ifo, taekis ea chokakima ēfe mifkiri ea afe, ēfe mapokiri ea māchofe,” faito, ¹⁰ “Nā rama yora nashiax āfe yora choshtanatiroma, āfe tae fisti choshtanatiro. Nāskakē nō tae fisticī nō chokatiro. Akka keyokōi mā choshtama, ranāri mā shara,” ato Jesūs fani. ¹¹ Nānori ato yoini māmāi tāpixō fatoto ato achimaximākai.

¹² Mā ato ochopaketa āfe rapati safeni. Mā āfe rapati safeta afianā tsaopakekafāni. Nāskaxō ato yoini: “¿Mā mā tāpiamē na ē mato fāka ochofaito?” ato fani. ¹³ Nāskaxō anā ato yoini: “Māfi, ‘Maestro,’ mā ea fayana, ‘Ifo,’ mā ea famis. Chanīmakoī ēmāi mātō Ifo ita ē mātō maestrori.” ¹⁴ Askata anā ato yoini: “Ē mātō Ifokī, askatari ē mātō maestrokī ē mato fāka ochopakea oa mātō ina keskarakōixō. Akka nā ē mato fāka ochopakea keskariāi mā ranā fāka ochokome faatanākāfe oa mātō inafō keskarax. ¹⁵ Ē mato ōimana keskariāi māri askakāfe,” ato fani. ¹⁶ “Ē mato chanīma yoi. A yonoxomistokai āfe xanīfo finōtirioma. Akka ē mato nīchia mā fetsafo ēfe meka yoinō. Nāskafixokai fetsafo ēfe meka ato yoifkīkai mā ea finōama. Ē mato fāka ochomis oa ē mato yonoxomis keskaraxō. Nāskaxō, ‘Nō fetsafo finōa, nō āto inama,’ iyamakāfe,” ato Jesūs fani. ¹⁷ “Na ē mato yoiaito mā nikakōiax, nāskax mā fāsi inimakōitiro.

¹⁸ “Nāskakē ē mato yoi, akka keyokōiōnoa ē mato yoima. Ē tāpia fatomākī ē katōa a nofe kai, askatari a nofe kaima. Nāskakē ē mato yoi, eōnoa Niospa meka yoikī kirika keneyonifo nō nikakī nō chanīmara fatiro. Iskafakī kirika keneyonifo, Niospa meka: ‘A feta piāi fētsa ea ōikaspakī ea chakafaxii,’ ixō kirika keneyonifo. Chanīmakoī mā ōifainaka,” ato Jesūs fani. ¹⁹ “Ea askafayoamano ē mato yoiyomis. Akka nā ē mato yoiai keskara ea askafafono mā ea ōikī, nāskakē mā ea chanīmara fatiro. ²⁰ Ē chanīkima mato yoi ē mato nīchi mā ēfe meka ato yoitanō. Mā ato yoiaito nikakaxō eari nikakani. Nāskatari ea chanīmara fakaxō nā ea nīchiari chanīmara fakani,” ixō Jesūs ato yoini.

*“Mā fētsa ea ato achimaxii,” ixō Jesūs ato yoini
(Mt. 26.20-25; Mr. 14.17-21; Lc. 22.21-23)*

²¹ Mā yoikī keyota Jesūs fāsi shināmitsakōini. Nāskaxō xafakīakōi ato yoini: “Ē chanīma mato yoi. Fatora mā fētsa ea mā ato achimaxii,” ato faito, ²² nikakani fesenākefainifo tāpikanaxma. ²³ Afe ketaxamei tsoa Jesūs fichisharapaikōini. ²⁴ “Fatora mā fētsa ea mā ato achimaxii,” ato faito nikakī a Jesūs fe ketaxamei tsoa Pedro fenāmāshita yōkani: “Tsoaōnoa yoi mā, yōkafē,” fani. ²⁵ Nāskafaito nikakī a Jesūs fe ketaxamei tsoaoto chaimashta fani yōkaxikī: “Ifo, ¿tsoaōnoa mī yoi mē?” faito, ²⁶ Jesūs kemani: “Na pōa tere pishta nami ene mēra mechanafaxō ē ināito nāatofi ea ato achimaxii kiki,” Jesūs fani. Nāskafaxō nami ene mēra pāa mechanafaxō Judas Iscariote Jesūs ināni, Simōn fetsa āfe fake. ²⁷ Jesūs pāa mechanafaxō Judas ināino Judas mēra Satanās chaka nanerisatani. Nāskaxō Jesūs Judas yoini: “Nā mī apaiyai keskara farisafafe,” fani.

²⁸ Nā tsaokaxō piaifāfekai tāpinifoma afeska fakī askafaimākai. ²⁹ Atirifāfe shinānifo: “Jesūs Judas nīchiaito Judaspa afara fitanō Jesūs nīchi fista ayanā pixikī,” ixō shinānifo. Akka atirifāferi shinānifo iskafakē: “Jesūs Judas nīchia a faamaisfo kori inātanō,” ixō shinānifo. Nā Judaspa āto kori kexexomis ini. ³⁰ Nāskax Judas koshi kani mā fakishaino.

Jesūs Ifofamisfo noinā faatanātirofo

³¹⁻³² Nāskata mā Judas ato makinoax kaano Jesūs ato yoini: “Iskaratīa ē naino Epa Niospa mato ōimani ēmāi āfe Fake sharakōikē. Nāskafax ēfi yōra fakekōi. Ē afama mīshti akaito ōikaxō, ‘Epa Nios fāsi sharara,’ faxikani. Nāskakē mā tāpitiro ēmāi Niospa Fakekōikē a keskara sharakōi.

³³ “Ēfe fakefāfe, ēkai anā nono mato fe ifinakama. Mā ea fenaxii. Ē judeofo yoita keskafakīri ē motori yoi. Ē kai arikai mā katiroma. ³⁴ Ēfe meka fenashara ē mato yoikai, noināi finakāfe. Nā ē mato noiai keskariāi māri noinā faatanāsharakāfe. ³⁵ Mā noināiyaito yorafāfe ōinōfo mā eōxō tāpimiski,” Jesūs ato fani.

*“Ē Jesūs ōimisma, Pedro ixiaino,” Jesūs ato yoini
(Mt. 26.31-35; Mr. 14.27-31; Lc. 22.31-34)*

³⁶ Nāskata Pedro Jesūs yōkani: “Ifo, ¿faki mī kaimē?” faito, nikakī Jesūs kemani: “Ē kai arikai iskaratīa mī efe kayotiroma. Chipō mī kaxii,” faito, ³⁷ anā Pedro kemani: “¿Afeskai iskaratīa ē mefe katiromamē? Mē iskaratīa itipinīshara mīōnoax naxikī,” faito, ³⁸ anā Jesūs kemani: “¿Mī chanīmamē? ¿Mā mī itipinīsharamē naxikī?” Jesūs fani. Nāskaxō anā yoini: “Na fakishi takara keoyoamano mī ea iskafai: ‘Ēkai Jesūs ōimisma,’ ixō mī ato yoi tres fakī,” Jesūs fani.

14

Jesús fai keskara. Aõnoax nõ Nioski nokotiro

¹ Anã Jesús ato yoini: “Èfe fakefãfe, mãto õiti fekaxtefayamakãfe. Nios chanĩmara fata, eari chanĩmara fakãfe. ² Èfe Epa ika ano pexe ichapa sharakõifo. È mato itipinĩsharafaxõi kaikai. Askarayamakãfe mato yoikerana. ³ È kaxõ ã mato itipinĩshara faxõikai. Afianã oxõ ã mato ifyoxii, a ã ika ari mato iyoxiki ari mã efe ãpaxanõ. ⁴ Mã mã fai tãpiaki a ã kai ari,” ato faito, ⁵ Tomás kemani: “Ifo, nõkai a mã kai ari tãpiama, afeskaxõ nõ fai tãpitiroma,” faito, ⁶ Jesús kemani: “Èfi nõ fai keskarakĩ. Èfi chanĩmismaki. Eõnoax yorafo ãpaxatirofoki. Tsoakai ãfe Epa ika ano nokotiro. Eõnoax fisti ãfe Epa ari nokotirofo.

⁷ “Ea tãpikõixõ ãfe Epari mã tãpikõitiro. Akka iskaratĩa mã ãfe Epa tãpikõikai. Nã mã ea õiai keskarakĩ mã ãfe Epa mã õi,” ato Jesús faito, ⁸ Felipe kemani: “Ifo, noko Epa Nios õimafe. Mã noko Epa Nios õimanaino nõ inimakõitiro,” faito, ⁹ Jesús kemani: “Felipe, afetiakai ã mato fe imisma. ¿Afeskakĩ mã ea tãpiyomismamã? Ea õikĩ ãfe Epari mã mã õi. ¿Afeskakĩ: ‘Ea Epa õimafe,’ mã ea faimã? ¹⁰ Èfi ãfe Epa fe fisti keskarakõiki. ¿Nã mã chanĩmara faimamã? A ã mato yoiã ãa ã mato yoima ãfe Epaõnoa ã mato yoi. Epa Niospa nã apaiyai keskara ea famai efe imis. ¹¹ È mato yoi ãfe Epa efe rafea ãri ãfe Epa fe rafemiski. Nãskakã ea chanĩmara fakãfe. Nã tsõa atiroma keskarafori ã famis nõ õixõ ea chanĩmara fakãfe.

¹² “Chanĩmakõi ã mato yoi. Nã ea chanĩmara faxõ nã ã akai keskarakĩ faxii. Èfe Epa ari kaxõ a ã aka keskaramaroko finõmainĩfõfã axikani. ¹³ Afara ãfe aneõxõ ãfe Epa mã yõkaito ã mato axoxii, eõxõ Epa Nios sharara fanõfo. ¹⁴ Afara fetsa ãfe aneõxõ mã Epa Nios yõkaito ã mato axotiro,” ixõ Jesús ato yoini.

“Epa Nios ãfe Yõshi Shara ã matoki nõchixii,” Jesús ato fani.

¹⁵ Anã Jesús ato yoini iskafakĩ: “Ea noikõikĩ nã ã mato yoiã keskakĩ ikãfe. ¹⁶ È Epa Nios mato kĩfixoni mato fetsa nõchixonõ, nõato mãto õiti fepeaxoyonõ. Nã Niospa Yõshi Shara, nãfi chanĩmismaki. Mato fe ipanaka. ¹⁷ A nikayamaifãfe õitirofoma. Askatari tãpitirofoma. Akka mãfi mã mã tãpimiski mato femãi ikã. Nãskatari mãto shinã mãra mato fe ika.

¹⁸ “Akka ãkai mato fe ikima. Askafixõ ã mato potaima. È matoki anã oxii. ¹⁹ È anã nono ikima. A ea Ifofaifãfema anã ea õikanima. Akka mã ea õixii, ã niano. Nãskakã mãri efe ãpanaka. ²⁰ Naax ã otoaito mã ea tãpitiroma ãmã Epa Nios fe ãpanakakã. Nãskarifiã mã efe ixii. ãri ã mato fe ixii. ²¹ Nãskakã ã mato yoiãito mã ea nikakõixõ mã ea fãsi noi. Ea noixori ãfe Epari mã noi. Askatari ãri ã mato noi. Nã ã shinãi keskara ã mato tãpimani,” ixõ Jesús ato yoini.

²² Nãskaito Judas fetsa, Judas Iscariotema yõkani: “Ifo, ¿afeskakĩ a mia Ifofaifõfoma mã ato tãpimatama noko fisti mã tãpimanimã?” ixõ yõkaito, ²³ Jesús kemani: “Ea noikakĩ nã ã mato yoiã keskara ea nikakõitirofo. Èfe Epa ato noiaino ãri ato noi. Nãskax nõ ato fe rafetiro. ²⁴ Ea noiyamakaxokai ã yoiã keskara ea nikakanima. Na meka mã nikai ãfe mekama, ãfe ãpa meka ã mato yoi. Nã ea nõchinito ãfe meka.

²⁵ “Mato fe iyoxõ ã mato yoiyofafãina. ²⁶ Nãskaxõ Epa Niospa ãfe Yõshi Shara matoki nõchi eõxõ mato fe ixõ mãto õiti mato inimamasharaxonõ. Keyokõi mato tãpimani. Nã ã mato yoiã keskara mato shinãmani.

²⁷ “È mato makinoax kakĩ ã mato õiti fepeaxosharafãinikai. Akka nã ea nikaiãfãfema mato õiti fepeaxotirofoma, ã fistichi ã mato axotiro. Nãskakã shinãchakayamakãfe. Rateyamakãfe. ²⁸ È mato yoiãito mã mã nikai ã mato makinoax kaikai. Askafiax ã anã matoki oxii. Ea noikõiax mã ekeki inimatiro ãmã ãfe Epa ari kano, ãfe Epamãi ea finõkõikã. ²⁹ Nã ã mato rama yoiã keskaito mã ea chanĩmara fatiro. Mẽ mato yoiã ixiã mã õixõ mã ea chanĩmara fanõ.

³⁰ “È mato mẽxotaima yoipaifãina nõ yõshi chakafãfe ato xanĩfo Satanãs chaka ekeki oi. Askafixõ ea afeska fatiro. ³¹ Akka ã Epa Nios fãsi noikõi. Nãskakã nã ea yoiã keskakã ã akõini. Nãskaxõ keyokõichi ea tãpikani ã fãsi aõ noiaito. Fininĩfõfãkãfe. Nonoax nõ kanõ,” ato fani.

15

Jesúsfi fana ãfe kaya keskarakĩ. Akka nã fana põya keskarafo a Ifofamisfo

¹ Anã Jesús ato yoini iskafakĩ: “Èfi uva ãfe kaya keskarakõiki. Akka ãfe Epa nã uva ãfe ifo keskara. ² Akka mã na uva ãfe põya keskarafo. Nã uva põya fetsa fimiymaito ãfe ifãfe mextetiro potaxikĩ. Akka nã uva ãfe põya fimiyafo nã ãfe teshpa mĩshiti ifãfe xatetiro. Nãskax uva põya sharayakõi itiro fimi sharaya ixikĩ. ³ Nãskarifiãkĩ mã ãfe meka nikaxõ mã mãto chaka mã potax mã isharaxii. ⁴ Emakinoax paxkayamakãfe. Efe rafekãfe, nã ã mato fe ika

keskariai. Akka uva pōya fisti fimitiroma āfe kayamaisax. Nāskarifiakī mā efe rafexoma nā ē mato amapaiyai keskara mā atiroma.

⁵“Ēfi nā uva āfe kaya keskarakī. Akka mā nā uva āfe pōyafō keskara. Akka nā efe rafekōiai ēri afe rafekōiaino ea keskarakōiri itiro. Ē mato fe ikamano mā afaa afeskatiroma. ⁶Uva āfe pōya chaka fimimais nō mextexō potatiro. Nāskaxō mā xinī tsasifaano nō ichafaxō nō kofatiro. Nāskarifiāi nā efe rafekaspaifo nāfo chiifā mēra fokani.

⁷“Akka mā efe rafekōixō ēfe meka mā nikakī mātō ōiti mēraxō mā shinākī mā afarashta fapaikī ēfe Epa Nios mā kifiaito mato axōi. ⁸A ē mato amapaiyai keskara mā akī nāskax eōxō tāpimis mā iki. Mā askafaito ōikakī Epa Nios tāpitirofo Epa Niosmāi fāsi finakōikē. ⁹⁻¹⁰A Epa Niospa noikōiai keskafakī ēri mato noikōi. Epa Niospa ea yoiai keskara ē afafāini. Akka ē afe imiskē ea noifafāini. Nāskafakīri nā ē mato yoiaito mā atiro māmāi efe ixō. Nāskakē ē mato noifafāini.

¹¹“Anori ē mato yoi ē inimai. Nāskarifiāi māri mā inimanō. Ē mato yoiaito mā anori akī mā tāpitiro ē mato noiaino. ¹²Iskafakī ē mato yoi: Ē mato noiai keskai māri noinākāfe. ¹³Nō fetsafo fe rafekōiax nō aō noikōiax nō aōnoax natiro. A mā nakī noiai keskarakōi tsōa finōtiroma. ¹⁴Ē mato yoiai keskara aki mā efe rafemis mā itiro. ¹⁵Akka a mato fe rafea mā tāpimatiro a mā shināi keskara. Nā ēfe Epa ea yoimis keskara ē matori tāpimani māmāi efe rafeano. Nāskakē ea yonoxomisfora ē anā mato faima. Efe rafeafora ē mato faxii. ¹⁶Mā ea ifyamafiaino ē mato ifini ea keskara mā inō mātoxō fetsafāferi ea chanimara fanōfo. Nāfāfe ea Ifofapanakafō efe ipaxakakī. Nāskaifono mā afarashta ēfe Epa Nios ēfe aneōxō mā yōkaito mato axosharaxii. ¹⁷Nā ē mato yoiai keskai noinākāfe,” ixō Jesūs ato yoini.

Jesūs Ifofamisfo ato noikaspakani

¹⁸Anā Jesūs ato yoini iskafakī: “Anā ē mato yoi mato noikaspayokanima. Akka ea noikaspayokani. Mato iskaratīa noikaspafiaifono mā tāpitiro taefakī ea noikaspakani. ¹⁹A ea Ifofaafoma fe mā ato fe rafeaito mato noikeranafo. Aa ranā noināifo keskari fakī matori noikeranafo. Akka mākai ato keskarama. Ē mato ifini a ea Ifofaifoma keskara mā inōma. Akka nā ea Ifofaafāfema mato noikaspakani. ²⁰Nā ē mato yoiai keskara shinākāfe. Ē mato yoi iskafakī a yonoxomistokai āfe ifo finōtiroma. Akka ea omiskōimakani matori omiskōimaxikani. Akka a ē ato tāpimana nikakaxō matori nikaxikani mā ato yoiaito. ²¹Akka mā ea Ifofaito, nā ea amisfo keskafakakī matori askafaxikani. Akka a ea nīchini tsōa tāpiama. Nāskaxō mato chakafaxikani.

²²“Ē atoki oyamaxō Niospa meka ē ato yoiyamaito tsōa tāpikeranafoma. Akka Niospa meka pishta tsōa nikayomisma afara chakafamisfo. Nāskax āto chaka atoō neama. Nāskafiaifono Niospa meka ē ato yoixiki ē oni. Nāskakē tsōa iskaratīa iskatiroma: ‘Tsōa ea Niospa meka yoiaa.’ Askatari: ‘Ē afaa chakafamisma,’ itirofoma. Mā nikafikatsaxakakī āto chaka xateafoma. Nāskax āto chaka atoō nea. ²³Ea noikaspayanā ēfe Epari noikaspakani. ²⁴Niosxō tsōa atiroma keskara ē ato ispamis. Askafikaxokai tsōa āto chaka xateafoma. Tsōa atiroma keskara ē faito ōifikakī ea nīkakanima. Nāskax shara ikanima. Akka ē afarafo shara fayamaito ea tāpikeranafoma. Nāskax ato chaka atoō nekeranama. Akka ē afarafo shara faito mā ōifikaxō ea noikaspayanā ēfe Epari noikaspakani. ²⁵A Niospa meka yoikī kirika kenenifo nē askakōi. Niospa meka yoikī eōnoa kirika kenenifo iskafakakī: ‘Ē afara chakafayamafiakē ea noikaspakani,’ ixō eōnoa yoikī kirika kenenifo.

²⁶“Matori noikaspafono ēfe Epa Nios arixō āfe Yōshi Shara ē matoki nīchixii. Nāato mato ōiti fepeaxosharanō. Nāfi chanīmakōikī eōnoa mato yoixii. ²⁷Ē yorafo Niospa meka ato yoikī taefani. Nāskax mā efe imiski. Nāskarifiakī māri eōnoa tāpixō mā ato yoitiro.

16

¹“A mā omiskōixiai ē mato yoiyoni mā iskakī shinānōma: ‘Ĵafeskaī Jesūs ēfe Ifo fiano ē omiskōimē?’ ixō mā anori shinākī mā ea potapaixii, anākai mā ea chanimara faxima. ²Tāpikāfe. Māto kaifāfe nā ea Ifofaafāfema mato potaxikani mā anā āto ichanāti pexe mēra ikinōma. Ē mato yoikōi anā shināsharakanima. Fakirira shinākani iskakakī: ‘Nā Niospa apaiyai keskara nō faxōi. Nā Jesūs Ifofafo nō retei,’ ixō anori shinākani. ³Efe Epa tāpiafoma eari tāpiafoma. Nāskakaxō mato chakafaxikani. ⁴Akka nā mā ea Ifofakī taefanitīa mā omiskōixii ē mato famisma, ē mato fe ifiaxokai ē mato afaa yoimisma. Akka iskaratīa ē mato yoi. Nāskakē mā mato omiskōimanaifono mā shināxii nā ē mato yoimis keskara,” Jesūs ato fani.

Niospa Yōshi Sharapa noko shināmatiro

⁵Anā Jesūs ato yoini iskafakī: “Ēfe Epa ea nīchini. Iskaratīa ē anā akiki kai. Akka mā, ‘Ĵfaki mī kaimē?’ mā ea faima. ⁶Ē mato yoiaino mā shināmitsai. ⁷Ē mato yoikōi, ē mato makinoax kaano mā shara ixii. Akka ē mato makinoax kayamaino Niospa Yōshi Shara

matoki oima. Nāskakē māto ōiti mato fepeaxoyoima. Nāskafiano ē mato makinoax kaxō ēfe Yōshi Shara ē matoki nīchixii. ⁸ Nā ēfe Yōshi Sharapa nai mēranoax oxō a ea Ifofaafoma ato yoixii iskafakī: ‘Mā mā afarafo chakafamiski,’ ato faxii. Nāskatari a Niospa fichipaiyai ato tāpimaxii. Nāskaxō a Nios Ifofaafoma ato yoixii iskafakī: ‘Mā mā afarafo chakafamiski, nāskakē mā omiskōi,’ ato faxii. ⁹ Nā ea Ifofaitoma afara chaka shināi. Nāskakē ēfe Yōshi Sharapa a afara chakafamis ispayoxii. ¹⁰ Ēfi nā ēfe Epa ea amapaiyai keskara ē amiski. Nāskax ēfe Epa ari ē kai anā ea ōinōfoma. Nāri Niospa Yōshi Sharapa ato tāpimaniyoxii. ¹¹ Nāskatari Niospa Satanās omiskōimaniyoxiai Niospa āfe Yōshi Sharapa ato tāpimaniyoxii, nā Satanās āto xanīfo.

¹² “Ē mato meka ichapa yoipaifaiotokai mā tāpitiroma. ¹³ Nāskafikē Niospa Yōshi Shara matoki oxō a Niospa āfe meka chanīmakōi mato tāpimaxii. Nāfi chanīmisma. Akka āfe meka mato yoitama nā ēfe Epa shināmanai anori mato tāpimaniyoi. Nā afarafo afeskara ixiai mato tāpimaniyoi. ¹⁴ Nāato eōnoa yoisharakōixii. Nāskakē nā ē mato yoimis keskara Niospa Yōshi Sharapa mato tāpimaxii. ¹⁵ Nā ēfe Epanāfori ēfenāfori. Nāskakē nā ē yoiyai keskara ēfe Epa āfe Yōshi Sharapa mato tāpimaxii,” ixō Jesūs ato yoini.

Jesūs aōxō tāpimisfo shināmitsafikanax chipo inimaxikani

¹⁶ Anā Jesūs ato yoini iskafakī: “Akka ēkai anā mato fe nono samarakaima. Mē ēfe Epa ari kai. Nāskakē mā ea ōiyoima. Nāskafix anā ē samamashta oaito mā ea ōixii,” aōxō tāpimisfo Jesūs ato fani.

¹⁷⁻¹⁸ Ato askafaito nikakani yoinānifo: “Ķfeskakī, ‘Ēfe Epa ari kaito mā anā ea ōiyoima,’ noko faimē? ‘Āfianā ē oaito mā ea ōixii,’ noko fai. Na noko yoiyai keskarakai nō tāpiama,” ikanax yoinānifo.

¹⁹ Nāskakaxō yōkapaiaifāfe Jesūs ato tāpini. “ĶNa ē mato yoiyai keskara mā tāpiamax mā yoinōnāimē?” ato fani. ²⁰ “Ē mato xafakīa yoinō. Mē omiskōiaino a ea Ifofaafoma fāsi inimakani. Akka māfi ea shināi mā oiāi. Mā ea shināi oiāfiāx chipo mā ekeki inimaxii. ²¹ Akka mā kēro fake kākī pae metiro. Nāskax mā fake kākixō anā pae metiroma māmāi āfe fake kākīax. Nāskax inimasharakōitiro māmāi āfe fake kākīsharax. ²² Nāskarīfai ē mato makinoax kaino mā oiāi omiskōixii. Nāskax ē anā chipo matoki oaino mā inimakōixii. Tsōakai mato xatematiroma mā ekeki inimaito.

²³ “Ē naax ē otoax ē anā mato fe iyamaino mā anā afara mā ea yōkatiroma. Akka ēfe aneōxō mā Epa Nios yōkatiro. Afarashta ēfe aneōxō mā Epa Nios yōkaito mato axoxii. ²⁴ Ēfe aneōxokai ēfe Epa mā yōkayomisma. Akka ē naax otokē nāskakē ēfe aneōxō ēfe Epa mā yōkatiro. Mā yōkaito ēfe Epa mato ināxii. Mato ināino mā fāsi inimakōixii,” ixō Jesūs ato yoini.

Jesūs keyokōi finōa

²⁵ Anā Jesūs ato yoini iskafakī: “Ē mato meka fetsafaxō yoiāito mā tāpiyomisma. Ēkairoko xafakīa mato yoiāito mā tāpipanā. Akka iskaratīa xafakīa ē mato yoi Epa Niosnoa mā tāpinō. ²⁶⁻²⁷ Nāskaxō mā ea noi. Ēmāi Nios ariax matoki onikē mā mā ea chanīmara faa. Nāskakē Epa Niospa matori noikōi. Akka, “Ē mato makinoax kakī anā ē mato Epa Nios kīfixoni,” ē mato faima. Mā mā yōkaxii ēfe aneōxō. ²⁸ Ē Epa ariax nono mai ano oni. Nāskakē iskaratīa nono mai anoax ēfe Epa ari ē kai,” ixō ato Jesūs yoini.

²⁹ Ato askafaino aōxō tāpimisfāfe kemanifo: “Aicho, iskaratīa xafakīakōi mī noko yoikai. A mī noko taefakī yoiāito nō tāpiyotama. Anā meka fetsafaxō mī noko yoima. ³⁰ Iskaratīa mā nō tāpia keyokōi mī tāpikōia. Nō mia yōkapaiaiyaito mī noko tāpitiro. Nāskakē mī Nios ariax onikē nō mia chanīmara fai,” ixō yoiāifāfe ³¹ Jesūs anā ato kemani: “ĶChanīmamē mā mā ea chanīmara faimē?” ato fani. ³² Nāskaxō anā ato yoini: “Chipo mā emakinoax mā paxkakāinikai. Mā fakirira kai. Chanīma, iskaratīa mā emakinoax mā fakirira kai. Tsoakai efe nēteima. Mā askafianokai eres ē nēteima. Ēfe Epa fe ē nētei. ³³ Nā ē mato yoi māto ōiti shara inō. Akka nā ea chanīmara faafoma fe mā nono nāmā nētei. Nāskakē mato omiskōimafaifono shināchakayamakāfe. Ē Satanās yafi nā ea chanīmara faafomafo ē ato finōkōia. Nāskakē ē mato kexesharatiro,” Jesūs ato fani.

17

Aōxō tāpimisfo Jesūs Epa Nios ato kīfixoni

¹ Nāskata Jesūs nai foisnīfofā Apa yoini: “Epa, iskaratīa ē naano ato tāpimafe ē mī Fakekōiki. Mī ato tāpimanaino ēri ato tāpimatiro mī fāsi sharakōi. ² Mī ea nīchini ē āto xanīfo inō. Nāskaxō mī ea ato ināni ē ato imasharapakexanō. ³ Meres fisti mī Nioskōi. Akka ēfi Jesucristo nā mā nīchini. Nā noko tāpiafo nāfo nīpanakafo.

4 “Ē nono mai anoxō afarafo ē ato ispa, mīmāi sharafinakōikē. Nā mīa yoiai keskara mē aka. 5 Nō mai onifamatai ē mia keskara xanīfo shara iyoapaoni. Nāskakē iskaratīa ē mefe xanīfo inō ea xanīfo imafe a ē ipaoni keskara.

6 “Nono mai anoa yorafo mī ea ato minini ē ato tāpimanō mī afe keskaramāki. Nā mīnāfōfiano mī ea ato minini. Mī meka nikakōinifo. 7 A mī ea yoia keskara ē ato yoimis. Nāfo mā tāpikōiafo. 8 A mīa yoiai keskara ē ato yoiaito ea chanīmara fakōikani. A ē mia ariax oniri mā tāpiafo. Chanīmara fakani a ea mīa nīchini.

9 “Ē mia ato kīfixōfāini. Akka a ea chanīmara faafoma ē mia ato kīfixonima. Nā ea mī ato mininiōxō ē mia kīfifafāini. Ē mia ato kīfixōfāini nāfomāi mīnāfokē. 10 Akka nā ēfenāfori mīnāki. Nā mīnāfori ēfenā. Nāskaxō nā ea chanīmara faafoōxō fetsafāferi tāpitirofo ē sharakē.

11 “Ēkai anā na mai ano ikima. Ē mikiki kai. Akka nā mia Ifofaafofi nono na mai ano nētekani. Epa, mī fāsi sharaki. Ato kexesharafe. Mī aneōxō ato kexesharafe. Nā mī ea ināni tii ato kexesharafe. Akka nōfi fisti keskaraki. Nāfori nofe fisti keskara inōfo. 12 Ē ato fe iyoxō ē ato kexeshara. Mīoxō ē ato kexeshara, ē fato fenoama. Akka nā Satanās āfe fake fisti ē fenoa. Nā mī meka yoikī kirika keneyonifo keskarax nā fisti mā fenoa.

13 “Iskaratīa ē mia ari kai. Ē kayoxoma ē ato yoiyoi nā ē ikai keskarai akairi inimakōinōfo. 14 Nā mī yoiai keskara mē ato tāpimani. A mia chanīmara faafāfema ato noikaspakani, miamāi Ifofaafono. Nāskakē ato noikaspakani. Nāskakēri ērikai ato keskarama. Akka eari noikaspakani.

15 “Akka ē mia yoima na mai anoa mī ato ifinō. Akka ē mia yoi na mai anoa mī ato kexesharanō Satanās chakata ato afeska fanōma. 16 Nā mia Ifofaafa a mia chanīmara faafomafo fe, ato fe rafetirofoma. Ērikai ē ato fe rafetiroma. 17 Mī meka chanīmakōi. Mī mekapa ato sharafafe mia keskara shara inōfo. 18 Ea mī mai ano nīchini ē mī meka ato yoinō. Nāskarifikē ē yorafo nīchi mī meka shara ato yoitanōfo. 19 Mīa ea yoia keskara ē akaino nāfāferi askari fanōfo.

20-21 “Ēkai ato fistiōxō kīfifafāinima. Nā ea Ifofaafāfe ato yoiaifono nikakaxō ea Ifofaxikani. Nāskakē ē mia ato kīfixōfāini nā nō shināi keskara fisti shinānōfo. Mī efe imis keskai nāfori nofe inōfo. Nō ato fe tanaima niaito ōikakī a ea chanīmara faafāfema akairi chanīmara fanōfo mī ea nīchini. 22 Mī efe imis keskai ēri ato fe imiski. Nā nō shināi keskarafa akairi shinānōfo. 23 Mī efe ika keskarari ēri ato fe ikaki. Akka nā mī shināi keskarafa nōri shinātiro. Mī ōiti keskara nō itiro. Akka mī ea atoki nīchini. Nā mī ea noiai keskari fakī nāfori mī ato noikōi. Mī askafaino nā ea chanīmara faafāfema tāpitirofo.

24 “Epa, nā yorafo mī ea ināfo efe inōfo mī ika anoa mia keskara shara ea ōinōfo. Mī mai onifayoxoma mī ea noiyoapaoni. 25 Epa, mī fāsi sharakōi. Nā ea chanīmara faafāfemakai mīa tāpiafoma. Akka ē mia tāpikōia. Mī ea nīchini nā efe ikafāfe mā tāpiafo. 26 Mī afe keskaramāki mē mia ato tāpimamis nā mī ea noiai keskari fakī, nāfāferi fetsafo noikōinōfo ē ato fe ikano. Askatari ē ato ōimafāini,” ixō Jesús Apa kīfīni.

18

Jesús achinifo

(Mt. 26.47-56; Mr. 14.43-50; Lc. 22.47-53)

1 Nāskata mā Apa kīfīkī nishpata aōxō tāpimisfo fe fakishi Jesús kani, xexa Cedron pishta pokefaini. Nāno ifi fanāfāfe āfe anefo olivos ini. Olivos mēra ikitoshinifo. 2 Judaspa ato Jesús achimani kakī tāpini faki Jesús kaamāki, Olivos anomāi aōxō tāpimisfo Jesús ato iyomiskē. 3 Nānori Judaspa sorarofa iyonī Jesús achinōfo. Nā ato Nios kīfixomis xanīfofōfāfe askatari fariseofāferi Nios kīfīti pexefā kexemisfo nīchinifo Judas fe fōtanōfo. Chiifoya kenofoya koshatifoya ashifoya fonifo. 4 Mā achifofāifono Jesús ato tāpini. Mā nokoafono ato yōkani: “ĴMā tsoa fenaimē?” ato faito, 5 “Nō Jesús Nazarete anoa nō fenai,” faifāfe, ato kemani: “Ēkīa, nono ē ika,” ato fani. Ato askafaino nā Jesús ato achimanai Judasri nāno ato fe ini. 6 “Ē nono ikaki,” Jesús ato faino, chetekiri ifiakekafāpakei fetsenifo. 7 Nāskaxō Jesús anā ato yōkani: “ĴTsoa mā fenaimē?” Jesús ato faino, “Nō Jesús Nazarete anoa nō fenai,” faifāfe 8 anā ato yoini: “Ēkīa nā mā ea fenai ē mato faa,” ato fani. Nāskaxō ato yoini: “Mā ea fenamākai na eōxō tāpimisfo ato nīchikāfe fotanōfo,” ato fani.

9 Nā Jesúsnoa yoikī kirika keneyonifo iskafakī: “A mīa ea minia fato fisti fenoima,” ixō kirika kenenifo. Nāskaxō nā kirika kenenifo keskarakōi Jesús Apa Nios kīfīni. 10 Nāskaino Pedro āfe keno tsekani, āfe keno tslostamexō. Mā āfe keno fixō nā ato Nios kīfixomisto āfe xanīfāfe yonomati paxteni. Nā xanīfāfe āfe yonomati āfe ane Malco ini. Nā Pedro paxteni. 11 Pedro askafaito ōikī, “Mī keno fafe,” Jesús Pedro fani. “ĴMī shināimamē? Ēfe Epa ea afara kechoki inā ē ayai,” ayatiki keparanākī Jesús Pedro yoini. “Nā ēfe Epa Niospa apaiyai keskara ē akikai,” ixō Jesús yoipaini.

*Jesús Anás ano iyonifo**(Mt. 26.57-58; Mr. 14.53-54; Lc. 22.54)*

¹² Sorarofāfe āfe xanīfo feta a Nios kīfīti pexefā kexemisfo feta osinākaxō Jesús achikaxō metexkere anifo. ¹³ Metexkere akaxō Anás pexe ano iyonifo. Nā Anás Caifās āfe rayos ini. Nā Caifās Nios ato kīfixomis xanīfokōi ini. ¹⁴ Nā Caifās āfe kaifo israelifo yoini: “Feronāfakē fīsti yorafaōnoax naa, sharaki,” ato fani.

*“Ē Jesús ōimisma,” Pedro ini**(Mt. 26.69-70; Mr. 14.66-68; Lc. 22.55-57)*

¹⁵ Askata Jesús iyoaifono Pedro fe a Jesúsxō tāpimis fetsa ato acho fonifo. Mā pexe ano nokoano nā Jesúsxō tāpimis fetsa xanīfāfe mā ōimis ini. Nā Jesús fe ikikaini. ¹⁶ Akka Pedro kāiti ano nēteni, ikinima. Akka nā Jesúsxō tāpimis fetsa ikikaini. Nāato xomaya a kāiti kexea yoini Pedrori ikimanō. ¹⁷ Mā Pedro ikiano nā kāiti kexemis xomayato yōkani: “¿Mīri mī Jesús āfe inamē?” faito, “Maa, ēkai Jesús āfe inama,” Pedro fani.

¹⁸ Mā fakishano matsinākōikanax chii ketefaax keyokōi chii yoonifo matsi meyamaxikakī. Nā xanīfofo āto yonoxomisfo fe a Nios kīfīti pexefā kexemisfāfe chii ketefaax yoonifo. Pedrori ato fe yooni.

*Judeofāfe xanīfāfe Jesús yōkani**(Mt. 26.59-66; Mr. 14.55-64; Lc. 22.66-71)*

¹⁹ Nāskata ato Nios kīfixomisfāfe āto xanīfāfe Jesús yōkani iskafakī: “¿Fatofomē a mīōxō tāpimisfo? ¿Afaa mī ato yoimismē?” faito, ²⁰ “Ēkai one ato yoiaama. Keyokōichi ea nikanōfo ē ato yoimis. Ē māto ichanāti pexe mēranao yafi a māto Nios kīfīti pexefā mēranao ē ato yoimis. Ēkai ēfe meka ē onemisma. ²¹ ¿Afeskakī mī ea yōkaimē? Ea yōkakima a ea nikamisfo yōkafe. A ē ato yoimis tāpiafoki,” Jesús faito, ²² a Nios kīfīti pexefā kexemisto afe ketaxamei niato fepasyanā yoini: “¿Afeskakī nōko xanīfo mī anori yoimē?” faito, ²³ Jesús anā kemani: “Afaa chaka ē yoimē ea yoife. Akka ē afaa chaka yoiaama ¿afeskakī mī ea fepasimē?” Jesús fani.

²⁴ Askafaito nikakī Anás āfe rayos Caifās ano Jesús nīchini metexkere axō. Nā Caifās ato Nios kīfixomis āto xanīfokōi ini.

*Pedro anā ato yoini: “Ēkai Jesús ōimisma,” ato fani**(Mt. 26.71-75; Mr. 14.69-72; Lc. 22.58-62)*

²⁵ Nānoax Pedro ato fe chū yooni. ato fe yooaito afianā Pedro yōkanifo: “Mīfi nā Jesús āfe ina fetsakī,” faifāfe, “Maa, ēkai nā Jesús āfe inama,” ato fani.

²⁶ Ato askafaino nā paxteato afe yōra yōkani: “¿Ē mia ōiamamē? Akka ē mia ōia. Nā fanapo mapoa mēranao Jesús yafi ē mia ōia,” nā paxteato afe yōra Pedro fani. ²⁷ “Maa. Ēkaima,” Pedro faino takara keoinākakfani.

*Pilato ano Jesús iyonifo**(Mt. 27.1-2, 11-14; Mr. 15.1-5; Lc. 23.1-5)*

²⁸ Nāskano fakishpari judeofāfe Caifās āfe pexe anoxō Pilato xanīfo ano Jesús iyonifo. Nā judeofo Pilato āfe pexe mēra ikitiroma inifo. Pilatokairoko judeokē a mēra ikipanāfāfe. “Nō Pilato āfe pexe mēra ikiax nō chakanatiro,” ikanax, ikikaspanifo. Nā judeofo a judeofoma fe rafexō Pascua fistatīa pitirofoma ipaonifo. Nāskara feyafamisfo ipaonifo. Nāskakē Pilato āfe pexe mēra ikikaspanifo. ²⁹ Nāskaifono pexe kachiori kāinākakā Pilato ato yōkani: “¿Afaa chakafakē na feronāfakē mā ea ano efeamē?” ato faito, ³⁰ “Afaa chakafayamakekai nō mikiki efekeranama,” faifāfe, ³¹ ato Pilato yoini: “Iyotakāfe. Māto xinīfāfe yoini keskafakī omiskōimaxikakī. Nā keskara mā feyafamiskī. Afaa chakafamāki mā akāfe,” ato Pilato faito, judeofāfe kemanifo: “Akka māto xanīfofōfāfe yoinifo nō tsoa retēkī mastatiroma,” fanifo.

³² Jesús aōxō tāpimisfo taeyoi yoini keskafakī nāskakōi fanifo ifi cruz ikaki mastakakī.

³³ Nāskano Pilato āfe pexe mēra Jesús ikimani yōkaxiki. Mā ikimaxō yōkani: “¿Mīmē judeofāfe āto xanīfo?” Pilato faito, ³⁴ Jesús kemani: “¿Mī ea shināmē ē judeofāfe xanīfo mia yoiaforaka?” Jesús faito, ³⁵ anā Pilato kemani: “¿Mī shināmē ē judeo? Ē judeoma. Akka mī kaifo feta mī xanīfofōfāfe mia ekeki efeafō ē mia omiskōimanō. ¿Mī afaa chakafakē mia ekeki efeafomē? Ea yoife,” Pilato faito, ³⁶ Jesús kemani: “Ēkai na mai anoax xanīfoma. Ē nonoax xanīfokē a ea Ifofaafāfe yorafa setekeranafa ea achiyanāfo. Akka ēkai na yorafāfe āto mai anoax ē āto xanīfoma,” Jesús faito, ³⁷ Pilato kemani: “¿Akka mī xanīfo rakikīā?” faito, “Nā ea mīa yoiai keskarakīā ē xanīfo. Nāskakē ē yōra fakekōi kāini meka chanīmakōi ato yoixikī. A meka chanīmakōi fīsti nikapaiyāifāfe nāfāfe ea nikamisfo,” Jesús faito, ³⁸ “¿Afaamē a meka chanīmakōi?” Pilato fani.

*Pilato ato yoini Jesús retenōfo**(Mt. 27.15-31; Mr. 15.6-20; Lc. 23.13-25)*

Askafata Pilato pexe kachiori kãinãkafani. Kãinãkafaxõ judeofo yoini: “Ë na feronãfake yõkakĩ êkai aõnoa afaa chaka nikama,” ato fani. ³⁹ “Iskaratĩa na Pascua fistatĩa ã yora fisti karaxa mëranoa ã mato kãimaxomis, nãskaramã mato feyafamiskẽ. ¿Akka ã mato xanĩfo ã mato kãimaxotiomẽ katanõ?” ato faino, ⁴⁰ fãsikõ mekainĩfofãfãfo: “¡Jesús tsekakima! ¡Barrabás noko kãimaxõfe!” fanifo. Nã Barrabás yometso ini.

19

¹ Nãskaxõ Pilato ato yoiano Jesús iyonifo sorarofãfe koshatinĩ koshaxikakĩ. ² Askano sorarofãfe moxa chainipafõ maiti fakaxõ maimanifo. Akiki kaxepaiyanã nãskatari tari õshi nana safemanifo. ³ Nãskax akiki kaxepai kakĩ iskafanifo: “Aicho. Mĩfi judeofãfe ãto xanĩfoki. Mĩ mẽxotaima nipanakaki,” iyanã fepasketsanifo.

⁴⁻⁵ Askafafõno Pilato Jesús pexe xaki mëranoa kãimani õinõfo. Jesús tari õshi nana safeax kãikaini, moxari maiti fakaxõ maimanafono. Nãskaxõ Pilato ato yoini: “Õikapõ na feronãfakekai afaa chakafaa ã nikama ã chakafapanã,” ato fani. ⁶ Ato askafaito judeofãfe ãto xanĩfofaxõ a Nios kĩfiti pexefã kexemisfãferi fãsikõ mekafanifo: “¡Mastafe! ¡Mastafe!” fanifo, “Mã iyokaxõ mastatakãfe. Êkai aõnoa afaa chaka ã nikama ã chakafapanã,” Pilato ato fani. ⁷ Ato askafaino judeofãfe kemanifo: “Akka na feronãfake noko yoisim: ‘Ëfi Niospa fakeki,’ noko famis. Akka nõko xinifãfe yoini: ‘Ë Niospa fakera ikai natiro,’ fanifo. Nãskakẽ na feronãfake nayamaima,” fanifo.

⁸ Askafafãfe nikai Pilato ratekõini. ⁹ Nãskaxõ ãfe pexe mërã Jesús anã iyoni. Iyoxõ yõkani: “¿Fanĩamẽ mĩ?” faino, Jesús kemanima. ¹⁰ Pilato anã Jesús yoini: “¿Ea mĩa kemaimamẽ? ¿Ea mĩa tãpiamamẽ ã xanĩfo? Ë mia kãimatiro, askayamai ã mia ato mastamatiro,” Pilato askafaino, ¹¹ Jesús kemani: “Niospa mia xanĩfo imayamainokai mĩ ea afeska fakeranama. Akka mĩ ea ato mastamanax mĩ chaka iki. Akka nã ea mikiki efea nã chakafinãkõ iki mĩ ea reteano,” Jesús fani.

¹² Askafaito nikakĩ Pilato Jesús kãimapaini. Kãimapaiyaino nikakani fãsikõ judeofo mekainĩfofãkata yoinifo: “Fatora fetsa xanĩfo ipaikĩ nãto César xanĩfo chakafai. Akka na Jesús xanĩfo ipai. Akka mĩ Jesús kãimaxõ mĩ anã nõko xanĩfo César tanaima,” fanifo.

¹³ Askafafãfe nikakĩ afianã Pilato Jesús pexe mëranoa kãimani. Nãskax Pilato a xanifãfe tsaoti ano tsaoni. Nã xanifãfe tsaoti pexe emãiti ini tokiri sapa kamaki ãfe tsaotiki tãoni. Nã tokiri hebreofãfe ãto mekapa anemisfo Gabata fakakĩ. ¹⁴ Mã Pascua fista ikaino xini keya Pilato tsaõxõ ato yoini mã Jesús kãimaxõ, “Nakĩa õikapõ mato xanĩfo,” ato fani. ¹⁵ Ato askafaino fãsikõ mekainĩfofãkata yoinifo: “¡Iyoxõ mastatãfe ifi cruz ikikakĩnoax nanõ!” faifono, “¿Mã õipaimẽ ã mato xanĩfo mastanõ?” ato Pilato faino, “César fisti nõko xanĩfokõ. Anã ano nõko xanĩfo fetsama,” judeofãfe ãto xanĩfofãfe Pilato fanifo.

¹⁶ Askafafõno Pilato ato Jesús nĩchixonĩ iyoxõ mastatanõfo.

Jesús ifi cruz ikaki mastanifo
(Mt. 27.32-44; Mr. 15.21-32; Lc. 23.26-43)

¹⁷ Nãskano sorarofãfe Jesús iyonifo. Iyoafõno ãakõ ifi cruz ika Jesús iyaxõ fonĩ. A mastafõ ano nokoni. A mastafõ nãno ãfe ane ini: “Mapõ Xao,” fanifo anekakĩ. Judeofãfe mekapa Gólotara fapaonifo. ¹⁸ Nãskata Jesús yafi yometso raferi mastanifo. Takai rafe yometso rafe mastanifo. Akka Jesús nẽxpakã anifo.

¹⁹ Mã Jesús mastakaxõ ãfe mapõ mãnãori kenenõfo Pilato ato yoini. “Jesús Nazarete anoa judeofãfe ãto xanĩfokõ,” fanifo kene kakĩ. ²⁰ Jerusalén ano yora fetsafõ osiafo ichapakõifo inifo. Nãnoxõ Jesús Jerusalén chaimashtaxõ mastafõ ini. Nãnoxõ Pilato meka fetsa fetsatapafo ato kenemani Jesús judeofãfe ãto xanĩfokẽ tãpinõfo. Judeofãfe ãto meka keneta, griegofãfe ãto meka keneta, romanõfãfe ãto mekari kenenifo. ²¹ Nãskax judeofãfe ãto xanĩfofo Pilato ano fonifo yoi fokani: “Jesús nõko xanĩfoma. Nãskakẽ ato kenemayamafe iskafakĩ: ‘Jesús judeofãfe ãto xanĩfokõ,’ askara ato kenemayamafe. Akka, ‘Jesús yoisim, “Ë judeofãfe xanĩfora” imis.’ Nãnori mĩ ato kenematiro,” faifãfe, ²² Pilato ato yoini: “Nã ãto kenemana keskara ãto kenemani. Êkai anã afaa fetsa ãto kenematiroma,” Pilato ato fani.

²³ Sorarofãfe Jesús mastafõno ãfe rapati fãanifo. Nãskax paxkanã fetsenifo Jesús ãfe rapati soraro cuatropa Jesús rapati finifo. Nãskata nã ãfe tari chainipari fãanifo. ²⁴ Nãskax yoinãfõ: “Nã tari nõ faxteimãkai fetsakanãyamaxikĩ. Nãskara memashara nõ finõ,” inifo. Nãskax ãfe tariya kaxenifo ãto kaxetiya. “Na finõmanato Jesús ãfe tari fii kiki,” inifo. Nãnori Niospa meka yoikakĩ keneyonifo. A Jesús inõpokoai yoikakĩ keneyonifo. Iskafakĩ kenenifo: “Ëfe rapati paxkanãxikani. Askata ãfe tari chainipayari ãto kaxetiya kaxexikani. Nã finõmanato ãfe tari fixii,” ixõ kirika keneyonifo. Nãskakẽ sorarofõ Jesús ãfe tariya kaxenifo.

²⁵ Nāskano nā Jesús mastafa ano chaimashta Jesús áfe afa nini. Áfe afa fetsari nāno nini. Nā Cleofaspa áfe áfinō María Magdalenanō nāno chaimashta ninifo. ²⁶ Nā aōxō tāpimis fisti áfe yamakōi a Jesús noikōipaoni afa fe ketaxamei nikē Jesús ōini. Nāskaxō Jesús afa yoini: “Na feronāfakēfi mī fakeki,” fani. ²⁷ Nāskata nā feronāfakēfi Jesús yoini: “Nafi mī efaki,” fani. Askafaino nikakī María áfe pexe ano iyoni kexesharaxikī.

Jesús nani

(Mt. 27.45-56; Mr. 15.33-41; Lc. 23.44-49)

²⁸ Jesúsnoa yoikī Niospa meka keneyonifo keskakōini. Mā Jesús tāpixō yoini: “Ē nōamāiki,” ato fani. ²⁹ Ato askafaino fimi ene kacha ocha mefetiki tsaono nā mīxa fikaxō fimi ene kachaki momokaxō Jesús ayamapainifo tafa xatekī rōtati fakaxō. ³⁰ Mā fimi kacha ayaxō Jesús yoini: “Keyokōi ēfe Ēpa ea yoia keskara mē aka,” ato fani. Ato yoita nāskax nai tepopakekafāni.

Soraronō Jesús áfe pishi nāmā chachini

³¹ Mā Pascua fista ikaino Jesús yafi yometso rafe ifi cruz ikakīnoa judeofāfe ōikaspanifo. Nā fistaŋa ato pena tenetiŋa ini. Nāskax mā fista ikaino Pilato ano fonifo yoi fokani iskafakakī: “Mā penama nōko fista iki kiki. Nā Jesús yafi nā yometso rafe āto fitax xao tēkerisa fanōfo koshi nanōfo ato yoife. Mā penama nōko fista iki kiki nā ato mastafa ano anā inōfoma nōko fistaŋa,” judeofāfe āto xanīfofōfāfe Pilato fanifo. ³² Nāskafaifono Pilato sorarofo yoini iskafakī: “Āto fitax xao ato tēkerisa fakāfe koshi nanōfo.” Ato askafaino fokaxō ōiafo yometso rafe naafoma inifo. Naafomano āto fitax xao ato tākenifo nanōfo. ³³ Akka Jesúski fokaxō ōiafo mā Jesús naa ōinifo. Nāskakē tsōa áfe fitax xao tēkenima. ³⁴ Akka soraro fistichi áfe āshi áfe pishi nāmā chachiaino áfe imi fakaya siini.

³⁵ Ēkīa Juan na kirika ē keneai nē ē ōimis keskara ē mato yoi na kirika kenekī mā chanīmara fanō. Ēfi chanīmakōi mato yoi. ³⁶ Niospa meka yoimisto a Jesús inōpokoai yoikī kirika keneni iskafakī: “Áfe xaokai tsōa tēkexikanima,” ixō kirika keneyonifo. ³⁷ Askatari, “A áfe pishi chachiaifono ōixinōfo,” a Niospa meka yoimisto nānorikōi kirika keneyoni.

Jesús makex kini mēra maifanifo

(Mt. 27.57-61; Mr. 15.42-47; Lc. 23.50-56)

³⁸ Nāskano José Arimatea ano ikax Pilato ano kani. Kaxō Jesús áfe yora yōkani: “Ifi cruz ikakīnoa ē Jesús fotomapai maifaxikī,” José faito, “Atāfe,” Pilato fani. Nā José Jesús Ifofamis ini. Jesús Ifofafixō ato yoinima. Judeofāfe āto xanīfofoki mesekī ato yoinima. ³⁹ Nicodemo feta José Jesús ifi cruz ikakīnoa fotomanifo maifaxikakī. Nā Nicodemo Jesúski fakishi kaxō yōkayoni. Nāto áfe pirofomā shara treinta kilo feni Jesús áfe yora raish axiki fena pisiyamanō. Fetsa áfe ane mīrra ini. Fētsa aneri áloes ini. Nā rafe osia ini. ⁴⁰ Askano José feta Nicodemo sama oxo shara pirofomā raish axō aō rakonifo. Judeofāfe āto kaifo maifakī askara feyafamisfo ini. ⁴¹ Nā ifi shara mīshti mapoa anoxō chaimashtaxō Jesús mastanifo. Nānori mafa kini fena, tsoa a mēra maijomisma ini. ⁴² Mā judeofāfe āto pena teneti chaimashta ikaino mā xini kaino Jesús maifanifo. Nāskakē nā mafa kini chaimashta nā mēra Jesús maifanifo.

20

Jesús otōni

(Mt. 28.1-10; Mr. 16.1-8; Lc. 24.1-12)

¹ Nāskano nomīkonō fakishparikōi María Magdalena kani nā Jesús mafa kini mēra maia ano. Kaxō ōia nā mafa kini fepekemea ini. Nā tokirinīfā aō fepoitafo mā fepekemea ini.

² María ōifaini ichoni Pedro yafi nā Jesúsxō tāpimis fetsa nā Jesús áfe yamakōi chanifaikani kani. Ato yoini: “Nōko Ifāfe áfe yora kini mēranao mā fakira oneafo nōkai tāpiama,” ato fani.

³ Ato askafaino Pedro fe a Jesúsxō tāpimis fetsa ōifokani ichonifo. Mafa kini ano ōifokani.

⁴ Nā fētsa Pedro xonōfaini rekē nokoikakī. Akka Pedro chipo nokotoshini. ⁵ Rekē nokotoshixō a Jesús maia ano mafa kini mēra tēkepakekafā naisni. Ari naiskī ōia a aō rakoitafo sama mania ini. ⁶ Nāskata Pedrori chipo nokotoshini. Nokoax mafa kini mēra ikikaini. Ikikaixō ōia aō rakoitafo mania ini. ⁷ A aō mapoki marakoitafo nā fosoita ariri áfe sama mania ini chaimashta. ⁸ Askaino a Pedro fe kaari kini mēra ikikaini. Ikikaikī ōia ano Jesúsma ini. Nāskaxō chanīmara fani. ⁹ A Jesús otōxiai Niospa meka yoikī kirika keneyonifo tsōa tāpiyonima.

¹⁰ Nāskata mā ōita āto pexe ano fenifo.

Jesús María Magdalenaki nokoni

(Mr. 16.9-11)

¹¹ Mā foaifono María kanima. Mafa kini kachiori niax María oiani. Oiayanā nāatori kini tēkepakekafā naiski ōini. ¹² Niospa áfe ājiri rafe rapatī oxokōi safekanax tsaofa ini Jesús

rakaita ano. Nā fosoita ariri fetsa tsaao, fetsari āfe tae ikita ariri tsaao ini. ¹³Nāskaxō Niospa āfe ājiri rafeta yoini: “¿Afeskai mī oiaimē?” faifono, “Ēfe Ifāfe āfe yora mā fakira oneafo ē tāpiama,” ato fani.

¹⁴Nāskata María texkeakekafā ōia Jesús a kachiori niano tāpinima. ¹⁵Jesús María yōkani: “Kēromā, ¿afeskai mī oiaimē? ¿Mī tosa fenaimē?” faito, María shināni: “Nā fanafo kexemisra,” fani. Nāskaxō María yōkani: “Mī ēfe Ifāfe āfe yora fanī mī faamē ea yoife, ē afianā nono maifanō,” faito, ¹⁶Jesús: “María,” faito, foisnifōfā María ōia nā Jesús āfe fesokōi ini. Nāskaxō María judeo mekapa: “Rabonī,” fani. Rabonī fakī, “Noko tāpimamisto,” fani. ¹⁷Askafaino, “Ea ramāyamafe. Ēfe Epa ari ē kaamaki. Akka ea ramākima efe yorafo ea ato yoixotāfe, mā ēfe Epa Nios ari ē kaikai. Nā ēfe Epari mātō Epaki. Nā ēfe Niosri mātō Nioski, ato fatāfe,” fani. ¹⁸Askafaino María kaxō aōxō tāpimisfoki nokoxō ato yoini: “Mē nōko Ifo ē ōiaki,” ato fani. Nā āfe Ifāfe yoia keskara ato yoini.

Jesús aōxō tāpimisfoki nokoni

(Mt. 28.16-20; Mr. 16.14-18; Lc. 24.36-49)

¹⁹Nāskata nomīkonō mā xini kaino a aōxō tāpimisfāfe judeofoki mesekakī āto pexe fepoti feponifo ichanākakī. Mā ichanāifono āto nēxpakīa Jesús nirisatani. Ato yoini: “Mātō ōiti fepeakax inimasharakāfe,” ato fani. ²⁰Ato askafata a mifiki rāfomā mastaitafo āfe tsefe ato ispani. A āfe pishiki āshi chachitafori ato ispani. Ato ispaifo ōikani āto Ifoki fāsi inimakōinifo.

²¹Afianā Jesús ato yoini: “Mātō ōiti fepeakax inimasharakāfe. Nā ēfe Ēpa ea nīchini keskafakīri iskaratīa ē matori nīchikai,” ato fani. ²²Nāskaxō ato yoini: “Na ēfe Epa āfe Yōshi Shara fikāfe,” ixō atoki axfainākafa ato xoō ani. ²³“Fatora fetsa mā āto chaka soaxonaino Niospari āto chaka soaxoxii. Mā ato chaka soaxoyamaino atoō chaka nepakenaka,” ixō Jesús ato yoiax nāskax ato makinoax kani.

²⁴Ato Jesús yoianokai Tomás ato fe ano inima. Nā Tomásri Jesúsxō tāpimis ini. Āfe ane fetsa “Rafe Kāini” fapaonifo. ²⁵Tomás atoki oaino yoinifo: “Mā nōko Ifo nokoki oaito nō ōia,” faifāfe Tomás ato yoini: “Ē āfe mifi natakino a rāfo tsefefe ē meikerana a āfe pishi tseferi ē meikerana nāskaxō ē chanīmara fakerana. Akka ē āfe tsefefe ramākayamaxō a mā Jesús ōia ē chanīmara faima,” ato Tomás fani.

Jesús aōxō tāpimisfoki anā nokorisatani

²⁶Nāskata ocho nia oxata Jesús aōxō tāpimisfo anā kene mēranoax ichanāfono Tomásri nāno ato fe ini. Pexe fepoti fepokōiafono Jesús atoki nokorisatani. Anā ato yoini: “Mātō ōiti fepeakax inimasharakāfe,” ato fani. ²⁷Nāskaxō Jesús Tomás yoini: “Ea mī mifi ramāfe ēfe mifi natakī. Ēfe pishi nāmāri ea ramāfe. Anā ea chanīmara fakima, ea chanīmara fafe,” Jesús faito, ²⁸Tomás kemakī: “Mīfi ēfe Ifoki. Mīfi ēfe Nioski,” faito, ²⁹“Ea mīa ōikī mī ea chanīmara fai,” fani. “Akka ea ōiyamafikakī ea chanīmara faifofo Epa Niospa ato shara faxii. Inimakōixikani,” Jesús fani.

Juan kirika keneni tāpinōfo

³⁰Akka afama mīшти tsōa atiroma keskafakī Jesús aōxō tāpimisfo ato ōimamis. Afara fetsafori Jesús aka ē afo mato kenexonama. ³¹Epa Niospa Jesús nīchini nōko Ifo inō. Nāfi Niospa Fakekī. Ē mato Jesúsnoa kenexoni mā chanīmara fanō. Chanīmara faax mā aōnoax Nios fe nīpaxanō.

21

Īamāfā kesemē Jesús aōxō tāpimisfoki nokoni

¹Nāskano Jesús anā aōxō tāpimisfoki atoki nokoni. Īamāfā Tiberias kesemē nāno atoki nokoni. Ē mato yoinō afeskax Jesús onimāki.

²Pedro fe Tomás (nā Tomás “Rafe Naneni” fapaonifo), Natanael Caná anoa ini Galilea mai anoa, Zebedeo fake raferi ini, Jesús fe rafemis raferi ato fe ichanānifo. ³Nāskaxō Pedro ato yoini: “Ē rinipa fii kaikai,” Pedro ato faino, “Nōri mefe kai,” fanifo. Nāskax fonifo kanōanāfānē nanefainifo. Fōkata rini potenifo nā rini fakishchāi potefikaxokai tsōa foe finifoma.

⁴Mā penaino Jesús Īamāfā kesemē atoki nokorisatani. Īamāfā kesemēxō aōxō tāpimisfāfe tsōa Jesús tāpinifoma. ⁵“¿Ēfe fakefāfe, mā foe fiamamē?” ato faino, “Nō fiama,” fanifo. ⁶Askafainono ato yoini: “Mātō pōya kayakai aōri mātō rini potekāfe. Askafaxō mā fitiroki,” ato faino nikakakī nā ato yoiai keskafanifo āto rini potekakī āto pōya kayakai aōri. Nāskaxō meafō mā foe kayakōi fia menifo. Ato kanōanāfā mēra nanepaikakī ranānifo. ⁷Nā Jesúsxō tāpimis fētsa nā Jesús āfe yamakōi ipaonito Pedro yoini iskafakī: “¡Nāfi nōko Ifoki!” fani. Askafaito nikai Pedro koshikōi āfe rapati safeni nāskax kanōanāfā makinoax Īamāfānaki

pahekaini áfe Ifoki nokorisapai. ⁸ Náskaito òikani atiri kanòanáfānē acho fonifo. Āto rini foe fospikòiano ninifonifo ĩamáfā kesemē chaimashta nokoxikakī.

⁹ Mā ĩamáfā kesemē nokokaxò òiafo chii mánā mánā ikaito òinifo. Foe yafi pāa xoimeia chii ketokonò raka òinifo. ¹⁰ Askata Jesús ato yoini: “A mā rama foe fia niri fekáfe,” ato fani.

¹¹ Akka Pedro kanòanáfāòoxò rini ninifoni ĩamáfā kesemē rataxiki. Mā rini fixò òia foe rini mēra fospikòia òini. Ciento cincuenta y tres ini. Akka fōe rini faxtenima. ¹² Askaifono Jesús ato yoini: “Piyoi fekáfe,” ato fani. Akka tsòa yòkanima: “¿Mī tsoamē?” tsòa fanima māmāi tāpikaxò āto Ifomāiyakē. ¹³ Nāskaxò Jesús ato pimakī ato pāa yafi foe ato ināni.

¹⁴ Mā reteafono otoitaxakī aòxò tāpimisfoki nokoni. Tres ves ini atoki oi.

Jesús Pedro yoini

¹⁵ Mā pixò Jesús Simón Pedro yoini: “Simón mīfi Juan fakeki. ¿Na fetsa finòmainifofā mī ea noimē?” faito, “Èje Ifo. Mā mī tāpiaki ē mia noiaito,” Pedro faito, Jesús yoini: “A ea noisharaxò a ea rama Ifofaifori ato kexesharafe ea Ifosharafanòfo. A oveja kexemisto áfe oveja fake kexemis keskafafe ato kexekī,” fani.

¹⁶ Anā Jesús Pedro yòkani: “Simón, mīfi Juan fakeki. ¿Chanĩmamē mī ea noimē?” faito, “Èje, Ifo. Mā mī tāpia ē mia noiaito” Pedro faito, anā Jesús yoini: “A ea noisharaxò ea Ifofamisfo ato kexesharafe ea Ifosharafanòfo. A oveja kexemisto áfe oveja kexemis keskafafe ato kexekī,” fani.

¹⁷ Nāskaxò anā Jesús yòkani: “Simón, mīfi Juan fakeki. ¿Ea mīa noikòimē?” ixò Jesús yòkari faino Pedro anā tooxinima. Nāskaxò anā Pedro kemani: “Ifo, mīfi afama mīshti tāpiaki. Mā mī tāpia ē mia noiaito,” fani. Askafaino anā Jesús yoini: “A ea Ifofamisfo ato kexesharafe ea Ifofasharanòfo. ¹⁸ È mia yoikòinò. Mī naetapakī nā mī apaiyai keskara mī fapaoni. Askatari nā mī kapaiyai ari mī kapaoni. Akka mā mī anifoax mī takairafe mēshax kaxii mia iyoaifono a mī kapaiyamai ari mia iyoxikani,” Jesús fani. ¹⁹ Askafakī Jesús Pedro tāpimani afeskax naximākai. Pedro Jesúsnoax naxiaino yorafāfe mā tāpikaxò, “Nios finakòia,” faxikani. Nāskano Jesús Pedro yoini: “Ea Ifosharafafe,” fani.

²⁰ Askafaino Pedro texkeakekafā Juan fichini acho oaino. (Nā Juanri Jesúsxò tāpimis ini, Juan Jesús noikòia ini. Jesús reteyoafomano aòxò tāpimisfo feta fakishi piyoni. Akka Juan afe ketaxamei tsoaxò Jesús yòkani iskafakī: “¿Ifo, tsòakai mia ato achimaximē?” fani Jesús reteyoafomano afeta pikī.) ²¹ Nāskaxò Pedro nā Juan fichixò Jesús yòkani: “¿Ifo, afeskax na Juan naximē?” fani.

²² Askafaino Jesús kemani: “A ē nimapaikī ē nimaino niyoxii nā ē anā oaitīa. Akka mīkai aònoa shināchakatiroma. Askatamaroko ea Ifofatitaifafe. Eònoa fisti shināfafāife,” fani.

²³ Nāskax Jesúsxò tāpimisfo āa ranā yoinānifo: “Juankai nanakama,” fanifo. Askafafiaifono Jesúska Pedro anori yoinima. Akka iskafakī yoini: “A ē nimapaikī ē nimaino niyoxii nā ē anā oaitīa. Akka mīkai Juanònoa mī shināchakatiroma,” fani. Nānori fisti Jesús Pedro yoini.

²⁴ Èkīa Juan ē kirika kenexò ē mato yoi. Èri Jesúsxò tāpimis. Ea Jesús noikòia. Jesús afarafo faito ē òimis. Nāfo ē mato kenexoni. Jesús afarafo akaito mē òimis. Nāskakē mā èfe meka chanimara fatiro. È mato yoiaito mā Jesús chanimara fatiro. ²⁵ Jesús afama mīshti fani afo yoiakī nò kirika kenekī mitotiroma. Èkīa Juan ē mato kirika kenexoni. Nā tii.

Jesúsxõ Tãpimisfãfe Aponifo Keskara

“Niospa ãfe Yõshi Shara matoki nãchixii kiki,” ixõ Jesús yoini aõxõ tãpimisfo

¹ Teófilo, ã mia anã kirika kenexoni mia yoikĩ. Èfi Lucaski, mia kirika fomai. A Jesús nai mẽra kayoxoma afama mĩshtifo fayanaã ato tãpimapaoni keskara yoikĩ ã mia kirika kenexõ fomayoni, mĩ tãpinõ. ²⁻³ Mã Jesús retefiafono oxa rafeta anã otoni. Mã otoxõ aõxõ tãpimisfo ato ifixõ ato tãpimani Niospa Yõshi Sharapa shinãmanaino akairi fetsafo tãpimanõfo. A metasitafo ato ispaketsani a aõxõ tãpimisfo. “Nafo ea metasitafofõkĩ õikapõ,” ato fani õikakĩ tãpisharanõfo. Mã anã nia afia ipaoni keskara ixõ tãpinõfo ato yoisharani nai mẽra kayoxoma. Cuarenta nia oxata ato tãpimasharani chipo katãxiki ato yoipakeyoni a Nios xanĩfoõnoa ato yoisharapakeni. Nãskax Apa Nios ari kani nai mẽra.

⁴ Nai mẽra kayoxoma anã pena fetsa aõxõ tãpimisfo yoisharani iskafakĩ: “Nonoax fakifoyoyamakãfe. È mato yoisharayanõ, mã nikasharanõ. Èfe Epa ãfe Yõshi Shara matoki nãchixii kiki a ã mato yoimis keskafakĩ. Mã mã nikafafainakĩ ã mato yoiaito. Nãskakẽ na Jerusalén anoxõ manayokãfe, ãfe Epa ãfe Yõshi Shara mato mẽra naneyonõ. ⁵ Juan mato maotisafakĩ faka mẽra ikimapakeni Niospa mãto chaka mato soaxonano mã ato õimanõ. Nãskafakĩri samama fatora penata Niospa ãfe Yõshi Shara mato mẽra naneaino mã shinã sharaya ixii.”

Jesús nai mẽra kani

⁶ Anã ano fisti Jesús fe ichanãkaxõ yorafãfe yõkanifo iskafakakĩ: “¿Ifo, iskaratãia nõko kaifo israelifãfe ãto xanĩfo mĩ ikimẽ? ¿Anã nafa nõko xanĩfo ixiiimamẽ?” fanifo yõkakakĩ.

⁷ Askafaiãfãfe Jesús anã ato yoini iskafakĩ: “Tsõa tãpia. Epa Nios fistichi tãpia. Afetiãra inõpõkõ mã tãpitiro. ⁸ Mã tãpiyamafitirono Niospa ãfe Yõshi Shara mato mẽra naneano aõxõ mã afama mĩshti tãpitiro. Nãskakẽ mã eõnoa ato yoitiro mẽstekõi. Taefakĩ na Jerusalén anoafõ yoita, mã Judea anoafõ yoita, mã Samãria anoafõ yoita, keyokõi mã maitio anoafõ eõnoa mã ato yoitiro,” ixõ Jesús aõxõ tãpimisfo yoini.

⁹ Nãskata mã ato yoita Apa Niospa ifiaino nai mẽra kani. Aõxõ tãpimisfãfe õiaifono fininãkafã kani. Mẽstekõi mãpeinifõfani nai kõi mẽra ikikainaito aõxõ tãpimisfãfe anã õinifoma mã kaano. ¹⁰ Nai mẽra foisafono feronãfake rafe ato ketaxamei nãtanifo rapati oxo shara safekanax ato yoinifo iskafakĩ: ¹¹ “¿Na Galilea anoafãfe, afeskakĩ mã nai mẽra foisimẽ? Mã Jesús nai mẽra kaa. Afetiãra anã matoki oxii. Fatora penata afia mã kaito õia keskara oxii kiki,” ixõ feronãfake rafeta ato yoini.

Jerusalén anoax aõxõ tãpimisfo ichanãnifo

¹² A mãchifanẽ ãfe ane Olivos anoax Jesús ronoinãkafã nai mẽra kaito õikata anã anoris fenifo Jerusalén ano chaima. Un kilometro Olivos fe Jerusalén nã tiixõ rafe ini. ¹³⁻¹⁴ Jerusalén ano nokokata pexe mẽra ikifaikata fomãkia mãpeinifõfãkata a ikafo ano ikifainifo. Ano ikifaikanax ano fistiãx ichanãnifo. Pedro ikaino, Jacobo ikaino (nã Jacobo ãfe ane fetsa Santiago ipaoni), Juan ikaino, Andrés ikaino, Felipe ikaino, Tomás ikaino, Bartolomé ikaino, Mateo ikaino, Jacobo Alfeo fake ikaino, Simón Celote ikaino, Judas Santiago fake ikaino, Jesús onefetsafo ikaifono, Jesús ãfe afa Maria ikaino, a kẽro fetsafori ikaifono ano fisti ichanãnifo Nios Kĩfikani. Nãnoxõ pena tii Nios Kĩfifãinifo.

¹⁵ Askata pena fetsa yora rasi ciento veinte ichanãnifo. Askaifono Pedro niinãkafã ato yoini ¹⁶ iskafakĩ: “Efe yorafãfe, ea nikakõisharakãfe ã mato yoinõ. Na Judaspafi yorafo iyoita Jesús achifonõfo. ‘Fato Jesús mãkĩ noko yoife,’ faifãfe, ‘Nakia,’ ato faito õikakĩ achitafo. Afia Niospa shinãmanaino nõko xini David yoikĩ kirika kenepaoni keskafakĩ Judaspa ato yoita. ¹⁷ Na Judas nofe rafemis noko akai keskari fakĩ Jesús ifini. Nãskakẽ nofeta yonoxofikatsaxakĩ mã chakafakĩ yorafo ato achimanita,” ixõ Pedro ato yoini.

¹⁸ (Ato askafaito kori inãitafo ãa anofi chakamenõ. Kori inãiafono anã anoris xanĩfofo inãita. Nã kõi xanĩfofõfãfe mai fiitafo. Askata Judas ãa tenexemeta ifiki nexeax ronoinãkafãita. Ronoax ariax xetaori pakei mã nafaraxikax ãfe poko napakemeita. ¹⁹ Askaito nikaitafo Jerusalén anoxõ. Anoax ãfe imi fokẽ nã mai aneitafo “Acéldama” ixõ aneitafo. Nõko mekapa nõ yoitiro iskafakĩ: “Imi Mai” fakĩ.) ²⁰ Askata anã Pedro ato yoini iskafakĩ: “Nõko xini David a inõpõkõai yoikĩ kirika Salmos ano keneni a Judasnoa yoikĩ iskafakĩ:

A yõra ãfe mai ano tsoa inõma,
yoikĩ keneni. Nãskata anã yoini iskafakĩ:

Feronãfake fetsa a yonomis ano ikiakẽkafanõ,
ixõ anori yoikĩ noko kenexoni.

²¹ “Nāskakē iskaratīa a feronāfake fetsa nō ifinō, a nofe Judas ipaoni keskara inō. Fatora fetsa nō ifinō, a Jesūs fe taefenai kafāsapaoni keskara nofe inō. ²² Nā nofe ixō ōini Juan Jesūs maotisafakī faka mēra ikimanaino, nāskakē mēxotaima nofe imis, akka mā Jesūs nai mēra kaito nofeta ōitakī, nāskakē nō ifinō nofeta ato yoyimis inō. Nofe rafexō Jesūsnoa iskafakī yoinō: ‘Mā Jesūs nayofias mā anā ofotaa,’ ixō ato yoinō,” Pedro ato fani.

²³ Ato askafaino José Barsabás fe Matías nāno inifo. Nā rafe ato ifipaiķī, “¿Fato nō ifimē?” ixō shinānifo. Nā José Barsabás āfe ane fetsa Justo. ²⁴ Askata a rafe ifipaifakī fisti ifinifo. Nāskakē Nios ķifinifo iskafakakī: “Epa Niospa, ¿fato nō ifimē? Epa, mī nōko Ifoki. Keyokōi nōko ōiti mēra mī tāpikōiaki. Nāskakē noko tāpimafe fato mī ifiamāki nofeta mīōnoa yoyimis inō. ²⁵ Judaspa Jesūs ato achimaita. Nāskakē Judas naax omiskōipakenaka. Nāskakē Judaspa anā mīōxō yonotiroma nofeta. Noko tāpimafe fato a Judas ipaoni keskara itiromākī mīōxō ato yoyimis inō,” ixō Nios ķifinifo.

²⁶ Nāskakata āto ane rafe tokiriki kenexō kesho mēra nanexō napakefōfānaifono fisti pakeaito ōikakī nā ifinifo. Matías āfe ane ini. Nāskakē Matías ifiafono nā feronāfake oncefo feta Jesūsnoa yoyimis ini.

2

Niospa Yōshi Shara ato ōiti mēra naneni

¹ Askata judeofāfe āto fista Pentecostēs ikaino a Jesūs Ifofaafō pexe fisti mēra ichanānifo. ² Anoxō nikafo nai mēranoax oa nēfēfā oi itikikerani pexe mēraxō nikafo. ³ Nāskata ōiafo oa chii keskara fotopakekafāni. Oa nōko ana keskarafīax oa chii rekēfo keskara maratamefāinafo ini. ⁴ Askaifono Niospa Yōshi Shara ato mēra nanetani. Askaino anā a meka fistichi tsoa mekanima. Meka fetsafāfe fisti rasi mekanifo Niospa Yōshi Sharapa ato meka fetsafamano.

⁵ Nāskaifono judeofāferi Nios Ifofapaikani Jerusalén ano ipaonifo, chai inoax fekanax. Nā Jerusalén ano inifo mai fetsa fetsatapafo anoax fekanax. ⁶ Anoxō nikafo oa nēfēfā oai keskara nikanifo. Askaito nikaferakani a Jesūs Ifofaafō ichanāfo ano ikitoshinifo. Tāpipaikani afaa afeskaimōai ikanax. Nāskata nikafo a chai inoax feafāfe āto mekapa mekaifāfe nikanifo, fisti rasi āto mekapa mekaifono. “¿Afeskaxō nōko meka tāpiafomē? Nikakapo,” ato fakī fetsanifo. Askakanax ratei fetsenifo. ⁷⁻⁸ Rateyanā yoinānifo. Iskanifo: “Na Galilea anoafāfe nōko meka nikayamafikatsaxakakī nōko meka tāpiafo nō nikai. ¿Afeskaxō tāpiafomē mai fetsanoax nō ofiafiano? ⁹ Akka nō Partia anoax oni. Fetsafori Media anoax fenifo. Fetsafori Elam anoax fenifo. Fetsafori Mesopotamia anoax fenifo. Fetsafori Judea anoax fenifo. Fetsafori Capadocia anoax fenifo. Fetsafori Ponto anoax fenifo. Fetsafori Asia anoax fenifo. ¹⁰ Askatari fetsafori Frigia anoax fenifo. Fetsafori Panflia anoax fenifo. Fetsafori Egipto anoax fenifo. Fetsafori nā Africa fe, Cirene chaima nikakanāfo anoax fenifo. Akka fetsafori judeofo Roma anoax fenifo; ¹¹ nāfo judeokōifo ini. Akka a Roma anoax feafori judeokōifoma inifo. Nāskafīkaxō mā Nios Ifofakani judeofo keskara inifo. Askatari fetsafori Creta anoaxri fenifo. Askatari fetsafori Arabia anoaxri fenifo. Nōfi mai fetsa fetsatapafo anoax nō onikī,” ikanax yoinānifo. “Nāskax nō ichanāiyoi oa chai inoax, akka nōko mekapa mekaifāfe nō nikai. Nāskaito nikai nō ratei,” ikanax yoinānifo. “Na Galilea anoafō nōko mekakōichi xafakīakōi yoikani iskakani: ‘Niospa afama mīshti tāpikōia,’ ixō noko yoikani nōko mekapa. ¹² Afeskaxō na yorafāfe nōko meka nikayamafikatsaxakakī noko yoiaifāfe nō ato nikasharakōi,” ikanax rateyanā yoinānifo: “¿Afeskai iskafomē?” ikanax.

¹³ Askaifāfe ōikakī a yora fetsafāfe ato iskafanifo: “¿Afeskai na yorafa pāekanax nōko mekapa mekakanimē?” ixō yorafāfe ato kaxemetsama fanifo ato ōsakakī.

Pedro Niospa meka ato yoini

¹⁴ Askaifono Pedro niinākfā Jesūsxō tāpimisfo oncefo feta fāsikōi mekainākfā ato yoini: “Ēfe kaifo judeofōfāfe na Jerusalén ano ikafo feta, ea nikasharakāfe. ¹⁵ ¿Afeskakī pāekanax nōko mekapa mekakanira, mā noko faimē? Nafō pāekanima. Penamakai tsoa pāeima mā rama xini keyaino. ¹⁶ Nā mā nikai anori Niospa meka yoyimisto Joel kirika keneni Niospa Yōshi Sharapa shināmanaino. Nā iskanōpokoai yoikī kirika keneni iskafakī:

¹⁷ A ea Ifofaifo nā maniafo tii anoā ēfe Yōshi Shara āto ōiti mēra ē nanexii. Nāfo askayoi mā chaima nōko mai keyoaino. Afia penatari māto fenafāfe ēfe meka yoixikani. Naetapafāfe ōiafo oa namakē ōia keskara ōixikani. Anifo tiitori eōnoa namaxikani. ¹⁸ Askata a ea yonoxomisfori feronāfakefoya ķerofoya ēfe Yōshi Shara ē ato mēra naneī fatora penata ēfe Yōshi Sharaōxō eōnoa ato yoinōfo. ¹⁹ Afama mīshti tsōa ōimisma afo ē ato ispaxii nai arixō, nāmāxori ē ato afama mīshti ispaxii. Imi yafi chii āfe kōimāfāri ōixikani ē ato ōimanaino. ²⁰ Askatari xinī anā chaxaxīma, fakishkōi ixii. Oxeri oa imi keskarakōi ōshikōi ixii. Askata nāfo askai fetseyoi mā chaima māto Ifo oaino. Askata mā

māto Ifo nokokōiaino keyokōichi xafakīa ōixikani. ²¹ Mā askai fetseaino akka nōko Ifo yoikī fatorafāfe iskafāifāfe: 'Ifo Cristo, ea shināfe, ē mefe ipaxanō,' faifāfe ato ifixii, ixō Joel kirika keneni Niospa anori yoiaino," ixō Pedro ato yoini.

²² Askatari Pedro anā ato yoini iskafakī: "Israelifāfe,* ea nikakāfe. Mā mā tāpia Jesús Nazarete anoa Niospa nai mēraxō nāmā nīchini, nāmāxō mato afama mishti ōimanō afara sharafo fakī. Mato askafaino mā tāpinō Niospa Jesús nīchinikē. ²³ Nāskafikē māfi Jesús achixō yora chakafo ināyameaki achixō cruzkī mastanōfo. Akka retoyofomano Niospa mā tāpixō Jesús nāmā nīchini: 'Ēfe Fāke mato nāxoxii,' ixō Niospa yoini mā tāpixō. Nāskakōikī mātoōxō yora chakafāfe retyameafo Niospa yoini keskafakī. ²⁴ Mā retēfitafono Niospa anā Jesús otofani. Anākai omiskōinakama. Anākai nanakama. Anākai natiroma. ²⁵ Askatari a xanīfo David afianori yoikī kirika mēra keneni Cristoōnoa āfe meka iskafakī:

Mē tāpia ēfe Ifo Nios efe itiani. Efe ixō efeta aki kiki. Nāskaxō ea kexei tsōa ea fekaxtefanōma. ²⁶ Nāskakē ēfe ōiti mēra ē fāsi inimakōi Niospa ea kexesharaino. Nāskakē ē yoikī: 'Nios fāsi sharakōi,' ē fafāfāfāini. Ē Nios chanīmara fakōini afe ipaxakī ēfe yora ea fena faxōano. ²⁷ Ea potayamaino ēfe fero mēsho omiskōipakenakama. Ēfe yora mai mēra nētima. Epa Niosi, mī ea noi. Ēfi mī fakekōikī, ēfe yora mī pisi famaima. ²⁸ Ē nafiakē mī ea nimapakenaka. Ē mia ari kai, mefe ikax ē inimakōixii, ixō David yoini Cristoōnoa yoikī.

²⁹ "Efe yora mīshtichi, ea nikakāfe. Nōko xini David āa yoikī kenenima. Jesúsnoa yoikī keneni. Afetīama nō David nani. Mā nō tāpia a maia ano. ³⁰ A nā askanōpokoai yoikī keneni. Niospa David yoini iskafakī: 'Ē mia yoi na chipo kāiyai mī fena ēfe Fakekōi ixii. Mia keskara xanīfokōiri ixii. Ēfi Nioskī. Ē mato pāraima,' ixō Niospa yoini. Niospa yoiāito nikakī David chanīmara fani, tāpini Niospa pārayamaino. ³¹ Nāskakē David tāpixō a inōpokoai Cristoōnoa yoini iskafakī:

Nafīax otōxii. Nāskax āfe fero mēsho omiskōipakenakama, āfe yorari pisinakama, ixō David keneni. ³² Nā David yoini keskakōifakī Epa Niospa mā Jesús otoakē nō ōita keyokōichi. ³³ Mā otoax mā nai mēra kaa Apa Nios ano. Iskaratīa xanīfo finakōia Apa fe. Nāskaxō Epa Niospa yoikī taefani iskafakī: 'Ēfe Yōshi Shara ē atoki nīchixikai nāmā,' ixō Niospa yoini. Nāskakē Niospa āfe Yōshi Shara nai mēraxō nāmā nīchia. Oa nēfēfā keskara Niospa āfe Yōshi Shara nokoki nīchia. Nāskakē nō māto meka nikayamafikatsaxakī nō meka fetsafāfe nō mekai fetsea. Mā chai inoax oxō mā noko nika, nō māto mekapa mekai fetseaito. ³⁴⁻³⁵ Nāskakē māri tāpikāfe, nānori David kirika kenenikī Jesúsnoa yoikī. Āa yoinima. David otoax nai mēra kanima. Nāskaxō kirika kenepakekī yoini iskafakī nōko Ifo Cristoōnoa:

Nono efe ife, efe xanīfokōi ixiki. A mia noikaspaifo ē ato mī nāmā nīchinō, ixō yoini Niospa. Nānori tāpixō David yoikī kirika keneni," ixō Pedro yoini.

³⁶ Askata Pedro anā ato yoini: "Ēri mato anori yoikai, israelifāfe, ē mato pāraima. Mā Jesús retēkī mā mastayamea. Akka Niospa yoini Jesucristo nōko Ifokōi inō," ixō Pedro ato yoini.

³⁷ Ato askafaito nikakakī shinānifo: "¿Afeskakī Jesús askafayameafomē?" ixō shināki ato ōitini shināketsanifo, Jesús shinākakī. Askata Pedro yafi a Jesúsnoa yoisim fetsafori yōkanifo: "No fe yorafāfe, nō mato nikai. ¿Nō anā afeskatiromē?" ixō ato yōkanifo.

³⁸ Askafāifāfe nikakī Pedro ato yoini: "Iskaratīa māto chaka soakāfe anā anori shinākakīma. Jesús aneōxō mato maotisafanōfo, faka mēra ikimapakekī. Mato maotisafafonō yorafāfe mato ōinōfo mā Jesucristo Ifofaito. Nāskaxō āfe Yōshi Shara mato mēra nīchi kiki mato fe rafekōinō. ³⁹ Jesús yoini iskafakī: 'Fatora fetsa nōko Ifo Niospa ifixii āfe Yōshi Shara ato mēra nanexii. Māto fakefori, māto fenafori a chai ikafo tiiri nō fake refonoafori Niospa āfe Yōshi Shara ato mēra nanexii Niospa ato ifiano,' ixō noko Jesús yoini."

⁴⁰ Ato askafakī yoita anā Pedro ato yoini ato iskafakī yoiyanā: "Māto chaka soakāfe. Na yora nono nāmā ikafo ichapa chakakōifo chaka shināmisfo. Askakakīma māa kexemesharakōikāfe anā askayamaxikakī. Mā askaito Jesús mato chaka soaxonō mato ifixiki mā afe ipaxanō," ixō Pedro ato yoini.

⁴¹ Ato askafaito nikakakī yora rasichi chanīmara faifāfe, ato maotisafapanifo, ato faka mēra ikimapakekakī. A ato maotisafaifo tres mil yorafo ini. Nāskax ato fe rafenifo a Jesús Ifofakakī taefanifo fe. ⁴² Nāskakē keyokōichi ato nikakōinifo a Jesúsnoa yoisimfāfe ato yoiāifono. Nāskax Jesús Ifofaafa fe rafesharakōipaonifo, a rama Jesús chanīmara faifo. Askaxō pāa torekaxō ato pikīpaonifo Jesús shinā kakī, a ato nāxoyamea. Nāskakē Nios kīfitai fapaonifo pena tii ichanāxaxō.

Jesús Ifofamisfo isharakōipaonifo

* 2:22 Israelifo āto ane fetsa judeofo ipaoni.

⁴³ Nāskaxō anoxō a Jesúsnoa yoimisfāfe, nā docefāfe, afama mīstifō apaoñifo, yonai-
fono ato sharafata, afara fetsafōri apaoñifo, nāskaxō afama mīшти faifāfe ato tāpinōfo.
Nāskafāifāfe ōikani keyokōi anoax yorāfo ratenifo. ⁴⁴ Jesús chanīmara fakani pena tii
ichanāñifo. Anoax āto afama mīшти paxkanāi fetsexikakī. ⁴⁵ Āto afarāfo ato minikaxō
korī fixō, a afaamaisfo kori ināñifo tsoa afayakēma. ⁴⁶ Nāskata pena tii Nios kīfīti pex-
efā mēranoax ichanāxō Nios kīñifino. Nāskaxō āto pexe mēraxō a Jesús ato nāyoxamea
shinākakī pāa torepaxexō pinifo inimakōiyānā. ⁴⁷ “Aicho, Nios fāsi sharakī,” ikanax inimai
finakōinifo. Askāifāfe ōikani a Jerusalén ano ikafāfe ato yoinifo iskakakī: “Na Jesús Ifofāfo
isharakōiafo,” ixō ato yoinifo. Nāskakē pena tii a yora fetsafāferi Jesús Ifofāfono Niospa ato
chaka soaxoni. Nāskax nā Jesús rama Ifofāifo fe ano fistiāx ichanāñifo, ato fe rafekanax.

3

Pedro feta Juan yora finimisma sharafanifo

¹ Askata a Nios kīfīti pexefā mēra Pedro fe Juan yātapake fonifo. Yātapakes anoxō yorāfāfe
Nios kīfīfokani fopaoñifo. ² Nā Nios kīfīti pexefā kāiti ano feronāfāke finimisma nāskarapa
kāini tsoa ini. Nā mēxotaima iyopaoñifo pexe fepoti ano, nā pexe fepotinī afe ane
“Sharashta” fanifo. Anoxō ikiaifāfe ato kori yōkanō iyopaoñifo. ³ Pedro fe Juan ikifainaifāfe
ōikī a finimismato ato kori yōkani iskakakī: “Ea kori inākāfe,” ato faito, ⁴ Pedro feta Juan
feesnifo. Pedro yoini iskakakī: “Noko feisfe,” fani.

⁵ Askafaito, “Ea kori inākanira,” ixō ato feisni. ⁶ Ato feisaito Pedro yoini: “Ē mia kori
ināima. Ē koriyama. Ē mia kori inākima ē mia sharafatiro. Nikafe, ē mia yoinō. Jesucristo
nā Nazarete ano ipaoni āfe sharaōnoax fininākāfāfe,” fani.

⁷ Askata Pedro mētsoinifōfāni aō pōya mēste aōxori. Nāskax a finimisma fininākafani.
Pedro mētsoinifōfānaino niinākafāni. Askaxō mea mā nisharakōia meeni a finimismato. Āfe
taefoya āfe opoxko mā shara meeni. ⁸ Nāskax inimakōini. Askata mono mono ini. Mono
mono ita Pedro fe Juan ikifainaifono, akairi ato fe ikikaini ichotiri ichotiri ikani inimayānā.
Nios kīfīti pexefā mēra ato fe ikikaini. Askata mekani: “Aicho, Niospa mā ea sharafakī,” ixō
Nios sharafani. ⁹ Askaito yorāfāfe a ichanāfo anoxō ōiketsanifo kafāsaito Nios yoisharayanā.
¹⁰ Askata, “Kee, ōikapo. Mā finia, na pexe kāiti āfe ane ‘Sharashta’ ano tsaotiani, a ato kori
yōkamis. Āfeskax finiamē?” ikanax yoināñifo, rateyanā.

Nios kīfīti pexefā kene fetsa āfe ane Salomón anoxō Pedro ato yoini

¹¹ Pedro fe Juan kaino ato fe kani nā finimisma mā sharax. Nā Nios kīfīti pexefā kene
fetsa mēra ikifainifo. A pexe kene āfe ane “Salomón” ini. Askaito nikakani yorāfāfe ōifokani
ichonifo ano ikiafono. Nāno nokotoshikata ōiafo a finimisma Pedro fe Juan niano ato fe
nia ini ato mētsoax. ¹² Askāifāfe ōikī Pedro ato yoini iskakakī: “Israelifāfe, ae nikakāfe.
Āfeskax nā finimisma sharamē ixō mā shināimē? Āfeskakī mā noko ōimē? Nōkai sharafama.
Akka Jesúsxō nō sharafaa,” Pedro ato fani. ¹³ Askata anā Pedro ato yoini: “Nōko xinifo
Abraham, Jacobo, Isaaca atiiti Nios Ifofapaoñifo. Afia fistichi a yonoxomis Jesús finakōia
imani. Nāskakē afama mīшти fani. Nāskafikēkai mā Jesús Ifofapayameama. Nāskakē
xanifo Pilato Jesús shinākī, ‘Nō reteimakai’ fāfāito, ‘Maa, nō sharafaima, ato retefame,’ ixō
Pilato mā yoyamea, Jesús retenōfo. ¹⁴ Jesús ōiti sharayaxō afaa pishta chakafamisma, akka
mā noikaspayamea. Nāskakē mā Pilato yoiikī: ‘A chaka kāimayamafe,’ mā fayamea. Pilato
Jesús kāimapaifaino a yora chakakōi Barrabás kāimakaspakī. Askafaito mā iskakafamea:
‘Barrabás kāimafe, Jesúsroko ato retefame,’ mā fayamea. ¹⁵ Akka nā Jesús taefakī yora
onifani, iskaratīari noko ikinā, aōnoax nō nia. Nāskafekē mā reteyamea. Mā mā retefiano
Apa Niospa afianā otofayamea. Nāskaito Juan feta nō ōiyamea. Mā anā otoyamea. Iskaratīa
nia. ¹⁶ Nāskakē nā finimisma Jesús chanīmara faax mā fininākafāna. Jesúsnoax mā shara.
Nāskakē keyokōichi mā ōi.

¹⁷ “Nāskakē ē mato yoi, efe yora mīstichi. Akka ēfi mē mato tāpimiskī. Akka mā tāpioxoma
mā Jesús reteyamea, ‘Niospa Fakemara,’ ixō. Askata māto xanifofōfāferi tāpiyameafoma.
Jesús nōko Ifokōi fiano tāpioxoma reteyameafo. ¹⁸ Nāskakē afetīama Niospa yoini a inōpokoai
mā tāpioxō: ‘Ēfe Fake Cristo retexikani,’ ixō Niospa yoini. Nānōri yorāfāfe kirika kenenifo,
Niospa ato shināmanaino. Nāskakē mā reteyameafo a Niosnoa ato yoimisfāfe nānorikōiri
yoinifo. Mā askakōia. Akka Niospa mā tāpiano, mā askakōifayamea. ¹⁹ Nāskakē māto chaka
xatekāfe. Mā afara chakafamiskī anā anōri shināyamakāfe. Nāskakē Epa Nios fisti shinākāfe,
māto chaka mato soaxonō. ²⁰ Nāskaxō nōko Ifāfe māto ōiti mato inimamasharakōinō.
Nāskakē mato ano Cristo Jesús Niospa anā nīchixii, māto Ifokōi mato nīchixoxii. Āfe Fake
Cristo Jesús katonī mato ifimis inō. ²¹ Iskaratīa Apa fe nai mēra iyoa, oyoxoma na
nāmā anoafō keyokōi Niospa fena shara fayoi. Askata chipo nāmā Jesús anā fotoxii.
Nānōri a Niosnoa yoimisfāfe yoiyopaoñifo a inōpokoai yoi kakī, Niospa ato shināmanaino.

22 Moisésri nānori yoikī kirika keneni iskafakī afia Nios fistichi shināmanaino: ‘Nōko Ifo Niospa mato mēra fisti nīchixii mato Nios yoixomis inō, ea ani keskafakī. Nāato mato yoiai anori nikasharakōikāfe. 23 Akka a nikakaspaifo Niospa afe yorafo mēra ato ifixiima. Ato makinoa ato potaxii anā ato fe inōfoma.’ 24 Na iskaratīa nō ōiai yoikī Samuel taefakī yoini a inōpokoai yoikī. Nānori fisti a Niosnoa yoimis fetsafāferi keyokōichi yoinifo Niospa ato shināmanaino. 25 Nāskax mā mato xinifāfe āto fenakōifokī mā. Nāskakē Niospa mato xinifo iskafakī yoini: ‘Māto fenafoōxō ē ato sharafai keyokōi nā maniafo tii,’ ixō Niospa Abraham yoini. 26 Nāskakē Niospa āfe Fake Jesús nokoki nīchini nai mēraxō yonoxomis inō. Taefakī nokoki nīchini nōko chaka nō xatenō anā chaka shināyamaxiki a Ifo sharafaxō. Nāskax nō isharakōinō,” ixō Pedro ato yoini.

4

Pedro yafi Juan xanīfofo ano iyonifo

1-2 Pedro feta Juan Jesúсноa yorafā rasi yoiaifono ōikani atoki fenifo, a ato Nios kīfixomisfo ita, a Nios kīfiti pexefā kexemisfo xanīfofo ita, saduceofo ita nāfo atoki fekanax ōitifishkinifo, Pedro feta Juan mā Jesús nafx anā otoita ato faifono. 3 Nāskakata yātapakē ato achixō karaxa mēra ato ikimanifo. Fakishchāi ishinifo a mēra. 4 Ato ikimayofafomano a yora rasi ato yoiaifono nikakakī ato chanīmara fakōinifo. Afia penata cinco mīl yora rasichi Jesús Ifofanifo.

5 Pedro fe Juan karaxa mēra ikafono, Jerusalén anoax judeofāfe xanīfofo fe a xanīfo fetsafori, askatari a Moisés yoikī kirika keneni keskara ato tāpimamisfori pena fetsa fakishpari ichanānifo. 6 Nānori a ato Nios kīfixomis xanīfo finakōia ini āfe ane Anás. Askatari a xanīfo fetsari āfe ane Caifás ini, Juanri ini, Alejandrōri ini, a ato Nios yoixomisfāfe āto kaifori ato fe inifo, ano fisti ichanākani. 7 Nāskaxō Pedro yafi Juan kenanifo ato yōkaxikakī. Tsōaōxō a finimisma sharafafomākī tāpipai kakī Pedro yafi Juan kenanifo karaxa mēraano. Mā feafono ato nakirafe nīchikaxō ato yōkanifo iskafakakī: “¿Tsōaōxō na finimisma mā sharafaitamē?” ato fanifo.

8 Ato askafaifono Pedro ato yoini iskafakī Niospa Yōshi Sharapa shināmanaino: “Efe xanīfofōfāfe, efe anifofōfāfe, ea nikakapo ē mato yoinō. 9 ¿Tsōaōxō nō yora sharafatiromē mā tāpipaimē? Na mā tāpipaiyai finimisma tsōaōnoax sharamākī mā noko yōkaito ē mato yoinō. Ea nikakāfe. 10 Tāpīxikakī israelifāferi tāpinōfo mēstekōi ē mato yoisharanō. Ea nikakāfe. Na feronāfake keyokōichi ōiaifo Jesús Nazarete anoato mā sharafaita. Nā mā ifi cruz ikakī mastaitato mā Apa otoaitano nāto mā sharafaa,” Pedro ato fani. 11 “Aōnoa yoyokī yōra kirika keneni iskafakī Niospa shināmanaino:

Tokiri pexe famisfāfe, ‘Na tokiri chakara,’ ixō potanifo sharafiano. Nāskakaxō chipo tāpinifo nā tokiri sharafinakōifiano.

Nāskarīfakī nā Jesucristo tokiri keskarafiano mā potamis sharafinakōifiano. Mā mā potafiano Epa Niospa ifini aōnoax mā afe yorafo inō. 12 Anā feto yora fetsakai nāmā ikama noko shara fatiro. Jesús fistichi nōko ōiti noko shara faxoto nō afe nīpaxanō,” ixō Pedro ato yoini.

13 Ato askafaito nikakani a xanīfofo āa ranā yoinānifo: “¿Afeskakī iskara yoinmē kirika kenekī tāpisharayamafixō? Ranotamakōi iskara noko yoi. ‘Na rafe Jesús fe ipaonifo,’” ikanax yoinānifo. 14 Nāskaxō ōiaifono nā finimisma mā finiax ato fetofai kafāsaito ōinifo mā sharax. Nāskakē na rafeta afaa chakafafoma ixō atoōnoa afaa yoitroma inifo nā finimisma mā shara ōikakī. 15 Nāskakaxō Pedro yafi Juan nīchinifo ato makinoax fotanōfo. Pedro fe Juan mā kāifainafono, nā xanīfofo āa ranā yoinānifo iskakani: 16 “¿Na rafe nō afeska faimē? Akka keyokōi Jerusalén anoafāfe mā tāpiafo, na feronāfake rafeta finimisma sharafaito ōitaxakakī. Fato feronāfake fētšana iskara finimisma sharafatiroma. Iskarakai nō fomātiroma. 17 Akka iskaratīa nō ato yoinō anā Jesúсноax mekanōfoma. Nō ato yoinō iskafakī: ‘Mā anā Jesúсноa yoiaito nō nikakī nō mato omiskōimani,’” ikanax āa ranā yoinānifo. 18 Askaxō ato kenanifo pexe emāitino. Ato kenakaxō ato yoinifo: “Anā mā Jesúсноa afaa yoikī.”

19 Ato askafāifāfe nikakī Pedro feta Juan ato kemani iskafakakī: “¿Akka nō tsoa nikaimē? Mato nō nikasharairaka, askayamakī Nios nō nikairaka. Mā shinākāfe feto sharamākī. 20 Nā nō Jesús ōifafaina keskafakī, nā noko Jesús yoiaito nō nikafafaina keskafakī nō yoiapaketiro enetama,” ixō Pedro feta Juan ato yoini.

21 Ato askafaifono ato yoinifo iskafakakī: “Mā anā Jesúсноa yoiaito nikaxō nō mato omiskōimani,” ato fanifo xanīfo tiito. Ato askafakaxō ato nīchinifo yora fetsafāfemāi ato ōiaifono. A xanīfo tiito ato koshapaifikakī ato koshanifoma yorafoki mesekakī. Akka a yorafāfe, “Epa Nios sharakōira,” fanifo Pedro feta Juanmāi Niosxō ato sharafaino. 22 A finimisma nāskara kāini ini mā cuarenta xinia akano Pedro feta Juan sharafanifo Niospa Yōshi Sharaōxō.

Jesús Ifofaafāfe Nios kīfīnifo mitsisipakōi ixikakī

²³ Nāskata a xanīfofofāfe ato nīchiafono Pedro fe Juan fonifo mā ichanāxō a ato fe rafeafo ato yoixikakī, a ato Nios kīfixomis xanīfofo feta anifofofāfe ato yoiafo keskara. ²⁴ Ato askafakī yoiaifono nikakaxō a Jesús Ifofamīsāfe Nios kīfinifo iskafakakī: “Epa Niosi, mī nōko Ifo finakōiaki. Mī keyokōi onifani. Nai yafi mai mī onifani. Fākakāri mī onifani. Nai mēranoari mī onifani. Nāmānoafari mī onifani, fākakā mēranoafari mī onifani, afama mīshtifo.” ²⁵⁻²⁶ Akka nā mia yonoxomis nōko xini David mī Yōshi Sharapa mī shināmāni mīōxō ato yoini iskafakī: *¿Afesakai na yorafo Nioski ōitifishkikanimē? Keyokōichi yorafāfe āa shinākani Nios potapaikakī. Askafikaxō potatirofoma. Āto xanīfo tiitori ano fisti ichanākaxō nōko Ifo Nios noikaspaxikani potapaikakī. Askatari a Niospa noko nichixoxiai Cristori noikaspaxikani. Aa askara shinākakī,*

ixō David kirika keneni mīōxō yoikōiki.

²⁷ “Iskaratīa nāskakōi Herodes fe Poncio Pilato yorafetsafo fe ichanāitafo, israelifori ato fe ikitafo mī Fake Cristo Sharafinakōia ifixō mī nīchifinino chakafakani. ²⁸ Nā mī yoiyoini keskafakī mā nāskakōi faitafo a inōpokoai mī yoini keskafakī. ²⁹ Epa Niosi, noko nikāfe mīōxō noko noimati fakani kiki. Nāskakē noko mesemayamafe nō mia yonoxosharamiskī. Nāskakē atoki mesetama mī meka shara nō ato ranotamakōi yoinō mitsisipakōi noko imafe. ³⁰ Epa Niosi, mī sharaōxō a isinī ikaifo ato sharafafe, afama mīshtifo ato ōimayanā a mia yonoxomis Jesucristo aneōxō,” ixō Epa Nios kīfinifo.

³¹ Mā askafakakī kīfikī xateaifono nā ichanāfo anoax mai naya naya ini. Nāskaino Niospa Yōshi Shara āto mēra naneaino ranotamakōi Niospa meka shara yoinifo.

Nā afarafō keyokōi atonā ini

³² Jesús Ifofaafāfe nānori fistic shinānifo āto ōitinī. Nāskakanax na afarafō nōkonā fistic ixō tsōa shinānima. Askakimaroko keyokōi atonā ini. ³³ A Jesúsnoa yoimīsāfe, “Nōko Ifo Jesús noko nāxofiax mā anā ōtoni,” ixō ato yoinifo Niospa Yōshi Sharapa ato shināmanaino. Nāskakē keyokōi nā chanīmāra faafo Epa Niospa ato shināmasharaino inimakōinifo. ³⁴⁻³⁵ A Jesús Ifofaafāfe atirito āto tarefoya āto pexefo ato minikaxō kori fikaxō nā Jesúsnoa yoimīsfo ato inānifo afāferi a afaamaisfo ato inānōfo tsōa afaa yopayamanō. ³⁶ Akka José Levī āfe fena ini. Chīpre anoax fakea ini. Nāskakē a Jesúsnoa yoimīsāfe āa anenifo iskafakakī: “Yora Inimamamis” fanifo. Akka āfe ane kaiyakōi Bernabé ini. ³⁷ Nā feronāfake tareya ini. Nāato āfe tare ato minixō kori fixō a Jesúsnoa ato yoimīsfo ināni a afaamaisfo ato inānōfo.

5

Āfe āfi feta Ananías ato feparapaini

¹ Akka feronāfake fetsa āfe ane Ananías ini. Āfe āfinī ane Safira ini. Nāato āfe tare ato minini kori fixii. ² Nā feronāfake āfe āfi feta shinākaxō ranāri kori finifo. Ranāri a Jesúsnoa ato yoimīsfo inānifo keyokōi mā noko ināfo ixō shinānōfo.

³ Nāskaito Pedro yoini iskafakī: “Ananías, *¿afeskai mī mēra Satanás naneamē mī Niospa Yōshi Shara feparapainō ranāri mā mī kori fifiaxō mī tareōxō?* ⁴ Akka, *¿taeyoi mī tare iyoamamē? Akka mā mī ato minia, akka, ¿na kori mīnāmamē? Nāskakē nā mī apaiyai keskafatiro. Akka atiri mekepāikī mī noko yoia shara ikerana. Askatamaroko mī noko fomāpai. Mīkai noko pārāima, akka Nios mī pārāpai,” ixō Pedro yoini.*

⁵ Askafāifāfe nikai Ananías koshikōi nanī. Askaito nikakani yorafā rasi ratei fetsenifo. ⁶ Nāskakē naetapafo fēkaxō Ananías rakonifo mā nakē. Nāskafakāta maifaifokakī iyonifo.

⁷ Mā askai samarakano āfe āfiri ikitoshini, afaa tāpiamax. ⁸ Nokotoshiaito Pedro yōkani iskafakī: “Ea yoipo mā tare minixō afe tii mā kori fiamāki,” ixō Pedro yōkani. Kemani a kēroma iskafakī: “Nā noko inā tii nō mato inā,” faito, ⁹ Pedro yoikī iskafani: “*¿Afeskakī mī fene feta mā shināxō nōko Ifāfe āfe Yōshi Shara mā feparapaimē? Mā mī fene nakē maifatakani a peke kachiori fekanı. Ōipo, iskaratīari mia iyoi fokani,” ixō Pedro yoini.*

¹⁰ Askafaito nikai Safira koshikōi nātani. Pedro nia nāmā pakeni. Naetapa tiito mā fene maifatakani ikiferakakī ōiafo mā āfe āfiri naa fichitoshinifo. Ari iffainifo maifaifokakī, fene ketaxamei. ¹¹ Askaito nikakani a Jesús Ifofamīsfo ratenifo. Yora fetsafori askanifo nikakani akairi ratei fetsenifo.

Iskarafokai tsōa ōiyomisma inifo

¹² Tsōa atiroma keskafakī nā Jesúsnoa yoimīsfoōxō afama mīshtifo fanifo yorafāfe ōinōfo. Nāskakanax keyokōi ichanānifo peke kene āfe ane Salomōn anoax. ¹³ Atiri a Nios Ifofaafoma a Nios Ifofaafō fe ato fe rafenifoma. Akka ato askafāifaifono yorafāfe, “Na Nios Ifofaafō isharakōiafo,” ato fanifo. ¹⁴ Ato askaifaifono yorafāfe nōko Ifo nikakōinifo, feronāfakefo feta kērofāfe. Nāskax ichapakōi inifo. ¹⁵ Nāskakata a isinī ikaifo xafakāia ato kāimanifo āto rakatiki ato rataxaxō fāi kesemē, “Pedro āfe yōra ato fakish faafōfānaino sharatirofora,” ikaxō. ¹⁶ Nāskakata a chaima ikafori yora kaya Jerusalén ano fonifo. A isinī ikaifo ato

efeyanā a niáfaka chakata ato mēra nanexō ato fekaxtefaifori ato efenifo. Nāfo a Jesúsnoa ato yoimisfāfe ato shakafapanifo.

A Jesúsnoa ato yoimisfo ato omiskōimakōinifo

¹⁷ A Nios ato kīfixomis xanīfo fe saduceofo afe ikanax òitifishkinifo, afeskakī noko nikakani-mamē ikanax. ¹⁸ Nāskakaxō a Jesúsnoa ato yoimisfo ato achikaxō karaxa mēra ato ikimanifo. ¹⁹ Akka Niospa āfe ājiri fakishi oxō karaxa āfe fepoti fepexō ato kāimani iskafakī ato yoiyanā: ²⁰ “Nonoax kāifaikaxō a Nios kīfiti pexefā mēraxō ato yoitakāfe afeskaxō nōko Ifo Jesús ato ikitiromākī,” ato fani. ²¹ Nā ājirinī ato yoiaito nikafo keskakani penakaiama Nios kīfiti pexefā mēra ikifainifo, anoxō ato yoixikakī.

Nāskaifono a ato Nios kīfixomis xanīfāfe, a afe ikafoya israeli xanīfofo ato kenani, ano fistiāx ichanāi fenōfo xanīfo finakōia anoax, anoxō a Jesúsnoa yoimisfo ato ifitanōfo ato fe ichanāi fenōfo. ²² Mā ato nīchiafono a ato kexemisfo fokaxō òiafo a karaxa mēra tsoa inima. Nāskakē anā ato yoifekani fenifo. ²³ Iskafakī ato yoinifo: “Kaxō nō òia karaxa fetaxōikōina nō fichitoshia, sorarofāfe kexekōiafono kāiti ano. Akka a mēra ikikaixō nō òia ano tsoa ikama,” ato faifono, ²⁴ nikakani a Nios kīfiti pexefā kexemisfāfe a ato xanīfofo fe, a ato Nios kīfixomisfo xanīfokōifo āa ranā yoinānifo: “¡Airal! ¿Afeskax tsekeafomē?” ikanax ratenifo.

²⁵ Askaifono feronāfake fetsa atoki oxō ato yoini iskafakī: “Nikakapo a mā ato karaxa mēra ikimanita feronāfake rafeta, a Nios kīfiti pexefā mēraxō mā ato yoikani,” ato faino, ²⁶ a ato kexemisfāfe āto xanīfo āfe inafō fe kani ato ifikai. Akka mā fokaxō ato efenifo. Nāskaxō ato afeska fanifoma yorafokī mesekakī tokirinī noko tsakatirofo ikaxō.

²⁷ Mā fokaxō ato iyonifo a xanīfo finakōia ano. Nānoxō a ato Nios kīfixomis xanīfāfe ato yoini iskafakī: ²⁸ “Mā nō mato yoita, ‘Anā ato Jesúsnoa yoyimakāfe,’ nō mato feita, akka, ¿afeskakī Jesúsnoa mā ato yoirifaimē? Jerusalén anoafō mā ato yoiki mā mā ato tāpimākōia. Nāskaxō mā noko pārapai nafāfe Jesús reiteitafora mā noko fapai, noko chakafapaikī.”

²⁹ Ato askafaitono Pedro a fe rafeafo feta ato kemani: “Akka nōfi Nios nikaikai. Yorafokai nō nikapaima. ³⁰ Nōko xinifāfe āto Niospa Jesús otoaita, mā mā retefitano ifi cruz ikaki mastaxō. ³¹ Nāskaxō Niospa Jesús a keskara xanīfofnakōi imani yorafo ato ifixō ato ikikōipakexanō. Nāskakē israelifāfe keyokōichi Nios chanīmara fanōfo, a afara chakafamisfono āto chaka ato soaxonō. ³² Chanīma mā nō òimis, askatari Niospa Yōshi Sharapa mā tāpia. Akka a nikaifo Niospa āfe Yōshi Shara ato mēra nanea,” Pedro ato fani.

³³ Ato askafaito nikakakī akikī òitifishkiyanā ato retepainifo. ³⁴ Akka nā xanīfofo fe fariseo āfe ane Gamaliel ato fe ini. Nāato a Moisés yoikī kirika kenenī keskara ato tāpimamis ini. Yorafāfe aōnoa yoisharakōimisfo. Nāato niinākafā ato yoini iskafakī: “Xafakīa ato kāimayokāfe,” ato fani. ³⁵ Nāskaxō ato kāimaxō a xanīfo fetsafo yoini: “Efe yorafāfe israelifāfe, ea nikakapo ē mato yoinō. Māfi na feronāfake rafe retepaikāi, ¿afeskaito mā ato retepaimē? Shināsharakāfe. Ato retepaikakīma,” ato fani. ³⁶ Nāskata anā ato yoini: “Shinākapo, oa feronāfake Teudas xanīfo iyonī. Xanīfo finakōia ipaiyaito cuatro cientos yorafāfe chīfafainifo. Akka nā mā yora fetsafāfe retenifo. Mā reteafono āfe inafō paxkanāi fetsenifo. Nāskakanax ariax keyonifo. ³⁷ Askatari chipo āto anefo kenekakī censo akaifono, Judas fetsa. Galilea ano ini. Xanīfo ipaikī ato yoini yorafāfe chīfafainōfo. Askafafaino nāri retenifo. Nāskakē āfe inafori paxkanāi fetsenifo. ³⁸ Nāskakē ē mato yoi na feronāfake rafe ato enekāfe ato afeska fakakīma. Akka a Niospa shināi anori ato yoyimakakī, āa ato yoikakī kaxpa ato yoitirofo. Nāskakanax keyotirofo. ³⁹ Akka Nios ato fe ikano mā ato afeska fatiroma. Māroko kexemesharakāfe ato chakafayanā Niosri mā chakafatiroki,” ixō Gamaliel ato yoiaito nikanifo.

⁴⁰ Ato askafaito nikakakī, a Jesúsnoa yoimisfo ato kenakaxō ato koshakata, “Anā Jesúsxō mā afaa yoiki,” ato fakaxō ato nīchinifo. ⁴¹ Nāskakē a Niosnoa yoimisfo xanīfofo anoax tsekekani inimakōinifo, Niosnoaxmāi omiskōikanax Jesúsnoa meka shara ato yoikani. ⁴² Nāskakē pena tii nōko Ifo Cristo Jesúsnoa meka shara ato yoinifo. A Nios kīfiti pexefā anoxō ato yoita pexefo anoxori ato yoifofāsanifono.

6

Jesúsxō tāpimisfāfe docefāfe feronāfake fetsafo siete ato ifnifo ato feta yononōfo

¹ Nāskaifono a Jesús Ifofaifo ichapakōi inifo. Akka fetsafo a griego mekapa ikaifāfe, hebreofo ato mekakafakakī taefanifo ato iskafakakī: “¿Afeskakī nōko kaifo a fenemaisfo a piaifo mā ato ināsharaimamē? Akka māto kaifo fisti mā ato ināi,” ikaxō ato mekafanifo. ² Ato askafaiāfāfe nikakata a Jesúsxō yoimisfāfe nā docefāfe a Jesús Ifofamisfo ato ichanāfakaxō ato yoinifo iskafakakī: “Nō mato Niospa meka yoikī nō xatetiroma a ma piāi mato paxkaxoxiki. Akka pena tii nō mato Niospa meka yoifafāini,” ato fanifo. ³ “Efe yora mishtichi, feronāfakefo siete fenakāfe a mā piāi mato ināsharanōfo. Mā mā tāpiakī fatofomākī Niospa Yōshi Shara fe

rafeafao. Nāfo nō ato yonomanō a mā piāi mato ināsharanōfo. ⁴ Akka nō pena tii Epa Nios kīfifāinikai, āfe meka sharari yoiyanā, ixō ato yoinifo.

⁵ Ato askafaifono nikakani keyokōi inimanifo. Nāskakata Esteban ifinifo, nāato Nios chanīmara fakōina ini, āfe Yōshi Shara a mēra naneano. Feliperi ifinifo, Prócorori ifinifo, Nicanori ifinifo, Timónri ifinifo, Parmenasri ifinifo, Nicolásri ifinifo. Nā Nicolás Antioquia anoā ini. Judeofāfe Nios Ifofaifo keskafakī Nicolás Nios shināmis ini. ⁶ Ato askafakāta a ato Jesúsnoa yoimisfo ano ato iyonifo. Anoxō ato Nios kīfixoyanā ato māmānifo.

⁷ A Jesúsxō yoimisfāfe Niospa meka ato yoiāifono atōōxō yorafāfe chanīmara fanifo, Jerusalén anoxō. Askatari judeofāfe a ato Nios kīfixomisfāferi akairi Jesús Ifofanifo. “Jesús Niospa Fakekōira,” ixō chanīmara fanifo.

Esteban achinifo

⁸ Esteban Jesús chanīmara fakōina ini. Niospa āfe kerex shara a mēra naneano akiki inimakōini. Nāskakē aōxō afama mīshtifokāi atō ōimani. ⁹ Akka judeofo fetsafo nā ichanāti pexe mēranoax ichanāpaonifo. Nā ichanāti pexe anenifo: “Anā Ato Inafoma,” fakakī. Nāfo Cirene anoāfo ikaino Alejandría anoāfo ikaino Cilicia anoāfo ikaino fetsafori Asia anoāfori nāfo ichanākanax Esteban fe feratenānifo. ¹⁰ Meka finōmapaifiaifono Niospa āfe Yōshi Sharapa Esteban āfe ōiti mēra shināmani. Shināsharakōita ato yoini. Ato askafaito tsōa Esteban kemanima.

¹¹ Ato askafaito nikakakī akiki ōitifishkiyanā yora fetsafo ato kori inānifo ato iskafayanā: “Nō mato kori inānō Esteban mā pāratakāfe iskafakī: ‘Na Esteban Moisés yoini keskara chakafaito nō nika, Niosri chakafayanā,’ ixō ato yoitakāfe,” ato fanifo. ¹² Mā fokaxō ato yoikī askafaifono, yorafō ōitifishkikani mekai fetsenifo, a judeofāfe āto xanīfo fe a Moisés yoikī kirika kenenī keskara ato tāpimamisfori askanifo. Nāskakaxō Esteban achikaxō xanīfokōi ano iyonifo. ¹³ Mā iyokaxō āa pārānifo āa chanī fetsekakī iskafakakī: “Na feronāfāke nōko Nios kīfiti pexefā mēxotaima chakafai, askatari a Moisés yoini keskara chakafai. ¹⁴ Nāskatari, ‘Nā Jesús Nazarete anoato nā Nios kīfiti pexefā pāoaxii kiki,’ ikaito nō nikamis. Nāskatari, ‘A Moisés yoini keskara ē fetsafaxii,’ ikaito nō nikamis,” fanifo āa pārakakī.

¹⁵ Askafaifono xanīfofo feta a ano tsaofāfe ōiafo Esteban āfe femānā nā ājirinī femānā keskarakōi ōinifo.

7

Esteban ato kemasharakōini

¹ A judeofo Nios kīfixomis xanīfo finakōiato Esteban yōkani: “¿Chanīmamakī a mīōnoa yoiāifo keskara?”

² Askafaito nikakī Esteban kemani iskafakī: “Efe yora mīshtichi, ea nikakapo. Nōko Nios fāsi sharakōixō afetiāma nōko xini Abraham yoini, Mesopotamia ano iyoano, Harán mai ano kayoamano. ³ Iskafakī yoini: ‘Na mai anoax tsekekaini katāfe, mefe yorafoya ato ōifaini. Nā mī kai ano ē mia ispaikai,’ ixō Niospa Abraham yoini. ⁴ Nāskakē Abraham Caldea anoax tsekekaini kani, Harán ano ikikai. Mā anoax āfe apa naano Niospa Abraham efeni na mai ano, na iskaratā nō ika ano. ⁵ Akka Niospa afaa pishta ināyonima. Mairi fena inānima. Akka iskafakī yoini: ‘Ē mia na mai ināxii,’ ixō yoiyoni. ‘Akka mā mī nanino mī fenafo ē ato ināxii,’ ixō Niospa Abraham yoiyoni āfe āfi feta fake akamano. ⁶ Askata Niospa anā yoini iskafakī: ‘Mī fenafo yora fetsa keskarakanax mai fetsa ano iyonōfo. Nānoax āto yonomati keskarakanax omiskōikōiyonōfo cuatrocientos xinia akani.’ ⁷ Nāskata anā yoini iskafakī: ‘Ē na yorafō omiskōimani, nā ato yonomakī omiskōimanaifo. Ē ato askafaino anoax mī fenafo tsekefaixikani. Mā anoax fokaxō nā Canaán mai anoxō ea nikasharakōixikani,’ ixō Epa Niospa Abraham yoini. ⁸ Niospa afetiāma Abraham yoini: ‘Mī fake feronāfāke mī foshki repa xatetiro,’ ixō yoiyoni. Nāskakē Abraham āfe fake Isaaca mā ocho nia ikano foshki repa xateni. Nāskarifakī Isaaca āfe fake Jacobori askafani. Nāskarifakī Jacobo āfe fakefo ato foshki repa xatepakeni.

⁹ “Jacobō āfe fakefo nōko xinifo ipaonifo, nāfāfe āto exto José ōikaspapaonifo. Nāskakaxō Egipto anoax foaifono yora fetsafo ato inānifo aōxō kori fixikakī nāfāfe Egipto ari iyotanōfo. Askafaifono Epa Niospa José potanima. ¹⁰ José omiskōiaito Epa Niospa ifini. Nāskaxō shināsharamani. Nāskakē Egipto anoxō ato xanīfokōichi José noisharakōini. Nāskaxō xanīfāfe José xanīfo imani, Egipto anoxō āfe pexe anoax xanīfokōi inō.

¹¹ “Nāskakē Egipto anoāfo fe Canaán anoax fonāiki finakōinifo omiskōiyanā. Nāskakē nōko xinifāfe afaa pinifoma. ¹² Akka Jacobo nikani Egipto anoā a piaifo ichapakē. Nāskakē nāri āfe fakefo nīchini a piaifo fitanōfo, nā nōko xinifo. Ari fokatsaxakakīma foitaenifo. ¹³ Nāskakata afianā fonifo. Mā anā foafono José āfe ochifo tāpimani. Nāskakē nā xanīfo Faraón tāpini José āfe kaifo. ¹⁴ Nāskata chipō José apa kenamani Egipto ano onō āfe fakefo fe. Nā yorafō setenta y cinco inifo Egipto ano ikifeaifo. ¹⁵ Nāskakē Jacobo kani Egipto ano ikikai.

Nānoax Jacobo nani, nānoaxri nōko xinifori nāpanifo. ¹⁶ Nāskakē Jacobo āfe xaofa Siquem ano fonifo maifaifokakī. Nā mai nōko xini Abraham afetiama fini, feronāfake āfe ane Hamor minini. Nā mai kini mēra nōko xinifo maifanifo.

¹⁷ “Akka mā anoax chaima tsekeaifono nā Epa Niospa Abraham yoiyoni keskai, mā Egipto anoax kaikanax fakefo ichapakōi kainifo. ¹⁸ Nāskatari Egipto anoax nā xanifo fetsa finakōiato José ōimisma ini. ¹⁹ Nā xanifāfe nōko kaifofo ato pārapaoni. Nāskaxō nōko xinifo ato omiskōimapaoni. Ato pāraxō āto fakefo ato potamapaoni nā fake rama kāiyaifo nanōfo. ²⁰ Ato askafaino nānoaxri Moisés fakeni. Akiki Epa Nios inimakōini. Nānoxō apa feta āfe afa ato pexe anoxō kexesharapaoni. Tres oxo anifo kexekakī. ²¹ Mā tres oxo akano apa feta āfa fētāmā fepoxō faka ketokonō ratanifo. Nānoa Faraōn fake xomayato fichixō ifini āfe fake keskarakōi inō. ²² Nāskakē Moisés nā Egipto anoxō tāpiafo keskarari tāpikōini. Mā yosixō yoikī tāpisharakōia ini a xanifāfe yoitiro keskafakī.

²³ “Mā cuarenta xinia axō Moisés āfe kaifo israelifo ōikai kani. ²⁴ Akka mā kaxō ōia Egipto anoato āfe kaifo koshaito ōini. Askafaito ōikī timamapaikī, Moisés Egipto ano a feronāfake koshakī reteni. ²⁵ Askafata Moisés shināni: ‘Ēfe kaifāfe tāpikani eōxō Niospa ato ifipai,’ ixō shināni. Akka tsōa tāpinima. ²⁶ Nāskata pena fetsa Moisés āfe kaifo ari kaxō ōia āfe kaifo raferi setenāifāfe ōitoshini. Nāskaxō ato raefapaita ato yoini iskafakī: ‘Nā yora fistifiax ŷafeskai mā setenāimē?’ ²⁷ Ato askafaino a fētsa seteai Moiséski ōiti fishkiyanā yoini iskafakī: ‘ŷTsōa mia xanifo imamē mī noko ikinō?’ ²⁸ ŷAkka mī ea retepaime nā Egipto ano a mī retefaiyamea keskafakī? ixō yoini akiki ōiti fishkiyanā. ²⁹ Askafaito nikai Moisés onekaini Madián mai ari kani. Nāri ipaoni yora fetsa keskarax. Nāriax āfiyaxō fake feronāfake rafe ani.

³⁰ “Nārixō Moisés mā cuarenta xinia akano, tsōa istoma machi Sinai chaima akiki ājiri nokoni, oa fanafo kooai keskara mēranoax. ³¹ Askaito nikai Moisés rateyanā namakē ōia fani. Nāskakē akiki chaimashta kaxō ōipaikī nika a mēranoax Nios mekaito nikani iskafakī yoiaito, ³² Ēfi mī xinifāfe ato Nioski. Abraham ikaino Isaaca ikaino Jacobo ikaino ēfi āto Nioskōikī, ixō Niospa yoiaito nikai Moisés rateyanā choani. Nāskakē anā ari naisnima. ³³ Nāskaito Epa Niospa yoini iskafakī: ‘Mī zapato pekafe, nā mī nia ano sharakōikī. ³⁴ Efe yorafa mē ōia omiskōiaifāfe Egipto anoax. Mē ato nika tetsosikaifāfe. Nāskax ē fotoa ato ifyoyi. Nāskakē iskaratāia Egipto ano ē nia nīchi, Niospa Moisés fani.

³⁵ “Āfe kaifāfe noikasapakakī iskafafianifono: ‘ŷTsōa mia yoiamē mī nōko xanifo inō noko ikinikī?’ ixō yoifinifono. Akka Epa Niospa xanifo imaxō nīchini āfe kaifo ifitanō, āfe ājiriōxō. ³⁶ Mā Moisés kaxō Egipto ano a nōko xinifo ifini. Mā ato iftani oxō Moisés afama mīshti fani tsōa atiroma keskara fakī. Nā mai anoxō cuarenta xinia ani. Nā iamāfānē āfe ane Ōshi anoax tsōa istoma ipaonifo. ³⁷ Moisés āfe kaifo israelifo yoikī iskafani: ‘Niospa fatora fetsa ea keskara mato ano nīchixii kiki. Nikasharakāfe,’ ato fani. ³⁸ Nā Moisés judeofo fe tsōa istoma ano ipaoni. Nānoax ājiri fe mekani machi Sinai anoax, nā ājirinī yoia keskafakī nōko xinifo yoini. Nā Moisés a noko ikipakexatiro Niospa meka shara fini, nā meka sharapa noko ikipakexatiro ixō ato yoini.

³⁹ “Akka nōko xinifāfe nikakaspayanā chakafanifo. Nāskakanax afianē Egipto ano fepainifo. ⁴⁰ Nāskakaxō Aarón yoinifo iskafakakī: ‘Noko nios faxōfe noko ikinō. Fakira Moisés kaaki nō tāpiamakī, Egipto ano a noko efefiitaxakī.’ ⁴¹ Nāskafaifāfe Aarón ato fakka fake keskara oro ato onifaxoni. Mā ato onifaxōano yoinā retexō ināyanā akiki inimayanā fista axonifo. ‘Aicho, nōko nios fasi sharakōi,’ fanifo āa onifaxō. ⁴² Nāskakē Nios ato makinoax paxkani iskafakī ato yoianā: ‘Na fishifo nai mēranoafo nōko niosra mā fatiro,’ ato fani. Akka nā Niosnoa yoimisfāfe, nānorikōi kirikakī kenenifo iskafakī:

Israelifāfe tsōa istomaxō mā mā cuarenta xinia afiaxō māka yoinā retexō mā ea ināpaonima, ⁴³ Askatamaroko māa mā afara fetsa onifaxō, ‘Nā nōko niosra,’ ixō Moloc mā iyafōsafafamis. Askata mātō nios Refān āfe fishifori mā noimis. Na nōko niosra ixō mā afara onifanixakī, akiki mā inima kakāini. Nāskakē ē mātō na tsōa istoma ano a ē mato chai nīchi, Babilonia finōfāi,

Niospa ato fani.

⁴⁴ “Nāskakē nōko xinifāfe tsōa istomaxō nā Moisés Niospa yoini keskafakī pexe fakanax ipaonifo. Nā Niospa Moisés yoini iskafakī: ‘Karpa pexe fafe nā ē mia ōimana keskara fakī,’ ixō yoini. ⁴⁵ Nāskakē mā xini ichapa finōta nōko xinifāfe nā karpa pexe finifo. Akka mā Josué xanifoxō ato iyoni yora fetsafo potaxō ato mai fiaifonōfo. Niospa ato axōfaino ato mai fianifo. Mā askapakeafono Davidri chipo xanifoni. ⁴⁶ Xanifo Davidkī Nios fasi inimakōini. Nāskakē David Nios yoini iskafakī: ‘Epa Niosi, ē pexe efapa shara mia faxopai ano Jacobo āfe fenafa inō,’ ixō yoini. ⁴⁷ Askafakī yoifixō axonima, āfe fake Salomón Epa Nios pexe faxoni. ⁴⁸ Akka yorafāfe pexe faxōiafono nā Nios finakōia a pexe mēra itiroma. Niospa keyokōi ikinā ixō a Niosnoa yoimisto kirika keneni iskafakī:

⁴⁹ Ē nai mēra ika. Nārixō na mai anoafō ē onifani tii keyokōi ē īkinā. Akka, ʔafesakāi mā ea pexe faxotiro mē a fisti mēra ē inō faki kafāsaxikima? ⁵⁰ Akka, ʔē afama mšitii onifanimamē?

ixō Niospa ato yoini.

⁵¹ “Akka māfi mātō xinifo keskarakī. Mā nikayospakōifo Epa Niospa meka mā nikakas-pakōimis, chanīmarakāi mā famisma. Niospa Yōshi Sharapa mato yoimis mā nikakōimisma. ⁵² Nāskaxō mātō xinifāfe a Niospa meka ato yoimisfo ato omiskōimapaonifo. Nāfāferi retenifo, ‘A sharafinakōia nokoki fotoxii kiki,’ ixō aōnoa yoinifo. Akka nā sharafinakōia mā nokoki oano, mā achixō ato retemayamea. ⁵³ Niospa ājirifoōxō Moisés Niospa meka shara mato yoifimiso mā nikakaspamis,” ixō Esteban ato yoini.

Esteban retenifo

⁵⁴ Esteban ato yoikī askafaito nikakani judeofāfe Esteban noikaspakani, akiki ōitifishkikī finakōinifo. ⁵⁵ Askafiaifono Esteban shināchakanima māmāi Niospa āfe Yōshi Shara āfe ōiti mēra naneano. Askata nai ari foisnīfofākī ōia Niospa āfe shara chaxasharakōiaito ōini, Jesús Apa fe ketaxamei nikē. ⁵⁶ Nāskaxō ato yoini iskafakī: “īŌikapō! Mā nai fepekemea ē ōikai Jesucristo Apa ketaxamei niakī,” ixō Esteban ato yoini.

⁵⁷ Ato askafaito nikakaspakōikakī fāsikōi fiisiyanā paopomenifo. Nāskakaxō noikas-payanā akiki fareke ferakaxō, ⁵⁸ mā achikaxō pexe rasi pasotai iyokaxō nā Esteban yōaitafāfe feronāfake naetapa āfe ane Saulo rapati inānifo ato kexexonō. Nāskakaxō chipo Esteban tokirinī tsakaketsanifo.

⁵⁹ Nāskakakī tokirinī tsakaketsaifono Esteban Epa Nios kīfimi iskafakī: “Ifo Jesús, ēfe fēro mēsho ifife,” ixō yoini. ⁶⁰ Nāskata ratokonō mai chachipakefōfā, fāsikōi fiisini. Iskafakī yoini: “Ifo, ea chakafakani kiki ato raefāfe,” ixō yoiax nani.

8

A Jesús Ifofafo Saulo ato omiskōimani

¹ Mā Esteban reteafono Saulo inimayanā: “Mā mā akakōikī,” ato fani. Nāskata afia penata nā Jesús Ifofamisfo ato omiskōimakī finakōinifo Jerusalén anoxō. Akka Jesúsxō tāpimisfo ichonifoma, Jerusalén ano nētenifo. Akka nā ato omiskōimanaifo ichokanax pakkanāi fetsenifo. Ranāri Judea mai ari foaifono, ranāri Samāria ari fonifo. ² Atiri yorafāfe a Nios Ifofamisfāfe Esteban maifakani oiāi finakōinifo aō noikani. ³ Akka nā Saulo Jesús Ifofamisfo ato omiskōimani pexefo tii mēra ikikafākakāini ato achixō karaxa mēra ato ikimaxiki, kērofoya feronāfakefo.

Niospa meka sharaōnoa Samāria ano ato yoinifo

⁴ Akka nā Jerusalén anox ichoafāfe Jesucristoōnoa meka shara ato yoifofāsafanifo nā foaifo arixō. ⁵ Felipe pexe rasi Samāria ano kani, anoxō Cristoōnoa ato yoikai. ⁶ Ato yoiaito nikakani yorāfo ichanākaxō Felipe nikakōinifo. Askatari Niospa Yōshi Sharaōxō tsōa atiroma keskafakī Felipe afama mšitifo faito ōinifo. ⁷ Askata a nīafaka chakafo ato mēra nanea ato makīnoa potapakeni. Nāskakē nīafaka chakafo ato makīnoax tsekei fiisiki fetsenifo. Askatari a finimīsoma sharafata chātofori sharafani. ⁸ Askafaito ōikani a pexe rasi anoafō Felipeki inimakōinifo, ato sharafapaito ōikani.

⁹ Akka nā Samāria mai anoafō feronāfake āfe ane Simón ini. Taeyoi yōfe iyopaoni, nāto Samāria anoafō ato pārapaoni: “Ē feronāfake sharafinakōiara,” ixō. ¹⁰ Keyokōichi fakefofaxō anifofāfe nikakōisharanifo iskafakī yoiyanā: “A nā yoimisfo a nato Niosxō afama mšitifo fai kiki,” ixō yoinifo.

¹¹ Nāskakē akiki inimakakī nikakōipaonifo āfe yōfeōxomāi mā ato pārapakemiskē. ¹² Akka askafiaifono Felipe Nios xanīfoōnoa yafi Jesucristoōnoa meka shara ato yoiaito nikakakī chanīmara fakōinifo. Nāskakē chanīmara faifāfe Felipe faka mēra ato ikimapakeni maoti-safakī āto chaka xatenōfo. Feronāfakefoya kērofoya ato faka mēra ikimapakeni. ¹³ Askatari a Simón yōfe ifiakatsaxakī atori Jesús chanīmara faxō Ifofani. Askafaito ōikī aari Felipe maotisafani. Nāskax nā Simón Felipe afe kapaoni. Akka Felipe tsōa atiroma keskafakī Niosxō afafo sharafaito ōikī yoini iskafakī: “Aira, ʔafesakaxō iskafaimē?” ixō Simón yoini.

¹⁴ Nāskaifono a Jesús fe rafemisfāfe Jerusalén anoxō nikanifo Samāria anoxō yorafāfe Niosnoa meka shara chanīmara faifāfe. Nāskakē Pedro yafi Juan nīchinifo, Samāria ari fotanōfo. ¹⁵ Mā Samāria ano nokokaxō a Nios Ifofafo ato Nios kīfixonifo Niospa Yōshi Shara ato mēra nanenō. ¹⁶ Ato mēra Epa Niospa Yōshi Shara naneyoamano Jesús aneōnoax maotisafanifo. ¹⁷ Nāskakē Pedro feta Juan ato māmānifo ato Nios kīfixoyanā. Ato askafiaifono Niospa Yōshi Shara ato mēra naneni.

¹⁸ Nāskakē Simón ōini Niospa Yōshi Shara ato mēra naneaito Pedro feta Juan ato Nios kīfixoyanā ato māmāifono. Ato askafiaifono ōikī Simón ato kori ināpaini. ¹⁹ Ato iskafakī

yoivanā: “Eari na kerex shara inākāfe ēri ato māmāpakenō Niospa Yōshi Shara ato mēra nanenō,” ixō Simón ato yoini.

²⁰ Ato askafaito Pedro kemani: “A na mī koriya mī nai, akka mī shinā korioxō a Niospa noko ināpaiyai keskara nō fitiro. Maa, askarakaima. ²¹ Mīkai afaa tāpiama na nō Nios yonoxonai keskarakai mī nofeta atiroma. Mia Niospa tāpikōia mī ōiti mēraxokai mī shināsharaima. ²² Nāskakē mī chaka xatefe a mī shināi anori anā shinākima. Nios yōkafē mī kīfaiato mia chaka soaxotiroki. ²³ Mē mia ōi mī ōitifishkiki finaito mīmāi chakakōiax,” ixō Pedro yoini.

²⁴ Askafaito nikakī Simón kemani iskafakī: “Ea Nios kīfixōfe, nā mīa yoiai keskafakī, Niospa ea omiskōimayamanō,” ixō yoini.

²⁵ Askakāta Pedro feta Juan Samāria anoafō nōko Ifo Jesúsnoa meka shara ato yoitakani Jerusalén ano anā fenifo.

Mā fekakī pexe rasi anoafō Jesúsnoa meka shara ato yoifenifo

²⁶ Nāskata Niospa āfe ājirinī Felipe yoini: “Fai fētsa kakīma, na fāi katāfe na fāi Jerusalén yafi Gaza finōfainaki tsōa istoma ari na fai kaaki,” fani. ²⁷ Askata Felipe fininākfāta kani. Fāi kai feronāfake Etiopía anoaki nokoni. Nā feronāfake xanīfōri ini. Nāato kēro xanīfokōi kori kexexopaoni Etiopía ano. Nāato Jerusalén ano kaxō Epa Nios kīfitani. ²⁸ Mā āfe kaifo mēra okī āfe karo mēra tsaioxō kirika anefeni, nā Isaiás Niosnoa yoikī keneni. ²⁹ Nāskata Niospa Yōshi Sharapa anā yoini Felipe: “Oa karo ano katāfe,” fani. ³⁰ Mā Felipe akiki kaxō nikani nā feronāfake Etiopía anoato kirika aneaito, nā Isaiás keneni. Nāskaxō yōkani: “¿Mā mī tāpiamē a mī aneai?” faito, ³¹ Etiopía anoato kemani iskafakī: “¿Afeska xō ē tāpitiromē? ¿Tsōa ea tāpimatiromē?” fata nāskaxō nā feronāfāke Felipe keneni: “Ēfe karomā naneyofe efe tsaokī,” fani. ³² A kirika kenea anekī ōiai iska ini:

Oveja iyokaxō retetirofo keskafakī, ari iyoniyo retexikakī. Ovejanā fake achikaxō āfe rani xateafono feroitiroma keskai ari tooxinima. ³³ Rāfinī fanifo afaa chakafayamafiakē noikaspa kakī. A xanīfofo aō rāfanā inifoma aō rāfanā itamaroko retenifo. Akka āfe fenafāfe nikanakafoma, ixō Isaiás keneni ōini.

³⁴ Nāskata nā xanīfo Etiopía anoato Felipe yōkani: “Ea yoife ē tāpinō na Niospa meka yoimisto yoini afaa ikamāki, fetsaōnoa yoikī kenenimāki askayamakī āa anoi yoimeki kenenimāki,” faito, ³⁵ Felipe yoini iskafakī: “Na mī kirika ōiai Isaiás keneni a Jesucristo noko nāxoxiai yoikī keneni,” fani. Nāskafaxō Jesúsnoa meka shara yoipakeni. ³⁶ Nāskakata fāi fokani faka ano nokonifo. Nānoxō a xanīfo Etiopía anoato Felipe yoini: “Na faka ōipo. ¿Na fāka mī ea maotisafatiromamē?” fani.

³⁷ Askafaito Felipe yoini: “Mī ōiti mēraxō mī chanīmara fakōinaito ē mia atiro,” fani. Askafaito a feronāfāke kemani: “Ēje, ē chanīmara fai Jesucristo Niospa Fake,” fani.

³⁸ Askafaito nikakī Felipe, “Mī karo nētefefe,” fani. Mā karo nētefakata nā rafe fotopakefōfānifo faka ano. Nānoxō Felipe a feronāfake Etiopía ano maotisafani. ³⁹ Mā faka anoax feaifono, Niospa Yōshi Sharapa Felipe iyofaino yamarisatani. Nāskakē a feronāfake Etiopía anoato Felipe anā ōinima. ⁴⁰ Nāskata Felipe mai fetsa, Azoto ano nokoni. Nānoax kakī a pexe rasi anoafō Jesúsnoa meka shara ato yoifoikaax, Cesarea ari nokoni.

9

Saulo Jesús chanīmara fani Damasco ano kakī
(Hch. 22.6-16; 26.12-18)

¹ Nāskatari nā Saulo mēxotaima ē mato reteikai ixō ato retepaipaoni a Jesús Ifofaafō. Nāskakē a ato Nios kīfixomisfo āfe xanīfo ano kani. ² Mā kaxō ato yoini iskafakī: “Ea kirika kenexokāfe ē aya katanō, ichanāti pexefo Damasco ano a Jesús chanīmara faifo ē ato achitanō, feronāfakēfōya kērofōya, Jerusalén ano ato iyoxō karaxa mēra ato ikimaxiki,” ixō ato yoini. ³ Akka mā pexe rasi Damasco chaima fāi kaino, nai mēraxō a kemataima chaxatanaino, ⁴ Saulo pakeni. Pakexō nikani, iskafakī yoiaito: “Saulo, Saulo, ¿afeska kī mī ea omiskōimanimē?” faito nikakī, ⁵ Saulo kemani: “Ifo, ¿mī tsoamē?” faito kemakī iskafani: “Ēkīa Jesús, a mī ea omiskōimanai. ⁶ Fininākfā. Pexe rasi ano katāxiki. Anoxō mia yoikani kiki mī afaa afeska faimākai,” fani.

⁷ Akka a Saulo fe foaifo ratekōinifo mekaito nikakani. Akka ano mekaito nikafikakī tsoa ōinifoma. ⁸ Nāskata Saulo fininākfani. Fininākfāta ōipaikī anā ōinima, mā fēxoa ini. Nāskakē mētsokaxō iyoniyo Damasco ano. ⁹ Nā Damasco ano tres nia ini ōiaxma. Askatari afaa pinima, afaari ayanima.

¹⁰ Akka nā Damasco ano Jesús Ifofaa fisti ika ini, āfe ane Ananías. Nāato namakē ōini nōko Ifāfe yoiaito iskafakī: “Ananías,” faito, “Ēkīa, Ifo,” fani. ¹¹ Askafaito nōko Ifāfe yoini: “Na fai āfe ane ‘Mēstekōi’ ari katāfe. Mā nokoxō Judaspa pexe ano yōkafē nānoa feronāfake Tarso

anoa, mī fichikai āfe ane Saulo. Nānoxō Epa Nios kīfi kiki. ¹² Anoxō mia namakē ōiafai kiki, mī mīfi mī māmāito, anā ōisharaxiki," ixō yoiaito, ¹³ nikakī Ananías kemani: "Ifo, na feronāfakeōnoa ea yoiiaifāfe mē nikamis. Nāato keyokōi: Jerusalén anoafō chakafaito a mia Ifofaafō. ¹⁴ Akka mā nono oa a ato Nios kīfixomis xanīfofōfāfe nīchiafono. A mia Ifofamisfo ato karaxa mēra nīchixikī mā ato ifiyo, ¹⁵ faito, ¹⁵ anā nōko Ifāfe yoini iskafakī: "Mē na feronāfake katoa eōnoa meka shara ato yoinō mai fetsafo anoafōya ato xanīfofōya israelifōya ato yoinō. ¹⁶ Nāskakē ē Saulo ōimana eōnoax omiskōifinakōinō," ixō yoini.

¹⁷ Askafaito nikafaini Ananías kani. Kaax pexe mēra ikitoshita nānoa Saulo fichitoshini. Nāskaxō āfe mīfi māmāni iskafakī yoiyanā: "Saulo, ēfi mefe yorakī. Nōko Ifo Jesús nā mī fāi oaito mikiki nokoitoto, ea nīchia ē mia fero sharafaxono, askatari Niospa Yōshi Shara mī mēra ē nanenō," faino, ¹⁸ koshikōi Saulo fero mēranoax oa foe pese keskara pakeni. Nāskaxō ōisharakōitani. Nāskakē Ananías maotisafani faka mēra ikimakī. ¹⁹ Nāskaxō mā pixō meea āfe yora sharakōi ini, anā āfe yora pachi inima. Nāskakē nā Jesús Ifofaafō fe Damasco ano ato fe oxa ranāyonifo.

Damasco anoxō Saulo Niosnoa yoini

²⁰ Askata Saulo ichanāti pexe mēraxō ato yoiakī taefani iskafakī: "Jesús Niospa Fakekōi," ixō ato yoini. ²¹ Ato askafaito nikakani ratei fetsenifo. Nāskaxō yoinifo iskafakakī: "Akka, ŷnato Jerusalén anoxō a Jesús Ifofamisfo ato omiskōimamismamē? Akka, ŷnaamamē? Mā nono oa nonoafō ato achiyo, a Nios kīfixomisfāfe āto xanīfofo ato iyoxonī axiki."

²² Akka taeyoi Saulo ratēpishatakī yoiyoni. Nāskaxō feyafani fāsikōi yoiakī. Nāskaxō mēstekōi ato yoini Niospa āfe Fake Jesús nokoki nīchini. Nāskakē judeofāfe Damasco anoxō tāpīpaiketsanifo. "ŷFato nō chanīmara faimē?" ikaxō, "Jesucristofi Niospa Fakekōiki," ixō ato yoiaito.

Saulo judeofoki mesei onekaini

²³ Nāskata mā oxai ichapano, judeofāfe ichanākaxō shinānifo: "ŷAfesaxō nō Saulo retē-tiromē?" ikaxō, ²⁴ akka Saulo tāpini yoiiafono. Pena yafi fakishchāi manaifono pexe rasi kāiti anoxō retēpaikakī. ²⁵ Askaito ōikakī a Jesús Ifofamisfāfe Saulo fēta mēra nanexō kene fomākīaxō risfichi fakishi fotomanifo a tsoa niama anori. Mā fotomanafono onekaini.

Saulo Jerusalén ari kani

²⁶ Mā Saulo Jerusalén ano nokoax a Jesús Ifofamisfo fe rafepaiyaito, akka keyokōichi omisnifo tāpīkaxoma koshikairoko Nios Ifofara ikaxō. ²⁷ Askaito ōikī Bernabé Saulo iyonī Jesús āfe inakōifo ari. Nāskaxō ato yoini iskafakī: "Na Saulo nōko Ifo ōia fāi kakī, nōko Ifāfe yoiaito. Nāskaxō na Saulo Damasco anoxō ato yoisharapakea, 'Jesús Niospa Fakekōi,' ixō ato yoiā ranotamakōi," Bernabé ato fani. ²⁸ Nāskakē Saulo Jerusalén ano ato fe ikax, kafāsapaoni. Nōko Ifo Jesúsnoa ato yoiifōfāsapaoni mesetama. ²⁹ Anoxō ato yoiaito judeofāfe griego meka tāpīkaxō fochishpamanifo. Nāskaxō afesaxoma retēpainifo. ³⁰ Askafaifono a Jesús Ifofaafāfe mā tāpīkaxō Saulo iyonifo Cesarea ano. Nānoxō Tarso ano nīchinifo.

³¹ Nāskakē a Jesús Ifofaafō Judea anoax ita Galilea anoax ita Samāria anoax ita isharakōinifo anā tsōa ato omiskōimanaimano. Anoxō Nios nikasharakōinifo isharakōikaxō Niospa Yōshi Sharapa ato axosharaino. Nāskakē a Nios Ifofaafō ichapakōi inifo.

Pedro Eneas sharafani

³² Nāskakē Pedro kafāsani a Nios Ifofaafō ato ōifofāsafai. A Lida ano ikaxō Nios Ifofaafori ato ōikai kani. ³³ Nānoa feronāfake āfe ane Eneas fichini. Rakatiani mā ocho xinia aka ini. ³⁴ Fichixō Pedro yoini iskafakī: "Eneas, Jesucristo mia sharafaaki fininākafāta mī oxati itipinīfāfe," ixō yoiaino, Eneas koshikōi fininākafani. ³⁵ Nāskakē Lida ano ikafāfe, Sarōn anoafāferi ōikakī nōko Ifo Jesús chanīmara fanifo.

Mā Dorcas naano Jesúsxō Pedro otofani

³⁶ Nāskafifono nā pexe rasi Jope ano kēro Nios Ifofaa ika ini, āfe ane Tabita. Griego mekapa Dorcas famisfo. Nā kēromā isharakōixō ato axosharakōipaoni ato afara ināsharakōikī. ³⁷ Nāato askafai, Dorcas isinī iki nani. Mā nakē chokakaxō fomākīa mēpemainīfōfā pexe kene fetsa ano ratanifo. ³⁸ Akka Jope fe Lida chaima ini. Nā Lida ano Pedro ika ini. Nāno ikē nā Nios Ifofaafāfe tāpīkaxō feronāfake rafe nīchinifo, iskafakī yoitanōfo: "Jope anoxō mia kenafō mī koshi kanō," ixō yoitanōfo.

³⁹ Askafaifono Pedro ato fe kani. Mā nokoano fomākīa mēpemainīfōfānifo a Dorcas raka ano. Anoax a kēro fenemisfo oiakakī Dorcas nayoxoma ato samafaxomis ispanifo. ⁴⁰ Askāifāfe ōikī Pedro ato kāimani. Ato kāimata ratokonō mai chachīpakefōfā Epa Nios kīfini. Nāskata a kēro naa ōiyanā yoini iskafakī: "Tabita, fininākafāfe," faino, nā kēromā Pedro feista nāskax tsaoīnākafāni. ⁴¹ Nāskata Pedro mētsoxō fininīfōfāni. Nāskata a Jesús Ifofaafōya a kēro ifomafafō ato kenani ato ōimaxiki mā Dorcas anā otoano. ⁴² Askaito nikanifo a pexe rasi

Jope anoafāfe. Nāskakē ichapakōichi nōko Ifo chanīmara fakōinifo. ⁴³Mā askafata Pedro Jope pexe rasi ano oxaranāyoni, a Simón anoxō fichi shinā famis ano.

10

Pedro fe Cornelio

¹Nā pexe rasi Cesarea anoa feronāfake āfe ane Cornelio ini. Sorarofāfe āto xanīfo ipaoni. Nā sorarofa, “Italianōra,” ato famisfo. ²Nā feronāfake āfe yorafo fe isharakōixō Epa Nios kīfipaonifo. Nāskatari judeofo ato axosharayanā kori ichapa ato ināpaoni. Nāskaxō Epa Nios mēxotaima kīfipaoni. ³Nāskata pena fetsa yātapake oa namakē ōia fani, Niospa āfe ājiri xafakīakōi ōini akiki oxō iskafaito: “Cornelio,” faito. ⁴Nāskakē Cornelio ājiris ōini. Nāskaxō rateifinakōiyanā yōkani iskafakī: “¿Afaa mī ea yoipaikī kenaimē, Ifo?” faito, ājirinī yoini: “Mī kīfaiato mā Epa Niospa mia nikakōia, a yora afaamaisfo ato axosharayanā mī ato kori ināito.” ⁵Nāskaxō yoini: “Fatora fetsa nīchife Jope pexe rasi ano kaxō Simón ifitanōfo. Āfe ane fetsa Pedro. ⁶Simón fetsa pexe ano oxaki nā Simón iamāfā ketokonō ikaki fichi koiro fai.”

⁷Askafakī yoiax mā ājiri kaino, Cornelio a yonoxomis rafeya āfe soraro fisti kenani nā soraronō kexekōimis ini. Akka nā soraronō Nios shināmis ini. ⁸Nā ājirinī yoia keskara mā ato yoixō Jope ari ato nīchini.

⁹Penama xini keya mā Jope chaima faifoafono, Pedro pexe māmākīa mēpeinīfōfāni arixō Epa Nios kīfikakī. ¹⁰Nāskax fonāikōikī pipaini. Akka pixikakī mā pīchaifono Pedro namakē ōia fani. ¹¹Ōia nai fepekemeaito ōini ariax sabanā keskara petapafā nexeax nai mēranoax nāmā fotopakekafanaito. ¹²Nā sabanā petapafā mēra yoinā fetsa fetsatapafō ōini ronofoya, peyafo, afama mīshti ini. ¹³Nāskata mekaito nikani iskafakī yoiaito: “Pedro, fininākakāfe. Nafō retexō pixiki,” faito nikani.

¹⁴Askafaito nikakī Pedro kemani: “Maa, Ifo, nafa ē pimisma, Moisés noko yoini nafa nō pitiroma,” faito, ¹⁵afianā yoiaito nikani iskafakī: “Niospa nafa shara imaki. Akka nafa chakara fayamafe,” faito nikani.

¹⁶Yoikī tres fata nāskax nā sabanā petapafā anā nai mēra kaito ōini. ¹⁷Nāskakē Pedro shināchakakōiyanā tāpīpaimi. “¿Afaa iskara Niospa ea yoipaimē na namakē ōia keskara ē ōiai?” ixō Pedro shināni. Nāskaino a Cornelio ato nīchia feafokī, pexe fepoti anoxō ato yōkanifo: “¿Fatomē Simón pexe?” ixō ato yōkanifo. ¹⁸Anoxō fāsikōi ato yōkanifo: “¿Fani Simón fetsa oxamē, āfe ane fetsa Pedro?” ixō ato yōkanifo.

¹⁹Oa namakē ōia keskara ōixō Pedro shināpaiyaino, Niospa Yōshi Sharapa yoini iskafakī: “Ōipo, feronāfake trespa mia fenai feafokī. ²⁰Fininākakāfe. Nā mā fotoax ato fe kataxiki tanaimakōi, ē ato nīchia feafokī,” faino, ²¹Pedro fotopakekafāxo a feronāfake tii ato yoini iskafakī: “¿Afaa mā akiyoamē? Ērokonō a mā ea fenai,” Pedro ato fani.

²²Ato askafaino kemanifo: “Nō oa nā sorarofāfe āto xanīfo Cornelio noko nīchiano nā feronāfakefi sharakōiki. Nios nikakōimis. Judeofāfe aōnoa meka shara yoimisfo sharara famisfo, Niospa āfe ājirinī yoia mia kenanō āfe pexe ano mī kanō, nāato mia nikasharai mī yoiaito,” fanifo.

²³Askafaiāfe nikakī Pedro ato ikimani. Nāno afe oxa fistinifo, nāskata Pedro ato fe penama kani. A afe rafeafori Nios Ifofakanax Pedro fe fonifo Jope anoax.

²⁴Mā fokanax pena fetsa Cesarea ano nokonifo, a Cornelio ato manai ano, afe yorafo feta. Āfe yamakōifori ano afe inifo ato kenamana fekanax. ²⁵Mā Pedro pexe ano nokoano, Cornelio āfe pexe anoax kāinākakāfā Pedro ifikai kani. Mā kaxō a nāmā ratokonō mai chachipakefōfā: “Mī fāsi sharakōira,” fani.

²⁶Askafaito ōiki Pedro fininīfōfāni iskafakī yoianā: “Fininākakāfe. Ēri yoraki mia keskara,” fani.

²⁷Nāskax afe mekayanā pexe mēra ikikaikī ōia yora ichapakōifo ichanā inifo. ²⁸Anoxō Pedro yoini: “Mā mā tāpia a nōko xinifāfe noko yoini keskara a judeofoma fe nō rafetiroma. Askatari āto pexe mēra nō ikitiroma. Akka Niospa ea tāpimana ē tosa chakafatama ē ato noisharakōinō. ²⁹Nāskakē ea yoiaifono ē koshi oa, ē okapama. Akka ē tāpipai afeskakī mī ea kenamāki,” faito, ³⁰Cornelio kemani iskafakī: “Mā cuatro nia finōa, a nono xini rakato ēfe pexe anoxō foni teneyanā ē Epa Nios kīfiaino yātapake, feronāfake rapati fafekōiai safeax ekeki nokoita, ³¹ea yoikī iskafaita: ‘Cornelio, mā Niospa nika mī kīfaiato. A mī akai keskarari mā tāpia, a afaamaisfo mī ato afara ināsharaito,’ ea faito ē ōita. ³²‘Nāskaxō feronāfake tres pexe rasi Jope ano nīchife Simón ifitanōfo. Āfe ane fetsa Pedro. A Simón fetsa āfe pexe mēra ikaki. Nā Simón fetsa fichi koiro shinā famiski iamāfā kesemē ikaki,’ ixō ea yoita. ³³Nāskakē feronāfake tres ē koshikōi nīchita mia ififonōfo. Akka mī nokoki osharakōiyanā mī noko inimamasharakōia. Nāskakē keyokōi mā nō ichanā Niospa noko ōiaino. Akka nō nikapai a nōko Ifāfe mia yoia keskara mī noko yoinō,” ixō Cornelio yoini.

Pedro ato yoini Cornelio pexe anoxō

³⁴ Askafaito nikakī Pedro yoini iskafakī: “Chanīma mē tāpikōia Niospa noko yora fetsa keskara ōima, keyokōi nā yora fisti keskara noko ōi. ³⁵ Askakimaroko nā mani fetsafāferi Nios nikakōikakī, afarafo sharakōi fakanax, Epa Niospa fake itirofo. ³⁶ Niospa israelifāfe fenafo meka sharaōnoa ato yoini, inimasharakōinōfo. Jesucristoōxō ato yoini, nā noko Ifoōxō. ³⁷ Mā mā nikamiski a Judea mai anoax ini keskara. Taefakī Galilea anoxō ato yoikī taefani: ‘Māto chaka xatekāfe Nios chanīmara fakāfe ē mato maotisafapanō,’ ixō Juan ato yoini. ³⁸ Akka mā mā tāpia Niospa āfe kerex sharafoya āfe Yōshi Shara Jesūs mēra naneni. Jesūs afama mīshtifo fapaoni, ato sharafayanā a omiskōiaifo, niafaka chakata ato omiskōimanaino. Nāskakē afama mīshtifo fatiro Niosmāi afe ikano. ³⁹ Akka nō ōiyamea Jesūs afama mīshtifo faito judeofāfe āto mai anoxō ata Jerusalén anoxori akaito nō ōiyamea. Nāskafafaito reteyameafo ifi cruz ikakī mastakaxō. ⁴⁰ Akka mā retefitafono Epa Niospa tres nia oxata otofayamea. Nāskakē nokoki nokoaito nō ōiyamea. ⁴¹ Akka atiri yorafoki nokoyamea, nokoki nokoaito nō ōiyamea. Afetiāmamāi Niospa noko katonixakī chanīmakōi nō mato yoi. Nō a feta piyanā nō afeta ayayamea mā Niospa otofayameano. ⁴² Nāato noko nīchiyamea pexe rasi anoafō nō ato yoinō iskafakī: ‘Niospa Jesūs nīchini,’ ato yoinō fatofomākī afe nīpanakafō mā nafianixakakī, askatari a niafori ato yoixii. ⁴³ A Niosnoa yoisfāfe a nā Jesūs iskanōpokoai yoikī aōnoa yoionifo. Iskafakakī yoinifo: ‘Nā chanīmara faifono aōxō Epa Niospa ato chaka soaxotiro,’ ixō yoinifo,” Pedro ato fani.

Nā judeofomafāfe Niospa Yōshi Shara finifo

⁴⁴ Pedro ato yoikī xateamano Niospa Yōshi Shara ato mēra naneni āfe meka shara nikaifono. ⁴⁵ Nāskakē a judeofāfe Jesūs Ifofamisfāfe Pedro fe foitaxakakī ato ōinifo. Ato iskafanifo: “Aira. Ōikapo. Na nōko kaifomafo Niospa Yōshi Shara ato mēra naneakekafana,” ikax yoinānifo. ⁴⁶ Anoxō ato nikanifo meka fetsapa mekaifāfe iskakani a ato kaifomafo: “Nios fāsi sharakōi,” ikanax mekaifāfe ato nikanifo judeofāfe. ⁴⁷ Askaifāfe Pedro ato yoini: “Akka tsōa na yorāfo ato maotiano fayamakāfe noko fatirofoma. Akka Niospa Yōshi Shara mā ato mēra nanea, nōmēra naneni keskaī.”

⁴⁸ Pedro ato yoini Jesucristo aneōxō ato maotiano fanōfo. Mā ato maotiano faafono, Pedro nīchikapanifo. “Kayamafe, nono nofe iyoxiki,” fanifo.

11

Pedro a Nios Ifofafo Jerusalén anoafō ato yoini

¹ Nā Cesarea anoafāfe Jesūs Ifofanifo judeofo yamafikaxō. Afāfe Jesūs Ifofaifāfe ato nikanifo a Jesūsxō tāpimiskōifāfe. A Nios Ifofamisfo fetsafāferi nikanifo. Atiixō ato nikanifo āto mai Judea anoxō. ² Askata Pedro Cesarea anoax kani Jerusalén ano. Anoxō a Jesūs Ifofamis fetsafāfe Pedro mekafanifo a Moisés keneni tāpiafāfe: “Judeofoma fe mī rafeira,” ikaxō. ³ Iskafanifo: “¿Afeskai a nōko kaifoma ano mī kaitamē? Anoxō ato fe rafexō mī ato feta piaito nō nikaita a Moisés yoini keskafakī nō ato feta pitiroma,” fanifo.

⁴ Askafāifāfe nikakī Pedro ato yoini a namakē ōiafaita keskara, ⁵ iskafakī: “Ē pexe rasi Jope anoxō ē Nios kīfiyanā oa namakē ōia keskara ē ōita. Ē ōita oa sabanā keskara nexeax nai mēranoax fotopakekafananaito a ē nia ano. ⁶ Askaito ē ōia a mēra yoinā fetsa fetsatapafo ikita askatari a xōchixaraifoya peyafori ē ōita a mēra kechokomekē. ⁷ Askata mekaito ē nikaita ea yoikī iskafaito: ‘Pedro, fininākakāfe. Na fetsa retexō pixiki,’ ea feita. ⁸ Ea askafaito nikakī ē kemakī iskafaita: ‘Maa, Ifo. Moisés yoikī keneni keskafakī, nāfo nō pitiroma. Nāskakē na yoināfo ē pimisma,’ ē feita. ⁹ Ē askafaito afianā nai mēraxō iskafakī ea yoiāto ē nikaita: ‘Niospa yoia nāfo mī pitiroki. Pife, sharaki, chakafakīma,’ ea feito ē nikaita. ¹⁰ Ea yoikī tres fata, afianā nai mēra kaito ē ōita. ¹¹ Askaino Cesarea anoax feronāfake tres ekeki feitafo. Ato nīchiafono ea fenai fevani. Mā fevanax pexe ano nokoitafo a ē ika ano. ¹² Nāskakē Niospa Yōshi Sharapa ea nīchita iskafakī ea yoianā: ‘Shināchakakīma ato fe katāfe,’ ea feita. Nāskatari a Nios Ifofafo seis feronāfake efo feitafo. Nāskakē ato fe yora yamafix Cornelio pexe mēra nō ikitoshita. ¹³ Nānoxō noko Cornelio yoita a āfe pexe anoxō ājiri ōitaxakī iskafakī yoiaito: ‘Fatora fetsa pexe rasi Jope ano nīchife Simón ifitanōfo, āfe ane fetsa Pedro. ¹⁴ Nāato mia yoi kiki afeskax Nios fe mī ipaxatiromākī, mefe yorāfo fe,’ ixō Niospa yoitano Cornelio ea yoita,” Pedro ato fani. ¹⁵ “Ē ato yoiaino Niospa Yōshi Shara ato mēra naneita, taeyoi nō mēra naneni keskaī. ¹⁶ Nāskakē ē shināfaita a nōko Ifāfe noko yoiyamea anori chanīma. ‘Juan ato fāka maotisafani, akka Niospa āfe Yōshi Shara mato mēra nanei,’ ixō Jesūs noko yoiyamea. ¹⁷ Epa Niospa āfe Yōshi Shara ato mēra naneita a nōmēra naneni keskafakī, nōko Ifo Jesucristo nō chanīmara faito. Akka ē, ‘Mī Yōshi Shara ato mēra naneyamafe,’ ē Nios fatiroma,” ixō Pedro ato yoini.

¹⁸ Ato askafaito nikakani a Nios Ifofamisfo Jerusalén anoax anā tsoa tooxinima, Nioskiroko inimanifo. Iskafakī yoinifo: “Aicho, Nios fāsi sharakōi, nā noko ināni keskafakī, āfe Yōshi Shara ato mēra nanea, a nikakōisharakanax afe Īpaxanōfo,” ixō yoinifo.

Antioquia anoafāfe Jesús Ifofanifo

¹⁹ Mā Esteban reteitafono a Jesús Ifofamisfo ato omiskōimakī taefanifo. Ato askafaifono ranāri Fenicia ari ichonifo, ranāri Chipre ari fonifo, ranāri Antioquia ari fonifo. Nārixō judeofo Jesúsnoa meka shara ato yoinifo. Yora fetsafo ato yoinifoma, judeofofo ato yoinifo. ²⁰ Ato askafaifono a Nios Ifofamisfo Chipre anoax fekāta Cirene anoaxri fenifo pexe rasi Antioquia ano. Mā fēkaxō a judeofoma nōko Ifo Jesúsnoa meka shara ato yoinifo. ²¹ Nōko Ifāfe āfe Yōshi Shara ato fe ikano, a āto xinifāfe ato yoipaonifo shināmamakāta nōko Ifo chanīmara fakōinifo.

²² Askaifono a Jesús Ifofamisfāfe Jerusalén anoaxō ato nikanifo. Nāskakē Bernabé Antioquia ano nīchinifo. ²³ Mā Bernabé nokoxō ōia Niospa ato imasharakōia ōitoshini. Askaifāfe ōikī Bernabé inimasharakōini. Nāskaxō ato yoisharakōini shināsharakōixō. “Isharakōixō nōko Ifo nikasharakōikāfe,” ato fani. ²⁴ Akka Bernabé feronāfake sharakōi ini. Niospa Yōshi Shara āfe ōiti mēra nanea, Jesús chanīmara fakōina. Nāskakē yorafāfe aōxō nōko Ifo Jesús chanīmara fakōinifo.

²⁵ Mā askata Bernabé Tarso ano kani Saulo fenaikai. Mā fichixō Antioquia ano iyoni. ²⁶ Nārixō a Nios Ifofaafō feta xinia fisti ani, yora ichapafo ato tāpimayanā. Antioquia anoaxō tafakī ato anenifo a Jesús Ifofaafō. “Cristianōra,” ato fanifo.

²⁷ Askaifono a Niospa ato shināmanaino Niosnoa ato yoipaonifo nāfo Jerusalén anoax Antioquia ano fonifo. ²⁸ Mā fokaxō fishtichi niinākakāfāxō ato yoini āfe ane Agabo, Niospa Yōshi Sharapa shināmanaino, “Nā maitio anoax fonāiki finakōixikanira,” ixō ato yoini. Akka chanīma, askakōini Claudio xanīfo ikano. ²⁹ Nāskakē a Nios Ifofaafāfe Antioquia anoaxō shinīnifo a Nios Ifofaa fetsafo Judea anoafō ato kori manamaxikakī, afe tii ato fomakanimākai. ³⁰ Nāskakaxō Bernabé yafi Saulo inānifo ato foxotanōfo. Nāno a Jesús Ifofamisfo Judea ano xanīfofo ikafo inifo. Nāfo ato kori inānifo ato paxkaksaxonōfo.

12

Santiago retekāta Pedro karaxa mēra ikimanifo

¹ Nāskaino Herodes xanīfāfe a Jesús Ifofamisfo atiri ato achixō karaxa mēra ato ikimani ato omiskōimayanā. ² Nāskata Herodes ato yoini Santiago retenōfo kenopa. Nā Santiago Juan fe nanea ini. ³ Mā Herodes Santiago ato retemanano ōikani judeofo akiki inimanifo. Askafaiāfe ōikī Herodes āfe inafō yoini Pedrori achinōfo. Nāato askafanifo fistatīa pāa faraxaxoma piyanā. ⁴ Mā Pedro achiafono Herodes Pedro karaxa mēra ikimani. Nānoxō diceiseis sorarofāfe kexenifo. Herodes shināni: “Mā fista senēano chipo ē Pedro kāimanō yorafāfe ōinōfo,” ixō shināni. ⁵ Nāskakē Pedro karaxa mēra ini, sorarofāfe kexekōiafono. Askafafiaifono a Jesús Ifofamisfāfe Epa Nios Kīfixonifo Niospa kexesharakōinō.

Niospa Pedro kāimani karaxa mēraanoa

⁶ Nā fakish fistichi Herodes shināni: “Ē penama Pedro kāimanikai yorafāfe ōinōfo,” ixō, akka karaxa mēraanoax Pedro oxani soraro rafe fe cadenānā takai rafe metexkere ikax. Nāskaino atiri sorarofāfe karaxa fepoti anoaxō kexeshinifo. ⁷ Nāskaino nōko Ifāfe āfe ājiri akiki nokorisatani. Karaxa mēra fakishfiapx penasharakōi ĩtani. Nāskaxō ājirinī Pedro mōini ramāyanā iskafakī yoini: “Fininākakāfe kataxiki,” faino koshikōi Pedro mifi inoax cadenās mepekemetani. ⁸ Nāskafata ājirinī yoini iskafakī: “Mī rapati yafi mī sapato safee,” faito nikakī Pedro koshi āfe rapati yafi āfe sapato safeni. Nāskaxō ājirinī anā yoini: “Mī tariri safee efe kaxiki,” fani.

⁹ Nāskafaino Pedro ājiri acho kani. Acho kakī shināpaini: “ĴChanīmamē mā ea ājirinī kāimanamē? Akka ē namakē ōiafai keskara ē ōi,” ixō shināpaini. ¹⁰ Nāskax ājiri fe kakī a soraro kexei taea finōfaini. A fetsari kexea finōfaini. Nāskax nā fepoti firo ano nokoxō ōia, mā fepoti āakōi fepekemea ini. Nāskax ājiri fe mā tsekeano fāi kaax ājiri a makinoax yamarisatani.

¹¹ Nāskafaito ōikī Pedro tāpini. Nāskaxō shināni iskafakī: “Chanīma, mē ōi ēfe Ifāfe āfe ājiri nīchia. Herodes feta judeofāfe ea retepaiaifono ea kāimana,” ixō shināni.

¹² Mā tāpiax Pedro María pexe ano kani, Juan āfe afa ano. Nā Juan āfe ane fetsa Marcos ipaoni. Nā Maria pexe anoaxō yora ichapafāfe ichanākaxō Epa Nios Kīfiaifono Pedro kani. ¹³ Mā kaxō pexe fepoti anoaxō ato kenaino, nā xomayato María yonoxomis āfe ane Rode, nāato kaxō ōini tsoamāki. ¹⁴ Mā Pedro āfe meka tāpikāta, inimakōiyanā pexe fepoti fēpexotama ato yoikai ichoni. “Mā Pedro oa. Na pexe fepoti ano nia,” ato fani. ¹⁵ Ato askafaito tsoa chanīmara fanima. Iskafanifo: “Mī chanī, Pedrokai oama,” faifono, “Maa,

mē Pedro āfe meka nikakōia,” ato fani. Ato askafaino iskafakī yoinifo: “Aamaki, āfe ājiriki,” fanifo.

¹⁶ Askafafono Pedro pexe fepoti anoxō mēxotaima ato kenani. Mā fēkaxō fepoti fepekaxō Pedro fichikanax ratenifo. ¹⁷ Askaifāfe ōikī Pedro āfe mēkemā mekayamakāfe ato fani. Nāskaxō ato yoini afeskaxō nōko Ifāfe karaxa mēranoa kāimanamākī. Nāskata anā ato yoini iskafakī: “Santiago yafi a Nios Ifofamisfo ato yoitakāfe,” ato fani. Ato askafakī yoita pexe fetsa ari kani.

¹⁸ Akka mā penano ano Pedro ōikanima sorarofō yoinānifo, tāpikanamax Pedro afeskamē ikanax. ¹⁹ Mā kāikaina nikaxō, Herodes ato fenamani, “Akka mā fenafikākī fichiyamaifono mā kexesharamaki,” ixō Herodes, “Nā sorarofō retēkāfe,” ato fani. Ato askafata Herodes Judea anoax kani Cesarea ari ikikai.

Herodes nani

²⁰ Herodes atoki ōitifishkini Tiro pexe rasi anoafō yafi Sidōn pexe rasi anoafoki. Atoki ōitifishkikaino Tiro anoafō feta Sidōn anoafāfe shinānifo Herodes yōkaifoxikakī anā atoki ōitifishkiyamanō. Nāskaxō xanīfo Blastō yoinifo: “Noko Herodes yoixōfe nō afe meka-paikai. Nokoki ōitifishkiki kiki, nō afe rafepaisharaiakai anā nokoki ōitifishkiyamanō. Nokoki ōitifishkiki afe yorafo yoitirokī a nō paii noko inānōfoma,” ixō Tiro anoafō feta Sidōn anoafāfe Blastō yoiaino. Nā yoiaino keskafakī Blastō Herodes yoini. ²¹ Askafaito nikakī, “Pena fetsa ē ato fe mekanō,” fani. Nāskata pena fetsa mā akiki feaifono, rapati sharakōi nā xanīfāfe safemis keskara safeax tsaoti sharakōi ano tsaoni, anoxō ato yoixiki. ²² Ato yoikī askafaino fāsikōi yorafo mekainīfōfānifo. Iskafakī yoinifo: “Na mekai yora mekaima, nios mekai,” fanifo. ²³ Askafafono nōko Ifāfe āfe ājirinī Herodes isinī imani, “Ē Niosma. Nios sharakōi,” ato faimano. Nāskax Herodes nani xenafāfe xaki mēraxō piaino.

²⁴ Askano Niospa meka shara Jesūsnoa ato yoifōfāsafaino akairi Niospa meka shara nikakaxō chanīmara fanōfo. ²⁵ Nāskafafono Bernabē feta Saulo mā yonokī mitokanax Jerusalén anoax fonifo, Antioquia ano. Juanri ato fe kani, āfe ane fetsa Marcos ini.

13

Bernabē feta Saulo Niospa meka ato yoikī taefanifo

¹ Antioquia ano Jesús Ifofamisfo inifo, a Niosnoa ato yoipaonifori ano ato fe inifo. A Jesús Ifofaax afeskax isharatirofomākī ixō ato tāpimamisfōri ano ato fe inifo. Bernabē ikaino, Sidōn āfe ane fetsa Nā Fisora fapaonifo ikaino, Lucio a Cirene ano ikaino, Manaén xanīfo Herodes fe yosini ikaino, nā Saulori ato fe ini. ² Akka pena fetsa foni teneyanā nōko Ifo kifiaifono Epa Niospa Yōshi Sharapa ato yoini iskafakī: “Bernabē yafi Saulo ato paxkanāfakāfe ē ato katoaki eōxō yononōfo,” ato fani.

³ Nāskata foni teneyanā mā Epa Nios kifīkaxō Bernabē yafi Saulo ato mīfi māmākaxō Epa Nios ato kifīxoyanā, ato nīchinifo fetsafo ari fokaxō Epa Niospa meka shara ato yoitanōfo.

Bernabē fe Saulo Chipre ano fonifo

⁴ Mā Niospa Yōshi Sharapa ato nīchia fokanax Bernabē fe Saulo Seleucia ano fonifo. Nānoax kanōanāfānē nanefainifo Chipre ano fokani. Nā ĩamāfā fakafā nakirafe mai toomāfā ano fokani. ⁵ Mā fokanax pexe rasi Salamina ano nokokaxō judeofāfe āto ichanāti pexe mēraxō Niospa meka sharaōnoa ato yoikī taefanifo. Juanri ato fe kani afara fetsa ato axoxii.

⁶ Nā ĩamāfā nakirafe mai toomāfā ano ato yoikāta, Pafos ano fonifo. Nānoa judeo yōfe fichinifo āfe ane Barjesús. Nā chanīkōi ipaoni ē Niosxō yoirā iki. ⁷ Nā yōfe Barjesús xanīfo Sergio Paulo fe ipaoni. Nā xanīfāfe tāpisharakōia ini. Nāskaxō Bernabē yafi Saulo kenamani, Niospa meka shara nikapaikōiki. ⁸ Akka nā yōfemā āfe ane fetsa griego mekapa Elimas fapaonifo. Nāato āfe xanīfo yoini: “Ato nikayamafe mia pārakani kiki,” fani, ea nikanōra ixō. ⁹ Nāskakē Saulo āfe ane fetsa Pablo ini. Niospa Yōshi Shara a mēra nanekōia. Nāato aas ōini. ¹⁰ Nāskaxō yoini iskafakī: “Chanīchakapa nīafaka fake, nā sharafō mī noikaspamis. Mī chanīmis ato pārapaiyanā nōko Ifāfe mēstekōi ato yoifimisno, akka anorima mī ato yoisim. Āfeskai mī xateimamē?” ¹¹ Akka iskaratia nōko Ifāfe mia omiskōimani. Mī anā fēro ōima, xinī chaxafiaino mī anā fena ōiyonakama,” fani.

Askafaino Elimas anā fēro ōinima. Fakish mēra nia keskara ini. Askaxō ato kenani mētsoxō iyoifonōfo anā fēro ōiyamaito. ¹² Nāskaito ōikī xanīfāfe nōko Ifo chanīmara fani. “Aira, Jesús afama mīshti fatiro,” ixō yoinifo.

Pablo fe Bernabē Antioquia ano inifo. Nā Antioquia Pisidia mai ano ini

¹³ Pablo afe rafeafo fe Pafos anoax kanōanāfānē nanefainifo pexe rasi Perge ano fokani. Nā Perge Panfilia mai ano ini. Nānoax Juan anā ato fe kanima. Nāno nēteax anā oni, Jerusalén ano. ¹⁴ Nā Perge anoxō Antioquia finōfainifo, Antioquia anoxō shinā Pisidia chaima ini. Nāriax pena tenetiā ichanāti pexe mēra ikifaikanax tsaonifo. ¹⁵ A Moisés

Niospa meka yoikī kirikaki keneni yafi a Niospa ato shināmanaino yoipaonifo keskara anekāta, a ichanāti pexe kexemisfo xanīfofāfe Pablo yafi Bernabé ato yoini iskafakāki: “Nōko kaifo rafeta mā noko afara yoipaimākai noko yoikāfe, noko inimamaxikakī,” ixō ato yoinifo.

¹⁶ Ato askafaifono Pablo niinākfā atokiri mēshainākfā mekayamakāfe ato fani. Nāskaxō ato yoini iskafakāki: “Ea nikakāfe ēfe kaifo israelifāfe yora fetsafo feta mā nofeta Epa Nios kifipaimākai ē mato yoisharanō. ¹⁷ Israelifāfe āto Niospa taefakī nōko xinifo katonī afe yora inōfo. Nāskakē Egipto anoax kainifo yora fetsafo mēra iyokanax Ejipto mai anoax. Nāskakē chipo Epa Niospa āfe kexer sharaōxō Ejipto anoax ato yoini. ¹⁸ Nāskakē Niospa meka tsōa nikasharayamafiaifono, Niospa ato kexepaoni cuarenta xinia tsōa istoma anoxō. ¹⁹ Nāskata Niospa Canaán mai anoxō siete faxō mani fetsafo ato potani, nōko xinifo a mai ato ināxiki. ²⁰ Nāskakē cuatrocientos cincuenta xinia ayonifo. Fena Canaán mai ano fonifoma. Mā cuatrocientos cincuenta xinia finōta xanīfoya inōfo Niospa ato yoini.

“Nāskatari chipo nā Niospa meka ato yoisirī Samuel xanīfo ini. ²¹ Nāskakē, ‘Xanīfo finakōia nō fichipai noko ikinō,’ ixō yoinifo. Nāskakē Niospa Saúl cuarenta xinia imani xanīfoki. Akka nā Saúl āfe apa Cis ini, Benjamín āfe kaifo. ²² Nāskata Epa Niospa Saúl tsekani anā xanīfo iyamanō. Akka Epa Niospa David xanīfo inō imani. Nāskaxō yoini iskafakāki: ‘Isaī āfe fāke David mā ea inimamakōi nā ē apaiyai keskafaki nāto akōini,’ ixō yoini. ²³ Nā David āfe fena ini Jesús. Epa Niospa nai mēraxō nāmā nīchini israelifo ato ifipakexanō nā yoiyoni keskafakī. ²⁴ Askatari Jesús oyoamano israelifo Juan Jesúsnoa meka shara ato yoini iskafakāki: ‘Māto chaka xatexō Nios Ifofakāfe maotisaxakakī fetsafāfe tāpinifō mā mātō chaka mā xateano,’ ixō ato yoini. ²⁵ Askata mā Juan chaima nakī, ato yoini: ‘¿Mā shināimē ē Cristokē? Maa, ēkai aama. Akka a Cristo samama oi a nō manai nōko xanīfo ikiyoi. Akai ea keskarama. Ato afama mīshti tāpia. Atokai afaa chakafamisma,’ ixō ato yoini.

²⁶ “Ēfe kaifo mīshtichi, māfi Abraham fenafokī, ea nikakapo a ēfe kaifomafō feta ē mato yoinō. Māfi Epa Nios chanīmara fapaikai. Nā meka sharaōnoa nikakāfe Epa Niospa āfe Fake nīchiniki noko ifipakexanō. ²⁷ Nā Jerusalén ano ikafāfe āto xanīfofō feta tāpinifoma Jesús tsoamāki. A inōpokoi yoikī aōnoa kirika kenenifori tsōa tāpiyameama, pena tenetiāta ichanāti pexe mēraxō anefikakī. Nāskakaxō reteyameafō nā aōnoa yoikī kenenifo keskakōifakī. ²⁸ Afaa chakafaito ōiyamafikakī retapaikakī. ‘Ato retemafe,’ yorafāfe Pilato fanifo. ²⁹ Nāskakē nā aōnoa yoikī kirika kenenifo keskakōifakī, mā askafayameafō retexaxō ifi cruz ikakinoa fotomapekofākakaxō mafa kini mēra maifanifo. ³⁰ Akka mā mafa kini mēra maifafafono Epa Niospa otofayamea. ³¹ Mā oxa ranāta a Galilea anoax Jerusalén ano afe foitafāfe atoki nokoaito ōiyameafō. Nāfāfe judeofō Jesúsnoa ato yoikani.

³²⁻³³ “Nāskakē na meka shara aōnoa nō mato yoi, Epa Niospa nōko xinifo yoini keskafakī. Mā noko askafaxokōia nō āto fenafokē. Nāskakē Epa Niospa mā retefitafono Jesús otoyamea. A kirika Salmo ano kenea iskai:

Mī ēfe Fake. Iskaratīa ē mia nima,

ixō kenenifo. ³⁴ Niospa afetiāma yoiyoni iskafakāki:

Mī nafiano ē mia otofaxii mī yora pisiyamanō,

ixō yoinino, nānorikōi aōnoa kirika kenenifo:

Chanīma, nā ē David yoini keskafakī ē mia sharafai,

ixō Niospa yoini. ³⁵ Nāskakē ana aōnoa yoikī yōra keneni iskafakāki:

Epa Niosi, mī Fake mī kexesharai āfe yora pisinōma,

ixō keneni. ³⁶ Chanīma, David nayoxoma ato ikiyopaoni, Niospa yoiaino. Nāskax chipo nani āfe xinifo nāpa keskai, nā āfe xinifo mai anorī David maifanifo. Anoax āfe yora pisini.

³⁷ Akka Jesús mā nafiakē Epa Niospa otoani. Ato āfe yora pisinima. ³⁸⁻³⁹ Efe yora mīshtichi, mā nō mato yoisirī māri tāpisharakāfe, māto chaka mā soapaimākai Jesúsxō mā atiro. Mā chanīmara faito aōxō Epa Niospa mato chaka soaxotiro. Akka a Moisés noko yoinioxōkai nōko chaka nō soatiro. ⁴⁰ Kexemesharakāfe a inōpokoi yoikī Niospa meka yoisirīfāfe kenenifo keskai mā askatiroki. Iskafakī yoinifo:

⁴¹ Akka ē yoiaito mā ea nikakapai, ekeki kaxemetsamayanā. Nāskakē ē afarafō akaito ōiax rateyanā mā nai iskarafō nō ōimisma ikax. Nāskakē mā chanīmara famisma, fetsafāfe mato yoifafafono,

ixō kenenifo,” ixō Pablo ato yoini.

⁴² Mā Pablo afe rafeafō fe judeofāfe āto ichanāti pexe mēranoax tsekafainafono, nā judeofofāfema ato iskafanifo: “Mā noko yoia keskafakī pena teneti fetsatīa noko anā yoifaixakāfe,” ixō ato yoinifo. ⁴³ Mā ichanāti pexe anoax ichanāi xateafono, judeofō feta yora fetsafāfe a Epa Nios Ifofaafō keskafakī akairi Epa Nios Ifofapaikani ato fe fonifo, Pablo fe Bernabé foaifono. ato fe foaifono ato iskafanifo: “Nofe yora mīshtichi, Niospa mato yoiāi anorī tāpisharakāfe. Niospa mato afara sharafaxōfai keskara shinākāfe inimayanā,” ato fanifo.

⁴⁴ Nāskata afianā pena fetsa pena tenetitīa, pexe rasi anoax yora ichapakōifo ichanānifo nōko Ifāfe āfe meka shara nikakani. ⁴⁵ Nāskaifono judeofāfe ato ōnifo yōrafā rasichi Pablo yafi Bernabé ato nikaifono. Nāskakē ōitifishkikōinifo. Nāskaifono judeofo Pabloki ōitifishkiyanā mekafakī chakafayanā Ichanifo. ⁴⁶ Ato askafaifono Pablo feta Bernabé mese-tama ato kemanifo ato iskafakakī: “Nō mato Niospa meka sharaōnoa yoikī taefafiaino, mā nikakaspamis. Nikakaspaxkai mā Epa Nios fe ipanakama. Nāskakē nā judeofoma nō ato yoikai. ⁴⁷ Nāskakē nōko Ifāfe noko nīchini iskafakī yoiyanā:

Ē mato nīchi oa luzpa keyokōi chaxa keskara faxō, eōnoa mā ato yoifotanō, efe ĩpaxanōfo.

Maifo tū anoa na chai ikafo ari kaxō mā ato yoitānō,”
ixō noko nīchini.

⁴⁸ Ato askafaifono nikakani, a judeofoma inimakōinifo. Nāskaxō yoinifo iskafakakī: “Nōko Ifāfe āfe meka sharakōi;” fanifo. Nāfāfe chanīmara fakōinifo a Niospa ato katoafo afe ipanakafora ikaxō. ⁴⁹ Nāskakē nā mai anoafo, nōko Ifāfe āfe meka sharaōnoa ato yoifofāsafanifo. ⁵⁰ Ato askafaifono judeofo nā kērofo isharakōimisfo fe mekanifo, a pexe rasi anoa xanīfofo feri inifo. Nāskakaxō ato yoinifo Pablo yafi Bernabé ato chakafakī ato omiskōimata a mai anoxō ato potanōfo. ⁵¹ Ato askafaifono Pablo feta Bernabé āto sapato tsekakaxō taatakanifo yorafāfe ato tāpinōfo. Nāskanax Pablo fe Bernabé Iconio ari fonifo. ⁵² Akka nā Nios Ifofafo inimakōinifo, Epa Niospa Yōshi Shara ato fe ikano, mā Pablo fe Bernabé foaifono.

14

Pablo fe Bernabé Iconio ano inifo

¹ Mā fokanax Pablo fe Bernabé Iconio ano nokonifo. Nānoax judeofāfe ichanāti pexe mēra ikifainifo. Nānoxō Niospa meka sharaōnoa ato yoiaifono ato nikakōisharayanā ato chanīmara fanifo, judeofāfe yora fetsafo feta. ² Askaifono judeofāfe ato nikakaspakakī, a judeofoma ato yoinifo iskafakakī: “Ato nikayamakāfe āa chanīkani kiki;” ato fanifo Pablo yafi Bernabé nikanōfoma. ³ Ato askafafiaino Pablo fe Bernabé nāno ato fe iyopaonifo. Nānoxō nōko Ifoōxō mesetamakōi ato yoipaonifo. “Nōko Ifāfe noko chaka soaxotiro Nios fe nō ĩpaxanō,” ixō ato yoinifo. Nāskaxō afama mīstiffo fakakī ato ispanifo. Askafaifono Niospa ato noikī ato ōimani aōxō ato yoinōfo. ⁴ Akka yorafāfe pexe rasi Iconio anoxō anoris shinānifoma. Ranārito judeofo chanīmara faifono, ranāritori Pablo yafi Bernabé chanīmara fanifo.

⁵ Nāskaifono judeofo yora fetsafo fe xanīfofo fe yoinānifo, Pablo yafi Bernabé ato tokirinī tsakakī omiskōimaxikakī. ⁶⁻⁷ Ato askafapaiyafono Pablo feta Bernabé mā tāpikanax Iconio anoax Lистра ano fonifo, nānoax Derbe ano fonifo. Nā pexe rasi Lистра fe Derbe Licaonia mai ano ini. Nāskakē nānoafo Niospa meka sharaōnoa ato yoifofāsafanifo.

Listra anoxō tokirinī Pablo tsakaketsanifo

⁸ Lистра ano feronāfake finimisma ika ini, kafāsamisma chatomāiax. Nāskarapa kāini tsaoo ini. ⁹ Pablo yoiaito nikai. Nāskaito Pablo aas ōikī shināni na feronāfake Jesús sharafatiro-raka chanīmara faito ixō shināni. ¹⁰ Nāskaxō fāsikōi yoini iskafakī: “Fininākakāfe,” faino, koshikōi fininākakānax kafāsani. ¹¹ Pablo askafaito ōikani, yorafo Licaonia mekapa mekanifo iskakani: “Aicho, na nios rafe nokoki fotoaki yora keskarakanax,” ikanax yoinānifo.

¹² Nāskakaxō Bernabé na nōko nios Zeus fakaxō, Pablori ato yoiaito, “Na nōko nioskōi Hermes,” fanifo. ¹³ Zeus kīfiti pexeya ini pexe rasi chaima, pexe efapa ini. Nā mēraxō na nōko niosra ikaxō Nioskōima kīfipaonifo. Nā pexe mēra yonomisto Pablo yafi Bernabé shināmaxō fakkafoya charofo fexonifo. Nāfāfe yorafo feta mā niosra ixō ato fakka retexopainifo ato ināxikakī.

¹⁴ Akka ato askafaifono Bernabé feta Pablo mā tāpikaxō, āto rapati faxtenifo, ato niosra faifono āto ōiti mēraxō shinākōikaki. Nāskakaxō ato mēra ikifaikata fāsikōi ato yoinifo ¹⁵ iskafakakī: “¿Afeskafakī mā noko na rafe niosra mā noko faimē? Nōkai niosma. Nōri mato keskara, nō mato meka shara yoiyoi oa na afarafo nōko niosra mā famis a chakafo mā potanō a chakafokai afama. Nāskaxō nā Nioskōi nīpanaka Ifokōi fakāfe, nai yafi mai fakafāri onifaniki. Nai mēranoafo onifata, nono mai anoafo onifata fakafāri mēranoafo onifani. ¹⁶ Nā iyopaonifāfe afara chakafakī xateafomano Epa Niospa ato xatemanima āa anōfo. ¹⁷ Nāskafiaifono Niosxō afarafo sharafakakī ato ōimanifo, tāpinōfo Nios tsoamāki. Akka nāato mato oi imaxona, māto fanāfori mato fofaimasharaxona, a mā piari mato ināsharataifa, mā inimasharakōinō,” Pablo feta Bernabé ato fani.

¹⁸ Ato askafakī yoifikkakī ato xatematroma inifo, ato fakka retexopaiyafono nōko niosra ixō ato ināpaikakī.

¹⁹ Ato askafaifono judeofo Antioquia anoax fekāta Iconio anoax fenifo. Ato pārai fekani, “Pablo feta Bernabé mato pārankani,” ixō ato yoinifo. Ato askafaifono Pablo tokirinī tsakaketsanifo. Mā nō reteaia ikaxō xarafokaxō pexe rasi pasotai potanifo. ²⁰ Askafaifono

a Jesús Ifofaafu a mǎnǎo niakekaxō òiaifono Pablo fininǎkafani. Askata finikaini pexe rasi mēra anǎ kani. Nǎskata nǎnoax pena fetsa Bernabé fe Derbe ano kani.

²¹ Derbe anoxō Niospa meka sharaōnoa ato yoiiaifono yōrafǎ rasichi ato nikakaxō Nios Ifofasharakōinifo. Mǎ ato yoikanax Listra ano fenifo, nǎnoax Iconio ano fenifo, nǎnoax Antioquía ano nokonifo. ²² Nǎriafo a Nios Ifofaafu ato yoifofǎsafakǎ ato inimamakōinifo, “Isharakōikǎfe Nios nikakōisharayanǎ. Epa Nios xanifo fe ipaxakǎ, nai mēra oyoamano nono mai anoax mǎ omiskōi finakōitiro,” ixō ato yoinifo. ²³ Nǎskatari Pablo feta Bernabé a Nios Ifofaafu anoafu a ato kexeaifo xanifofo katonifo, Nios chanīmara fakōinafono. Mǎ foni teneyanǎ Epa Nios kǐfikaxō iskafakǎ: “Epa Niospa, ato kexesharafe mia chanīmara fakani kiki,” ixō yoinifo.

Pablo fe Bernabé anǎ Antioquía ano fenifo nǎ Antioquía Siria mai ano ini

²⁴ Mǎ anoax fokakǎ Pisidia finōfǎikanax Panfilia ano nokonifo. ²⁵ Nǎskakata Perge anoxō Niospa meka sharaōnoa ato yoikata, Atalia ano fonifo. ²⁶ Nǎnoax kanōanǎfǎnē fonifo Antioquía ano anǎ fokani. Nǎ Antioquía anoxō ato nǐchinifo. “Niosnoax fokaxō ato yoisharatakǎfe,” ixō ato nǐchiyameafono ato yoitakani anǎ fenifo. ²⁷ Mǎ Antioquía ano nokoafono a Jesús Ifofamisfo ato fe ichanǎfono anoxō ato yoinifo a Niospa ato feta afama mǐshti aka keskara. Iskafakǎ ato yoinifo: “Nōko Ifǎfe a judeofoma ato chanīmara famaino mǎ Ifofaafu,” ixō ato yoinifo. ²⁸ Nǎskakanax Pablo fe Bernabé nǎ Nios Ifofaafu fe nǎno ato fe iyopaonifo.

15

Jerusalén anoax a Jesús Ifofaafu ichanǎnifo

¹ Nǎskaifono feronǎfakafu Judea anoax Antioquía ano fonifo. Mǎ nokokaxō a Jesús Ifofamisfo ato yoinifo iskafakǎ: “Moisés noko yoini iskafakǎ: ‘Foshki repa xateyamax nō Nios ano katiroma,’ ixō noko yoini. Nǎskakē nǎ Moisés noko yoini keskai nō askamis,” ixō ato yoinifo. ² Ato askafaifǎfe nikakǎ Pablo feta Bernabé, “Maa, askarakaima. Fanǎrira mǎ yoi,” ato fakanax ato fe feratenǎnifo. Ato askafaifono Pablo yafi Bernabé a Jesús Ifofamisfo fetsafori ato katokaxō Jerusalén ari ato nǐchinifo a Jesúsxō ǎfe meka ato yoisfoya a Nios Ifofaafu ato kexemisfo ato yōkatanōfo chanīmamakǎ.

³ Nǎ Nios Ifofaafǎfe Antioquía anoxō ato nǐchiafo fokakǎ, Finicia yafi Samǎria finōfǎikakǎ ato yoifainifo: “A judeofofǎfema Nios Ifofakǎ mǎ ǎto chaka xateafora,” ixō ato yoiiaifono nikakani a Nios Ifofaafu inimakōinifo.

⁴ Mǎ Pablo fe Bernabé Jerusalén ano nokoafono, a Jesús Ifofaafu feta a Jesúsxō ǎfe meka yoisfo feta a ato kexemisfofǎferi ato ifnifo, ato iskafayanǎ: “Aicho, mǎ nokoki osharakǎ,” ixō ato yoianǎ. Ato askafaifono anoxō ato yoinifo a Niosxō afama mǐshtifamamisfo. ⁵ Ato askafaifono nikaxō fariseofǎfe Jesús Ifofakaxō ato iskafanifo: “Judeo yamafikaxō Nios Ifofakaxō ǎto foshki repa xatetirofo Moisés yoini keskafakǎ,” ixō ato yoinifo.

⁶ Nǎskaifono a Jesúsxō ǎfe meka ato yoisfo fe ato kexemisfo fe ichanǎnifo tǎpixikakǎ a yoiiafo keskara. ⁷ Mǎ ichapa yoinǎfono Pedro fininǎkafǎ ato yoini iskafakǎ: “Efe yora mǐstichi, mǎ mǎ ea tǎpia afetiama Niospa ea katonǎ, mato mēraoax ǎfe meka shara a judeofoma ē ato yoinō, akairi chanīmara fakanax afe ipaxanōfo. ⁸ Niospa a shinǎifo keskara tǎpikōia. Nǎato ato tǎpimani afe yora inōfo. Nǎskaxō ǎfe Yōshi Shara ato mēra nanei, a nōmēra naneni keskafakǎ. Nǎskakē keyokōichi tǎpitirofo Niospa ato ifiaito. ⁹ Niospa atoya yora fetsa keskara noko òima, nǎ yora fisti keskara noko òi. Nǎ noko ani keskafakǎ ǎto chakari mǎ ato soaxona chanīmara faifono. ¹⁰ Akka mǎto xinifǎfe a Moisés yoini keskara nikakōipaonifoma. Nǎskarifiakǎ mǎri mǎ nikakōimimisa. Akka a Moisés yoini keskara nikakōiyamafikatsaxakǎ, ǎfeskakǎ a judeofoma Jesús Ifofaifafono a Moisés yoini keskara nikakōikǎfe mǎto famismē? Nǎskakē afǎferi nikakōitirofoma. Akka Jesús fisticchi noko nimafitirono, ǎfeskakǎ mǎ chanīmara faimamē? ¹¹ Akka Moisés yoini keskarato noko nimatirora ixō mǎ shinǎmis. Akka nōko Ifo Jesús nō chanīmara faito, noko noikōixō noko ifitiro afe nō ipaxanō. Nǎskarifiakǎ a judeofoma ato ifitiro chanīmara faifono,” ixō Pedro ato yoini.

¹² Nǎskakē anǎ tsoa tooxinima, ato nikakani. Akka Pablo feta Bernabé ato yoinifo a Niospa atoōxō afama mǐshtifo faa, judeofoma mēraxō. ¹³ Mǎ yoikǎ xateafono, Santiagori ato yoini iskafakǎ: “Efe yora mǐstichi, eari nikakapo ē mato yoinō. ¹⁴ Simón Pedro noko yoiyamea Epa Niospa a judeofoma ato noikǎ mǎ ato katoo ǎfe yorafo inōfo ixō noko yoiyamea. ¹⁵ Nǎnorikōi a inōpokoai yoikakǎ a Niosnoa yoisfǎfe kenenifo. Iskafakǎ yoinifo na kirika keneano:

¹⁶ Nǎskata ē anǎ oxii a David ǎfe kaifǎfe ea anǎ shinǎtama chaka shinǎifono, ato chaka soaxoxiki. Ato òiti fepeaxosharayanǎ isharakōinōfo ea anǎ Ifofakanax. ¹⁷ Ea òikakǎ

fetsafāferi ea fenanōfo nā maitio ikafō feta nā ē ato katoafāfe ixō Epa Niospa yoini. ¹⁸ Nōko Ifāfe afetiama afama mīshiti tāpiyoni, ixō aōnoa yoikī kenenifo.

¹⁹ “Nāskakē ē shinākī iskafai, nōko kaifāfema Nios Ifofapayiaifono nō ato afara fetsa kerekakai amatiroma. ²⁰ Askatamaroko nō ato kirika kenexō fomanō iskafaki yoikī:

Na nōko niosra ikaxō afara onifakaxō nami ināfo piyamakāfe. Askatari mātō āfima chotayamakāfe. Kēromāri āto fenemafo chotamayamanōfo. Askatari yoinā yafi afara inafakaxō tetoxakafō āfe imi foyamaito piyamakāfe, āfe imiri ayayamakāfe, ixō nō ato kirika kenexō fomanō judeofoma. ²¹ Nā taeyoi ato yoipaonifo keskakakī, iskarafāri pexefo anoxō a Moisés ato yoipaoni keskakakī ato yoikani. Mēxotaima ichanāti pexe mēraxō pena tenetiā nā kirika anemisfo.”

A judeofoma ato kirika kenexō fomanifo

²² Nāskakata a Jesúsxō ato yoisimifāfe a ato kexemisfāferi a Nios Ifofaafāferi shinānifo a Nios Ifofaa fetsafo katōxikakī, Antioquía ano ato nīchixikakī Pablo fe Bernabé foaifono. Judas yafi Silas ifinifo, nā Judaspa āfe ane fetsa Barsabás ipaoni. Na feronāfake rafe isharakōiafo a Nios Ifofaafāfe ato fapaonifo. ²³ Nāskakaxō mā foaifono ato kirika keneni inānifo ato foxotanōfo, iskafakī ato yoikaxō:

Nōfi Jesúsxō āfe meka yoikatsaxakī, ato kexemisfo feta a Jesús Ifofaafō nō mato kirika kenexō foma, mā tāpinō. Efe yora mīshitichi, mā nōko kaifoyamafekē nō mato meka shara foma, Antioquía ano fomata Siria ano fomata Cilicia ano fomata nō mato fai. ²⁴ Mā nō tāpia yora fetsafo nonoax foitafo nō ato nīchiyamañiano, mā foitaxakakī mato yoikakī āto mekapa mato fekaxtefakani, fanīrira mato yoikakī nō ato anori yoiyamafekē fanīrira mato yoiāifono mā ato tāpipai. ²⁵ Nāskakē ichanāxō nō shinā feronāfake fetsafo katōxiki noko anoax fokaxō mato ōitanōfo. A nō ato noiai Bernabé yafi Pablo nō katoa. ²⁶ Nā Bernabé feta Pablo nōko Ifo Jesucristoōnoa ato yoipaifiaifono ato retepaimisfo ato nikakaspakakī. ²⁷ Nāskakē Judas yafi Silas nō nīchia mā fokaxō mato yoisharakōinōfo nā nō mato kenexona keskakakī. ²⁸ Nā Niospa Yōshi Sharapa shināi keskakakī nānorikōi nō shināi. Afaa fetsa nō mato yoipaima. Akka nā sharafinākōia nō mato yoipai mā nikanō: ²⁹ Na nōko niosra ikaxō afara onifakaxō yoinā retexō ināfo piyamakāfe. Askatari āfe imi ayayamakāfe. Yoinā ina fakaxō tetoxakafō āfe imi foyamaito piyamakāfe. Askatari mātō āfima chotayamakāfe, kērofāferi āto fenema chotamayamanōfo. Akka nā nō mato yoiāi anori mā nikasharakōiax, mā isharakōikai. Nā tii nō mato yoi a kirikakī kenexō, ixō ato yoinifo.

³⁰ Nāskakaxō Jerusalén anoxō ato nīchiafono Antioquía ano fonifo. Mā fokaxō a Nios Ifofaafō ato ichanāfakaxō kirika kenea ato inānifo. ³¹ A Nios Ifofaafāfe kirika anexō ōikani, inimaifinākōinifo, “Aicho, noko kirika kenexō manamakakī noko inimamasharakōikani,” ikanax. ³² Judas yafi Silas Niospa ato shināmanaino Niospa meka tāpikaxō Niosnoa meka shara ato yoikakī ato inimakōiyānā ato nikamasharakōinifo āto mekapa a Nios Ifofaafō. ³³ Nā Antioquía ano ato fe iyopaonifo. Nāno ato fe ikafono nā Nios Ifofaafāfe ato nīchinifo iskafakī ato yoiyanā: “Tanaima fosharatakāfe,” ato faifono, tanaimakōi fosharakōinifo a anoxō ato nīchiameafo ano. ³⁴ Akka Silas anā Jerusalén ano kanima nāno ato fe nēteni. Judas fisti kanī. ³⁵ Akka Pablo fe Bernabéri fonifoma, Antioquía ano nētenifo anoxō fetsafo feta nōko Ifoōnoa meka shara yoixikakī.

Pablo añanā kani Jesúsnoa meka shara pexefo tii ari ato yoikai

³⁶ Mā askakāta Pablo Bernabé yoini iskafakī: “A Nios Ifofaafō nō anā ato ōikanō fokāfe pexe rasi anoafo a nōko Ifoōnoa meka shara nō ato yoikī taefaniano afesakax ikafomākī.” ³⁷ Bernabé Juan iyopaini ato fe kanō, nā Juan āfe ane fetsa Marcos ipaoni. ³⁸ Akka Pablo iyokaspani. Nā Marcosmāi Panfilia anoax ato makinoax nēteyameano, ato feta yonokaspakī. ³⁹ Askai feratenākanax anoax paxkanāfainifo. Bernabé Marcos Chipre ano yoikai kanōanāñānē nanekaini. ⁴⁰ Akka Pablo Silas ifini afe kaxiki, afeta Niospa meka shara ato yoi axiki. Askaito ōikakī a Jesús Ifofamisfāfe ato Nios kīfixonifo fosharakōitanōfo Niospa ato kexesharanō. ⁴¹ Mā fokakī Siria yafi Cilicia anoafo Jesúsnoa meka shara ato yoifōfāsanifo, a Nios Ifofaafāfe Jesúsnoa tāpisharakōinōfo inimasharakōikakī.

16

Timoteo ato fe kani Pablo feta Silaspa Niospa meka sharaōnoa ato yoikai foaifono

¹ Pablo fe Silas pexe rasi Derbe ano nokonifo, nānoax Listra ano fonifo. Nānoa Nios Ifofaa fetsa āfe ane Timoteo fichinifo. Āfe afa Judea kēro ini, Nios Ifofa, akka āfe apa griego ini. ² Nā Nios Ifofaafāfe Listra anoxō Iconio anoafāferi, “Na Timoteo feronāfake sharakōira,” fanifo. ³ Pablo Timoteo iyopaini afe kanō. Akka iyoyoxoma āfe foshki repa xatemani, judeofāfe

mekafayamanōfo, māmāi tāpikaxō Timoteo āfe apamāi griegokē. ⁴ Askata mā fokakī a pexe rasi anofo a Jesús Ifofamisfo ato yoifainifo, nā Jesúsxō āfe meka yoimisfo feta, a Jesús Ifofamisfo ato kexernisfāfe Jerusalén anoxō ato yoitafo anori. ⁵ Ato yoiaifāfe nikakani a Jesús Ifofamisfāfe Jesús chanīmara fakī finasharakōinifo. Askatari a Jesús Ifofaifo ichapakōi kainifo pena tii.

Pablo namakē ōia keskara fani feronāfake Macedonia anoa

⁶ Akka Niospa Yōshi Sharapa, Asia mai ari ato nīchikaspani, arixō Jesúsnoa meka shara ato yoipaiifaifono. Nāskakē Frigia yafi Galacia finōfainifo. ⁷ Fokanax Mísia mai xatea ano nokonifo. Nānoxō Bitinia ano fopaikakī shinānifo, ari fopaiyaifono Jesús āfe Yōshi Sharapa ato nīchikaspani. ⁸ Nāskakē Mísia finōfaini fokanax Troas ano nokonifo. ⁹ Nānoxō Pablo fakishi namakē ōia fani, feronāfake Macedonia anoato nīxō yoikī iskafaito: “Nono Macedonia ano ofe noko tāpimaxiki,” ixō yoiaito ōini. ¹⁰ Nāskara ōixō Pablo ato yoini iskafakī: “Itipinīkāfe nō Macedonia ano kanō, Niospa ari noko nīchipai kiki arixō Jesúsnoa meka shara nō ato yoinō,” noko fani.

Pablo fe Silas Filipos ano inifo

¹¹ Nā Troas anoax nō kanōanāfānē nanekaini ĩamāfā nakirafe mai toomāfā ano kai āfe ane Samotracia ano. Nānox kaax pena fetsa Neápolis ano nō nokoni. ¹² Nānox nō anā kani Filipos ano. Nā Filipos ano romanō xanīfokōifo ipaonifo nānoa āto pexe rasi sharafinakōia ini, nā Macedonia mai ano. Nāno nō oxa ranāyoni. ¹³ Nānox pena tenetifā pexe rasi anoax nō tsekekainikax faka ketokonō nō kani, nō shinā anoxō judeofāfe Nios kīfikanira ixō. Nāno tsaoux Niosnoa meka shara kērofo nō yoini ano ichanāfono. ¹⁴ Nānoa fetsa āfe ane Lidia ini pexe rasi Tiatira anoa. Nā kēromā sama fexta nana sharakōi ato minimis ini. Askatari Nios shinākōimis. Nāskaxō Pablo Jesúsnoa yoiaito nikakōisharaito ōikī nōko Ifāfe āfe ōiti fepeaxosharakōini. ¹⁵ Nāskaito ōikī afe yorafoya maotisafanifo faka mēra ikimakī. Nāskaxō noko yoini iskafakī: “Mā ea iskafaikai, mī nōko Ifo ifofaki mā ea faikai, ēfe pexe ano oxai fekāfe,” noko fani. Noko askafaino nō nēteyoni.

¹⁶ Nāskata pena fetsa a Nios kīfimisfo ano nō kaino nāno nokoki xomaya nokoni niafaka chaka a mēra naneano. Nāato ato ōnāxomis ini. Āto inakōima ini, āa ato onāxomis. Aōxō kori ichapa fimisfo ini. ¹⁷ Nā xomayato noko chīfafaini Pablo fe nō kaino fāsikōi mekayanā noko yoifoni iskafakī: “Na feronāfakefōfi Nios nā keyokōi finōato āfe inakōifoki. Afeskax nō Nios fe ipaxatiromāki noko yoi feafo,” ixō yoini.

¹⁸ Pena tii noko askafafōfāsa fani. Noko askafaito Pablo mā fekaxtexō anā teneyamakī, ifakekafā nā niafaka yōshi chaka xomaya mēra nanekē iskafani: “Jesucristoōxō ē mia yoikai na xomaya makinoax tsekekaitāfe,” fani. Askafaino a makinoax niafaka chaka tsekekaini.

¹⁹ Pablo askafaito ōikakī, akka a xomayato āfe ifofāfe shināchakakōinifo anā afaakema, anākairoko aōxō kori fikani. Nāskakaxō akiki ōitifishkikakī Pablo yafi Silas achikaxō xanīfo finakōia ano iyonifo. ²⁰ Nāskakaxō xanīfofo ano ato iyokaxō iskafakī ato yoinifo: “Na judeo rafeta nōko pexe rasi anoa ato chakafakī mekafakani. ²¹ Nō mato yoisharaira ikaxō nā imisfo keskapaikī anori ato yoipaikani. Akka nōa nō chanīpaima, askara yoikī nō feyafaima nōmāi romanōfoxō,” ixō ato xanīfofo yoinifo.

²² Ato askafafāfe nikakani yorafā rasi atoki ōitifishkinifo Pablo yafi Silaski. Nāskakaxō āto xanīfofofāfe ato yoinifo ato rapati fiakaxō ato chati koshanōfo. ²³ Ato koshakī finakaxō karaxa mēra ato ikimanifo. Nāskakaxō a karaxa kexea yoinifo ato kexesharakōinō tsekeyamanōfo. ²⁴ Yoikī askafafāfe nikakī, a karaxa kexemisto oke mēra chaikōi ato ikimaxō tafara rafe oyatamaxō ato tsāoni.

²⁵ Ato askafafono Pablo fe Silas yamenakekafanaino Epa Nios kīfīyanā fanānifo. Askafono a ato fe karaxa mēra ikafāfe ato nikanifo. ²⁶ Nāskafono fāsikōi mai naya naya ikī, nā karaxa pexe simīto posa posa akōini. Nāskafaino āfe fepotifo fepekemei fetsemi. Nāskaino a karaxa mēra ikafo cadenās mepekemei fetsemi. ²⁷ Askaino a karaxa kexea moinākaḡā ōia mā karaxa āfe fepoti fepekemei fetsea ōini. Askaito āfe espada tsekata āa retemepaini, mā tsekeafora ixō shināi. ²⁸ Askaito Pablo fāsikōi yoini iskafakī: “Mīa retemeyamafe. Nō faki kaamaki,” faito nikakī.

²⁹ A karaxa kexeato āfe soraro fētsa, “Ea kirosī otaxō fexōfe,” fani. Mā fexoano koshikōi ichoni choayanā ratei, nāskax Pablo fe Silas niafono ato nāmā ratokonō mai chachipakefofāni. ³⁰ Nāskata fininākāfe mā ato kaimaxō ato yōkani iskafakī: “¿Afeskaxō ēfe chaka ē soatiromē Nios fe ipaxakī?” ixō ato yōkani.

³¹ Ato askafaito nikakakī kemanifo iskafakakī: “Nōko Ifo Jesucristo chanīmara fafe Ifokōi faax mefe yorafo fe mī afe nīpanakakī,” fanifo.

³² Nāskakaxō nōko Ifoōnoa meka shara yoinifo, a afe ikafori āfe pexe mēranoa ato yoinifo. ³³ Ato askafafono nā fakish fistichi nā karaxa kexemisto a ato koshafo ano ato fāka chokani.

Ato askafaino áfe áfiyafi áfe fakefoya ato maotisafanifo, ato faka mēra ikimapakekakī Jesūs chanīmara faifono. ³⁴ Nāskaxō áfe pexe ari ato iyoxō ato pimanī. Nāskax áfe áfi fe áfe fakefo fe inimakōini Nios chanīmara fakōikanax.

³⁵ Nāskata penama xanīfofōfāfe áto sorarofō nīchinifo a karaxa kexeafō ato yoitanōfo Pablo yafi Silas ato kāimanōfo. ³⁶ Nā karaxa kexeato Pablo yoini iskafakī: “Xanīfofōfāfe ea yoiafo ē mato kāimanō. Mā mā tanaima kasharatiro,” faino, ³⁷ Pablo a ato kexeafō yoini iskafakī: “Nōri romanōfōfiano noko koshaketsafō yorafāfe ferotaifi, noko yōkasharakaxoma. Nāskakaxō noko karaxa mēra ikimanafo. Akka, ¿afeskakī one mā noko kāimapaimē? Áakōi noko kāimani fenōfo ato yoitakāfe,” Pablo ato fani.

³⁸ Ato askafaito nikakakī mā fokaxō sorarofāfe ato xanīfofo yoinifo. Ato yoiaifono nikakani ratenifo: “Nōri romānōfora,” ato faifāfe nikakanax. ³⁹ Ato askafaito xanīfofo mā fokaxō ato iskafanifo, Pablo yafi Silas: “Nō mato tāpiama māri romanōfo fekē nō mato koshaketsaxō karaxa mēra nō mato ikimanakī. Na karaxa mēranoax kāikāfe, nōko pexe rasi anoax fōtaxikakī,” ato fanifo. ⁴⁰ Mā karaxa mēranoax kāikanax Pablo fe Silas Lidia pexe ano fonifo. Nānoxō a Nios Ifofaafō Jesūsnoa meka shara ato yoikakī ato inimamakōinifo. Nāto yoikī askafakanax ato makinoax fonifo.

17

Tesalónica anoax mekai fetsenifo

¹ Pablo fe Silas mā fokakī, Anfipolis yafi Apolonia finōfāikanax, Tesalónica ano nokonifo. Nā Tesalónica ano judeofāfe ichanāti pexe ini. ² Pablo nā imis keskai pena tenetitīa ichanāti pexe mēra kapaoni. Tres simānā anoxō ani, anoax ato fe feratenāyānā a kirika ano Niospa meka kenenifoōnoa ato yoiyāna. ³ Anoxō ato yoini: “A Cristo omiskōiax nani. Mā nafiakē anā Epa Niospa otoani. Nā Jesūsnoa ē mato yoikai nāfi Cristokī,” ixō Pablo ato yoini.

⁴ Ato askafaito nikakakī atiri judeofāfe Jesūs chanīmara fanifo. Mā Jesūs chanīmara fakanax ato fe rafenifo. Askatari griegofāferi Nios chanīmara fakaxō Nios fāsi sharakōi fanifo, nā kērofo xanīfofo feta. ⁵ Askaiifāfe ōikani judeofo noko anā nikakanimaraka ikanax, Pablo yafi Silas mepaikani ōitifishkinifo. Nāskakaxō a yora xani chakafo ato fenaifokani fonifo, Pablo yafi Silas chakafakakī mekafanōfo, fetsafāfe pexefo tii anoxō ato nikanōfo. Nāskakanax Jasón pexe ano fonifo Pablo yafi Silas fenaifokani, ato kāimaxikakī yorafāfe ato omiskōimanōfo. ⁶ Akka Pablo yafi Silas anofo ato fichikaxoma, Jasón yafi a Nios Ifofamis fetsafō ato achikaxō áto xanīfofo ano ato iyonifo. Mā ato iyokaxō fāsikōi ato iskafanifo: “Na feronāfakefāfe fanīma mīshtixō ato chakafafōfāsafamisfo. Akka mā noko ano feafo. ⁷ Na Jasón áfe pexe mēra ato ikimana. Nafāfe a romanō xanīfāfe yoisimis anori anā nikakanima. Akka nāno nōko xanīfo fetsa áfe ane Jesūs ikani,” ixō ato yoinifo.

⁸ Ato askafaito nikakani xanīfofo ōitifishkikī metsamanifo, noko anā nikakanimara ikanax. ⁹ Akka Jasón feta fetsafāfe a xanīfofo ato kori ināfono ato kāimanifo.

Pablo fe Silas Berea ano fonifo

¹⁰ Nāskakata fakishi Pablo fe Silas Berea ano fotanōfo koshikōi ato nīchinifo. Mā Berea ano nokokanax judeofāfe ichanāti pexe mēra ikifainifo. ¹¹ Nā judeofāfe Pablo feta Silaspa ato yoiaifono ato nikakōipainifo, Tesalónica anofo keskara inifoma. Ato nikashara-paikōikakī Niospa meka shara nikakōinifo. Nāskakata pena tii kirika fepekaxō ōinifo a ato yoiafo keskara chanīmamākī. ¹² Nāskakē judeofāfe Jesūsnoa chanīmara fakōinifo. Askatari griegofāferi chanīmara fakōinifo. Kērofāferi nikakōinifo a feronāfakefāfe nikaifo keskafakī.

¹³ Akka judeofāfe Tesalónica anoxō nikanifo Pablo Niosnoa meka shara Berea anofo ato yoiaito. Nāskakanax Berea ari fonifo, mā ari fokaxō ato yoinifo Pablo mekafakī chakafanōfo. ¹⁴ Ato askafaito, akka a Jesūs Ifofamisfāfe Pablo koshikōi katanō nīchinifo fakafā kesemē ano. Akka Timoteo fe Silas fonifoma. Berea ano nētenifo. ¹⁵ Akka a Pablo fe fofaifo, áfe fonifo pexe rasi Atenas ano. Nānoax anā feaifono Pablo ato yoini iskafakī: “Timoteo yafi Silas ea ato yoixotakāfe koshi ekeki fenōfo,” ixō ato yoini.

Pablo Atenas ano ini

¹⁶ Pablo Timoteo yafi Silas Atenas anoxō ato manayanā ōia Atenas anoxō afarafo ichapakōifo onifakaxō, “Na nōko niosra,” faifāfe ōi. Áfe ōiti mēraxō shināchakakōini. ¹⁷ Nāskakē Pablo nā judeofāfe ichanāti pexe mēranoax judeofo fe a judeofoma fe a Nios sharara faifo fe yoināni. Nāskatari a pexe emāiti niāx yoināifo mēxotaima Pablo Jesūsnoa ato yoini. ¹⁸ Ato yoiaino yora fetsafō akiki fenifo áfe feratenāxikaki. Nāfāfe shinānifo iskakakī: “Nā nō apaiyai keskafakī nō atiro noko inimamanō,” ixō shinānifo. Nāfāfe áto anefo epicureofo. Ranāri iskanifo: “Afara afeskara afaino nō tenetiro,” ixō shinānifo. Nāfāfe áto anefo estōicofo. Nāfo epicureofo fe estōicofo Pablo fe feratenānifo. Iskafakī yoinifo: “Na mekakī finamisto ¿afaa noko yoipaimē?” ixō yoiaifono, fetsafāferi iskafanifo: “Nios fetsafōnoa

noko yoipai rakikā, ixō yoinifo. Nāskafakī fetsanifo. Pablo Jesúsnoa meka shara ato yoifiaito, mā Jesús nafiax anā otoyamea ixō ato yoifiaito nikakaspakakī. ¹⁹ Nāskakaxō Areópago ano Pablo iyonifo a anoax mēxotaima ichanākakaxō afarafo yoimisfo ano. Nānoxō yōkanifo iskafakakī: “Nō tāpinō na mī yoiai anori meka fenakōiki noko yoife. ²⁰ Na mī noko yoiai anori nō nikamismakī. Afaa ikamākī noko yoife nō tāpinō,” fanifo. ²¹ Nā Atenas anofo feta yora fetsafāfe anoxō ōikakī nikapaikōinifo a nikaifo keskara ato yoixikakī.

²² Nāskaxō nā ichanāmisfo āfe ane Areópago anoxō Pablo ato nēxpakīa niinākāfe ato yoini: “Atenas anoafāfe, ea nikakapo, mē mato ōi mā Niosnoa nikapaikōiaito tāpipaikōiyanā. ²³ Nā mā nios kīfimis ano kafasakī mē ōia. Nānoa ē fichia na nōko niosra ixō mā afara onifanixakī mā akiki kenekī iskafakē: ‘Nō na nios ōimisma,’ ixō mā aōnoa yoikī kenenī. Nā nios ōikatsaxakīma mā kīfimis, nāōnoa ē mato yoi.

²⁴ “Nā Niospa keyokōi onifani, afama mīshiffo nai mēranoafoya mai anofo onifani ato Ifo ixikī. Nā Nios yorafāfe pexe faafo mēra ikama. ²⁵ Askatari afaa axokāfe ikima. Akka nāto keyokōi noko nima. Nō xakainō noko nefefaxoni, afara fetsafori ani.

²⁶ “Askata feronāfake fisti onifakī tafefani, nānoax nā maniafo tii kainōfo, nā mai tio ano ipaxakakī. Nāskaxō ato yoini, afe tii xinia akanimākai fanīra ikaxō. ²⁷ Nāskakē Niospa yorafo onifani keyokōichi fenanōfo tāpipaikakī. Akka fenakī fichitirofo. Chanīma, Nios chai ikama, noko chai faama. ²⁸ Akka Niosnoax nō nia. Akka Niosyamakēkai nō nikeranama. Akka nā mato tāpimamisfāfe kenenifo iskafakakī: ‘Nō Niospa fenakōifo,’ ixō yoinifo. ²⁹ Akka nō Niospa fenafofiāxō, nō shinātiroma Nios na yorafāfe afarafo onifafo keskara inō, āa shināxō yorafāfe onifafo keskara. ³⁰ Askafiaifonokai Niospa ato afeska fanima. Akka iskaratīa keyokōi ato yoi āto chaka xatekaxō chanīmara fanōfo. ³¹ Nāskakē Niospa tāpiyoni afetīa ato ichanāfaimākai, a ato omiskōimanaitīa, fatofa sharafofomākī askayamai fatofori chakafomākī. Nā feronāfake katonioxō ato askafaxii. Akka mā nafiakē Āpa otofaito keyokōichi ōinifo,” ato faito,

³² a Jesús naax otoiā nikakani, akiki kaxemetsamanifo. Ranārīto yoikī iskafanifo: “Mā nō nikakī a mī noko yoiaito, anā pena fetsa noko yoifaixāfe,” fanifo.

³³ Askafaifono a ichanāfo anoax Pablo kani. ³⁴ Akka Pablo mā kaino atiri afe fonifo Jesús chanīmara fakanax. Dionisiori nāno ato fe ini, nā Dionisio Areópago anoxō ato fe ichanāxō ato yoimis ini. Kērori nāno ato fe ini, āfe ane Dāmaris, kēro fetsafori ano ato fe inifo.

18

Pablo Corinto ano ini

¹ Nāskata Pablo Atenas anoax kaax Corinto ano nokoni. ² Nānoa feronāfake āfe ane Aquilakī nokoni. Nā feronāfake Ponto pexe rasi ano ini. Rama Italia anoax āfe āfi Priscila fe nokoita ini, nā Italia anoā āto xanīfāfe āfe ane Claudio ato potaitano. Ato iskafayanā na judeofo Roma anoax fōtanōfo ixō. Nāskakē Pablo ato ōikai kani. ³ Nā Pablo nā akaifo keskafakī akairi pexe fakākī tāpia ini, karapa pexe fakī. Nāskakē nāno ato fe nēteni, ato feta yonoxiki. ⁴ Nāskakē nānoax mēxotaima pena tenetiūa ichanāti pexe mēra kapaoni. Anoxō judeofoya a judeofoma ato Jesúsnoa meka shara nikamapai chanīmara fanōfo.

⁵ Akka Silas fe Timoteo mā Macedonia anoax akiki nokoafono Pablo Jesúsnoa meka shara judeofo ato yoifofāsafani: “Jesúsfi Cristoki Niospa katoni āfe Fakekōi inō,” ixō ato yoini. ⁶ Ato askafaito nikakakī judeofāfe Pablo iskafanifo: “Jesúsikai Cristoma. Mīa mī chanī,” fakaxō Pablo ichaketsanifo. Askafaifāfe nikakī Pablo āfe rapatiōnoa atoki mapo taa taani mā anoax kakī ori fetsa ari ato iskafāfāini: “Ē Niospa meka mato yoipaiifaito mā ea nikakaspai. Māto shināmā mā iki. Nāskax naax mā Nios fe nīpanakama. Ē mato yoisharapaifaito mā ea nikakaspai. Nāskakē na judeofoma ari ē kai ariāfo ato yoixiki,” ixō Pablo ato yoini.

⁷ Nāto askafata āto ichanāti pexe anoax kāikaini feronāfake āfe ane Ticio Justo pexe ano kani. Nāato Epa Nios shinākōikī kīfipaoni. Nā ato ichanāti pexe chaīma ikā ini. ⁸ Feronāfake Crispa ichanāti pexe anoā āto xanīfo ini. Nāato āfe āfi feta āfe fakefofaxō nōko Ifo nikakōiyanā chanīmara fani. Askatari nā Corinto anoafāferi chanīmara fakōinifo, Pablo Jesúsnoa meka shara ato yoiaito. Nāskakē chanīmara faifono ato matoisafakī faka mēra ato ikimapakenifo. ⁹ Nāskano fakish fetsa Pablo namakē ōia fani, nōko Ifāfe yoiaito iskafakī: “Ratekima mēxotaima ēfe meka sharaōnoa ato yoi xateyamafe. ¹⁰ Ē mefe ikakī mia tsōa afeska faima kiki. Na pexe rasi ano efe yorafo ichapa ikafokī,” ixō yoini. ¹¹ Nāskakē Pablo Corinto ano nēteni. Anoxō xinia fisti finōmata oxē seis ani. Nānoxō mēxotaima Niospa meka ato yoipaoni.

¹² Akka Acaya mai anoax Galión xanīfo finakōia ini. Nānoax judeofo ichanānifo Pablo achixikākī. Mā achikaxō āto xanīfo finakōia ano iyonifo. ¹³ Iskafakī āto xanīfo yoinifo: “Na feronāfake ato pārāfofāsafai, yoipai mā Nios kīfiki iskafatiro ixō. A Moisés yoini anori ato yoima, fakirira ato yoi,” ixō yoinifo.

¹⁴ Pablo mā ato kemapaiyato nā xanifo Galión judeofo yoini iskafakī: “Na feronāfāke afara chakafakē, askayamakī ato retetekē mā ea yoiato ē mato nikakerana. ¹⁵ Akka nā māto xinifāfe yoipaonifo keskaraōnoa mā yoita, a māto kaifāfe āfe aneōnoa yoita, a Moisés yoini keskaraōnoa mā yoi. Akka nā mā apaiyai keskafakāfe, ē aōnoa afaa tāpipaimakai. ¹⁶ Nāskakē nonoax fotakāfe,” Galión xanifāfe ato fani. ¹⁷ Ato askafa fokaxō Sóstenes achinifo nā ichanāti pexe anoa xanifo. Mā achikaxō nāri seteketsanifo xanifāfe ferotaiifi. Akka nā xanifo Galión aō rafañā inima.

Pablo anā Antioquia ano kani Niosnoa meka shara ato yoikai. Taeyoi kai rafenixakī anā kai fistini

¹⁸ Pablo Corinto ano oxaranāyoni. Nānoax a Nios Ifofaafō makinoax kani Priscila fe Aquila afe fonifo. Nāskakata kanōñāfānē nanefainifo Siria mai ano fokani. Mā fokanax akka Cencrea anoax kanōñāfā mēra nanexoma Pablo ato testemayoni. Akka Pablo Nios yoiyoni: “Ē mīōxō afara axii, mī ea ōiaino,” ixō yoini. Akka mā axō ato testemani tāpinōfo. Ē Nios afara afeskarafaxōara ikax. ¹⁹ Nāskata mā fokanax Efeso ano nokonifo. Nāno Pablo ato nīchifaini Aquila yafi Priscila, ichanāti pexe mēra kakī nāanoax judeofo ichanāfono ato fe yoināxiki. ²⁰ Nānoax nētefapainifo. “Kayamafe nono nofe iyofe,” fanifo. Askafaifono akka Pablo nētekaspani. ²¹ “Maa, ē nētetiroma, mē kai,” ato fani iskafakī ato yoianā: “Epa Niospa ea nīchiaino anā oxō ē mato ōiyoxii.”

Nāto askafata Pablo kanōñāfānē naneinākafani Efeso anoax mā kai. ²² Mā Cesarea ano nokoax, Jerusalén ano kani a Nios Ifofaafō ato yoisharaiakai. Mā ato yoita anā kani Antioquia ano. ²³ Nāno ato fe ikatsaxakī, nānoax anā kani Niospa meka sharaōnoa ato yoifofāsafaikai. Galacia anoaxō ato yoikī taefata, Frigia anoaxori ato yoini. A Nios Ifofaafō ato inimamakōini, Niosnoa meka shara ato yoikī.

Apolos Efeso anoafō Niosōnoa meka shara ato yoini

²⁴ Nāskaifono Efeso ano judeo fisti nokoni āfe ane Apolos pexe rasi Alejandría ano ini. Nāto Niospa meka yoikī kirika kenenifo tāpikōia ini, xafakīakōi ato yoimis. ²⁵ Nāto nōko Ifo Jesúsnoa tāpikōixō ato yoini, inimakōikai nā tāpia anori xafakīakōi Jesúsnoa ato yoini. Askafixō Jesúsnoa tāpisharaxō nā Juan ato maotisafakī faka mēra ato ikimani nā fisti tāpia ini. ²⁶ Nāskata Apolos ichanāti pexe mēraxō ranotamakōi ato yoiaito nikakī. Aquila feta Priscila kenakaxō ori iyokaxō Niospa meka tāpimasharakōinifo nikasharakōinō.

²⁷ Nāskakē Apolos Acaya mai ano kapaiyato nikakī a Nios Ifofaafāfe iskafanifo: “Nō a Jesús Ifofamisfo kirika kenexō fomanō mia ifisharakōinōfo,” ixō yoinifo. Apolos mā Acaya mai ano kaxō, ato yoisharakōini. Ato askafaito nikakani Niosnoax inimasharakōinifo. ²⁸ Nānoax ōiaifo judeofo Apolos yoini: “Jesús Niospa Fakemara,” faifono. Akka nā kirika keneaxō Apolos ato yoini iskafakī: “Nā nō manai Cristofi Niospa Fakeki,” ixō xafakīakōi ato yoiaito tsōa kemanima.

19

Pablo Efeso ano oni

¹ Apolos Corinto ano iyoano, māchi keya ari fai tāpiato kaax Efeso ano Pablo nokoni. Nānoa Nios Ifofamisfo fichitoshini. ² “¿Mā Nios Ifofaxō Niospa Yōshi Shara mato mēra mā nananimē?” ixō Pablo ato yōkaito, kemanifo iskafakakī: “Maa, nōkai aōnoa afaa nikayomisma, Niospa Yōshi Sharakai nō nikamisma,” fanifo.

³ Askafāfāfe nikakī anā Pablo ato yōkani: “¿Afeskai mā maotisanimē?” ato faito, kemanifo iskafakakī: “Juan noko yoinino nō ini,” ixō yoinifo.

⁴ Askafaifono anā Pablo ato yoini iskafakī: “Juan ato maotisafani afara chakafakatsaxakakī āto chaka xatepaiyafono Nios Ifofapaikakī. Iskafakī ato yoianā a chipo oxiai nikakōisharaxikāfe ixō ato yoini, Jesúsnoa yoikī,” ato Pablo fani.

⁵ Pablo ato yoikī askafaino, nikakani nōko Ifo Jesús āfe aneōnoax maotisanifo fetsafāfe tāpinōfo. ⁶ Askafaifono ōikī Pablo ato māmāpakeaino Niospa Yōshi Shara ato mēra naneni. Nāskakanax meka fetsapa mekai fetsenifo. Niosnoa meka shara nikakaxō ato yoinifo. ⁷ A ato mēra Niospa Yōshi Shara nanea, doce feronāfake ini.

⁸ Nāskaifono Pablo nāno ato fe ikax mēxotaima ichanāti pexe mēra kapaoni. Anoxō tres oxe ani. Niospa meka sharaōnoa ato yoianā ranotama, anoaxō Nios xanifoōnoa ato tāpimapaikōikī. ⁹ Ato askafafiaino atirifāfe nikakaspakakī yorafāfe ferotaiifi mekakakī chakafanifo iskafakakī: “Nōkai Jesús chanīmara faima. Aōnoaxkai Epa Nios ari nō katiroma,” ixō yoiaifono, Pablo ato makinoax kakī a Nios Ifofaafō ato iyonī, feronāfake āfe ane Tirano a anoaxō ato tāpimamis ano. Nānoaxō a chanimisfo anoaxō pena tii Pablo Jesúsnoa meka shara ato yoipaoni. ¹⁰ Anoxō Pablo Niospa meka sharaōnoa ato yoikī xinia rafe ani. Nā Asia mai ano ikafāfe nikasharakōinifo Niospa meka sharaōnoa. Judeofo feta a judeofofāfema

nōko Ifo Jesúsnoa meka shara nikapaonifo. ¹¹ Nāskakē Niospa Pabloōxō afama mīshtifo fakī ato ispani. ¹² Nāskakē yorafāfe āto payōiro iyamata āto sama faxte pistha Pablo āfe yora ramākanifo. Nāskafata mā fokaxō a isinī ikaifoya a niafaka chaka naneafō ato ramānifo. Ato askafaifono a isinī ikaifo fe a niafaka chaka naneafō sharai fetsenifo.

¹³ Nāskaifono atiri judeofāfe fofāsakakī niafaka chakafo yorafo makinoa pōtanifo pexefo tii fofāsakakī. Jesús āfe aneōxō niafaka chakafo yorafo makinoa ato pōtapainifo. Iskafanifo: “Niafaka chakafāfe, Jesús aneōxō Pablo noko yoimiski, akka nō mato yoikai ato makinoax tsekefaitakāfe,” ato fanifo.

¹⁴ Nāskafapaonifo nā judeo āfe fake sietipa, nā judeo āfe ane Esceva ini. Nā ato Nios kīfioxomisfāfe āto xanīfo ini. ¹⁵ Ato askafaifono a niafaka yōshi chaka yora mēra naneato ato kemani iskafakī: “Ē Jesús ōimis, askatari Pablori ē tāpia. Akka, ōmā tsoamē?” ato fata, ¹⁶ nā niafaka yōshi chakayato ato rapati faxteyanā, fāsikōi ato achixō ato seteketsayanā ato imi tofeni. Nāto askafakī fetsaino pexe mēranoax yorioma ichonifo. ¹⁷ Nāto askafaano Efeso anoxō judeofāfe yora fetsafo feta nikakani ratenifo. Nāskakaxō, “Nōko Ifo Jesús fāsi sharakōi,” fanifo.

¹⁸ Nāskakaxō a Jesús chanīmara famisfāfe fēkaxō a afara chakafapaoni xakakī yorafāfe ferotaifi yoinifo. ¹⁹ Askatari a yōfe tāpiafāfe āto kirika fēkaxō yorafāfe ferotaifi koanifo, mā Jesús Ifofakaxō. Nā kirika kene ōiafo kopikōi ini, como cincuenta mil ini. ²⁰ Nāskakē nōko Ifāfe āfe mekashara nikaketsanifo Jesús Ifofamisfāfe ato yoiaifāfe, āfe kerex sharaōxō afama mīshtifo fakakī.

²¹ Nāskafata Pablo shināni Macedonia yafi Acaya ano kaxiki. “Nānoax Jerusalén ano ē kaikai, Jerusalén anoax Roma ano ē kaikai,” ixō shināni. ²² Nāskaxō a afeta yonomisfo rafe Macedonia ano ato nīhini Timoteo yafi Erasto. Akka Pablo Asia ano nēteyoni.

Efeso anoax yorafo mekai fetsenifo

²³ Nāskaifono nā Efeso anoafō mekai fetsenifo: “Jesúsfi Niospa Fakekī aōnoax nō Nios ari katiro,” Pablo ato faino, ²⁴ nāno feronāfake āfe ane Demetrio ini. Nāto yonokī afarafo kori exe keskara oxokōi onifapaoni. Nā feronāfāke afara onifakī tāpikōia ini. Nāskaxō kēro ōitsa onifani, na nōko niosra ixō āfe ane Artemisa. Ranāfaxō kēro ōitsa fakī kafāshara mīshtifo onifani. Nāskakē a afeta yonofaifāfe aōxō kori ichapa fipaonifo. ²⁵ Nāskaxō Demetrio ato ichanāfani, a afeta yonomisfo ato iskafayanā: “Efe yora mīshtichi, mā mā tāpiaikī nōko nios Artemisa yora keskara onifaxō, aōxō nō kori ichapa fimiski. ²⁶ Akka mā mā ōimis nikayanā, na Pablo ato yoifofāfamis iskafakī: ‘Na yorafāfe niosra ixō onifaafō, akai niosma,’ ixō ato yoi. Mā yora ichapafāfe chanīmara fakōinafo ato yoiaito nikakakī. Na Efeso anoafos ato yoiafa, Asia mai anoafori ato yoimis. ²⁷ Na Pablo yoiafō keskara mesekōi, ē shināchakakōi. Anā noko tsōa kori ināyamaino nō fenotiro, na nōko nios Artemisa anā tsōa kīfitroma, nā maitio ikafāfe Asia mai anoxō kīfimisfo. Askatari a nōko nios kīfiti pexefā mēranoax anā ichanātirofoma,” ixō Demetrio ato yoini.

²⁸ Demetrio ato askafaito nikakani Pablōki ōitifishkianā fāsikōi yoinifo iskafakakī: “¡Na Artemisa Efesio anoafō nā sharafinakōiafo, tsoa keskarama!” ikanax fāsikōi mekai fetsenifo.

²⁹ Nāskakanax pexe rasi anoax fekaxtei fetsenifo. Nāskakaxō Gayo yafi Aristarco achinifo. Nā rafe Macedonia anoafō inifo, Pablo fe feitafo. Nāskakaxō a yora kaya ichanāfo ano ato iyonifo. ³⁰ Ato askafaifono Pablo ato mēra ikipaini arixō yorafo yoixiki. Akka a Jesús Ifofaafāfe Pablo nīchikaspanifo, “Mia retetirofoki,” ikaxō. ³¹ Askatari a Pablo fe rafemisfāfe, xanīfōfōfāfe Asia mai anoxō ato yoinifo, Pablo yoitanōfo ato mēra ikiyamanō. ³² Nāskakē āa ranā ichanākanax fāsikōi mekanifo. Atirifāfe fetsa anori yoinifo. Nāskaifono ranārito tāpinifoma afeskaikī ichanāfomakī. ³³ Nāskaifono judeofāfe shinānifo, na yorafo chakai mekai taeafora noko fakanira ikaxō. Nāskakaxō Alejandro pītsikinifō ōiaifono ori nīxō ato yoitakāfe ikaxō. Nāskaifono Alejandro niināfakāfā mēshaxō ato yoini iskafakī: “Mekayamakāfe, ē mato yoisharanō,” ixō Alejandro ato yoini. ³⁴ Akka mā tāpikaxō Alejandro judeokē, fāsikōi āa ranā mekai fetsenifo, iskakanī: “Na Efeso anoafāfe āto Artemisa sharafinakōia,” ikaxō.

³⁵ Askaifāfe ōikī a xanīfo kenexomisto, “Mekayamakāfe,” ato fani. Ato askafaito anā tsoa mekanima. Nāskaxō ato yoini iskafakī: “Efesofō anoafāfe ea nikasharakāfo. Keyokōichi tāpiafo nōfi Efeso anoafokī, nā āto nios Artemisa āfe kīfiti pexefā nō kexemis. Nā onifafo nai mēranoax pakeafori nō kexemis. ³⁶ Nāskakē āa chanikanira tsoa itiroma. Nāskakē anā mekayamakāfe, afaa afeskapapayamakāfe shināsharaxoma. ³⁷ Akka na feronāfakēfo mā ato efea afaa chakafayamafafono, askatari na pexefā mēranoa tsōa afaa oneyamafano, askatari na nōko nios Artemisa tsōa chakafakī mekafayamafano mā ato efea. ³⁸ Akka na Demetrio afeta yonomisfo feta, a ato chakafapai xanīfōfo ano ato iyotiro, anoxō ato yōkanō afaa chakafafomakī. ³⁹ Nāskaxō afara fetsa mā yoipaikī nā ichanāfo anoxō mā yoitiro. ⁴⁰ Mā iskaratīa ato chakafai keskafakī xanīfōfōfāfe nikaxō nokori askafatirofo. Na yorafāfe

afaa chakafayamafiamisfono, afeskakī mā yōachepeimē xanīfofōfāfe noko faifono nō ato kematiroma,” ixō a xanīfo kenexomisto ato yoini.

⁴¹ Ato yoikī askafata ato nīchiaino fonifo.

20

Pablo Macedonia ano kata Grecia ariri kani

¹ Mā mekakani nishpafono Pablo a Nios Ifofaafō kenani ato yoisharaxiki. Mā ato yoisharata, ato makinoax kani Macedonia ari kai. ² Mā kaxō nāriafo Jesúsnoa meka shara ato yoifofāsafakī a Nios Ifofaafō ato inimamakōini. Nāskata Grecia ano nokoni. ³ Nānoxō tres oxe ani anoax kanōanāfānē Siria ano kapaikī, nikani judeofāfe kexeafono retapai kakī. Nāskakē fāi kakī, Macedonia anā finōfaini. ⁴ Mā kaino feronāfāke ranāri afe fonifo. A feronāfāke fetsa āfe ane Sōpater Berea anoa ini. Āfe apa ane Pirro ini, Aristarcori ini, Segundori ini, nā Segundo Tesalónica anoa ini. Fetsari Gayo, Derbe anoa ini. Fetsari Timoteo ini. Askatari Tiquico fe Trófimo Asia mai anoa inifo. Nā tii Pablo fe fonifo. ⁵ Nā tii rekē fokaxō Troas anoxō noko mananifo. ⁶ Akka mā fista senēno chipo nō kani. Nā fistaia pāa faraxaxoma pimisfo ini. Nāskata Filipos anoax kanōanāfānē nō kai cinco nia mā nō oxax Troas ano nō atoki nokoni. Nāno nō siete nia oxayoni ato fe.

Troas ano ōikai Pablo kani

⁷ Nāskata mā pena nomīkoaino nō ichanāni pāa kaxke mīshtixō pixiki a Jesús noko nāxoyamea shinākī. Anoxō Pablo a Nios Ifofaafō yoini, mā penama kaxiki yamenake kafanaino ato yoikī xateni. ⁸ Nānoax pexe kene keya fomākīa anoax nō ichanāni, a rāpari ichapa ōtai fetsea anoax. ⁹ Nāskaino naetapa āfe ane Eutico pexe kene fomākīa āfe naisti anori tsaoni. Pablo ato chaikōi yoiaino nā naetapa oxakatsaini. Nāskax mā oxachāi kaax pexe kene fomākīakōinoax pakeax nakē chishtoinīfōfānifo. ¹⁰ Nāskakē Pablo fotopakekafā chishtoinīfōfā nā naetapa ikōni, ato iskafakī yoianā: “Rateyamakāfe, naamaki,” ato fani.

¹¹ Nāskafata anā pexe fomākīa Pablo māpeinīfōfāxō ato pāa kaxkeketsaxoni ato feta pixiki. Nāskaxō ato yoikī pena fani. Mā penano Pablo kani. ¹² Ato askafaino nā naetapa nafiax mā otokē afe yorāfāfe xanēnē iyonifo. Askafakī Pablo ato inimamakōini.

Troas anoax Pablo Mileto ano kani

¹³ Akka nō kanōanāfānē rekē kani, Aso anoxō Pablo ifixiki. Akka noko iskafakī yoini: “Ē fāi kaikai rekē fokāfe,” ixō noko yoini. ¹⁴ Nā Aso anoa noko fichiax nefe feronāfāke kani. Nāskax Mitilene ano nō nokoni. ¹⁵ Nāskata nānoax nō tsekeainax pena fetsa Quio mai nō finōfaini kaax pena fetsa Samos fai fototai nō nokoni. Anā anoax kaax pena fetsa pexe rasi Mileto ano nō nokoni. ¹⁶ Akka Pablo Asia ano samarakapainima. Efeso anori kakaspani, Jerusalén ano koshi nokopai ato feta fista Pentecostés apai.

A Nios Ifofaafō ato kexemisfo Efeso anoafō meka shara Pablo ato yoini

¹⁷ Mileto anoxō Pablo ato kenamani, Efeso anoxō Nios Ifofaafō ato kexemisfo. ¹⁸ Mā feafono ato iskafani: “Mā mā ea ōimis ē isharakōiaito nā ē oitachāi. Na Asia mai anoxō ē afaa afeska fama ē isharakōia Jesúsnoa meka shara mato yoi. ¹⁹ Mēxotaima ē mato mēra itiani, nōko Ifo yonoxoni. Ē mato yoi ē oiatiani Nios mato Ifo sharafamapai. Askatari ea omiskōimanaifono ē omiskōimis judeofāfe ea askafafono. ²⁰ Akka ea askafafiaifono Jesúsnoa meka shara ē mato yoikī xateima. A meka sharakapafo ē mato yoimis. Ranotamakōi ē mato yoimis, ichanāni pexe anoxō yoita a mātō pexekōifo anoxori ē mato yoimis. ²¹ Judeofo yoita a judeofomari mē yoimis āto chaka xatekaxō Nios Ifofanōfo nōko Ifo Jesucristori chanīmara fakōinōfo.

²² “Akka iskaratīa Jerusalén ano ē kai, Niospa Yōshi Sharapa ea nīchiaino. Ē tāpiama arixō ea manafo ea afeskarafakani. ²³ Akka mē tāpia Niospa Yōshi Sharapa ea yoiaito, pexe rasi anoxō ea karaxa mēra ikimakaxō ea omiskōimakanī. ²⁴ Akka ea askafafiaifono ē shināchakaima. Nā Epa Niospa ea amapaiyai keskara fisti ē shināi. Epa Niospa keyokōi yorāfo noikōi na meka shara ato yoitāfe ea fani. Nā ea yoini keskara ē apai.

²⁵ “Ē mato mēraxō Nios xanīfōnoa ē mato yoimis. Akka mē tāpikōia anā mā ea ōinakama. ²⁶ Nāskakē ē mato yoipai. Na fetsafāfe ea nikakaspamisfo ē ato yoipaiifaito tsōa ea nikamisma. Nāskax omiskōixikani. Nāskakē ē ato afeskafatiroma, mē ato yoimis. ²⁷ Mē mato yoimis a Niospa fichipaiyai keskafakī ē mato yoikaspamisma. ²⁸ Nāskakē kexemesharakāfe, a Nios Ifofaafōri ato kexesharakāfe. Niospa Yōshi Sharapa mato Ikināki, a Nios Ifofaafō mā ato kexesharanō. Jesús nokoōnoax nai āfe imi foniki. ²⁹ Mē mato makinoax kaano, chipo a fanīrira yoimisfo chakafo fekanī mato fanīrira yoipaikani. Oa poomānā chaxo fichixō pitiro keskafakī mato pārapaikani mā anā Jesús shinānōma. ³⁰ Afianofi mā fetsa mā ranā mā pāranōnāxii nō Niospa meka tāpiara ixō mā ato pāraxii, a Nios Ifofaafāfe mato nikanōfo.

³¹ Kexemesharakōikāfe, akka shinākapo. Tres xinia ē ani Niospa meka sharaōnoa mato yoikī. Penata yoita, fakishi yoikī ē mato famis, Niospa meka sharaōnoa ē mato yoi ē oiamis.

³² “Akka efe yora mīshtichi, iskaratīa ē Epa Nios kīfi mato kexesharanō, a mato noiai keskafakī āfe meka shara mato mēra nanenō. Nāato āfe kerex sharaōxō āfe meka shara mato inātiro mato mēra nanesharanō askatari a yoiyoni keskafakī afe yorakōifo ato afara ināsharakōitiro afe īpaxanōfo. ³³ Ēakōi ē afaa fipaimisma, askatari ē mato kori yōkamisma, rapatiri ē tsoa yōkamisma. ³⁴ Askatamaroko ēfe mifikōichi ē yonofaito mā mā ōimis, a ē fichipaiyai fixiki, a efe ikafori ato ināxiki. ³⁵ Mē mato ōimamiski afeskaxō mā yonotiromāki, a omiskōiaifo ato axosharayanā. Nōko Ifo Jesús āfe meka sharaōnoa shināyanā fetsafāfe noko afara ināino nō inimatiro keskai, ‘Nōri fetsafo afara ināsharai nō inimaifinakōitiro,’ ixō nōko Ifāfe noko yoini,” Pablo ato fani Efeso anofo.

³⁶ Mā ato yoikī askafata ratokonō mai chachipakefōfā Pablo ato Epa Nios kīfixoni.

³⁷ Anoax keyokōi oiayanā Pablo ikōketsayanā kokoketsanifo. ³⁸ Shināmitsakōinifo: “Ē anā mato ōinakamara,” ato faino, askakāta afe fakafā kesemē fonifo Pablo kaito ōifokani. Nāskax Pablo kanōanāfānē nanekaini mā kai.

21

Pablo Jerusalén ano kani

¹ Anoa a Nios Ifofafo nō ato ōifaini, kanōanāfānē nō nanekaini kaax Cos ano nō nokoni. Anoax kaax pena fetsa Rodas ano nō nokoni, anā anoax kaax Pátara ano nō nokoni. ² Nā Pátara anoxō kanōanāfā nō fichini Fenicia ano kaino, nāo nō nanekaini. ³ Kakī fakafā nakirafe Chipre mai toomāfā nō ōifaini. Nā Chipre mai nōko pōya mishkiori ini. Nā finōfaini kaax Siria ano nō nokoni. Nānoxō pexe rasi Tiro fai fototai nokoxō kanōanāfā mēraano afama mīshtifo māpemanifo. ⁴ Nānoa a Nios Ifofafo nō ato fichini, nāno nō ato fe siete nia oxani. Nāfāfe Pablo yoinifo Niospa Yōshi Sharapa ato shināmanaino iskafakakī: “Jerusalén ano kayamafe. Anoxō mia retepaikani kiki,” ixō yoinifo. ⁵ Askafaifono mā siete nia finōta nō anoax kaino, keyokōi āto āfife fe āto fakefo fe nefe fonifo pexe rasi pasotai. Nānoxō nā māshifā anoxō ratokonō mai chachipakefōfā nō Epa Nios kīfini. ⁶ Nāskata mā nō kakī nō ato yoisharaketsata, kanōanāfā mēra nō nanainākfani, akka atii anā fenifo āto pexe ano.

⁷ Nāskata kanōanāfānē nō kai Tiro ano nō nokoni, nānoax kaax Tolemaida ano nō nokoni. Nānoax a Nios Ifofafo fe nō ato fe yoināsharakōini, askatari nāno nō ato fe oxa fishtiyoni. ⁸ Nāskata nānoax kaax pena fetsa Cesarea ano nō nokoni. Nānoax Felipe pexe ano nō kani. Nā Felipe Niospa meka shara yoisini ini. A Jesús Ifofaafāfe afetiama Felipe ifinifo Jerusalén anoxō a piaifo ato paxxaxonō. Seis feronāfake fetsafoya Felipe ifinifo ato feta yononō. Nāato pexe ano nō nēteni. ⁹ Felipe fake xotofake cuatro inifo fenemais. Nāfāfe Niospa Yōshi Sharapa ato shināmanaino ato yoipaonifo. ¹⁰ Nāno nō oxa ranāni, nāno Judea anoax feronāfake āfe ane Agabo nokoki nokoni. Nāato Niosnoa yoisini ini, a inōpokoai yoikī. ¹¹ Mā noko ano nokoxō, Pablo āfe nanexemeti fiata, aō metexkere ita aō otxekere ini. Nāskaxō ato yoini iskafakī: “Niospa Yōshi Sharapa ea yoi Jerusalén anoxō judeofāfe na nanexemeti ifo iskafaxikani. Nāskaxō yora fetsafo ināxikani,” ixō Agabo ato yoini.

¹² Noko askafaito nikakī Cesarea anofo feta, “Jerusalén ano kayamafe,” nō Pablo fani. ¹³ Askafaifono Pablo noko kemani iskafakī: “¿Afeskakī mā oiayanā mā ea shināmitsamanimē? Mē itipinīshara ea nexayamakakī ea retekani Jerusalén anoxō, nōko Ifo Jesúsxō a askafakani,” Pablo noko faito, ¹⁴ nō anā afaa fanima noko nikayamaito. Nāskaxō nō yoini iskafakī: “Nōko Ifāfe nā mia apaiyai keskafanō,” ixō nō yoini.

¹⁵ Mā askata nō itipinī fani, nāskax nō Jerusalén ano kani. ¹⁶ Nō kaino a Nios Ifofafo ranāni nofe fonifo Cesarea anoax. Nāfāfe noko yoinifo feronāfake āfe ane Mnasón pexe ano, nā Mnasón Chipre ano ini. Nāato afetiama Nios Ifofakī taefani. Nāskaxō āfe pexe anoxō noko ifini ano nō oxanō.

Pablo Santiago ōikai kani

¹⁷ Mā nō Jerusalén ano nokoano a nofeta Jesús Ifofamisfāfe noko ifinifo nokoki inimakōiyanā. ¹⁸ Askata pena fetsa Pablo nofe kani Santiago ōikai. A Nios Ifofafo ato kexemisfori nāno inifo. ¹⁹ Mā atoki nokoxō Pablo ato yoisharakōini. Nāskaxō ato yoipakeni a Niospa aōxō a judeofoma ato chanīmara famakōikē.

²⁰ Ato yoiaito nikakakī, “Nios fāsi sharakōi,” fanifo. Nāskaxō Pablo yoinifo iskafakakī: “Nofe yorashta, nō mia yoisharapai, mā mī ōimiski na judeofāfe ichapakōichi mā nōko Ifo Jesús chanīmara fafiakaxō, nāfāfe a Moisés yoini keskara nikapaikōimisfo. ²¹ Nāfāfe yoiāfo judeofo a yora fetsafo mēra ikafo mī ato yoikē iskafakī: ‘A Moisés yoini keskara nikayamakāfe,’ ixō mī ato yoikē, ‘Askatari māto fakefo foshki repa xateyamakāfe, askatari a mā imis keskai anā askayamakāfe,’ ixō mī ato yoisimiskē. ²² Akka, ¿nō afeskaimē, yorāfāfe nikakani mā mī nono oano? ²³ Akka nā nō mia yoiāi keskafe. Na cuatro feronāfakefāfe Nios

yoiafoki iskafakakī: 'Epa Niosi, mī noko yoia keskai nō askakōikai,' ixō yoiafoki. ²⁴ Akka na cuatro feronāfake fe Nios yoiiti pexefā mēra katāfe, nō imis keskai ato fe ife māto chaka soaxikakī. Mī ato kopifaxōfe mato testeafono. Mī ato askafaito oikakī keyokōichi tāpitirofo a mīōnoa yoiaifo āa chanīkani. Askatamaroko mīri a Moisés yoini keskara mī nikakōimis. ²⁵ Akka a judeofofāfema a Jesús Ifofaafāfe mā chanīmara fakōinafo. Akka mā nō ato kirika kenexona iskafakī: 'Nō nami pitiroma na nōko niosra ixō afara onifakaxō fetsafāfe ināfono. Askatari yoināfo āfe imiri nō ayatiroma. Askatari yoinā ina fakaxō tetoxakafo āfe imi foyamaitori āfe nami nō pitiroma, askatari nōko āfima nō chotatiroma, kēromāri āfe fenema chotamatiroma,' ixō nō ato yoia," Pablo fanifo.

Nios kīfiti pexefā mēraxō Pablo achinifo

²⁶ Nāskafaifono nā cuatro feronāfake Pablo ato yoni. Nāskata pena fetsa ato fe Nios kīfiti pexefā mēra ikini, āto chaka soaxikakī. Nāskata a Nios kīfiti pexefā mēra ikikaini xanīfo yoixiki a Epa Niospa yoini keskara afetia keyoimākai, nā tiitori yoinā retexō Epa Nios ināpaikakī.

²⁷ Mā siete nia ikano judeofo Asia mai anoax fokaxō Nios kīfiti pexefā anoa Pablo oikakī yorafo yoinifo Pablo chakafakī mekafanōfo. Ato askafaifono Pablo achinifo. ²⁸ Mā Pablo achikaxō fāsikōi ato yoinifo iskafakakī: "Israelifāfe, nofeta nākiifēkape, a na feronāfake kafāsakī yorafo ato pārafofāsa famiski. Nōko maifo tii anoa ato chakafakī yoimiski. Askatari a Moisés noko yoini anori nikayamakāfe ato fai. Askatari nōko Nios kīfiti pexefā chakafakī mekafai. Askatari nōko Nios kīfiti pexefā sharafinakōifiano chakafaa, a mēra nōko kaifoma griego yorafo ikimana," fanifo. ²⁹ Akka taeyoi Pablo oinifo pexe rasi ano nā Trófimo fe kafāsaito. Nā Trófimo Efeso anoa ini. Na Pablo nōko Nios kīfiti pexefā mēra Trófimo ikikinaki ixō shinānifo aa yamafiano.

³⁰ Nāskakē pexe rasi anoax mekai fetzenifo, nāskaifono yorafo nikaferakani ichonifo. Nāskakaxō Pablo achikaxō Nios kīfiti pexefā mēranao kāimanifo. Nāskata Nios kīfiti pexefā koshikōi feponifo. ³¹ Nāskaxō mā chaima reteafono, romanō anoa sorarofāfe āto xanīfāfe nikani pexe rasi Jerusalén anoafāfe yōachēpeaifāfe. ³² Nāskaifāfe nikakī a soraro xanīfāfe a afe rafeafoya āfe sorarofa ichanāfani. Nāskax ato fe koshikōi ichoni yorafo mēra, a soraro xanīfo āfe sorarofa fe kaito oikakī anā tsōa Pablo seteketsanima enerisafanifo.

³³ Nāskata a soraro xanīfāfe mā Pabloki kaxō mā achixō, cadenās rafeta ato metexkere amani. Nāskaxō chipo yōkani tsoamāki, askatari afaa afeska faamāki. ³⁴ Akka askafaino yorafo fanīrira mekai fetzenifo anoris yoinifoma. Nāskai mekai fetseafono soraro xanīfāfe tāpitiroma ini. Nāskaxō sorarofa mēra ato iyomani. ³⁵ Mā chaima sorarofa mēra nokoikano, anoxō yorafāfe retepaiaifono, sorarofāfe Pablo chishtokaxō yoinifo yorafāfe afeska fanōfoma. ³⁶ Nāskakē keyokōi acho fokani fāsikōi mekafonifo. "Aa chaka reterisafakāfe," ato faafonifo.

Askafaifono yorafāfe ferotaiifi Pablo ato yoini

³⁷ A sorarofa ika mēra mā ikimanaifono, a sorarofāfe āto xanīfo Pablo yōkani: "¿Ē mefe pishta mekatirōmē?" faito soraro xanīfāfe kemani iskafakī: "¿Griego mekapa mī mekatirōmē? ³⁸ Akka, ¿mīmamē a Ejipto ano afeīama xanīfo potapaiyanā cuatro mil yorafo tsōa istoma iyoni?" ixō xanīfāfe yōkani.

³⁹ Askafaito nikakī Pablo kemani iskafakī: "Maa, ēma. Ēfi judeoki. Ēfi Tarso anoax fakeakī nā pexe rasi Cilicia mēranoax. Akka na yorafo ē ato yoinō ea yoife," faito, ⁴⁰ nā soraro xanīfāfe, "Mī ato yoitiro," fani. Nāskafaino Pablo kipiti ano niināfāfā mēshaināfāfā, "Mekayamakāfe," oinoma ato fani. Mā ato nishpafaxō hebreo mekapa iskafakī ato yoini:

22

¹ "Efe yora mīshtichi, ea nikakāfe ē mato yoinō ea chakafafo keskara, ea anā chakafayamanōfo," ixō ato yoini.

² Hebreo mekapa ato yoiaito nikakani, tsoa pishta tooxinima. Askaifono Pablo anā ato yoini, ³ "Ēri judeo. Tarso anoax ē fakea, Cilicia mai anoax. Akka ē nono Jerusalén anoax yosia, ēfe maestro Gamalielxō ē tāpia. Na Moisés nōko xinifo yoipaoni anori ē yoimis. Mēxotaima ē shinākōimis ēfe oitifoaxō ē Nios Ifofapaikī. Nā mā Nios Ifofapaiyai keskafakī ēri askafapaoni. ⁴ Taefakī a Jesús Ifofaifo ē ato omiskōimaki ē ato retepaipaoni. Nāskaxō ē ato achixō karaxa mēra ē ato ikimapaoni, feronāfakefoya kērofo. ⁵ A ato Nios kīfixomisfāfe āto xanīfofo feta a xanīfo fetsafāfe mato yoitirofo nā ē mato yoiai keskara. Nāfāfe ea kirika kenexō inānifo, nofe yorafo judeofo Damasco anofo ē ato foxotanō. Nāskax ē ari kani a Nios Ifofafo ato fenaikai, ato achixō Jerusalén ano ato efexiki anoxō ato omiskōimaxiki," ixō Pablo ato yoini.

Pablo afeskaxō Jesús Ifofamāki ato yoini
(Hch. 9.1-19; 26.12-18)

⁶ Anā Pablo ato yoini iskafakī: “Akka fāi kaikī mē chaima Damasco faikaino, nānoxō xini keya oa luz keskarato nai mēraxō ea chaxakōitani. ⁷ Ea askafaino ē nāmā pakeni. Nāskaxō mekaito ē nikani, ea iskafaito: ‘Saulo, Saulo, ¿afeskakī mī ea omiskōimanimē?’ ea faito. ⁸ Ea askafaito ē yōkani iskafakī: ‘¿Mī tsoamē, Ifo?’ ē faito ea kemani iskafakī: ‘Ēkia Jesús Nazarete anoa, nā mī ea omiskōimanai,’ ea fani. ⁹ A efe foaifāfe luz keskarato ea chaxatanaito ōikani ratenifo. Akka a ea yoi mekaito tsōa nikanima. ¹⁰ Ea askafaito ē yōkani iskafakī: ‘¿Ifo, ē afeskatiromē?’ ē faito, nōko Ifāfe ea iskafani: ‘Fininākfāta Damasco ano katāfe. Anoxō ē mia yoi kaikai mī afaa afeskafaimākai,’ ea fani. ¹¹ Akka anā ē fēro ōitiroma ini, nā luzpa ea fechaxki mā ea fēxoano. Nāskakē a efe foaifāfe ea mētsoxō Damasco ano iyonifo.

¹² “Nāno feronāfake āfe ane Ananias ika ini. Nāato Nios nikakōixō a Moisés yoini keskara nikakōipaoni. Nānoxō judeofāfe Damasco ano ikaxō aōnoa yoisharapaonifo. ¹³ Ē Damasco ano nokoano ekeki Ananias oni ea ōiyoi. Mā ekeki oxō ea iskafani: ‘Efe yorashta Saulo, anā ōife,’ ea faino koshikōi ē anā fēro ōini. Nāskaxō ē ōisharakōini. ¹⁴ Anoxō ea yoini iskafakī: ‘Nōko xinifāfe āto Niospa mia katoa, a mia amapaiyai keskara mī tāpinō. Askatari āfe Fake sharafinākōia mī ōinō, āfe meka sharafinākōia nikayanā. ¹⁵ Nāskaxō mī ato yoixii Niosnoa, nā maniafo tui anoa, nā mī ōiaifoya, nā mī nikaifo. ¹⁶ Nāskakē samarakakima koshikōi fininākfāta maotisafe faka mēra ikīpakekafāfe nōko Ifāfe āfe aneoxō mia chaka soaxonō,’ ea fani” ixō Pablo ato yoini.

Pablo ato yoini a judeofoma mēra Epa Niospa nīchini

¹⁷ Anā Pablo ato yoini iskafakī: “Mē Jerusalén ano anā oax, Nios kīfiti pexefā mēra ē kani anoxō Nios kīfikai. Nānoxō ē ōia oa namakē ōia ē fani. ¹⁸ Ē nōko Ifo ōini ea iskafaito: ‘Nā Jerusalén anoax koshi tsekekaitāfe, mī eōnoa yoiaito mia tsōa nikama kiki,’ ea fani. ¹⁹ Ea askafaito ē kernakī iskafani: ‘Ifo, mā ea tāpiafo nā ichanāti pexe mēranoafo kaxō ē ato achixō karaxa mēra ē ato ikimapaoni a mia Ifofaifo. Askatari ē ato koshaketsapaoni. ²⁰ Askatari a mī inakōi Esteban reteaifono, ēri nāno ato fe ini reteaifono. Nāskaxō ē ato rapati kexexoni.’ ²¹ Ē askafaino nōko Ifāfe ato yoini: ‘Fininākfāta fāi katāfe, mai fetsafo ari chaikōi ē mia nīchikai a judeofoma ari,’ ea fani,” ixō Pablo ato yoini.

Soraro xanīfāfe Pablo kexeni

²² Ato askafaito nikakani, akka fāsikōi yorafo mekainīfōfānifo: “Na feronāfake chaka retefe anā niyamanō,” fayanā chakafakī mekafanifo. ²³ Nāskakakī ōitīfishkikī finayanā fāsikōi mekakakī āto rapati taa taa ayanā fomākīa mapo saakī fetsanifo. ²⁴ Askafaiifāfe nikakī a soraro xanīfāfe ato yoini Pablo karaxa mēra ikimanōfo, koshaketsakaxō, nāskafaifono ato yoinō afeskai a yorafo akiki chakai mekakanimākai. ²⁵ Akka mā metexk-ereakaxō koshapaiyaifono, a soraro xanīfo fētsa Pablo yoini iskafakī: “¿Tsōa mia yoiamē mā romanō koshanō xanīfo yōkaxoma?”

²⁶ Askafaito nikai a soraro xanīfo āfe xanīfokōi yoikai kani iskafakī: “¿Mī afeska faimē, na feronāfakeri nofe romanō?”

²⁷ Askafaito nikakī soraro xanīfokōi Pablo ano kani yōkai. “¿Mī chanīmamē mī romanōmē?” ixō yōkaito, “Ēje, ēri romanōki,” Pablo fani.

²⁸ Askafaito nikakī a xanīfāfe yoini iskafakī: “Ē romanō ixiki kori ichapa ē ato ināni, akka taeyoi ē romanō iyopaonima,” fāto nikakī, Pablo kemani iskafakī: “Akka ēfi romanōkōiki,” fani.

²⁹ Ato askafaito nikakani a koiro fichi koshapaiyaifo a makinoax fonifo. Nā soraro xanīfōfe mā tāpiax Pablo romanōkōikē nikai ratekōini cadenānā ato metexkerekamax.

Judeofāfe āto xanīfāfe ferotaifi Pablo yoini

³⁰ Nāskata pena fetsa soraro xanīfokōichi tāpīpaikōikī judeofāfe aōnoa afaa yoiafomākī, a cadenānā menexafo mēpeni. Nāskaxō ato ichanāfani a Niosnoa ato yoimisfo ato kexemisfoya, a xanīfokōifo. Nāskaxō Pablo kāimaxō āto ferotaifi nīchini.

23

¹ A xanīfofo ōikī Pablo ato yoini iskafakī: “Efe yora mīshtichi, nā Epa Niospa ea yoikī taefani keskai, nē askakōimis. Efe ōiti mēraxō ē Nios shinākoīyanā ē sharakōimis,” ixō ato yoini.

² Akka Ananias ato Nios kīfixomis āfe xanīfo ini. Nāato a Pablo ketaxamei nia yoini Pablo apasnō. ³ Askafaito ōikī Pablo kemani iskafakī: “Epa Niospa mia koshai mīkai afaa tāpiama. Mī ano tsoaxō mī ea pārāi a Moisés yoini keskara nikaimara ixō. Akka mīroko a Moisés yoini keskara nikakaspakī, mī ea ato apasmana,” ixō Pablo yoiaino, ⁴ a anoxō ōiaifāfe Pablo iskafanifo: “¿Afeskakī a ato Nios kīfixomis xanīfo mī chakafakī mekafaimē?” faifono, ⁵ Pablo

ato yoini: “Efe yora mīshtichi, ē tāpiama nato ato Nios kīfixomis xanīfofiano. Akka kirika ano kenekī iskafanifo: ‘Māto xanīfo chakafakī mekafayamakāfe, ixō yoinifo,’ ixō Pablo ato yoini.

⁶ Nāskaxō mā tāpixō ano fisti ichanāfono saduceofoya fariseofo fāsikōi Pablo ato yoini: “Efe yora mīshtichi, ēri fariseo, ēfe kaifofori fariseofo. Akka ea chakafakī mekafakani, yora naax anā ototirora ixō ē chanīmara faino.”

⁷ Pablo ato yoikī askafaito nikakani, fariseofo fe saduceofo āa ranā feratenānifo. Nāskakanax ichanākanax paxkanānifo. ⁸ Akka saduceofāfe yoimisfo: “Naax nō anā ototiroma,” famisfo. Askatari anokai ājirima anorikai nōko yōshima famisfo. Akka fariseofāfe keyokōi chanīmara famisfo. ⁹ Nāskakanax fāsikōi mekainīfofānifo, akka nāno ranāri inifo a Moisés yoikī kirika keneni keskara ato tāpimamisfo. Nāfo fariseofo inifo, nāfāfe niinīfofākaxō yoinifo iskafakakī: “Na feronāfakekai afaa chakafama. Ōitsai, yōshi sharapa yoiyamāki Niospa ājirinī yoia rakikīa,” ixō yoinifo.

¹⁰ Ato askafaino fāsikōi mekai xatenifoma. Nāskakaxō Pablo achikaxō nini nini akanai-fono nā soraro xanīfo ratekōini. Nāskakē āfe sorarofa kenamani, ato anoa ifixō anā āfe pexe ano iyoikaxiki.

¹¹ Nā fakishi Pablōki nōko Ifo nokoxō iskafakī yoini: “Pablo, inimafe. Na Jerusalén anoafono eōnoa mī ato yoimis keskafakī na Roma anoafori ato yoife,” fani.

Pablo retexikakī itipinīsharanifo

¹² Nāskata pena fetsa ranāri judeofo yoinānifo Pablo retexikakī. “Nō Pablo retexoma nō foni tenekī taefanō, afaa piamata afaari nō ayaimakai, noko Niospa retetiroki. Akka mā Pablo retexō chipo nō pixikai,” ikanax yoinānifo. ¹³ Cuarenta feronāfakefo anori yoinānifo. ¹⁴ Nāskakata nā feronāfakefo fonifo a ato Nios kīfixomisfāfe āto xanīfofo fe a judeofāfe āto xanīfofo ikafo ano. Iskafakī ato yoifokani: “Nō yoia iskafakī: ‘Pablo retexoyoma, nō foni teneyoi nō afaa piyamata afaari nō ayaima. Nō askayamaino Epa Niospa noko retetiro,’ ixō nō yoia,” fani. ¹⁵ “Akka iskaratīa mā na xanīfo fetsafo feta, na soraro xanīfo yoikāfe mato ano penama Pablo efenō. Feparaxō yoikī iskafakāfe: ‘Nō Pablo yōkasharapaiki noko nīchixōfe nō yōkanō afaa aōnoa yoiafomākī,’ ixō yoikāfe. Oaito ōiki nō achixō reterisafanō,” fani.

¹⁶ Nāskafono Pablo āfe piāka nikani nō Pablo retenō ikaifono. Nāskax sorarofa mēra kani anoa āfe koka Pablo yoikai. ¹⁷ Mā Pablo nikaxō, soraro xanīfo fetsa kenaxō yoini iskafakī: “Na naetapa xanīfokōi ano iyotāfe, afara yoipai kiki,” fani.

¹⁸ Nā soraro xanīfāfe āfe xanīfokōi kenaxō yoini iskafakī: “Na karaxa mēra ikato Pablo ea kenaxō ea yoia na naetapa ē mikiki efenō afara mia yoipai kiki,” faito, ¹⁹ nā xanīfokōichi nā naetapa mētsofaixō a fisti iyoxō orixō yōkani: “¿Afaa mī ea yoipaimē? Ea yoife,” faito, ²⁰ nā naetapa yoini iskafakī: “Mā judeofo yoināfo, mia yoixikakī mī penama a xanīfofo ichanāfo ano mī ato Pablo iyoxonō. Mia feparapaikani nō Pablo yōkasharapai aōnoa nō nikasharapai mia fai fekanō. ²¹ Akka mia askafafono ato nikayamafe. Cuarenta feronāfakefo fai nēxpakīa kexekaxō ēfe koka manafokī achikaxō retexikakī. Nō Pablo retexii nō foni tenekī taefanō afaa piyamata afaari nō ayaimakai. Nō askayamaito Epa Niospa noko retetiroki. Akka mā Pablo retexō chipo nō pikai ikax yoināfo, mā itipinīkōikaxō mia manafo mī ato afafaimākai,” ixō nā naetapa yoini.

²² Askafaito nikakī a soraro xanīfāfe nā naetapa nīchini, “Na ea mīa yoiai anori tosa yoiyamafe,” fayana.

Pablo xanīfo Félix ano nīchinifo

²³ Nāskaxō a soraro xanīfokōichi afe xanīfo rafe kenaxō ato yoini dos cientos sorarofa yoixō nīchinōfo, askatari setenta kamayonō fotanōfo, askatari dos cientos sorarofa ashifoya fotanōfo Cesarea ari fōkani fakishi. ²⁴ Nāskata kamayori ato itipinīfamani a kamaki Pablo tsoax kanō. Nāskaxō ato yoini kexesharata iyotanōfo xanīfo Félix ano. ²⁵ Nāskaxō kirika kenexō ato ināni a xanīfo Félix foxotanōfo iskafakī kenexō:

²⁶ Efe xanīfo Félix, ēkīa Claudio Lisias, ē mia kirika kenexō fomai mia yoisharayanā. ²⁷ Na feronāfake judeofāfe achixō retepaiyafono, akka ē nikaita ēri romanōki ikaito, nāskaito nikakī ēfe sorarofa fe kaxō ē ifita. ²⁸ Afaa chakafaamakī ē tāpipaikī, judeo xanīfofo ichanāfo ano ē iyoita. ²⁹ Anoxō ea yoiaifāfe ē nikaita, na Pablo a Moisés yoini keskara shināima ea faifāfe. Akka afaakai chakafama retepanāfāfe, askatari karaxa mēra ikimapanāfāfe. ³⁰ Akka mē tāpia judeofāfe ea feparapaiyāifāfe Pablo retepai kakī. Nāskakē ē mikiki nīchi. A Pablo chakafaifori nāfōri ē mia ari nīchi, afaa Pablo chakafamākī mia yoinōfo. Nā tii ē mia yoi efe xanīfāfe,

ixō keneni. ³¹ Āto xanīfāfe ato yoia keskafakī kexesharakōixō, fakishi Pablo iyonifo Antīpatris ano. ³² Askata pena fetsa sorarofa atiri nēteferakani āto pexe ano fenifo a tāe foaifo. Akka a

kamayonō foaifo Pablo fe fonifo. ³³ Mā Cesarea ano nokokaxō xanīfo ano Pablo iyonifo, a āto xanīfāfe kirika kenexō manamana, nā xanīfo Félix inānifo. ³⁴ Mā a kirika kene anexō, nā xanīfāfe Pablo yōkani: “¿Mī fanīamē?” faito, “Ē Cilicia anoa,” Pablo faito nikakī, ³⁵ anā yoini iskafakī: “A mia mekafakī chakafaifo mā fēkaxō mīōnoa yoiāifāfe ē nikanō mia afaa fakanimākai ē ato manayonō,” ixō yoini. Nāskaxō sorarofō yoini Herodes xanīfo ika ano iyoxō Pablo kexesharakōinōfo.

24

Pablo xanīfo Félix yoini

¹ Mā cinco nia oxata nā ato Nios kīfixomis xanīfokōi, āfe ane Ananías, Cesarea ano oni. Judeofāfe āto xanīfo fetsafo fe feronāfāfe fetsari ato fe kani, āfe ane Tértulo, nāato ato yoixomis ini. Nāfo xanīfo ano fonifo, Pablo chakafakī mekafaxikakī. ² Mā nokoafono xanīfāfe Pablo ifitanōfo ato yoini. Mā efeafono nā Tértulo Pablo yōani. Iskafakī nā xanīfo Félix yoini: “Aicho xanīfo, mī noko ikinā nō isharakōiaki. Aicho mī tāpisharakōiaki nōko maitio anoafō mī ato yoisharakōimis noko chakafanōfoma. ³ Fanīmā mīshitxō mī askafaito nō nikamis. Nāskakē mī noko sharafamiskē nō mikiki inimasharakōimis. ⁴ Akka ē mia yoikī, ē mia chai samaratapaimakai. Nō mia yoiāito noko pishta nikayofe. ⁵ Na feronāfāfe mā nō ōimis ato fekaxtefamis, fakima mīshitfo kafāsakī ato pārafōfāsafakī judeofāfe anoris shinānōfoma. Askatari āto xanīfo nazarenōfo ato mekamamis. ⁶ Askatari nōko Nios kīfiti pexefā chakafakī mekafaito nikakī nō achita. ⁷ Akka nā sorarofāfe āto xanīfo Lisias nomakinoa kerexkai ifita. ⁸ Anoxō noko yoikī iskafaita: ‘Māri Cesarea ano fotakāfe afaa Pablo chakafamākī, a xanīfo yoixikakī.’ Nāskakē nō mia ano oa. Yōkaxō mī tāpitiro nā afara chakafakē aōnoa nō yoiāi keskara,” ixō yoiāifono, ⁹ judeofāferi ano fisti ichanākaxō, nānoriri yoinifo: “Chanīma,” fanifo.

¹⁰ Askafaiifāfe nikakī xanīfāfe Pablo āfe mēkemā, “Mekafe,” faino, Pablo niinākfā yoini iskafakī: “Inimākōikai ē mia yoi ē afaa chakafamisma. Mē tāpia na mai anoafāfe mī āto xanīfokōi, mā mī xini ichapa aka xanīfokī. ¹¹ Akka mī ato yōkaxō mī tāpitiro ē oxa ichapama doce nia ē ika na Jerusalén ano ē oita anoxō Epa Nios kīfixikī. ¹² Ē tsofe feratenāito ea ōimisfoma, Nios kīfiti pexefā mēraxori ē tsoa mekafamisma, ichanāti pexe mēraxori ē tsoa mekafamisma, askatari a pexe rasi mēranoax ē tsofe feratenāito ea tsoa ōimisma. ¹³ Na yorafokai āa kaxpa chanītirofoma, ē afaa chakafaitokai ea ōiafoma. ¹⁴ Akka ē mia yoitiro nōko xiniifāfe āto Nios ē shinākī ē kīfimis. Nōko Ifo noko yoipaoni keskafakī akka na yorafāfe āa chanīra ea famisfo. Akka a Moisés yoikī kirika kenenī nāri ē chanīmara fakōimis. A Niospa ato shināmanaino yoipaonifori, nāfori ē chanīmara fakōimis. ¹⁵ Akka na ea yōāifāfe a yora sharafoya yora chakafa nafono Niospa ato otofaxii chanīmara famisfo keskafakī ēri nā akaifo keskafakī chanīmara famis. ¹⁶ Nāskakē mēxotaima ē isharapaikōimis, shināsharakōita. Niospa mā ea ōimis, yorafāferi mā ea ōimisfo.

¹⁷ “Mai fetsa ari kafāsakī mē xini ichapa akatsaxakī, ēfe mai ano ē oita a afaamaisfo ato kori ināyoi, askatari a Nios kīfiti pexefā mēraxō Nios afara ināxiki. ¹⁸ Epa Niospa noko yoini keskarakōi ē faa. A nō imis keskai nē askakōikī Epa Niospa ferotaifi afaa chakafatama ē isharakōia. Akka yora ichapa ano efe ikafofoma. Askatari anoax tsoa fāsi mekaitama. Akka atiri judeofo Asia mai anoax fenixakakī ea ōiafo. ¹⁹ Nāfāfe ē afara chakafaito ea ōifikaxō çafeskai afo feafomamamē, nonoxō ea yōaxikaki a ē afara chakafaito ōiafo keskara? ²⁰ Akka afo feyamaifono, nā nonoafō mī ato yōkatiro ē afaa chakafaito ea ōiafomākī judeofāfe āto xanīfofōfāfe ferotaifi. ²¹ Akka ē anoxō fāsikōi mekainākfā ē ato yoiāi iskafakī: ‘Yora naax anā ototiro,’ ixō ē chanīmara faito, mā ea chakafakī mekafai ixō ē ato yoiāi,” Pablo xanīfo fani.

²² Akka na Félixpa Jesúsnoa tāpia ini. Nāskaxō shināni iskafakī yoianā: “Mā soraro xanīfo Lisias oxō ea yoisharaiyonō ē tāpisharanō mī afaa chakafaamākī,” ixō yoini.

²³ Nāskaxō xanīfo Félixpa soraro xanīfo fetsa yoini anā Pablo karaxa mēra ikimayonō a āfe yorafāfe pimapaikakī ōipaiyāifāferi ato ikimanō.

²⁴ Mā oxa ranāta xanīfo Félix anā oni āfe āfi Drusila fe. Nā āfe āfi judeo kēro ini. Nāskaxō Félixpa anā Pablo kenamani. Mā oxō Pablo ato yoiāito nikanifo Jesús meka shara afeskaxō nō Jesucristo Ifofatiromākī. ²⁵ Akka Pablo yoini afeskax nō isharatiromākī, askatari afeskax nōa nō kexemesharatiromākī. Jesús Ifofaxma naax omiskōipakenakafo ixō yoiāito nikai Félix ratekōini. Nāskaxō yoini iskafakī: “Iskaratīa katāfe ē mia anā kenaxikai afaa afeska fayamakī,” ixō yoini.

²⁶ Pablo askafaito nikakī Félixpa shināni ea Pablo kori ināno ē kāimatiro ixō. Nāskakī mēxotaima kenapaoni afe mekaxiki. ²⁷ Nāskakī anoxō xinia rafe anifo. Nāskatari Félix tsekeni anā xanīfo inima, fetsa ini xanīfoi, āfe ane Porcio Festo. Akka Félixpa karaxa mēranoa Pablo kāimani, judeofāfe aōnoa yoisharakōinōfo.

25

Festopa ferotaiŕi Pablo yoini

¹ Festo nokoni xaniŕo ixiki. Mā tres nia ikax Cesarea anoax Jerusalén ari kani. ² Nārixō a ato Nios yoixomisfāfe āto xaniŕofofāfe a judeo xaniŕo feta Pablo chakafakī mekafanifo. ³ Nāskaxō Festo yōkanifo Festopa ato yoinō Jerusalén ano Pablo iyotanōfo. Akka atiito shinānifo fai nēxpakīaxō nō Pablo retenōra ikaxō. ⁴ Askafaiŕife nikakī akka Festopa ato kemani iskafakī: “Pablo Cesarea ano karaxa mēra ika. Akka ari mē samama kai,” ato fani. ⁵ Nāskaxō ato yoini iskafakī: “Nāskakē mātō xaniŕo Cesarea ano efe fotirofo, na Pablo afaa chakafaamakī arixō yoixikakī.”

⁶ Festo Jerusalén ano oxa ranāyoni. Nāskata Cesarea ano anā oni. Nānoxō pena fetsa a xaniŕo tsaomisfo anoaxō tsaoxō ato yoini Pablo ifitanōfo. ⁷ Mā Pablo oano ōikakī, judeofāfe Jerusalén anoax fēkaxō, akiki fokaxō mekafakī chakakōi fanifo. Askafaiŕono, “Afaa Pablo chakafamākī ea yoikapo,” xaniŕife ato faito, tsoa afaa inima Pablokairoko afaa chakafaito ōikanax āamāi noikaspakakī. ⁸ Askafaiŕife nikakī Pablo ato kemani iskafakī: “Ēkai afaa chakafama, a Moisés judeofo yoini keskarari ē chakafamisma, a anoax Nios kīfiti pexefāri ē chakafamisma, askatari romanō xaniŕo ē chakafakī mekafamisma.”

⁹ Askafaito nikakī judeofāfe nōko xaniŕo Festo sharakōira fanōfo Pablo yōkani iskafakī: “Ĵmī Jerusalén ano kapaimē? Anoxō ē ōikanō mī afaa afeska famākī.”

¹⁰ Askafaito nikakī Pablo kemani: “Ē ari katiroma mīrimāi romanōfāfe xaniŕokē nonoxō ea yōkatirofo. Mā mī tāpia, ē judeofo chakafamisma. ¹¹ Akka ē afara chakakōifaito ea ōikaxō ea retetirofo. Ea retekanira ikax ē meseima. Akka ē afaa chakafayamaito āa ea pāraxō ea ari nīchitirofoma ea retenōfo. Akka ē xaniŕo finakōia César ano ē kapai anoaxō ea yōkanō.”

¹² Askafaito nikakī Festopa a afe rafeafo feta yoini: “Mā mī yoiaiki xaniŕo finakōi ari katāfe arixō mia xaniŕife yōkanō,” fani.

Xaniŕo Agripa ano Pablo iyonifo

¹³ Mā ano ikatsaxakī pena fetsa xaniŕo Agripa āfe chiko Berenice fe Cesarea ano fonifo Festo fe mekasharai fokani. ¹⁴ Nāri oxa ranāifono, Festopa Pabloōnoa xaniŕokōi iskafakī yoini: “Na karaxa mēra feronāfake fisti ika Félixpa ikimayameano. ¹⁵ Ē Jerusalén ano ikano a Nios ato kīfixomisfāfe āto xaniŕo fe judeofāfe āto xaniŕo ekeki fēkaxō Pablo chakafakī mekafaitafo iskafakī ea yoianā na feronāfake omiskōimafe ea faitafo.

¹⁶ “Ea askafaiŕono ē ato yoikī iskafaita: ‘Nō romanōfāfe askara feyafamisma nikasharaxoma nō tsōa retetiroma. A chakafakī mekafaiŕo fe ato fe yoināmano, afeskakī aōnoa yoikī chakafakī mekafakanimākai.’ ¹⁷ Nāskakē mā nono Cesarea ano feafono, pena fetsa mē xaniŕoxō a xaniŕo tsaomisfo ano tsaoxō, ē ato manamayamea Pablo ifitanōfo. ¹⁸ Akka afaa chakafaamakī ea yoikapo ē ato fafiaino, tsōa aōnoa afaa chaka ea yoiama. Afara chakafakī finakē ea yoikanira ixō ē shināfiaino. ¹⁹ Akka aōnoa yoikī iskafaiŕife ē nikaita: ‘Na Pablo Niosnoa yoisnisfo anori yoima, a feronāfake Jesús mā nafianino, mā anā otoyamea,’ ixō yoisnisfaiŕife ē nikaita. ²⁰ Ē afeskaimē na yoiaifōōnoakai ē tāpiama ixō ē shināita. Nāskaxō ē Pablo yōkaita, Jerusalén ano kapaimākai xaniŕife anoaxō yōkanō a aōnoa yoiaifo keskara.

²¹ “Ē askafaito ea Pablo yoikī iskafaita: ‘Ē anā Jerusalén ano kapaima. Nonoxō ēfe xaniŕokōichi ea yōkatiro,’ ixō ea yoita. Ea askafaito ē ato yoita anā Pablo karaxa mēra ikimanōfo, nā ē nīchiatīa,’ ixō Festopa yoiaito, ²² Agripa yoikī iskafani: “Ēri na feronāfake nikasharapaikōi,’ ixō Agripa yoiaito, Festopa kemani iskafakī: “Mī penama nikatiro,” fani.

²³ Nāskata pena fetsa Agripa āfe chiko Berenice fe rapati sharakōi safekanax xaniŕife pexe mēra ikinifo. Soraro xaniŕo fe a pexe rasi anoax xaniŕo ato fe ikinifo. Nāskaifono Festopa Pablo ifitanōfo ato yoini. ²⁴ Mā Pablo efaafono Festopa xaniŕo Agripa iskafakī yoini: “Efe xaniŕo Agripa, a xaniŕo fetsafori nofe ichanāfāfe na feronāfakekia ōikapo. Judeofāfe ekeki efafo aōnoa afara chaka yoianā. Jerusalén anoaxō chakafamisfo, nono Cesarea anoaxori chakafamisfo. Mēxotaima fāsikōi mekayanā retefe ea famisfo. ²⁵ Akka afaa chakafakai ē ōima ē retepanā. Akka iskaito ē nika: ‘Ē xaniŕo yoipai ē afaa chakafamākī ea yoinō,’ ixō Pablo yoiaito ē nika. ²⁶ Akka afaa chakafaitokai ē ōiama, aōnoa yoikī ēfe xaniŕo ē kirika kenexō ē fomapanā. Nāskakē mato ano ē Pablo efea mīmāi xaniŕo finakōikē. Efe xaniŕo Agripa, mī Pablo yōkaxō mī ea yoitiro nānori yoikī ē xaniŕo kirika kenexō fomanō. ²⁷ Akka ē shinā askara sharama na feronāfake xaniŕo ari nō nīchitiroma tāpixoma afaa aōnoa yoiafomākī.”

26

Pablo xaniŕo Agripa ano kaxō yoini a aōnoa chakafakī yoiafo keskara

¹ Nāskakē xaniŕo Agripa Pablo yoini iskafakī: “Mī yoitiro afeskakī mia chakafakī mekafafomākī,” faito Pablo mēshainākfā ato yoini iskafakī: ² “Xaniŕo Agripa, ē inimakōi mī ferotaiŕi yoi na judeofāfe eōnoa afara chaka yoiafo keskara yoi, na eōnoa yoiafo keskara

mī chanīmara fanōma. ³ Akka mī xanīfokōi mā mī ōimis, nā judeofo imis keskai nō yoināito. Nāskakē ē mia yoi, fekaxtekima mī ea nikayonō,” ixō Pablo yoini.

Pablo Jesús Ifofamax isharayopaonima

⁴⁻⁵ Anā Pablo ato yoini iskafakī: “Keyokōi judeofāfe tāpikōiafo a ē ato mēranoax imis keskara, ēfe mai anoxō tāpikāta, Jerusalén anoxori tāpiafo. Askatari mā tāpiafo, akka mia yoipaikakī mia yoitirofo, ēri fariseo. Nā nōko xinifāfe noko yoipaonifo keskara ē nikakōimis. ⁶ Epa Niospa nōko xinifo yoini keskafakī, a yora naax anā ototirora ixō ē chanīmara faito, ea chakafakakī mato ano ea efafo. ⁷ Ēfe kaifo judeofāfe nā doce xoko fetsafāfe, nā Epa Niospa yoyoini keskara ōipaikakī manamisfo. Nāskakē Epa Nios kīfimisfo, penata kīfita fakishi kīfiki famisfo. Nāskarifiakī ēri ōipaikī ē manaino, na judeofāfe āa ea pārakakī ea chakafakī mekafamisfo. ⁸ ¿afeskakī mā chanīmara faimamē, Niospa yora nakē otofiatitrono?” ixō Pablo ato yoini.

Pablo ato yoini a Jesús Ifofafo ato omiskōimapaonixakī

⁹ Anā Pablo ato yoini iskafakī: “Ēa shināxō a Jesús Ifofafo ē ato omiskōimapaoni. Nā Jesús Nazarete ano ikano, āfe ane nikakaspakī ē chakafapaoni. ¹⁰ Jerusalén anoxō ē ato askafapaoni. A Nios ato kīfixomisfāfe āto xanīfofōfāfe ea yoiafano a Nios Ifofafo ichapakōifo ē ato karaxa mēra ikimapaoni. Ato reteafonori nō ato retenō ē ato fapaoni. ¹¹ Mēxotaima ē ato omiskōimapaoni, anā Jesús sharara fayamakāfe ixō. Nā ichanāti pexefo mēraxō ē ato askafapaoni. Ē atoki ōitifishkikī finakōikī pexe rasi fetsafo mēra kaxori ē ato omiskōimapaoni,” ixō Pablo ato yoini.

Pablo yoini afeskaxō Jesús Ifofamāki

(Hch. 9.1-19; 22.6-16)

¹² Anā Pablo ato yoini iskafakī: “Nāskakē achixō ē ato omiskōimapai pexe rasi Damasco ano ē kani, a Nios ato kīfixomisfāfe āto xanīfofōfāfe ea yoikaxō ea nīchiafono. ¹³ Xanīfo Damasco ari fāi kakī ē ōini xini keya nai mēraxō chaxatanaito oa xinī chaxa keskara inima, chaxakī finakōini. Ea kemataima chaxakōia ini, a efe fofaifori ato askafani. ¹⁴ Noko askafaino nō nāmā pakeni. Askata āfe meka ē nikani hebreo mekapa ea yoiaito iskafakī: ‘Saulo, Saulo, ¿afeskakī mī ea omiskōimanimē? Ea māa iskafai, mīakōi mī chakamei oa fakka ifiki chachixō pae meetiro keskai.’

¹⁵ “Ea askafaito nikakī ē kemakī iskafaita: ‘¿Ifo, mī tsoamē?’ ē faito, nōko Ifāfe ea kemakī iskafaita: ‘Ēkīa Jesús, ea māa omiskōimamis. ¹⁶ Fininākakāfe ē mikiki nokoaki mī ea Ifofanō. Askatari na mī ōiai keskara mī ato yoinō, a ē mia chipo ōimanai keskarari. ¹⁷ Ē mia kexesharaxii judeofāfe mia retepaiyaifono, yora fetsafāferi mia askafaifono ē mia kexesharaxii. Nāskakē ato mēra ē mia nīchi. ¹⁸ Nāskakē ato mēra ē mia nīchi, eōnoa mī ato yoinō anā fakish mēra nia keskara inōfoma, askatamaroko penata nia keskara shara inōfo, Satanās chakata ato yoiaito anā nikayamanōfo, askatamaroko Nios Ifofanōfo. Nāskakaxō ea chanīmara fakaxō afara chakafakatsaxakakī āto chaka xatekanax Niospa yoini keskai efe ipaxanōfo,’ ixō Jesús ea yoini,” ixō Pablo ato fani.

Jesucristo yoiaito namakē ōia keskara faxō Pablo nikakōini

¹⁹ Anā Pablo ato yoini iskafakī: “Ēfe xanīfo Agripa, ē nikakaspanima a ē namakē ōia keskara faxō nī mēraxō ea yoiaito. ²⁰ Damasco anoxō ē ato yoikī taefani Jesúsnoa meka shara ato yoikī. Nāskata Jerusalén anoafori ē ato yoini, Judea mai anoafori ē ato yoini. Askatari a judeofoma ē ato yoini iskafakī: ‘Māto chaka xatekāfe Nios Ifosharakōifaxikakī, askaxori afarafo shara fakī ato ōimakāfe mato chanīmara fanōfo mā Nios Ifofasharakē,’ ixō ē ato yoiaito, ²¹ judeofāfe ea achinifo Nios kīfiti pexefā mēraxō ea retepaiyaifono. ²² Akka ea retepaiyaifono Epa Niospa ea kexesharani, iskaratīari ē isharakōia Niosnoa ato yoianā. A xanīfokōifoya a afamafori ē ato yoyimis. Afaa fetsa ē yoimisma. A ato Niospa shināmanaino Moisés feta yoipaonifo anori fisti ē yoimis. ²³ Iskafakī ato yoipaonifo, na Niospa nīchia Cristo omiskōiax naxii. Mā nafias anā ototaxii, mā ototaxō ato yoisharax afeskax Epa Nios fe ipaxatirofomākī, judeofoya a judeofoma,” ixō Pablo ato yoini.

Pablo Agripa shināmapaini akairi Jesús Ifofanō

²⁴ Pablo yoikī askafafiaino, Festopa mekatimafani iskafakī yoini: “Pablo, mā mī fekaxtekōia mēxotaima kirika fisti anekī tāpikōiax,” fani.

²⁵ Askafaito nikakī Pablo kemani iskafakī: “Ēfe xanīfo Festo, ē fekaxtemisma. Askatamaroko na ē yoiai anori sharakōi, chanīmakōi ē mato yoi. ²⁶ Na ē mato yoiai anori nōko xanīfo Agripa mā tāpikōia a ē Jesúsnoa yoimis anori. Nāskakē xafakīakōi āfe ferotaiifi ē yoi, akka mē tāpia na ē yoiai anori nāatori mā tāpia. Nā ē yoiai anori ē nikamisma mā itūroma onekai ē yoimisma. ²⁷ Ēfe xanīfo Agripa, a Niospa ato shināmanaino yoipaonifo keskara, ¿mī chanīmara faimē? Akka ē tāpia mī chanīmara fai,” ixō Pablo Agripa yoini.

²⁸ Askafaito nikaki Agripa kemani iskafakī: “Mā mī ea chanīmara famakerana Jesús Ifofafe,” ixō yoini.

²⁹ Askafaito anā Pablo yoini: “Iskaratīa iyamai afetiara ea keskara mī inō ē fichipai, askatari nā mā ea nikaifo keyokōi ea keskara mā inō. Nōko Ifo Jesús Ifofai nāskafiax karaxa mēra mā ikiyamanō ē imis keskai. Nānori ē mato Epa Nios kīfxomis,” ixō Pablo ato yoini.

³⁰ Ato askafaito nikai xanīfokōi fininākfani, xanīfo fetsa fe, Bereniceri ato fe askani, a ano tsoafori ato fe fininīfōfānifo. ³¹ Nāskakanax ori fokanax āa ranā yoinākani iskanifo: “Na feronāfākekai afaa chakafama afeskakīkai retetirofoma, askatari afeskai karaxa mēra itiroma.”

³² Nāskaxō Agripa Festo yoini iskafakī: “Na feronāfake nō kāimakerana, ē xanīfo César ari kaimakai noko faīno,” ixō Agripa Festo yoini.

27

Pablo Roma ari nīchinifo

¹ Nāskakē shināxō Italia ano noko nīchinifo. Pablo yafi a afe karaxa mēra imisfo soraro xanīfāfe āfe ane Julio ato kexenō. Nā sorarofō, “Xanīfo finakōia kexemisfo,” ato famisfo.

² Nānoax kanōanāfānē nō nanekaini. Nā kanōanāfā Adramitio fai fotoa anoax oaino mā itipinīkōiax Asia fai fotoa ano kaino. Aristarcori nofe ini, nā Aristarco Tesalōnica ano ini, Macedonia mai ano. ³ Nānoax kaax pena fetsa Sidōn fai fotoa ano nō nokoni. Nānoxō soraro xanīfāfe āfe ane Julio nāato Pablo noikōikī iskafani: “Mefe yorafo kaxō ōitāfe afāfe nā mī fichipaiyai keskara mia inānōfo,” ixō yoini. ⁴ Nāskata Sidōn anoax nō anā kanōanāfānē kaino, nēfefanē noko akaino nā fakafā nakirafe mai toomāfā āfe ane Chipre aōri nō kani, takai fetsaxomāi noko nēfefanē katimafaino. ⁵ Askata mā nō kakī Cilicia yafi Panfilia fakafā kesemēkōi nō finōfaini. Askata pexe rasi Mira ano nō nokoni. Nā pexe rasi Mira Licia mai ano ini.

⁶ Nānoxō a soraro xanīfāfe kanōanāfā fetsa fichini Alejandrīa anoax okē. Nā kanōanāfā Italia anoax kaino, nāo noko naneni aō nō kanō. ⁷ Fenāmāshta kai nō oxa ranākōini, nō kanōanāfā tōfei nō xokenākōini. Nāskax pexe rasi Gnido okiri nō nokoni. Anoxō nēfefanē noko anā akaino, pexe rasi Salmona okiri nō finōfaini. Nā Creta ano fakafā nakirafe mai toomāfā okiri nō kayakeni. ⁸ Nāskata nēfefanē noko katimafaino nō samarakakōi nō fekaxtekōini. Nāskata nō nokoni pexe rasi āfe ane Buenos Puertos ano. Pexe rasi Lasea chaima ini.

⁹ Nāskai mā nō ano samarakōiano, mā mechakaino fakafā pooiki meseniaito ōikī anā katiroma meeki Pablo ato yoini ¹⁰ iskafakī: “Xanīfōfōfāfe, nō katiromaki mesekōi iki kiki mē tāpiaki. Na kanōanāfā yafi nōko afama mīstifo nō fenotiro, askatari nōri nō āsai fetsetiroki,” ¹¹ ato faīno akka tsōa Pablo nikanima. Akka na kanōanāfānē ifāfe yoini: “Maa. Nō meseima, nō āsaima. Nō kanō fokāfe,” ato fani. Ato askafaino nā sorarofāfe āto xanīfāfe nā kanōanāfānē ifo nikanī. Nā rafeta Pablo nikanifoma. ¹² Akka nā fai fototai shara inima anoxō mechaka finōpaifaifono nāskakē anoxō shinānifo: “Nō nonoax kani Fenice ano,” ixō shinānifo. Nā pexe rasi Fenice Creta mai ano ini.

Nēfefanē fakafā anoxō ato ani

¹³ Nāskaxō shinānifo: “Anā nēfefaima kiki, fenāmāshta nefei kiki na nēfe nō kanō,” ikax yoinānifo. Nāskata nānoax mā nō kakī Creta ketokonōkōi nō finōfaini. ¹⁴ Akka mā nō kaino chipo nokoki nēfefākerakī, fakafā pooiki kanōanāfā rafe rafe ani. ¹⁵ Noko askafaino fakafā ketokonō nō kapaifaīno, noko katimafani. Nāskakē nā nēfefanē nā iyopaiyai ari noko yoini. ¹⁶ Noko askafaino nā fakafā nakirafe mai tōo efapama āfe ane Cauda nō finōfaini. Nāno nō finōfainaino anā noko nēfe fāsi anima. Nāskakē a kanōa kafāshara chirotamea fāsi kerexkai kanōanāfā xaki mēra nanenifo. ¹⁷ Mā askafakaxō risfi efapato kanōanāfā nexasharakōinifo ato nēfe tōoxayamanō. Nexakaxō āto sama poteti pekakaxō kanōanāfā mēra rātanifo, nēfe noko iyoyamanō nā mashi āfe ane Sirte ano ikaxō, “Nēfe noko fakirira iyoikanōra,” ikaxō. Nāskakaxō kanōanāfāki nexakaxō āto afeskarafakafānaki nōtanifo, nato nā noko iyopaiyai ari noko iyoikanōra ikaxō. ¹⁸ Akka pena fetsa anā nokoki nēfefani, nāskakē nā kanōanāfā mēraano āto afama mīstifo fakafā naki potaketsanifo. ¹⁹ Askakāta mā tres nia ikano nēfefā nishpayamaito ōi kakī āto risiffoya āto firofo, āto fitifo, āto samafo, fakafā naki potakī mitonifo. ²⁰ Nāskai nēfefā nishpayamaino xini yafi fishifo nō ōitiroma ini, nēfefanē noko ōitimafaino. Nāskatari anā afaa nō shinānima mā nō āsai fetseira ikax.

²¹ Nāskakī mā nō fonī tenekī ranā faano, Pablo niinākakā noko yoini iskafakī: “Efe yora mīstichi, nō afeskakeranama na Creta anoax fena foyamakāfe ē mato fafiaino mā ea nikaitama. Nōko afama mīstifokai nō fenokeranama, mārikai omiskōikeranama. ²² Nāskakē rateyamakāfe. Mā āsaimakai. Kanōanāfā fisti fakafā mēra iki kiki. ²³ Na fakishi Niospa āfe ājiri ekeki nokoakī Niospa nīchiano, nā Niosfi ēfe Ifokōikī, nā ē yonoxomis. ²⁴ Ea iskafakī

yoiaki: 'Pablo, rateyamafe. Mī xanīfo César ano kaikai ato mia yōkanō mī afaa chakafamāki. Mīoxō Epa Niospa na kanōanāfā mēra mefe foaifo ato kexesharai kiki afeskakanima kiki,' ixō ea yoiaki. ²⁵ Nāskakē ē mato yoikai efe yora mīstichi, ratekakima inimakāfe. Epa Niospa ea yoiaki keskara ē chanīmara fakōimiski. Mē tāpiaki tsoa āsaima kiki mā ea ājirinī yoiaki. ²⁶ Akka fakafā nēxpakīa mai toomāfā anoax nōko kanōanāfā tooxai kiki," ixō Pablo ato yoini.

²⁷ Mā nō catorce nia finōta fakafā āfe ane Adriático ano nō nokoni. Nāskakē nānoxō nēfefanē nā noko yoiapaiari ari noko iyoikaino, nā fakish fistichi yamenake kafanaino a kanōanāfā mēra yonomisfo yoinānifo: "Mā nō mai ano nokoikaira," ikanax. ²⁸ Nāskakaxō āto tanātini faka noamāki ixō meenifo. Mā meekaxō ōiafo treinta y seis metros ini, askata afianā ori fokaxō meeafō veintisiete metros ini. ²⁹ Nāskakaxō mesekakī nō tokirinīfakī nokoi katirora ikaxō, cuatro faxō āto firopafāfo nexakaxō kanōanāfāki chenexti fakaxō fakafā naki potanifo, noko nēfefanē iyoyamanōra ikaxō. Nāskakaxō Epa Nios kīfinifo koshi penanōra ikaxō. ³⁰ Nāskaifono akka a kanōanāfā mēra yonomisfo onefaipainifo kanōanāfā mēranoax. Nāskakē a kanōanāfā mēranoa a kanōa kafāshara fotomapainifo. Nō firopafāfo nexaxō kanōanāfā renexte faxō nō fakanaki potaira ikaxō ato feparapainifo. ³¹ Nāskaifono Pablo soraro xanīfo yoini, āfe sorarofoya iskafakī: "Nafo kanōanāfā mēra nēteyamaifono tōsa mato anā iyoyamaino, mā āsai mitokomei," ato faino, ³² sorarofāfe a aō kanōa fotomapaiyairo risfi xatenifo a kanōa fakanaki pakeano fāka fōtanō.

³³ Nāskata mā penaino Pablo shināxō ato yoini afara pishta pinōfo. Iskafakī ato yoini: "Mā nō nomīko rafe akaki nēfefā nishpaira ixō, manayanā a mā pimis keskafakī mā afaa piamakī. ³⁴ Ē mato yoikai pikāfe. Nō piax shara nō itiroki anā mato yora kerox inō. Nō afeskaimakai," ixō ato yoini.

³⁵ Ato yoiakī askafata pāa tsoainīfōfā āto ferotaifi, Epa Nios kīfiki iskafani: "Aicho Epa Niosī, mī noko kexesharaki," fata ato pāa pikīni. ³⁶ Ato askafaino inimakōiyānā anā ratekakīma akairi pini. ³⁷ Akka nā kanōanāfā mēra docientos setenta y seis yorafo nō ini. ³⁸ Mā pii māyakōikāta ato trigofō fakafā naki potanifo, kanōanāfā xaka inō.

Kanōanāfā ikini

³⁹ Mā penaino a kanōanāfā mēra yonomisfāfe, mā mai fichifikaxō tōsa tāpinima. Akka a fakafā chitotanā anoax mashi fichikaxō, "Ono nōko kanōanāfā nō rītiaki kanō," inifo. ⁴⁰ Nāskakata a aō kanōanāfā nexea āfe risfi xatekaxō nānoa ōifainifo. Nāskatari āto fitifo pekaketsanifo kanōanāfā mēstekōi iyoikanō. Nāskata afianā kanōanāfā rechokoki āto samapafā poteinīfōfānifo ato nēfe iyoikanō. Nāskax mā fōkakī mashi chaima fanifo. ⁴¹ Akka mā fofaifono kanōanāfānē mashi tsakax nāno rakanī. Refokirixori mashi tsakakōia ini, pishta ferotiroma. Nāskakē aō chipokirinoax toxai fetseni fāsikōi fākapā poo ikaino.

⁴² Nāskaino sorarofāfe a karaxa mēra imisfo ato retepainifo, tsoa pishta ichoyamanō. "Keyokōi nō ato retenō," ikax yoinānifo. ⁴³ Akka a sorarofāfe āto xanīfāfe Pablo retepaikīma, "Ato reteyamakāfe," āfe sorarofō fani. Nāskaxō ato yoini iskafakī: "Fatoto mā faka feakī tāpiamāki faka feafaitakāfe mashi ano nokoxikakī. ⁴⁴ Akka a faka feakī tāpiafoma tii na kanōanāfā kaxkē aō nonoax fonōfo," ixō soraro xanīfāfe ato yoini.

Nāskakē keyokōi āsaxma mashi ano nokonifo.

28

Pablo mai toomāfā āfe ane Malta ano ini

¹ Mā nō keyokōi fākapā kesemē nokoxō, nō tāpini nā fākapā nēxpakīa mai toomāfā āfe ane Maltakē. ² Nānoxō keyokōi noko ifisharakōinifo. Nānoax nokoki oi ikaino, matsikōi ini. Nāskakē anoxō chii ketefakaxō, "Yoofēkāfe," noko fanifo. ³ Pablo nānoxō karoya shano ikōferani chii ketefakī. Mā chii ketefaino chii xanamei shano kākikerani oxō mifiki chachini. Mā mifiki chachiax aō neetani. ⁴ Pablo āfe mifi shano ronokē ōikani āa ranā iska fetsenifo: "A na feronāfāke ato retemis rakikīa. Fakafā anoax nokosharafaino, mā Niospa shano chachimana nai rakikīa," ikanax yoinānifo.

⁵ Akka Pablo metashkiri itakī shano chii nēxpakīa potani. Shanopa chachifiano Pablo paemenima. ⁶ Nāskakē keyokōichi ōiketsanifo faraxinākakafanax naira ikaxō. Akka faraxiyamaito ōikakī, iskafanifo: "Nakai retemitsamisma, nafi nioski," ikanax yoinānifo.

⁷ Anoxō shinā nā xanīfo Publio chaima ika ini. Nānori yorafo afe ikafo ini. Nā xanīfāfe āfe pexe anoxō noko ifisharakōixō noko pīchasharakōixoni, tres nia ano nō oxaino. ⁸ Nānoax Publio āfe apa isinī iki rakanī, yonayanā chixoi. Nāskaino Pablo ōikai kaxō Epa Nios kīfixota āfe mīfi māmāsharani. ⁹ Pablo sharafaito nikakanax a isinī ikaifori nā ika anoax feafono Pablo ato sharafapani. ¹⁰ Ato askafaito ōi kakī anoxō afama mīstiffo noko ināketsanifo. Nāskata mā nō ato makinoax kai kanōanāfā mēra nō naneikainaino, anā afama mīstiffo noko inānifo a nō kakī pifoiakai.

Pablo Roma ano nokoni

¹¹ Nāskata anoxō mā nō tres oxe akax, kanōanāfā mēra nō naneinākfāni. Nā kanōanāfānē nā mai anoxō mechaka finōmani. Nā kanōanāfā Alejandría anoa ini. Nā kanōanāfā recho koki afarafō tsoxō fonifo na nōko niosra ikaxō, fetsa āfe ane Castor ini, fetsari Pólux ini. ¹² Nāskax nō nokoni Siracusa fai fotoa ano, nāno nō tres nia oxayoni. ¹³ Nānoax kanōanāfānē nō anā kai fakafā ketokonō pishtakōi nō kaax Regio ano nō nokoni. Nānoxō pena fetsa nēfēfānē noko ani a xini oaikirinoaxma oxō. Nāskakē nānoax kaax pena fetsa nō nokoni Puteoli ano. ¹⁴ Nānoa a Jesús Ifofaafō nō ato fichini nāfāfe noko yoikī iskafanifo: “Nono nofe oxa ranāyokāfe,” noko fanifo. Nāskata nānoax ato makinoax kaax chipo Roma ano nō nokoni. ¹⁵ Mā nō kaino nō Roma ano nokoyoamano a Jesús Ifofamisfāfe Roma anoxō nikaketsanifo. Nāskakē nokoki nokoifekani fenifo. Atiri pexe rasi Foro de Apio anoxax fenifo, atiri pexe rasi Tres Tabernas anoxax nokoki nokonifo. Askaifāfe ōikī Pablo Epa Nios kīfīkī iskafani: “Aicho Epa Niosi, mī yorafō ekeki nīchiaki,” fani inimakōiyanā. ¹⁶ Mā nō Roma ano nokoano, xanīfāfe ato yoini pexe fetsa mēra ares Pablo inō, anoxō soraro fistichi kexenō.

Roma ano Pablo ini

¹⁷ Mā nokoitaxakakī ano tres nia ixō, Pablo judeofo xanīfofo Roma anoa ato kenamani fenōfo. Mā fekanax ichanāfono Pablo ato yoini iskafakī: “Efe yora mīstichi, ea nikakapo ē mato yoinō. Ēkai judeofo chakafakī mekafamisma. A nōko xinifo ipaonifo keskarari ē chakafakī mekafayamafiakē, ea achikaxō Jerusalén anoxō romanōfo ano ea nīchinifo. ¹⁸ Nānoxō mā ea yōkaxō, ea nīchipainifo, ēkairoko afaa chakafakē ea retexikakī. ¹⁹ Ea askafaifono, akka judeofāfe ea iskafayameafo: ‘A chaka kāimayamafe,’ ea faifono, ē xanīfofo yoini iskafakī: ‘Ē xanīfokōi César ano kapai ato ea yoinō, ē afaa chakafayamafiakē efe yorafāfe eōnoa yoiāfo keskara,’ ixō ē ato yoini. ²⁰ Ē mato kenamana mato fe yoināxiki. Akka mā mā nikai ēfe kaifo israelifāfe, nā noko nimamis Niospa Fake nō manamis. Nāskakē mā mā ea ōi nonoxō ea metexkere akafono,” ixō Pablo ato yoiāto, ²¹ nikakakī iskafanifo:

“Judea anoxō mīōnoa tsōa noko kirika kenexō femama. Nofe yorafō judeofori ariax fēkaxō mīōnoa afaa chaka noko yoiāfoma. ²² A mī yoiāi keskara nō tāpipai, akka mā nō nikamiski, a maniafo tii anoxō a Jesús Ifofamisfo chakafakī ato mekafamisfokī,” ixō ea yoinifo.

²³ Nāskakata, “Pena fetsa nō mefe ichanāfainakaki,” fanifo. Nāskakē yora ichapakōi a Pablo ika ano fenifo nikai fekani. Mā feafono Pablo ato yoikī yātafani, Nios xanīfoōnoa ato yoikī. Afeska faxoma Jesúsnoa ato nikamapaikōini, a Moisés kenenioōnoa ato yoita, a Niospa ato shināmanaino kenenifoōnoari ato yoini. ²⁴ Pablo ato yoiāto ranārīto nikanifo, akka ranārītori nikakaspanifo. ²⁵ Nāskakē āa ranā fochishpanā faatanānifo ares shinākanima. Nāskakata mā fopaiyaifono Pablo ato yoini iskafakī: “Isaiās chanīmākōi ato yoipaoni Niospa shināmanaino. Nāōxō Niospa Yōshi Sharapa mātō xinifo yoini, iskafakī:

²⁶ Kaxō mī kaifo yoiāfe iskafakī: ‘Mā mā nikakōifīkī mā nikasharaima; mā mā afara sharafō ōifīkī mā ōisharaima.’ ²⁷ Mā na yorafāfe nikafīkākī shināsharakanima, āto ōiti fēstokōi. Mā ōifīkākī tāpipaikanima, na ē yoiāi keskara chanīmākōi ōifīkākī. Askatari nikakōiafoma ē ato chaka soaxopanā efe nīpaxanōfo, ixō Niospa Yōshi Sharapa Isaiās yoini. ²⁸ Na ē mato yoiāi keskara tāpikāfe, Epa Niospa noko nimapaiyai keskara mā nikayamaino a judeofoma ē ato yoi afāfe ea nikakōixikani,” ixō Pablo ato yoini.

²⁹ Pablo ato yoikī askafaino, judeofo mā fokani āa ranā feratenāfonifo.

³⁰ Anoxō Pablo xiniya rafe ani. A pexe ifo Pablo kori ināni a mēra ixiki. Nānoxō ato ifīsharapani ōikai fofaifono ato yoisharayanā. ³¹ Nānoxō ranotamakōi ato yoini afesaxō Epa Nios xanīfāfe noko ikītiromākī. Nōko Ifo Jesucristoōnoari ato yoiaito tsōa xatematiroma ini. Nā tii.

Pablo Roma Anoafo Kirika Kenexõ Fomani

Pablo Jesús Ifofaafa Roma anoafo kirika kenexõ fomani

¹ Roma anoafāfe, ē mato kirika kenexõ fomai. Ēkīa Pablo, ē Jesucristo yonoxomis. Niospa ea nīchini ē aōnoa yoimis inō, āfe meka shara Jesúsnoa yoinō.

² Niospa āfe Fake nokoōnoax naiyonōpokoai tāpixō a Niospa meka yoimisfāfe meka kenenifo. Jesúsnoa meka shara yoinifo. ³ Niospa Fakeōnoa meka shara kenenifo a inōpokoai keskafakī. Jesús Niospa Fakekōifiax David āfe xini ini. Nā David nōko xinifāfe āto xanīfokōi ipaoni. ⁴ Niospa afama mīshiti fatiroxakī nōko Ifo Jesucristo otofani. Otofaxō ato ōimani nāmāi Niospa Fakekē. Niospa āfe shināmā āfe Yōshi Sharaōxō āfe Fake otofani. Ato ōimani Jesúsmaī āfe Fakekē. ⁵ Jesucristoxō noko noi. Noko noikī āfe shinā noko ināni. Nāskaxō noko nīchini Jesúsnoa yoimis nō inō. A judeofomari a xoko fetsafori afāferi Jesús chanīmara fanōfo nō yoiaino. Jesús chanīmara fakaxō nikasharakōinōfo. ⁶ Māri mā mā Jesucristo chanīmara faito mato nīchini mā afe yorafo inō.

⁷ Roma anoafāfe, ē mato kirika kenexõ fomai. Niospa mato noixō mato ifini mato chaka soaxoxiki afe yorafo mā inō. Mato noikī mātō shinā mēraxō mato shināsharamanō. Epa Nios feta nōko Ifo Jesucristo mato askafanō.

Pablo a Jesús chanīmara faafa Roma anoafo ato ōipaini

⁸ Ē mato yoinō. Nikakapo. Keyokōichi a maitio anoafāfe mato yoimisfo, mā Jesús chanīmara faito ōikakī. Nāskakē, “Aichora,” ē Nios famis. Jesucristoxō, “Aichora,” ē famis.

⁹ Ēfi Nios yonoxokōikai. Chanīmakōi ē yonoxonikai. Ē feparanima. Āfe Fakeōnoa ē meka shara yoimis. Pena tiifi ē mato Nios kīfixōfāfāini. Niospa tāpia. ¹⁰ Ē mato ōisharapai. Nāskaxō ē Nios kīfifafāini ē mato ano kapaikī. Akka ē kai, ē kayamai ē kaima. A Niospa ea nīchipaiyaino ē katiro. ¹¹ Ē mato ōisharapai. Ōikaxō ē mato Niospa meka yoipai. Niospa āfe Yōshi Sharaōxō ē mato yoipai mā chanīmara fakī finakōinō Jesús Ifo sharakōi faxiki. ¹² Nāskax Jesúsnoax nō inima faatanānō. Mā Jesús chanīmara faino ē inimatiro. Nāskarifiakī ē chanīmara faino mā inimatiro.

¹³ Efe yorafāfe, ē mato tāpipapai mā tāpinō afeskaxma ē matoki kapai ē katiroma mei, ē kamisma. Mē kāta katamis ifiakeranax afara fetsa aki ē kamisma, mato ari kapaifi. Mai fetsa aria ichanāmisfo judeofoma nāfo ē Jesús ato chanīmara fama. Nāskari fakī ē matori askari famapai. ¹⁴ Jesús ea yoia ē āfe meka keyokōi ato yoinō. Nā kirika kenekī tāpiafo ita a kirika kenekī tāpamafōi ē ato yoikai. Nafafoya a nafamafōi ē ato yoitiro. Ē ato yoiaino nikakakī Jesús chanīmara fanōfo. ¹⁵ Nāskari fakī ē Jesúsnoa mato Roma anoari yoikapaimis.

¹⁶ Jesúsnoa meka shara yoipakai ē ranotiroma. Āfe meka xafakīa shara. Noko Niosnoa tāpimatiro a tsōa atiroma keskara Niospa atiro. Nō chanīmara faito Jesucristoxō Niospa noko chaka soaxotiro nō afe ipaxanō, nō fenoyamaino. Taefakī judeofāfe nikakōinifo. Akka iskaratīari judeofomafāferi nikakani afe ipaxakakī. ¹⁷ Nā Jesúsnoa meka sharaōxō Niospa noko ōimatiro. Nō Jesús chanīmara faito Niospa nōko chaka noko soaxotiro. Nānori kenenifo iskafakakī: “A Jesús chanīmara fakōinaifo Niospa āto chaka ato soaxō afaa chakafamisma keskara ato ōi. Nāskax shara ipanakafō Nios fe.”

Keyokōi yorafo chakamisfo

¹⁸ Niospa meka nikakaspafāfe a chakafamisfo Niospa ato ōimani ato omiskōimakī. Niospa meka chanīmakōifiano nikakaspakata yora fetsafori ato Niospa meka chanīmara ato famakaspakani. ¹⁹ Nōko Nios afe keskaramākī tāpipaikī nō tāpitiro. Akka Niospa noko ōimamis. ²⁰ Nō Nios ōiyamafixō nō tāpitiro Niospa keyokōi onifani, nāmāi Nioskōi ixō. Nā Niospa onifani ōikī nō tāpitiro tsoa fētsa keyokōi atiroma. Nios fisticchi atiro, afama mīshiti. Nāskakē Nios nikakaspafāfe Nios chanīmara fapaikanima, a onifani ōifikakī. Nāskakē Niospa ato omiskōimani nāfāfe Nios tāpipaikanima. Akka tāpipaikī tāpikeranafo. ²¹ A Niospa onifani ōifikakī iskafakī yoipaikanima: “Nios fisticchi keyokōi onifani. Aicho, Nios finakōia,” ikaxō shināpaikanima. Nāskakaxō āto shinā mēraxō afara shināsharakanima. Afara chaka fisti shinākani āto ōiti fakish keskara ikaxō. ²² “Nōfi tāpikōiaki,” ifiakaxō tsōa shināsharaima. ²³ Niosfi sharakōikī shara enenakama. Nāfi isharapakenakakī. Isharakōifiaito Ifofapaikanima. Askata yorafo isharayamaino yora fetsafāfe afara yora keskara onifakaxō, “Na nōko Niosra,” ikaxō kīfimisfo Nioskōi kīfikaspakakī. Yoinā keskara onifakaxō, peya keskara onifakaxō, rono keskarari onifakaxō, nāskarafo onifakaxō, “Na nōko Niosra,” ikaxō kīfimisfo.

²⁴ Askafafāfe ōikī Niospa anā ato Ifofamaima. Nā chakafapaiyairo fisti akaifāfe ōikī Niospa ato xatemanima. Nāskax āa ranā fekaxte faatanākani. ²⁵ Nios fisticchi chanīmismaki. Nā chanīyamafimiskē tsōa Ifofapaima nā fisti nōko Nios sharakōifiano. Niospa keyokōi

onifaniano tsōakai Ifofapaima. Akka nā Niospa onifanifo, “Nā nōko niosra,” ikaxō kīfitaifamisfo. Tsōakai Nioskōi Ifofapaima, mēxotaima sharafinakōia ifiamiskē. Nāskakē, “Epa Niosi, mī sharafinakōia,” ikaxō yoikani. Askapakexapainōfora.

²⁶ Askafaiifāfe ōikī Niospa ato chaka xatexonama, afara chakafapaiyaifo fisti akaifāfe. Niospa noko onifani feronāfake yafi kēro, kēro feronāfake fe inō. Askafafianino kēro rafe fichināpaikani chaka ikani. ²⁷ Askatari feronāfake rafe fichināpaikanax chotanākani, kēro tanatama. Askax chaka ikanax omiskōikani.

²⁸ Nāskakakī chaka fisti shināpaikani. Anā Nios shināpaikanima. Askaifāfe ōikī Niospa ato potai nā apaiyai keskara fakī chaka fisti shinānōfo. ²⁹⁻³¹ Chaka fisti feyafakanax chaka shinākani. Chaka faatanāi xatekanima. Feronāfakefāfe āto āfima fichipaikī chotamisfo. Kērofāferi āto fenema fichipaikī chotamamisfo. Nāskaxō afara shara āa atonā fisti fipaikani. Fetsafo chakafakī xatekanima. Fetsafo xītipaimisfo. Yora retemitsamis ita, setemitsamis ita, feratenā faatanāmisfo. Ōitifishkikī feyafamisfo. Ato pārafōfāsafamisfo. Ato noikaspamisfāfe fetsafonā fiapaikakī. Ato noikaspamisfo. Chanīmisfo fetsafo pāramisfo. Nios noikaspayanā tsoa noimisfoma. Ichamitsamisfo. Kakapaimisfo, āa kakapaimisfo. Afara fetsa chaka shināi iskakani: “Afaa chaka fetsa ē afeska faimēti,” ixō shinākani. Āto apa yafi āto afa nikakaspakani. Afara shara shinākanima. A yoiyai keskara amisfoma. Āa chanīmisfo. Tsoa noikanima. Ōitifishkikax fetsaki raemisfoma. ³² “Askakanax nakanax omiskōipakenakafo,” ixō Niospa anori yoini. Niospa yoiya keskara āto shinā mēraxō tāpifikaxō afara chaka xatemisfoma. Askata fetsafāfe afara chakafaiifāfe ōikani atoki inimamisfo.

2

Niospa mēstekōi noko ōixō yoitiro: “Nāto afaa chakafamisma. Akka natori chakafamis,” noko fatiro

¹ Ēfe kaifo judeofāfe, ē mato yoinō. Mā fatorafāfe yoi iskakī: “Na keskara yorafāfe afara chakafaiifo omiskōipakenakafo,” ixō mā shināmis. Anori shināfikī māri ato keskarari afara chakafamis. Nāskata, “Nō afaa chakafamisma,” mā itiro. ² Mā nō tāpia, Niospa ato tāpikōia a yorafāfe chaka shināifo. Nāskakē ato omiskōimaxii. Niospa tāpikōixō chanīmakōi yoi. ³ Mā, “Nato afara chakafara,” ixō māri mā aki. ŪNāskakī mā shināimē: “Niospa noko omiskōimanimi,” ixō? Akka nāskakē ē mato yoi. Niospa matori omiskōimani mā afara chakafaito. ⁴ Niospa mato noi. Mā chakafafaito mato omiskōimarīsafaima. Mato noikikai mato omiskōimapaima. Nāskakē, “ŪNā ē ipaiyai keskara ē iki,” ixō mā shināimē? Askara shināyamakāfe. Niospa mato noikī mato shinā fetsafaxopai mato chaka mā xatexō āfe meka mā nikasharakōinō. ⁵ Niospa mato shinā fetsafaxopaifaito mā nikayospakōi. Māto ōiti mā kerexfaxō mā Nios nikakaspai. Mākai mato shinā mā fetsafapaima mato chaka mā xatexiki. Mā askafaino iskaratīa Niospa mato omiskōimayoi. Akka mā mai keyoaino mato omiskōimaxii mākaroko mato chaka xateano. Nā keyokōi yora chakafo ato omiskōimanaitīari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii. ⁶ Nā nō imis keskara Niospa tāpikōia. Nāskax nō naano keyokōi noko kopifaxii mā noko mai keyoaino. ⁷ Yora fetsafāfe shara shināmisfo a Niospa ato amapaiyai keskara apaiikī. Niospa ato inimamatiro. Askatari Nios fe ipaikani. Askara yorafo Nios fe ipanakafo. ⁸ Akka yora fetsafāfe nā apaiyai keskara shinākani. Niospa meka nikakaspakani. Chaka fisti shinākani. Askarafokī Nios atokī ōitifishkixō ato omiskōimani. ⁹ Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax. ¹⁰ Nā Nios chanīmara faafo tii Niospa ato imasharaxii a keskara inōfo. Nāskaxō ato yoiixii iskafakī: “Māfi sharakī. Mā ea nikasharakōia. Nāskax mā efe isharapakenaka,” Niospa ato faxii. Nānori judeofo yoiixii. A judeofomari ato yoiixii askafakī. ¹¹ Niospa ōia nāskarafos ōi yorafo, a judeofo ōita a judeofomari nāskarafos ōi.

¹² Akka a Moisés kirika keneni tāpiamato afara chakafaax omiskōipakenaka. Nios fe ipanakama. Askatari a Moisés kirika keneni tāpiato afara chakafaax nāri omiskōipakenaka. Nānori Moisés kenekī yoini: “A afara chakafamisfo omiskōipakenakafo,” ixō Moisés kirika keneni. ¹³ A Moisés kirika keneni keskara nikafikakī nikakaspai. Afokai Niospa shara ato ōima. Akka nā Moisés kirika keneni keskara nikakōiaifo, “Sharafora,” Niospa ato faxii. ¹⁴ Moisés Niospa meka a judeofooma ato kirika kenxonima. Askafekē a Moisés keneni keskara judeofomafāfe tāpiamafikaxō āa tāpikōikaxō shara shinākani. Nāskaxō a Moisés keneni tāpiafo keskara ikafo tāpiamafikanax. ¹⁵ Moisés keneni tāpiamafikaxō shināsharaifono fetsafāfe ato ōitirofo Moisés keneni keskara Niospa ato shinā mēra ato shināmana. Akka sharafakaxō shinākakī iskafatirofo: “Ē afaa chakafama,” ixō shinātirofo. Akka afara chakafaxō shinākani iskatirofo: “Oashta, ē afara chakafaa,” ixō shinātirofo. Nāskaxō anā afaa chakafapaikanima. ¹⁶ Niospa nōko ōiti mēraxō nō shināito noko tāpikōia. Jesucristo

noko tãpia. Akka yorafãfe nõko õiti mēraxõ nõ shinãito noko tãpiafoma. Nãskakē mã nõko mai keyoaino Niospa noko yoikĩ iskafaxii mãmãi noko tãpixõ: “Nafõ sharafo. Akka nafõri chakafo,” noko faxii. Nãskara ē yorafo yõimis.

Moisés judeofo Niospa meka kenexoni

¹⁷ Ea nikakapo, efe yorafãfe. ¿Mã shinãkĩ iskafatiromē? “Nõrifõ nõ judeofõki. Moisés keneni keskara mã nõ tãpia. Nõfi Niospa afe yorafõkĩ,” mã imis. ¹⁸ Moisés kenenioxõ Niospa mato amapaiyai keskara mã tãpitiro. Askatari mã asharakõikĩ mã tãpitiro. ¹⁹ Akka mã shinãmis iskafakĩ: “A Moisés keneni tãpiafoma yora fēxo keskarafo. Nãskakē nõ ato tãpimasharatiro ãto õiti xafa shara inõfo, anã fakish keskara inõfoma,” ixõ mã shinãi. ²⁰ “Nã afara shara tãpiamafõri nõ ato tãpimatiro,” mã iki. Nãskatari, “Nã rama tãpiaifõri nõ ato yoitirora,” ixõ mã shinãi. Mã shinãi iskafakĩ: “Mã nõ Moisés keneni tãpikõia. Nãskaxõ nõ ato yoitiro noko chanĩmara fanõfo,” ixõ mã shinãi. ²¹ A Moisés keneni keskara mã ato yoifiki, ¿afeskakĩri mãri mã nikakõimamē? “Atoki yometsoyamakãfe,” mã ato fafiai mãri mã yometsoi. ²² “Mãto ãfima fe iyamakãfe,” mã ato fafiã mãri mãto ãfima fe mã chotanãmis. Askatari yora fetsafãfe afara onifakaxõ, “Na nõko niosra,” famisfo. Askafafiaifõno mã ato yõimis: “Anã ano Nios fetsama. Nios fisti. Afara yora faxõ, ‘Na nõko niosra,’ fayamakãfe,” mã askafamis. Mã ato askafafiai ãto nios kifiti pexefã mēranoax mã yometsoimis. ²³⁻²⁴ Mãfi yoikĩ iskafamis: “A Moisés Niospa meka kirika keneni nõ tãpikõia,” nã kakapaimisfo keskara mã imis. Askafafiãxõkai a Moisés keneni keskara mã akama. Mã askayamaito õikakĩ judeofomafãfe yoikĩ iskafamisfo: “Niospa afe yorafo judeofo isharafo. Nãskakē Niosrikai sharama,” ixõ yõimisfo. Askafakĩ matoõxõ Nios chakafaifo. Nãnõri Niospa meka yõra kirika keneni.

²⁵ Moisés judeofo kirika kenexoni iskafakĩ: “Mãto fake feronãfakefo fõshki repa xatekãfe mato tãpinõfo mã judeofokē,” ixõ Moisés kirika keneni. Mãto fake fõshki repa mã xatefixõ nã Niospa mato yoini keskara mã nikayamaito Niospa mato õi judeofõma keskara. Niospa yorafo mã itiro ma mã judeofõfiãx. Nãskarari nã Epa Niospa noko yoini keskara mã ikaito Niospa mato õi judeokõifo keskara. ²⁶ Judeofõyamafixõ Niospa meka nikaifõno Niospa judeofo keskara ato õi afe yorafo keskara. ²⁷ Nã judeofõma fõshki repa xateyamafikaxõ a Moisés Niospa meka yoikĩ kirika keneni tãpiyamafikaxõ nã Niospa yoini keskara chanĩmara fakanax nãskarafõfi sharafõki mato keskarama. Akka mãfi judeofõfixõ a Moisés kirika keneni tãpifixõ mã nikakõima. Moisés mato Niospa meka yoikĩ kirika kenexofianino mã nikasharakõima. ²⁸ Mãfi judeofo kãinikĩ. Nãskaxõ mã fõshki repa xatemis. Akka mã judeofõfixõ a Niospa yoini keskara mã nikaima. Nãskax mã judeokõifo keskarama. Mã mãto feyafatifixõ mãto chaka mã xatemisma. Nãskaxkai mã Niospa afe yora ikima. ²⁹ Moisés kirika kenekĩ yoini keskafakĩ judeofãfe ãto fakefo fõshki repa xatemisfo ato tãpinõfo judeokõifokē. Akka judeofo atirifãfe Nios shinãkanima. Nãfõfi judeomakõifo keskara. Nãfõkai Niospa afe yorafõkĩ. Akka judeofo atirifãfe Nios shinãkani. Nãfõfi judeokõifõkĩ. Nãfõfi Niospa afe yorafõkĩ. Niospa Yõshi Sharapa noko õiti fetsafaxõano Nios keskara shara ikafo. A Moisés kirika kenenito noko õiti fetsafaxotiro. Niospa Yõshi Sharapa noko õiti fetsafaxotiro. Akka yorafãfe, “Mifi sharakĩ,” noko fayamafiaifõno Niospa, “Mĩ sharakĩ,” noko fai.

3

¹⁻² ¿Nõ judeofõxõ nõko fakefo nõ fõshki repa xatemiskē sharamē? Ëje, shara itiro. Akka nõfi judeofo fake kãiniki. Moisés Niospa meka yoikĩ noko kirika kenexoni. Nãskakē nõ inimai nõ judeofo. Efe yora mĩshitchi, shinãkapo. Epa Niospa nã yorafo tii yoipaiyai keskara nõko kaifo taeyõi ato yoiyõni. Noko tãpimanai keskarari nõ yora fetsafõri nõ ato tãpimanõ ãfe meka. ³ Akka nõko kaifãfe atirifãfe Niospa meka ifõ shara fayamaifõno akka Niospa a yoiai keskara amis. ⁴ Yorafo chanĩmisfo. Akka Nios ramashara chanĩmisma. Yorafãfe keyokõichi noko pãrafiaifõno akka Niospa noko pãramisma. Nã David Niospa meka yoikĩ kirika keneni iskafakĩ:

Niospa ãfe meka mēstesharakõĩ yorafãfe õinõfo. A shara shinãifo Niospa ato sharafaxõi.

Akka a chaka shinãifo Niospa ato tãpimakĩ omiskõimaxii, ixõ David yoikĩ kirika keneni.

⁵ Nios fistiifi sharakõiki. Nõkai a keskarama. Nãskakē nõ chakafaito yorafãfe õikakĩ shinãtirofo iskafakakĩ: “Nios iskarama, Niosfi sharakõikĩ. Na yorafãfe afara chakafakani. Akka Niospa afaa chakafamisma,” ixõ shinãtirofo. Nãskaxõ Nios sharara fakani. Akka nãskaxõ ãa yora fētsa shinãtirofo iskakĩ: “Ë afara chakafaito õikakĩ yorafãfe yoitirofo: ‘Akka Nios iskarama, Nios shara.’ Nãskakē ē chaka shinãi yorafãfe Nios sharakõi õinõfo ea keskarama. Nãskakē Niospa ea omiskõimatiro ma ē chakafafiaito,” ixõ yora fētsa shara shinãima. Nãskara shinãkĩ yõra shinãi keskara shinãi, Niospa shinãi keskara shinãima.

⁶ Nios chakama. Nios mēstekōi ika. Akka mēstekōi iyamaxō yorafa yoikeranama iskafakī: “Nafō sharakōifoki. Ē ato sharafaxōi. Akka nafori chakafo. Ē ato omiskōimani,” ixō Niospa yoikeranama mēstekōi iyamaxō. ⁷ Yora fētsa āa shināi askatiro: “Yorafāfe ea yoitirofo ē chanīaito ōikakī. Iskafakakī ea yoitirofo: ‘Mī Nios keskarama. Nios chanīmīisma. Nios mēstekōi ika,’ ixō ea yoitirofo. Akka ē chanīaito ōikakī fetsafāfe, ‘Nios sharakōi, mia keskarama,’ ea faxikani. Nāskakē ē shināitiro iskafakī, Niospa ea yoitiro iskafakī: ‘Mī afara chakafafaiato ē mia omiskōimaxima,’ ea Niospa fatiro,” ixō āa yōra anori shināi. Anori Niospa yoyiamafiano āa shināi askatiro. ⁸ Iskafakakī yoipaikani: “Nō afara chakafanōkāfe. Nō afara chakafaito ōikakī yorafāfe, ‘Nios sharara,’ fanōfo,” ixō yoipaikani. “Nā Pablori anori yoimiski nō afara chakafanō,” ixō yoikani. Āa chanīmīisfo. Ēkai anori yoimīisma. Epa Nios chanīmīisma. Nā keskara yorafa ato omiskōimaxii.

Nō keyokōichi chakafamis

⁹ “Nō judeofo sharakōifo. Akka nā judeofoma sharafoma,” ē faima. Askatamaroko ē iskafakī yoimis: “Nōfi nā judeofoma ōitsa, nāskarafos nō. Nō keyokōichi afara chakafamis. Nāskakē Niospa ato yafi noko omiskōimaxii noko tāpimakī,” nānori ē yoimis. ¹⁰ Niospa meka yoikakī kirika kenefifo iskafakakī:

Tsoa pishtakai nā Niospa yoia keskara famisma. ¹¹ Tsoa pishtakai Nios shināpaikanima. Tsōakai Nios tāpīpaisharakanima. ¹² Tsoa pishtakai anā Nios Ifofapaikanima. Afara chaka fisti fapaikani. Afara sharakai tāpiafoma. Tsōa pishtakai sharafamisma. Fato fistichikai shara Ifofaima. ¹³ Yora naax maiax fepekemeax pisi kāitiro. Nāskarifiakī nōko axfapa meka chaka fisti nō yoimis. Mā nō ato pārakī feyafamis. Nā rono paekapato noko chachiano nō paemetiro keskarari nōko meka chakaōnoax omiskōixikani. ¹⁴ Nō ato fekaxtefapaikī meka mitsisipato fisti nō mekamis. Nō ato īchari famis. ¹⁵ Tsoa afayamafekē nō ato retepaimis. ¹⁶ Nōa kafāsakī nō ato omiskōimafōfasafaki. Nōa nō ato fekaxtefaafōfāsafaki. ¹⁷ Yora fetsafokai nō ato raefapaimisma ato fe isharaxikima. ¹⁸ Nōko shinā mēranoaxkai Nioski nō rateima. Āfe meka nō nikapaima. Nōko chaka nō xatepaima, ixō nāskara yoikī kirika kenefifo.

¹⁹ Mā nō tāpia a Niospa yoia keskara Moisés noko kirika kenexoni. Akka tsōakai Niospa meka nikakōimisfoma. Nāskaxō tsōa yoitiro ma iskakī: “Ēfi afaa chakafamismaki. Ē shara imis,” tsoa itiro ma. Akka Niospa noko yoitiro iskafakī: “Māri afara chakafamiski,” keyokōi noko fatiro. ²⁰ Nāskakē Niospa meka a Moisés noko kenexoni nō nikapaifaito, Niospa noko yoikī iskafatiroma: “Mā shara imiski,” noko fatiro ma. Akka tsōa āfe meka nikasharakōima. Āfe mekaoxō nō tāpitiro keyokōichi nō chakafamisfo.

Jesucristo chanīmara faax nō Nios fe ipaxatiro

²¹⁻²² Iskaratīa Niospa noko afara fetsa tāpimana. Noko xafakīa ōimana afeska faxō noko imasharatiromākī a keskara shara nō inō. Moisés kenenixō noko shara imaima. Akka nō Jesucristo chanīmara fakē Niospa noko shara imatiro Jesús māi noko nāxonikē nōko chaka noko soaxoxiki. Nānori Niospa meka Moisés yoikī kirika keneni. Niospa meka yoimisfāferi nānori kenefifo. Nā keyokōichi Jesucristo chanīmara faifo Niospa ato shara imai. Judeofo, judeofomafori Niospa shara imatiro Jesús chanīmara faifāfe. ²³ Keyokōichi mā nō chakafamis. Tsoa Nios keskarama. Nios sharakōi. Afaakai chakafamisma. A keskarakai tsoama. ²⁴ Nāskakē Niospa noko noikī nōko chaka noko soaxotiro nō Jesucristo chanīmara faino. Akka Jesucristo nōko chakaōnoax noko nāxonī. Nāskaxō nōko chaka noko soaxoni. Nō afaa kopifatiroma Niospa noko shara imanō. ²⁵ Āfe Fake Jesucristo nīchini āfe imi foax nōōnoax nanō nōko chaka noko soaxoxiki. Nāskaxō Niospa noko omiskōimanima. Nō Jesús chanīmara faino Niospa nōko chaka noko soaxoni nō shara inō. Nāskaxō nō ōitiro Nios sharakōi. Jesús nayoamano chakafafaiifono Niospa teneyoni. Ato omiskōimayonima Niospamāi tāpixō āfe Fākemāi chipo ato nāxoxiaino Niosmāi mēstekōi ixō. ²⁶ Jesús nōko mai ano oax noko nāxonī. Nāskakē nō chanīmara faito Niospa nōko chaka noko soaxoni noko imasharai. Nāskaxō Niospa noko ōimasharai amāi mēstekōi ixō.

²⁷ Nāskaxō tsōa yoitiro ma iskafakī: “Ēfi sharaki, fetsafo keskarama. Nāskax ē Nios fe ipanaka,” ixō tsōakai yoitiro ma. Moisés kirika kenekī yoini keskara nikafixō tsōa anori yoitiro ma. Jesucristo noko nāxonī nōko chaka noko soaxoxiki nō shināsharanō. Nāskakē nō Jesús chanīmara faino, “Jesús nōko chaka noko soaxoni nō afe ipaxanō,” ixō nō yoitiro. ²⁸ Nāskakē anā nō mato yoi. Jesucristo nō chanīmara fakēma a Moisés kirika keneni keskara nō ifofafaito nōko chaka noko soaxonima. Akka nō Moisés meka nikaito Niospa, “Mī afara sharafamiski,” noko fatiro ma. Akka nō Jesús chanīmara faito, “Mī Jesúsnoax isharakōimis,” noko fatiro.

²⁹ Nāskakēri, ¿Niospa judeofo fisti ato ifitiromē afe yora inōfo? Maa, judeofomafori ato ifitiro Jesús chanīmara faifono afe yora inōfo. ³⁰ Niosfi fistiki. Judeofori, judeofomafāferi

Jesús chanĩmara fakanax Nios fe nipanakafo ato chaka soaxonano. ³¹ ¿Nõ Jesús chanĩmara faxõ a Moisés kirika keneni nõ potatiromẽ? Maa, nõ potatiroma. Jesús chanĩmara faxõ a Moisés Niospa meka yoikĩ kirika keneni nikakĩ nõ chanĩmara fatiro.

4

Abraham Nios chanĩmara fakõini keskara yorafãferi keyokõichi Nios chanĩmara fatirofo

¹ Akka nõko xini Abraham ipaoni keskara ẽ mato yoinõ. ² Abraham afara sharafaõxokai Niospa ẽfe chaka soaxonima. Akka Nios chanĩmara faito Niospa ẽfe chaka soaxoni. “Mĩ afara sharafaito nõskakẽ ẽ mia ifitiro mĩ efe yora inõ,” ixõ Niospa anori yoinima. Akka Niospa anori yoiano Abraham yoikerani: “È afara sharafaito ea Niospa chaka soaxona,” ixõ yoikerani ẽ kakapaikĩ. Akka anori Niospa yoinima, nã Niospamãĩ mã ẽfe chaka soaxonano chanĩmara faito. ³ Niospa meka yoikĩ Moisés kirika keneni iskafakĩ: “Abraham Nios chanĩmara faito Niospa ẽfe chaka soaxoni. Nãskakẽ Niospa yoini iskafakĩ: ‘Mĩ afaa chakafamisma keskara ẽ mia õi,’ Niospa fani.” Nãskakẽ Moisés kirika keneni. ⁴ Akka feronãfãke yora fetsa yonomaxõ kori inãtiro, kaxpa inãtiro. ⁵ Akka nõ afara sharafaõxokai Niospa nõko chaka noko soaxonima, nõ afaa chakafamisma keskara noko õixiki. Askataroko nõ Jesús chanĩmara faito Niospa nõko chaka noko soaxotiro. ⁶ Nãskarari David yoini iskafakĩ: “Mã Nios chanĩmara faito oa afaa chakafamisma keskara Niospa mato õitiro a Moisés keneni keskara mã nikakõiyamafaito. Nãskax mã inimatiro.” David anã yoini iskafakĩ:

⁷⁻⁸ Fatora yora Niospa ẽfe chaka soaxonano inimatiro Niospamãĩ õiaino afaa chakafamisma keskara. Mã Niospa yora ẽfe chaka soaxõ Niospa anã shinãchakaima a yõra afara chakafapaoniõnoa. Nãskax yora inimakõitiro Niospamãĩ mã ẽfe chaka soaxonano, ixõ David yoini kirika kenekĩ.

⁹ ¿Nã judeofo fisti Niospa ẽto chaka ato soaxotiro mẽ? Maa, anorima. Judeomafãferi Nios chanĩmara faifãfe ato chaka soaxotiro afori inimanõfo. Nãskakẽ Niospa meka yoimisto kirika keneni iskafakĩ: “Abraham Nios chanĩmara faito Niospa sharakõĩ õini,” ixõ a Niospa meka yoimisto kirika keneni. ¹⁰ Akka taeyoi Abraham foshki repa xateyoamano Niospa yoini iskafakĩ: “Mĩ ea chanĩmara fai nã mĩ afaa chakafamisma keskara ẽ mia õi,” Niospa fani. ¹¹ Nios chanĩmara faito Niospa Abraham ẽfe chaka soaxoni afaa chakafamisma keskara õixiki. Nãskaxõ chipo Abraham foshki repa xatenifo fetsafãfe tãpinõfo Nios chanĩmara faino. Akka taeyoi Abraham Nios chanĩmara fani askayoxoma. Nãskaxõ chipo foshki repa xateni. Taefakĩ Abraham Nios chanĩmara fani Niospa fake ixiki. Nãskano a chipo Nios chanĩmara faifo Abraham ẽfe fenafo. “Abraham nõko xini ipaoni,” fatirofo. Abraham keskara nõ foshki repa xateyamafixõ nõ Nios chanĩmara faito Niospa noko chaka soaxotiro afaa chakafamisma keskara noko õixiki. ¹² Abraham askayoxoma Nios chanĩmara fani. Nãskaxõ foshki repa xateni. Nã Abraham judeofãfe ẽto xini ipaoni. Judeofo a Nios chanĩmara faafãfe nãfãfe ẽto xinikõĩ Abraham nafãferimãĩ Nios chanĩmara fakanax.

Niospa noko yoiaĩ keskara noko axõĩ

¹³ Niospa Abraham yoini: “È mia yafi mĩ fenafo keyokõĩ ẽ mato mai inãikai,” fani. A Moisés kirika keneni Abraham nikaito Niospa mai inãnima. Akka Nios chanĩmara faito Niospa mai inãni. Nãskaxõ Abraham Nios chanĩmara faito Niospa ẽfe chaka soaxoni, afaa chakafamisma keskara shara õikĩ. ¹⁴ Fetsafãfe anorima shinãtirofo iskafakakĩ: “Nõ Moisés kirika keneni nikaito Niospa a yoiaĩ keskara noko axotiro. Akka Jesús fisti nõ chanĩmara faito Niospa noko axotiro. Kaxpa nõ Jesús shinãĩ,” ixõ anorima shinãtirofo. Akka nõroko Jesús chanĩmara faito Niospa yoia keskara noko axosharatiro Jesúsmãĩ nõko Ifoxõ. ¹⁵ Akka Niospa meka a Moisés yoini keskara nõ nikayamaito Niospa noko omiskõimatiro. Akka Niospa noko afaa yoiyamanino nõ nikayospa ikeranama. Akka iskaratã nõ nikayospakõifo mã nõmãĩ Moisés kirika keneni tãpiax.

¹⁶ Taeyoi Niospa Abraham yoiyoni Nios chanĩmara faino. Nãskakẽ Niospa afama mĩshiti axoni a yoiyoni keskafakĩ. Niospa Abraham afaa yõkanima afama mĩshiti axosharaxõ. Akka Abraham ẽfe fenafori Niospa ato noikĩ nãskaxõ afama mĩshiti ato axosharai a yoiyoni keskafakĩ. A Moisés yoini keskara nikakõiaito Niospa afama mĩshiti axosharanima. Akka Nios chanĩmara faito Niospa axosharani. Nãskarari a Abraham keskarafo Nios chanĩmara faifori Niospa ato shara faxõĩ. Akka Abraham nõko xinikĩ nõmãĩ Nios chanĩmara fai Abraham ipaoni keskara. ¹⁷ Niospa Abraham yoini keskafakĩ, yora fetsa kirika kenekĩ iskafani: “Nã yora ichapakõifo ẽto apa keskarakõĩ mĩ inõ,” ixõ kirika keneni. Abraham Nios chanĩmara fani. Askaxõ Abraham nõko epa keskara Niospa õi. Niospa nã namisfori anã otofatiro. Nãskaxõ Niospa afama mĩshiti onifatiro tsõa õimismafo. Nãskakẽ Abraham Nios chanĩmara fani.

¹⁸ Nāskax Abraham anifokōi ini anā fake atiromaxakī. Nios chanīmara faito Niospa yoini: “Mī chipo fake fixii. Mī fenafori ichapa rasi kaixikani,” ixō Epa Niospa yoini keskara Abraham chanīmara fani. Nāskax, “Yorafāfe āto xini mī iki,” Niospa fani. ¹⁹ Nāskax Abraham anifokōi ini. Cien xiniya aka. Sara āfe āfiri yōxafokōi ini. Anā yōxafoxō fake fitiroma ini. Nāskaxifō Abraham Nios chanīmara fani. “Ē anifokōi, ē anā fake fitiroma,” ixō Abraham shinānima. “Akka Niospa tsōa atiroma keskara fatiro,” ixō Abraham shināki Nios chanīmara fani. ²⁰ “Mī āfi Sara fake nanexii,” ixō Niospa yoini. Niospa nāskara yoiāito nikakī Abraham Nios chanīmara fani. Niospa askafafiaino, “Ēfe āfi yōxafokōia. Anā fake nanetiroma,” ixō Abraham shinānima. “Niospa ea yoia keskara ea axotiro. Aicho, Nios fāsi sharakōi,” fani. ²¹ Niospa axōai keskara fakī Nios chanīmara faxō Abraham afaa fetsakai shinānima. ²² Nāskakē Niospa yoini: “Mī ea chanīmara fai afaa chakafamisma keskara ē mia ōi,” Niospa fani.

²³ Niospa Abraham askafaniōnoa yōra kirika keneni iskafakī: “Nios chanīmara faifāfe afaa chakafamisfoma keskara Niospa ato ōi,” ixō Abrahamnoa fisti kirika kenenima. A Nios chanīmara faifo Niospa ato ōi afaa chakafamisfoma keskara māmāi āto chaka soafono. ²⁴ Nokori askara kenexoni nō Nios chanīmara faito. “Nōko Ifo Jesús naafiakē Niospa otofani,” nōri chanīmara fakē, afaa chakafamisma keskara Niospa noko ōi. ²⁵ Nōko chakaōnoax Jesús nani nōko chaka noko soaxoxiki. Askata mā otoaano aōnoax afaa chakafamisma keskarafō nō ixii.

5

Nō Nios chanīmara faito afaa chakafamisma keskara Niospa noko ōi

¹ Nōko Ifo Jesucristo nō chanīmara fakē nōko chaka noko soaxonano aōnoax nō Nios fe isharapakexatiro. ² Nō Jesús chanīmara faito noko noikī Niosya noko rafemani. Nāskakē, “Ē Nios ikano kaax ē a keskara shara itiro,” ixō nō shināi nō akiki inimakōitiro. ³ Askatari Jesúsnoax omiskōi nōko shinā mēra nō inimakōitiro. Askax nō a keskara nō itiro. Omiskōifaito Jesús āfe shināmā nōko shinā mēra noko mitsisfamaxotiro nō tenenō. ⁴ Akka Jesúsnoax omiskōikī nō tenei nō yora finakōia ipainākfatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe ipaxanō. ⁵ Nō askara shināi nō rāfitiroma Niospamāi a yoia keskara noko axōaino. Akka noko Niospa noikōikī āfe Yōshi Shara nōko shinā mēra noko nanexotiro.

⁶ Akka nōa nōko chaka nō soametiroma. Nāskakē Niospa āfe Fake nīchipayaitīa nai mēraxō nāmā nīchini yora chakafoōnoax naaxinō. ⁷ Tsōakai yora fetsa nāxopaitiroma sharafiano. Ētsa, itiro rakikīa yora nai yora sharafoōnoax. ⁸ Akka nō chakafokē Niospa āfe Fake nīchini noko nāxonō. Nāskakē nō tāpitiro Niospa noko noikōiai. ⁹ Askax nōōnoax naano āfe imi foni. Nō chanīmara fakē afaa chakafamisma keskara noko ōi noko chaka soaxō. Akka nō chakakē Jesús nōōnoax nani. Nāskakē iskaratīa mā nō chanīmara fakī finakōia. Anā nokoki Nios ōitīfishikīi noko omiskōimaxima. ¹⁰ Askata nō Nios noikaspaino āfe Fāke noko nāxonī Nios fe nō rafenō. Nāskax nō iskaratīa Jesús afe yorafo nō afe rafekōia. Askaxō noko sharafakī finakōi. Jesús nakē Niospa anā otofani, nōri afe nīpaxanō. ¹¹ Akka nō Nios noikaspayoni. Iskaratīa mā nōko Ifo Jesucristoōxō noko raefaa nō afe isharakōia. Nāskakē Jesús Nioski noko inimamasharakōia.

Adāōxō yorafāfe keyokōichi chakafamisfo. Akka Cristo nōko chaka noko soaxotiro

¹² Niospa nā feronāfāke Adán taefakī onifani. Nā Adán taefakī afara chakafani. Nāskakē aōxō afara chakafapāfo. Nā Adán afara chakafaniōnoax keyokōi nō natiro nōmāi keyokōichi afara chakafaax. ¹³⁻¹⁴ Mā Adán afetiāma naniano Moisés Niospa meka yoini kirika keneni afe keskara nō niimākai. Akka Niospa Moisés yoioamano keyokōichi chakafayopaonifo. Nāskax mā nai keyonifo. Fetsafāfe chakafafiakaxō Moisés kirika keneni tāpīpaonifoma. Askafafiāfāfe oa afaa chakafamisfoma keskara Niospa ato ōini tsōakairoko āfe meka tāpikē. Adán keskarafoma. Adán Niospa meka tāpīfīax nikayospani. Nāskaxō Adán chakafakī taefani. Nāskarifiakī yorafāfe keyokōichi chakafamisfo. Akka nāskax mā nai keyokani, Adánmāi taeyoi nanikē. Nāskarifiāi Cristo oni yora chakafoōnoax naiyoi. Nāskakē yorafo aōnoax nīpaxatirofo.

¹⁵ Akka Jesucristo Adán keskarama. Adán Nios nikakaspax nani. Nāskakē nōri aōnoax natiro. Akka Jesúsxō Niospa yorafo noikōikī ato imasharapakenaka afaa chakafamisma keskarāmāi ato ōikī. Akka nā Adán nai taeni afara chakafaax. Nāskax yorafo Adánnoax nāpanakāfo. Akka Jesús Ifofakanax Jesús fistiōnoax keyokōi isharapakenakāfo. Jesúsxō Niospa ato raefatiro a chanīmara faafo tii. ¹⁶ Adán afara chakafaniōnoax yorafo nai keyotirofo. Nāskatari āto chakaōnoaxri nai keyotirofo. Akka nō keyokōichi chakafakē Niospa noko omiskōimatiro. Nā Adán ani keskarakai Cristo afaa chakafamisma. Mā nō keyokōichi afara chakafamiskē Jesucristoōxō Niospa noko noikī nōko chaka noko soaxotiro

afaa chakafamisma keskara noko òikì. Omiskòitamarako nò afe isharpakexanò. ¹⁷ Adán áfe chakafoònoax keyokòì nakani. Akka Cristo fisti nokoònoax nani nò aònoax Nios fe nìpaxanò Niospamài noko shara òiaito. Jesucristoòxò Niospa noko noixò noko nimapakenaka. Nàskakè noko askafaxòkì Jesús Adán finòkòia.

¹⁸ Nàskakè ē mato yoiaì keskara nà feronáfake Adán áfe chakaòxò keyokòì Niospa noko omiskòimani. Akka Jesúskaì afaa chakafamisma. Nàskakè nà chanìmara faafo tii Nios fe nìpanakafo. Nàskakè nà afaa chakafamisma keskara Niospa ato imai. ¹⁹ Akka nà feronáfake Adán Nios nikakaspakì taefani. Nàskax Adán nikayospakòì taeyoi ini. Keyokòichi aòxò nò chakafapamis. Akka nà Cristo fistichi ares Nios nikakòimis. Afaakai chakafamisma. Nàskakè nà chanìmara faafo tii aònoax afaa chakafamisma keskarafo ipanakafo.

²⁰ Moisés Niospa meka yoikì ato kirika kenexoni afara chakaònoa tàpinòfo. Akka nà Moisés ato kenexoni mā òifìkakì a Niospa ato yoia keskara tsòa nikakòikanima. Keyokòichi afara chakafamisfo. Mā chakafakì finafafono Niospa ato noisharakòixò áfe Fake atoki nìchini ato chaka soaxonò. ²¹ Afara chaka fisti shinàkani namisfo. Akka Niospa noko noikòia. Nàskakè áfe Fake Jesús noko nàxoni nòko chaka noko soaxoxiki. Nàskakè nò Jesús chanìmara faito Niospa afaa chakafamisma keskara noko òi. Noko chaka soaxonano nò afe ipanaka.

6

Cristo nia keskara nòri afe nìpatiro

¹ Akka yorafáfe atirito shinàkakì iskakani: “Nò afara mēxotaima chakafafaino Epa Niospa noko noikì nòko chaka noko soaxotiro. Nàskakè nò afara chakafa fafafaìtiro.” Ixò anori shinàkani sharamè? Maa, sharama. ² Nàskakè afara chaka shinàyamakáfe. Nò Jesús chanìmara faxò mā nòko chaka nò pota. A nò ipaoni keskara nò anà shinàpaima. ³⁻⁴ Mā mā tàpia noko maotisafani nò fetsafo òimanò. Nàskax nò a Jesús fe naa keskara nò chaka ipaoni keskara anà shinàima. Nàskakè nòko chaka soapaikì nò Jesús chanìmara faino noko maotisafani. Jesús nokoònoax naano maifanifo. Nàskax nò afe naa keskarax nòri maia keskara. Akka Jesús naax otoinàkafata Apa ari kani. Nòri nono mai anoax Jesúsnoax ari nò katiro. Askaxò Apa Niospa mā Jesús otofaxò noko òimani nàatomài afama mīshti fatiroxakì. Nòko òiti noko fetsafaano a nò ipaoni keskara nò anà itiroma, a keskara sharakòì nò ipai.

⁵ Cristo nòkoònoax nani. Nà nò chanìmara faax nò afe rafetiro. Nàskakè Jesucristo nakè Apa Niospa otofani keskarakìri anà otofatiro, a keskara shara nò inò. ⁶ Jesús mastanifo nòko chaka noko soaxonò. Nòri Jesús fe masta keskarakòì anà chakafapaima. Nàskarifiiai nò Jesús Ifofaax nò afe naa keskara. Nàskaxò nò anà chaka shinàima. Afara chakafo nòko ifoma. ⁷ Akka yòra nàxokai anà chaka shinàtiroma. Nàskarifiiai nòri chaka shinàtiroma afara chakakairoko nòko ifokè.

⁸ Nò Cristo fe naa keskaraxò nò Jesús chanìmara faax nò afe isharpakenaka nāmài nò chanìmara faax. ⁹ Mā nò tàpia Cristo mā nafiano Niospa otofani. Nàskax anà natiroma. Anàkai afeskak Cristo natiroma. ¹⁰ Akka nai fistinixakì nòko chaka noko soaxoni anà afara chaka nòko ifo inòma. Nàskakè iskaratìa Cristo mā nia. Nàskaxò nà Niospa apaiyai keskarai.

¹¹ Māri Cristo fe naa keskara. Nàskakè iskaratìa mā shinàtiro iskakì: “È chaka ipaoni keskara anà shinàpaima. Nàskax ē iskaratìa Jesucristoònoax Epa Nios fe rafe kakaini ea amapaiyai keskara axiki,” ixò anori shinàkàfe. ¹² Nàskaxò afara chaka anà ifofayamakáfe afara chaka mato famapai kiki a keskara mā anòma. ¹³ Nàskax Niosnoax isharpakáfe. Afara chaka mato famapaiyai nìkayamakáfe. Afara chakafamis iyamakáfe. Nios Ifofakáfe mato sharafanò. Iskaratìkàfe: “Nios ēfe Ifokòixò ea amapaia keskara ē aki sharafakì.” ¹⁴ Akka anà afara chakapa mato afeska fatiroma. Afara chaka anà mato Ifo itiroma mā mā Cristo chanìmara faano. Epa Niospa mato noikì ares fisti mato ifitiro mā afe ipaxanò. Akka nà Moisés kirika kenenìònoaxkai mā Nios fe ipaxatiroma.

Epa Niospa mato amapaiyai keskara mā nikakòiyànā mā yonoxokòitiro

¹⁵ Moisés yoini keskara nò nikaito Epa Niospa noko nimasharaima. Akka Cristo nò chanìmara faito noko noikì noko nimasharatiro. Nà fisti nòko Ifo itiro noko chaka soaxonano. Nàskatari, ùnò afara chakafa fafafaìtiro mē Niospa noko noikì nòko chaka soaxonò? Maa, nò afaa chakafatiroma. ¹⁶ Mā tàpia áfe yonomatixò mato ifo nikakòiyànā mā yonoxotiro. Nàskarifiakì mā katotiro fatomākì mato Ifo. Epa Nios mā nikakòitiro áfe yonomati ixii, askayamai chaka mā katoax mā áfe yonomati mā itiro. Chaka katoax mā naax mā omiskòixii, mā Nios fe nìpanakama. Askatamaroko Epa Nios nikakòiax mā áfe isharpakenaka. ¹⁷ Mā afara chaka ifofaax áfe yonomati mā ipaoni. Akka iskaratìa mā mā Epa Nios Ifofaa. Mato yoimis keskara mato shinà mēraxò mā nikakòimis. ¡Aicho! Mā mā Epa Nios Ifofaano mato nimasharamis. ¹⁸ Nàskakèkai afara chaka anà mato ifo itiroma anà mato yonomatiro. Akka iskaratìa afara shara fisti mato ifo itiro. Māfi áfe inakòifoki. ¹⁹ È mato

meka fekaş yoima, mato ifoðnoa ē mato yoinō mā tāpisharakōinō. Chaka fetsa fetsatapafo mato ifo ipaoni. Nāskaxō mā afara chakafakī finakōipaoni. Akka iskaratīa Epa Niospa āfe inafō, mā. Anā afara chakafayamakāfe afara shara fisti mato ifo inō.

²⁰ Taeyoi afara chaka mato ifo ipaoni. Nāskakē afara shara mā shināpaonima mato ifo ipanā. ²¹ ŷMā ipaoni keskara sharamē? ŷMato imasharapaonimē? Maa, a nō ipaoni keskarakai anā afokai nō shināpaima. Afo nō shināi nō rāfitiro. Nā chakafō xateyamax nā nō naitīa nā omiskōipakenakafo mēra nō katiro. ²² Nāskakē iskaratīa afara chaka anā mato ifoma. Epa Nios mato Ifo. Māfi āfe yonomatifoki. Mā āfe yonomatifokē mato sharafa fafafāini a keskara shara mā inō mā afe ĩpaxanō. ²³ Nā afara chaka nōko ifono, ŷafanā noko kopifaimē? Akka aðnoax nō naax nō omiskōipakenaka. Akka Jesucristo nō Ifofaino Epa Niospa noko afaa kopi yōkaima nō afe nipaxanō.

7

Nō anā chaka ifofaxoma nō Cristo Ifofatiro

¹ Efe yorafāfe, mā mā tāpia nōko xanifokōichi noko yoia keskara nō nikatiro. Nō niyoxō nō nikatiro. Akka mā nō naxō nō anā nikatiroma. ² Nāskarifiāi kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka. ³ Akka fene niyoanokai kēromā fene eneta fetsa fe fianātiro. Askarafi chakakī. Chota feroma itiro. Akka fene naano kēro feronāfake fetsa fe fianā askara shara, ixō Moisés keni.

⁴ Akka mā fenē naxō anā āfe āfi yonomatiroma. Nāskarifiakī mā Cristo fe naa keskarak a Moisés kirika keni anā mā nikatiroma. Akka mā Cristo fe naa keskarak mā yora fena sharakōi itiro Cristo mato Ifono. Mā Cristo naax otoiñākafanax Nios fe ipanaka. Nāskaxō afara shara mato amatiro mā Nios yonoxonō. ⁵ Nō Cristo Ifofamatai afara chaka fetsa fetsatapafo nō ayopaoni. Moisés keni keskara atama nō chaka fisti shināpaipaoni. Nā chakaðnoax nō naxii. ⁶ Cristo noko nāxoni nōko chaka noko soaxoxikī nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarak nō yora fena shara iki. Afara chaka anā nōko ifoma. Askatamaroko āfe Yōshi Sharaðxō Niospa noko amapaiyai keskara noko amatiro. A fisti nō Ifofai, a Moisés keni keskara ifofayopaonixaki anā nō ifofatiroma.

Moisés keniioxō nō tāpia nō chakafamis

⁷ Iskafakī shināyamakāfe. A Moisés noko kenexoni, chakara fayamakāfe. Akka Moisés Niospa yoini keskara keneyamanikēkai nō chakafamis nō tāpikeranama. Moisés keni iskafakī: “Yora fetsanā afara fiapayamakāfe. Nō yora fetsanā fiapaii nō chakafai,” Moisés anori keneyamanikē nō tāpikeranama. ⁸ Moisés anori keni tāpifioxō nōko ðiti chakakōikē nō shināsharaima. Nōkonāyamafekē nō fichipaimis. Afara chakafori nō fichipi. Akka Moisés Niospa meka keneyamanikēkai nō nikayospa ikeranama. ⁹ Niospa meka tāpixoma afara chakafafiakī nō shināma. Askata chipo nō āfe meka tāpifioxō nō akama a noko yoia keskara. Nāskafaxō āfe mekaðxō a nō afara chakafamis nō tāpitiro. ¹⁰ Niospa yoia keskara akax nō nipaxatiro. Niospa yoiai keskara nō akima mā tāpifiax, askax nō omiskōi. “Moisés keni keskara ayamax nō natiro,” ixō nō shināmis. ¹¹ “Epa Niospa noko yoia keskara nō aki. Nāskai nō Nios fe nīpanaka,” ixō nō shināfikī nō afara chakafakī nō xateama. Akka chakapa noko pārai. Nāskakē nō tāpia nōko chakaðnoax nō omiskōi nō Nios fe nīpanakama.

¹² Moisés keni keskara sharakōi nāmāi Niospa meka. Niospa meka mēstekōi, chanīmakōi. ¹³ A Moisés keni sharafianokai a keni keskara nō nikasharamisma. Moisés keniioxō nō tāpitiro nō chakafamis. Moisés keni ðifikī, ŷafeskafaxō nōko chaka nō potatiromē? Nāskax nō naax nō omiskōipakenaka. ŷMoisés keniioxō nō omiskōipakenakamē? Maa, askarama. Akka nō Nios nikakaspax nō omiskōipakenaka. A Moisés keni sharakōi, Niospa meka. Moisés keniioxō nō tāpia nō nikayospakōi. Nō Niospa meka nikakōimisma. Nāskax nō chakakōi.

Nōakōi nōko chaka xatepaifikī nōko shinā mēraxō nō xatetiroma. Nōko shinā mēra chakakōi

¹⁴ A Moisés Niospa Yōshi Sharapa shināmanaino noko kenexoni. Niospa meka nō shināyamai nō sharama. Afara chakafi nōko ifokī nō āfe yonomati. ¹⁵ ŷAfeskai nō iskamismē? Nōkai tāpīama. Nō sharafapaiyai keskara nō akima. Akka nō akaspafiakī nō aki. ¹⁶ Moisés keni keskara nō nikapai, “Nā meka shara,” shinākī. Askara shināfikī nō akima. Nā afara chakafapayamafikī nō aki. ¹⁷ Nōakai nō afara chakafapaima. Akka nōko shināmā nō shinākī nō afara chakafamis. Afara sharafapafikī nō shināsharaima, nōko shinā mēramāi chakakōikē. ¹⁸ Mā nō tāpia nōko shinā mēra sharama. Isharapaifi nō itiro. ¹⁹ Akka a nō akai keskara sharama. Nā sharafapafikī nō amisma. Nā afara chakafapayamafikī nāskara nō amis. ²⁰ Nāskakī a nō akaspai nō aki. Nōakōi nō afara chakafapaima. Nō chaka potapafikī nō potatiroma nōko shinā mēramāi chakakōikē. ²¹ Akka nō askamiskī.

Nō sharafapaifaito nōko shinā mēraxō afara chakapa noko fakirira shināmapai nō shara shinānōma. Nō keyokōi askamis.

²²⁻²³ Nōa nō iskafai: “Aicho. Niospa noko yoiāi keskara shara,” ixō nō shināfi nō nikayospamis afara chakapamāi noko fekaxtefai. Niospa meka nō tāpifiax nō nikayospamis. Nōa nō sharafapaiyai keskara nō atiroma. Nō chaka xatetiroma. ²⁴ Nāskakēkai ē inimaima. Ē shināchakai. Ēfi feronāfakē chakakī. Ē inimaima. Ēfe shinā mēraxō ē afara chakafaax ē omiskōixii. Ooa. ¿Tsōa nō Ifofatiromē nōko Ifokōi inō, afara chaka anā nōko ifo inōma? ²⁵ Aicho Epa Nios. Ēfe Ifokōi Jesucristoōxō ēfe chaka ē xatetiroki. Iskaratīa ē tāpia Niospa meka nō ifofapaifiki afeska faxō nōa nō atiroma nōko shinā mēramāi chakakē. Akka Jesucristoōxō nō atiro.

8

Niospa Yōshi Sharaōnoax nō ika

¹ Akka Jesucristo nōko Ifono nō afe yora. Nāskakē Epa Niospa noko yoima iskafakī: “Mā chaka. Ē mato omiskōimanō. Emakinoax fotakāfe omiskōipakenakafo mēra nānoax mā omiskōipakenaka,” ixō noko yoipakenakama māmāi nōko chaka noko soaxō, ² Jesucristoōxō Niospa āfe Yōshi Sharapa noko nimasharai anā chaka nōko ifo inōma, nō omiskōipakexanōma. ³ Moisés yoini keskara nō tāpifiano aato noko imasharatiroma nōko chaka noko soaxotiroma. Akka Epa Niospa shināyoni āfe Fake nai mēraxō mai ano nīchixiki ari noko keskara yora inō. Noko keskarafaxokai nō amis keskara afaa chakafamisma. Akka noko nāxoni anā afara chaka nōko ifo inōma. ⁴ Nāskata iskaratīa nō Niospa Yōshi Shara Ifofaax aōxō Moisés yoini keskara nō nikatiro. Nō Niospa meka ifofasharakōitiro.

⁵ Akka nō chaka xateyamano afara chakapa noko amapaiyai keskara fisti nō atiro. Akka Niospa Yōshi Sharapa noko Īkināno nā noko amapaiyai keskara fisti nō atiro. ⁶ Nā apaiyaifo keskara fisti shinākanax afo nakanax anā otokanax omiskōipakenakafo. Nios fe ipanakafoma. Akka Niospa Yōshi Shara ato mēra naneano nā apaiyai keskara Niospa Yōshi Sharaōxō atirofo. Nāskax isharapakenakafo shināsharakata. ⁷ Fetsafāfe Nios noikaspakani Niospa ato yoiāi keskara nikapaikanima. Āto shinā mēraxō afara chaka fisti shinākani. Nāskaxō Niospa ato yoiāi keskara nikatirofoma. ⁸ Nā āto shināmāi shināifo keskara fisti shinākakī Niospa ato amapaiyai keskara atirofoma. Afara chaka ifofaifono Nios atoki inimaima.

⁹ Akka māakai askarama. Māto shinā mēraxō afara chakapa mato shināmanima. Akka Niospa Yōshi Shara mato shinā mēra nanexō mato shināmasharamis. Akka Niospa Yōshi Shara mato shinā mēra naneyamaino mā Cristo fe rafetiroma. ¹⁰ Cristo mato fe rafefiaino afara chakaōnoax mato yora nai. Māto yora nafiano mato fēro mēsho naima Nios fe nīpanaka Niospamāi afaa chakafamisma keskara mato ōiaino. ¹¹ Mā Jesús naano Niospa otofani. Nāato āfe Yōshi Shara mato shinā mēra nanea. Nāskarifiakī mato yora naano āfe Yōshi Sharaōxō Niospa anā mato otofatiro mato yora fenasharakōi inō.

¹² Efe yora mīshtichi, Niospa Yōshi Shara nofe rafeaino Epa Niosnoa nō shinātiro noko amapaiyai keskara akī. A nō afara chakafamiskai anā nō shināpaitiroma noko Niospa amapaiyai keskara akī. ¹³ Akka a nō apaiyaifo keskara fisti shināx nō omiskōipakenaka nai. Akka nāskafixō Niospa Yōshi Sharaōxō afara chakafakī nō xatexō anā chaka nō shinātiro. Nō Epa Nios fe nisharapakenaka.

¹⁴ Niospa Yōshi Sharapa noko shināmanaino nō Niospa fakefo iki. ¹⁵ Āfe Yōshi Sharapa noko shināmasharapai nō anā mesenōma. Mā nōfi Niospa Yōshi Shara fīaki. Nā āfe Yōshi Sharaōxō āfe fakefo noko imā. Aōxō nō yoitiro iskafakī: “Epa Nios, mī ēfe Epa,” ixō nō yoitiro. ¹⁶ Nōko shinā mēraxō Niospa Yōshi Sharapa noko yoi iskafakī: “Mī Epa Niospa Fakekōi,” ixō noko yoi. ¹⁷ Nō Niospa fakekē nā noko yoiāi keskara noko inātiro. Nōfi nō Niospa fakekē nā āfe Fake Cristo ani keskara nokori inātiro. Nōōnoax omiskōifinixakī iskaratīa nai mēraoax Apa Nios fe xanifokōi. Nāskarifiāi nōri aōnoax omiskōiax nō nai mēra Epa Nios ano nokoano noko sharafinakōia imaxii nō afe isharapakexanō, a keskara shara nō inō. Akka afe yorafo Niospa ato sharafaxōi nāfomāi āfe fakefokē.

Niospa fakefo Jesús fe isharapakenakafo

¹⁸ Nō iskaratīa omiskōiyofiax nō chipo Jesús fe isharapakenaka. A keskara sharafinakōi noko imāi. Tsōa ōimisma keskara sharafo noko ōimaxii. A nō omiskōipaoni anā nō shināima. ¹⁹ Epa Niospa āfe fakefo otofaxii a keskara sharakōi ato imaxii. Akka nā Niospa onifanifāfe manakani ōisharapaikōikakī afe keskarafato ato imaimākai. ²⁰⁻²¹ Niospa āfe fakefo sharakōi ato ōimaxii. Nāskatari a onifanifori sharakōi ixii. Anā afaa chaka ixiiima. Afarafo anā payokomepakēnakama. Akka iskaratīa nā Niospa onifanifo payokomepakēnakafato askayamapaifiaifono. Nāskaxō Niospa yoini: “Adān afara chakafaōnoax keyokōi

payokomepakenaka.” Akka Niospa ãfe fakekõifo akiki nokoafono ato yora fetsafaxoxii anã payokomenõfoma, afara chakafãfe ato fekaxtefanõma. Nãskarifiã Niospa onifanifori nã Niospa fakekõifo keskara shara ixii, anã payokomepakenakama.

²² Këromã fake kãikĩ pae meytiro. Mã kãixõ anã pae metiroma. Nãskarifiã a Niospa onifanifo omiskõiyokani. Akka mã Niospa ato fetsafaano anã omiskõixikanima. ²³ Akka nõ Niospa fakefo ãfe Yõshi Shara nofe rafeaino nõ tãpitiro nõ Nios ikano kaax nõ isharakõixii. Akka iskaratã nõ isinĩ iki fekaxtei. Nãskakẽ nõ manasharai Epa Nios ika ano noko ifinõ nõ ãfe fakefokẽ a keskara shara noko imanõ. Nãskatari nõko yora fena sharakõi noko imai anã nõ isinĩ inakama. Anãkai nõ nanakama. ²⁴⁻²⁵ Nãskara nõ shinãi nõ akiki nokoaito noko fetsafaxii a keskara shara nõ inõ. Nãskax nõ afe ipanaka. Chanĩmara faxõ inimayanã nõ manasharatiro fena fenakima nã nõ akiki nokoaitã. Akiki nokoxõ nõ anã manatiroma mãmãi nõ õiki.

²⁶ Nãskarifiãkĩ Epa Niospa ãfe Yõshi Sharapa noko axosharafafãini. Afeskaxõ nõ Epa Nios kifisharatiromẽ nõkai tãpiama. Akka ãfe Yõshi Shara nõ mẽra nanexõ noko shinãmanaino nõ kifisharatiro. Noko noikĩ noko kifixonĩ. Noko kifixonai keskarakai tsõarikai kifitiro. ²⁷ ãfe Yõshi Sharapa shinãi keskara Epa Niospa tãpikõia. Keyokõi nõko shinã mẽrari nõ shinãi keskara tãpikõia. Epa Niospa noko amapaiyai keskara nãnori ãfe Yõshi Sharapa a chanĩmara faafo tii ato kifixomis.

Jesúsxõ nõ keyokõi finõkõitiro

²⁸ Akka nõ tãpia Epa Niospa noko katoni a apaiyai keskara nõ anõ. Nõ Epa Nios noiaino afarafãfe noko afeskarafafaino afoxõ Epa Niospa noko axosharai. ²⁹ Nõ Jesús Ifofayoamano Epa Niospa tãpiyoni fatofomãkĩ a chanĩmara faifo. Akka chanĩmara fayoafoamano shinãni iskafakĩ: “Nafõ ãfe Fake keskara ãfe ato imaxii,” ixõ shinãyoni. Niospa ãfe Fake iyoa Jesús. Nãskaxri nõri ãfe fake chipoko ixii. ³⁰ Tãpiyoni nõ ãfe fakefo ixinõ. Askano nõko shinã mẽraxõ noko yoini: “Èfe Fake chanĩmara fakãfe,” noko fani. Fatora anori yoixõ ato chaka soaxoni isharanõfo, afaa chakafamisma keskara ato õixii, ato chaka soaxonano ãfe Fake sharakõi keskara inõfo.

³¹ Noko askasharafaino nõ fakiri yoitiromẽ? Epa Niospa noko sharafakõinaino afara chakafãfe noko chakafamatiroma. ³² Epa Niospa noko noikĩ ãfe Fake Jesús timamanima noko naxonõ. Nãskanixakĩ noko axosharatiro nã apaiyai keskara nõ anõ. ³³ Epa Niospa noko katoni nõ afe yora inõ. Nãskaxõ nõko chaka noko soaxonano afara chakafamisma keskara noko õixiki. Askano fetsafãfe mã chakara noko faifono nõ ato ifofaima. ³⁴ Jesucristo noko nãxokẽ Ápa otofani. Iskaratã Epa Nios ika ano ika Apa feta ato keyokõi ikĩnã. Epa Nios noko kifixõfafãini. Nã chanĩmakõikẽ tsõa, “Mĩ afara chakafamiskĩ. Nãskax mã omiskõipakenaka,” noko tsõa fatiroma. ³⁵ Tsõakai Jesucristo nomakinoa potatiroma noko noiyamanõ. Nõ omiskõikãi, nõko shinã mẽra fekaxtekãi, nõ Jesúsnoa yoiaito noko omiskõimafãi, noko fonãimafãi, nõ rapati yopafãi, noko mesemafãi noko retapaifãi, keyokõi afãfekãi Cristo nomakinoa potatirofoma noko noiyamanõ. ³⁶ Niospa meka yoikĩ David kirika keneni iskafakĩ:

Epa Nios, pena tii mĩõxõ noko retepaikani. Nõ oveja keskara. Ifãfe nã oveja itipinĩfasharai retexiki. Nãskarifiãkĩ a mĩõxõ noko chakafãifãfe noko retepatirofo, ixõ kirika keneni. ³⁷ Noko askafafãifono keyokõi nã chakafo nõ finõkõitiro Jesús noko noiaino. ³⁸⁻³⁹ Jesucristo nõko Ifonokai afanã Epa Nios nomakinoa potatiroma anã noko noinõma. Nã ãfe chanĩmara fakõini. Epa Niospa noko noiaino afanã noko afeska fatiroma anã noko noinõma. Nõ nafiakẽkai nomakinoa afanã Nios potatiroma. Nõ niyoanori nomakinoa tsõa paxkatiroma. ãfe ãjirifãferikai nomakinoa paxkatirofoma. Yõshi chakafãferikai nomakinoa paxkatirofoma. Afarafo iskaratã ikaifãferikai nomakinoa paxkatirofoma. Inõpokoiaifãferikai nomakinoa paxkatirofoma. Afara chakafãfe ãto xãnifofofãferikai nomakinoa paxkatirofoma. Nã nai ari ikafãfe, mai ano ikafãferikai nomakinoa paxkatirofoma. Epa Niospa nõko Ifo Jesucristoxõ noko noi. Nãskakẽ keyokõi onifanifãferikai nomakinoa paxkatirofoma anã noko noinõma.

9

Niospa judeofo katoni afe yora inõfo

¹ È Cristo fe rafexõ ã mato mẽstekõi yoi. È mato pãraima. Niospa Yõshi Shara ã mẽra naneano ãfe shinãmã shinãkĩ chanĩma ã mato yoi. ² È mato yoi iskafakĩ, ãfe kaifo atirito Cristo Ifofaafoma. Nãskakẽ ãfe shinã mẽra ã atoõnoax omiskõi kakaini. È ato shinãkõikĩ finamis afomãi efe yorafokẽ. ³ Nãskakẽ ã shinãmis iskafakĩ: “Epa Niospa, ãfe kaifo nã israelifo ã ato axopai fenoyamanõfo, mefe nipaxanõfo omiskõipakenakafo mẽra fonõfoma. Nãskaxõ Cristo makinoa ea potãfe ato potakima ã ato omiskõixonõ afo omiskõipaxexanõfoma.

Nā ē fichipai ēfe kaifo judeofo Cristo fe İpaxanōfo,” ixō ē shināmis. ⁴ Nō judeofo, Jacobo āfe fenafo. Epa Niospa noko ifini āfe fakefo nō inō. Nāa Nios sharafinakōixō nōko kaifo israelifo ato ōimapaoni. “Ē mato afara sharafaxōikai. Cristo nā oxiai judeokōi ixii. Aōxō ē mato sharafaxōikai,” ixō Niospa yoini. Nāskara Moisés Niospa meka yoikī israelifo ato kirika kenexoni nikanōfo. Nāskaxō ato tāpimani afeskaXō Nios kiftirofomāki ichanāxō. Nāskata afara sharakōi ato axoxiai keskara ato yoyoini. ⁵ Judeofāfe xinifāfe Epa Nios İfosharapaoñifo. Cristori judeo fake kāini, Niospa Fakekōiifax. Nāskax arifi nōko xinifāfe āto fena. Nāfi yorafāfe āto İfokī, nāatomāi keyokōi ato İkikē. Nāskakē, “Nios fāsi finasharakōia,” nō fapaxanō. Askapainō.

⁶ Epa Niospa noko yoisharayoni keskara judeofo atirito chanīmara fayamafiafona āfe meka chanīmakōi. Afe yorafo yoyoini keskara axii. “Nā judeofo Israelifāfe āto fenafo ē katoa efe yora inōfo,” ixō Niospa yoini. Askafafiano atirito Nios chanīmara famisfoma. Nāskakē afe yorakōi keskara Niospa ato ōima. ⁷ Nāskarifiakakī Abraham apaoni keska fakī āfe fena atirifāfe Nios chanīmara famisfoma. Afokai Niospa yorakōifoma. Akka Niospa Abraham yoini iska fakī: “Mī fakekōichi Isaaca āfe fakefo mī fenakōifo ixii, mī fake fetsafāfe āto fakefori mī fenakōifo ixiima,” ixō yoini. ⁸ Nāskano nō tāpitiro Abraham āfe fenafo atiri āfe fakekōifo Niospa ato ōima. Akka Niospa Abraham yoyoini āfe āfinī Sara fake fixiai. “Nā fakefi mī fakekōi ixii. Mī fakē āfe fakefori mī fenakōifo ixii,” fani. Nā yoini keskara Abraham Nios chanīmara fani. Nā Abraham Nios chanīmara fai keskafakīri Nios chanīmara faifono nāfofi Niospa fakekōifoki. ⁹ Abraham āfe āfinī Sara fake naneamatai Epa Niospa yoyoini iska fakī: “Xinia fētsa ē anā mikiki nokoxii. Nāskano mī āfi Sara fake kāixii feronāfakē,” ixō Niospa Abraham yoini.

¹⁰ Nāskata Sara āfe fake kāini. Nāskaxō aneni, Isaaca fakī. Nāskakē nā Isaaca nōko xini. Isaaca naetapaxō Rebeca fini āfe āfi inō. Rebeca fake rafe naneni. Nā fake rafeta itō apakōi Isaaca ipaoni. ¹¹⁻¹² Rebeca fake kāini fake rafe naneax. Esau kāi taeni. Chipa Jacobo ini. Akka kāiyoafomano tsoa tāpiyonima fatoto shara shināimākai, fatotori chaka shināimākai. Nāskano Niospa fisti katoni afe yora inō. Kāiyoafomano Niospa āto afa yoyoini iska fakī: “Mī fake chipokoto āfe ochi yonomaxii,” fani. Akka Niospa nā apaiyai keskara fatiro, yorafāfe apaiyai keskara Niospa faima. Askano nō tāpitiro Niospa a inōpokoi keskara shināyoni nāskarokōi aki. ¹³ Nāskara Niospa meka yōra kirikaki keneni iska fakī: “Ē Jacobo ifipai efe yora inō. Esau ē fichipaima,” fani.

¹⁴ Nāskakē ħiskara nō yoitromē, “Niospa mā fake fisti katoa kāiyoafomano, afaa chakafayoafomano fisti mī katoa akka fetsa katoama ōixoma. Nāskakē Niospa shināsharaima,” ixō nō shinātiromē? Maa, anori nō shinātiroma. Akka Niospa tāpisharakōia. Nā apaiyai keskara fatiro. Nā fichipaiyai katotiro. ¹⁵ Niospa Moisés yoini iska fakī: “Nā ē axopaiyai ē axosharaiakai. Nāskarifiakī nā ē noipaiyai ē noisharaiakai,” ixō Niospa yoini. ¹⁶ Askatari nō Nios nikasharatama nōakōi nō afe yora isharapayaito askara noko axōima. Askatamaroko Niospa noko noikī noko iftiro afe yora nō inō, nāatomāi noko ōiti tāpikaxō. Nāskaxō noko noikī nā apaiyai keskara shara axōi. ¹⁷ Moisés kirika keneni iska fakī: “Epa Niospa Egipto anoa āto xanifo yoini iska fakī: ‘Ē mia xanifo imapaikī ē mia xanifo imani mīoxō nā maitio ikafāfe tāpinōfo ē afama mīshti faito. Akka mī afara chakafaito ē mia potai mī anā xanifo inōma. Ē mia askafaito ōikakī eōnoa ato yoitirofo nā maitio ikafāfe: ‘Nios tsoa keskarama āfe shināōxō mā Faraón pota,’ ixō eōnoa yoitirofo,’ ixō Niospa Faraón yoini.” ¹⁸ Akka shinākapo. Nā Niospa ato noipaiyai ato noikī axosharatiro. Nāskarifiakī fētsa afara chakafakī xateamano Niospa āfe ōiti nikayospakōi imatiro afaa shināpaiyamai keskara imatiro.

¹⁹ Nāskakē fētsa shinātiro iska fakī: “Ķafeskakī Niospa noko yoitromē afara chakafamisfora fakī? Akka nāato noko amai nā apaiyai keskarafakī. Nāskakē noko omiskōimatiroma nō nikayospaito,” ixō fētsa yoitiro. ²⁰ Askafayamafe. Ķafeskakī mī Epa Nios kemapaimē? Mifi yoraki. Aafi Nioski nā apaiyai keskara atiro. Akka a Niospa onifatokai yoikī iska fatiroma: “Ķafeskakī mī ea iskara onifaamē?” ixō yoitiro. ²¹ Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iska fatiroma: “Ķafeskakī mī ea iskara faamē?” ixō yoitiro.

²² Nāskarifiakī Epa Niospa keyokōi yorafo onifafaxō atiri ato potatiro āfe meka nikaka-spaifāfe. Fenāmāshta ato yoioyofaito nikayospamisfo. Nāskakē anā teneima, mā atoki ōitifishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe. ²³ Akka nōfi ato keskarama. Noko Niospa noikī noko tāpimamis. Nāskatari noko itipinīsharafamāi inimakōikai nō nai mēra shara afe İpaxanō. Noko askafamakī yorafo ōimani nā noiaifo Niospa ato noikōia. ²⁴ Noko judeofo fisti Niospa katonima nō afe İpaxanō. Akka judeofomafori ato katoni. ²⁵ Nānori Oseas Niospa meka yoikī kirikaki keneni iska fakī:

Fetsafo judeofomari ē katoxii efe yorafori inōfo. “Ē mato noi,” ē ato yoiyamafikatsaxakāi, ē ato yoixii iskafakāi: “Ē mato noikōi,”

ixō Epa Niospa yoini keskara Oseas kirikaki keneni. ²⁶ Askata anā keneni iskafakāi:

Niospa judeofoma ato iskafani: “Mā kai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakāi: “Nafō Niospa fakefo. Epa Nios finakōia afama mīshti fatiro,”

ixō yoixikani. ²⁷ Isaías israelifoōnoa yoini iskafakāi: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarifiāi judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakāi. ²⁸ Nāskaxō nā yoiyoni keskara nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo,” ixō Isaías yoini. ²⁹ Isaías yoiyoni keskara nāskakōi. Nāskata anā yoini iskafakāi:

Nōko Ifo finasharakōia nōko fenafo fetsafo ifini afe ĩpaxanōfo. Askafayamafiano anā judeofo ikeranama. Akka nō nai keyokerana Sodoma anoa fe Gomorra anoafo ini keskai, ixō Isaías kirika keneni.

Nā judeofoma na meka shara Jesúsnoa Pablo ato yoini

³⁰ Nāskakē ē mato yoi. Nā judeofomafāfe shināyonifoma iskafakakāi: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki. ³¹ Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakāi: “A Moisés keneni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiro ma ato shara ōixiki. ³² ¿Afeskakāi Niospa ato shara ōimamē? Ē mato yoinō. Afāfekairoko Jesucristo chanīmara faifono ato chaka soaxopanā. Askatamaroko Moisés ato yoini keskaraōnoax isharapaikāi āto chaka soapaikani Niospa ato shara ōinō. Akka Moisés yoinioxō Niospa ato chaka soaxotiro ma. Ē mato afara fetsa anā yoinō. Tokiri fai nēxpakā rakano finōpai akiki nō otisikaināi nō paketiro. Nāskarifiakāi Jesús finōpaiyāifāfe chanīmara fakanima afe nīpāxakakāi ma. Akka nā yorafo oa nō tokiriki otisikai paketiro keskarafo. Nāskakāi Jesús finōpaikakāi shināchakatirofo. Akka tsōa Jesús finōtiroma. ³³ Nānori Isaías Niospa meka yoikā kirika keneyoni iskafakāi:

Nikakapo, judeofāfe āto pexe rasi ano Niospa tokiri keskara nīchixii yorafo akiki otisikā shināchakaxinōfo. Nā tokiri epapakāi yorafo otisikani paketirofo. Akka nāskarari nā Jesucristo chanīmara faafo tiikai paketirofoma. Anā shināchakakanima, ixō Jesúsnoa Isaías kirika keneni. Akka Jesús nā tokiri efa pa keskarakōi.

10

¹ Efe yora mīshtichi, ēfe kaifo ē shinākāi finakōi. Ē ato Nios kīfixōfāfāini Jesús chanīmara fanōfo, Nios fe ĩpaxanōfo. ² Mē tāpia nāfāfe Epa Nios tāpisharapaikani. Nāskafikakāi a Niospa ato tāpimapaiyai keskara shinākanima. Āa āto shināmā fisti shināxō akani. ³ Jesúsxō Epa Niospa āto chaka ato soaxotiro afaa chakafamisma keskara ato ōixiki. Akka nā Jesús ato chaka soaxotiro nikakaspakani. Āakōi shinākanax shara ipaikani. ⁴ Iskakakāi shinākani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākani. Akka Moisés kenenioxō nōko chaka nōa nō soametiroma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakāi nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ipaxakāi. Nāskakāi nō Cristo fisti Ifofatiro. Nō anā Moisés keneni nikatiroma.

Jesús yorafoōnoax ato nāxoni

⁵ Moisés kirika kenekāi iskafani: “Epa Niospa noko yoini keskara ē kirika keneni. Fatora fētsa nā meka ifo sharakōi fai isharakōixii, afaa chakafaamax. Akka māfi Nios fe ikōisharapakenakaki. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.” ⁶⁻⁸ Askata anā kirika kenekāi iskafani: “Niospa noko yoini afesax nō shara itiromākāi. Nō Cristo chanīmara faito nōko chaka noko soaxotiro afaa chakafamisma keskara noko ōixiki. Nā Cristo meka shara nōko shinā mēra ikakāi. Nō aōnoa tāpixō nō ato yois. Akka iskara shināyamakāfe: ‘¿Tsoa nai mēra katiromē Cristo fotomaxiki nō chanīmara fanō?’ Akka tsoakai nai mēra katiroma Cristo fotomaxiki. Askatari iskafakāi shināyamakāfe: ‘¿Afesaxō mā Cristo naafianikē mai mēranoko nō ifitiromē?’ ixō shināyamakāfe. Akka iskaratīa Niospa meka nō mēra ikakāi,” ixō kirikaki Moisés keneni. Nānori nō mato yois. ⁹ Akka, “Jesús ēfe Ifoki,” nō ato fakāi nō shinātiro iskafakāi: “Chanīma, Jesús nafianikē Apa Niospa otofani,” ixō nō shināito nōko chaka noko soaxotiro nō afe ĩpaxanō. ¹⁰ Akka nōko shinā mēraxō nō chanīmara fakē Epa Niospa nōko

chaka noko soaxotiro afaa chakafamisma keskara noko ðixiki. Askatari, “Jesucristo ěfe Ifoki,” ixō nō ato yoiāx nō afe ipanaka.

¹¹ Nānori Niospa meka yoikī yōra kirika keneni iskafakī: “A Jesucristo Ifofakanax anā āto ifo fetsa fenakanima. Cristo fistichi ato nimasharatiro afe ipaxanōfo,” ixō kirikaki keneni. ¹² Judeofo feta judeofomafāferi Cristo chanīmara faifono āto Ifo itiro. Niospa ato ðia nā yora fisti keskarafo, nāskarafos ato ði. Nāskaxō fatotora yōkaito Niospa axosharakōifafāini aō noikōikī. ¹³ Nānorikōi Joel yoikī kirika keneni iskafakī: “Fatotora nōko Ifo chanīmara faxō yoikī iskafaito: ‘Mī ěfe Ifoki, ea ifife ěfe chaka ea soaxoxiki,’ faito āfe chaka soaxotiro afe ipaxanō,” ixō Joel kirika keneni.

¹⁴ Akka tsōa Jesús Ifofaxoma, “Ea ifife ěfe chaka ea soaxoxiki,” ixō tsōa yōkatiroma chanīmara faxoma. Akka Jesúsnoa nikakatsaxakīma afeska faxō chanīmara fatirofoma. Tsōakairoko Jesúsnoa ato yoimiskē nikapanāfāfe. ¹⁵ Akka Niospa ato nīchiyamaino tosa katiroma Niospa meka shara ato yoixikakī. Ākai fotirofoma. Nānori Isaías kirika keneni iskafakī: “A meka shara yoi feai sharakōi,” ixō yoini.

¹⁶ Ē mato yoinō Niospa mā yorafo nīchini Cristoōnoa meka shara ato yoitanōfo. Niospa meka yoisharafiaifono judeofo atirifāfe ato nikapaikanima. Nānori Isaías kirika keneni iskafakī: “Ēfe Ifāfe, nō ato yoiāito tsōa chanīmara faima,” ixō yoini. ¹⁷ Nāskano Cristoōnoa meka shara yoiāito nikakakī fetsafāfe chanīmara fatirofo.

¹⁸ “Akka, ijudeofāfe nā meka shara Jesúsnoa nikamisfomamē?” ixō fētsa ea yōkaito, ě kematiro iskafakī: “Ēje, mā nikamisfo.” Nānori David yoini kirika kenekī iskafakī:

Nā maifo tii anoafāferi nā meka shara mā keyokōichi nikamisfo, ixō David kirika keneni. ¹⁹ Mā shināiraka iskafakī: “Akka judeofāfe na meka shara Jesúsnoa mā nikafikakī nikasharamisfomara,” ixō mā shināi rakikā. Akka ě mato yoi iskafakī, mā nikamisfo nā meka shara Jesúsnoa. Mēxotaima mā nikafikakī chanīmara faafoma. Akka israelifomafāfe Nios nikakatsaxakīma mā rama aōnoa nikafo. Moisés Niospa meka yoikī kirika keneni iskafakī:

Nā judeofoma efe yora iyopaonifoma. Akka iskaratīa ě ato noikōikī ě ato ifi efe yora inōfo. Ē ato askafaito ðikakī judeofāfe ato noikaspaxikani ato xītipaikakī. Askatari, “Na judeofomafāfe afaa tāpiafoma, judeofāfe ato fafiaifono ě ato ifi efe yora inōfo. Nāskakanax judeofo atoki ðitifishkixikani,” ixō Niospa yoini, ixō Moisés kirika keneni. ²⁰ Chipō Isaíasri Niospa meka yoikī kirikaki keneni iskafakī:

A judeofomafāfe akōi ea fenayamafikatsaxakakī chipo ea fichixō ea chanīmara fakanax efe ipanakako. Askatari, “Niosnoa noko tāpimafe,” ixō ato yoiyamafikatsaxakakī. Akka chipo ě ato tāpimaxii,

ixō Niospa yoini keskara Isaías keneni. ²¹ Askafiaifono ěfe kaifoōnoa Niospa yoini iskafakī: “Nā pena tiixō āto shinā mēraxō ě ato yoimis iskafakī: ‘Ekeki fekāfe,’ ixō ě ato shināmafaiino ekeki fepaikanima. Nikayospamisfo,” ixō Niospa yoini keskara Isaías kirika keneni.

11

Niospa israelifo noikōi

¹ Mā iskafakī shināiraka: “Epa Niospa afe yorafo israelifo mā pota,” ixō mā shināiraka. Mā askaito ě mato kematiro iskafakī: “Maa, ato keyokōi potama. Nāskaxō eari potama ěri israeli. Akka Abraham fe Benjamin ěfe xini. Nāskax ě israelikē ea Niospa potama,” ixō ě mato kematiro. ² Epa Niospa afe yora inōpokoafio israelifo ato katoyonixakīkai ato potamisma. Shinākapo. Nōko xini Elias israelifoōnoa yoikī kirika keneni iskafakī: ³ “Ēfe Ifāfe, a mī meka shara yoimisfo mā ato retemisfo. Askatari a mīsa kamakixō mia kifimisfo mā potafo. Iskaratīa ě fistichi mia Ifofai. Anā ano tsoama. Eari retepaikani,” ixō Elias Nios yoini. ⁴ Nāskafaito nikakī Epa Niospa ōfaa fanimē, Eliás? Iskafakī kemani: “Maa. Meres fistikai mī ea chanīmara faima. Akka nāno mī kaifo sietē mil yorafāfe ea chanīmara fakaxō afaa fetsakai ifoafaafoma. Akka yorafāfe onifanifo āfe ane Baal, ‘Akai nōko niosra,’ famisfoma,” ixō Niospa Elias yoini. ⁵ Nāskarifiakī iskaratīari ěfe kaifo fisti rasichi mā Nios Ifofaafō, Niospanāi afetīama ato noikī ato katoyonino afe yora inōfo. ⁶ Niospa noko noikōisharakī noko ifi nō afe yora inō. Akka nō afara sharafāfōxokai noko ifima. Niospa noko afaa kopi yōkaima noko ifixiki. Akka āakōi noko ifi noko noisharakī. Nāskakē nō afara sharafatiroma noko ifinō. Akka a nō kopifa keskara noko ðikī āakōi noko ifikeranama. Nāskakē noko afaa kopi yōkaima āakōimāi noko ifixō.

⁷ Akka ěfe kaifo israelifo fisti rasichi Nios fenapaonifo afe rafexikakī, nāfomāi Niospa katoyonino afe yora inōfo. Akka israeli fetsafāfe Nios nikakaspapaonifo Nios fe rafekaspakakī. Akka a Nios nikakaspafāfe āto ðiti kerekxōifakaxō nikakaspakani. ⁸ Nānori Niospa meka kirika kenekakī iskafanifo: “Epa Nios nikakaspakani nā oxafo keskarafo afaa shinākanima. Askatari oa yora fēxo keskara ipaikani. Nāskaxō Nios nikakōipaikanima.

Askafaifāfe Epa Niospa āfe meka shara ato tāpimanima. Iskaratīari nāskakani,” ixō yōra kirikaki keneni. ⁹ Askatari David kirika keneni iskafakī:

A Nios nikakaspaifāfe shinākani iskafakakī: “A nō piāi ichapa ita nōko afama mīshiftori ichapa. Nāskakē Niospa noko shara ōi,” ixō shinākani, Nios nikayamafakakī. Akka nōko afama mīshitiōxō Niospa noko shara ōima nō afe īpaxanō. A Nios nikakaspaifo āto afama mīshitiōnoax fenoxikani afama mīshifto shināifāfe. Niospa ato omiskōimaxii. ¹⁰ Oa yora fēxo keskara inōfo. Askarafāfe Nios nikayamaifono oa yora afara efekōi pefea keskara Niospa ato imanō, ixō David kirika keneni a Nios nikakaspaifoōnoa yoikī.

Judeofomafāferi Jesús chanīmara fakanax afe ipanakafo

¹¹ Akka, ūNiospa afe yorafo israelifo ato potapakenakamē? Maa, ato keyokōi potaima. Akka nā israelifāfe Cristo chanīmara fayamifomano a israelimafāferi mā Jesucristo chanīmara fakani. Ifofaifono Niospa ato ifi afe yora inōfo. Akka nā israelifomafāfe mā Cristo chanīmara faifono israelifāfe ato ōikakī akairi Jesucristo chanīmara fapaikani afe ipaxakakī. ¹² Ēfe kaifāfe, afara chakafamisfo Jesucristo Ifofapaimisfoma. Akka Epa Niospa nā maitio anoafō Jesucristoōnoa ato tāpimanano chanīmara fakanax afe ipanakafo. Nāskaxō Niospa ato shara faxōi, inimakōinōfo. Askatari ēfe kaifo judeofāferi chipo Jesucristo chanīmara fakanax inimai finakōixikani Niospa ato sharafaxōano.

¹³ Akka mā ēfe kaifoyamaifano Epa Niospa ea mato mēra nīchini Jesúsnoa ē mato yoinō. Ē inimakōi Epa Niospa ea katonī ē mato ano onō. ¹⁴ Ē mato yoiaino mā Cristo chanīmara fayana mā inimakōiāito mato ōikakī ēfe kaifāferi Jesucristo chanīmara fapaikani, mato keskara ipaikakī. Nāskarākōi ipainōfora. ¹⁵ Shinākapo. Ēfe kaifo judeofāfe Jesucristo chanīmara fayamaifono Niospa ato potani anā afe yorakōi inōfoma. Akka nā maifo tii anoafāfe Cristo chanīmara fakanax Nios fe rafekani. Nāskakē ēfe kaifāferi Cristo chanīmara faifono Niospa anā ato ifi afe yora inōfo. Nāskakanax sharakōi ixikani. Nā yora naax otoa keskara itirofo, inimakōikani. ¹⁶ Nāskaxō ē anā mato yoinō pākiri keparanākī iskafakī: Pāa kaxke pishta Niosnā ikano keyokōi āfenā itiro. Nāskatari ifi āfe tapo āfenā ikano āfe teshpāfori keyokōi Niosnā itiro. Nāskarifiakī ēfe kaifāfe Jesucristo chanīmara fakakī taefanifo fisti rasichi. Nāskakē āto fenafāfe Nios Ifofakanax chipo afe yora ixikani chanīmara fakanax.

¹⁷ Ē mato afara fetsa anā yoinō mā tāpinō. Ēfe kaifo judeofo ifi olivo āfe pōya keskarafo. Nā ifi pōya fimioma ifāfe mextexō potatiro. Nāskaxō ifi olivo fetsa nā nii mēra nia āfe pōya fetsa fīaxō tichixotiro nā olivo kayakōiki. Nāskarifiakī judeofāfe Jesucristo chanīmara fayamaito Niospa mā ato pota. Akka mā judeofoma. Māfi nā ifi olivo nii mēra nia keskarafofōkī. Nā ifi ifoyama keskarafo, mā. Nāskax mā Epa Niospa yora ipaonima. Akka Jesucristo mā Ifofaito Niospa mato ifi afe yora mā inō. Nāskata nā ifi olivo mā āfe pōya tichiax āfe tapo mēranoax yosiaino foaisharatiro. Nāskarifiakī nā judeofāfe āto xinifāfe mekaōxō mā Niosnoa tāpisharakōiafo nā ifi olivo yosiai keskaraō. ¹⁸ Iskara shināyamakāfe: “Nō sharakē noko Niospa ifia. Akka judeofo chakafokē Niospa mā ato pota,” iyamakāfe. Shinākapo. Māfi ifi āfe pōya keskarafo. Ifi pōyakai āfe tapomais nitiroma, xanatiro. Ifi pōyāfo aō tapoōnoax nia. Nāskarifiakī judeofo āto xinifāfe Nios tāpinifo taefakakī. Atoōxō māri Nios tāpitiro.

¹⁹ Mā shināiraka iskakī: “Ifi pōya chakakē, ifāfe mextexō pōtatiro. Nāskarifiakī judeofāfe Jesucristo chanīmara fayamaifono Niospa ato potani. Akka nō judeofo keskarama nō Jesucristo chanīmara faax nō afe ipanaka,” ixō mā shināiraka. ²⁰ Nā mā yoiāi keskara chanīmakōikī kexemesharakāfe. Akka judeofāfe chanīmara fayamaifāfe Epa Niospa ato potani. Nā judeofo potani keskafakī Epa Niospa matori potatiroki. Kexemesharakāfe, mā anā Jesús chanīmara fayamaito matori potatiroki. Nāskakē kakapayamakāfe. Mā Jesús chanīmara fayamā mā fenotiroki. ²¹ Judeofāfe Nios chanīmara fakī taefanifonono chipo āto fenafāfe chanīmara fayamaifāfe Niospa ato potani. Māri mā chanīmara fayamaito matori potatiroki.

²² Akka shinākapo. Niospa noko noifiaino nō nikayamaino noko tāpimatiro omiskōimakī. Nāskakē judeofāfe chanīmara fayamaifāfe ato omiskōimakī ato potai. Akka Niospa mato noikī afe yora mato imai. Nāskakē mato noiai keskara shināfafāikāfe. Chanīmara fafafāikāfe. Mā askafayamaino matori potatiro. ²³ Ēfe kaifo judeofāfe anā chaka shinākakima, Jesús chanīmara faifono anā afe yora Epa Niospa ato imatiro. Ifi mextexō anā āfe pōya tichixotiro anā foainō. Nāskarifiakī Epa Niospa anā ato ifitiro afe yora inōfo. ²⁴ Mākai judeofoma. Judeofo ifi olivokōi keskarafo. Akka mā judeoma. Mā nā olivo nii mēra nia keskara. Olivokōi āfe ifāfe nā nii mēra olivo āfe pōya xatexō olivokōiki tichitiro foaisharanō. Nāskarifiāi mā Niospa yora ipaonima. Akka iskaratīa Epa Niospa mato ifia mā afe yorafo inō. Nāskakēri ēfe kaifo anā Niospa ato ifipasharakī ifitiro afe yora inōfo. Jesús chanīmara faifāfe afe yorafo ato imatiro.

Epa Niospa judeofo anā ato ifixii afe yora inōfo

²⁵ Efe yora mīshṭichi, māfi israelifoma. Meka fetsaōnoa mā nikamisma ē mato tāpimanō mātō shinā mēraxō mā shinānō, nā ē mato yoiāi keskara mā tāpiax kakapaimis mā inōma, mā iskanōma: “Nō israelifo keskarama, nō sharafinakōia,” mā inōma. Chanīma, iskaratīa ēfe kaifo israelifāfe āto ōiti kerexkōixō Niospa meka shara Jesúsnoa nikakaspakani. Akka israelifāfema Jesús chanīmara faafono Niospa ato ifini afe yora ato imaxii. Nāskatari ēfe kaifāferi anā Nios chanīmara faifāfe Niospa anā ato ifixii afe yora inōfo. ²⁶ Akka keyokōichi israelifāfe Jesús chanīmara faifāfe Epa Niospa ato ifixii afe yora inōfo. Nānori Isaías kirika keneni iskafakī:

Nōko Ifo Siōn anoax oxii nōko chaka noko soaxoxiki nō afe īpaxanō. Nā nōko Ifo israeli yora ixii. Nāto israelifo ifiyoi anā afara chaka āto ifo inōma, ixō Isaías kirika keneni. ²⁷ Askata Isaías Niospa meka anā yoini iskafakī:

Ē ato yoyoni keskara ē āto chaka ato soaxoxii,
ixō Niospa yoini Isaías kirikaki keneni.

²⁸ Jesúsnoa meka shara judeofāfe nikakaspakani, noikaspakakī. Akka mā judeoma. Nāskakē Epa Niospa mato sharafaxōa āfe meka shara Jesúsnoa mā chanīmara fanō. Akka judeofāfe āto xinifo Niospa yoini iskafakī: “Ē mato ifi mā efe yora inō,” ixō ato yoini. Nāskakē āto xinifoōxō Niospa ato noi, āfe fenafori noikōi. ²⁹ Epa Niospa ēfe kaifo āfe afama mīshṭi ināixakī yoyoni keskara anā fetsafaima afetiāmamāi ato ifiyonixakī. Nāskakī ato potapakenakama. ³⁰ Akka mā judeoyamafixō mā Epa Nios nikayopaonima. Akka iskaratīa mā anā nikayospa ipaima. Nāskakē Niospa mato sharafaxopai mā chanīmara faito. Akka ēfe kaifo judeofo ato sharafaxopaiāfaiito nikakaspapaonifo. Nāskakē mā chanīmara faito Epa Niospa mato noikī mato sharafaxōi. ³¹ Nā mā Nios nikakaspayopaoni keskakani ēfe kaifofo. Nāskafiaifono nā mato noiai keskari fakī atori Niospa noikōi. Nāskakē chipo Epa Nios anā shināxikani. ³² Epa Niospa yoini tāpixō iskafakī: “Yora keyokōichi chakafamisfo, nikayospafo,” ixō yoini. Askafiaifono ato noikī ato chaka soaxoxii afe īpaxanōfo.

Nios sharafinakōia

³³ ¡Aicho! ¡Nōko Nios sharakōi! Afama mīshṭi tāpikōia. Shināsharakōia. Āfe shinā mēraxō yorafoōnoa shināi keskara tsōa tāpitiroma. Aato akai keskara tsōa tāpitiroma. ³⁴ Tsōa nōko Ifāfe shināi keskara tāpitiroma. Tsōarikai nōko Ifo tāpimatiroma. ³⁵ Tsōarikai nōko Ifo afaa ināma noko niminō. ³⁶ Ares āfe shināmā shināxō afama mīshṭi onifani. Keyokōi āfenā. Aōnoax nipanaka. Nāskakē, “Nios sharakōira,” fapanakafo. Askapainō.

12

Afeska Niospa āfe yonomati nō itiomākī

¹ Efe yora mīshṭichi, ē mato yoisharapaiyai keskara akāfe. Epa Niospa mato noikī mato sharafamiski. Nāskakē māri ināmekāfe mātō Ifo inō, āfe yonomati ipaxakakī. Mā askaino anā afara chaka mātō ifo itiro, Nios mātō Ifo iki. Shinākapo. Mā mēste shināsharakōikī Nios noiyānā sharafakāfe. Mā askafaino Nios matoki inimakōitiro. ² Nios Ifofaafāfema shināi keskara shināyamakāfe. Mā shināpaoni keskara anā shināyamakāfe. Iskaratīa Niospa mātō shinā mēra fetsafapaiyai keskara shinākāfe. Afaa fetsakai mā shinātiroma. Mā askakī mā tāpitiroma Niospa mato imapaiyai keskara sharafinakōi. Mato imapaiyai keskara mā ikaino matoki inimatiro.

³ Epa Niospa ea noikī ea yoiā ē mato tāpimanō. Nāskakē ē keyokōi mato yoisharapai. Kakapaimis iyamakāfe. Niospa mato imapaiyai keskara fisti shinākāfe. Afaa fetsa shināyamakāfe. Niospa mato shināmāna keskara fisti matōōnoa shinākāfe. Mēstekōi matōōnoa shinākāfe. Mā Nios chanīmara fakī shinākāfe iskakī: “Ea Niospa imapaiyai keskara ē ipai,” ixō shinākāfe. ⁴ Ē mato afara fetsa ēa yoiā. Nōko yora fistifiano nō pōyayai fetsea. Askata nō feroyata, pachoyata, nā nō fisti askai fetsea. Nāskaxō nāfāfe nō afara fetsafo atiro. ⁵ Nāskarīfai nōko Ifo Cristo fistikōi. Akka nōfi āfe pōya keskara, āfe fero keskara, āfe tae keskara nō iki fetsea yora fisti fiāx.

⁶ Epa Niospa noko amapaiyai keskara nō aōxō fetsafo axosharatiro. Mā nō Nios Ifofaano a noko imapaiyai keskara noko imaketsai fētsa āfe meka ato yoinōfo, fētsari ato tāpimanō, fētsari afaamaisfori ato inānō. Nāskarafo noko imaketsai. Mā nō Nios Ifofaano noko noikī noko katoa noko amai keskara nō anō. Noko fetsafo katoa āfe shināōxō fetsafori āfe meka nō ato yoinō. Nāskakē mā mato katoano mā chanīmara faxō mato yoiāi keskara fetsafori ato yoisharakāfe. ⁷ Mā mato fetsafo katokē āfe shināōxō fetsafori axosharafafāikāfe. Mato fetsafo katokē āfe shināōxō āfe meka ato tāpimasharakāfe. ⁸ Mato fetsafo katokē aōxō fetsafo ōiti ato fepeaxōfāfāikāfe. Mato fetsafo katokē afara yopaifo inimayanā ato ināsharakāfe. Mato fetsafo katokē āto xanīfo mā inō. Nāskakē Niospa shināmāna keskara

ato yonomasharakāfe. Xanīfo mēsteshara ikāfe. Nā mato katokē āfe shināōxō omiskōiaifo ato noikī inimayanā ato axosharakāfe.

AfeskaX Nios Ifoafafo itirofomē

⁹ “Ē mato noira,” ifiata ato pārayamakāfe. Yorafo noikōikāfe. Afara chakafo noikaspakāfe. Afara shara noisharakāfe. Afo potayamakāfe. ¹⁰ Nā mā Nios chanīmara faafo tii noinānkāfe. Mato fe yorakōifo fe mā noināmis keskariai noinōnānkāfe. A mā mā nōimeai keskariai fetsafori ato noisharakāfe. “Fetsafo finakōiaki, ē finakōiyamaki,” ixō ato sharafakāfe. ¹¹ Nōko Ifo yonoxoni xaniyamakāfe. Niospa Yōshi Sharaōxō inimakāi yonosharakokāfe. ¹² Epa Niospa mato sharafaxoxiai keskara shinānkāfe. Nāfo shināi inimakāfe. Akka omiskōifi fena fenayamakāfe. Epa Nios kīfikī xateyamakāfe. ¹³ Nios Ifoafafo afara yopaifono ato inānkāfe. Fetsafo pimasharakāfe. Pexe yopaifāfe mātō pexe mēra ato ikimakāfe. Ato kexesharakāfe.

¹⁴ Mato omiskōimanaifāfe ato kopiynamakāfe. Nios kīfikāfe iskakāfi: “Epa Niospa ato chakafayamafe ato sharafafe,” ixō Epa Nios kīfikāfe. Nāskaxori ato īchayamakāfe. Askataro ato sharafaxokāfe. ¹⁵ Inimaifono māri inimakāfe. Ato sharafaifono aōnoax inimakāfe. Oiaifono māri shināmitsayanā ato shinānkāfe. Omiskōiaifono māri ato aōnoax omiskōikāfe. ¹⁶ Afe feratenākāma Epa Niospa mato shināmapaiyai keskara fisti anori shinānkāfe. “Ē ato keskarama,” iyamakāfe. Xanīfofo fisti fe rafepaimis iyamakāfe. Afaayamafo ferī rafekāfe. “Ē tāpia keskarakai fetsafāfe tāpiafoma,” ixō anori shināyamakāfe. Kakapayamakāfe.

¹⁷ Mato chakafafiaifāfe ato kopiynamakāfe. Āto ferotaifi isharakāfe, “Nios chakara,” fayamanō. ¹⁸ Keyokōi yorafo fe rafepaisharakāfe. Mā aska sharafapaifiaino fetsafo mato fe rafesharapaikanima. ¹⁹ Efe yora mīstichi, fētsa mato chakafafiaito ato kopiynamakāfe. Epa Niospa meka yoikakī kenenifo iskakāfakāfi: “Mato chakafaifo ē ato omiskōimanikai,” ixō kirika kenenifo. Epa Niospa yora chakafo ato omiskōimaxii. Mākai ato omiskōimatiroma. ²⁰ Ato kopitamaroko nā mato noikaspaifo fonāikaifāfe ato pimakāfe. Nōmā ikaifāfe ato ayamakāfe. Ma askafaito ōikani, “Noko kopikanimara,” ikanax rāfipainōfo. ²¹ Askata fetsafāfe mato chakafapaifiāfāfe māri kopikiri ato chakafayamakāfe. Chaka ifofayamakāfe. Askataro afara sharafatitafakāfe. Askafakī mā chaka potatiro.

13

Nō xanīfofo nikakōitiro

¹ Epa Niospa yoini keskara nā maitio ikafāfe xanīfofo katotirofo. Akka xanīfo finakōia nikata afe rafeafori nikakōikāfe Niospa ato xanīfo imaino. Akka Niospa xanīfo ato imayamaino itirofoma. ² Niospa noko yoini iskakāfi: “Māto xanīfofo nikakōikāfe.” Akka māto xanīfo mā nikakaspakī Niosri mā nikakaspai. Mā nikakaspaito mato omiskōimaxii. ³ Akka nō isharaxkai nō xanīfoki mesetiro. Akka nō isharayamax nō xanīfoki mesetiro. Xanīfoki mesexikima isharakāfe. Mā askaito mato chakafatama matoōnoa yoisharanōfo. ⁴ Xanīfofo Epa Nios yonoxomis keskarafō mato axosharakani. Akka mā afara chakafaax xanīfoki mā mesetiro. A xanīfofo afokai kaxpa xanīfoafoma, mato omiskōimatirofo. Nāfofi Niospa ōimati keskarafokī afara chakafaifāfe ato omiskōimatirofo. ⁵ Akka māto xanīfofo nikakōikāfe mato omiskōimayamanōfo. Māto shinā mēraxō shināsharaxikakī. Ato nikayamakī mā shinātiro iskakāfi: “Ooa, ē nikayospakōi. Nāskax ē shināmitsaito ē mei,” ixō mā shinātiro xanīfofo nikayamax.

⁶ Māto xanīfofo Nios yonoxomisfo keskarafō pena tii mato yonoxokani mā isharanō. Nāskakē mato kori yōkaifāfe ato inānkāfe aōxō mato axosharanōfo. ⁷ Mā ato nimixō ato kori inānkāfe. Askatari ato noisharata ato noisharakāfe.

Nō nōinōnātiro

⁸ Tsoa nīmīyamakāfe. Askataro noinānkāfe. Noināi eneyamakāfe. Nā nō yorafo noiaioxō Epa Niospa yoini keskarakōi nō amis. ⁹ Noko yoikī iskakāfi: “Māto āfima fe iyamakāfe. Kērofori māto fenema ferī iyamakāfe. Retemitsapayamakāfe. Yometsoyamakāfe. Fetsa pārayamakāfe. Fetsa fīapayamakāfe,” ixō noko yoini. Afara fetsafori noko yoini. Nō yorafo noikī na Epa Niospa yoini keskara nō ato chakafaima. Nāskakē a mā nō noimeī keskari akī fetsafo ato noife. ¹⁰ Nō fetsafo noikōixō nō ato chakafatiroma. Akka nō ato noikōikī Niospa yoini keskara nō aki. Nō āto āfi fe nō ipaima. Askatari nō ato noikōixō nō atoki yometsoima. Askatari nō ato pārima. Akka nō ato noiaioxō Niospa noko yoia keskara nō atiro.

¹¹ Nā Jesús fena oyoaima chāi ē taefakī Jesús Ifofani. Akka iskaratūa nōko Ifo Jesús mā chaima oi. Nāskakē ē mato yoiai keskara akāfe. Oxakatsa ikai keskara iyamakāfe. Oxakatsa ikīkai nō yonosharatiroma. Nāskakē xanikakīma Jesús yonosharakokāfe itipinīsharaxikakī. ¹² Mā penaino samamakōi penatiro. Nāskarifiakakī mā nōko Ifo chaima oaino fakish mēra

ika keskara iyamakāfe. Māto chaka xatekōikāfe. Jesús ika keskara māri xafakā ikāfe afara chakafaxikakima. ¹³ Isharakōikāfe penano nō ōisharatiro pakexikima. Nāskarifiakī Jesús Ifofaax nō isharakōitiro afaa chakafatama. Akka fetsafāfe monokakī afara chakafaifo mēra foyamakāfe. Chaka fetsa fetsatapapo ayamakāfe. Pāeyamakāfe. Askatari māto āfima chotayamakāfe. Kēromāri māto fenema chotamayamakāfe. Afara chaka fetsafo shināyamakāfe. Feratenā faatanāyamakāfe. Fetsa xītipimīs iyamakāfe. ¹⁴ Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

14

Mato fe yorafo a Nios Ifofafo mekafakī chakafayamakāfe

¹ Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nōfe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekafakī chakafayamakāfe. ² Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiro: “Ēfi Jesús chanīmara fakī ēkai nami pitiro. Ē fanafo fisti pitiro,” ixō yoitiro Jesús meka tāpisharaxoma. ³ Fētsafāfe nami pikī a nami pimisfoma ato mekafakī chakafatiroma. Ato yoikī iskafatirofoma: “Mā afaa tāpiama. Nō nami pia shara, noko chakafatiroma. Nami shara,” ato fatirofoma. Nāskarifiakī nā nami pimismato a nami pimisfo ato mekafakī chakafatiroma. Ato yoikī iskafatiroma: “Nafāfe nami pikakī chakafakani,” ixokai atoōnoa yoitirofoma. Akka Epa Niospa keyokōi nāskarafo noko ifi nō āfe fakefo inō. Nāskakē fetsafo mekafakī chakafayamakāfe. ⁴ Jesús Ifofaafokai māto inafoma. Akka afāfe Epa Nios yonoxomisfo. Nāskakē ato mekafakī chakafayamakāfe. Epa Niospa ato yoitiro. A chakafaifo ato iskafatiro: “Mā chakafai,” ixō ato yoitiro. Askatari a sharafaifo, “Mā sharafai,” ato fatiro. Akka a chaka shināifo Niospa ato tāpimatiro isharanōfo anā chaka shinānōfoma.

⁵ Akka a Nios Ifofafo fetsafāfe shinākani iskafakakī: “A judeofāfe tenetiā nō ichanātiro Jesús shināi,” ixō anori shinākani. Akka fetsafāferi shinākani iskakakī: “Nā pena keyokōi shara nō ichanātiro Jesús shināi,” ixō shinākani. Nāskaxō nā āto shināmā shināifo keskara shara. Nā shināifo penata ichanātirofo Jesús shinākani. Akka mā shināi keskara shināyamaifono ato mekafakī chakafayamakāfe. ⁶ “Na judeofāfe tenetiā nō ichanātiro Jesús shināi,” ixō shināifāfe, nāfāfe nōko Ifo Jesús Ifofasharapaikani. Akka a nā fatora penata nō ichanātiro Jesús shināi ikaiāferi, nāfāfe nōko Ifo Jesús Ifofasharapaikani. Askatari fetsafāfe shinākani: “Nō nami pitiro. Aicho, Epa Niospa mī noko nami inā nō pinō,” ixō shinākani. Nāfāferi nōko Ifo Jesús Ifofasharapaikani. Akka fetsafāferi nā nami piyamaifāfe nāfāferi nōko Ifo Jesús, “Aicho,” fatirofo. Nāskaxō nāfāfe Nios shināsharapaikani. ⁷⁻⁸ Nō niyoxōkai nōa nō apaiyai keskara fisti nō shinātiro. Epa Niospa noko amapaiyai keskara nō shinātiro. Nōfi āfenāfoki. Nāfi nōko Ifokī. A nō naitiari nōko Ifo Jesús niyoxō nō Ifofasharapai nokoki inimanō. A nō naitiari nōko Ifo nō shinātiro nōmāi āfenākōixō.

⁹ Cristo noko nāxonī. Mā maifafono otokainixakī. Iskaratīa mā nia. Nāskakē nō nayoamax nōko Ifo iki. Mā nō naaxri nōko Ifo ixii. ¹⁰ Āfesakafakī mato feta chanīmara faafo mā mekafakī chakafaimē? Āfesakafakī mā fetsaōnoa mā shināchakaimē? “Aakai afaamara,” ixō mā shināi. Shinākapo, keyokōi nō chipo Nios ikano nō akiki nokoi kaikai. Askatari noko yoixii nō afara sharafayamakē nō chakafamiskē. ¹¹ Isaias Niospa meka yoikī kirika kenenī.

Niospa yoini iskafakī: “Chanīmakōi ē nia. Chanīmakōiri keyokōi maifo tii anoafō ekeki nokoxikani. Ekeki ratokonō mai chachikaxō yoixikani: ‘Epa Niospa, mī chanīmakōi, mī Nioskōi,’ ixō ea keyokōichi yoixikani.”

¹² Akka keyokōichi Epa Niospa ferotaifi nō amis keskara nō yoixii. Nō shināmis keskarari nō yoixii.

Fetsafo afara chakafamayamakāfe

¹³ Nāskakē a mato feta Jesús chanīmara faafo mekafakī chakafayamakāfe. Iskafakī shinākāfe: “Nō afara chakafaito ōikaxō akairi chakafatirofo. Nāskakē nō afaa chakafapaima akairi afaa chakafayamanōfo.” ¹⁴ Jesús ēfe Ifokē ē mato yoisharapai. Keyokōi a nō piaifo shara nō pitiro. Nā ē chanīmara fakōini. Nāskafiano fetsafāfe shinākani iskafakakī: “Na piaifo nō pixō nō chaka shinātiro,” ixō shinākani. “Nō nami pitiro,” ixō shināfikakī mā nami pikani. Nāskaxō chaka shinākani. ¹⁵ Mato feta fētsa Jesús chanīmara faifo āfe ferotaifi a nami pitiroma piyamakāfe āfe shinā mēraxō shināchakanōma. A noikōixō mā āfe ferotaifi pitiro. Nōko Ifo Cristo aōnoaxri nani. Nāskakē a pitiroma pikī mā fetsa shināchakamatiro. Nāskakē āfe ferotaifi piyamakāfe Jesús kachikiri faax fenoyamanō. ¹⁶ “A ē akai keskara chakama,” ixō mā shināfiaino fetsafāfe askara shinākanima. Iskafakī shinākani: “Na mā akai keskara chaka,” mato faifono mā xaterisafatiro matoxō shināchakayamanōfo. ¹⁷ A nō piaito

Niospa yora noko imatiroma. Askatari a nō ayaito Niospa yora noko imatiroma. Akka Nios nōko xanifokōino afe Yōshi Sharaōnoax nō sharakōi. Nōko ōiti fekaxteima nō inimakōitiro. ¹⁸ Nōko Ifo Cristo nō nikasharaino Epa Nios nokoki inimasharatiro. Yorafāferi nokoōnoa shināsharatirofo.

¹⁹ Nāskakē Jesús chanīmara fai fetsafo fe isharakōikāfe. Jesúsnoa yoinōnākāfe a keskara shara ixikakī. ²⁰ Niospa yoini keyokōi a nō paii shara. Nāskafekē fetsafāfe, a Nios tāpisharafāfema shinākani iskafakakī: “Afara fetsa nō pixō nō chakafai,” ixō shināifono āto ferotaifi afara piyamakāfe. Akka mā āto ferotaifi piaino mato ōikakī āto shinā mēra shināchakatirofo. Nāskaxō anā Jesús Ifofasharatirofoma. ²¹ Mā nami piaito fetsafāfe mato ōikī shināchakatirofo. Nāskaxō anā Jesús Ifofatirofoma. Nāskakē anā ayayamakāfe. Afara fetsafori akī mā ato shināchakamatiro, nāskakē xatekāfe Jesús Ifofanōfo. ²² Nāskaxō mā shināi keskara mares shinākāfe. Epa Nios fisti mā yoitiro. Mā Nios chanīmara faxō mato shinā mēra shināsharakī mā iskafatiro: “Chanīma, ē akai keskara chakama,” ixō shināki mato shinā mēra mā inimatiro. ²³ Nāskaxō fētsa Niospa meka tāpisharaxoma shināitiro iskafakī: “Nafō pikī ē chakafairakaiti,” ixō shināfikī akairi pikī chakafatiro. Afara fetsafori shināki iskafakī: “Nafō akī ē chakafairakaiti,” ixō shināki akairi akī chakafatiro.

15

Nā mā apaiyai keskara fatama fētsa apaia keskara axokāfe

¹⁻² Jesús chanīmara fakōixō a Niospa meka tāpisharafoma nō ato fenāmāshta yoitiro ato fe feratenātama. Nōa nō apaiyai keskara fisti nō atiroma. Nā Jesús chanīmara faa fetsafori noikī nō ato axotiro āto shinā mēra inimamakī shara inōfo Jesús Ifo sharafakōimōfo. ³ Shinākapo. Nōko Ifo Cristo aafi apaiyai keskara fisti shināpaonima. Aōnoa Nios yoimisto kirika keneni iskafakī: “Epa, ē mia nikakōia. Akka mia chakafakakī eari chakafakani,” ixō kirika keneni Cristoōnoa yoikī. ⁴ Niospa meka kenepakeniyō noko tāpimaxikakī. Afe meka nō chanīmara faxō afara chaka finōkōixō nō tenekōinō. Afe mekaōxō nōko ōiti nō fepeaxō nō tāpitiro nōko Ifo fe nai mēra chipo nō afe ipanaka anā afara chakapa noko omiskōimanōma. ⁵ Noko afara chakapa afeskarafafaito Epa Niospa noko mitsisfamatiro nō tenenō nōko ōiti fepeaxokī. Nāskakē mā Jesús Ifofasharaino mato nānori fisti shināmatiro. ⁶ Nāskakē nōko Ifo Jesucristo afe Apa nō yoisharai. Nāskax nā meka fistipa nō mekai keskarakōi Epa Nios yoisharakī nā yora fisti keskara.

Niospa meka shara judeofoma yoini

⁷ Cristo nokoki inimakī noko ifini afe yorafo nō inō. Nāskakē māri fetsafo fe yōra faatanākāfe. Mā askaino Niosnoa shināsharatirofo. ⁸ Ē mato yoinō Jesucristo mai ano oni judeofo ato yonoxomis keskara ikiyoi. Niospa nōko xinifo yoiyoni keskara Cristo oni. Nāskakē Niospa nōko xinifo yoini keskara chanīmakōikē nō tāpitiro. ⁹ Akka judeofo-maōnoaxri Jesús oni. Nāfāferi chanīmara faxō yoixikani iskafakakī: “Aicho, Epa Niospa noko noikī afe Fake nokoki nīchini. Epa Nios shara,” ixō yoixikani. Nānori David kirika keneni iskafakī:

Epa Niosi, ē mīōnoa ato yoisharaxii, a judeofoma. Ē mia fanāki, “Aicho, Nios shara,” ē mia faxii, ixō kirika keneni. ¹⁰ Anā Niospa meka yoikī kirika keneni iskafakī: Judeofoma nā judeofo fe inima faatanākāfe. Māri ato fe Niospa yora ixii, ixō kirika keneni. ¹¹ Anā kirika keneni iskafakī:

Maitio anoafāfe, nōko Ifoōnoa yoisharakāfe. Keyokōi nā maifo tii ikafāfe nōko Ifo fanākāfe,

ixō kirika keneni. ¹² Isaías aatori iskafakī kirika keneni:

Nōko xini Isaī afe fena na maitio ikafāfe āto xanīfo ixii. Shināxikani iskafakakī: “Nā fistichi Nios ika ano noko ifitiro nō afe ĩpaxanō, nō anā nanakama,” ixō shināxikani, ixō Isaías kirika keneni Cristoōnoa yoikī.

¹³ Epa Nios chanīmara faxō nōko Ifo oxiaino nō manai. Epa Niospa noko shināmani iskafakī: “Chanīma, nōko Ifo oxii noko ifixiki nō afe ĩpaxanō,” ixō noko shināmani. Nāskakē ē mato kīfixomis Niospa mato inimamanō. Askatari mato shinā mēra mato shināmasharai mā afeskatama mā isharanō mato axosharai. Mā Nios chanīmara faano afe Yōshi Sharapa mato axosharai mā isharanō.

Pablo Jesucristoōnoa judeofoma ato yoini

¹⁴ Efe yora mīshtichi, mē tāpia mā noinā faatanāito Jesúsnoa mā tāpisharai mā yoinōnāsharatiro. ¹⁵⁻¹⁶ Niospa ea noikī ea katoni Jesucristo afe yonomati ē inō, afe meka

shara ē mato tāpimanō. Nāskakē ē ranotama anā aōnoa ē mato shināmasharai kirika kenekī. Akka Niospa ea nīchini judeofoma ē ato Jesús Ifofamanō. Mā Jesús Ifo sharafaxō, māto chaka mā soax a keskara shara mā inō. Nāskax Epa Nios matoki inimakōi.

¹⁷ Nāskakē ē inimakōi nōko Ifo Jesucristomāi ea katonikē Epa Nios ē yonoxonō judeofoma Niospa meka ē ato yoinō. ¹⁸ Ēa ē ato yoima. Cristo ea shināmanaino ē ato yoisim. Nāskakē a ē ato yoisim keskara Epa Niosnoa nikakōimisfo. ¹⁹ Āfe Yōshi Sharapa ea shināmanaino a tsōa atiroma keskara ē ato ōimana. Nā maitio Jerusalén anoafō yoita Ilirico anoafori ē ato yoini. Keyokōi nā meka shara Cristoōnoa ē ato yoifofāsafamis. ²⁰ Ēkai a yora fetsafāfe Cristoōnoa yoisimisfo ari ē kapaimisma. A Cristoōnoa nikamisfoma ano ē kapaimis ato tāpimaxiki. ²¹ Nānori Isaias Niospa meka keneni iskafaki:

Tsōa aōnoa nikayomisma chipo nikakaxō tāpinōfo,
ixō keneni.

Pablo Roma ano kapaiķi shināni

²² Akka ē mato ari kapaimis. Ē mato ōikapaiķi ē kamisma. Afara fētsa ea katimafamis. ²³ Nāskafixō iskaratīa Jesúsnoa mē ato yoikī mē mitoa. Nāskax mē itipinā mato ari kaxiki. Mē xini ichapa amis mato ōikapaiķi. Mēxotaima ē mato ari kapaimis. ²⁴ Ē España ari kai ē mato ano nēteyoxii mato fe mekaxiki nō yoinōnāsharaxiki. Mato anoax ē kaito a ē yopai ea ināxikāfe ē España ari nokosharanō. ²⁵ Akka iskaratīa ē Jerusalén ano kayoiki. Jesús chanīmara faafāfe ea nīchikani a Jerusalén anoxō Jesús chanīmara faafō ē ato kori inānō. ²⁶ Macedonia anoxō a Jesús chanīmara faafāfe Jerusalén anoafō a Jesús chanīmara faafō ato kori ināpainifo. Acaya anoxori Jesús chanīmara fakaxō ato kori ināpainifo a afaamaisfo. Nāskakē ea kori inānifo ē ato inātanō. ²⁷ Inimayanā ato ināpaiķi ato yoinifo iskafakaki: “Jerusalén anoax Jesúsnoa yoisimisfo nokoki fenifo Jesúsnoa meka shara noko yoi fekani. Akka nokoki feyamanifono na meka shara nō nikakeranama. Nāskaxō nō afarayaxō nō ato ināpai ato sharafaki,” ixō yoinifo. ²⁸ Nāskata ē ato kori ināfainikai Jerusalén anoax España ari kākī. Nāskaxori ē Roma anoā ē mato ōifainikai. ²⁹ Mē tāpia ē mato ano nokoxō nōko Ifoxō ē mato yoisharaxii mato shinā mēra mā inimanō.

³⁰ Efe yora mīshtichi, meka fetsari ē mato yoipai. Mā nōko Ifo Jesucristo noixō āfe Yōshi Sharaōxō ea noikāfe. Ea Nios kīfixokāfe ē yonosharaxonō afanā ea afeska fanōma. ³¹ Ea kīfixokāfe Epa Niospa ea kexenō Judea anoafāfe a Jesús chanīmara faafāfema ea afeska fanōfoma. Ea kīfixokāfe a Jesús chanīmara faifo Jerusalén anoafō ē ato kori inānō inimakōikai finōfo. ³² Mē ato ināķi mitoano Epa Niospa ea nīchiano ē inimayanā matoki nokoxinō. Nāskata nō yoinōnāsharaxinō nōko ōiti mēra inimayanā. ³³ Epa Nios mato fe inō. Akka Niospa noko imasharatiro nō isharanō.

16

Pablo ato meka fomani

¹⁻² Nofe yora Febe, Cencrea anoax matoki nokokē sharafakāfe. Nā kēromā nōko Ifo Ifofasharakōimis. Cencrea anoxō a Nios Ifofaafō ato sharafaxomis. Yora fetsafori ato afara yopaito axokāfe.

³ Aquila āfe āfi Prisca nā rafe efeta Jesucristo yonosharaxomisfo. Ea ato yoisharaxokāfe. ⁴ Yorafāfe ea retepaiyaiķāfe nā rafeta ea kexesharamisfo ea reteyamanōfo. Ēfe kaifomari nā Jesús chanīmara faafāfe ichanākaxō yoisimisfo iskafaki: “Aquila yafi Prisca nō atoki inimasharakōi,” ixō yoisimisfo. ⁵ Āto pexe anoaxri ichanākaxō ea ato yoisharaxokāfe. Efe yorakōiri Epeneto ea yoisharaxokāfe. Nāatofi Asia anoxō Cristo chanīmara fakī taefaniki. ⁶ Mariari mato yonosharaxomiski aari ea yoisharaxokāfe. ⁷ Efe yora raferi Andrónico yafi Junias ea ato yoisharaxokāfe. Nā rafe efe karaxa mēra iķinifo. A Jesúsnoa yoimisfāfe a rafeōnoa yoisharamisfo. Ē Jesucristo chanīmara famatai nā rafeta chanīmara fakī taefanifo.

⁸ Ampliatori ē noishara nāatomāi nōko Ifo Ifofasharakōiāito. Aari ea yoisharaxokāfe. ⁹ Urbano efeta Jesucristo yonoxomis. Nārifi ea yoisharaxokāfe. Efe yorashtari Estaquis nāri ea yoisharaxokāfe. ¹⁰ Apeles feronāfake sharakōi. Epa Nios akiki inimamis. Nāatori Jesucristo yonosharaxomis. Nāri ea yoisharaxokāfe. Aristóbulo yafi afe yorafori ea ato yoisharaxokāfe. ¹¹ Efe yorashtari Herodión ea yoisharaxokāfe. Narciso yafi afe yorafāferi nōko Ifo chanīmara faafō, afori ea ato yoisharaxokāfe. ¹² Trifena yafi Trifosari ea ato yoisharaxokāfe. Nā kēro rafeta nōko Ifo yonosharaxomisfo. Nofe yora Pérsidari ea yoisharaxokāfe. Nā kēromāri nōko Ifo yonosharaxomiski. ¹³ Nōko Ifāfe Rufori katonī afe yora inō. Nā Rufo āfe afa ēfe efakōi keskara. Ea kexesharamis. Nā raferi ea ato yoisharaxokāfe. ¹⁴ Asíncrito ikaino Flegonte ikaino Hermas ikaino Patrobas ikaino Hermes ikaino nāfāfe nōko Ifo chanīmara faafō. A fetsafāferi nōko Ifo chanīmara fakanax ato fe

ikafori ea ato yoisharaxokāfe. ¹⁵ Filólogo ikaino Julia ikaino Nereo ikaino āfe poi Olimpas ikaino keyokōi a nōko Ifo chanīmara fakanax ato fe ikafori ea ato yoisharaxokāfe.

¹⁶ Keyokōi ichanākanax yoinōnā faatanāsharakāfe noinōnāsharakikakī. Nā maitio ikafāfe a Cristo Ifoafāfe mato yoisharapaikani.

¹⁷ Efe yora mīstichi, ē mato yoinō nikakapo. Mato fe ichanāmis fetsafāfe mato afara chakafamapaikani anā mā Jesúsnoa shinānōma. Akka nō mato mēstekōi tāpimanai keskara nāfāfe mato anori yoikanima. Akka fakirira mato yoipaikani anā mā Jesús shinānōma. Nāskax ato fe rafeyamakāfe, mato pāratirofokī. ¹⁸ Afāfekai nōko Ifo Cristoōxō yoisimisfoma. Nāfāfe afara fipaiyaifo fistis shināmisfo. Niospa meka tāpisharafoma āto meka fistiōxō ato pārapaikani ato anorima shināmaxikakī. ¹⁹ Keyokōichi mā nikafo nōko Ifo mā Ifo-fasharakōikē. Nāskakē ē matoki inimakōini. Afara sharafoōnoa tāpikōikāfe. Mā afara chakaōnoa tāpiyamakāfe. Afoōnoa shināyamakāfe. ²⁰ Epa Niospa mato imasharatiro mā isharanō. Nāto Satanās mato nāmā potai anā mato afeskafanōma. Nōko Ifo Jesucristo mato sharafaxopainō.

²¹ Nā Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nāfāferi mato mekashara fomakani. Nāfo efe yorakōifo.

²² Nā Terciori mato mekashara fomai. Nāto ea kirika kenexona.

²³ Gayopa pexe mēra ē ikē ea kexemis. Jesús chanīmara faa fetsafori Gayopa pexe mēranoax ichanāmisfo. Nāfāferi mato mekashara fomakani. Na Erasto pexe rasi anoa ato kori kexexomisto mato mekashara fomai. Askatari nofe yora fetsari Cuarto nāatori mato mekashara fomai.

²⁴ Nōko Ifo Jesucristo mato noikī mato sharafanō. Askapainō.

Mā ato yoikī enekī Niosnoa ato yoisharani

²⁵⁻²⁶ Epa Niospa mato kexesharanō. Ē Jesucristoōnoa mato yoisimis keskara āfe shināmā mato shināmatiro mā Ifofasharanō. A iyopaonifāfekai tsōa Jesucristoōnoa tāpiyopaonifoma. Akka iskaratīa keyokōichi mā tāpiafo. Epa Niospa nā nīpanakato noko nīchini Jesucristoōnoa nō ato yoinō. A ixiaīnoa Epa Niospa ato yoini nānorikōi kirika kenenifo. Nā maitio ikafāfe Jesús chanīmara fayana nīkasharatirofo.

²⁷ Nōko Ifo Jesucristoxō keyokōichi Niosnoa yoisharapakenakafa. Nōko Nios fistichi keyokōi tāpikōia. Askapainō.

Nā tii ē mato yoi.

Pablo Corinto Anoafo Kirika Kenexõ Fomani

Pablo Jesús chanimara faafo Corinto anoafo kirika kenexõ ato fomani

¹ Èkã Pablo, ã mato kirika kenexõ fomai. Nofe yora feta nã Jesús Ifofamis feta, ãfe ane Sõstenes, efeta mato kirika kenexoni. Epa Niospa ea katopaikĩ ea katoni ãfe meka shara Jesucristoõnoa ã yoifofãsafanõ. ² Akka Jesucristo ea nĩchini ã ãfe meka shara keyokõ maifo tii ã ato yoifofãsafanõ. Corinto anoaface mãfi Niospa fakefoki. Nãskakẽ ã mato kirika kenexõ fomai. Mã mẽxotaima ichanãmis Niospa meka shara tãpisharakõixikĩ. Niospa mato katoni Jesucristoõnoax mã afe yora shara inõ. Mato fisti katonima, a shinãifori keyokõ ato katoni mato fe Niospa yora inõfo. Nã mai fetsa anoaface nõko Ifo ãto Ifori. ³ Mato noikĩ mato shinã mẽraxõ mato shinãmasharanõ. Epa Nios feta nõko Ifo Jesucristo mato askafanõ.

Jesucristo afara sharafo noko axotiro

⁴ Mẽ tãpia Jesucristo mato noikĩ afarafo mato tãpimani ãfe õiti keskara mã inõ. Nãskara tãpixõ ã Epa Nios kĩfikĩ iskafa fafafaĩni: “Aicho Epa Niosi, mã Corinto anoafo afara sharafo Jesucristoõxõ mã ato tãpimanaki,” ixõ ã kĩfifafaĩni. ⁵ Chanĩma, Jesucristo mato fe rafesharaino aõxõ mã Niosnoa tãpisharakõitiro. Akka ãfe shinãõxõ xafakã mã yorafo mã yoisharatiro. Jesucristoõnoa mã ato yoisharatiro. ⁶ Nõ mato Jesúsnoa yoini keskara nikakĩ mato õiti fetsafaxõ a keskara shara mã ixii. Nãskakẽ mã Jesús chanimara faxõ mã mã ato õimana. ⁷ Nãskakẽ Epa Niospa ãfe Yõshi Sharãõxõ mato imapaiyai keskara mã iki. Nios chanimara faa fetsafo nãskarifiakani Niospa mato shinãmasharaino. Nãskakẽ mã nõko Ifo Jesucristo fe ipaikõikĩ mã manasharai nã nokoaitã õixikĩ. ⁸ Oyoxoma mato kexesharayoi. ãfe kerex shara mato inãyoi mã Ifofasharano. Nãskakẽ nokoõxõ yoixii iskafaki: “Mãfi efe ipanakakĩ, ã mato chaka soaxonano. Nãskakẽ tsoa mato iskafatiroma: ‘Mã chakakõifoki,’ mato tsoa fatirofoma,” ixõ mato Jesús yoixii. ⁹ Epa Niospa mato katoni ãfe Fake nõko Ifo Jesucristo fe mã rafenõ. Epa Nios chanĩma, noko yoiyai keskara aki.

Corinto anoxõ Jesús chanimara faafãfe anoris shinãnifoma

¹⁰ Efe yora mĩstichi, ã mato yoisharapai. Nõko Ifo Jesucristo ea yoiaino ã mato yoi nãnorifõ mã shinãnõ, mã fetsa shinãnõma. Jesucristo mato shinãmpaiyai keskara fisti shinãkãfe. ¹¹ Efe yora mĩstichi, mã nika a Jesucristo mato shinãmpaiyai keskara fisti mã shinãima. Cloépa afe yorafo nono fẽkaxõ ea yoiãfo mã feratenã faatanãito. ¹² Akka mã atiri iskai fetsei: “Nõfi Pablo ifofamiski. Noko tãpimanai keskara kayakakõĩ nõ nikamis. Fetsafãfekai kayakai shinãkanima,” ixõ mã yoisim. Askatari fetsafori iskakani: “Nõfi Apolos ifofamiski,” ixõ mã yoisim. Askatari fetsafori mã iskamis: “Nõfi Pedro ifofamiski,” ixõ mã yoisim. Askatari fetsafori mã iskamis: “Nõfi Cristo Ifofai,” ixõ mã yoiketsamis.

¹³ Efe yora mĩstichi, çafeskai mã feratenãimẽ? Askarakai sharama. Cristokai anori noko shinãmanima feratenãyanã anorima nõ shinãketsanõ. Cristokai ãfe shinã ranãyama. Mẽstekõĩ fisti noko yoisim. Akka, çafeskakĩ “Nõ Pablo ifofaira” mã ato faimẽ? Èkai mato ifi cruz ikakĩnoax nãxonima. Cristo fistichi mato ifi cruz ikakĩnoax nãxonni mã Ifofanõ. Askatari ãkai tsoa faka mẽra ikimakĩ maotisafama ea ifofanõfo. ¹⁴ Nãskakẽ ã inimai. Èkai tsoa maotisafama. Akka Crispo yafi Gayo nã rafes ã maotisafa Cristo Ifofaifãfe õikĩ. ¹⁵ Nãskakẽ tsoa yoitiroma iskafaki: “Pablo ãfe aneõnoax ã maotisameni. Nãskakẽ ã Pablo ifofai,” ixõ tsoa shinãtiroma. ¹⁶ Chõõ, iskaratiari ã rama shinã. Estefanas yafi afe yorafori ã ato maotisafani. Ë shinãyoama ã tsoa fetsa maotisafamara ã ika. ¹⁷ Cristokai ea yoiama ã yorafo maotisafapanõ. Akka ea yoiã ã aõnoa meka shara ã mato yoinõ. Ëa shinãxõ ã mato yoiama. Ëa shinãxokai ã mato Jesucristo chanimara famatiroma. Jesucristo mato ifi cruz ikakĩnoax nãxonni mato chaka soaxoxikĩ. Cristo mekaõxõ Niospa mato chanimara famatiroma.

Epa Niospa keyokõĩ tãpikõia afara fetsa apaikĩ atiro. Cristoõxõ noko õimayopaoni

¹⁸ Nãskakẽ Jesús ato nãxonni nikakanax a chanimara faafãfema yoikĩ iskafakani: “Jesús ifi cruz ikakĩnoax noko nãxonni nõko chaka noko soaxoxikĩ, ixõ noko yoipaiyaiãfe nõkai chanimara fatiroma. Æa chanĩkani,” ixõ shinãmisfo. Nãskakanax nãfo fenokõikani. Omiskõipakenakafo mẽra fokani. Akka nõ Jesús chanimara faito noko nimapakenaka nõ afe ãpaxanõ. Niospa ãfe shinãõxõ Jesús noko nãxonni nõko chaka noko soaxoxikĩ. Afara fẽtsakai noko nimatiroma nõ afe ãpaxanõ. ¹⁹ Akka Niospa meka kirikaki kenekĩ iskafanifo:

Fẽtsa yoikĩ iskafatiroma: “Nõ tãpikõia. Nõko mãpo shinãsharafaĩ nõ afara fetsafo fatiro nõfi tãpisharakõiakĩ,” ixõ shinãfikakĩ afaa tãpiafoma. Askarãfofi ã ato õimanikai afãfe shinãifo keskarakai ã ato shinãmanima. Nãfãfekai afaa tãpimisfoma. Æa shinãmisfo, ixõ Niospa yoini.

²⁰ Akka, ¿fanimē a nō kirika kenekī tāpiakōiara imisfo? Akka tāpifikaxō a Niospa shināi keskara shinākanima. Nāfofi Niospa ato ōimaxii afaa tāpiafoma keskara fakī. “Nōfi afama mīshti tāpikōiaki,” ifaifāfe Niospa afaa tāpiama keskarafo ato imai. ²¹ Tsōa pishtakai āto shināmā Nios tāpitirofoma. Nios fistichi keyokōi tāpisharakōia. Nāskakē nō ato yoimis iskafakī: “Niospa tāpikōiōxō āfe Fake Jesucristo nīchini noko nāxonō nōko chaka noko soaxoxikī,” ixō nō ato yoimis. A Nios chanīmara faafāfema yoikī iskafamisfo: “Jesús chanīmara faifāfe aōnoa anorima yoimisfo,” ato famisfo. Akka nā Jesús chanīmara faifo Niospa ato chaka soaxoni afe nīpaxanōfo. Nā nō mato yoimis.

²² Akka ēfe kaifo judeofo iskamisfo: “Niospa nai mēraxō afama mīshti noko ōimanaito chipo nō Jesús chanīmara fatiro,” ixō shināmisfo. Akka nā judeofomafāferi afama mīshti tāpipaikani. Afesfaxō Niospa yorafo imasharaimākai tāpipaikani. Askatari afesfaxō Jesús yorafo āto chaka soaxonomākī nāri tāpipaikani. Afama mīshti āa shinākakī tāpipaikani. Akka tāpitirofoma. Nāskakē iskamisfo: “Noko Jesucristoōnoa yoiaifono nō tāpitiroma, fekaxkōi. Nāskakē nō Jesús chanīmara faima. Nā afara nōa nō shināi nā nō chanīmara fai,” ixō yoimisfo. ²³ Nānori shināfiafono nō yoikī iskafamis: “Jesucristo ifi cruz ikakinoax noko nāxonī noko chaka soaxoxikī,” ixō nō yoimis. Akka ēfe kaifāfe judeofāfe yoikī iskafamisfo: “Ifi cruz ikakī mastafo askarakai nōko Ifo itiroma. Akka Cristokai afesfax natiroma,” ixō judeofāfe shināmisfo. Nāskatari yora fetsafo Cristoōnoa nikakani akiki kaxepaikani iskamisfo: “Tsōakai askara chanīmara faima. Akka tsoa fētsakai noko nāxotiroma,” ixō yoimisfo. ²⁴ Askafiafono nā chanīmara faifo tii Niospa ato katoni afe ipaxanōfo. Judeofo yafi judeofomari Cristoōxō Epa Niospa ato katoni chanīmara faifāfe. Nāskakē āfe shinā sharaōxō ato nima. Atofi keyokōi tāpikōiaki Cristoōxō noko nima nō afe nīpaxanō. ²⁵ Jesús chanīmara faafāfema yoikī iskafamisfo: “Jesucristo noko nāxonī,” ixō yoifikakī anorima shināmisfo, āa chanīkakī. “Akka yora mapo sharayato Cristo chanīmara fatiro,” ixō yoimisfo a Jesús chanīmara faafāfema. Akka anorima yoifiafono Niospa āfe Fake Jesús noko nīchixonī noko nāxoyonō. Nāskax Niospa āfe shinā a chanīmara faafāfema āto shināi keskarama. Atofi mēstekōi shināmī. Akka nā chanīmara faafāfema yoimisfo iskafakakī: “Nō tāpikōia,” ixō yoifikakī yoisharamisfoma. Anorima shināmī. “Nō afama mīshti fatiro,” ifiakakī fetsafo nimasharatirofoma. Askafikata aforikai āa chaka soametirofoma. Akka Epa Nios fistichi afama mīshti fatiroxakī noko chaka soaxotiro.

²⁶ Efe yora mīshtichi, Niospa rama mato katoano afe keskara mā iyopaonimākī. Shinākapo. Mā fisti rasichi mā kirika kene tāpia mā ipaoni. Askatari mā xanīfo ipaonima. Nāskax mā finakōia mā ipaonima. Akka nā Jesús chanīmara faafāfema yoikī iskafamisfo: “Afāfekai afaa tāpiafoma,” ixō mato yoimisfo. ²⁷ Mato askafafiafono Epa Niospa mato katoni afe yora mā inō. Matoōnoa yoimisfo iskafakakī a Jesús Ifaifāfema: “Afāfekai afaa tāpiafoma. Shināsharakanima,” ixō yoimisfo. Askatari shināmī iskakakī: “Nōfi afama mīshti fatiroki. Akka a Jesús chanīmara faifo pachikōifo, kerexkai shinātirofoma. Nō atiro keskara atirofoma,” ixō shināmī. Mato askafiakakī chipo mato tāpitirofo. Niospa mato afara shara tāpimanaino ōikani rāfipaitirofo. ²⁸ Nāskakē shinānani iskakakī: “Jesús chanīmara faifo afāfekai afaa tāpiafoma. Nāskakē nō ato ōipaima,” ixō matoōnoa mato yoifiafono Niospa mato katoni afe yora mā inō. “Mākai afaama,” mato fafiafono Niospa mato katoni mā ato ōimanō akka afāfekairoko afaa tāpiafoma. ²⁹ Akka tsōa pishtakai Niospa ferotaifi yoitiroma iskafakī: “Ē tsoa keskarama. Ē shara shināi fetsafo keskarama,” ixō yoitiroma. ³⁰ Niosnoax Jesucristo afe yorafo mā inō. Jesucristoōxō noko mēstekōi tāpimani āfe ōiti keskara noko imaxii. Noko nāxonī noko chaka soaxoxikī nō afe nīpaxanō. ³¹ Nāskakē nō Jesús chanīmara faaxkai nō kakapaimis itiroma. Niospa meka yoikī yōra kirika keneni iskafakī: “Akka tsoakai āa yoimesharatiroma iskai: ‘Ē afama mīshti tāpikōia,’ ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra keneni.

2

Jesucristo ifi cruz ikakī mastanifo Pablo ato yoini Corinto anoafō

¹ Efe yora mīshtichi, ē matoki nokofenaxō yōra shināōxō ē mato Niospa meka yoyameama. Niospa āfe shinā fistiōxō ē mato yoiyamea. Ēa shināxō ē mato yoyameama. Niospa ea shināmanaino ē mato yoiyamea. ² Ē matoki oyoxoma ē shinākī iskafani: “Jesucristo ifi cruz ikakinoax noko nāxonī, nā fisti ē ato yoixikai. Afaa fetsa ē ato yoitromaki,” ixō ē shināyamea. ³ Askata mē nokoax ē matoki ratekōiyamea. Nāskakī rateyanā ē shināyamea iskafakī: “Ē mitsisipama ea ōikakī ea nikakaspatirofo,” ixō ē shināyamea. ⁴ Nāskakē ē mato Jesucristoōnoa yoimis ēfe shināmā shināxō ē mato yoitamaroko Niospa Yōshi Sharapa ea shināmanaino ē mato yoiyamea. Ē mato yoiaino aōxō mā Jesús chanīmara fayamea. ⁵ Akka yōra shināōxō mā Jesús chanīmara fayameama. Niospa shināōxō mā chanīmara fayamea.

Niospa Yōshi Sharapa noko shināmasharatiro

⁶ Nāskakē a Niospa meka nikasharaifāfe mā tāpiafo nō Niospa Yōshi Sharaōxō xafakāikōi nō ato yoiaito. Nāskaifono fetsafāferi kirika kene tāpisharakōifikaxō Niospa shināi keskara tsōa anori shināima. Āto shināōxōkai Niospa meka nō mato yoima. Āto xanīfofōfāfe shināifo keskararikai nō mato yoima. Akka āto xanīfofo mā chaimashta tsekekani. Anā afo xanīfo ikanima. Nā xanīfofōfāfe shināifo keskara mā keyoi. A shara shināifo keskara shinākanaxma. ⁷ A nō mato iskaratari Niosxō yoia tsōa tāpiyopaonima. Niospa mai onifayoxoma shināki iskafani: “Ēfe Fāke ato chipo nāxoxii nā chanīmara faafo tii ato nimapakesixakī,” ixō shināni. ⁸ Ē na meka mato yoiāi keskarakai xanīfofōfāfe tāpiyopaonifoma. Nāskaxō Jesús retenifo. Akka tāpikaxokai tsōa nōko Ifo Cristo ifi cruz ikaki mastakeranifoma. Nā nōko Ifo Cristo sharafinākōia. ⁹ Akka yōra kirika kenekī iskafani:

Afama mīshti shara Niospa ato axoxii. Tsōa ōiyomisma sharafo ato axoxii. A tsōa nikayomisma ato axōfāi a tsoa pishta āto shinā mēraxō shināyomisfoma nāfo ato axosharaxii. A ato noiaifo ato itipinīshara faxoxii, nāskara yoiikī Niospa meka yōra kirikaki keneni. ¹⁰ Nā kirika kenekī yoinifo keskarakōi Epa Niospa āfe Yōshi Sharapa noko ōimani. Āfe Yōshi Sharapa keyokōi tāpikōia. Epa Niospa shināi keskarari āfe Yōshi Sharapari tāpikōia.

¹¹ Yōra āfe shinā mēraxō āa shināitokai tsōa tāpitiroma. Akka ares fisti tāpitiro. Nāskarīfai Epa Niospa shināi keskara āfe Yōshi Shara fistichi tāpikōia. ¹² Epa Niospa āfe Yōshi Shara nokoki nīchini noko tāpimapaiyai keskara noko tāpimanō. Akka nā chanīmara faafāfema Niospa meka nikakanima. Nāfāfe shināi keskarakai Niospa noko shināmanima.

¹³ Nāskakē yorafāfe noko tāpimanifo keskara nō mato yoitamaroko Niospa Yōshi Sharapa nōko shinā mēraxō noko shināmana keskara nō mato yoisimis. Āfe meka chanīmakōi fisti. Nāskakē nōri aōxō nō mato chanīmakōi Niospa mekakōi tāpimani. Nā meka shara mā nikamis māmāi Niospa Yōshi Shara mato fe rafeano.

¹⁴ Akka fetsafo Niospa Yōshi Shara fe rafeyamano nāfāfe Niospa Yōshi Sharapa yoiāi keskara nikakaspakani. Nāskaxō iskafatirofo: “Tsōakai nā meka chanīmara faima. Akka nā shara shināifāfe chanīmara fakanima,” ixō shināni. Akka Niospa Yōshi Sharapa shināi keskara tsōa tāpiama. Nāskakē Niospa Yōshi Shara ato fe rafeyamano a yoiāi keskara tāpiafoma. Akka Niospa Yōshi Shara fistichi ato tāpimatiro chanīmara faifono. ¹⁵ Akka fatora fetsa Niospa Yōshi Shara afe ikano Niospa tāpimapaiyai keskara tāpitiro. Fatoforimākī chaka shināifo, askatari fatoforimākī shara shināifo Niospa Yōshi Sharapa ato tāpimatiro. Nāskakē a Niospa Yōshi Shara fe rafeyamato a Jesús chanīmara faifo ato tāpitirofoma. ¹⁶ Akka Isaiās kirika keneni iskafakī:

Tsōakai nōko Ifāfe āfe shinā mēraxō shināi keskara tāpitiroma. Tsōakai nōko Ifo tāpimatiroma, ixō kirika keneni. Askafiaifono nā nō Cristo chanīmara faifāfe a shināi keskara nō tāpitiro nō afe rafexō.

3

Corinto anoafo Niospa Yōshi Shara fe rafeafoma

¹ A fake rama kāiatokai afaa tāpitiroma. Mā yosixō tāpitiro afara fetsa. Nāskarīfai a rama Jesús Ifofaifāfe Niospa meka tāpisharafoma a fake yome rama kāia keskarafoma. Nāskarafo mā Jesús māto Ifo fiano ranārito āfe meka mā tāpisharama. Mā rama Jesús Ifofayamaifai oa rama Jesús Ifofaifo keskarafoma, mā. Niospa meka mā mā nikafikatsaxakī a yoiāi keskara mā nikasharama. Ooa efe yora mīshtichi, māfi Niospa meka nikamisma keskarafokī, rama Jesús Ifofaifo keskara. Māfi nā Niospa Yōshi Shara fe rafeama keskarafoma. Nāskakē ē mato Niospa meka tāpimasharatiroma mākaikoro itipinīsharakē nikasharaxikima. ² Fake yome rama kāiatoko chocho fisti atiro, afaakai pitiroma. Nāskarīfiakī Niospa meka mā nikapaifiki āfe meka mā nikasharatiroma. Nāskakē āfe meka ichapa ē mato yoiyotiroma. Āfe meka fetsafori ē mato yoipaiifaino mā nikasharaima. Nāskax māka itipinīsharapaima Niospa meka nikasharaxikima. ³ Māfi nā Niospa Yōshi Shara fe rafeama keskarafokī. Nāskaxō fetsafo mā ato xītpai mā ato keskara ipalkī. Nāskax mā fochishpanā faatanāpai mā ika. Nāskaxō yōra shināi keskara mā shināi. Akka Niospa Yōshi Sharapa mato shināmapaiyai keskara mā shināima. ⁴ Mā fatora fetsafāfe yoiikī iskafai: “Nōfi Pablo ifofakī. Pablo fistichi noko tāpimasharatiro,” ixō mā yoisimis. Akka fetsafāferi mā yoiikī iskafai: “Nōfi Apolos ifofakī. Apolos noko shara yoiitiro,” ixō mā yoisimis. Nāskax mā fochishpanā faatanāpai. Nāskaxō yōra shināi keskara mā shināi. Askarafokai Niospa Yōshi Sharapa mato shināmanima.

⁵ Akka askayamakāfe. Nō afaama. Akka Apolos fetakai nō afaa tāpiama. Nōkai Nios keskarama. Akka nōfi āfe inakī. Nāskaxō nō mato Jesús chanīmara famani. Nōko Ifo Niospa noko katonī noko yonomapaiyai keskara nō yonoxonō. ⁶ Ē mato iskafakī yoiyai.

Yora fĕtsa taefakĭ xiki fanatiro. Fetsafĕfe a nĕmĕ orometirofo foaisharanĕ. Nĕskafixokai nĕ rafeta xiki foaimatirofoma. Nios fistichi xiki foaimasharatiro. Nĕskarifiakĭ ĕ mato taefakĭ Jesucristo chanĭmara famani. Chipo Apolos Cristoĕnoa mato yoini ĕfe meka mĕ nikasharakĕinĕ. Nĕ mato yoiaino Nios fistichi mĕto shinĕ mĕraxĕ mato shinĕmasharatiro ĕfe meka mĕ tĕpisharakĕinĕ. ⁷Nĕ ĕ mato yoiaino mĕ nikai keskara Apolos feta nĕ afaa tĕpiama. Akka Nios fistichi yorafĕ shinĕmasharatiro ĕfe meka tĕpisharakĕinĕ. ⁸Akka taefakĭ fetsafĕto Jesĕs chanĭmara famano, a chipo ato yoiaitori nĕnorikĕiri ato yoi. Nĕ rafetamĕi nĕnorikĕi shinĕkakĭ Niospamĕi ato shinĕmanaino. Nĕskakĕ ato Jesĕsnoa yoixikani a Ifofasharanĕ. Nĕskatari Niospa a yonoxonafĕo ato afara inĕxii. Fetsa ichapa inĕta fetsafĕri ichapama inĕxii yonoxosharafomano. ⁹Efe yora mĕshtichi, ĕ meka fetsa mato yoipai. Tarepa ifo fistifiano fetsafĕferi yonoxotirofo. Askatari pexe ifo fistifiano fetsafĕferi yonoxotirofo. Nĕskarifiakĭ mĕfi Niospa ĕfe tare keskarafo. Askatari mĕ ĕfe pexe keskara. Nios fisti mĕto ifo. Akka nĕri Apolos feta yonoxomiski. Noko yoiaino keskara nĕ mato tĕpimasharanĕ ĕfe meka mĕ nikasharakĕinĕ.

¹⁰ ĕ mato yoinĕ afeska faxĕ pexe fatirofomĕki. Taefakĭ ĕfe kishi kerexkĕi fixaxĕ nĕchitirofo. Mĕ kishi nĕchikaxĕ aĕxĕ yonotirofo. Nĕskarifiakĭ mĕfi pexe keskarakĭ. Akka nĕ mato Niospa meka tĕpimani nĕ pexe faifo keskara. Cristofi pexe kishi keskarakĭ. Nĕ ĕfe kishiĕnoax pexe nitiro. Nĕskarifiakĭ Cristo mato nimai. Ea Niospa tĕpimashara keskari taefakĭ ĕ mato yoiaino mĕ Cristo Ifofani. Askatari fetsafĕferi nĕnorikĕi mato yoikani mĕ Cristo Ifofasharanĕ. Nĕskata nĕ fetsafĕo ĕ ato yois iskakakĭ: "Shinĕsharata ato mĕstekĕi yoisharakĕfe," ixĕ ĕ ato yois. ¹¹ ĕ mato taefakĭ Cristoĕnoa yoini mĕ Ifofanĕ. Akka tsĕakai mato yoikĭ iskatirofoma: "ĕ mato meka fetsa tĕpimanĕ mĕ chanĭmara faax Nios fe ĭpaxanĕ," ixĕ tsĕa mato anori yoitirofoma. Jesucristo fistichi noko nimasharatiro nĕ Nios fe ĭpaxanĕ. ¹² Afara fetsa anĕ ĕ mato yoinĕ, ea nikakapo. Fĕtsa pexe fakĭ kishi kerexkĕi nĕchitiro. Akka fĕtsari akiki rofetaxĕ kerexkĕi kenetirofo. Fĕtsari akiki oro kenetiro. Fĕtsari akiki tokiri sharakĕi kenetirofo. Askatari fĕtsari akiki ifi kerexma kenetirofo. Fĕtsari xepa pei akiki kenetirofo. Fĕtsari tafafakĭ akiki kenetiro. Nĕskakĕ nĕ pexe kooaino pexe ano ikafo ichotirofo kooyamaxikakĭ. Akka pexe kishi kerexkĕi akiki keneafĕo oro akiki keneta, roe taxo akiki keneta, tokiri sharari akiki keneafono kootirofoma. Akka nĕ ifi kerexma kootiro. Xepa peifori kootiro. Tafari kootiro. ¹³ Nĕskarifiakĭ Nios nĕ pĕxe ifo keskara. Niospa meka yoisifĕ nĕ pexe ifo pexe faxĕaifo keskarafo. Fetsafĕfe shara faxomis, fetsafĕferi shara faxomisma. Nĕskaxĕ anĕ oaitĕa Cristo noko ōimaxii nĕ nĕ axomis keskara fatofĕo keyonakamakĭ. Akka fatofĕo nĕpanakafomĕki. Noko ōimaxii afeskaĕ nĕ Nios yonoxonamĕki. Fĕtsa Jesĕs Ifofasharaxoma ĕa shinĕxĕ Niospa meka ato yoisharaima, tĕpisharaxoma ato yoisharatiroma. A yoiaino keskara sharama, ifi kerexma keskara, samama keyotiro. Akka fĕtsa Niospa mekakĕi ato yoi. Niospa shinĕmanaino ato tĕpimani. Nĕ tokiri kerexkĕi keskara keyotirofoma. ¹⁴ Nĕskatari fatofĕo Nios yonosharaxonamano Niospa afara shara inĕsharaxii nĕ Jesĕs oaitĕa. ¹⁵ Akka fatofĕo Nios yonosharaxonamano Niospa afara shara inĕaima. Nĕskafix Nios fe ĭpanaka. Āa kaxpa yonokatsaxakĭ akka ĕfe yono keyoxii.

¹⁶ Akka, ĕmĕ tĕpimamĕ mĕ Niospa pexe keskarakĕi? Āfe Yĕshi Shara mato mĕra ika. ¹⁷ A Nios ika anokai afaa chakama. Nĕskakĕ ĕfe Yĕshi Shara mato mĕra ikano ōisharakĕfe chaka shinĕi iyamakĕfe. Mĕ afe nĕpaxanĕ Niospa mato katonĭ afe yora mĕ inĕ. Nĕ Ifofaafĕo tĕi ato shara imai. Akka fatofĕo ato anorima yoikĭ ato afara chakafamaino Niospa kopikiri omiskĕimaxii.

Cristo noko tĕpimasharatiro

¹⁸ Efe yora mĕshtichi, iskakakĭ shinĕyamakĕfe: "Nĕ Jesĕs chanĭmara famafĕfe kirika raiskakĭ afama mĕshti tĕpisharakĕaifo. Nĕri ato keskaraĕo anori shinĕkĭ tĕpikĕia," ixĕ anori shinĕi mĕ pĕrameyamakĕfe. Jesĕs chanĭmara famafĕfe shinĕkakĭ iskakakani: "Nĕ Jesĕs chanĭmara faafĕfe shinĕsharakanima," ixĕ nokoĕnoa yoisifĕo. Matoĕnoa anori yoifiaifono Niospa mato mĕstekĕi shinĕmasharapai mĕ shinĕtiro. ¹⁹ Nĕ Jesĕs chanĭmara famafĕfe shinĕkani iskakakakĭ: "Nĕfi mĕstekĕi shinĕsharakĭ," ifiaifĕfe Niospa ato ōia mĕstekĕi shinĕsharakanima. Tatima keskarafo ato ōi. Nĕnori yĕra Niospa meka yoikĭ kirika keneni iskakakĭ: "Nĕ Jesĕs chanĭmara famafĕfe ĕa shinĕkani iskakakĭ: 'Nĕfi tĕpikĭ finakĕiaki,' ixĕ shinĕkakĭ Nios pĕratirofoma. Āakĕi anori pĕramekani. Nĕskakanax fenoafĕo," ixĕ Niospa meka yĕra kirikakĭ keneni. ²⁰ Anĕ David kirika keneni iskakakĭ: " 'Nĕfi tĕpisharakĕiaki,' ifiaifĕfe nĕko Ifo Niospa ato tĕpikĕixĕ yoikĭ iskatirofo: 'Nafĕfekai mĕstekĕi shinĕsharafoma, tatima keskarafo,' " ixĕ David kirika keneni.

²¹ Nĕskakĕ anĕ yoi iskayamakĕfe: "Na feronĕfĕke a noko tĕpimamisto ĕfe meka fisti mĕstekĕi, sharakĕi," ixĕ anori anĕ shinĕyamakĕfe. Niospa ato shinĕmayamainokai tsĕa mĕstekĕi shinĕkeranama. Nios fistioxĕ nĕ mato mĕstekĕi yoitiro mĕ tĕpisharakĕinĕ. Keyokĕi Niosnĕ, nĕ Niosnĕri mĕtonĕ. Nĕskakĕ aĕxĕ mato shara faxĕi. ²² ĕ ikaino, Apolos ikaino,

Pedro ikaino nō Nios yonoxomis. Āfe meka nō mato yoimis mā nikasharanō. Askatari naax mā afe ipaxanō. Keyokōi Niosnā, askatari nā Niosnāri mātonā. Iskaratīa afara sharafo ikai aōxō Niospa mato shara faxōi. Nā chipo ixiaifori aōxori Niospa mato shara faxoxii. Keyokōi a Niospa onifanifo mātonāri. Nāskakē māri āto ifo ixii. ²³ Akka Cristofi mato Ifokī. Cristori āfe Ifori Nios.

4

Cristo yonoxomisfāfe afesaxō yonoxotirofomāki

¹ Akka mā nokoōnoa shināki iskafatiro: “Nafāfēfi Cristo yonoxomisfokī,” ixō nokoōnoa yoikāfe. Cristoōnoa meka shara tsōa nikayomisma Epa Niospa nōko shinā mēraxō noko shināmanaino nō atori tāpimani. ² Akka āfe inafāfe āfe ifo nikakōitirofo. Āto ifāfe ato yoia keskara axosharatirofo. Akka nōfi Cristo āfe inafoki. Niospa noko yoini iskafakī: “Ē mato yoia keskara ato yoikāfe ato fomākakīma. Ato yoikāfe xanikakīma,” ixō noko yoimis. ³ Nios fistichi tāpikōiakī nā ea yoia keskara ē aki. Akka yorafāfe ea mekafakī chakafakani. Akka fetsafāferi ea yoisharakani. Nāskanōki āa ea mekafanōfo. Ē āto yonomatimaki. Akka ē Niospa yonomatiki. Akka Nios fistichi tāpia ē yonoxosharakōiaito. Yorafāfekai tāpiafoma. Ērikai tāpia. ⁴ Ēfe shinā mēraxō ē shināi iskafakī: “Ea Niospa yoiāi keskara ē akī,” ixō ē anori shināfiaino nōko Ifo fistichi ea tāpikōia a ea yoia keskara ē ayamakī ē akima. ⁵ Cristo anā oyoamano iskafakī yoiyamakāfe: “Nāfāfekai Nios yonosharaxokanima,” ixō anori yoiyamakāfe. Akka yora fētsa shināi keskara tsōa tāpia. Shinākapo. Nōko Ifo anā oaitīa keyokōichi noko ōiaifono nōko shinā mēraxō nō shināmis keskara nōko Ifāfe ato ōimaxii. Anākai nō afaa pishta nō fomāxiima, Niospamāi keyokōi tāpikōikē. Nā nō afara shara nō one axomis tsōa ōiyamaino, askatari nā nō afara chakafamis nāfo keyokōi Niospa noko kāimaxoxii. Askatari nō afara shara faino Niospa noko yoikī iskafaxii: “Aicho. Ē mato yoia keskara mā amis. Mā sharakōi,” ixō noko yoixii.

⁶ Efe yora mīstichi, nānori ē mato yoi mā isharanō. Yōra kirika keneni keskara a Niospa yoiāi nā fisti ē aki. Nā Apolosri Epa Niospa yoia keskara fisti aki. Nō askafaito mā noko ōixō nō akai keskara māri akāfe. Nāskakē iskayamakāfe: “Nā noko yoimisto āfe meka sharafinakōia, fetsafo keskarama. Akka nō fetsafo nikapaima,” ixō anori shināyamakāfe. ⁷ Akka Niospa keyokōi noko onifani. Nō Nios fistiōxō afara fetsa nō ato sharafaxonō. Nāskaxō, “Nā ē akai keskarakai tsōa atiroma,” ixō shināyamakāfe. Nāskax kakapaimis iyamakāfe.

⁸ Mā shināki iskafamis: “Nō Niospa meka tāpikōia. Nō fetsafo finōkōia. Nāskaxō nō anā tsoa fichipaima noko tāpimanō. Nōfi Cristo fe xanīfo keskaraki. Nō yorafāfe āto ifo keskarakī,” ixō mā shināi. Nāskapainōra mā xanīfokōifo iki. Mā xanīfokōifo ikaino nōri mato fe xanīfo ikerana. Akka nō xanīfoma. Noko tsōa ifofaima. ⁹ Ē afara fetsa mato yoipai, nikakapo. Karaxa mēra ikiafo ato retematirofo. Yora ichapafāfe ōiaifono ato retematirofo. Nāskarifiakī nōri ato keskara. Noko Jesús nīchini nō aōnoa meka shara nō ato yoinō. Nō Jesúsnoa yoiāx nō Jesúsnoax omiskōiaino keyokōi yorafāfe noko ōikani. Niospa āfe ājirifāferi noko ōikani. Nō yora mītsisipama noko ōikani, nōkairoko xanīfofo keskarakē. Nō āto nāmā rakakōia noko ōikani.

¹⁰ Nāskakē ē Jesucristo Ifofamis. Akka mā ea yoimis: “Pablo afaa tāpiamara,” mā ea famis. Askatari, “Nō Jesús Ifofakī nō tāpisharakōia,” mā imis. Askafixō mā tāpisharakōia. Nāskaxori mā ea yoimis, “Na Pablo afaa afeska fatiroma. Akka nō afarafo nō atiro,” mā imis. Askafixō mā askafatiroma. Mā shināki sharakōi mā meei. Akka ea mā ōia ē afaamakōi mā ea ōimis. ¹¹ Akka iskaratīari nōfi fonāiyānā nōamaikāyānā rapati shara safeyamata nō imis. Askatari noko koshamisfo. Akka pexemais ixō Niospa meka fisti nō ato yoifofāsafamis. Nāskax nō omiskōi. ¹² Nāskaxō nō kerexkai yonotiro a nō piai fixiki. Nāskatari yorafāfe noko mekafakī chakafaifono ato kopitamaro nō tenemis. “Jesús mato shara foxopainō,” ixō nō yoimis. Noko omiskōimafiaifono nō tenemis. ¹³ Askatari noko ichaifāfe ato kopitamaro Niospa meka shara nō ato yoimis. Nāskakē iskaratīa noko chakafakani, “Māfi nā afamafo keskarakī, nā afara chaka potafo keskara,” ixō nokoōnoa yoimisfo.

¹⁴ Nāskakē ē mato nānori yoikī kirika kenexō ē mato rāfimapaima. Askatamaroko ē mato shināmasharapai. Akka māfi ēfe fakekōifo keskarafoki. Ē mato noikōi. Nāskakē ē mato yoisharapai anā mā anorima shināyamanō. ¹⁵ Yora ichapato mato Cristoōnoa tāpimakani. Akka ē tafakī mato Cristoōnoa tāpimayoni. Nāskakē mā Cristo chanīmara fani. Eōnoax mā Niospa fakekōifo. Nāskatari ē mato epa keskarakōi. Fetsafāfe Cristoōnoa mato tāpimafiaifono afokai mato epa keskarama. Akka ē fisti mato epa keskarakōi. ¹⁶ Nāskakē nā ē ikai keskakāfe. Ē Nios Ifofasharai keskafakī māri askafakāfe. ¹⁷ Nāskakē ē Timoteo matoki nīchikai. Ē Timoteo Cristo chanīmara famaki taefani. Nāskax ēfe fake keskarakī. Ē aō noikōi. Nōko Ifo Jesús yoiāi keskarakōi nikakōi. Ē Jesucristo Ifofai keskara Timoteo mato shināmaxii

mā shināmakinōma. Nā chanīmara faafo pexe rasi tii anoafo ē ato tāpimani keskara Timoteori mato tāpimaxii.

¹⁸ Mē tāpia mā ranārīto shinākī iskafai: “Pablo Timoteo nokoki nīchi nokoki mesekī. Āakai nokoki opaima. Akka nō keyokōi tāpikōia. Nō Pablo yopaima,” ixō mā shināi. Askai mā kakapaimis. ¹⁹ Anori mā shināfiaino ē samamakōi ē mato ari kaikai. Niospa ea yoiaino ē samamakōi mato ari kai. Mē mato ano nokoōxō ē tāpixii nā kakapaimisfāfe Niospa Yōshi Sharaōxō yoikanimākai, āakōi yoimisfomākī. ²⁰ Nios nōko Ifono nō meka fisti yoitamarako āfe shinā sharaōnoax nō isharatiro. ²¹ Nāskakē nā ē matoki nokoaitīa āfe shinā sharaōnoax ē matoki nokoxii. Mē nokoxō ē tāpixii afeskax mā ikamākī. Mā chaka xateyamakē Niosxō ē mato tāpimaxii omiskōimākī. Akka māto chaka mā xatekē ē mato noikōikī fenāmāshta ē mato yoisharaxi. Nāskakē ē matoki nokoxō ē mato omiskōimayamano fenāmāshta oi tsii faxō ē mato yoixii ea yoikāfe fato mā fichipaimākai.

5

Jesús chanīmara fafiakaxō afara chakafakani (Hch. 9.1-19; 22.6-16)

¹ Mē nika mato mēraxō feronāfāke fistichi afara chakafaito. Akka, ¿afeskakī mā yoimamē anā afaa chakafayamanō? Nā feronāfāke āpa āfi fe oxakī chakafai. Askara chakakōi. Nā Nios chanīmara faafoma tsoa askamisma. ² Ooa. Nā feronāfāke mato mēraxō afara chakafai aōnoa rāfipaikanima, “Nō sharakōifora,” ixō mā yoimis kakapaiyanā. Akka, ¿afeskakī nā feronāfākeōnoa mā shināchakaimamē? Akka nāskaxō āfe chaka xateyamax anā mato fe ichanāito potakāfe anā mato fe ichanāyamanō. ³⁻⁵ Ē mato fe iyamafiāxō ē mato shinākōi. Ē ano mato fe iyamafiāxō nā feronāfāke afeskaimākai mē tāpikōia. Ē mato anoxō yoikī iskafakerana: “Mā Jesucristo shināyanā ichanāino Niospa āfe Yōshi Sharaōxō nā feronāfāke āpa āfi fe imiskē mato makinoa potakāfe Satanás ifofaafo mēra inō. Nāskakē Satanás nā feronāfāke omiskōimanō. Nāskaxō Satanás nā apaiyai keskara faxii nā feronāfāke. Nāskafaino omiskōixii. Satanás omiskōimanaino āfe chaka xatepaixii Jesús anā Ifofapaikī anā omiskōiyamaxiki. Mā āfe chaka xateano nōko Ifo Jesucristo anā oaitīa nā feronāfāke ifixii afe ipaxanō anā omiskōinōma,” ixō ē mato yoikerana ē mato fe ixō.

⁶ Ooa, mā iskamis: “Nō sharakōi,” ixō mā shināfikī mākai nā feronāfāke mato mērao mā potapaima afara chakafafaito. ¿Mā tāpiamamē, yora fistichi mato mēra ixō afara chakafaito mā xatemayamax aōnoax keyokōi mā chaka itiro? ⁷ Ē mato afara fetsa yoipai. Nikakapo. Kēromā pāa fakī fāvadura aya osiano keyokōi faraxitiro. Pishta aya osiano keyokōi faraxitiro. Nāskarifiakī fētsa mato mēraxō afara chakafaito mā xatemayamax aōnoax keyokōi mā chaka itiro. Nāskakē nā yora fistichi afara chakafaito potakāfe mato mēraxō anā afara chakafayamanō, nō fena keskara ixikakī. Akka Niospa Fake, Jesucristo, noko nāxonī nōko chaka noko soaxoxiki. Nāskakē mā afaa chakafamisma keskara. ⁸ Nāskaxō a nō chakafapaoni anā nō shināpaima. Fetsafo fekaxtefayamata ato pārāyamata meka chanīmākōi fisti nō ato yoitiro.

⁹ Ē mato kirika kenexoyoni iskafakī: “Feronāfākefo āto āfima fe imisfo. Askatari kērofori āto fenema fe imisfo. Askarafo yorafo fe rafeyamakāfe.” ¹⁰ Akka a Jesús Ifofafoōnoama ē mato kenexoyonima. Nā Jesús Ifofafoōnoa ē mato kenexoni. Akka faki pishtakai iyamafoma a Jesús Ifofaifoma. Nāskakē nō ato fe imis. Fakira kaxō nō ōimis nāriri ikafo a Jesús Ifofaafoma. Nō ato fe ifiaxō afāfe akaifo keskarakai nō amisma. Afāfe āto ifo Satanás. Nāskaxō āto chaka xateafoma. Chaka fetsa fetsatapafo amisfo. Nāskaxō āto āfimafo chotamisfo. Kērofori nāskarifiāmisfo āto fenema fe chotanākani. Afama mīshti fipaikata āfenāfoma fipaimisfo. Nāskatari yometsokōifo imisfo. Nāskakata nioskōiyamafekē, “Na nōko niosra,” ikaxō afara kifimisfo. Nāskafaifono nō ato feta afaa chakafamisma. Nāskafikē nō ato fe imis. Nō ato makinoax faki pakxatiro. ¹¹ Akka mā efeta Nios Ifofaino ē mato kirika kenexoyoni. Nāskakē fatotora yoikī iskafatiro: “Ēri mato feta Jesucristo Ifofai,” ixō yoifixō āfe āfima chotamis. Kērofori askari amisfo āfe fenema fe chotanāmisfo. Askatari afama mīshti fichipaimisfo. Atonāma fipaimisfo. Nioskōiyamafekē afara kifimisfo. Yora fetsafo chakafamisfo. Pāemisfo. Yometsomisfo. Askarafo fe rafeyamakāfe. “Nō Jesús Ifofaira,” ifiakaxō afara chakafamisfokī. Askarafo fe rafeyamakāfe.

¹²⁻¹³ Nā Jesús Ifofaifāfema afara chakafaifāfe nō ato yoitiro ma omiskōinōfo. Akka Nios fistichi ato yoitiro iskafakī: “Mā afara chakafamis. Nāskaxō māto chaka mā xateyamaito ē mato omiskōimaxii,” ixō Niospa ato yoitiro. Akka nō ato yoitiro ma. Nāskakē Niospa noko yoia nā Nios Ifofaa fetsafāfe afara chakafaifono nō ato yoitiro āto chaka xatenōfo omiskōixikakima. Akka Niospa meka yōra kirikakī kenenī iskafakī: “Nā feronāfāke mato mēraxō afara chakafamis yoikāfe anā mato fe ichanāyamanō āfe chaka xateyamax,” ixō kirika kenenī.

6

A Nios Ifofamisfo rafeta fētsa chakafaino fētsa chakafayamafaito, askara achixō a xanīfo Nios Ifofaama ano iyotirooma ato yoinō

¹ A mato feta Nios Ifofaafa ato yōayamakāfe xanīfofo yoiķi a xanīfofofāfe Nios Ifofaafomaki. Askatamaroko nā Nios Ifofaafa ano ato iyokāfe ato yōkanōfo mato chakafafomakī. ² Akka, ŷmā tāpiamamē mā Nios Ifofaxō mā nōko Ifo nokoaino mā xanīfo keskara mā ixii? Nāskaxō mā ato yoixii fatofomākī shara imisfo. Askatari mā yoixii fatofomākī chaka imisfo Niospa ato omiskōimanō. Nāskakē iskaratīari fētsa pishta chakafaano mā ranā yoinōnāsharakāfe xanīfofoki chanikakīma. ³ Askatari mā Nios feta yoixii āfe ājirifo fatofāfe sharafafomākī, askatari fatofāferi chakafafomākī Niospa ato omiskōimanō, a chakafamisfo. Nāskakē iskaratīa mā mā ato ōi fatofomākī chakafo fatoforimākī sharafo. Nāskakē mā ranā mā yoinōnāsharakāfe xanīfofoki chanikakīma a xanīfofāfe Nios Ifofaafomaki. ⁴ A mato feta shara shināifo mā ato ifitiro mato yoisharanōfo, mā fochishpanā faatanāino. Akka a Jesús Ifofaafoma mā ato ifitiro. ⁵ Afaa tāpiafoma mā ato ifax mā rāfitiro. Akka, ŷa shara shināifo mato fe ikafomamamē? Ēje, nāno ikafo a shara shināifo. Nāskakē ato ifikāfe mato yoisharanōfo mā fochishpanā faatanāino. ⁶ Akka mā fochishpanā faatanāx, mā raenā faatanāsharamisma. Askakīmaroko mā ato yōaxō nā Nios Ifofaafoma ano mā ato iyomis xanīfofofāfe ato yōkanōfo.

⁷ Mā ranā mā fochishpanā faatanāx nā Nios Ifofaafomaki mā atoki chanimis. Akka askarakai sharama. Nāskakē Jesús Ifofaa fētsa mato chakafaito kopitamaroko a Jesús Ifofaafomaki mā chanihiro. Nāskax mā shara itiro. Askatari a Jesús Ifofaa fētsa matoki yometsoano nā Jesús Ifofaafomaki mā chanihiro āa matoki yometsonōfo. Nāskax mā shara itiro. ⁸ Akka mā ranā mā yometso faatanāmis chaka faatanāyanā. Askatari mato fe yorafori mā ato chakafamis.

⁹ ŷMā tāpiamamē a yora afara chakafamis Nios xanīfo ano katiroma? Nāskakē māri mā pārameyamakāfe. Mā afara chakafaax Nios xanīfo ano mā katiromaki. Akka nā āto āfima chotamisfo Nios xanīfo ano fotirofoma. Askatari kērofori āto fenema chotamamisfo Nios xanīfo ano fotirofoma. Nāskatari nioskōiyamafekē afara fetsa fichipaikī, “Na nōko niosra,” ixō fichipaimisfo. Afokai Nios xanīfo ano fotirofoma. Askatari feronāfakēfo aa ranā chotanāpaimisfo. Kērofori nāskari amisfo aa ranā chotanāpaikani. Afokai Nios xanīfo ano fotirofoma. ¹⁰ Askatari yometsomisfo, atonāma fipaimisfo, pāemisfo, Ichamitsamisfo, nikayospamisfo, afara fētsa fiatiaxō ato pāraxō afara fetsa fiamisfo. Nāskarafokai Nios xanīfo ano fotirofoma. ¹¹ Mā askapaonixakī iskaratīa mā mā Niospa afe yorafo. Niospa āfe Yōshi Sharaōxō mato chaka mato soaxona nōko Ifo Jesucristo mā Ifofaito. Māto chaka mato soaxoyanā āfe ōiti keskara shara mato imai. Askafaxō afaa chakafamisfoma keskara mato ōi.

Nō Cristo fe rafexō nō chakafatiroma

¹² Akka mā yoiraka iskafakī: “Cristo ēfe Ifo. Nāskakē a Niospa yoiyamano nā ē apaiyai keskara ē atiro, afaa chakama,” ixō mā yoiraka. Ēje, nānorikōi. Askatamaroko afara shara fetsa fekē ē aki ē ifofatirora ixō ē apaima. ¹³ Askatari mā yoiraka iskafakī: “Niospa nōko xāki noko onifaxoni a nō piar nō pinō. Nāskaxori a nō piar noko onifaxoni,” ixō mā yoisim. Akka chipo Niospa a nō piar yafi nōko xāki yamafaxoxii nāatomāi a nō piar noko onifaxonixakī. Chanīmakōi Niospa noko onifani nō afe rafepakexanō. Niospakai nōko āfima fe nō inō noko onifanima. Kērofori āto fenema fe inō ato onifanima. Askatamaroko Niospa nōko yora noko onifaxoni nō nōko Ifo fe nō rafepakexanō, Jesús āfe ina nō inō, nāskata Jesús nōko Ifo inō. ¹⁴ Nōko Ifo Jesús mā nafianikē Epa Niospa āfe shinā sharayaxō otofani. Nāskarifiakī āfe shinā sharayaxō nokori otofaxii.

¹⁵ ŷMā tāpiamamē nō Cristo Ifofaax nō āfe yorakōi? Nāskaxō nō nōko āfima chotatiroma nōmāi Jesús afe yorakōixō. ¹⁶ Niospa meka yoiķi yōra kirika kenekī iskafani: “Feronāfake kēro fe ikaino nā rafe yora fisti keskarakōi itirofo,” ixō keneni. ŷMā tāpiamamē, nā mato āfima fe mā ikī yora fisti keskara mā itiro? Nāskakē mato āfima fe iyamakāfe mā chakanatiroki. Askatari kērori fene fetsa fe itiro. ¹⁷ Nāskax nō nōko Ifo Jesús fe rafeax nā yora fisti keskara nō ixii. Niospa āfe Yōshi Shara nokoya rafemaxii. Nāskax nōko fero mēsho nā fisti keskara ixii Niospa Yōshi Shara fe rafeax.

¹⁸ Nāskakē mato āfima fe ipaiyamakāfe. Askatari kērofori mato fenema fe ipaiyamakāfe. Askara shināyamakāfe. Askapaikakīma ato makinoax ichotakāfe mato āfima fe ixikakīma. Mā chakanatiroki. Askatari kērofori ichotakāfe mato fenema fe ipai kakīma mā chakanatiroki. Akka mato āfima mā chotakī mato yora mā chakanafatiroma. Askatari afara chaka fetsa akī mato yora mā chakanafatiroma, afara chaka afiafiki mā chakanatiroma. ¹⁹ ŷMā tāpiamamē Niospa Yōshi Shara nofe ika? Nōko yora āfe pexe keskarakōi. Nāskakē Niospa Yōshi Shara nōmēra ika nāmāi nōko Ifofaax. Nāskax mākōi mā ifofamatiroma. Akka Nios

māto Ifo. ²⁰ Jesucristo mato nāxoni māto Ifo ixikī. Nāskax mā āfe inakōifo. Nāskatari Nios māto Ifokōi. Nāskax māto yora Niosnā. Nāskakē Niosnā ixosharakāfe Niospa mato imapaiyai keskara. Mā askafaito ōikakī fetsafāfe, “Nios sharara,” fatirofo.

7

Afeskax feronāfake āfi fe isharatirofomē

¹⁻² Mā ea kirika kenexō femakī mā ea yōkaita. Nāskakē nā mā ea yōkai keskara ē mato yoisharapai mā tāpinō. Feronāfāke kēromaisax shara itiro. Askafiax āfiyapai āfiyatiro chakafaxikīma. Nāskax feronāfakefo āfiyatirofo. Xotofakefori feneyatirofo. Nāskara shara. ³⁻⁴ Feronāfāke mā āfiyax āfe yora anā āfenā fistima. Āfe āfināri itiro. Nāskarifiāi kēro mā feneyax anā āfe yora āfenā fistima. Āfe fenenāri itiro. Nāskakē āfinī āfe fene afe ipaiyaito fene ranītiroma. Nāskatari fenēri āfe āfi afe ipaiyaito ranītiroma. ⁵ Nāskakē ranīnōnyamakāfe. Akka nāskaxō mā shinātiro iskafakī: “Nō Epa Nios kīfiyonō, nō paxkanōnāx oxa ranāyoxikī. Chīpo anā nō kemānāxikī,” ixō mā yoitiro. Nāskafiax chai samarakayamakāfe. Mā samarakaino Satanās mato chakafamatiro mā kēro fetsa fe ipaitirokī. Nāskarifiāi kērori feronāfake fetsa fe ipaitiro. Afe ipaikī chakafatiro.

⁶ Ē mato, “Fianākāfe,” ixō ē mato yoima. Akka mā fianāpai mā fianātiro. ⁷ Askata ē shinākī iskafai: “Feronāfakefo ea keskara kēromais ikanax shara itirofo. Niosnoax ē āfiyamax ē isharai. Ē shināchakaima. Ē inimakōi. Akka Niospa ea kēromais ima keskarakai ato askafaima. Fetsafo Niosnoax āfiyāfo. Fetsafori kēromaiskanax nā ē ikai keskariai inimatirofo.”

⁸ Akka iskaratīa nā kēromaisfo yafi fenemaisfo ē ato yoinō. Feronāfakefo ea keskara kēromais itirofo. Askatari kērofori fenemais itirofo. Askara shara. Askatari āto fene ato makinoax namis, afo anā feneyatirofoma. Ea keskara shara itirofo. ⁹ Akka feronāfake ares ixō teneyamai kēro fe ipaikī fatora kēro fe oxatiro. Askara sharama. Askatamaroko āfiyatiro tanaima shara ixikī, anā kēro fetsafo fe ipaixikīma.

Feronāfāke āfe āfi potatiroma, nāskarari kēromāri āfe fene potatiroma

¹⁰⁻¹¹ Askata iskaratīa feronāfake āfiya ē yoipai, xotofāke feneyari ē yoisharapai. Ēa ē mato yoima. Nōko Ifoōxō ē mato yoi iskafakī, kēromā fene enetiroma. Mā fene eneax fetsa fe fianātiroma. Ares itiro. Akka askayamai anā fenekī kematiro. Askara shara itiro. Askatari feronāfāke āfi enetiroma.

¹² Nāskakē iskaratīa keyokōi ē mato yoisharapai. Na meka ē mato yoiāi Niospa ea yoiyamafekē ēa mēstekōi shinākī ē mato yoi. Feronāfāke Jesús Ifofaino āfe āfinī Jesús Ifofaxoma fene noikī fene enepaiyamaino fenē āfe āfi potatiroma. ¹³ Askatari āfe āfinī Jesús Ifofaino fenē Jesús Ifofaxoma āfe āfi enepaiyamaino āfinī fene enetiroma. ¹⁴ Feronāfāke Nios chanīmara faimano āfe āfinī Nios chanīmara faino āfe āfiōxō Niospa nā feronāfake shara faxotiro. Nāskaxō āfe āfinī Jesús Ifofaito ōikī āfiōxō fenē Jesús Ifofatiro. Nāskatari kēromā Jesús Ifofayamaino fenē Jesús Ifofaino feneoxō Niospa nā kēro shara faxotiro. Akka feronāfake fe āfi enenāifono āto fakefo shara itirofoma. Akka enenāyamaifono Niospa āto fakefo shara ōitiro. ¹⁵ Akka feronāfāke Jesús Ifofayamakē āfinī Jesús Ifofaito fenē enepaikōikī enetiroma. Nāskax kapaiyaito nētefayamafe. Katanō. Mā nētefaino fekaxtetiropi. Askatari kēromā Jesús Ifofayamakē fenē Ifofaito kēromā enepaikōikī enetiroma. Kapaiyaito nētefayamafe. Katanō. Mā nētefaino fekaxtetiropi. Niospa noko katonī nōko shinā mēraxō afanā noko fekaxtefanōma nōko ōiti tanaimakōi shara inō. ¹⁶ Kēromā Jesús Ifofaxō āfe feneri Jesúsnoa tāpimatiro āfinī fene yoiaino fenē Ifofai rakikīa nō tāpitiroma. Feronāfākeri Jesús Ifofaxō āfe āfiri Jesúsnoa tāpimaino Ifofai rakikīa, nō tāpitiroma.

¹⁷ Nā nōko Ifo Jesús mato ima keskara nāskara ikāfe. Akka Niospa mato ifini nā Jesús mato ima keskara mā inō. Askatari nā Nios Ifofafo tii Nios kīfiti pexefā anoafoya nā maitio anoafori nānorikōi ē ato yoimis. ¹⁸ Iskafakī ē ato yoimis. Judeofo Niospa ato yoini keskarakōi āto fake feronāfakefo foshkī repa xatepaonifo. Akka mato foshkī repa xatenifono Jesús Ifofaxō shinākī mā iskafatiroma: “Iskaratīa ē Jesús Ifofai. Nā fistichi ēfe chaka ea soaxonano ē afe ipaxanō. Ooa, ŷafeskakī ea foshkī repa xatenifomē, ē askayamapaiifaino? Aatokai ēfe chaka ea soaxotiroma. Nāskakē ē foshkī repa xateama keskarxō ē ato fomāi;” ixō shināyamakāfe. Akka māto foshkī repa mā mato xatenifono shināchakayamakāfe. Askatari mā Jesús Ifofaxō iskakī shināyamakāfe: “Judeofo āto xinifāfe ato yoini keskara ē ipai. Ē foshkī repa xatepai nā Moisés yoini keskara ē ixikī” ixō anori shināyamakāfe. Nō foshkī repa xatepiroma Niospa noko ifinō. ¹⁹ Akka nō foshkī repa xatemisma askatari nō foshkī repa xatemis nāskara shara. Akka nō askanokai, “Mā chakafaa,” noko Niospa faima. Askatari nō askamanori, “Mā chakafaa,” noko Niospa faima. Nā judeofo imis keskarakai nō itiroma noko Niospa ifinō. Askatamaroko Niospa

noko yoini keskara nã fisti nõ atiro. ²⁰ Akka nã Niospa mato ifini keskarakõï ikãfe. ²¹ Mã fëtsa yonomati ikatsaxakã shinãchakayamakãfe. Nãskarakõï ikãfe. Akka mãto ifãfe mato nãchipaiyaino, “Fotakãfe anã yonoxoxikakãma,” mato faino mã katiro. ²² Akka nõko Ifo Jesús mato ifini. Mato ifiyoamano ranãri mã ãto yonomati iyopaoni. Iskaratãri mã ãto yonomati mã ato yonoxomis. Mã askafixõ mã Jesús Ifofaano, Jesús mãto chaka mato soaxonano, ãfe yonomatikõïfõ mã iki. Nãskaxõ tsõa mato iskafatiroma: “Mãkai Jesús afe yorafoma,” tsõa mato fatiroma. Akka ranãritokai mã tsõa yonoxomisma. Askafiax mãri Jesús Ifofaax mãri ãfe yonomatikõïfõ. ²³ Epa Niospa ãfe Fake Jesucristo noko nõchixonõ noko nãxoyonõ nãskax nõko Ifo inõ. Nãskax mã afe yorakõïfõ. Nã fisti mãto Ifokõï. Nã fistichi mẽstekõï mato shinãmasharatiro. Askaxõ fetsafo ifofayamakãfe mato shinãmasharatirofomaki. ²⁴ Efe yora mãshtichi, Niospa mato ifiano nã mã ipaoni keskara ikãfe Epa Nios mato fe ikaino.

Feronãfake ãfimaifsoya kërõfo fenemaisfoõnoa Pablo yoini

²⁵ Akka iskaratã afara fetsa anã ã mato yoipai mã ea yõkaita. Feronãfakefo ãfimaifsoya kërõfo fenemaisfoõnoa ã mato yoi. Ë mato yoiai keskara nõko Ifãfe ea yoiyamafixõ ea noikã ea nõchini ã ãfe ina inõ. Nãskakë ã mato yoiai keskara mã chanãmara fatiro. ²⁶ Iskaratã afara mesekõikõ noko omiskõïmani. Nãskakë mã ãfimaifsoya ika shara. Nios Ifofaafãfema noko omiskõïmapaikani nõ Jesús Ifofakë. ²⁷ Akka ãfiyakaxõ mãto ãfi eneyamakãfe. Askatari ãfimaifsoya kërõ fenayamakãfe. ²⁸ Akka mã kërõyaxõ mã chakafatiroma. Kërõfori feneyakatsaxakãma mã feneyaxõ mã chakafatiroma. Askata mã feneyax askatari feronãfake mã ãfiyak mato omiskõïmanaifono mã omiskõitiro. Nãskaxõ mato omiskõïmatirofo mã Jesús chanãmara faino. Nãskakë ã mato yoisharapai mã omiskõiyamanõ.

²⁹ Askatari ã mato iskafakã yoipai, efe yora mãshtichi. Nõko Ifo Jesús mã chaima oi kiki. Nõko Ifo nõ yonoxokã nõ chai faima. Nãskakë nõ nõko Ifo yonoxosharakõipai. A ãfimaifsoya nõko Ifo yonoxosharakõitirofo kërõ shinãkima. Askatari mã ãfiyatori nõko Ifo yonoxosharatiro mã ãfimaifsoya yonoxonaifõ keskafakã. ³⁰ Askatari mã shinãchakaifãfe nõko Ifo yonoxosharatirofo mã shinãchakaifãfema yonoxonaifõ keskafakã. Nãskatari mã inimaifãfema nõko Ifo yonoxosharatirofo mã inimaifãfe yonoxonaifõ keskafakã. Askatari mã afara fiaifãfe shinãtirofo iskafakã: “Na nõkonãma, akka na nõko Ifonã,” ixõ shinãtirofo. Akka nõko Ifo shinãkõikã nõ yonotiro. ³¹ Nõko Ifo Jesús mã chaima oi kiki. Nãskakë nõko mã anoxõ nõ yonoxosharafaifãinõ mã nõ yopai fixiki. Nãskafixõ afama mãshtifos shinãkima nõko Ifokõïroko nõ shinãkõinõ. Keyokõï mã anoafo keyoxikani. Nãskakë Jesús nõ shinãkã finakõikã afama mãshti fipaikã nõ shinãtiroma.

³²⁻³⁵ Ë mato anori yoi mãto shinã mëraxõ afaranã mato fekaxtefanõma. Ë mato, “Ãfiyayamakãfe,” faima. Askatari xotofakefori, “Feneyayamakãfe,” ã ato faima. Ë mato mẽstekõï imapai nõko Ifo fisti mã shinãkã finakõinõ, mã afara fetsa shinãnõma. Askaxõ ã mato yoia keskara feronãfake ãfimaisto ãfe Ifo inimamapai. Akka feronãfake ãfiyakõ ãfiri inimamapai. ãfiri yopaito fenë shinãchakakã ãfi fixotiro. Nãskakã ãfe Ifo fistikai shinãtiroma. Nãskaxõ ãfe Ifo inimamapaikã ãfiri inimamapai. Askatari xotofake fenemaisto ãfe Ifo Jesús fisti yonoxosharapai. Afara fetsakai shinãima ãfe Ifo fisti shinãi. Niospa amapaiyã keskara fisti aki. Akka xotofake feneyaxõ ãfe feneri inimamapaikã afara fetsafori shinãtiro ãfe Ifo Jesús fisti shinãkãma.

³⁶ Nãskakë meka fetsari ã mato yoi. Feronãfake taefakã xotofake yoiyoxõ fichisharapãkã chipo fitiro ãfe ãfi inõ. Shinãkã iskafatiro: “Më afetiama afe mekaitakã, mã fipa,” shinãchakayamaxiki ixõ fitiro, chaka shinãyamaxiki. Nãskafakã afaa chakafaima. ³⁷ Askatari feronãfake fëtsa shinãkã iskafatiro: “Ëfe Ifo ã yonoxosharapaiyã keskara ã ãfiyakõ ã axotiroma. Nãskakë ã ãfiyaima mã yoifixõ,” ixõ anori shinãkã afaa chakafaima. Tsõa kerexkai, “Ãfiyafe, mã mã yoiaki,” fayamaino mã feronãfake xotofake fe fianãtiroma Nios yonoxosharaxii. ³⁸ Akka feronãfake mã xotofake fe fianãsharatiro. Akka mã xotofake fe fianãima nõko Ifo yonoxosharatiro. Nãskarari shara itiro.

³⁹ Askata meka fetsari ã mato yoi. ãfe fene naamanokai kërõmã fene enetiroma fetsa fe fianãxiki. Akka mã fene naano fetsa fe fichinãpai afe fianãtiro mã Nios Ifofaa fe. Askara shara. ⁴⁰ Nãskatari ã ãfe shinãkã iskafai. Mã fene naano fetsa fe fianãmax nãskarari sharakõï itiro. Ë shinã Niospa Yõshi Sharapari nonorikõï mato yoipai.

8

Nioskõima onifakaxõ yorafãfe kãfipaonifo. Nãskaxõ nami inãpaonifo atoõnoa Pablo yoini

¹ Mã ea yõkaito ã mato yoisharatiro. Yora fetsafãfe afara onifakaxõ, “Na nõko niosra,” ikaxõ nami inãmisfo. Askata anã mã nami fikaxõ ato inãmisfo yorafãfe pinõfo. Akka yorafãfe ãto niosnã nõ nami pia, shara. Nõ piamari, shara. Nãskaxõ nõ afaa chakafaima. Akka mã yoikã iskafamis: “Mã nõ tãpia nõ ãto niosnã nami pia, shara. Akka nõ piamari,

shara,” māmāi shinākī Nioskōimara ixō. Akka mā fatora fetsafāfe shinākī iskafamis: “Ēfi tāpikōiaki. Nā ē shināi keskara ē mēstekōi shināi. Ē fetsafo keskarama. Ē apaiyai keskara ē atiro,” ixō mā yoimis. Askara yoi kakapaimis mā itiro. Askara shinākīkai nō fetsafo inimamatiroma. Askakimaroko nō yorafo noixō nō āto ōiti fepeaxosharakōitiro Jesús Ifofasharanōfo. Nāskakē nō ato inimamatiro. ² Askatari fatora fētsa shinākī iskafamis: “Ēfi afama mīshti tāpiakī,” ixō anori yoifīkī atiri afaa tāpiama. ³ Akka fatora fētsa Nios noiano nāskarīfakī Niospa aōnoa yoitiro iskafakī: “Nā ea noiai mē tāpikōia. Nāfi efe yoraki,” ixō yoitiro.

⁴ Nāskaxō yorafāfe afara fetsa onifakaxō, “Na nōko niosra,” ikaxō nami ināifo. Nā nami nō pitiro. Nā shara. Nō chakafaima. Akka nō piamari, shara. Akka mā nō tāpia a afara fetsa yorafāfe onifafo akai afama. Nā onifafotokai afaa tāpiama. Akai ōitiyama. Āfe māporikai afaa shinātiroma. Akai Niosma. Akka Nioskōi fisti. ⁵ Jesús Ifofaafāfema yoikī iskafamisfo: “Nios ichapa. Nai mēranofoya mai anofoya nios ichapakōi,” ixō yoimisfo. Akka nā āto nios ichapafīax Nioskōifoma. ⁶ Mā nō tāpia Epa Niosfi fīstūki. Fetsakai anoma. Nāato keyokōi onifani. Nokori onifani nō āfe fakefo inō. Nāskatari nōko Ifo Jesucristori fisti. Anā ano fetsama. Nāskaxō Niospa āfe Fake feta keyokōi onifani. Aōnoax nō nitiro.

⁷ Nā ē mato yoiai keskara fisti rasichi Jesús chanīmara faifāfe tāpiafoma. Shināmisfo iskafakakī: “A fetsafāfe afara onifafo, nā āto nioskōi nia,” ixō yoimisfo niyamafiakē. Akka āto xinifāfe nānori ato yoipanonifo. Nāskakē shinānkai iskakakī: “Nā āto niosnā nō nami pixō nō Nioskōi chakafatiro,” ixō shinātirofo. Akka mā pikaxō āto shinā mēraxō shināchakatirofo: “Mā nō chakafara,” ikaxō. ⁸ Anori shināfiafonokai a nō afara piatokai Nios yafi noko rafemasharatiroma. Nios makinoa noko potatiroma. Afara onifakaxō, “Na nōko niosra,” ikaxō nami ināifo nā nami nō piamanokai noko shara imatiroma. Askatari noko chakafatiroma. Nāskatari mā nō pianori noko chakafatiroma. Nāskatari noko shara imatiroma.

⁹⁻¹² Nāskakē mato feta Nios Ifofafo afaa chakafamayamakāfe. Mā shināi iskafakī: “Nō keyokōi pitiro. Afara onifakaxō, ‘Na nōko niosra,’ ikaxō nami ināifo. Nā nami nō pitiro nā onifafokairoko Nioskōikē. Akka mā nō na nami pixokai nō āto nios chanīmara faima. Akka mā nō tāpia Nioskōima. Akka pixō Nioskōi nō chakafaima. Jesúsri nō kachikirifaima,” ixō mā shināi. Mā anori shināfiaino Jesús Ifofaa fetsafāfe anori tāpiafoma. Tāpiamaifono nā nioskōimato kīfīti pexefā anoxō mā piati fisti mā pipai māakai āto nios ifofapaima, nāskakī mato ōikakī akairi apaikani. Akka mā mā tāpia yorafāfe āto niosnā nō nami pia shara, chakama. Akka fetsafāferi Nios Ifofafiakaxō yoimisfo iskafakakī: “Āto niosnā nō nami pia sharama, nō chakafatiro,” ixō yoimisfo. Nāskaxō mā nami piatio fetsafāfe mato ōikakī akairi afāfe nami pitirofo. Nāskaxō mā nami pikaxō chipo shinātirofo iskafakakī: “Ooa, mē nami pixō ēfe Ifo Jesús ē chakafaa ēmāi āto niosnā nami pixō. Nā nami pikī ē āto nios sharafai. Ē āto nios ifofai ōitsai. Ooa, ē chakafaa,” ixō shinātiro. Askaxō āfe shinā mēraxō shināchakakōitiro mā nami piatio ōikakī akairi pikaxō. Nāskakē mā chakafamatiro. Askafakī Cristori mā chakafai. Mā mā tāpia afara onifakaxō, “Na nōko niosra,” ikaxō nami ināifo nā pixokai mā chakafaima nā onifafokairoko Nioskōikē. Akka fetsafāfekai tāpiafoma. Afāfe shinākani: “Nā nami pixō nō chakafatirokī,” ixō shināmisfo. Akka mā piatio ōikakī akairi pikaxō shināchakatirofo. Mā akai keskafakīri shinākani. Akka mā nā nami piyamainokai akairi pikeranafoma. Shināchakakeranafoma. Nāskakē mato fe yorafo noikōixō mā nā nami pitiroma ato chakafamaxikima. Akka atoōnoaxri Cristo naniki. ¹³ Nāskakē nō nami pixō Jesús Ifofaa fetsafo nō ato chakafamatiro. Nāskakē āto niosnā nō nami pitiroma fetsafo chakafamayamaxikī. Nāskakē nō fetsafo chakafamapaima. Nofeta Jesús Ifofaa fetsafo noikī nō afaa chakafamapaima.

9

Niospa Pablo nīchini āfe meka ato yoinō

¹ Nios fistifi ēfe Ifokī. Nā ea yonomapaiyai keskara ē atiro. Tsōakai ea yonomatiroma. Jesús ea nīchini ē aōnoa yorafo yoinō. Akka nōko Ifo Jesús mē ōisharakōini. Aōnoa ē mato yoiaito mā chanīmara fani. Nāskakē nōko Ifo Jesús ē yonoxonaōxō Jesús mā Ifofai. ² Fetsafāfe shinākakī iskafamisfo: “Niospakai Pablo nīchiama Jesúsnoa noko tāpimanō,” ixō anori yoimisfo. Fetsafo mekaino anori shināyamakāfe. Ē mato yoiaito mā nōko Ifo Jesús chanīmara fai. Nāskakē mā tāpitiro chanīma Niospa ea nīchini ē mato Jesúsnoa yoinō.

³ A ea Ichakakī mekaifaifono iskafakī ē ato kematiro: ⁴ Fetsafāfe Jesúsnoa yoiaito nikakakī afaa kopi yōkaxoma kaxpa ato pimamisfo. Akka ē mato Jesúsnoa yoiaito nikakakī, ħeari afaa kopi yōkaxoma kaxpa eari pimatirofomamē? ⁵ Ē akai keskafakī Pedrori Jesúsnoa yoifofāsafamis. A Jesús nīchiafāfe fetsafāferi Jesúsnoa ato yoifofāsafamisfo. Jesús āfe extofāferi ato yoifofāsafamisfo. Nāfo kēro Jesús Ifofafo fe fianākaxō Jesúsnoa ato yoifofāsafaifono āto

āfifori ato fe fofāsamisfo. ¿Nāfāfe āto āfifāfe Jesús Ifofaafō fe fianāfo keskari ēri nā kēro Jesús chanīmara faa fe ē fianātiromamē eferi kafāsanō? ⁶ ¿Afeskakī ē Bernabé feta nō mato Jesúsnoa yoifikī nō yonoimē, a nō yopai yafi a nō paii fixikī? Akka fetsafāfe Jesúsnoa mato yoifikakī yonokanima nō akai keskafakī. Akka afara yopaifono mā ato ināmis. Akka a nō yopai kaxpa nō fimisma, yonoxō nō fimis. ⁷ Anā meka fetsari ē mato yoinō. Sorarofāfe kaxpa yonokanima. Āto xanīfāfe a piaifo ato inākani. Askatari ato kori inākani. Nāskarifakī yora tare fanamisto āfe tare foaisharano āfe yono pitiro. Askatari fakka kexemistori āfe fakka chocho fīaxō ayatiro. Nāskarari a Jesúsnoa yoimisfāfe a piaifo fitirofo pixikakī tsōa kopifaxoma.

⁸ Nā ē mato yoiāi keskara yōra mekama. Akka Moisés nānori kirika keneyoni Niospa meka yoikī. ⁹⁻¹⁰ Moisés Niospa meka kenekī iskafani: “Nā fakka keskara nexakaxō xiki peama peama amamisfo āfe xaka potaxikakī. Nāskakē ifāfe renextiroma xiki xaka pinō ifomāi yonoxokī,” ixō Moisés Niospa meka yoikī kirika keneni. Akka fakkaōna Niospa yoinima. Yorafoōnari yoini. Nā Jesús yonoxomisfoōna yoini. Nāskaxō afaa kopifaxoma fitirofo yopaifo Niosnoa ato yoikakī. Askatari fetsafāfe tare kexexō shinātirofo iskakakī: “Ē na tare kexeakī nāskakē ē tarepanoa afama mīshti fīpa,” ixō shinātirofo. Nāskarifakī a Niospa meka ato yoimisfāfe a paii fitirofo. ¹¹ Nāskarifakī nokori kopikiri a nō yopai mā noko kaxpa inātiro afaa kopī yōkaxoma. ¹² Fetsafāfe Jesúsnoa mato yoiāifono nikakī nā yopaifo mā ato ināmis.

Akka nō mato taefakī yoiyoni. Nāskakē mā noko afama mīshti inātiro fetsafo finōmainīfofā. Mā noko afama mīshti ināfitirokē nō mato afaa yōkamisma. Nāskaxō nō tenemis. “Nō ato kori yōkaito anā noko nikapaitirofoma,” ixō nō shināmis. Nāskakē nō mato afaa yōkapaimisma. ¹³ ¿Mā tāpiamamē? Nōko kaifo judeofo na Nios kīfiti pexefā mēra femisfo a piaifo. Nā piaifo Nios ināxikakī. Nāskakē a Nios kīfiti pexefā mēra yonomisfāfe a paii kaxpa pimisfo tsōa kopifaxoma. ¹⁴ Nāskarifakī nōko Ifāfe yoini iskafakī: “Fētsa ēfe meka shara fetsafo yoiāito nikakakī nā nikaifāfe a yopaifo ato inātirofo,” ixō nōko Ifāfe yoini. ¹⁵ Nānori nōko Ifāfe yoifinikē ē mato afaa pishta yōkamisma. Mato Niospa meka yoifikī ē mato kirika kene foma: “Ea kori inānōfora,” ixō. Nāskakē tsōa ea yoikī iskafatiroma: “Pablo ato kori fiapaikī ato Jesucristoōna yoimis,” ixokai tsōa eōna anori yoitiro. “Akka Pablo ato kori fiamiski ato Jesucristoōna yoikī,” ea mā faito ē rāfipaitiro. Nāskaxō ē mato afaa pishta yōkamisma: “Pablo kori fia,” mā ea fanōma. ¹⁶ “Ē mato afaa yōkatama Jesúsnoa ē mato yoimis. Nāskakē ē sharafinakōiakī,” ixokai ē yoitiroka kakapaiyanā. Akka Niospa ea katoxō ea nīchini ē Jesúsnoa ē yoifafainō. Akka ē Jesúsnoa yoiyamaito Niospa ea omiskōimatiro. ¹⁷ Ē yoikī iskafamis: “Epa Niosi, mī Fakeōna ē yoipai,” ixō ē yoikē Epa Niospa ea afara inātiro. Akka ēa ē yoima. Niospa ea nīchini Jesúsnoa ē ato yoinō. Nāskakē nā ea yoini keskara ē ato yoimis. ¹⁸ Akka ē Niospa meka shara yoimiskē, ¿afaa ea Niospa ināimē? Ato Niospa meka yoixokai ē afaa ato yōkamisma. Askaxorikai ē ato yoimisma iskafakī: “Niospa mato yoikē Jesúsnoa ē mato yoifafainaito a ē yopai ea inānōfora,” ixokai ē ato yoimisma. Akka ē Niospa meka ato yoipai afaa yōkaxoma. Nāskax ē inimasharakōi Epa Niospa ea inimamaino.

¹⁹ Ēkai tsōa yonomatima. Nāskafīax ēākōi ē mato yonomati keskarakōi. Nāskakē keyokōi yorafo ē axosharapai ato Jesús chanīmara famaxikī. Nāskax ē yorafāfe āto yonomati keskarakī. Akka nā Nios Ifofaafoma ē ato fe rafemis āto feyafati shara keskara ixō ē ato yoiāito, Jesús Ifofanōfo ē Niospa meka yoiāito. ²⁰ Ēfe kaifo judeofo fe ē ikax nā ikaifo keskari ēri ato keskara ipai. Ē ato keskara ikaito ea ōikakī Jesús chanīmara fatirofo. Nōko xini Moisés nōko kaifo yoipaoni keskarakai iskaratā anā ē nikaima. Akka ē nikayamafikī a Moisés yoipaoni keskara nikamisfo fe ēri ato fe ixō Moisés yoini keskara ēri askai ato Jesús chanīmara famaxikī. ²¹ Nāskakēri nā Moisés yoini keskara nikaifoma fe ē ato fe ixō nā Moisés yoini keskara ē akima ato Jesús chanīmara famaxikī. Ē nāskafamiskē Cristo ea yoini keskara ē amis. Ē nikasharaxō nā fisti ē kachikiri fatirofo. ²² Jesús chanīmara faafāfe ranārīto Niospa meka tāpisharayokanima. Ē nā keskarafō fe ikax ēri ē ato keskara ipai eari Jesús tāpimasharanō. Nā ēa tāpimana keskara ēri ato tāpimasharanō. Nāskatari fatora fetsafo fe ē ikax ē ato keskarari ē ipai. Eōxō Jesús chanīmara fakanax afe isharapakexanōfo. ²³ Nāskakē ē askafakī ē ato Jesucristoōna tāpimasharai nā chanīmara faifono ēri ato fe inimai finakōitiro.

²⁴⁻²⁵ Akka mā mā tāpia nā naetapafo xonōnōnāxikakī ichotiurofo yora ichapafāfe ato ōiaifono. Akka nā koshi fistichi ato xonōtiro. Nāskakē akiki xanīfo inimakī afara shara fetsa inātiro. Nāskakē kerexkai ichotiurofo fetsafo xonōpaikani. Akka ichoyokanaxma tae fenai ichoyofofāfōfāitirofo feyafaxikakī xokenāxikakima. Nāskarifakī nōko Ifo Jesús kerexkai yonosharaxokāfe afara chakafo fayamaxikakī. Akka Niospa mato yoiāito nikakī akāfe Jesús feyafaxō Ifofaxikakī mā akiki nokoaitūa mato afara shara inānō. Akka nā ichokī ato xonōa xanīfāfe afara shara inā keyotiro. Akka Niospa noko afara inā keyonakama.

²⁶ Nāskakē ē Jesús fisti yonoxoni afaa fetsa shinātama. Akka ēa ē kaxpa mato yoimisma. Niospa ea shināmanaino ē mato yoimis. Naetapafo xonōnōnāpaikani mēstekōi ichotirofo. Nāskarari ē mēstekōi ika. Ēfe Ifāfe ea yoiāi kesarakōi ē iki akiki nokosharaxiki. ²⁷ Ēa ē apaiyai keskara ē akima. Ēfe Ifāfe ea amapaiyai keskara ē aki. Ē tenepaifiki ē tenetiroma Jesús Ifofasharaxiki. Ē xokenāfiakī ē tenetiroma Jesúsnoa yoiāi. Jesús fistichi ea yonomatiro. Nāskakē ē fetsafori yoifafāini Jesús Ifofaxō yonosharaxonōfo. Nāskakē Niospa ea yoiāi keskara ē ayamax ē yoitiro, afianā ē Nios yonoxotiroma. Niospa anā ea yonomatiro. Ē fenopaima. Nāskakē nā ēa ē apaiyai keskara ē akima. Ēfe Ifāfe ea amapaiyai keskara, nā fisti ē aki.

10

Judeofāfe Nios chakafapaoni keskara iyamakāfe

¹ Efe yora mīstichi, tāpikāfe. Nōko xinifo Egipto anoax fonifo. Akka Niospa nai kōi nāmā pishta ato fotomaxoni a ōiāx nōko kaifo judeofo acho fonifo. Niospa nā nai kōiōxō ato iyopaiyai ari ato yoni. Ato iyoikaino nā ĩamāfā āfe ane Ōshi ano nokonifo. Nānoxō nōko kaifo judeofo Niospa ato ĩamāfā nēxpakīa rafe ato paxkaxotani anori pokefainōfo. ² Moisés ato rekē tanaxoni. Akka nōko kaifo judeofo Moisés acho fonifo. Nā Moisés chanīmara fakanax afe rafepaonifo. Nāskakē nai kōi nāmā pishta kaino Moisés nāmā ato yoni. ĩamāfā pokeifokani mā ĩamāfā nakirafekōi shinātanano. Nāskakē pokefainifo ĩamāfā nēxpakīa. Mā āfe kaifo ato ififani Moisés kani. ³ Askatari Niospa nai mēraxō a piaifo ato potaxoni fikaxō pinōfo. ⁴ Nāskatari ano fakamano Moisés tokirinifā āfe mēstetini ramāno faka sharakōi tsekeni keyokōichi ayanōfo. Cristoōnoax faka sharakōi tsekeni judeofāfe ayanōfo. Akka fakirira fofāfofāipaonifo Cristo ato fe kaino, tsōa Cristo ōinima. ato fe kakī ato axopaoni ato kexexō. ⁵ Askafafiaifono Epa Nioskai atoki inimanima āfe meka nikayamaifono. Nāskakanax tsōa istoma anoax fofāfofāikani nikayospakanax nai keyonifo. Nā tsōa istoma ano ato maifakī fetsanifo Niospa ato namakī keyoano.

⁶ Akka afāfe afara chakafapaonifo. Nāskakē atoōnoa noko tāpimani afara chakafo fapaonifo keskara nōri ayamanō inifo keskai omiskōixikima. ⁷ Afāfe afara chakafapaonifo keskara ayamakāfe. Akka nāfāfe afara fetsa onifakaxō, “Na nōko niosra,” fapaonifo. Nāskakaxō kifāpaonifo. Kifākaxō āfe ferotaiifi piyanā ayata ikaxō afara fetsafo chakafapaonifo. Pāeyanā monopaonifo. “Nōko nios nokoki inimaira,” ikanax askapaonifo. Nāskakē māri ato keskara iyamakāfe. ⁸ Nāskakanax āto āfima fe ipaonifo. Askatari kērofori āto fenemafo fe ipaonifo. Askaifāfe ōikī Niospa veintitrēs mil yorafo ato namarisafatani nā pena fisti. ⁹ Māri ato keskara chaka iyamakāfe. Akka, “Nioskai nokoki fena ōitifishkiyotiroma. Nāskakē ē afara chakafafaito ea Niospa omiskōimanima,” ixō shinānyamakāfe. Akka nōko xinifāfe chakafafāfe ōikī anā teneyamakaiāi Niospa ato omiskōimani. Nāskakē ato mēra rono paekōifo nīchini ato chachinōfo. Ato chachiano ranāri nanifo. Nāskakē noko tāpimai nōri Nios chakafaito nokori omiskōimatiro. ¹⁰ Askatari mēxotaima mekaifāfe ōikī Niospa āfe ājirinī ranāri ato namani. Akka māri ato keskara iyamakāfe mato omiskōimayamanō.

¹¹ Nā nōko xinifāfe afara chakafapaonifoōnoa noko kenexonifo noko yoisharanō nōri ato keskara iyananō omiskōixikima. Akka nōko Ifo Jesús oyoamano chaima nō itipinīsharayo mā nōko Ifo nokoaino anā nō keskara chaka nō ixikima. ¹² Akka fētsa shinākī iskafai: “Ēkai ato keskarama. Ē afaa chakafatiroma. Akka afara sharafo fisti ē amis,” ixō anori shinātiro. Nāskakē kexemesharakāfe ato keskara iyamaxikakī afara chakafai. Akka māri Jesús Ifofasharamax mā ato keskari mā itiro afara chakafai. ¹³ Satanās mato afara chakafamapaikī mato fisti chakafamapaimisma. Keyokōi nā Nios Ifofaafori ato chakafamapaimis. Mato chakafamapaifaino Niospa mato yoiāi keskara mato kexesharatiro mā afaa chakafanōma. Akka mato yoimis keskara mato axōi mā chanīmara faito. Nāskakē Niospa Satanās mato ichapama fekaxtefatimafai mā chakafanōma. Mato Niospa amatiro mā tenenō mato fekaxtefaino. Māto ōiti mato kerexfaxotiro mā Satanās nikanōma. Askatari afara āfe keskarrarafāfe mato fekaxtefaino Niospa mato amatiro mā tenenō mā Nios kachikirifaxikima.

¹⁴ Efe yora mīstichi, fetsafāfe afara onifakaxō, “Na nōko niosra,” ikaxō chanīmara faifono ato makinoax paxkafaitakāfe. ¹⁵ Nāskakē shināsharakōikāfe nā ē mato yoiāi keskara ōitsai ē mato pāairaka. Akka ea yoiāfe ē mato pāaimākai. ¹⁶ Mā mā tāpia Niospa meka nikai nō ano fisti ichanāmis. Nāskaxō nō fimi ene ayamis Jesús noko nāxoni shināyanā. Nā nō ayamis, “Fimi ene Jesús āfe imira,” ixō nō shināmis. Nāskaxō nō shinātiro Jesús noko naxōi āfe imi foni nō afe nīpaxanō. Nāskakē nō yoitiro iskafakī: “Aicho Epa Niosi, mī Fāke noko nāxoni nō afe ĩpaxanō,” ixō nō yoitiro. Nāskatari pāa torepakexō Jesús noko nāxoni shinākī nō pimis. “Nā pāa Jesús āfe namira,” ixō nō shināmis. Nāskaxō nō shinātiro Jesucristo noko omiskōixononi mastafiono ifi cruz ikakinoax. Nāskakē nō afe rafepakenaka Ifofaax. ¹⁷ Akka

pãa fisti torepakexō keyokōichi nō pimis. Nāskarifikī Jesucristo fisti keyokōichi nō chanīmara faax fisti keskara nō ixii.

¹⁸ Nāskatari nōko kaifo israelifo shinākāfe. Nāfāfe āto inafō retexaxō Nios ināmiso āto chaka soapaikakī. Nāskatari nā israelifāfe Nios kīfīti pexefā mēraxō Nios yonoxomisfāfe nā nami pimisfo. Nāskakanax nā fisti keskara imisfo ano fisti ichanānākaxō pikani Nios shināyanā. ¹⁹ Nāskakē ē mato yoi nā afara fetsa onifafo akai afama. Askatari afara fetsa onifakaxō nami ināfo nā namikai afama a onifafokairoko Nioskōikē. ²⁰ Akka nā Jesús Ifofaafāfema Nioskōi nami inātamaroko afara fetsa onifakaxō, “Nā nōko niosra,” ikaxō niafaka chaka nami ināmiso. Nāskakē māri nami ināyamakāfe. Niafaka chaka fe mā rafeaito ē mato ōipaima. ²¹ Mā nōko Ifo Jesús fe rafepai a niafaka chakaxō fe rafeyamakāfe. Askaxō nā rafe mā ifofatiromaki. Nā Jesús Ifofaafō fe mā ato fe ichanākaxō pãa torexō mā ato feta pimis Jesús noko nāxonī shināyanā. Nāskakē nā Jesús Ifofaafoma fe ato fe mā ichanātiroma niafaka chakaxō nixaxikīma. ²² Nōko Ifo Jesús fe rafepaifikī nō niafaka chaka fe rafepaikī nō nōko Ifo Jesús nō ōitifishkimatiro. Nō askafaito noko omiskōimatiro. Akka, ¿nō Jesús kexekai finōtiromē noko omiskōimayamanō? Maa, nō Jesús finōtiroma. Jesús noko omiskōimanaito tsōa noko timamatiro.

Nā Jesús Ifofaafō nō ato noikōixō nō ato shināchakamatiro

²³ Akka mā shināiraka iskafakī: “Cristo ēfe Ifo. Nāskakē nā ē apaiyai keskara ē atiro, afaa chakama,” ixō mā shināiraka. Ēje, nānorikōi mā shināmis. Nāskakē afara shara shinākī: “Nā chakama nō atiro,” ixō mā shināfiaino akka fetsafāfe anori shinākanima: “Chakara,” namisfo. Nāskakē fetsa ferotaifi nō afara pitiro ma to shināchakayamaxikī. Chanīma, nō Jesús Ifofaxō Niospa noko yoini keskara keyokōi nō pitiro. Keyokōi nami shara nō pitiro. Chanīmakōifiano, Jesús Ifofaa fetsafāfe shināmisfo iskafakakī: “Ē nami pitiro. Ē nami pixō ē Jesús chakafatiro,” ixō shinātirofo. Nāskakē nō ato ferotaifi nō nami pitiro ma shināchakanōfoma. Akka nō ato shināchakamatama Jesús fisti nō ato shināmapai. ²⁴ Nāskakē nā mā apaiyai keskara fisti shināyamakāfe. Fetsafōnoari shinākāfe. Ato axosharakāfe.

²⁵ Fatora fetsa mato nami ināpai mato kori fīaxikī akka pipaikī mā fitiro pixikī. “¿Fanīa mī na nami feamē?” ixō yōkayamakāfe mā pixō shināchakaxikīma: “Nā nami nā mī niosnāraka,” ixō yōkayamakāfe. Akka noko Niospa yoini iskafakī: “Keyokōi mā nami pitiro,” ixō noko yoini. ²⁶ Nōko Ifāfe keyokōi onifani. Keyokōiri āfenā. Nā onifani tii noko ināpai nōkonā keyokōi inō.

²⁷ Akka nā Jesús chanīmara famato mato pimapaiyaito mā a feta pipaiyai afeta pikāfe. Nāskaxō iskafakī yōkayamakāfe: “¿Fanīa na nami mī feamē? Nā mī niosnāraka,” ixō yōkayamakāfe. Yōkaxoma mā pitiro shināchakaxikīma. ²⁸⁻²⁹ Askatari fetsa mato yoikī iskafatiro: “Ē mato nami pimāi nā ēfe niosnā,” ixō mato yoiaito nā nami piyamakāfe. Akka mā piaito ōikī āfe shinā mēraxō shinātiro iskafakī: “Ajaa, na feronāfāke Jesús Ifofafiaxō nā ēfe niosnā mā nami pii. Na feronāfākekai Jesús Ifofasharama,” ixō āfe shinā mēraxō shinātiro. Nāskakē māri mā nami pixō māto shinā mēraxō mā shināchakatiro: “Mā nō chakafara,” ixō. Akka mā mā tāpia keyokōi nō nami pitiro. Nāskakē fetsafāfe tāpamano ato ferotaifi nā nami piyamakāfe shināchakayamanōfo. ³⁰ Mā yoiraka iskafakī: “Ē keyokōi nami pikī ē Nios, ‘Aichora,’ fafafaīni. ¿Akka afeskakī fetsa eōnoa shināchakatiromē?” ixō mā shināiraka.

³¹ Ē mato yoinō afara mā akai shara shinākī akāfe. Niospa mato shara ōinō akāfe. Niosnoa shināsharanōfo akāfe. ³² Nā mā akai keskafakī fetsafō shināchakamayamakāfe. Nōko kaifo judeofo iyamai mani fetsafō Nios Ifofaafōya ato shināchakamayamakāfe matoōxō nōko Ifoōnoa shināchakanōfoma. ³³ Nāskari fakī ēri keyokōi yorafo ē ato shara faxopai inimanōfo. Akka nā ē apaiyai keskara fisti ē akīma. Fetsafāfe afara apaiyaifo keskafakī ē ato axopai Jesucristo Ifofakaxō ato chaka xatekanax afe ipaxanōfo.

11

¹ Akka na Cristo akai keskara ēri aki. Akka māri nā ē akai keskara akāfe.

Ichanāxō nō Nios shināino feronāfāke fe kēro afeskax itirofomāki Pablo ato yoini

² Mā ea shināmiskē ē mato aicho fai matoki inimakī. Nā ē mato yomis keskara mā nō feyafamiskī. Nā mā nikafafaīni. ³ Efe yora mīshtichi, ē afara ē mato yoipai mā tāpinō. Cristofi keyokōichi nōko Ifokī. Nāskarari kērofāfe āto ifo āto fenefo. Akka Cristo āfe Ifokī Epa Nios. ⁴ Nāskakaxō feronāfāke Nios yoiti pexe anoxō yoivanā kīfikani marakometirofoma Cristo shinākani. Nō marakomexō nōko Ifo nō noima. Nāskakē nōko Ifo nō rāfimatiro. ⁵ Askatari kērofāfe Nios kīfipaiyanā Niospa meka yoipaikani marakometirofo fetsafāfe tāpinōfo āto fenefo āto ifokē. Nāskara mā nō feyafamis. Āto marakometimaisax maxko ika keskara itirofo. Nāskaxō āto fenefo rāfimatirofo. ⁶ Akka kērofāfe Nios kīfipaikani

marakomekaspakani feronāfakefo keskara maxko itiro. Nāskakanax kērofo maxko ikanax rāfipaitirofo. Nāskakē ato iskafatirofo: “Nā kērofo chakafora,” ikaxō yoitirofo. Nāskakē kērofāfe Nios kīfipaiyanā āfe mekari yoipaikani marakometirofo. ⁷ Akka feronāfakefāfe Nios kīfipaikani askayamai āfe meka yoipai marakometirofoma Nios keskara sharamāi ikanax. Askatari Nios nikakōikanax āfe ōiti keskara shara ikafo. Nāskafakīri kērofāfe ato fene nikakōikanax shara itirofo. Nāskakē ato fenefo atoki inimitirofo. ⁸⁻⁹ Niospa feronāfake onifakī taefani. Chipō xotofake onifani. Feronāfakeōnoa Niospa xotofake onifani. Kēronoakai Niospa feronāfake onifanima. Akka feronāfakeōnoa xotofake Niospa onifani fene afara axosharanō. ¹⁰ Nāskakē feronāfake kēro tkitiro. Kērofāferi ato fene nikakōitirofo. Nāskax Nios Ifofaafō ichanāifono kērofāfe ato marakometi maitirofo ato fenefo nikakōikaxō fetsafāfe ato ōinōfo ato fenefo nikakōiaifono. Askaifono Niospa āfe ājirifāfe ato ōikakī yoitirofo iskafakakī: “Niospa yoini keskara na kērofāfe ato fenefo nikakōisharakani,” ixō yoitirofo. ¹¹ Nāskax nōko Ifo fe nō rafeax feronāfakefo fe xotofakefo nō axō faatanāsharatirofo. Akka xotofakefo iskatirofoma: “Nō feronāfakefo nō yopaima,” itirofoma. Askatari feronāfakefo iskatirofoma: “Nō xotofakefo nō yopaima,” itirofoma. ¹² Niospa taefakī feronāfake onifani, āfe ane Adán. Nāskaxō xotofakeri onifani, āfe ane Eva. Adán āfe pishi tsēkaxō Niospa onifani. Nāskatari xotofake fake feronāfake kāipakemis. Akka xotofakefoya feronāfakefo Niospa onifani.

¹³ Efe yora mīshtichi, shinākāpo. Xotofakefāfe mato fe ichanākaxō Nios kīfipaikakī marakomexoma Nios kīfikī, žaskara sharamamē? Mā ea yoitiro. ¹⁴ Mā mā tāpia feronāfake foo chainipaya nō shara ōitiro. Akka nōkai askara feyafamisma. Nāskakē feronāfake foo chainipa fatiro. Foo chainipayax rāfitiro. ¹⁵ Akka xotofakefāfe ato foo chai faafō nā marakometi shara ōitsa itirofo. ¹⁶ Akka na ē mato yoiāi keskara ea nikakaspai fetsa efe feratenāito ē afaa yoipaima. Akka nā fisti ē mato yoimis. Xotofakefo marakometiro ē mato yoimis. Nā ē mato yoimis keskarari Nios Ifofaa fetsafāfe nānorikōiri yoimisfo nā ichanāifotā.

Nios yoiti pexe anoax ichanākaxō Corinto anoafāfe afarafo chakafafono Pablo ato yoini anā askanōfoma

¹⁷ Akka afara fetsari ē mato yoipai. Mē nika Nios yoiti pexe anoax ichanākaxō mā afara chakafaito. Nāskaxō afara shara fatama mā afara chakafakōini. Nāskakē, sharafora ē mato faima. ¹⁸ Akka mē nika mato anoax fēkaxō ea yoiāifono nā mā ichanāitīa fetsafo fe mā osināxma ato fe ichanākaspaito. Nāskax mā ato ketaxamei tsaopaitiro. Mā ichanākaxō nā nōko Ifo Jesús mato nāxoni shināpaifi mā ranā mā noikaspa faatanāi. Nā ē matoōnoa nikai keskara ē chanīmara fai rakikā. ¹⁹ A mā shināi fisti anori mā shināima. Nāskarāfo yorafo a shināi fisti anori shinākanima. Nāskakē mā ranā feratenākakīma yoinānāsharakāfe tāpisharaxikakī. Fetsafāfe anori mā shināino, nāskakē fetsafāferi anorima shināi. Nāskakē yoināsharakāfe feto sharamākī. ²⁰ Ē anā mato yoisharapai. Mā Nios yoiti pexe anoax ichanākaxōkai mā pāa piyanā ayayanā a noko Jesús nāxoni mā shināima. Askatamaroko mā piāi yafi a mā ayai fisti mā shināimis. ²¹ Mē nika a mā piāi mā feaito mares pixikī ichanākaxō ato manayoxoma. A fonāikaifokai mā ato ināima. Nāskakē fonāikani. Askatari mā pāemis. Askarakai sharama. ²² Akka pipaikī ichanāti pexe ano kayoxoma ikisi mato pexe anoxō piyokāfe. Akka mato pexe anoxō piyoxomaroko nā Nios yoiti pexe ano mā femis anoxō mares pixikī a fonāikaifo ato akīxikima. Nāskakē a fonāikaifo rāfitirofo. Mā askafakī a mato fe ichanāfo mā chakafai. Mā ato noima. Ĕē matoōnoa yoisharaimē? Maa. Ĕkai matoōnoa yoisharaima māmāi ato chakafaito.

Jesús noko nāxoni shināyanā nō piyanā nō ayatiro
(Mt. 26.26-29; Mr. 14.22-25; Lc. 22.14-20)

²³⁻²⁴ Nāskakē nōko Ifo Jesús ea yoini keskara ē anā mato yoini. Ea tāpimani keskara ēri mato tāpimapai. Nōko Ifo Jesús Judaspa ato achimayoamano nā fakish fisti aōxō tāpimisfo fe ichanāyoni. Nāskaxō ato feta pikī pāa tsomaxō Apa Nios yoini iskafakī: “Epa Niospa, mī sharafinakōia. Mīfi keyokōi tāpiaki. Aicho,” fata pāa torepakexō ato tii ināni. Nāskaxō ato anā yoini iskafakī: “Na pāafi ēfe yoraki. Ĕfi matoōnoax chipō naikai mato noikōiax. Mē naano nā mā ichanāitīa nā mā pāa piāitīa ea shināfafāikāfe,” ixō ato yoini. ²⁵ Nāskaxō mā piāifono anā kecho tsomaxō ato yoini iskafakī ato ayamayanā: “Afara fena shara ē mato yoinō. Nā mā ayai ēfe imi. Nāskakē mā ea shināitiro. Ĕfe imi foyanā ē matoōnoax nai mā efe Epa Nios ari ipaxanō. Nā nō akai keskara chipō akāfe mē naano nā mā ichanāitīa ea shinākī,” ixō ato Jesús yoini. ²⁶ Nāskakē nā mā ichanāitīa pāa piyanā ayayanā Jesús shināfafāikāfe: “Nōko Ifāfe noko nāxoni,” shināyanā. “Nā pāa Jesús āfe yora,” ixō shināfafāikāfe pāa piyanā. Jesús anā oaitīa nā chanīmara faifo askapakexanōfo. Ĕ anā oaitīa nāskarax akāfe.

Ichanāifo anoxō pāa pikī nō Jesús shināitiro

²⁷ Nāskakē nā mā ichanāi anoxō mā pāa piyanā ayayanā mā Jesús shinātiro. Askafafiakīkai mātō chaka xatekaspaxō māri mā chakafai pāa pixō. Akka nōko Ifāfe noko nāxoni āfe yora omiskōiyanā āfe imi foyanā noko nāxoni. Nāskakē nō ichanāi anoxō pāa piyanā ayayanā nōko Ifoōnoa shinākima nō nōko Ifo nō chakafai. ²⁸⁻³² Nāskakē nō ichanāyanā nō pāa piyanā nō ayatiro nōko Ifo shināyanā. Akka taefakī nō shinātiro iskafakī: “Ē afara chakafamis,” ixō nō shinātiro. Akka nō afara chakafafaxō Epa Nios nō yōkayotiro nōko chaka noko soaxonō. Nāskaxō Jesús noko nāxoni nō shinākōitiro pāa piyanā. Akka nō askafayamaito Epa Niospa noko omiskōimani. Akka nā ē mato yoiai keskara atiri mā askaima. Nāskakē mā iramanai. Ranāri mā isinī iki. Nāskatari ranāri mā mā nai. Nāskakē nā mā ichanāitia pāa piyoxoma afara chakafaxō ikisi Epa Nios yoiyokāfe mato chaka soaxonō matori omiskōimayamanō. Akka noko omiskōimafiakī a Jesús Ifofaafoma Niospa ato omiskōimani keskafakī noko omiskōimasharaima. Akka afokai āfe fakefoma. Nāskaxō omiskōipakenakako mēra ato potaxii. Akka nōfi āfe fakekōifokī. Nōko Ifāfe noko omiskōimafiakī a omiskōipakenakako mēra noko potatamaroko noko omiskōimakī noko tāpimani nō nā chakafanōma.

³³ Akka mā ichanāxō pāa pixikī ranārito mā taefakī piimis. Nāskakē fetsafāfe akairi pipaikani afaa pitirofoma. Akka piyoxoma ato manayokāfe fetsafo feta pixikakī. Nāskakē mā ato manayotiro keyokōichi pitirofo. ³⁴ Akka fatora fetsa mā fonāiki ichanāyoxoma mātō pexe anoxō mā piyotiro. Nāskaxō mā ichanāxō mā ichapa piyamaino fetsafāferi pitirofo. Nāskaxō mā ichanāxō Jesús shinākī ato feta mā pisharaino Niospa mato omiskōimani. Afara ichapakōi ē mato yoipai. Nāskaxō ē matoki nokoxō atoōnoa ē mato yoisharapai.

12

Jesús Ifofaafāfe Niospa Yōshi Sharaōxō afarafo atirofo fetsafo fe axō faatanāsharaxikaki

¹ Efe yora mīstichi, afara fetsa anā ē mato yoisharapai. Niospa Yōshi Sharaōxō afarafo nō atiroōnoa ē mato tāpimapai aōnoa mā tāpisharakōinō. ² Shinākapo. Mā Jesús Ifofaamano afara fetsa onifakaxō, “Na nōko niosra,” ikaxō mato chanīmara famapaonifo. Mā chanīmara fafaino a onifafotokai afaa shinātirofoma. Askaxorikai afaa pishta mato yoitiro. Nāskakē mā anorima shināyopaoni. ³ Askata yora fetsafāfe matoki nokoxō yoitirofo iskafakakī: “Ē mato Niospa meka yoinō. Niospa Yōshi Sharaōxō ē mato yoi,” ixō mato yoiaito, ōafeskaxō mā tāpitiromē Niospa Yōshi Sharaōxō mato yoimākī? Ē mato tāpimanō afeskaxō mā tāpitiromākī. Fatora yora fetsa Jesús mekafakī chakafai, akai Niospa Yōshi Sharaōnoax mekaima. Akka, “Jesúsfi nōko Ifokī,” ixō yoi Niospa āfe Yōshi Sharaōxō yoitiro.

⁴ Nā nō Epa Nios Ifofa tii āfe Yōshi Sharapa noko amapaiyai keskara noko amai. Ares fisti noko shināmaitiro aōxō nā Nios Ifofafo fetsafo nō ato asharaxonō. ⁵ Aōxō fetsa fetsafakī afo akī nōko Ifo nō axotiro. Nā keyokōi Nios chanīmara faifo tii nōko Ifo fisti. ⁶ Nāskakē Niospa nā nō Ifofa tii noko shināmāni aōxō nō fetsafo afara axosharanō. Askatari Niospa keyokōi noko tāpimani a noko axopaiyai keskara noko axōi. Nā nōko Nios fisti anā ano fetsama. ⁷ Askatari nō Nios Ifofaito noko tāpimani āfe Yōshi Shara nofe iki. Nofe ixō noko amatiro nā Nios Ifofaifo nō ato axosharanō. ⁸ Fetsafāfe Niospa Yōshi Sharaōxō mēstesharakōi noko yoitiro. Askatari fetsafāfe Niospa Yōshi Sharaōxō tāpisharakōikī noko tāpimasharatiro. ⁹ Askatari fetsafāferi Niospa Yōshi Shara fistiōxō Nios chanīmara fakanax finakōia ikafo. Askatari fetsafāferi Niospa Yōshi Sharaōxō yorafo sharafakani. ¹⁰ Askatari fetsafāferi Niospa Yōshi Shara fistiōxō tsōa atiroma keskara faino, fetsafāferi Niospa Yōshi Sharaōxō nā Niospa yoiai keskara noko yoiaifono, fetsafāferi Niospa Yōshi Sharaōxō tāpitiro fetsa niafaka chakaōxō yoimākai askayamai Niospa Yōshi Sharaōxō yoimākai. Askatari fetsafāferi Niospa Yōshi Sharaōxō meka fetsa nikayomisma yoitiro. Askatari fetsafāfe meka fetsafāfe noko yoiaito nikafikī nō tāpiyamaito fetsafāferi Niospa Yōshi Sharaōxō noko yoisharatiro tāpinōfo. ¹¹ Nā nō Nios Ifofatifi Niospa Yōshi Shara fistichi noko amapaiyai keskara nō atiro. Nā noko amapaiyai keskara noko amatiro.

Nōfi yora fisti keskaraki

¹² Nōko yora fistifiano nō pōyayai fetsea. Askata nō feroyata, pachoyata nā nō fisti askai fetsea. Nāskarifiyai nō keyokōichi Cristo Ifofaano nā fisti keskarakōi. ¹³ Cristo fistifiano nōfi āfe pōya keskarakī. Atiri nō judeofo ikaino mani fetsafori judeofoma ikaino yorafāfe āto yonomatifo ikaino askatari yorafāfe āto yonomatifoma ikaino nō askai fetsea. Nā nō Cristo chanīmara faafo tii nō afe yora ika. Niospa Yōshi Sharapa noko ōiti fetsafaax nō mēra iki.

¹⁴ Nōko yora fistifiano nō pōyayai fetsea. ¹⁵ Nāskakē nōko tāekai yoikī iskafatiroma: “Ēkai mēkema. Nāskakē ēkai āfe afaama,” ixō yoifi nā nōko tāeri nōko yoraō nea. ¹⁶ Nāskatari nōko pachori yoikī iskafatiroma: “Ēkai feroma. Nāskakē ēkai āfe afaama,” ixō yoifi nā nōko pachori nōko yoraō nea. ¹⁷ Akka nōko yora nōko fero fistikē afeskaxō nō nikakeranama. Nāskatari nōko yora nōko pachō fistikē afeskaxori nō xetekeranama. ¹⁸ Akka Niospakai

askara noko onifanima. Nā apaiyai keskara fakī noko onifani. Mapoya fāta feroya fāta pōyaya fāta pachoya fata kishiya fāta noko fani. ¹⁹ Akka nōko yora afara fistiya ikanokai shara ikeranama. ²⁰ Akka nōko yora fistifiano nō pōyayai fetsea.

²¹ Nāskakē nōko fērokai mēke yoikī iskafatiroma: “Ē mia yopaima,” ixō yoitiroma. Māporikai tae yoikī iskafatiroma: “Ēkai mia yopaima,” ixokai yoitiroma. Nāskafakīri a Nios Ifofaa fetsafo iskafakī yoiyamakāfe: “Ē mia yopaima,” ixō yoiyamakāfe. Niospa nā Ifofafo tii noko noikōia. Nāskakēri nōa ranā noinākāfe. ²² Nōko yora āfe afara fetsafo mitsisipayamafekē nāfori nō yopakōi. ²³ Nōko yora āfe afara fetsafo, sharamara, nō fafiakī nāfori nō kexesharai. Nōko afara fetsafori nō onesharatiro nō rāfixikīma. ²⁴ Akka nōko yora āfe afara fetsa sharanō nō onetiroma. Niospa noko yora onifaxonī nō kexesharanō. Nāskaxō nō yoitiro iskafakī: “Ēfe afara ē yopakōi,” ixō nō yoitiro. Nāskafakiri fētsa a Nios Ifofaa fetsa yoikī iskafatiroma: “Nakai afama,” ixō yoifaiino Nios aō noikōi. Nāskakē noko onifani nā Ifofafo tii keyokōi nō yopakōi. ²⁵ Niospa noko onifani nā Ifofafo tii keyokōi nō kexenōnāsharatiro isharaxikī nānori fisti shināxikī. ²⁶ Akka nō fanira moxaki chachixō nō pae meetiro keyokōi nōko yora pāei fetsetiro. Nāskarīfakī Jesūs Ifofaa fetsa omiskōiaito keyokōi nōri shināmitsatiro. Nāskafakī yorafāfe Jesūs Ifofaa fetsa sharafakē keyokōi nō afe inimakōitiro.

²⁷ Akka nō Cristo yora keskarakōi. Nāskax nō āfe pōya keskarafō. Nō ichapaflix nō yora fisti keskarakōi. ²⁸ Nāskaxō keyokōi nā nō Jesūs Ifofaa tii Epa Niospa noko katoni aōxō afara fetsa nō anō. Akka fetsafori taefakī ato katoni Jesucristoōnoa ato yoifofāsafanofo. Askatari fetsafori katoni āfe meka yoimis inōfo Niospa ato shināmanaino. Askatari ato katoni ato tāpimamisfo inōfo. Askatari aōxō tsōa atiroma keskara amisfo ato katoni. Askatari Niospa Yōshi Sharaōxō a isinī ikaifo ato sharafamisfo ato katoni. Askatari fetsafo ato axomisfo ato katoni. Askatari fetsafo shara yonomamisfo ato katoni. Askatari fetsafāfe āfe Yōshi Sharaōxō meka fetsapa yoiyomisma ato katoni ato yoinō āfe mekapa. Noko keyokōi katoni aōxō yorafō nō axosharanō. ²⁹ Niospa keyokōi noko katoni a apaiyai keskara nō anō. Akka noko askafafianino keyokōichi Jesucristoōnoa nō ato yoifofāsafamisma. Askaxori keyokōi noko katonima āfe meka yoimisfo nō inō. Askaxori keyokōi noko katonima aōxō ato tāpimamisfo nō inō. Askaxori keyokōi noko katonima tsōa atiroma keskara aōxō afama mīshti nō fanō. ³⁰ Keyokōi noko katonima Jesūsō isinī ikaifo ato sharafamisfo nō inō. Keyokōi noko katonima nā meka fetsapato āfe Yōshi Sharaōxō nō ato yoinō. Keyokōi noko katonima nā meka fetsa nixaxō nā yoia keskara nō ato tāpimanō. ³¹ Nāskakē Niospa mato imapaiyai keskara ixō nā Jesūs Ifofafo mā ato shara faxotaifai. Niospa Yōshi Sharapa mato amapaiyai keskara nāfo fichipaikāfe. Akka nāfo sharafiano ē mato afara fetsa sharafinakōia iskaratūa ē mato yoinō. Ea nīkasharakapo. Shara finakōia Niospa noko imapaiyai keskara ē mato tāpimanō, a noko Niospa noiai keskari fakī nōri fetsafo noisharakōinō.

13

Nō fetsafo nōisharakōitiro

¹ Ēfe mekapa ē yoifitiroxakī, yora fetsafāfe mekapari ē yoifitiroxakī, Niospa āfe ājirifāfe mekapari ē yoifitiroxakī ē Niosxō yorafō noiyamax ēkai afaa itiro. Nāskax ē mekai achakōi itiro, fetsafo fekaxtefai keskara ē itiro. Nāskafakī ēa ē fetsafo axomis keskara ē itiro. ² Niospa meka ē ato yoifiki ē ato noiyamax ēkai afaa itiro. Askatari fetsafāfe Niospa meka tāpiyamaino akka ē tāpikōifixō ē ato noiyamax ēkai afaa itiro. Askatari ē Nios chanimara fakī finakōixō ē Niosxō ē nā machi xekafitiroxaki ē yorafō noiyamax ēkai afaa itiro. Ē ato noiyamaino Niospa ea shara ōima. ³ Nāskatari ē afama mīshti nā afaamaisfo keyokōi ē ato ināfixō ē ato noiyamax ēkai afaa itiro. Askatari Niospa meka shara ē ato yoiaito ea nikakaspakakī ea koaifono ē atoōnoax nafiakī ē ato noiyamax ēkai afaa itiro. Ē ato noiyamaino Niospa ea shara ōima.

⁴ Nō yorafō noikōiaino noko fekaxtefaifono nō atoki ōitifishkitiroma, nō tenetiro. Nāskaxori nō ato noikōikī nō ato axosharatiro. Askaxori nō ato noikī nō xītipaitiroma. Askatari kaka-paimis nō itiro. Nō yorafō noikōikī nō iskatiro: “Ē tāpikōia. Ē fetsafo keskarama,” ixō nō yoitiroma. ⁵ Nāskaxori nō ato noikōikī nō ato rāfinīfaima. Askaxori nōa apaiyai keskara fistic nō shinātiroma. Akka nō fetsafori nō ato axosharatiro. Askaxori nō ato fena feratemisma nō itiro. Nāskaxori noko fētsa chakafakī mekafaino nō shinātaifatiroma. Afo shinātamarako nō aō noisharatiro. ⁶ Askaxori nō ato noixō fetsafāfe afara chakafaito ōi nō inimatiroma. Akka afara chanimakōi shara nikai nō inimakōitiro. ⁷ Askaxori afara afe keskararafiaino nō Nios noikī nō shināchakatiroma. Nō tenetiro. Askatari ato noikōikī atoōnoa afara chaka yoiaifono nikakī nō chanimara fatiroma. Akka fetsafoōnoa chaka nikafixō nō tāpixoma, “Afaa chakafayamapainōfōra,” ixō nō shinātiroma ato noikī.

Askatari a mēxotaima chakafaifoōnoa atoōnoa nō yoitiroma iskafakī: “Nāfāfe mēxotaima afara chakafaifono Niospa ato chaka soaxotiroma,” ixō nō yoitiroma. Askatamaroko nō iskafatiro: “Nios Ifofakakī āto chaka xatetiromo,” ixō nō shinātiro ato noikī. Nāskaxori afara afe keskararafiaino nō Nios noikī nō kachikiri fatiroma.

⁸ Nā Jesūs Ifoafaifāfe Epa Nios yafi yorafo ato noipakenakafo. Askafiaino nōko mai keyoaino Niospa meka yoimisfāfe anā ato yoixikanima. Askaxori a yōra mekapama meka fetsapa yoimisfāfe anā meka fetsapa yoixikanima. Askaxori nā tāpimamisfāferi anā noko tāpimaxikanima. Mā nōko Ifo nokoaino nō anā ato yopaxiima noko axonōfo. ⁹ Nāskakē iskaratīa Niospa noko tāpimanai keskara nō tāpisharayoama. A Niospa meka noko yoimisfāfe keyokōi tāpisharafoma. ¹⁰ Mā Jesucristo nokoaino nō a keskara shara ixii. Aatofi keyokōi tāpiaī. A tāpia keskara nokori tāpimaxii.

¹¹ Akka ē yomeax ēfe meka fāke meka keskara ē iyopaoni. Fakefāfe metiro keskarari ē meyopaoni. Fakefāfe shinātiro keskarari ē shināyopaoni. Iskaratīa mē yoixō fakefāfe shināi keskara ē anā shināima. Fakefāfe ichapa tāpiana. Akka ē iskaratīa mē yoixaf fakefo keskara anā ē ikima. Iskaratīa ē feronāfakekōi ē anā fakefo keskarama. ¹² Feisiti fetakōikē nōko femānā nō ōisharatiroma. Nāskarari Jesūs nō ōitiroma afe keskara ikamākī. Akka nā oaitīa nō ōixii afe keskaramākī. Akka iskaratīa nō tāpisharayoama. Akka Jesūs oaino nō tāpisharakōixii. Jesūs noko tāpikōia keskarari nōri tāpikōixii. ¹³ Iskaratīa nō Nios chanīmara fai. Nō Nios chanīmara faxō nō manai nā oaitīa afe ipaxakī. Nō Nios chanīmara fai nā shara. Askatari afe ipaxakī nō manaino nāri shara. Askatari nō fetsafo noikōia nāfi sharafinakōiaki.

14

Niospa Yōshi Sharapa noko amapaiyai keskara anā Pablo yoini

¹ Nā Niospa noko noiai keskafakī fetsafori noitaifakāfe. Nāskara sharakōi. Nāskara fichipaikāfe askaxikakī. Askatari Niospa Yōshi Sharapa afara fetsa mato amapaiyai keskara nō fetsafo fe axoshara faatanānō, afori fichipaikāfe. Niospa Yōshi Sharaōxō nā Niospa meka mā ato yoinō fichipaikōikāfe. ² Askatari fētsa Niospa Yōshi Sharaōxō meka fetsapato yoikī yorafo yoitama Niosroko yoitiro. Niospa Yōshi Sharaōxō yoifaitekai tsōa tāpitiroma. ³ Askatari fētsari Niospa meka shara noko yoikī noko tāpimasharatiro nō Jesūs Ifofasharanō. Askata nōko ōiti noko fepeaxosharatiro nōko ōiti mēra nō inimanō afara afeskarafiaino. ⁴ Askatari fētsa Niospa Yōshi Sharaōxō meka fetsapato yoikī āa metiro āfe ōiti fepeaka keskara. Askatari fētsa nōko mekapa Niospa meka shara noko yoisharaito nō keyokōichi nikatiro. Nāskakē Niospa noko yoiyai keskara nikasharax nōko ōiti fepeaka keskara shara nō itiro.

⁵ Mā keyokōichi nā meka fetsapato Niospa Yōshi Sharaōxō mā yoipainō. Nāskara sharafiano akka fētsa māto mekapa mato tāpimasharai nāfi sharafinakōiaki. Akka fētsari meka fetsapato mato yoiaito mā nikatiroma tsōa mato yoyamaino. Akka nā mato yoiyai keskara fētsari mato tāpimatiro mā tāpinō. Nikai māto ōiti fepeaka keskara shara itiro. ⁶ Efe yora mīshitchi, meka fetsapato ē mato yoiaito mā nikayamax nā mekakai mātonā afama. Nāskakē nā ē mato yoiyai keskara Niosxō māto mekakōichi ē mato tāpimatiro Niospa mato yoipaiyai keskara mā tāpinō.

⁷ Shinākāpo, meka fetsa ē mato yoinō. Xāiti anorima maneaito nō nikasharatiroma fatomākī xafakīa maneaifo. ⁸ Askatari soraro fētsa nā kexemisto āfe pōōiti pōōatiro āfe sorarofo itipinīsharanōfo ato reteifoxikakī. Askafafiakī pōōasharamano tsōa tāpitiroma. Nāskakē tsoa itipinīsharatiroma ato reteifoxikakī. ⁹ Askatari meka fetsapa mā fetsafo yoiaino afeska faxōkai mā yoiyai keskara tsōa tāpitirofoma. Mā askara mekapa mekai māākōi mā mekai tsōa mato nikayamafaiaino. ¹⁰ Akka nā maitio ikafo meka fetsapa mekani. Akka nō ato nikatiroma. Āto kaifāfe meka fisti nikatiromo. Nāskax keyokōi meka shara. ¹¹ Akka ēfe mekapa ē ato yoiaito yora fetsafāfe tāpitirofoma. Ēkairoko āto kaifāfe mekapa yoiaito ea nikafo. Akka ē āto meka tāpiamax ē āto kaifo keskara itiro. ¹² Nāskakē Niospa Yōshi Sharapa mato afara fetsa amapaiyai keskara nāfo mā fichipaikōitiro. Mato askafaino aōxō nā Jesūs Ifofafo mā ato ōiti fepeaxosharakōitiro Jesūs Ifofasharanōfo. Nāskara fichipaikāfe Nios yonosharaxoxikakī.

¹³ Nāskakē Niospa Yōshi Sharaōxō meka fetsapato yoikī Epa Nios kīfikāfe nā mā yoiyai keskara mato tāpimanō. Mā tāpisharaxō atori mā ato tāpimatiro akairi nikakōisharanōfo. ¹⁴ Nāskakē Niospa Yōshi Sharaōxō meka fetsapato nō Nios kīfikī nōko shināmā shināxō nō kīfima. ¹⁵ Akka Niospa Yōshi Sharaōxō meka fetsapato ē Nios kīfitiro. Askatari yorafāfe mekakōichiri ē Nios kīfitiro keyokōichi nikanōfo. Askatari meka fetsapa fanāitiro. Askatari yorafāfe mekapari ē fanāitiro keyokōichi nikanōfo. ¹⁶ Mā Niospa Yōshi Sharaōxō meka fetsapa Epa Niosnoa mā yoifaifo afeskakōi a mato fe ichanāfāfe yoitirofoma iskafakakī: “Chanīmakōi mā yoi,” mato fatiروفoma tsōakairoko māto meka tāpixō. ¹⁷ Mā meka fetsapato

Nios aicho fafiakī fetsafo mā ato ōiti fepeaxosharatiroma mato nikafiaifono māmāi meka fetsapato yoikī. ¹⁸ Efe yora mīshitchi, Niospa Yōshi Sharaōxō yōra mekapama meka fetsapa mato finōinīfōfāta ē yoimiskī. Nāskakē ē Epa Nios aicho fai. ¹⁹ Askafia a Jesūs Ifofaafoya fetsafori ē āto yoipai ea nikanōfo. Ichanāti pexe anoxō ato ichanāfaxō āto mekakōichi ē ato yoipai meka ichapama ē yoifiaito. Nāskarafi sharakī. Akka yōra mekapama meka fetsapa ē ato yoiaito ea nikatirofoma meka ichapa ē ato yoifiaito. Nāskakē mekakōichi ē ato yoipai ea nikanōfo.

²⁰ Efe yora mīshitchi, ē mato tāpimapaiyai keskara tāpisharakāfe. Fake yomē tāpisharayoxoma, shināsharatiroma. Nāskarifakī fake yomē shināi keskara shināyamakāfe. Mēstekōi shinākāfe. Akka yora xinifāfe chaka shinātirofo. Akka fake yomefāfekai chaka shinātiroma. Nāskakē fake yome keskara ikāfe. Afara chaka tāpipaiyamakāfe. ²¹ Isaías Niospa meka yoikī keneni iskafakī:

Nā israelifo ē ato yoifiaito ea nikakaspamisfo. Nāskakē ē ato kaxpakōi yoimis. Nāskaifāfe ōikī āto kaifoma ē atoki nīchikē, āto mekapa ato yoiaifāfe ato nikakanima meka fētsapamāi yoiafono. Ato yoifiaifonokai ato nikakanima,

ixō Isaías kirika keneni Niospa meka yoikī. ²² Nāskakē yōra mekapama nō meka fetsapa ato yoiaito a Nios Ifofaafāfema noko nikatirofoma. Nāskakē Niospa ato ōimani afāfekai Niospa meka tāpitirofo. Akka Nios Ifofaafāfema fayamakaxō. Akka Nios Ifofaafāfē Niospa meka tāpitirofo. Askata ichanāxō āto mekakōichi nō ato Niospa meka yoiaino Niospa Yōshi Sharaōxō nikasharatirofo. Akka nā chanīmara faafāfema nikasharakanima āto mekakōichi nō ato yoifiaito. ²³ Nāskakē ichanāx yōra mekapama meka fetsapa mā mekaino a Nios chanīmara faafoma fe a mato fe yoramafori mato fe ichanāxō mato nikakakī shinātirofo iskafakakī: “Ōikapo, nā yorāfo nā afaa shināifoma keskarafo,” ikanax yoinātirofo. ²⁴⁻²⁵ Nāskata mā ichanāxō Niospa meka mā yoisharaito a Nios chanīmara faafoma fe a nofe yoramafori mato nikakaxō āto ōiti mēraxō shinātirofo iskakakī: “Ooa, nōri Niospa yoiai keskara nō amisma. Niospa keyokōi tāpikōia. Nōko shinā mēraxō nō afara pishta fomāpaimisfo Niospa tāpikōia. Chipō noko kāimaxoxii,” ixō shinātirofo. Nāskaxō shinātirofo Niospa meka mēstesharakōikī. Anori shinākakī ratokonō mai chachixō Epa Nios kīfitirofo iskafakakī: “Epa Niospa, mī sharafinakōia. Na mia chanimara faafo fe mī ika keskai nōri mefe ipai,” ixō kīfitirofo.

Pablo ato yoini nō ichanāx nō afeskatiromāki

²⁶ Efe yora mīshitchi, ē mato yoipai iskafakī ē mato tāpimapai. Mā ichanāino fētsa mato fanāixotiro. Fētsari mato Niospa meka yoitiro. Fētsari Niospa Yōshi Sharaōxō meka fetsapa mato yoitiro. Fētsari Niospa Yōshi Sharaōxō a meka fetsapato mato yoiaifo mato tāpimatirofo. Nāskakē nā ē yoiai keskara asharakāfe. Nāskax mā ranā mā ōiti fepeasharatiro. ²⁷ Mā ichanāino yora ichapama a yōra mekapama meka fetsapa mekapai mekatirofo. Nāskakē fetsa mekai taetiro. Askatari fetsari chipo mekatiro. Akka meka fetsapato mato yoiaito fētsari mato mekapa xafakīa mato tāpimatiro a mato yoiai keskara mā nikasharanō. ²⁸ Akka yōra mekapama meka fetsapato mā yoipaiyaito tsōa nikatiroma. Akka a ato tāpimatirofo ano ikafomano meka fetsapa mā ato yoitiro. Akka mato pexe anoax mares fisti mā mekatiro yōra mekapama Epa Nios fe.

²⁹ Mā ichanāino nā Niospa meka yoimis rafeta Niospa meka mato yoitirofo. A yoiai keskara nikakaxō nā Jesūs Ifofaifāfe shinātiro iskafakakī: “Niospa Yōshi Sharaōxō noko yoi,” askayamai, “Āa shināxō noko yoirā,” ixō shinātirofo. ³⁰ Askaxō fētsa Niospa meka mato yoioyaino fetsari tsaano Niospa Yōshi Sharapa shināmanaino mato yoipaikī yoitiro. Akka a taefakī yoiaito tsaoxō nikatiro. ³¹ Nāskakē Niospa Yōshi Sharapa mato shināmanai keskara fētsa yoikī taefatiro fētsari chipo yoitiro. Askatari fētsari yoitiro. Nāskaifono nā ichanāfāfe keyokōichi ato nikatirofo. Nāskaxō ato ōiti fepeaxosharakanī. ³² Nā Niospa meka ato yoiaito āfe shinā mēraxō shinātiro iskafakī: “Fētsari ato yoipai kiki ikax xatetiro.” ³³ Askaxō ichanāxō rafekaita ato yoiaifono tsōa ato nikasharatiroma. Nāskakē ato ōiti fekaxtefatirofo. Askarakai Niospa fichipaima. Akka Niospa fichipai nā ichanāfo anoxō rafekaita ato yoiyamaino fistichi ato yoinō nikasharakōinōfo.

³⁴ Askatari afara fetsari ē mato yoisharapai. Nios Ifofaifo ichanāifo anoax xotofakefo mekatirofoma. Niospa meka yoimisto yoiaino xotofakefāfe nikkōitirofo. Mekatamaroko nā Niospa meka yoiai keskara nikasharaxikakī. Nānori taeyoi Niospa meka yoikakī kirikakī kenenifo. ³⁵ Nā ichanāxaxō nikafo keskara xotofakefāfe tāpisharaxoma āto fene yōkapaikakī manayotirofo. Akka āto pexe ano nokokaxō āto fenefo yōkatirofo āto fenefāfe ato tāpimanō. Nāskakē mā ichanāino xotofakefo mekaifokai sharama.

³⁶ Akka Epa Niospa yoipaiyai keskara mato fisti taefakī tāpimanima. Niospa meka yoimisfo matoki fisti fenifoma Niospa meka yoifekani. Fetsafori yoifekani fenifo. ³⁷ Akka fatora fētsa mā yoikī iskafatiro: “Nō Niospa meka ato yoimis. Askatari nō Niospa Yōshi Sharaōxō nā Nios Ifofaifo nō afara fetsa ato axosharatiro,” ixō mā yoikī mā tāpitiro

nā ē mato kenexonai keskara nōko Ifāfe mato yoiā mā anō. ³⁸ Fētsa anorima mato yoiāto nikayamakāfe. ³⁹ Nāskakē efe yora mīsttichi, nā mā ichanāi anoxō Niospa meka ato yoiipai kāfe. Nā sharakōikī. Akka fētsa yōra mekapama meka fetsapa Niospa Yōshi Sharaōxō mato yoiyaiyāto xatemayamakāfe. ⁴⁰ Akka mā ichanāino fētsa taefakī yoiitiro. Askatari fētsari chipo yoiitiro nā yoiāifo keskara mā nikasharakōinō. Mā askaino māto ōiti fekaxteima.

15

Cristo nafīax anā otoni

¹⁻² Efe yora mīsttichi, iskaratīa meka shara Jesúsnoa ē mato yoisim keskara ē anā mato shināmapai. Ē mato Jesúsnoa yoiāino mā chanīmara fani. Mā chanīmara faito Jesús mato chaka soaxoni mā afe ipaxanō. Akka ē mato yoini keskara mā kai kachikiri famisma. Akka mā kachikiri faino ēa kaxpa mato yoiikerani.

³⁻⁷ Yorafāfe ea meka sharafinakōia yoiyonifo. Nāskakē ēri mato yoini iskafakī: Cristo noko nāxonni nōko chaka noko soaxoxiki. Akka Cristo tres nia maiyoni. Askata anā otoni. Mā otoax Pedrokī nokoī taeni. Nāskatari chipo a aōxō tāpimisfokiri nokoni. Askatari nā chanīmara faafoki yorafā rasifokiri nokoni. Akka fisti rasi nāpaifono, akka ranāri nanifoma. Nāskatari chipo Santiagokī nōko Ifo nokoni. Askatari a aōnoa āfe meka yoisimfokī nokoni.

⁸ Akka chipokōi ekeki Jesús nokoni. Ē kai aōnoa afaa tāpiyopaonima. Akka fetsafāfe mēxotaima nikayopaonifo. Nāskakē chanīmara fakī taefanifo. Akka ē afe niyopaonima taeyoi a fetsafo ikai keskai. Ē askafaino ea Jesús katonni chipo. Ekeki nokoxō ea yoiāito ē koshi Ifofani. ⁹ Akka ē chakafayopaoni keskara Jesús Ifofaa fetsafāfe chakafamisfoma. Akka ē afara chakafakī finayopaoni. A Jesús Ifofafo ē ato omiskōimayopaoni. A afe yorafo ē chakafayopaonifikē Jesús ea noikī ea nīchini aōnoa ē ato yoinō. ¹⁰ Niospa ea noixō ea katonni a apaiyai keskara ē anō. Nāskakē nā ea amapaiyai keskara mē amis. Akka ea kaxpakōi katonima. Nā aōxō yonoxomisfo keskafakī ē yonoxokī finakōimis. Akka ēakōi ē yonoxomisma. Ea noikī Niospa ea katonni ē Jesús yonoxomis inō. ¹¹ Akka ē Jesúsnoa yoisim iyamai fetsafāfe mato Jesúsnoa yoisim itirofo nānori fisti nō mato yoisim. Nāskakē nā Jesúsnoa fisti nō mato yoisim keskara nikakī mā mā Jesús chanīmara faa.

Namisfo otoxikani

¹² Nō mato yoisim iskafakī: “Cristo noko naxōfinixakī mā anā otoni,” ixō nō mato yoisim. Akka, ōafeskakī atiritō mā yoiikī iskafamismē? “Yora naax anā ototiro,” ixō mā anorima yoisim. ¹³ Akka yora naax ototirokēma Cristori otokeranima. Akka nō tāpia yora naax ototirokē nāskakē Cristo otoni. ¹⁴ Akka Cristo otoyamanikē kaxpa aōnoa nō mato yoiikerana. Nāskakē kaxpakōi mā chanīmara fakerana. Akka chanīma Cristo naax otoni. ¹⁵ Akka Cristo otoyamanikē nō mato pārakerana. Akka nō mato yoisim iskafakī: “Epa Niospa Fake Jesús otofani,” ixō nō mato yoisim. Yora naax ototirokēma Epa Niospa Cristo otofakeranima. ¹⁶ A naafo otoyamaino Cristori otokeranima. ¹⁷ Cristo otoyamanikē kaxpakōi mā chanīmara fakerana. Māto chaka mato soaxokeranama. ¹⁸ Akka Cristo otoyamanikē kai nōri naax nō otokeranama. Askax nō afe nīpakeranama. ¹⁹ Nono mai anoxō niyoxō nō shinākī iskafakerana: “Ē naax Cristo otoni keskai ēri ototiro ea Niospa otofaano,” ixō nō shināfiāx Cristo otoyamanikē nāskakē kaxpa nō chanīmara fakerana. Akka Cristo otoyamanikē chanīmayamakē, “Afaa tāpiafoma,” noko fakeranafo nokoōnoa shināchakakōikeranafo.

²⁰ Akka chanīmakōi, Cristo otōi taeni. Anā naxiima. Nāskakē Cristo otonino nā chanīmara faafo nakanax otoxikani afe ipaxakakī. ²¹⁻²² Akka Adán Niospa onifakī taefani. Adán taefakī afara chakafani. Nāskakē afara chakafaax nani. Akka nā feronāfakeōnoax keyokōi nāpamisfo. Nāskarifiāi nā feronāfake Cristoōnoax nā chanīmara faafo ototirofo afe nīpaxikakī. ²³ Cristo otōi taeni nīpaxakī. Nā anā oaitia keyokōi afe yorafo otofaxii afe nīpaxanōfo. ²⁴ Nāskatari nono mai anoāfo keyoxikani. Nāskatari Cristo keyokōi xanīfofo potaxii anā xanīfo inōfoma. Askatari niāfakafāfe āto xanīfofori potaxii. A niāfakafāfe āto xanīfo finakōiari potaxii. Cristo ato potano anā ato yonomapakenakafoma. Nāskaxō Cristo Apa Nios yoiikī iskafaxii: “Mā yorafo keyokōi āto xanīfo mī itiro. Ē anā āto xanīfo ikima,” ixō Apa yoiixii. ²⁵ Akka iskaratīa Cristo nōko xanīfo iyoa. Nā xanīfo fetsafo a Cristo nikakaspaifo Niospa anā ato afaa imaxiima. Cristo nāmāri ato nīchixii. Nāskatari Epa Nios xanīfokōi ipanaka. ²⁶ Akka Niospa Satanás omiskōipakenakafo mēra potaxii. Akka nā Satanás Adán afara chakafamanino keyokōichi nō afara chakafaax nō napanaka. Nāskakē Niospa Satanás omiskōipakenakafo mēra potano anā tsoa nanakama. ²⁷ Nāskaxō Niospa āfe Fake Cristo nāmāri keyokōi ato nima. Akka mā nō tāpia Apa Nios fisti āfe Fake nāmā ikama nāatomāi nāmā keyokōi ato nimax. ²⁸ Keyokōi Niospa Fake nāmā ikafono Apaōxō ato yonomatiro. Nāskaxō āfe Fāke Apa yoiixii iskafakī: “Epa mūri ea yonomatiro,” ixō yoiixii. Nā

Apa yoi ai keskara nikasharakōi. Nāskakē Apa Nios fistichi keyokōi yonomaxii āto xanīfo finakōimāiaxō.

²⁹ Akka yora maotisamisma naano fētsa maotisaxotiro. Nāskara mā feyafamisfo. Akka yora naax otoyamanikēkai tsōa ato maotisanoxokeranama. Tsoa otoyamanikē nōri ototiro. Akka, ŷafeskai nō maotisaxonimē nō otoyamafi? Akka nō tāpia mā nō naax nō anā otoxiai. ³⁰ Akka tsoa otoyamanikēkai ēri otokeranama. Nāskakē, ŷafeskai mēxotaima Cristoōnoax mesekōi mēra ē kafāsaimē ē otoyamafi? Akka ē tāpia a ē otoxiai. Nāskakē mēxotaima ē Cristoōnoax mesekōi mēra kafāsai Cristoōnoa ato yoifofāsafai. ³¹ Nāskakēri ē fetsafo matoōnoa yoisharamis māmāi eōxō nōko Ifo Jesucristo mā Ifosharafaino. Efe yora mīshtichi, chanīma ē mato yoi mēxotaima Cristoōxō ea retepaikani. ³² Poomānā noko pipaiyai keskara nā Efeso anoafāfe ea retepainifo, a Cristo nikakaspaifāfe. Akka Cristoōnoax ē naax ē otoyamax kaxpa ē aōnoax nakerana. Askatari ē ato Cristo Ifofamano nakanax tsoa otoyamaino kaxpa ē ato Cristo Ifofamakerana. Nō naax anā otoyamafixiakī nā nō apaiyai keskara nō anōkāfe. Nāskakē fetsafāfe yoikakī iskafakani: “Nō nayoxoma nō piyanā nō ayayoi inimayanā. Nō Nios shinātama nā nō apaiyai keskara nō ayoi,” ixō shinākani anorima. Akka nō naax nō anā otoxii. Nāskakī nō nayoxoma Niospa noko amapaiyai keskara nō anōkāfe.

³³ Niosnoa yora chakafāfe mato pāramisfo. ato fe rafeyamakāfe. Yora chakafo fe mā rafeaito matori afara chakafamatirofoki. ³⁴ A mā anorima shināmis anā shināyamakāfe. Chakafakī xatekāfe. Atiritokai mā Nios tāpisharama. Nāskax mā rāfipaitiro.

Nō naax anā nō otoaitia nōko yora fetsa keskara ixii

³⁵ Akka yoikī iskafakani: “ŷAfesaxō Niospa naafo otofaxiimē? ŷAnā nō otonō afe keskara yoraya noko imaimē?” ixō yoikani. Anori yoikakī afaa shinākanima. Akka shara shināsharakakī tāpitirofo. ³⁶ Nō ifi exe fanano āfe xaka payokometiro. Akka āfe exe oke mēranoa pishta payokometiroma chipo foaitiro. Maiax āfe exe xaka naamax āfe exe pishta foaitiroma. ³⁷ Akka nō afara fanakī nō āfe kayafoya fanatiroma. Āfe exe fisti nō fanatiro. Mā āfe xaka payokomeaino āfe exe foaitiro. Nāskax mā foaikax anā āfe exe keskara itiroma. Fetsa keskara itiro. ³⁸ Nā ifi exe nō fanano Niospa foaimasharatiro. Nā apaiyai keskafakī panafo fetsa fetsatapafo fai.

³⁹ Akka nōko yorari yoināto yora keskarama. Nōko yora fetsa keskara. Yoinānā fetsa kesarafono peyafonāri fetsa kesarrafo. Foenāri fetsa kesarrafo. Akka nā yora fisti keskara Niospa noko onifanima, fetsa fetsatapafo Niospa noko onifani. ⁴⁰ Akka nōko mai anoafāfe āto yorāfo fetsa kesarrafo. Askatari Epa Nios ari anoāfori nai mēranoafāfe āto yorāfori fetsa kesarrafo. Keyokōi sharafix askarafoma. ⁴¹ Akka xini ikaino oxe ikaino fishifo ikaino nā yora fisti keskarama fetsa kesarrafo. Nāfo sharafix askarafoma.

⁴² Nāskarifi ai yora naino āfe yora payokometiro. Anā nō otoaxkai nōko yora payokome-nakama. Nāskara shara nō ipanaka anākai nō nanakama. ⁴³ Nōko yora maia anoax chakakōi ixii. Akka nō otoax sharakōi nō ipanaka. Nō nono mai ano niyoax nō iramanapakeax nō natiro. Nō anā otoaxkai nō anā nanakama, mitsisipa shara nō ipanaka. ⁴⁴ Nō naano noko maifafono nōko yora payokomei. Akka nō otoano Niospa noko nimaxii afe ipaxanōfo. Akka nō mai ano niyoax nō natiro. Akka mā nō naax anā nō otoax nōko yora fetsa keskara ixii. Nō anā nanakama. ⁴⁵ Niospa meka yōra kenekī iskafani: “Feronāfake Adán Niospa onifakī taefani. Onifaxō xāka ikai fani,” ixō yōra kirikaki keneni. Akka Cristori Adán keskara feronāfake. Feronāfakekōixō noko nimapakenaka. Nō naax anā otoax nō anā natiroma. ⁴⁶ Niospa feronāfake Adán onifakī taefani. Chipo Cristori kāini noko nimapakexakī. ⁴⁷ Niospa nā feronāfake Adán onifakī taefani. Mai yorafaxō onifani. Akka Cristo nai mēranoax nokoki fotonī. Tsōakai Cristo onifanima. ⁴⁸ Akka nono mai anoax nō kāiax nōko yora Adán yora keskara. Nō Jesús Ifofaax nā keskara nō ixii. ⁴⁹ Nō nono mai anoax fake kāini. Nāskax nō Adán kesarakōi. Askatari nō Niospa yora ikax nō Jesucristo kesarakōi ixii.

⁵⁰ Efe yora mīshtichi, ē mato yoinō nō afesxax iximākai. Nō iskaratīa namiya. Askatari nō imiya. Nāskara yorayax Nios fe nō ipanakama. Akka nōko yora natiro nō anā otōixiakī. Nō anā otoax nōko yora fetsa keskara ixii. Nāskakē nō anā nanakama. ⁵¹ Tsōakai nikayomisma na meka shara ē mato yoi. Tāpipaikī ea nikasharakāfe. Akka nōkai atiri naima. Askafix nō keyokōi fetsa keskara iki fetsexii. ⁵² Jesús anā oaino āfe ājirinī āfe maneti maneaino Jesús chanīmara faafo, a nayoamafo, fetsa keskara itaxikani. Fetsoitanai kesaratāxikani fetsa keskara itāxikani. Askatari Jesús chanīmara faax namisfori otorisatāxikani. Nāskakē keyokōi Jesús chanīmara faafo tii fetsa keskara ixikani. Askax anā nanakafoma. ⁵³ Nō iskaratīa naino nōko yora payokometiro. Askafano Niospa nōko yora noko fetsafaxoxii nō anā nanōma, nō afe nīpaxanō. ⁵⁴ Nānori Niospa meka yoikakī kirika kenenifo. Nā yoinifo keskara chanīmakōi ixii. Iskafakakī kirika kenenifo yoikakī: “Aicho. Anākai Niospa

yorafo nanakama. Cristoñoax nō afe isharapakenakaki,” ixō kirika kenenifo. ⁵⁵ Askatari kenenifo iskafakī: “Anākai afanā noko namatiroma. Anākai nō nai omiskōinakama,” ixō kirika kenenifo. ⁵⁶ Nō afara chakafamisnoax nō nai nō omiskōitiro. Nāskakē nā Moisés noko yoinioxō nō tāpitiro afara chakafaax nō natiro. Naax nō omiskōixii. ⁵⁷ Akka Jesucristo noko nāxoni noko chaka soaxoxiki. Nāskakē nō Jesucristo Ifofaax nō nafiāx nō anā otoax nō anā nanakama. Nō afe nīpanaka. Nāskakē nō Epa Nios aicho fai.

⁵⁸ Akka efe yora mīshtichi, afara fetsa shināyamakāfe. Niospa noko imapaiyai keskara nā fisti shināsharakāfe. Jesús Ifofasharakāfe. Nōko Ifo Jesús yonoxosharafafāikāfe. Mā mā tāpia nōko Ifoōxō nō yonoai kaxpa nō yonomisma, nōko Ifomāi noko amakē. Nāskakē nō aōxō ato axosharatiro nō kaxpa ato axōima.

16

Nā Nios Ifofaafāfe kori ichafaxō Nios Ifofaafō fetsafo fomani

¹ Iskaratīa mā ea yōkaita, afara fetsa kirikaki kenexō ē mato yoi. Nios Ifofaafō Jerusalén anoafō afaamais. Ato noikī mā ato afara fomatiro. Akka nā Nios Ifofaafō Galacia anoafō ē ato yoia keskara ē matori yoipai nā afaamaisfo afarafo mā ato ināsharanō. ² Nomikotīa ichanāi mā kori ichafaxō chipo Jerusalén anoafō mā ato fomatiro. Yonoxō kori fīta atiri mā ato inātiro. Akka mā kori ichapama fixō ichapamari mā ato inātiro. Akka mā ichapa fixō ichapari ato inākāfe. Nomikotīa ichanāi mā kori ichafatiro, ea manakima kori ichafayokāfe. Nā ē matoki nokoaitīa mā anā kori meketiroma. Nā kori mā ichafaa nā Jerusalén anoafō afaamaisfo mā ato fomatiro mē Corinto ano matoki oano. ³ Nāskano feronāfake sharakōifo katokāfe afāfe nā afaamaisfo ato kori foxotanōfo Jerusalén anoafō. Nāskatari ē Corinto ano nokoxō Jerusalén anoafō ē kirika kenexō ē ato fomanō. Nā feronāfake sharakōifāfe ato foxotanōfo. Akka nā feronāfakefāfe nofeta Jesús Ifofaafō. Nāskakē ato ifisharakāfe ixō ē kirika kenei nā feronāfakefo sharakōifāfe foxonōfo Jerusalén anoxō Jesús Ifofaafāfe ato tāpinōfo. ⁴ Niospa ea nīchipaiyaino nā feronāfakefo mā katoa efe fotirofo.

Pablo Corinto ano kapaikī ato yoini

⁵ Ē Macedonia finōfainikai ē matoki Corinto ano nokoikai. ⁶ Ētsa, ē ano mato fe samaraka pishtayotiro rakikīa. Askayamai ē mato feta mechaka fisti finōyotiro rakikīa. Nāskakē ē matoki nokoaino mā ea axosharayotiro. Askatari mē kaino mā ea nīchitiro ē kasharatanō. ⁷ Ēkai mato finōfaipaima. Niospa ea nētefayopaiyaino ē mato ano nēteyotiro. ⁸ Askafīax ē nono Efeso ano iyoi nā nōko fista āfe ane Pentecostēs ikaitīa. ⁹ Nonoxō yorafāfe nōko Ifoōnoa nīkapaikani. Nāskakē ē nonoxō nōko Ifoōnoa ē ato yoisharayoi chanīmara fanōfo. Ē nōko Ifoōnoa ato yoifiaito atirifāfe ea xatemapaikani ē Jesúsnoa yoiamanō.

¹⁰ Akka ē nōko Ifo yonoxomis keskafakī Timoteori nōko Ifo yonoxomis. Nāskakē matoki Timoteo nokoaino kexesharakāfe akiki inimayanā. ¹¹ Nāskakē, “Mī afaamara,” fayamakāfe. Nāskax mato anoax ekeki oaino nīchisharakāfe inimayanā ekeki nokonō. Nios Ifofaa fetsafo fe ekeki nokoyonō ē anā ato fe rafesharanō.

¹² Askatari iskaratīa nofe yora Apolosōnoa ē mato yoi. Ē Apolos yoia iskafakī: “Corinto anoafō oiyotāfe,” ē faito ea yoia iskafakī: “Ē iskaratīa kayotiro. Niospa ea nīchipaiyaitīa ē katiro,” ixō ea yoia.

Pablo mā mekai xatekī Corinto anoafō ato meka fomani

¹³ Jesús shināfafāikāfe chakafakakīma. Jesús Ifofasharakāfe. Jesús chanīmara faax afara afeskarafaito rateyamakāfe. Kachikirifayamakāfe. ¹⁴ Afarafo mā akai keskara Nios yafi yorafo noikī axosharakāfe.

¹⁵⁻¹⁶ Estēfanas afe yorafo fe Acaya ano ixō nānoxō Jesús chanīmara fakī taefanifo. Mā mā ato oimiskī. Mā mā tāpia nāfāfe Nios Ifofaafō sharafamisfo. Nā keskarafo nikasharakāfe. Nā ato feta yonoaifori nikasharakāfe.

¹⁷ Ē inimasharakōi Estēfanas, Fortunato, Acaicori afo ekeki nokoafono. Akka mā ea axopaiyai keskara nāfāfe mā ea axōafo. Mā ea axotiroma mā chaikōi ika. ¹⁸ Nā tiito ea inimamamisfo. Mato inimamamisfo keskafakī eari inimamamisfo. Nāskakē atoōnoa yoisharakāfe.

¹⁹ Nā nōko Ifo chanīmara famisfāfe Asia anoafāfe mato yoisharapaikani. Aquila feta āfe āfi Priscila mato yoisharapaikani. Mato shinākōikani. Āto pexe mēranoax ato fe ichanāmisfāferi mato yoisharapaikani. ²⁰ Keyokōi nōko Ifo chanīmara faafāfe nono efe ikaxō mato yoisharapaikani. Nāskakēri mā ranā yoinōnāsharakāfe.

²¹ Ēfi Pabloki mē mekai xatekī meka rafes ē mato kenexonō. Akka tafekī nofe yora Sóstenes ea kirika kenexona. Akka iskaratīa ēkōi kirika mato kenexoni mā tāpinō.

²² Fatatora nōko Ifo noiyamaino Niospa omiskōimapaionō omiskōipakenakafo mēra potakī.

Nōko Ifo Jesús chaima nokopainō.

²³ Nōko Ifo Jesucristo mato noikī mato inimamasharakōinō.

²⁴ Ē nōko Ifo Jesucristoōxō keyokōi ē mato noi. Nā ti.

Pablo Corinto Anoafu Afianã Kirika Kenexõ Fomani

Pablo Corinto anoafu yoisharani

¹ Ëfe yora mĩshtichi, êkĩa Pablo. Ë kirika kenexõ mato fomai mã tâpinõ. Nofeta Jesús ifofamis Timoteo feta ã mato kirika kenexõ fomai. Epa Niospa ea katopaiyaito Cristo Jesús ea katonĩ ãfe meka ã mato yoifofãfõfãinõ.

Nios chanĩmara faafo Corinto anoafu, Acaya mai anoafori ã mato keyokõĩ yoisharai. ² Ë nõko Nios mato kĩfixomis iskafakĩ: “Epa Niospa, nõko Ifo Jesús feta ato noikõikĩ ato õiti inimamasharaxõfe. Askatari ato shara fafe,” ixõ ã matoõnoa yoimis.

Pablo omiskõini

³⁻⁴ Nõ Epa Nios yoisharanõ iskafakĩ: “Epa Niospa, mĩ noko sharafa fafãfãini. Mĩ sharafinãkõia. ¡Aicho!” ixõ nõ Epa Nios yoinõ. Nãfi nõko Ifo Jesucristo ãfe Apakĩ. Nãatori noko noisharakõĩ. Askatari nõ omiskõiaito noko inimamatiro. Akka mã nõ meemis keskara mei, fetsa omiskõiaito nõ inimamatiro, mã Epa Niospa nõ omiskõiaito noko inimamamis keskafakĩ. ⁵ Cristo omiskõimãkĩfinakõinifo. Nãskakẽri nõri Cristoõnoax omiskõikõĩ. Akka Cristo omiskõiaito Niospa axosharakõini. Nãskakẽ Cristoõxori nõkõri Niospa axosharakõĩ. ⁶ Akka nõ Niospa meka mato yoi nõ omiskõiaito mã noko nikakõixõ mã nõko Ifo Jesús chanĩmara faax mã afe isharakõitiro. Nãskax mã inimakõitiro. Akka nõ mato yoi nõ omiskõifiaito nõko õiti Epa Niospa noko inimamaxomis. Akka mã mã nõko õimis nõ omiskõiaito Epa Niospa noko axosharaito. Nãskarifiã mãri omiskõiaito Epa Niospa matori axosharakõixii mã tenesharakõinõ. ⁷ Mã nõ tâpia nõ omiskõiaĩ keskai mãri nofe omiskõiaito Epa Niospa nõko õiti inimama keskafakĩ matori inimamasharai.

⁸⁻⁹ Efe yora mĩshtichi, Asia mai anoax nõ omiskõita ã mato yoi mã tâpinõ. Nõ omiskõifinãkõita tenetiroma mei nai keskarakõĩ nõ meita. Nãskakẽ nõ tâpitiro nãskara Epa Niospa noko tâpimana nõa nõ ifimetiroma nõ omiskõiyamanõ. Epa Nios fistichi noko ifitiro. Akka nõ omiskõiaino nõ naano, nãatofi yorafo otofatirokĩ, ixõ nõko shinã mẽraxõ nõ shinãita. ¹⁰⁻¹¹ Akka nõ fãsi omiskõĩ nakerãfãino Epa Niospa noko ifita. Anã afetãra noko ifixii. Askatari nõ chanĩmara fakõini nokomãĩ ifitaifamiskẽ, mãmãĩ noko Epa Nios kĩfixomiskẽ. Mã noko askafãino mã Nios chanĩmara faa fetsafãfe shinãkĩ iskafaxikani: “Aicho Epa Niospa, mĩ Pablo yafi afe rafemisfo mĩ ato ifisharakõia. Mĩ fãsi sharakõĩ,” ixõ yora ichapafãfe yoixikani.

Afeskaĩ Pablo kanimamẽ Corinto ano

¹² Nã nõ fakira kafãsaĩ ariax nõ isharakõimis, nõ afaa chakafamisma. Niospa fichipaiyai keskara nõ amis. Askatari mato mẽranoax nõ isharaifinãkõimis. Nãskakẽ nõ shinãchakaima nõ inimasharakõĩ. Akka nõkai nõ mato pãramisma, chanĩma fisti nõ mato yoimis. Niospa noko noikĩ noko shinãmanaino nõ isharanõ mato mẽranoax. Askatari mã nõ fakira kafãsaĩ ariax nõ isharakõimis. ¹³⁻¹⁴ Ë mato kirika kenexõ manamani tâpitiropinĩ shara faxõ fekaxma mã tâpitiro xafakĩa sharakõĩ. Nãskafekẽ atirifãfe tâpisharafoma ãfe keskaramãkĩ. Nãskafixõ mã tâpisharai, nãskara shara ã fichipai. Nãskakẽ nõko Ifo Jesús anã oaino mã nokoki inimasharaxii, nõri matoki inimasharanõ.

¹⁵⁻¹⁶ Nãskakẽ ã shinã ã Macedonia ano kaitã ã mato ano mãpefãixii anã ã mato yoisharaxikĩ mãto õiti mẽra mã inimanõ. Askata mã Macedonia anoax ã oaitã anã ã mato ano mãpetiro mato fe iyoxiki. Chipõ Judea ano ea nõchitirofo, ixõ ã shinãni. ¹⁷ Nãnõri ã shinãfiãx ã mato ari ã kayoikaima. Akka mã iskafakĩ shinãiraka: “Pablo ã kaira ifiax kaima, ¿afeskakĩ noko pãramẽ?” ixõ mã shinãiraka. Akka êkai õiti ranãyama fetsa yoikĩ, fetsa yoikĩ ã fapanã. Nõ yõra Jesús ifofaamato shinãĩ keskara ã shinãina. ¹⁸ Nã Niospa noko pãramisma keskafakĩ nõrikai mato pãramisma. Nãskakẽ tâpisharakõia nõ mato pãramisma. ¹⁹ Akka Timoteo ikaino Silvano ikaino ã ikaino Jesucristo Niospa Fakeõnoa nõ mato yoimis. Jesucristo mekakai rafema, ãfe meka mẽstekõĩ. Chanĩma fisti. ²⁰ Epa Niospa noko yoiyõa keskara keyokõĩ Cristo mã nõko axomis. Nãskakẽ nõ keyokõichi yoimis iskafakĩ: “Epa Niosĩ, mĩ fãsi sharakõĩ. Jesúsxõ keyokõĩ mĩ afama mĩshti famis mã mĩ yoiyõa keskafakĩ. Nãskakẽ Jesús aneõxõ nõ mia aicho fai,” ixõ nõ yoimis. ²¹ Askatari Epa Niospa mato yafi noko Jesús ifõsharakõifama. Nãskatari noko katõxõ nõkõni ãfe meka yoimis nõ inõ. ²² Akka fẽtsa ãfe afarafo marakka fatiro fetsafãfe tâpinõfo ãfenãkẽ. Nãskafakĩri Epa Niospa ãfe Yõshi Shara nõ mẽra nanea aõxõ nõ tâpinõ nõ afe yoraxõ. Nãskakẽ nõ tâpitiro afara fetsa mã noko yoiyõa keskara chanĩmakõĩ noko inãxii.

²³ Ë mato ari kaira ixõ ã shinãfiãtaxakĩ ã kaama. Epa Niospa ea tâpikõia ã chanĩkẽma. Ë mato ari kakerana. Nãskafiax ã kaama ã mato shinãkĩ. Ë ato ari kaxõ ã ato fasi yoikĩ ã ato shinãmitsamatirora ikax nãskax ã mato ari kaama. ²⁴ Ë mato askafatama êroko mato

inimamapaisharai. Ēkai m̄to ifo ipaima. Akka Jesús fisti n̄ko Ifo. Akka m̄a m̄a Jesús chanimara fax̄o m̄a m̄a Jesús Ifo sharak̄oifai. N̄skak̄ē ē mato feta Jesús yonoxopai m̄a inimai finak̄oin̄o, askatari m̄a Jesús Ifo sharak̄oifan̄o.

2

¹⁻² N̄skak̄ē ēfe shin̄a m̄erax̄o shin̄ākī ē iskafayamea: “Ē Corinto ari kapaifi ē kaima. Akka ē kax̄o ē ato yoikī iskafapaima: ‘A m̄a afara chakafamis keskara xatek̄āfe,’ ix̄o ē ato yoikī ē ato inimamatiroma. Askakimaroko ē ato shin̄amitsamatiro. Ē ato shin̄amitsamanaino, ŷts̄ōa ea inimamatiromē? Akka ares fisti ea inimamatirofo,” ix̄o ē shin̄ayamea. ³ N̄skak̄ē ē mato kirika kenexona, mato ari kak̄īma. Akka ē shin̄a, “Ē ato ari kax̄o ē ato iskafaino: ‘M̄a isharak̄oiyama m̄ato chaka xatek̄āfe,’ ē ato faino shin̄amitsak̄oitirofo,” ix̄o ē shin̄ayamea. Akka m̄a ea nikayamaino ēri shin̄amitsak̄oitiro. Akka m̄a an̄a Nios nikak̄ī an̄a isharak̄oiaiaino, m̄a ea inimamasharak̄oitiro. Akka m̄ē tāpik̄oia ē inimak̄oiaiaino m̄ari inimak̄oitiro. ⁴ Ē mato kenexok̄ī ē meyamea ēfe ōiti shin̄amitsak̄oiaito oiayan̄a. Ēkai mato shin̄amitsamapainima. Askatamaroko ē mato kenexoni a ē mato noik̄oiai keskara m̄a tāpin̄o.

F̄etsa noko chakafaito n̄o rae fatiro

⁵ Akka n̄a feron̄āfake f̄etsa ea chakafak̄ī mekafak̄ī ea fisti shin̄achakamanama, n̄a m̄a Nios Ifofaafari keyok̄o mato shin̄achakamana. N̄skak̄ē noko keyok̄o chakafak̄ī mekafaa. Noko askafafaino ēkai na feron̄āfake omisk̄oimaki finapaima. ⁶ Akka m̄a ran̄arito omisk̄oimanak̄ī n̄skan̄ok̄āfe. ⁷ Akka a m̄a aka keskafak̄ī an̄a askafak̄īma rae fak̄āfe. N̄skak̄ō yoisharak̄āfe inimamasharak̄īkak̄ī an̄a omisk̄oin̄oma. Akka m̄a askafayamaino āfe shin̄a m̄era shin̄amitsak̄oitiro an̄a shin̄asharatiroma an̄a Nios Ifofapaima. ⁸ N̄skak̄ē ē mato yoiai keskafak̄ī ea nikasharak̄āfe. “N̄o mia noik̄o. M̄i an̄a nofe isharak̄oitiro,” ix̄o yoik̄āfe tāpin̄o. ⁹ Ē mato kirika kenex̄o manamayamea tāpīpaik̄ī m̄a m̄ex̄otaima ea nikak̄oim̄ākai. ¹⁰ M̄a fetsa raefak̄ē ēri n̄a raefatiro. F̄etsa ea chakafaito ē mato shin̄ākī Cristo ea ōiaino ēri n̄a raefatiro. ¹¹ N̄o fetsa raefasharak̄oiaiaino Satan̄as noko feparatiroma. N̄o tāpisharak̄oia Satan̄as noko kexepaik̄o. Akka a Nios Ifofaafō isharyamaino, raefayamaino, a Nios Ifofaafoma tiito chakafak̄ī mekafatirofo Satan̄as fichipaiyai keskara. Akka n̄o fetsa raefaino Satan̄as noko afeskafatiroma.

Pablo pexe rasi Troas ano nokoax inimanima

¹² Akka ē mato ēnoa tāpīmapai. Ē pexe rasi Troas ano kani meka shara Cristōnoa ato yoikai. Cristōnoa nikapaik̄oifino. N̄skano n̄oko Ifāfe ea atoki n̄ichini ē āfe meka ato yoin̄o. ¹³ Akka ē shin̄āni nofe yora Tito Troas ano a ē fichikaira ix̄o. Akka fichiyamax ē inimanima. N̄skax̄o ē f̄asi shin̄āk̄oini. N̄skata, “M̄ē kai,” ix̄o Troas anofo n̄a n̄oko Ifo chanimara faafo ē ato yoita ē oni nono Macedonia ano.

Cristōx̄o n̄o keyok̄oifn̄oitiro

¹⁴ Aicho Epa Niosi, m̄o Cristo Jesús afara chaka potamana an̄a afeskafan̄oma. N̄skak̄ē n̄ori afe inimai n̄om̄ai āox̄o āfe meka yoikatsaxak̄ī yorafāfe tāpin̄ofo. Akka pirofom̄a nakas shara nachikomea n̄o keyok̄oichi xetetiroma keskafak̄ī, n̄skafak̄iri Niospa noko n̄ichiano nokōox̄o keyok̄oichi tāpītirofo āfe meka shara. ¹⁵ Akka n̄o meka shara Cristōnoa yoimis keyok̄oichi nikan̄ofo. Akka atirifāfe chanimara fak̄oikani, Nios fe ipaxakak̄ī. Akka atirifāfe nikasharakanamax Jesús Ifofakanamax nakanax omisk̄oipakenakafo. ¹⁶ Akka na meka shara nikaifoma m̄a nakanax omisk̄oipakenakafo m̄era fokanax omisk̄oixikani, n̄āfāfem̄ai na meka shara n̄a n̄o afara pisik̄o xetemis keskara xetekatsaxakak̄ī. Akka n̄a meka shara nikaifāfe n̄a n̄o pirofom̄a nakas shara xetemis keskara xetemisfo. N̄skakanax Nios fe n̄īpanakafo. Akka, ŷts̄ōa Niospa meka Jesúsnoa yoisharatiromē? Akka ts̄ōa atiroma. ¹⁷ Akka fetsafāfe Niospa meka ato yoikak̄ī kori fīpaikani āa ato p̄arakax̄o. N̄o mato Niospa meka yoikai noko kopifak̄āfe ikax̄o āa ato p̄arakax̄o ato kori f̄iaifo keskafak̄ī n̄okai mato askafamisma. M̄a n̄o tāpia n̄o āfe meka yoiaito Epa Niospa noko ōisharak̄oī, n̄āatom̄ai noko n̄ichinixak̄ī. Āfe meka yoikai n̄o kaxetiroma, Niospam̄ai noko ōiaino n̄om̄ai Cristo āfe inax̄o.

3

Jesús ato meka fena yoimis Pablo ato yoini

¹ Askara n̄o yoiaino, m̄a shin̄airaka n̄a n̄o n̄o yoimesharai keskara. Maa. N̄o n̄o yoimesharaima. M̄a chaka shin̄ai. Akka f̄etsa yonopaiyaito f̄etsari fetsa kirika kene fomaxotiro fetsafāfe ōin̄ofo yonosharamisk̄ē. Akka, ŷm̄a shin̄aim̄ē fetsafāfe nokōnoa kirika kenen̄ofo noko yoisharakak̄ī n̄o yonosharamisk̄ē Niospa meka yoik̄ī? Akka n̄o askara fichipaima. Akka, ŷm̄a shin̄aim̄ē n̄o mato kirika kene ȳokaito kirika kenex̄o m̄a noko in̄ān̄o n̄ori fetsafo in̄ān̄o noko tāpin̄ofo n̄o mato m̄erax̄o yoisharamisk̄ē? Maa. Askara n̄o fichipaima. ² Akka

nā kirika kenea keskara nō fichipaima māmāi nā kirika kenea keskarakē, fetsafāfe mato ōitirofo māmāi Nios Ifofasharakē. Mato ōikakī nokori tāpitirofo nō Niosxō yonosharamiskē. ³ Akka mā mā isharakōia anā mā imis keskarama a Niospa fichipaiyai keskaraino. Nā noko ōimana Cristo mato ōiti fetsafaa fena keskara mā inō. Nāskakē mā kirika kenea keskara. Mato ōixō fetsafāfe tāpitirofo nō Niospa meka mato tāpimasharamiskē. Akka na kirika kene lapii kenemeama, askatari tokiri sapaki kenemeama; Epa Nios nīpanakato āfe Yōshi Sharapa mato imashara mā isharakōinō.

⁴ Iskafakī nō yoia, mā nōmāi tāpixō Niospamāi noko nūchinikē nō āfe meka mato yoinō Cristo āfe sharaōxō nō mato yoisharamis. ⁵ Akka nōa nō afara shara nō mato yoitiroma mā isharanō. Askatamaroko Epa Niospa āfe Yōshi Sharaōxō nō fetsafo tāpimatiro isharanōfo. ⁶ Niospa Yōshi Sharaōxō na meka fena nō ato yoimimis Jesúsnōa nō Nios fe nīpaxatiro. Akka a Moisés kenenīōnoa nō ato tāpimamisma, sharafiano keyokairoko nikanōfo nō ato yoipanā. Akka a Moisés yoini keskara keyokōi nikakanamax Nios ika ano katiroma. Askatamaroko Niospa Yōshi Sharapa noko imasharapakenaka Nios ika ano nōmāi Cristo Ifofakē.

⁷⁻⁸ Epa Niospa nōko xinifo israeliolo nā ato yoipaiyai keskara ato yoini nikanōfo. Tokiri pāraiki kenexō ato yoini. Epa Niospa Moisés tokiri kene ināino luz keskara fafekōini. Nāskatari Moisés femānā fafekōini. Nāskakē mā Moisés māchi keya ariax fotokē nōko xini israelifāfe ōitiroma inifo. Nāskax fafekōifiax fenāmāshta matapakeni. Akka Epa Niospa Moisés yoini keskara sharakōifixō noko imapakexatiroma. Sharakōifixō, akka iskaratīa Niospa Yōshi Sharapa noko yoiai keskara nāroko sharafinakōia. ⁹ Akka nā Moisés yoini keskara sharafiano nikakanamax nakanax Nios ika ano katiroma. Akka iskaratīa Niospa āfe Fake Jesúsxō noko chaka soaxotiro nō afe isharapakexanō. Nā sharafinakōia afaa fetsakai askarama. ¹⁰ Epa Niospa Moisés yoini keskara sharafiax, akka Epa Niospa Jesúsxō noko axoni keskara nāroko sharafinakōia. ¹¹ Niospa meka shara Moisés fiaino fafesharakōini. Mā fiax āfe femānā fafesharakōini, Moisés. Āfe femānā fafesharakōifiax fenāmāshta matapakeni. Epa Niospa Moisés yoini keskara sharafiax, akka Epa Niospa Jesúsxō noko axoni keskara keyonakama nāroko sharafinakōia.

¹² Nāskakē mā nō tāpikōia Epa Niospa Jesúsnōa yoini keskara keyonakama. Nāskakē ranotama nō Jesúsnōa yorafo yoitiro. ¹³ Nōkai Moisés keskarama. Moisés āfe femānā fafeaino samapa feopomeni israelifāfe ōinōfoma nāskax fenāmāshta matapakeni. ¹⁴ Akka nōko xinifāfe nikasharapanifoma, āto ōitimāi fēstokōi keskarakē. Iskaratīari nōko kaifo nāskaratori. A Moisés ato yoini keskara ato kirika anexonaifono ato nikakaspakanax. Nāskakaxō Epa Niospa meka tāpisharatirofoma. Akka Cristo fistichi ato shināmatiro nā ōiti fēstoa keskara inōfoma. ¹⁵ Iskaratīari nā Moisés yoini keskara ato anexonaifono āto ōitimāi fēstokōiano shināsharapanāfāfe. ¹⁶ Askafikaxō iskaratīa a Moisés kenei keskara anā shinākaxoma nōko Ifo chanīmara fakaxō aōnoa fisti shinātirofo. Nāskakē anā feopomea keskara ixikakima. ¹⁷ Niospa Yōshi Shara nō Ifofaax nōke ifokaino afaa fetsa nōko ifo itiroma, noko ikixikī. ¹⁸ Akka nōko ōitikai fēstoa keskarama. Nōko Ifāfe āfe meka nō nikasharakōitiro. Āfe Yōshi Sharapa noko ikixō noko fetsafatiro a keskara shara nō inō. Akka mā noko fetsafaano nō sharakōi ixii. Nāskakē fetsafāfe noko ōikakī tāpitirofo nō shara isharakē. Nā feisiti xini chaxaino fafeai keskara noko ōikakī nōko Ifo Jesús tāpitirofo afe keskaramāki.

4

¹ Akka Epa Niospa noko shinākī noko yoini āfe meka shara Jesucristoōnoa nō yoifofāfōfāinō. Nāskakē nō shināchakaima, nō Niospa meka yoiki xateima. ² Nāskakē nō afaa one chakafamisma rāfixikima, a afara one chakafamisfo keskakakī. Askatari nō tosa pāramisma. Askatari nōa nō Niospa meka fetsafaxō yoimisma. Akka Niospa tāpia meka chanīma fisti nō yoimiskē. Nāskakē mā nokoki inimasharapainō, nā nō afarafo shara faito ōi. ³ Na meka shara Jesúsnōa nō yoimimis nikakaspaifono nā onea keskara. Nāskakē tāpikanamax oa fēstoa keskarafo. Nāskakanax omiskōipakenakafo. ⁴ Nāfofi nā niafiaa chaka āto ifoxō ato yoimis. Nāskaxō nā ōiti fēstoa keskara ato faano na meka shara Jesúsnōa tāpitirofoma. Nā yora fēxō luz ota sharafiano ōitiroma keskarafo. Nāskaraxori Jesús finakōia tāpitirofoma. Nāskatari tsōa tāpitiroma Jesús Apa keskara sharafinakōifiano. ⁵ Akka nōkai nōa nō nokoōnoa nō mato yoimisma mā noko ifofanō. Askatamaroko nō mato yoimis Jesucristo mato Ifo inō. Nōko Ifokē aō noixō nō yonoxosharapai. Akka nō mato axosharapai Cristoōnoa mā tāpinō. ⁶ Niospa pena onifayoxoma fakishkē yoini pena inō. Nāskarari nō Jesús Ifofayamax nōko ōiti nā fakish keskara chakakōi ipaoni. Akka Niospa Jesucristoōxō nōko ōiti mēra noko chaxamashara aōxō nō tāpinō afe keskara sharakōimāki.

Pablo yoini nō Jesús chanīmara faax nō isharatiro

⁷ Akka nō afaayamafekē Niospa āfe sharakōi noko mēra nanea nō āfe meka shara Jesúsnōa ato yoinō. Akka nā kesho noko keskarari akai afaama. Samama moshitiro.

Moshifitirokē a mēra afara sharakōi nō nanetiro. Nāskarifiāi nō afaayamafiano Jesūs nofe rafea. Nāskakē yorafāfe tāpitirofo Niospa Yōshi Shara nōmēra nanea. ⁸ Nā nō imis keskara iskaratīa ē mato yoinō mā tāpinō. Noko chakafafiakakī noko xatemakanima. Nāskafixō nō afeskaimēti ixō, nō shināchakafikī mā nō tāpia Epa Niospamāi noko axosharafafainaito. ⁹ Noko noikaspakakī noko chakafapaimisfo. Nāskakaxō noko chīfafofāsafamisfo. Noko askafafiafono Epa Niospa noko potaima. Nāskakatari noko retepaikakī noko tefeya fafiafono Epa Niospa noko kexesharamis nō nayamanō. ¹⁰ Jesūs niyoano retepaipaonifo keskafakī nokori nāskari fakani retepaikakī. Noko retepaifiafono nōko Ifo Jesūs noko kexesharai noko retenōfoma. Nāskakē yorafāfe tāpitirofo mā Jesūs nafianixakī anā otoax nikē. ¹¹ Nō Jesūs yonoxonaito mēxotaima noko retepaikani. Akka noko retepaifiafono nōko Ifo Jesūs noko kexesharai noko reteyamanōfo. Akka nōa nō ifimetiroma nayamaxiki. Nāskakē tāpitirofo mā Jesūs nafianixakī anā otoax nofe ikē. ¹² Nāskakē Jesūsnoa nō mato yoimis fetsafāfe noko retepaifiafono mā chanīmara faax mā afe Īpaxanō.

¹³ Akka Epa Niospa meka kirika ano yōra keni iskakafī: “Ē Epa Nios chanīmara fakōini. Nāskakē Niosnoa ē ato yoi,” ixō kirikaki Niospa meka keni yōra. Nāskarifiakī nōri Niospa meka chanīmara fakōixō nō mato yoi. ¹⁴ Akka mā nō tāpia nōko Ifo Jesūs mā nafiakē Ēpa Niospa anā ōtofani afe Īpaxanō. Nāskakē Āpa Jesūs ōtofani keskafakī mato yafi nokori ōtofaxii nō afe Īpaxanō. ¹⁵ Akka nō omiskōikōi mato Epa Niospa meka yoi mā āfe meka chanīmara fakōinō. Nāskakē yora ichapafāferi Epa Nios nikakōiakxō, “Aicho, Epa Niosi, mī fāsi sharakōi,” faxinōfo.

¹⁶ Nāskakē nō omiskōifikī nō shināchakaima. Nōko Ifokai nō kachikiri faima. Akka nōko yorari anā kerexma nō omiskōiaino. Askafixō nōko shinā mēra mēxotaima noko kerex fafāfāini. ¹⁷ Akka a nō niyoax nō omiskōiyoi akai afaama, samamashita keyoi. Akka nō Jesūsnoax omiskōiaito a noko sharakōi imai a keskarakai tsōa ōiyomisma. Nāfori keyonakama. ¹⁸ Akka nā nō omiskōiai shināntamaroko nā nō ōiyomisma nō shināi. Nios ika anoxō noko inimamapakenaka. Nāa nō shināi. Akka nā afaranā noko omiskōimanai samama keyoxii. Akka a Niospa noko chipo imai keskara keyonakama.

5

¹ Akka ē mato yoinō nikakapo. Pexe xiniāx pāo ikax keyotiro. Nāskarifiāi nō naino nōko yora keyotiro anā nōko fero mēsho nō mēra inōma. Akka tsōakai noko yora fenafaxotiroma. Epa Nios fistichi noko yora fena onifaxotiro. Akka mā nō nai mēra kaax nōko yora fena shara ixii. Epa Niospa noko yora fena shara faxōano a anā keyonakama. ² Akka nō fekaxtemis nōko yora fekakxōime. Nōko yora fenashara fapai nai mēraxō. ³ Akka nō naax, nōko fero mēsho yoraya itiroamamē? Maa. Epa Nios fisti nō Ifofamiskē noko yora fena shara faxotiro nō afe Īpaxanō. Nāskakē nōko fero mēsho yoramais nai mēranoax itiroma Epa Niospamāi noko yora fena faxōano. ⁴ Iskaratīa nono mai ano niyoax nōko yora omiskōiyoi. Askafīax nō nayopaima. Nō nayoamano Cristo onō noko yora fetsafaxoxiki nō isharaapakexanō. ⁵ Nā Ēpa Nios fistichi noko onifani nō afe Īpaxanō. Nāskakē āfe Yōshi Shara nō mēra nanea nō tāpinō noko yora fetsa faxoxiaino.

⁶ Nāskakē nō shināsharafafāini nono mai ano niyoaxō, nayoxoma, nōko Ifo Jesūs ari kayoxoma mā nō tāpia. ⁷ Nāskakē nā Jesūs ika ano ōiyamafikī nono mai anoxō nō chanīmara fafāfāini. Nāskaxō chipo nō ōixii Epa Niospa noko fetsafaano. ⁸ Akka mā nō tāpisharakōia Epa Niospamāi noko yora fetsa ināino. Akka mā nō nakī nōko yora nō ratafainikai nō sharafinakōia ikikakī. Nāskakē nō inimasharakōi mā nō nai nōko Ifo Jesūs femāi nō ikikai. ⁹ Akka nono mai ano nō niyoaxō nōko Ifo nō yonoxosharayopai nokoki inimanō. Nāskatari nai mēraxori na fischisharapaiyai keskafakī nōko Ifo nō inimamapaisharakōi. ¹⁰ Akka nā chanīmara faafo tii Cristoki nokoxikani. Nāskatari noko yoipakexii nono mai ano niyoaxō nō shara famismākī, askayamakī nō chakafamismāki. Akka nō afara shara famiskē afara sharakōi noko ināxii. Akka nō afara chakafamiskē afara shara noko ināpaifikī noko ināxima. Nāskakē nō fixiima. Nāskakē Jesūsxō nō yonopai sharakōi.

Pablo yoini Cristoōnoax nō Nios fe rafetiro

¹¹ Akka Niospa noko yoiā keskara nō ayamax nō rāfitiro. Nāskatari fetsafori nō ato yoipai nā Niospa ato yoiāi keskara anōfo. Niospa noko tāpikōia nōmāi mēstekōi yoiāito. Nōkai ato feparapaima. Māri mā mā noko tāpikōia nō mato pāramisma. Nōko meka mēstekōi fisti nō mato yoimis. Nānori fisti māto shinā mēraxō mā shināpainō. ¹² Akka kakapai nōa nō yoimesharapaima. Akka mēstekōi fisti nō mato yoimis, mā mā tāpia. Akka fetsafāfekai mato yoikōikanima mato feparapaikani. A yoiāifo anorikai yoimismfoma āa āto shinā mēraxō shināxaxō yoimismfo kakapaiyanā. Akka nōfi mato pāramisma, chanīma fisti nō mato yoimis. Nāskakē mā nokoki inimakōimis. Nāskaxō mā nokoōxō ato yoikī nokoōnoa mā ato yoisharatiro. ¹³ Chanīma, nō Nios noikī kerexkai nō yonoxofāfāimis aōnoa fetsafāfe

nikasharanõfo. Akka yorafãfe nokoõnoa yomisfo iskakakã: “Na Pablo feta yonomisfãfe shinãsharamisfoma mēxotaima ato Niospa meka yoifofãsafamisfo omiskõifinafikã,” ixõ noko yomisfo. Æa noko askafanõfokĩ mã nõ tâpiakĩ Niosxõ nõ yonofikã mã ãfe meka tâpinõ. Akka nõ mēstekõĩ shinãsharakĩ nõ mato yonoxosharamis. ¹⁴ Cristo noko noikĩ noko yoini nõ ãfe meka shara mato yoinõ. Cristo keyokõĩ yorafõnoax naani. Nãskakẽ mã nõ naa keskara a nõ iyopaoni keskara ixikima. ¹⁵ Akka mã Jesús nayoni yorafõnoax keyokõĩ a keskara shara ixikĩ. Nãskakẽ a nõ chaka ipaoni keskara ixima. Nãskakẽ nõ nõ apaiyai keskara fisti anã nõ shinãtiro. Cristoõnoax nõ yonosharaxotiro. Cristo ãa nokoõnoax nayoni. Nafiano Epa Niospa ãfe sharaõxõ anã otofani.

¹⁶ Akka mã Jesús chanĩmara faafãfema fetsafõnoa shinãifo keskarakai nõ anã atoõnoa anori shinãpakenakama. Nõri anori shinãyopaoni nõ anã askapaima. Cristoõnoari nõ chakakõĩ shinãyopaoni. Nõkai anã aõnoa anori shinãima. ¹⁷ Nãskakẽ Cristo mã Ifofaafo ato shinã fetsafaxõa anã shinãyopaoni keskara inõfoma, fena keskara shara inõfo. A Niospa fichipaiyai keskara fena keskara nõ ixii. Keyokõĩ fena keskara ixii. ¹⁸ Epa Niospa Cristoõxõ noko fetsafaa anã nõ noikaspãnõma, nõ afe rafenõ. Askatari noko yoini aõxõ ãfe meka nõ ato tâpimanõ Epa Nios fe rafenõfo. ¹⁹ Epa Niospa Cristoõxõ keyokõĩ yorafõ afe rafemapai anã nõ noikaspãnõfoma. Cristomãĩ noko nãxonikẽ Epa Niospa a nõ afara chakafamisnoa anã shinãima. Nã Epa Niospa noko yoiã keskafakĩ nãnorikõĩ nõ mato yomis.

²⁰ Akka Cristo noko nĩchini nõ ãfe meka mato yoinõ. Nõ ãfe meka mato yoi mã Epa Niospa mato yoiã keskara. Epa Niospa nokoõxõ mato yoi mã Cristo mato yoipaiyai keskafakĩ. Nãskakẽ nikakõikãfe Cristo mato nãxonikĩ mato chaka soaxoxiki. Nãskakẽ Cristo Ifofaxõ mãto chaka xatekãfe Epa Nios fe rafexikakĩ. ²¹ Akka Cristo afaa chakafapaponima. Nãskafikẽ Epa Niospa nõko chakafõ akiki nĩchini. Cristo afaa chakafayamfiakatsaxakĩ noko nãxoni Epa Niospa noko omiskõimayamanõ. Nã yora chaka keskarax nõko chakafõnoax Jesús nani. Nãskakẽ nõ Jesús Ifofaino Niospa noko õitiro sharakõĩ mã nõ afaa chakafamisma keskara, nokoki inimakõikĩ.

6

¹ Akka nõ Nios feta yonomis ãfe meka mato yoiã. Nãskakẽ nõ mato yoisharapai Epa Niospa mato noisharakõiaino, mã shinãmakiyamanõ, ãfe meka mã kachikiri fayamanõ. Fetsafãfe anorima mato yoiãto nikayamakãfe. Askatamaroko Jesús meka shinãmakiyamakãfe. ² Taeyokĩ Niospa meka yomistõ kirika kenenĩ iskakakĩ Niospa yoiãno:

Ë mato shinãito, mã ea yoiãno ã mato nikai mã omiskõiaino. Ë mato ifinõ, ã mato axosharaxiki, ixõ yoini Epa Niospa. Nãskakẽ nikasharakãfe iskaratũari Epa Niospa noko axosharapai noko ifixii.

³ Nõkai mato afaa chaka yoipaima tsõa noko chakafayamanõfo. Akka nõ chaka niaito õikaki a Nios chanĩmara faamafãfe noko mekafatirofo. Nãskakẽ nõ afaa chakafapaima. ⁴ Akka mã nõ keyokõĩ Niosxõ aka keskara nõ mato õimamis nõmãĩ yonoxokatsaxakĩ. Noko omiskõimafiaifono nõ tenekõimis. Askatari fekaxteifinãkõita nõ tenekõimis. Noko chakakõĩ famisfo, noko askafafiaifono nõ tenekõimis. ⁵ Nãskakaxõ noko koshamisfo, askatari karaxa mēra noko ikimamisfo. Nãskatari yora chakafãfe noko noikaspakakĩ fãsi noko mekafamisfo. Noko askafafiaino fekaxtekõiyana nõ yonomis. Askatari nõ oxa tenekõimis. Nãskaxri nõ fonãikõimis. ⁶⁻⁷ Noko askafafiaifono afaa chakafatama nõko õiti mēraxõ nõ afaa chaka shinãima. Nõ Cristo fe rafeaito nõ noko yomis keskara mã nõ tâpia. Noko chakafafiaifono nõ atoki õitifishkitama. Fena fenakima nõ tenekõimis. Nãskax fetsafõ fe rafepaikĩ nõ ato sharaã fafafãimis Niospa Yõshi Sharaõxõ nõ ato askafamis ato pãrakima nõ ato noikõimis. Nõ askakĩ keyokõĩ nõ mato õimatiro nõmãĩ Niospa yonomatixõ. Satanã nõko afara chakafamapaifaiito Niospa Yõshi Sharapa nõ Nios keskara shara noko imaino ãfe Yõshi Sharaõxõ nõ afara chaka potatiro. ⁸ Akka fetsafãfe nokoõnoa meka shara yoifiaifono fetsafãferi nokoõnoa meka chaka yomisfo. Akka fetsafãferi na yorafõ sharakõira noko fãfiaifono fetsafãferi noko ïchamisfo. Nõ chanĩmakõĩ yoifimiskẽ noko feparamisfo ixõ nokoõnoa fetsafãfe yomisfo. ⁹ “Pablo fe rafeakãĩ tsoama. Nõkai ato õimisma,” noko fãfiaifono akka fetsafãfe Nios Ifofakõikaxõ noko noikani. Nãskatari nõ napaiãfax nõ nia. Noko omiskõimafiakakĩ noko tsõa reteama. ¹⁰ Akka nõ shinãmitsafaiãto nõko Ifo Niospa noko inimamamis. Akka afaamaisfixõ nõ Niosxõ nõ fetsafõ imasharakõimis, Nios Ifo shara faifono. Nõ afaamais keskarafãx nõ aya a Niospa noko inãĩ. Akka nõ keyokõĩ Niosnã nõkonãri.

¹¹ Efe yora mĩstichi Corinto anoafãfe, mã nõko õiti mēraxõ nõ shinãĩ keskara nõ mato yomis. Nõ mato fomãmisma. Keyokõĩ nõko shinã mēraxõ nõ shinãĩ keskara nõ mato yomis mã tâpinõ. ¹² Akka nõ mato noikaspamisma. Akka mãroko noko noisharamisma. ¹³ Akka

iskaratīa ē mato yoi āpa fake noisharakī yoi tiro keskafakī, nokori noisharakāfe nā nō mato noiai keskafakī.

Nā Nios chanīmara faafāfema akaifo keskara ayamakāfe

¹⁴ Nā Jesūs chanīmara faafoma fe rafeyamakāfe. Akka na yora Nios Ifofaafāfe shināifo keskarakai nā yora chakafāfe shinākanima. Nāskarīfiai pena fe fakish osinātiro. ¹⁵ Nāskarīfakī Cristo feta Satanās anoris shinātirofoma. Akka nā Cristo Ifofaafāfe fichipaiyairo keskara nā Cristo Ifofaafāfema askara fichipaikanima. ¹⁶ Nā Cristo chanīmara faafāfe ichanāmisfo Epa Nios kifinōfo. Akka nā Ifofaafoma ato fe ichanātirofoma afara nimofa fakaxō kifitirofo na nōko niosra ikaxō. Nāskakē nā rafe osinātiro. Akka afāfekai Epa Nioskōi kifipaikanima. Akka Epa Nios nō mēra ika. Nāskakē nō Niospa pexe keskara. Nōko Nios nia. Epa Niospa yoini iskafakī:

Ēfi ato fe ikikai, ato fe rafexikī. Ē āto Nios ikaino afo efe yora ikani, ixō yoini. ¹⁷ Askatari Epa Niospa yoini iskafakī:

Akka nā Cristo chanīmara faamafāfe akaifo keskara ayamakāfe. Ato fe rafeyamakāfe afaa chakafaxikākima. Mā askano ē mato ifikai, ixō yoini. ¹⁸ Askatari nā afama mīshti atiroto ato yoini iskafakī:

Akka ē mātō Epa ixii. Akka mā ēfe fakefo ixii, ixō nōko Ifo Niospa yoini.

7

¹ Ēfe yora mīshtichi, Epa Niospa nā noko yoiyoni keskara shara. Nāskakē nō isharanō keyokōichi nōko chaka nō xatenō. Afarafāfe nōko yora iyamai nōko ōiti mēraxō noko chakafamatiro nāfo nō xatekōinō sharakōi ixiki. Nō Epa Nios noikōiax a keskara shara nō ipai.

Corinto anoxō chaka shināyopaonifo. Akka iskaratīa mā shara shinākanī

² Akka nā yora fisti keskara nō inō noko noisharakāfe. Nōkai mato chakafamismaki. Askatari nō mato afaa chakafamamisma, askatari nō mato pāramisma. ³ Ēkai nā ē mato yoi ai keskafakī mekakī chakafakī ē mato yoimisma. Akka ē nayoxoma ē mato mēxotaima noikōifafāini. Nāskatari mē naflaxō mēxotaima ē mato noikōixii. Nāskakē tsōa noko paxkanā fatiroma nā yora fisti keskaramāi nō ikē. ⁴ Mā nō tāpikōia mā noko noikōiyanā, mā Jesūs Ifo sharakōi fakē. Nāskakē nō yorafo yoimis mā isharakōimiskē. Nāskatari nō omiskōifi nō inimakōimis.

⁵ Akka nā nō Macedonia ano nokoitatīa nō teneama, mēxotaima fanīma mīshtinoax fekaxteaifāfe ōi. Akka nō shināchakakōimis. Askatari a Nios Ifofaa fetsafori nō ato shinākōimis, mā nōko Ifo Jesūs kachikiri faafora ixō. ⁶ Akka nā shināmitsaifo Niospa ato inimamamis. Nāskakēri nokoki Tito nīchiano nō inimakōimis. ⁷ Akka mā nokoki Tito nokoxō noko inimama noko yoi iskafakī: “Corinto anoafāfe ea inimamakōiafo,” ixō Titopa noko yoi. Askara nō nikai nō inimakōia. Askatari noko yoi mā eōnoa yoi kī iskafakī: “Nō Pablo shinākōi nokoki samamashta nokopainō,” ixō mā yoi kē: “Nāskaxori nōko ōitinī nō shinā chanīma nō afara chakafamis. Akka nōkai anā askapaima. Nō Pablo shināi,” ixō mā yoiaino Titopa ea yoi. Nā keskara nikai ē nimai finasharakōi.

⁸ Akka ē mato kirika kenexō manamakī ē mato shināmitsamana. Nāskax ēri shināmitsakōiyoa. Akka anā ē shināmitsaima. ⁹ Akka iskaratīa ē inimakōi. Akka ē mato shināmitsamanax ē inimaima. Akka mā shināmitsayanā mā Epa Nios kifiti iskafakī: “Epa Nios, nō afara chakafakī noko reaefae nō afara chakafamiski,” ixō mā yoi kē. Nāskakē ē inimasharakōimis. Mā askafaino Epa Niosri matoki inimasharakōi. Akka ē mato kirika kenexō manamakī ē mato yoi kī chakafaama. Askatararoko ē mato yoisharakōia mato axosharayanā. ¹⁰ Akka nō shinākī iskafatiro: “Ooa, ē afara chakafakī, Niosri ē chakafaa,” ixō shinākī nōko chaka nō xatepaitiro Epa Nios Ifofapaikī. Nō askaito ōiki Epa Niospa noko ifitiro nō afe ĩpaxanō. Nāskaxō nō shinātiro ma iskafakī: “Ooa, ēfe chaka ē xateama shara ē ikerana. Niosri ē Ifofaama ē shara ikerana,” ixō anori nō shinātiro. Akka nā chanīmara faamafāfe nō shināi keskara shinākanima. Iskafakī shināmisfo: “Ooa, nō afara chakafaa,” ixō shinākani āto ōiti mēra shināmitsakanima Nioskai shināpaikanima. Nāskax nakanax Epa Nios fe ipanakafo. ¹¹ Akka mā kai askarama. Shinākapo. Mā mātō ōiti mēraxō mā mā shinā anā mā Nios Ifofai mātō chaka xatepaikī nā Niospa fichipaiyai keskafakī. Nāskax mā ratekōia Niospa keyokōi noko omiskōimaxira ikax. Nāskakē mā mā itipinikōia ika a afara chakafai fo ato omiskōimaxiki. Nāskaxō mā fāsikōi ato yoi āto chaka xatenōfo. Nāskakē mā mā noko ispanākai ato keskarama. Nāskakē mā ea fichisharapaikōi ē mato ōikanō mā isharakōiyamakī. ¹² Akka ēfe kirika kene fixō mā ea noiyanā mā ea nikakōisharamis. Akka ē kirika keneama, nā feronāfāke afara chakafaaōnoa omiskōimakāfe ixō. Askatari nā feronāfāke omiskōimanafoōnoari ē kirika keneama. Akka ē mato kirika kenexona mā

tāpinō mā ea noimākai. Akka mā ea nikakōimis. Nāskaxō mā tāpitiro māmāi ea noikī Niospa ferotaifi.

¹³ Nāskakē nō inimasharakōi, māmāi noko noisharakōiaino nikakōisharayanā. Akka Titori matōōnoax inimasharayamea. Nā Tito inimaito ōi nōri inimaifinasharakōiyamea. ¹⁴ Akka Tito kayoamano ē yoiti iskakafā: “Na Corinto anoafo sharakōifo,” ixō ē yoiti. Nāskakē Tito matō mēra kaano mā ifisharakōiyamea. Nāskakē ē matōōnoax rāfiyamea. Akka chanīma fisti nō matō yoimis. Nā ē matōōnoa Tito yoia keskara chanīmakōi Titopa matō ōia. ¹⁵ Tito matoki nokoxō ōia mā rateaito matō ōita noko Titopa ferateneira ikax. Nāskakē pishta rateyanā mā Tito nikakōita. Nāskakē Titopa matō shinākī, matō noikī finakōi. ¹⁶ Ēri matoki inimakōi. Akka iskaratīa mē tāpia nā ē matō yoiai keskara mā amiskē.

8

“Afarayaxō fetsafo ināsharakāfe,” ixō Pablo Corinto anoafo yoini

¹ Akka meka fetsari ē matō yoinō mā tāpinō. Mā Epa Nios Macedonia anoxō chanīmara faafono Epa Niospa ato noikī āto shinā mēraxō ato shināmashara fetsafori kori ināsharakōinōfo. ² Akka Macedonia anox omiskōifīkakī Niosnoax inimakōikakī, afaayayamafiakaxō nā yora afaamaisfo ato afara fetsa ināsharakōiafo. ³ Akka nā ē ōia keskara ē matō yoinō. Fetsafāfe afaayayamafiakaxō fetsafori ato afara ato ināsharakōiafo. Ato afaa fishkofafoma. Nāskakē atonā afaa ichapa nēteama. ⁴ Iskakafī ea yoiafo ato ināsharapaikī: “Nā Jesús chanīmara faa fetsafāfe kori yopakani. Nāskakē nōri ato afara fomasharapai,” ea faafo. ⁵ Nō shināyamea kori fistis noko inākanira ixō, Jerusalén anoafo a Nios Ifoafafo ato foxopaikī. Akka noko kori ināyokaxoma taefakī Nios ināyameafo, iskakafī yoianā: “Ifo, nōfi mefe yorakī nā mī noko afara amapaiyai keskara mī noko yoitiro,” ixō yoiyameafo. Nānori yoikāta nokori yoiyameafo iskakafakī Niospa fichipaiyai keskafakī: “Nōri nō matō nikakōinō,” ixō noko yoiyameafo. ⁶ Titopa taefakī matō yoiyoni iskakafī: “Māto korifo ichafakāfe a afaamaisfo Jerusalén anoafo ato ināxīkakī,” ixō matō yoiyoni. Nāskakē nō Tito yoiyamea iskakafī: “Nā mī yoimis keskafakī anā ato yoife nā afaamaisfo Jerusalén anoafo ato kori inānōfo. ‘Mā ato noikī mā ato kori inātiri,’ Corinto anoafo ato yoife,” ixō nō Tito yoiyamea. ⁷ Akka mā Jesús chanīmara fakī finakōiyānā mā Niospa meka mēstekōi yoimis, āfe meka tāpisharakōiyānā. Chanīmakōi mā Jesús yonoxosharakōiyānā mā noko noisharakōi. Nāskakē nā mā afaafo shara faa keskafakī nā afaamaisfori mā ato ināsharatiro. Niosxō mā ato noikōikī inimasharakōikai mā ato inātiri, fetsafo finōkōinīfofā nā mā imis keskayanā.

⁸ Akka ēakōi ē matō yoima nā afaamaisfo mā ato kori inānō. Akka ē tāpipai fetsafāfe ato kori ināpaiyai keskafakī māri ato ināpaimākai. Askayamakī māto meka fistichi mā yoiaraka nō ato ināira ixō. Akka askakīma mā ato noikōiyānā mā ato ināsharatiro. ⁹ Mā mā tāpia nōko Ifo Jesucristo nai mēranoax nāmā fotoyoamax afama mīstifoya iyopaoni. Afaakai yopapaonima. Nāskafixō noko noikōikī āfe afama mīstiffo keyokōi potāferani. Nāskax nokoōnoax afaamais iyopaoni nō aōnoax isharapakexanō.

¹⁰ Akka nā ē shināinoā ē matō yoinō mā tāpinō. Akka mā xīnia fisti finōa mākai inimakōiyānā kori ichafaxō mā ato ināma. Akka taefakī nā afaamaisfo mā ato noikī mā ato kori ināpaikī mā fiyamea mā mekea ato chipo ināxiki. ¹¹ Nāskakē inimakōikī mā kori ichafakī taefati keskafakī iskaratīari inimayanā ato ināsharakāfe anā afaa yopanōfoma. Nā mā ato ināpaiyai ato inākāfe. ¹² Akka mā ato ināpaikī mā ato inātiri. Askatari mā afarayaxō mā ato ināsharaito Epa Niospa tāpia. Askatari mā afara ichapayaxōma mā ato ināitori nāri Epa Niospa tāpia. Nāskakē inimakōi.

¹³⁻¹⁴ Akka ē matō iskakafī yoima: “Ichapakōi ato inākāfe,” ixō ē matō yoima. “Askatari keyokōi mā ato ināx mā afayaima,” ixō ē matō yoima. Akka iskaratīa mā afara ichapaya. Nāskakē nā afara yopaifo mā ato inātiri. Akka māri afara yopaito nāfāfe afara ichapayaxoxori matori inātirofo. Mā askai mā ranā mā kexenōnāsharax mā isharakōitiro afaa yopaxikima. ¹⁵ Akka kirika ano Niospa meka kenea iskai: “Akka nōko xīnifo tsōa istomaxō a piaifo Niospa ato ināpaoni. Akka nā ichapa fiato tēxefapaonima. Akka nā ichapama fiatori afaa yopapaonima,” ixō kirika ano Niospa meka yōra keneni. Nāskakē yora fetsafo nō afara ināito, Niospari noko afara fetsafo noko inātiri nō afaa yopayamanō.

Tito fe rafeafo

¹⁶ Ē matōōnoa shinākōiai keskafakī Titopari āfe ōiti mēraxō matō shinākōi, Epa Niospa shināmanaino. Nāskakē nō Epa Nioski inimakī nō aicho fai. ¹⁷ Akka iskakafī nō yoiyamea: “Corinto anoafo anā ato ōitāfe ato yoisharaxikī,” ixō nō Tito yoiyamea. Nānori nō yolaino inimayamea. “Aicho, ē ato ari kaikai ē ato yoisharai kaikai,” ixō noko yoiyamea. Akka ē shināi nō yoiai fistiōnoax kaima. Āari matoki kasharapai kai. ¹⁸ Akka nā nofeta Nios Ifofamis fetsa nō Titoya nīchi. Nā nofe yora, nāatori Jesúsnoa ato yoisharamis. Nāskakē aōnoa keyokōichi meka shara yoimisfo. ¹⁹ Akka nā Nios chanīmara faafo tiito ichanākaxō nā

feronāfake katonifo, nofeta nā kori yopaifo foxōikanō. Nios shinākī na kori nō ato ināyanā nōko Ifo sharara fanōfo. Askatari nō mato feta nō ato ināpai tāpinōfo nō ato axosharapai.

²⁰⁻²¹ Nā afaamaisfo nō ato kori foxosharapai. Nāskakē yorafāfe ferotaifi nō ato ōimasharapai noko chakafakī mekafayamanōfo. Na kori ichapa nō ato foxosharapai noko iskafanōfoma: “Nōko kori ranāri oneafo,” noko fanōfoma. Nāskakē nōko Ifāfe ferotaifi nā yorafāfe ferotaifi nō ato ōimapai nō isharakōixō.

²² Akka nā nofe yora nā Jesūs Ifofamis fetsa Tito yafi nō mato nīchi. Nā feronāfake mā nō ōimis nāto Jesūs chanīmara fakōimis. Nofeta Jesūs yonoxosharakōimis. Akka nāto mato nikamis mā Jesūs Ifofasharakōixō nā afaamaisfo mā ato ināsharakōiaito. Nāskakē mato ari kapaimis mato feta ato shara faxiki. ²³ Akka mā mā Tito ōimiski. Nāto efeta mato yonoxosharamiski. Nā efe rafemis Jesūs yonosharaxoxiki. Nā Jesūs chanīmara faafo raferi afe mato ari fokani. Akka nā Jesūs chanīmara faafāfe ichanākaxō ato katonifo mato ari fonōfo. Nā rafeta Nios Ifofasharakōimisfo. Nāskakē ato katonifo mato ari fonōfo. ²⁴ Akka mato ari nokofaifāfe ato ifisharakōikāfe nā Nios Ifofafo ato katonifo ato tāpinōfo mā ato ifisharaito. Mā ato askafainā ē matoōnoa yoisharamis keskara tāpitirofo chanīmakōikē.

9

Nā Nios Ifofaafāfe Corinto anoafō feta Macedonia anoxō nā Nios Ifofaa fetsafori ato kori manamanifo

¹⁻² Akka nono Macedonia anoxō ē kirika kenexō ē mato fomakī ē mato yoikī iskafapaima: “Ato kori fomakāfe,” ixō ē mato yoipaima. Akka mē tāpia mā xinia fisti aka nā Jesūs chanīmara faa fetsafāfe afara yopaifāfe mā ato ināpaiyaito. Akka ē Macedonia anoafō ē yoikī iskafaa: “Acaya anoxori ato kori fomapaikani Judea anoafō,” ixō ē yoia. Ē ato askafaito nikakaxō akairi ato kori fomasharapaikani. ³ Nāskakē ē Tito yafi nā afe rafeafo ē matoki nīchi nā ē matoōnoa yoisharai keskara chanīmakōikē tāpinōfo. Ē Macedonia anoafō ato yoimis iskafakī: “Nā Corinto anoafāfe mā itipinīshara faafo ato kori fomaxikakī,” ixō ē ato yoia. Akka ē Tito yafi a afe rafeafo ē nīchi mato ano nokokaxō ōinōfo nā ē matoōnoa ato yoia keskara chanīmamākī. ⁴ Akka Macedonia anoafori efe foaifono ē ato fe mato ano nokoxō ōia mā kori ichafayamano ē mato rāfiaino māri mā rāfipaitiro. ⁵ Nāskakē ē shinā Tito yafi afe rafeafo rekē mato ari nīchixiki mato feta kori itipinīfanōfo ato fomaxikakī nā afaamaisfo. Akka afetiama mā mā shināxō yoiyoni: “Nā afaamaisfo nō ato kori fomanō,” ixō. Akka ē mato yoia: “Ato kori inākāfe,” ixō. Māakōi mā ato ināi. Akka nāskara shara mā ato ināpaiiki mā ato inātiro.

⁶ Nāskakē shināsharakāfe. Akka nō fimi exe fisti fanaxō ichapa fitiroma. Akka nō fimi exe ichapa fanano nō fimi exe ichapa fitiro. Nāskarifiakī nō fetsafo afara ichapama inākē nokori Niospa ichapama ināxii. Akka nō inimayanā fetsafo ichapa ināto nokori Niospa ichapa inātiro. ⁷ Nā ōto shinā mēraxō shināifo keskafakī fetsafo inātirofo. Nāskakē iskafakī shinātirofoma: “Ooa, ē ichapama ināpaifaito ea yōkarifaito ē inā.” Askatari iskafakī shinātirofoma: “Akka ē ināyamaino ekeki ōitifishkitiro. Akka ē ināi ekeki ōitifishkiyamanō,” ixō anori shināyamakāfe. Askatamaroko inimayanā inākāfe. Nā fetsafo ato afara ināi inimamis nā Niospa noikōi. ⁸ Akka nā mā fichipaiyai tii keyokōi Niospa mato inātiro afara sharafo fetsa fetsatapafo mā afaa yopanōma. Askatari nā afara yopaifo mā ato ināno, Niospa keyokōi tāpia mato sharafa fafafaītiro māri fetsafo shara fanō. ⁹ Niospa meka aōnoax kirikaki kenea iskai:

Feronāfake sharapa nā afaamaisfo afara ichapa ato ināsharamis. Nāskakē Epa Niospa nā feronāfake axosharaino mēxotaima ato afara ināsharatiro, ixō keneni. ¹⁰ Niospa fimi exefo onifani. Nāskakē nō fimi exe fanatiro. Chipō Niospa āfe fanafo foaimasharaxotiro pisharanō. Nāskarifiakī mā afara yopaito Niospa mato ināsharatiro. Afara ichapakōi mato ināno mā inimayanā nā Nios Ifofafo Jerusalēn anoafō mā ināsharafafaitiro. ¹¹ Chanīma, Niospa mato afaa fishkoima afara ichapa mato ināi māri ato afara ichapa inānō. Akka nā afara yopaifo mā ato ināi nāfo nō ato foxoxii. Nāskakē inimayanā yoixikani iskafakī: “Aicho Epa Niosi, mī fāsi sharakōi,” ixō yoixikani. ¹² Akka mā ato afara ināsharaino nā afaamaisfāfe fixikani. Nāskakē mā fikaxō inimayanā Epa Nios yoixikani iskafakakī: “Aicho Epa Niosi, mī noko shara famis,” ixō yoixikani. ¹³ Mā ato afara ināsharano nā afaamaisfo inimakōixikani mā ato ināsharano. Nāskakē yoikī iskafaxikani: “Aicho Epa Niosi, nā noko afara ināifāfe mī meka nikasharakōimisfo. Jesūs nōko Ifo mia famisfo. Mī ato yoia keskafakī noko ināsharafo. Fetsafori nāfāfe afara ato ināsharafo. Nāskakē mā nō ato tāpikōia chanīmakōi mī Fake Jesūs āto Ifokōi,” ixō nā afaamaisfāfe yoixikani. ¹⁴ Nāskakē mato Epa Nios kīfixoxikani. Mā Niosxō ato afara ināsharakē, yoikī iskafaxikani: “Epa Niosi, mīōxō na yorafāfe noko afara ināsharafo. Aicho Epa, nō ato fāsi noikōi. Atori shara fafe,” ixō mato Epa Nios kīfixoxikani. ¹⁵ Aicho Epa Niosi, mī Fake

Jesucristo mī nōai ināsharakōini nofe rafesharapakexanō. Nāfi sharafinakōiakī ađnoa nō yoisharapaikōi nōkai tāpiama afeskaxomāi nō yoisharakōinō.

10

“Niospa ea nīchini Jesúsnoa ē mato yoinō” ixō Pablo ato yoini

¹ Iskaratīari meka fetsari ē mato yoisharapai. Efe yora mīstichi, ea nikasharakāfe. Jesucristokai meka mitsisipato noko yoimisma. Noko yoikī fenāmāshta noko yoisharamis nō āfe meka nikasharakōinō. Nāskarifiakī ēri Cristoōxō mato fenāmāshta yoisharapai mā tāpinō. Akka eōnoa yoikī iskafamisfo: “Pablo nofe ixō fenāmāshta noko yoiāito nō ōimis. Nāskafixō noko kirika kenexoni mitsisipakai noko kirika kenexonaito nō ōimis,” ixō ea yoimisfo. ² Ē matoki nokoxō fāsi mekakai ē ato yoipaima ea nikanōfo. Askafixō ea nikayamafiaifono fāsi kerexkai ē ato yoitiro. Akka nā ea chakafakakī mekafaifo ato nikayamakāfe. Akka eōnoa yoi iskafamisfo āa chanīkani iskakani: “Pablo noko yoi nā Nios Ifofaamafāfe yoiāifo keskara. Niospa shināōōkai noko yoima,” ixō yoimisfo. Akka ē matoki nokoxō ē mato yoitiro nā Nios Ifofaamafāfe shināifo keskara ē mato yoimisma. Niospa shināi keskara fisti ē mato yoimis. Akka mē nokoxō fāsi mekakai ē ato yoixii tāpinōfo. ³ Chanīma, nono mai ano nō ika nā Nios Ifofaafoma fe. Akka nā Nios chanīmara faamafāfe fetsafo finōpaiyaifo keskai nōkai askamisma nā noko noikaspaifo ato finōxiki. ⁴ Akka a Nios Ifofaafoma a Satanās nikakī mato chanīkī tāpimapaikani mā anā Jesús Ifofayamanō. Mato pārapaikani. “Nō Nios Ifofara,” ikani. Askatamaroko nō Nios nikakī nō mēxotaima yoimis chanīmakōi. Nāskaxō Nios āfe sharaōxō nō ato xatematiro afara chaka anā yoiyamanōfo. ⁵ Epa Niospa noko yoiāino nō fetsafo tāpimatiro āa chanīaifo, “Nō Niospa meka tāpisharakōiakī,” ikanaifo, kakapaiaifo. Akka nō Niospa sharaōxō fetsafo nō ato tāpimatiro nā chanīmisfo Niospa meka tāpisharafoma. Shara shināfoma. Epa Nios Ifofaima. Niosxō nō ato yoimis Nios Ifofanōfo. ⁶ Akka ea Jesús nīchini āfe meka ē mato yoinō. Nāskakē mā Jesús yafi ea nikakōixō mā anā afaa chakafayamaino ē mato afeskafatiroma. Akka mā noko nikakaspaifo ē mato omiskōimatiro.

⁷ Akka mā ōikī shināi oa shara keskaraxō fetsafāfe yoiāifono iskafakī: “Cristo ea nīchini āfe meka ē mato yoinō. Akka Pablokai ea keskarama,” ixō mato yoimisfo. Akka nāfāfe shināsharakaxō tāpitirofo eari Cristo nīchinikē āfe meka shara ē mato yoinō. ⁸ Nōko Ifo Jesús ea yoimis keskara ē mato yoitiro. Mato afaa chakafamatama nōko Ifo ē mato Ifofamasharapai mato ōiti fēpeaxosharaxiki. Ē anori mato yoi ēa kakapaitama, ēroko mato yoisharapai. Ē anori mato yoikai ē rāfima. ⁹ Akka ē mato kirika kenexō ē mato ratepaima mā mesenōma. ¹⁰ Akka fetsafāferi eōnoa yoikī iskafamisfo: “Pablo noko kirika kenexokī noko feratekōiāito nō ōimis. Akka askafīax nofe ikē nō ōia afaamakōi nō ōimis. Āfe mekakai mitsisipama,” ixō eōnoa yoimisfo. ¹¹ Nānori eōnoa yoifimisfono ē mato ari samama kaxō ē ato tāpimaxii. Nā ē mato kenexona keskafakī nānorikōi ē mato yoixii.

¹² Fetsafāfe mato yoimisfo iskafakī: “Nōfi afara tāpikōiakī nō mato tāpimasharakōitiro,” ixō mato yoimisfo. Nāskarafo ichanākanax āa ranā yoinākani iskakani: “Noko keskarakai tsoama. Nores fisti nō tāpisharakōia,” ikanax kakapaimisfo. Nāfo tatimākōifo afaakī tāpiafoma. Nāskakaxō nāfāfe anorima afara chaka yoimisfo. Akka ēkai ato keskarax ē sharakōi ē itiroma ēroko ato keskarax. ¹³ Akka nōkai anori yoipaitiroma. Nā Niospa noko yoiāi keskara fisti nō mato yoitiro. Noko yoini āfe meka shara fisti nō mato yoinō. Nā fisti nō mato yoimis. Akka mā ika nā Niospa ea nīchini ano. Akka ē kani Corinto anoxō mato Niospa meka tāpimaxiki. ¹⁴ Nāskakē ori fetsa ari ē kanima, nā ea nīchini ano ē kani. Akka nā nō mato yoiāi keskara chanīmakōi. Nōkai kakapaimisma. Nā Niospa noko yoiāi keskara fisti nō mato yoitiro. Akka nō mato Niospa meka yoikī taefatani Jesucristoōnoa meka shara mā nikamiskēma. ¹⁵ Akka nā ē kamisma anoxō fetsafāfe ato yoiāfono nō ato yoiā ixō nō ato yoimisma. Akka nō mato yoi nā nō mato afara axosharamis fistiōnoa. Akka nā fetsafāfe mato axomisfoōnoa nō yoimisma. Akka mā mā Jesús nikasharai. Nāskapainō. Mēxotaima mā nikasharakōifafāinō. Akka mā ea ifisharakōiano mēxotaima ē mato yoisharatiro nā Niospa fichipaiyai keskafakī. ¹⁶ Nāskakē mai fetsa ari chaikōi mato finōfāi ē kapai Jesúsnoa ato yoixiki nā Niospa meka nikamifoma ari. Akka nārixō mā fetsafāfe ato yoiāfono nō ato yoiā, nō ipaima fetsafo imis keskai. Nōkai fetsafo ato yono xītikapaima. ¹⁷ Akka kirika ano Niospa meka kenea iskai: “Akka tsōakai āa yoimesharatiroma iskai ē afama mīsthi tāpikōiakī ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra keneni. ¹⁸ Akka fetsa āa yoimesharai akai afaama. Akikikai Nios inimatiroma. Akka Niospa fetsa na feronāfake sharakōi faax akiki inimakōitiro.

11

Pablo ato yōani āa chanīkani noko Niospa nīchiaki nō Niospa meka mato yoinō imisfoōnoa

¹ Iskaratīa ē mato yoinō, nā yora shināsharayamaito yoiyai keskara nānorikōi ē mato yoifīkīkai askarakōi ē mato yoima. Nā mā ea nikamis keskafakī iskaratīa ea nikasharakāfe. ² Feronāfāke kēroyapaikī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfake fetsa fe oxayamanō. Nāskax mā fianākanax fene fes fianātirofo feronāfake fetsafekairoko oxakatsaxakī. Nāskarifiakī ē mato Nios Ifofamakī ē mato kexesharani. Nāskaramāi Epa Niospa fichipaiyaino. Nāskakē mēxotaima ē mato kexesharai mā fetsafo nā chanīmisfo mā ato nikayamanō. Nāskakē mā nai mēra Nios ano kaax Cristo afe yorakōi mā ixii. ³ Nāskakē ē shināchakakōi Satanās Eva ani keskafakī fetsafāfe matori pārāyamanōfo, mato pārāifono mā anā Cristo noinōma. ⁴ Ooa. Fetsafāfe mato pārāpaikani. Nō Jesúsnoa mato yoimis keskara anori mato yoikōiyamafiaifono mā kai ato xatematama mā ato chanīmara fai. Nō Niospa Yōshi Sharaōxō meka shara Jesúsnoa nō mato yoimis keskara anorikai afāfe yoikanima. Jesúsnoa anorima mato yoifiaifono mā ato xatemanama. Mā ato nikayanā mā yoimis iskafakī: “Aicho, mā nofe isharapainō,” ixō mā ato yoimis. ⁵ Akka mā shināi nāfāfe Niospa meka yoisharakōimiforo ixō. Akka askafīkaxō ea finōfāfoma. ⁶ Akka, ĵmā shināimē ē yoisharatiroma? Akka ē Niospa meka tāpisharakōia. Nā ē mato yoiyai anori mēstekōi. Mā mā ea tāpikōia ē mato Niospa meka xafakīakōi yoimis. Nā keskara ē mato òimafafāini.

⁷ Nā ē mato Niospa meka yoimis chāikai ē mato afaa yōkamisma. Ēkai mato afaa fiamisma, koriri ē mato yōkamisma. Ōitsai, ē mato chakafairaka ē mato kori fiakīma. Akka ē Niospa meka shara Jesúsnoa ē mato yoimis Niospa fakefo mā inō. Ē mato askafai afaamais keskara ē imis mā Niospa meka tāpisharakōinō. ⁸ Akka ē mato fe ikano nā Nios chanīmara faa fetsafāfe ea kori inānifo aō nā ē fichipaiyai keskara ē finō. Ōitsai, ē atoki yometsoa keskararaka nā kori fii mato Niospa meka yoi, ē mato yonoxomis keskaraxō. ⁹ Ē mato fe imis chāikai ē afara yopafīkī ē mato fekaxtefamisma. Akka Macedonia anoafāfe Nios chanīmara faafo fēkaxō ea afarafo inānifo. Akka ē mato fe imis chāikai ē tsoa afaa yōkamisma. Askatari ē tsoa afaa yōkapakenakama. ¹⁰ Cristo āfe meka chanīmakōi. Nāskarari nā ē mato yoiyai chanīmakōi. Nāskakē Acaya mai anoxō nā ē mato yoiyai keskara ea tsōa xatematiroma. ¹¹ Ē mato anori yoikī, ĵē mato noimamē? Maa. Anorikaima Niospa tāpikōia ē mato noikōi.

¹² Nā ē mato yonoxomis chāi ē mato afaa fiapaimisma. Iskaratīari ē mato afaa yōkaima. Nāskaxos ē mato yonoxoni nā chanīmisfo mā anā ato chanīmara fanōma. Nā ē yonoaito ōikaxō fetsafāfe yoimisfo iskakakī: “Nōri Pablo yonoai keskafakī nō yonoi,” ifiakaxō afāfekai ē yonoai keskafakī tsōa yonomisma. ¹³ Akka nāfo chanīmisfo. Ē ikai keskara ipaifīkani tsoa askakōimisma. “Cristo noko nīchia aōnoa āfe meka nō mato yoinō,” ixō mato yoifīkani afokai Cristo fe rafemisfoma. ¹⁴ Chanīma, Satanās nokoki nokotiro nā Niospa āfe ājiri fafeai ōitsa. Nāskarato noko yoitiro iskafakī: “Ēfi mato xafakīa yoikai,” ixō noko feparapaitiro. ¹⁵ Akka nā Satanās yonoxomisfori nā keskara itirofo. “Nōri nō Nios yonosharaxomis,” ixō noko pārāpaikani. Nāskaifāfe ōikī Niospa ato omiskōimakī finakōixii. Nāskakē nāfāfe afara chakafakanax omiskōipakenakafa.

Pablo omiskōini Niospa meka yoikatsaxakī

¹⁶ Ē mato yoiyai keskara anā ē mato yoinō: “Pablo afaa tāpiama,” ixō eōnoa shināyamakāfe. Akka ea nikapaikī ea nikayokāfe. Nā yora fetsa afaa tāpiama mā nikamis keskafakī eari nikasharayokāfe. Ēari ē pishta yoimeyonō. ¹⁷ Nā ē mato yoiyai keskara a ēa ē yoimesharai ēfe Ifāfe ea anori yoiama. Akka nā afaa tāpiamafāfe anori yoimisfo. ¹⁸ Akka nā nōko Ifo chanīmara faafoma āa yoimesharai fo keskara nānori fetsafāfe mato yoimisfo. Akka iskaratīari ē mato yoi a ēari ē yoimesharai keskara. ¹⁹ Akka mā shināi mā tāpikōia. Nāskaxō nā afaa tāpiamafo mā ato nikamis. Akka afeskakī mato anorima yoifiaifono mā ato xatematamisma. ²⁰ Mato yoimisfo āto yonomati keskarakōi mato fakaxō, askatari mato kaxpa yonomamisfo. Nāskatari mato pārāmisfo, askatari mato chakafamisfo, askatari mato ĵchamisfo. Mato askafaiifono mā tenekōimis. ²¹ Mato askafakakī shinākaniraka nō mitsisipakōira ikaxō. Ooa. Nōkai mitsisipama oa ato akaifo keskafakī nōri mato askafapanā. Akka nōkai mato askafamisma nōkairoko ato keskaraxō.

Akka nāfo āa yoimesharakakī mato afara yoimisfo keskafakī ēari ē yoimesharatiro. Ooa. Nā afaa tāpiamafo keskaraxō anā ē mato yoi. ²² Akka nāfo. “Nō hebreos yorāfo,” ikani. Akka ēri hebreo yora. Askatari, “Nō israeli yorāfo,” ikani. Akka ēri israeli yora. Askatari, “Nō Abraham āfe fena,” ikani. Akka ēri Abraham āfe fena. ²³ Akka, ĵnāfo fistimē Jesucristo yonoxomisfo? Maa. Akka ēroko yonoxokī finakōimis. Ooa. Ē iskafakī ē mato yoi oa shināsharayamaito yoiyai keskaraxō ē mekai askayamapaifi. Akka nā chanīmisfāfe mato yoikī iskafakani: “Nō Jesús yonoxokōimis. Askatari Jesúsxō noko karaxa mēra ikimanafo,” imisfo. Akka ēroko yonokī finakōimis. Nāskakē earoko karaxa mēra ikimakī finakōimisfo.

Askatari ea koshakī finakōimisfo. Ea askafakī fetsaifono mē nakerakōimis. ²⁴ Efe yora judeofāfe ea koshakakī cinco veces fakī ea koshamisfo. Nā ea kohaifo tii treinta y nueve ea famisfo. ²⁵ Romano xanīfofōfāferi āto chāti ea koshanifo tres veces fakī. Askatari ēfe kaifāferi tokirifāfe ea tsakakī fisti fanifo. Askatari kanōanāfānē ē pokedafainaino kanōanāfā fakafā fospia ikiaino mē āsakerani. Mā kanōanāfā fakafā mēra ikiano nā kanōanāfā āfe kaxke ē fakafā mānāo ē nononi āsaxikima. Fakish fisti ita pena fistiri ē ini. ²⁶ Mē kafāsamis, faka faiyaito mesekōi ē ōimis; askatari yometsoafāfe ea achikaxō ea mesenifaifono mē ōimis; askatari ēfe kaifokōifāfe ea mesenifaifono mē ōimis; yora fetsafāferi ea mesenifaifono mē ōimis; pexefā rasi anoxori ea mesenifaifono mē ōimis; tsōa istomaxori ea mesenifaifono mē ōimis; fakafā anoari mesekōi mē ōimis; “Nōri Nios Ifo sharakōifamis,” ikax a chanīmisfāfe ea mesenifaifonori mē ōimis. ²⁷ Ē omiskōiyanā ē yonomis xokenākōiyanā; askatari ē oxa tenekōimis; askatari ē fonāiyanā nomi tenekōimis; askatari ē pimisma; askatari matsi mei ē omiskōikōimis rapatimais ikax.

²⁸ Nāskarafo ē mei ē omiskōikōimis. Askatari afara fetsafoōnoaxri ē omiskōimis. Askatari mēxotaima ē mato shinākōimis nā mā ichanāxō keyokōichi mā nōko Ifo Jesús Ifofamis tii mā kachikiri fayamanō. ²⁹ Akka ē nika fētsa Jesús Ifofasharapaifi rateaino ē aōxō shināchakakōitiro. Akka fētsa a Nios Ifofaa afara chakafamakē ē akiki ōitifishkiki rāfikōitiro. ³⁰ Akka nā ē mato rama yoiāi keskara kakapaikī ē mato yoima. Ē mato yoi mā tāpinō ēa ē afaa atiroma. ³¹ Nā Nios fisti nōko Ifo Jesucristo āfe Apa, nāato tāpikōia ēkai chanīmisma. Iskafakī nō yoinō: “Epa Niospa, mī sharafinakōia;” ixō nō yoipakexanō. ³² Akka Aritas xanīfokōi iyopaoni. Nā Aritas fetsa nīchini Damasco anoax xanīfo inō. Damasco ano ē ikano, nāato āfe sorarofō yoini nā pexe rasi anoxō āfe kāiti anoxō ea kexenōfo ea achixikakī. ³³ Akka anoxō ea achipaiyaifono, nā nōko Ifo Jesús Ifofaafāfe fēta efapa mēra ea onekaxō pexe rasi kene fomākīaxō ea fotomanifo ē katanō.

12

Pablo āfe namapa ōiai keskara ōini Niospa tāpimanaino

¹ Akka ēa ē yoimesharai. A ēa ē yoimesharai keskarakai akai afaama. Nāskafekē nōko Ifo Jesús ea ōimana keskara ē mato yoinō. Nā ēfe namapa ē ōiai keskara ea ōimana. Nā tsōa nikamisma ea tāpimani. Nānori ē mato yoi. ² Mā catorce xinia finōa a Niospa ea ifirisafayoni, ē Cristo fe rafeaito ōikī. Ēkai tāpiama ēfe fero mēsho fisti nai mēra kani rakikīa, askayamai ēfe yora kani rakikīa. Nios fisticī tāpia a ē ini keskara. ³⁻⁴ Niospa nā ika ano ea ifirisafayoni. Nā ē mato yoiyoa keskara anā ē mato yoi. Ēfe yora iyamai ēfe fero mēsho fisti kani rakikīa ēkai tāpiama. Nios fisticī tāpia nā ē ini keskara. Nā ika anoxō ea afara nikamani keskara ē tsoa yoitiro. Akka ea yoikī iskafani: “A mī nika keskara tsoa yoiyamafe,” ixō ea Niospa yoini. ⁵ Ē nā ōia keskara ē fetsafo yoipaima iskafakī: “Niospa ea fisti nā ika ari ea ōimani,” ixō ē yoitiro. Ē anori yoipaima. Anori ē yoi kakapaimis ē itiro. Ēkai ēa ē yoimesharapaima. Ereskai ē afaa fatiroma. Nāskakē nā fisti ē yoisim inimakī. ⁶ Akka ēa ē yoimesharai ē yoimetiro. Ē anori yoi nā yora afaa tāpiamafāfe yoimisfo keskara ē yoima. Chanīmakōi eōnoa ē yoimesharatiro. Akka ēkai eōnoa ē yoimesharapaima eōnoa shinākī finakōinōfoma. Mā ea ōimis ē afe keskaramākī, askatari mā ea nikamis ē afe keskara yoimismākī.

⁷ Akka Epa Niospa a ika ari ea ōimani keskara tsōa ōimisma. Akka Niospa ea ōimaniōnoax ēa ē yoimesharapaitiro ē tāpikōiara ikax. Nāskakē Niospa nētefayamano Satanās ea isinī imani nā nō moxaki chachiano noko mōxa fekaxtefai keskafakī ēa ē yoimesharayamanō. ⁸ Nāskakē ē kifikī iskafani: “Ifo, ea sharafafe,” ixō tres ves fakī ē yōkani. ⁹ Ē askafaito nōko Ifāfe ea kemakī iskafani: “Ē mia noi. Askafixō ē mia sharafaima. Cristo mia axotiro na pae mī tenenō ē mefe rafekakaini. Mī mitsisipayamafikē ē mīōxō ē ato ōimatiro ē afama mīshiti fatiro,” ixō ea kemani. Nāskakē ē isinī ifiai ē inimasharakakaini. ¹⁰ Nāskakē ē mitsisipayamafix Jesucristoōnoax ē inimakōi. Nāskaxō ea īchafono ē tenemis, afaayayamaxri ē inimakōimis ea omiskōimanaifonori ē tenemis. Nāskatari afarafo fekaxkōifekē ē tenemis. Ē askafakī ē mitsisipayamafixō Jesucristoōxō ē afama mīshiti fatiro.

Pablo nā Nios chanīmara faafo Corinto anoafo ato shinākōini

¹¹ Akka nā yora afaa tāpiamafo āa yoimetirofo keskarax ēa ē yoimea. Akka mā eōnoa afaa yoisharama. Akka mā ea ōisharakī, “Nā Pablo sharakōi,” ixō mā eōnoa yoiano nā sharakōi ikerana. Nāskakē ēa ē yoimesharakōi fetsafāfe ea tāpinōfo ē afe keskaramākī. Akka ēkai ē afaa asharatiroma. Ēkai afaama. Nāskafekē nā eōnoa afara chaka mato yoimisfāfe ea finōkanima. ¹² Jesucristo ea nīchini aōxō āfe meka ē mato yoinō. Nāskakē tanaimakōi ē yonomis fena fenakima. Nāskara ē yonofaino Niospa afama mīshiti amis eōxō mā tāpinō Jesucristo ea nīchinikē. ¹³ Akka, ¿afeskakī mā iskafakī shināimē? “Pablo nā Nios chanīmara faa fetsafo ato shara fai keskafakī nokori shara faima,” ixō mā eōnoa yoitiro. Akka nā

Nios chanīmara faa fetsafori ē ato shara fai keskafakī, nāskarīfakī ē mato sharafa fafāfāini. Ēkai mato afaa fiapaimisma. Askatari ē mato fekastefamisma. Ea pimakape ea rapati safemayanā ē mato famisma. Ōitsai, ē mato afaa fiapaikima ē mato chakafaamakī ea raefakāfe.

¹⁴ Mē mato ari kai rafea. Akka iskaratīa mē itipinīsharax anā ē mato ari kai. Ē mato amis keskafakī anā ē mato yōkākī fekastefaima. Ē mato afaa fiapaitama ēroko mato shināfāfāini. Shinākapo. Fakefāfekai apa yafi afa pimatiroma. Akka afa fetaroko apa fakefo pimatiro. Akka māfi ēfe fakekōifo keskarakī. Akka ē mato Niospa meka tāpimasharakōia eōnoax mā isharanō. ¹⁵ Akka ē afarafo fikī mē kori potakī keyokōia, askafafīaxō ē shināchakaima, askatari ēakōi ē ināmei mā Niosnoax isharakōinō. Akka ē mato noikī finasharakōifianokai ōitsai mā ea noikī finasharakōimisma rakikīa.

¹⁶ Akka ē mato afaa yōkamisma. Akka fetsafāfe mā Corinto anoafāfe eōnoa yoimifiso iskafakakī: “Akka mā nō tāpia Pablo mato afaa yōkamisma. Askafixō mato pāraxō mato kori fiamis, Judea anoafō ē ato foxotanōra,” ixō. ¹⁷ ŪNā feronāfakefo ē matoki nīchinioxō ē mato pārāmē ē mato kori fiaxiki? Maa. ¹⁸ Ē Tito yoini iskafakī: “Corinto ano katāfe,” ixō ē yoini. Nā nōko Ifo chanīmara faa fetsafori ē matoki nīchini. Akka, ŪTitopa mato pārāmē mato afara fiakiki? Maa. Mē tāpia Titopakai mato afaa fiapaimisma. Nā ē mato fe imis keskai ari mato fe imis. Noko rafeta nō mato yoimis. Nāskara fisti nō mato afara shara faxopai noko rafe nō mato fe imis.

¹⁹ Mā shināiraka ē mato yoiyai keskara mā eōnoa shināsharanō. Maa. Anorikaima. Epa Niospa nā ē yoiyai keskara ea nikamis Cristo ea shināmanaino. Efe yora mīstichī, nā ē mato yoiyai keskafakī ē mato shara fapai Jesús shināi keskafakī māri mā shināsharanō. ²⁰ Akka ē tāpīama, ōitsai, ē ari nokoxō ōia a ē yoiyai keskai mā isharayamakē ē mato fichikai. Askatari ē matoki nokoaino ōitsai, mā ekeki inimaima rakikīa nā mā shināi keskai. Akka ē matoki nokoxō ōipai mā mā chaka xatexō mā Jesús Ifofasharaino. Akka ē matoki nokoxō ōia mā chaka xateyamanō ē shināmitsatiro. Mā fochishpanā faatanāta, fētsa fiati māri fi mā fīpaita, fetsa mekafata, ōitīfishkita, mares fisti mā fīpaita, mā chanīta, fetsafo mekafata, nō tsoa keskarama ita, isharayamata, mā askaito ē mato ōipaima. ²¹ Nāskatari ē shināchakakōi, shināyanā ōitsai Niospa atoōxō ea rāfimaniraka ixō ē shināi mā isharayamaino. Mā askaino ē matoki nokoax ē rāfikōixii mā afara chakafaino. Akka ranāri mā isharapaonima. Māto āfima fe mā oxapaoni. Askatari kērofori āto fenema fe oxapaonifo. Nāskatari afara chakafō fetsa fetsatapafo mā apaoni. Akka mā xateyamaino ē nokoax ē mato ōi ē shināmitsakōixii, rāfikōiyanā.

13

Pablo iskafakī ato yoini: “Anā afaa chakafayamakāfe,” ixō ato yoini

¹ Mē mato ōikī rafe faa. Iskaratīari anā ē mato ōikaikai. Ē anā mato ōikaikai mā mātō chaka mā xateamākī. Akka kirika ano Epa Niospa meka kenenifo iskafakī: “Fētsa afara chakafaito ōixō yōfaito, ‘Nato afara chakafaa,’ ixō rafeta yoiiaifono, askayamakī trespa yoiaino askayamakī ranāfi yoiiaifono chanīmara nō fatiro,” ixō kirika ano Niospa meka kenenifo. Nāskafakīri ē mato ano nokoxō ē nikai mā afara chakafaito mā afara chaka xateyamaito. Akka ē mato ōitiro mā chaka ikamākī, askayamai shara mā ikamākī. ² Akka anā ē mato ano kayoxō mē mato yoiyoni mā afara chakafanōma. “Mā afara chakafakī xateyamaino ē mato omiskōimaxii,” ixō ē mato yoiyoni. Anā iskaratīari chai ixō ē mato yoi kirika kenexō iskafakī: “Ē anā kaxō ē mato ōikai mā mā chaka xateamākī. Akka mā chaka xateyamaito ē mato omiskōimaxii. Akka tsoa pishtakai ē finōmaxima.” ³ Akka mā tāpipai Cristo eōxō mato yoiaino. Chanīma, mā samama tāpinō xafakīakōi ē mato ōimani. Akka ēakai ē mato yoima, Cristoōxō ē mato yoi. Jesucristo mītsisipakōikai mato tāpimani māto chaka mā xatenō. ⁴ Chanīma, Jesucristo nokoōxō ifi cruz ikakī mastaifono nā feronāfāke pachikōi keskara ini. Nokoōnoax nai āakai ifimenima. Nāskafinixakī iskaratīa Niospa sharaōnoax nia. Nāskarīfai nōri mītsisipama. Nāskafixō Jesús feta nā Niospa apaiyai keskara nō atiro Epa Niospa sharaōxō.

⁵ Akka māto shinā mēraxō shināsharakāfe chanīmamākī mā mā Jesús Ifofasharamākī. Māa tāpimesharakāfe. Akka, Ūmā mā tāpīamē Jesucristo mato fe ikano? Askayamai mā mā chanīmis rakikīa nō Jesús Ifofaira ifīaxō mā Ifofaama. ⁶ Akka mā mā ea ōikī tāpia ē Jesucristoōxō yonosharakōimiskē mato mēraxō. Nā mā chanīmara fakōipainō. ⁷ Ē mato Epa Nios kīfixomis mā afaa chakafanōma. Nokoōnoa shinānōfo ixokai ē Epa Nios kīfimisima. Iskafakī fetsafāfe nokoōnoa shinākani rakikīa: “Pablo fe rafeafāfe ato yonoxosharafoma,” ixō nokoōnoa yoiyani rakikīa. Akka noko askafaiifono mā Jesús Ifosharakōifai nāskara nō fichipai. ⁸ Akka Niospa meka shara fistiōnoa nō yoitiro. Aōnoakai meka chaka nō yoitiro mā āfe mekamāi sharakōikē. ⁹ Akka fetsafāfe nō afama noko askafakī shināfiifono

nō shināchakaima. Akka mā Jesúsnoax isharakōikē nō fāsi inimakōitiro. Akka nō mato Epa Nios kīfixona mā a keskara sharakōi inō. ¹⁰Akka ē mato kirika kenexona mato ari kayoxoma mā ea nikanō. Mē mato ari nokoxō ōia mā Cristo Ifo sharakōifaino ē mato ōitoshinō. Nāskakē mā isharakōiaino Niosxō fāsi mekakai ē mato yoima mā isharakōinō. Epa Niospa ea yoia ē mato yoisharanō mā Nios Ifo sharakōifanō isharakōixō.

Mā Pablo āfe meka xatekī ato yoisharani

¹¹Mē mekai xatekī ē mato yoisharai. Jesús keskara isharakāfe. Ea nikasharakāfe. Nānori fisti shinākāfe. Isharakāfe. Mā askaino Niospa mato noikōikī mato inimamasharai āfe Yōshi Sharaōxō mato fe ixō. ¹²Keyokōi nā mā Nios Ifofaa tii yoinōnāsharakāfe. ¹³Keyokōi nōko Ifo Jesús chanīmara faafāfe nā efe ikafāfe mato yoisharapaikani.

¹⁴Nōko Ifo Jesucristo mato axosharapai. Epa Niospari mato noikōi. Niospa Yōshi Shara mato fe rafepakexanō. Nā tii.

Ēkīa Pablo

Pablo Galacia Anoafo Kirika Kenexõ Fomani

Galacia anoxõ Nios Ifofaafõ Pablo ato kirika kenexõ fomani

¹ Ëkĩa Pablo, ã mato kirika kenexõ fomai. Niospa ea nĩchĩni aõnoa meka shara ã ato yoinõ. Yorafãfe ea nĩchinifoma, Jesucristo feta Epa Niospa ea nĩchĩni. Nã Niospa Jesucristo otofani mã nakẽ.

² Mã Galacia anoxõ Nios Ifofakẽ, na nono efe ikafãfe, akairi Nios Ifofakaxõ efeta mato kirika kenexõ fomakani. ³ Epa Niospa nõko Ifo Jesucristo feta mato noikĩ mato sharakõĩ fanõ. Askatari mãto õiti mẽranoax mã anã fekaxtenõma. ⁴ Nõ afara chakafamisno nokoõnoax Jesús nani nõko chaka noko soaxoxiki, askatari nã yorafo chakafo mẽranoa noko ifixiki Epa Niospa fichipaiyai keskafakĩ. ⁵ Nãskakẽ Nios sharakõĩ mẽxotaima fapanakafo. Nãskapakexapainõ.

Anã ano meka fetsama a nikax Epa Nios fe nõ ipaxanõ. Akka Epa Nios fistichi noko nimapakenaka

⁶ Ooa. Epa Nios potakanimara ixõ ã shinãmis, koshikõĩ kachikiri fayana mã potafiaino, Cristo mato noiaino Epa Niospa mato katofinino. Epa Nios fe ipaikakĩ ãfe meka shara nikafiyana, meka fetsa fetsatapafo nikakakĩ kachikiri famisfo. ⁷ Akka anã anokai meka fetsama, a nikax Nios fe nõ ipaxatiro. Akka nã Nios Ifofaafãfema mato fekaxtefakani. Meka fetsafaxõ anorima mato yoipaikani, Cristoõnoa meka shara mã nikapaiffaito a nikax afe ipaxakĩ. ⁸ Akka fetsafãfe Nios fe mã ipaxanõ Niospa mekaõnoa mato yoifkikĩ, meka fetsafaxõ anorima mato yoikani, mã nõ mato yoifimisno. Nã keskara yorafo nã omiskõipakenakafo mẽranoax omiskõipakenakafo, ã iyamai Niospa ãjiri itiro nai mẽranoax oax. ⁹ Nã ã taefakĩ mato yoiyoni keskafakĩ, iskaratĩa anã ã mato yoi. Fetsafãfe Nios fe mã ipaxanõ Niospa mekaõnoa mato yoifkikĩ anorima mato yoikani, mã nõ mato yoifimisno. Nãnorĩ mato yoikanax nã omiskõipakenakafo mẽranoax omiskõipakenakafo.

¹⁰ Ë yoiki iskafaino, yorafãfe eõnoa yoisharanõfora ixõ ã shinãima, askatamaroko Niospa eõnoa yoisharanõ. Ëkai yorafo eõnoa shinãmasharapaima. Akka yorafo eõnoa shinãmasharapai, ãkai Cristo yonoxomis itĩroma.

Jesucristo ea nĩchĩni ãfe meka sharaõnoa ã ato yoinõ

¹¹ Efe yora mĩstichi, xafakĩakõĩ ã mato yoipai. Na meka shara Jesucristoõnoa ã mato yoimis nõ afe ipaxanõ. Na keskarakai yorafãfe ãto shinãmã shinãmisfoma. ¹² Na meka shara ã mato yoimis keskara yorafãfe ea tãpimanifoma. Tsõarikai ea tãpimanama. Askatamaroko nõko Ifo Jesucristo ea tãpimana keskara ã mato yoimis.

¹³ A ã ipaoni keskara mã mã nikapaoni. Ëmãĩ judeoxõ a nõko xinifãfe yoipaoni keskara ã nikayopaoni. Mã mã tãpia mitsisipakõikai a Nios Ifofaafõ ã ato omiskõimapaoni, anã Nios Ifofayamanõfora ixõ. ¹⁴ Nõko xinifo judeofãfe yoipaonifo keskara ã nikakõini, ãfe kaifofõ ã ato finõkõini, efe yosifinifono. Ë nikakõikĩ a ãfe xinifãfe yoipaonifo keskara ã nikakĩ finakõini.

¹⁵ Akka taefakĩ Epa Niospa ea katoni ã fakeyoamano. Ea noikõikĩ ea katoni. Nãskakẽ ea tãpimapaikĩ ea askafani. ¹⁶ Nãskaxõ ãfe Fake ea tãpimani ãfe meka shara a judeofoma ã ato yoinõ afe ipaxanõfo. Nãskakẽ ãrama Jesús Ifofakĩ ã tsoa yõkaikai kanĩma ea tãpimanõ. ¹⁷ Nãskakẽ Jerusalén ano ã kayonima a taefakĩ Jesúsnoa meka sharaõnoa yoimisfo ato õikai. Askatamaroko Arabia mai ano ã kani. Nãskata Damasco ano anã ã oni.

¹⁸ Nãskata Jerusalén ari fena ã kayonima, mã xinia tres akax ã kani. Nãnoxõ ã Pedro tãpini, nãno ã afe oxa ranãyonĩ quince nia ã ini ano oxai. ¹⁹ Akka nã Jesús fe rafemisfo fetsafori ã õinima. Nõko Ifãfe ãfe exto Santiago fisti ã õini. ²⁰ Niospa ferotaifi ã mato yoikõĩ, na ã mato kirika kenexokĩ chanĩmakõĩ ã mato yoi.

²¹ Nãskata chipo Siria yafi Cilicia mai ano ã kani. ²² Akka Judea mai anoxõ Cristo Ifofafĩakaxõ ã tãpiayonifoma. ²³ Ea õiyamafikatsaxakakĩ eõnoa iskafakĩ yoiãifãfe nikapaonifo: “A na feronãfãke taefakĩ noko omiskõimapaofinixaki, iskaratĩa Jesúsnoa meka shara ato yoifofãsafai. Askatari noko keyokõĩ omiskõimakĩ noko xatemapaipaoni nõ anã Jesús nikanõma,” ixõ eõnoa yoinifo. ²⁴ Nãskaxõ eõxõ Epa Nios aicho fakani, mã Pablo Nios Ifofara ikaxõ.

2

“Na Pablori noko ani keskafakĩ Jesús katoa aõnoa ãfe meka shara ato yoinõ,” fanifo

¹ Mã catorce xinia finõta Jerusalén ano anã ã kani Bernabẽ fe. Titori ã iyoni. ² Ë ari kani Niospamãĩ ea yoiano. Nã Jerusalén anoxõ xanĩfofo fes ichanãxõ ã ato yoini a judeofoma Niospa meka sharaõnoa afe ipaxanõfo ã ato yoimis keskara. Nãskakẽ ã ato

yoini: “A ě ato yomis keskara sharamamāki, mī shara yoisimiki ea fakanimākai,” ixō ě ato yoini. ³ Nāskakē tsōakai Tito afaa fanima efe oiano. Tito judeoyamafiano foshki repa xatefe tsōa fanima. ⁴ Nānoa fetsafo nō Nios Ifofara ikanax one ikikanax nofe ichanānifo, Nios Ifofayamafikanax. Nāfāfe yoinifo iskafaki: “Titopari foshki repa xatetiro,” ixō yoinifo. Nāfāfe noko ōipaikani ikiafo ini, chanīmamāki tāpīpaikakī afeskax Cristo Jesús Ifofaax nō ikamāki. Noko anā yonomapaikani nō Jesucristo Ifofanōma a Moisés yoini keskara fisti nikanōfora ixō noko anā yonomapaikani. ⁵ Akka nāfāfe noko yoipaiyaifono nō ato nikamisma. Akka nō fichipaimis nā meka shara chanīmakōi Jesucristoōnoa mā nikakōinō afe ipaxaki.

⁶ Akka a xanīfofōfāfe ě ato fe ichanāino, “Nā mī ato yoiai anori sharamaki, meka fetsa shara ato yoife,” ea tsōa fanima. Akka afo xanīfofōfiano ě atoōnoa shināchakaima. Nāskarifiakī Niospa nōko femānāōxō noko onāima, akka Niospa noko tāpikōia. ⁷ Meka fetsa shara ea yoitamaro, afāfe tāpinifo a Niospa āfe meka ea yoini keskara a judeofoma āfe meka sharaōnoa ě ato yoinō afe ipaxanōfo. A Pedro yoini keskafakī judeofo na meka sharaōnoa ě ato yoinō. ⁸ Nā Nios fistichi Pedro nīchini judeofo mēra āfe meka sharaōnoa ato yoinō. Nāatori ea nīchini a judeofoma mēra ěri a judeofoma āfe meka sharaōnoa ě ato yoinō.

⁹ Nāskakē Santiago ikaino Pedro ikaino Juan ikaino, afāfe a Nios Ifofaafō ato ikikaxō ea tāpinifo Niospa ea nīchinino nā meka sharaōnoa a judeofoma ě ato yoinō. Nāskakaxō ea yafi Bernabē noko metakaxanifo. Noko askafakāta nokoki inimakaki noko yoikī iskafanifo: “Aicho, judeofoma mēra kaxō Niosnoa meka shara mā ato yoitiro,” noko fanifo, judeofoma mēra kaxō Niospa meka sharaōnoa nō ato yoikanō, akka afāfemāi nā judeofo Niospa meka sharaōnoa ato yoikakī. ¹⁰ Akka noko yoikī iskafanifo: “A afaamaisfo ato shināmakiyamakāfe. Afarayaxō ato inākāfe,” ixō noko yoinifo. Askara yoikī ea inimamanifo ěrimāi a afaamaisfo ě ato ināsharamiskē.

“Na mī akai keskara sharama,” Pablo Pedro fani Antioquia anoxō

¹¹ Akka Pedro Antioquia pexe rasi ano kaxō afara chakafaino āfe ferotaifi ě yoikī iskafani: “Na mī akai keskara sharama, mī chakafai,” ixō ě yoini. ¹² Akka taeyoi a judeofoma feta pipaonifo. Nāskaifono chipo a Santiago fe rafeafo fenifo. Mā feafono judeofoma makinoax Pedro paxkani anā ato feta pinima a rama feafoki atoki mesekī mī chakafai na judeofoma feta mī pii ea fatirofora ixō. Nāskakē anā a judeofoma feta pinima. Akka a judeofo rama feafāfe ato yoikī iskafanifo: “Mā Nios ari kapaikī mātō foshki repa mā xatetiro,” ixō mēxotaima ato yoinifo. ¹³ Nāskakē a judeofori Nios Ifofakanax nā Pedro ikai keskanifo. Nā Bernabēri ato fe askani. ¹⁴ Akka nōko xinifāfe Niospa meka sharaōnoa noko yoinifo nō afe ipaxanō anori Pedro nikayamaito ōikī yorafāfe ferotaifi ě Pedro yoikī iskafani: “Mī judeo. Akka a judeofoma fe mī imis, nāskax judeoma keskara mī imis. Akka, ¿afeskakī a nōko xinifāfe yoipaonifo keskara a judeofoma mī ato yoipaimē, judeofo keskara ixō?” ě Pedro fani.

Judeofo a judeofoma feta Nios Ifofakanax Nios fe ipaxatirofo

¹⁵ Akka nō judeokōifo nō sharakōifo nō afaa chakafakī finakōimisma na yora fetsafāfe amisfo keskafakī. ¹⁶ Askatamaroko mā nō tāpia a Moisés noko yoini keskaraōxō nōko chaka nō soatiroma Niospa noko omiskōimanōma. Akka nō Jesucristo Ifofaito nōko chaka noko soaxotiro, nō askainokai noko omiskōimaxima. A Moisés yoini keskara nō shināito nōko chaka noko soaxotiroma. Akka Jesucristo fisti nō Ifofaito noko omiskōimaxima.

¹⁷ Nōfi Cristoōxō nōko chaka nō soatiroki noko omiskōimanōma. Nāskara mā nō tāpifixō nō afara chakafamis. Akka nō afara chakafaito, ¿Cristo noko afara chakafamapaimē? Maa, askarama. Noko afaa chakafamatiroma. ¹⁸ A Moisés noko yoini keskara mā nō tāpia, aōnoaxkai Nios fe nō nipaxatiroma. Jesús fistichi nōko chaka noko soaxotiro nō afe nipaxanō. Nā nō chanīmara fai. Akka a Moisés keneni keskara afianā nō nikapai nō fenotiro Nios fe nō ipaxatiroma. ¹⁹ Akka a Moisés yoini keskara ayamakī mē tāpia ěkai aōnoax isharatiroma. ě askaino Epa Nios ekeki inimatiroma. Nāskakē nāfoōxō mē tāpia Cristo fisti ě chanīmara faino Epa Nios ekeki inimatiroma. Nāskax ě afe yora itiro. Akka iskaratīa a Moisés yoini keskaraōnoa anā ě shināpakenakama, atokai ea ikipakexatiroma. Askara shinātamaroko Nios fisti fe ě rafei afe isharaxiki. ²⁰ Nōko Ifo Cristo ifi cruz ikaki mastaifono nani keskai ěri ě afe naa keskarakōi ini. Nāskakē iskaratīa a ě ipaoni keskara anā ě ikima. A ě Jesús Ifofayamax ě ipaoni keskara anā ě shināima. Niospa Fake Cristo ea noikōi nā ipaiyai keskakī ea nāxoni. Nāskakē ě chanīmara faino iskaratīa Cristo efe ika a keskara shara ea imaxiki. ²¹ Akka Epa Niospa āfe Fakeōxō ěfe chaka ea soaxoni ě afe nipaxanō. ěkai afaa fetsa shināimisma nisharapakexakī, Nios fisti ě shinākōimis Nios fe nipaikī. A Moisés kenenioxō nōko chaka nō xateax Nios fe nō nipaxafiatirono Cristo noko nāxokeranima. Āakōi Cristo noko nāxokerani.

3

A Moisés yoini keskara nõ nikayamakī nõ Jesús chanīmara fakõinaito nõko chaka noko soaxotiro

¹ Efe yora mīshtichi Galacia anoafāfe, māfi oa yõra shināsharaima keskarafoki. Akka, ¿tsõa mato paraimē oa mato parakani afianā mā shināsharanõma? Akka nõ xafakīakõi mato yomis Jesucristo ifi cruz ikakī mastafono matoõnoax nani. Nõ mato yoisharafimisno meka fetsa nikakī mā anorima shināmis. ² Akka ē mato yõkapai mā ea yoinõ a Moisés noko yoini keskara tāpixõ mā Niospa Yõshi Shara fiamāki, askayamakī Jesucristoõnoa meka shara nikaxõ mā fiamāki. ³ Niospa Yõshi Sharaõxõ Jesús mato amapaiyai keskara mā ayopaoni. Akka iskaratīa mā shinākī iskafai: “A Moisés noko yoini keskara nikax nõ isharatiro,” ixõ mā shināmis. Ooa. ¿Afskakī oa yorafāfe shināsharaifoma keskara mā shināimē? ⁴ Mā Jesús Ifofaino mato omiskõimapaonifo, askafikī Niospa Yõshi Sharaõxõ mā Jesús Ifofasharamis. Akka afianā mā Jesús Ifofayamai mākõi kaxpa mā Jesúsnoax omiskõipaoni. Mā askayamapainõ. ⁵ A mā nikamis keskara mā mā chanīmara fakõina. Nāskakē āfe Yõshi Shara mato mēra naneyanā, tsõa atiro ma keskafakī afama mīshti mato faxõfa. Moisés kenenioxokai mato askafaxõama.

⁶ Shinākapo. Abraham Nios chanīmara faito Niospa yoyoini iskafakī: “Mī ea chanīmara faito mī chaka ē mia soaxoni mī efe ipaxanõ,” ixõ yoini. ⁷ Nāskakē tāpisharakāfe nā Abraham āfe fenafāfe nā Nios chanīmara faifāfe, nāfāfe chanīmara fakõinafoki. ⁸ Epa Niospa a inõpokoai keskaraõnoa tāpiyoni a nõko kaifofofāfemari Ifofaifono āto chaka ato soaxota ato imasharaxixakī. Askaifono atoki inimakõini, akka Niospa Abraham yoyoini iskafakī: “É mīõxõ keyokõi nā maifo tii anoafõ ē ato sharafaxii,” ixõ Niospa yoinino kenenifo. ⁹ Nāskakē Abraham chanīmara fani keskafakī, akairi chanīmara faifono Epa Niospa ato sharafaxõi, Abraham sharafaxoni keskafakī.

¹⁰ Akka fetsa shinākī iskafai: “Moisés yoini keskara ē nikai ē isharakõi,” ixõ shināi afi āfe chaka aõ nepakenaka. Akka kirika kenekī yoikī iskafanifo: “Moisés yoikī kirika kenekī iskafakī yoinino: ‘A Moisés yoini keskara nikayamakani āto chaka āto nepakenaka,’ ” ixõ yoinifo. ¹¹ Akka fetsa Epa Nios chanīmara faino āfe chaka soaxota imasharakõitiro. Akka fetsa a Moisés yoinioxõ āfe chaka soapaikī iskafakī shinātiro: “Moisés noko yoini keskara nõ nikaito Epa Niospa noko imasharatiro,” ixõ shināfiafonokai Epa Niospa a Moisés yoini keskaraõxõ ato imasharatiroma. ¹² Akka mā nõ tāpia Jesús fisti nõ chanīmara faax Epa Nios fe nõ ipaxatiro. Akka a Moisés noko yoini keskaraõnoax nõ askatiroma. Akka Moisés noko yoini iskafakī: “Nā Niospa noko yoini keskafakī mēxotaima nõ nikayamax Nios fe nõ ipaxatiroma,” ixõ noko yoini.

¹³ Akka a Moisés noko yoini keskara: “Nõ nikayamaito Epa Niospa noko omiskõimaxira,” ixõ kenefinifono, noko omiskõimatama, āfe Fake omiskõimani. Niospa meka kenenifo iskafakī: “Fatora fetsa ifi cruz ikakī mastafono, atori Epa Niospa omiskõimaxii akairi omiskõinõfo,” ixõ kenenifo. Akka nõ afara chakafamisno Cristo nokoõnoax ifi cruz ikakinoax nani. Noko nāxoyamanikē nõ omiskõipakexakerana. ¹⁴ Akka Epa Niospa Abraham sharafani keskafakī, judeofori Jesucristoõxõ ato sharafaxii. Nāskakē a chanīmara faifo tii ato yoyoini keskafakī āfe Yõshi Shara atoya rafematiro. Akka Cristo nokoõnoax nani Apa Nios fe nõ ipaxanõ. Nāskatari Niospa Abraham yoyoini keskafakī chanīmara faifono a judeofomari ato imasharaxii.

Niospa Abraham yoyoinino Moisésri ato yoini nikanõfo

¹⁵ Efe yora mīshtichi, iskaratīa nā nõ amis keskaraõnoa ē mato yoi mā tāpinõ. Feronāfake mā āfe feronāfake yoioyõxõ anā shinākī fetsafatiroma māmāi āfe ane kenexõ. ¹⁶ Nāskarifiakī Epa Niospa Abraham yoyoini āfe fena fistiõnoa yoikī. Āfe fena Cristo fistiõnoa yoini. ¹⁷ Ē mato xafakīa yoinõ Epa Niospa Abraham yoyoini keskara cuatro cientos treinta xinia finõta Epa Niospa Moisés yoinikī. Niospa Moisés yoinino akka Abraham yoini keskara anā fetsafatiroma. Nā yoyoini keskakõimis. Nāskaxõ Epa Niospa anā shinākī fetsafanima, nā yoyoini keskara amiskī. ¹⁸ Epa Niospa Abraham yoyoini keskara Abraham chanīmara faito, chipo Epa Niospa Abraham noikī āakõi axosharakõini.

¹⁹ Akka, ¿afeskai a Moisés yoini keskara sharamē? Ē mato yoinõ, ea nikakapo. Niospa yoiaino Moisés keneni yorafāfe tāpinõfo afeskax isharatirofomāki, Niospa fichipaiyai keskai. Askatamaroko tsoa askamisma, nikayospakõimisfo. Nāskakē Epa Niospa āfe ājirifo yoini afāferi Moisés yoinõfo Moisésri yorafa yoinõ yorafāfe nikakõinõfo Abraham āfe fena Cristo oyoamano. ²⁰ Akka Epa Niospa Abraham anori yoinima. Āfe ājirioxõ yoyamata, yorafõxori yoinima. Epa Niospa āakõi yoipaiyai keskafakī Abraham yoini.

¿Afskakī Epa Niospa Moisésxõ ato yoinimē?

²¹ Akka, ¿Epa Niospa a inõpokoaifo yoiyoni keskara yafi a Moisés yoini keskarakõiri mã shinãimamê? Maa. Epa Niospa mekakai rafema. A Moisés yoini keskaraõxõ noko nima-pakexatirokê Epa Niospa nãfoxõ nõko chaka noko soaxokerana nõ a keskara shara inõ. ²² Akka Niospa meka yoikĩ kirikiki kenekĩ iskafanifo: “Keyokõichi nõ afara chakafakatsax-akĩ nõ nõ karaxa mēra ika keskarakõi,” ixõ kenenifo. “Akka Jesucristo nõ chanĩmara faito aret fisti noko kãimatiro afara chaka nõko ifo inõma.” Nãskarakõi yoikĩ kenenifo.

²³ Nãskakê nõ chanĩmara fayopaonima. Akka Cristo oyoamano a Moisés noko yoini keskaraõnoax oa karaxa mēra ika keskarafo nõ iyopaoni. Akka mã Cristo oano nõ chanĩmara faino noko kaimanano anãkai oa karaxa mēra ika keskara nõ itiro. ²⁴ Nãskakê nõ tãpitiro Epa Niospa apaiyai keskafakĩ Moisés noko yoini. Nãskakê nõko ifo keskara iyopaoni. Akka Cristo oaino nõ chanĩmara faino nõko chaka noko soaxota noko imasharaxiki. ²⁵ Nõ askafipaonixakĩ mã Cristokõi nokoano a Moisés yoini keskara afianã nõko ifo itiro. ²⁶ Akka mã chanĩmara faax Niospa fakekõifo mã iki mãmãi Cristo Jesús Ifokõi faxõ.

²⁷ Keyokõi mãfi mã mã Cristo fe rafekõiakĩ mã maotissimeax keskarax Niospa Yõshi Shara mato mēra naneano. Nãskax oa rapati fena shara safea keskarakõi mã. ²⁸ Epa Niospa Cristoõxõ keyokõi nõ maifo tii anoafõ keyokõi nãskarafõ noko õi. Judeofõya a Judeofõma, a ato yonomatifoia a yonomatifoia, feronãfakefoia kērofo, nãskarafõ noko õi. Jesucristo nõko Ifo ikano aõnoax yora fisti keskara nõ itiro. Akka keyokõichi nõ Ifofaax nõ afe yorafo. ²⁹ Akka mã Cristo afe yorax Abraham afe fenafõri mã iki. Nãskakê nõ keyokõi Epa Niospa Abraham yoiyoni keskara mãtonãri iki.

4

¹⁻² Akka ã mato iskara yoipai. Apa naano afe fãke afe apanãfo fitiro. Nãskakê nõ fake yomekê, fetsafãfe afe afama mãshtifo kexesharaxoyokaxõ, nõ fake yome yonomayotirofo. Nãskakê ãpa yoini keskafakĩ ãa yosiyonõ, yora fetsafãfe afe afama mãshti kexexoyotirofo. ³ Nãskarifiakĩ nõ Cristo Ifofayoamano nõ oa fake yome keskarakê nõko xinifãfe noko yoipaiyai keskafakĩ noko yoipaonifo. Nãskakê ato yonoxomis keskara nõ iyopaoni. Nã Cristo chanĩmara faafãfema amisfo keskara noko amapaonifo nõ ato yonoxomis keskara inõ. ⁴ Akka Epa Niospa nõ yoinitã, afe Fake nĩchini, kēromã xakĩ mēranoax kãini judeokõi nõ Moisés noko yoini keskara nikakõipaoni. ⁵ Akka nono mai ano oni, noko imasharaxii a Moisés yoini keskara nikapaimisfono, nãskax Niospa fakekõi keskara nõ inõ.

⁶ Chanĩma, mãfi iskaratĩa Niospa fakefoki. Nãskakê Epa Niospa afe Yõshi Shara nõ mēra naneano aõxõ nõ yoitiro iskafakĩ: “Epa Niosi, mifi ãfe Epakõi,” ixõ nõ yoitiro. ⁷ Nãskakê iskaratĩa mã Niospa fakefo, a Moisés yoini keskara nõ anã nikaima nõko ifo inõ. Nãskakê afe fakefo afara inãsharai keskafakĩ matorĩ afara inãsharaxii Jesucristoõxõ.

Pablo a Jesús Ifofafo ato shinãkõini

⁸ Akka taeyoni mã Nios tãpiyoamã nã nioskõimafo mã ato nikaito mato yonomayopaonifo. ⁹ Mã mã askapaonixakĩ, akka iskaratĩa mã mã Nios tãpikõia. Epa Niospari mato tãpikõia. Mã mã Nios tãpikõifiax, ¿afeskakĩ a mã apaoni keskafakĩ afianã mã ato yonoxopaimê? Afãfekai Epa Nios xanĩfo ika ari mato iyotirofoma. ¹⁰ Nã mãto xinifãfe yoinifo keskai mã askakõimis. Nãskakê pena safaronõ mã tenemis, askatari rama oxo kãiyaino mã fista amis, askatari rama xinia ino mã fista amis, askatari seis xinia finõmata mãto tare mã fanamisma. Mã shinãkĩ iskafamis: “Nã fistatĩa nõ ato fe inimaino Epa Nios nokoki inimatiro, nãskaxõ nõko chaka noko soaxotiro,” ixõ mã anorima shinãmis. ¹¹ Ë mato shinãkõimis ã mato yonoxopaoni. Ë mato Jesúsnoa yoikĩ kaxpa ã mato yoipaoni rakikĩ mã shinãyamafianõ.

¹² Efe yora mãshtichi, ã mato yoisharapai ã akai keskafakĩ anã mã Jesús Ifofanõ. Mã Jesús Ifofai keskafakĩ ãri Ifofaaki. Ë mato fe ikano mã ea chakafapaonima, askatamaroko mã ea sharafapaoni. ¹³ Akka mã mã tãpia Epa Niospa ea nētefani taefakĩ Niospa meka sharaõnoa ã mato yoinõ nõ afe ipaxanõ. Akka ã isinĩ iki ã anã katiroma ini. Nãskakê ã mato ano nēteni. ¹⁴ Ë isinĩ iki ã omiskõifianõ mã ea iskafanima: “Pablo isinĩ iki mesekõi nõ afe ichanãtiroma,” mã ea fanima. Askatamaroko mã ea ifisharakõini oa Niospa afe ãjiri keskara õikĩ, askatari oa Jesucristo keskara ea õikĩ mã ea ifisharakõini, askatari mã ea kexesharakõipaoni. ¹⁵ Ë mato yoiaino mã inimapaoni. Akka, ¿afeskai iskaratĩa a mã ipaoni keskai anã mã inimaimamê? ¿Mã shinãimamê a mã ea noikõipaoni keskara? Ë afara yopaito mã ea inãpaoni ea noikõiyana. Akka mãto ferori tsekatiro pinikê mã ea inãkerapaoni. ¹⁶ Akka, ¿mã shinãimê na meka chanĩmakõi yoikĩ ã mato noikaspai keskara?

¹⁷ A Moisés yoikĩ kenenĩ keskara yora fetsafãfe mato tãpimapaikani. Nãfãfe a shinãifo keskara mato tãpimapaikani mã ato keskara inõ. Akka a akaifo keskara mã ato feta aka a keskarakai sharama. Nãskaxõ nãfãfe noko paxkanã fapaikani afianã mã ea nikatama afãfe mato yoiaifo keskara mã ato nikanõ. ¹⁸ Akka fetsafãfe mato sharafaifono shara

itiro. Ë mato fe iyamafiano mato sharafaifono, nãskarari sharakõ itiro. Jesucristoõxõ mato sharafaifonori sharakõ itiro. ¹⁹ Ëfe fakefãfe, afianã ã matoõnoax omiskõikĩ ã pae meekõ. Nã kãromã fake kãikĩ pae meetiro keskarakõ ã mei. Akka mã fake kãixõ anã pae meetiroma. Nãskarifiakĩ mã Jesũ Ifofayamaino ã matoõxõ pae meekõitiro. Akka Cristo ãfe Yõshi Shara mãto õiti mãra naneano afianã ã matoõxõ pae meetiroma. ²⁰ Ooa. Iskaratã ã ano mato fe ipainõ afianã ã mato yoisharaxiki. Akka ã tãpiama a mã shinã keskara mã anorima shinã. Akka ã ano mato fe ixõ ã mato yoisharakõikerana.

Agar fe Sara ipaonifo keskaraõnoa noko yoi

²¹ Niospa shinãmanaino a Moisés kirika keni keskaraõnoa mã anã nikapaimãkai Nios Ifofakaspakĩ ea yoikapo ã mato yoinõ. Akka, ¿a Moisés yoini keskara mã nikamismamẽ? ²² Iskafakĩ yoikĩ keniifo: “Abraham fake rafeya ini. Fetsa ãfe ãfinĩ yonomati feta fake ani, fetsa ãfe ãfikõ feta ani. Nã ãfe ãfikõ tsõa yonomati inima,” ixõ keni. ²³ Nã Abraham ãfe ãfinĩ yonomatinĩ fake fini, nã kãrofãfe fake fimisfo keskarari fake fini. Akka Abraham ãfe ãfikõ yõxafokõ ini fake fitiroma. Nãskafekẽ Epa Niospa Abraham yoyoni iskafakĩ: “Mĩ ãfinĩ fake feronãfake fixii,” ixõ yoinino, nãskakẽ Abraham ãfinĩ fake feronãfake fini. ²⁴⁻²⁵ Nã xotofake rafeoxõ Niospa afara fetsa noko shinãmani. Niospa yoyoni afeska faxõ yorafo ifitiromãkĩ. Nã kãro Agar nõ shinãino machi Sinai noko shinãmani, Arabia anoa. Nã machi ãfe ane fetsa Agar. Nã machi arixõ Niospa Moisés yoini Moisésri nã israelifo ato yoinõ nikakõinõfo. Askatari nã kãro Agar nõ shinãino noko Jerusalén shinãmatiro. Nã Jerusalén ano ikafo nõ shinãino nã Agar ãfe fakefo noko shinãmatiro. Nãfãfe Moisés yoini keskara nikakanax nãfo ãto yonomati keskarafo. ²⁶ Akka nãno kãro fetsa Abraham ãfe ãfikõ. ãfe ane Sara, nã nõko efakõ keskara. Nõ Sara shinãino Jerusalén fetsa nai mãraano noko shinãmatiro Epa Nios ika aria. Nãskakẽ chipo nõ ari ixii. Nõri Sara keskara nõ ãto yonomatima, ãfe fakefori nõto yonomatifoma. A Moisés yoini keskarakai nõko ifo itiroma. ²⁷ Akka kirika kenekĩ iskafanifo:

Kãromã, mã fake fimismakĩ inimafe, askatari mã fakeyamakĩ inimayanã tai tai ife mã fake pae meemismaki. Akka nã kãro fenẽ eneyoa nãfi chipo ãfe fena ichapayakõ ixii kiki, a kãro feneya finõmainifofã, ixõ yoikĩ kirika ano keniifo.

²⁸ Efe yora mĩstichi, nõfi Isaaca keskaraki. Epa Niospa Abraham yoyoni keskai ãfe fake Isaaca chipo kãini. Nãskarifiakĩ Epa Niospa yoyoni keskai nõri ãfe fakefo. ²⁹ Nã ãto yonomati Agar yõxafoxõ ãfe fake fikĩ taefani ãfe ane Ismael. Akka nã fake fimismato Sara chipo yõxafoxõ fake fini Niospa Yõshi Sharaõxõ. Nãskano Agar ãfe fake Ismael iyoxõ ãfe exto omiskõimapaoni. Nãskarifiakĩ Niospa Yõshi Sharaõnoax nõ Niospa fake ikaino, fetsafãfe Nios Ifofakaxoma noko omiskõimatirofo. ³⁰ Akka kirika kenekĩ, ¿afaa fanifomẽ? Kenekĩ iskafanifo: “Mĩ fake Isaaca ã inãxiai keskara, akka nã mãto yonomati Agar ãfe fãke afaa fixiima. Nãskakẽ mato anoxõ ãfe fakeyafi ato nĩchikãfe afianã mato fe inõfoma,” ixõ Epa Niospa Abraham yoini. ³¹ Nãskakẽ ã mato yoi efe yora mĩstichi, nõkai a ãto yonomatinĩ fake keskarafoma. Askatamaroko nõfi Abraham ãfe ãfikõichi fake keskarafo. Nãskaxõ nõ Nios Ifofaax nõ tsõa yonomati itiroma, nõ Niospa fakekõifo itiro.

5

Cristoõnoax isharakãfe a mã ipaoni keskara chaka anã shinãkakima

¹ Akka Cristo nokoõnoax nani a Moisés yoini keskara nõ anã nikanõma, nãskax anã ãto yonomati nõ inõma. Cristo fistiõnoax nõ isharatiro, nãskakẽ Cristo kachikiri fayamakãfe. Mã ipaoni keskara anã iyamakãfe, nõko xinifãfe yoinifo keskara afianã nikayamakãfe ãto yonomatifo ixikakĩma.

² Ë mato yoinõ, ea nikasharakapo. Iskafakĩ shinãyamakãfe: “Ë foshki repa xatekema Epa Niospa ãfe chaka ea soaxotiroma,” ixõ shinãyamakãfe. Anori mã shinãito Jesũ mãto chaka mato soaxotiroma Epa Nios fe mã ipaxanõ. ³ Afianã xafakĩakõ ã mato yoipai. Fatora fẽtsa mã foshki repa xatepai Nios fe ipaikĩ, anori shinãfikĩ nã Moisés yoini keskara nikakõimax, anorima shinãx Nios fe mã nipaxatiroma. ⁴ Moisés yoini keskara fisti mã nikaito mãto chaka mato soaxotiroma. Nãskax mã Cristo fe rafeima, akka Epa Niospa mato noifiaino mã Cristo fe rafeima, akka Epa Niospa mato noifiaino mã Cristo kachikirifai. Nãskafekẽ mato afeska fatiroma mãto chaka mato soaxona mã afe ipaxanõ. ⁵ Akka Niospa Yõshi Sharaõxõ mã nã tãpia, Cristoõxõ nõko chaka noko xoaxotiro Niospamã noko noikõikĩ. Nãskakẽ nõ manasharã. ⁶ Nõ foshki repa xateano, askayamãkĩ nõ xateamano, afãfekai nõko chaka noko soaxotiroma. Akka nõ Jesucristo Ifofakõinaino fetsafo noko ato noimasharakõitiro nõ ato noisharakõinõ. Nã fisti nõ fichipai, chanĩmara fasharakõixii.

⁷ Mā Jesús Ifofasharayopaoni. Akka, çtsõa mato yoiamē, na meka sharakõi kachikiri-fayanā mā anā nikanõma? ⁸ Akka Niospakai anori mato yoiamā. Afe Fake fisti mā chanimara fanõ mato yoia. ⁹ Akka mato mēraxõ yora fistichi chaka shināki, nā fistichi keyokõi mato afara chaka shināmatio, aõxõ chakakõi mā shināno. ¹⁰ Ë Nios kifīyanā nõko Ifo ē chanimara fakõini, ē akai keskafakī mări chanimara fanõ. Akka nā mato fanirira chaka shināmanaifo Niospa ato omiskõimaxii.

¹¹ Efe yora mışhtichi, akka eõnoa yoikī mā iskafamis: “Na Pablo yoimis nõ foshki repa xateamax nõ Nios ari katiroma ixõ yoimis,” mā ea famis. Maa, ekai anori yoimisma, ē anori yoiaito ea omiskõimakeranafo. Akka ē yoimis: “Jesucristo ifi cruz ikaki mastaifono noko nāxonni, nõko chaka noko soaxoxii Epa Nios fe nõ ipaxanõ,” ixõ ē yoimis. Nānori ē yoiaito nikakī nā Jesúsnoa nikakaspamisfāfe ea omiskõimamisfo. ¹² Akka fetsafāfe mato yoimisfo iskafakakī: “Mā foshki repa xatexoma mā Nios chanimara faima,” ixõ fanirira mato shināmamisfo. Nānori yoikakī mato fekaxtefamisfo, nāfo anā mato fe iyamapainõfo.

¹³ Efe yora mışhtichi, Jesucristoõxõ iskaratīa afe meka fisti nikakõikāfe. Afaa fetsa mato yonomayafiaino chakafayamakāfe. Jesucristo mato imasharakī iskaratīa nā nõ apaiyai keskara nõ atiro iyamakāfe. Akka fetsafo fe axõ faatanākāfe noinākõiyānā. ¹⁴ Akka Niospa Moisés yoini iskafakī: “Nā mā noimeai keskariakī fetsafori noisharakāfe,” ixõ yoini. Mā askafakī nā Niospa Moisés yoini keskara, keyokõi mā aki. Mā askafakī keyokõi a Niospa Moisés yoini keskara mā aki. ¹⁵ Akka mā chakafaatanax mā keyotiro, oa paxta rafe keyonākanax retenātirofo keskai. Nāskakē kexemesharakāfe askaxikakīma, a mato feta Nios nikamisfo anā mato fe ichanātirofomaki. Askatari Nios kachikiri fatirofoki.

Nõko shinā mēraxõ nõ afara chakafapaimis keskara yafi a Niospa Yõshi Sharaõnoax nõ isharatiro Pablo ato yoini

¹⁶ Akka ē mato yoi Niospa Yõshi Shara nikasharakāfe aõnoax isharaxikaki. Nāato mato yoitiro mā afeskaimākai. Nā nikakõixõ afianā a mā apaoni keskara mātõ shinā mēraxõ afara anā mā atiroma. ¹⁷ A nõko shinā mēraxõ nõ afara chakafapaiyai keskarakai Niospa Yõshi Sharapa shināima. Nāskaxõ afe Yõshi Sharapa noko amapaiyai keskara nõko shinā mēraxõ nõ shināfikī nõkai askafapaimisma. Nõko shinā mēraxõ nõ shināpaoni keskarakai Niospa Yõshi Sharapa anori shināmisma. Akka nā nõ apaiyai keskafakī nõ atiroma. A nõ afara chakafapaoni keskara nõ anā ayamakī Niospa Yõshi Sharapa nõko shinā mēraxõ noko yoiai keskara nõ nikakõitiro. ¹⁸ Nāskakē Niospa Yõshi Shara nofe rafeaino a Moisés yoini keskara anā nõko ifo itiroma noko yonomaxiki.

¹⁹ Fetsafāfe Nios nikakaspakakī afarafo chakafakani. Mā mā tãpia afe keskarafo ikafomāki. Nāskakē feronāfakēfāfe āto āfimafo chotamisfo. Nāskakata afara fetsa fetsatapafõ chakafamisfo. ²⁰ Nāskakaxõ afara yora fakaxõ na nõko niosra ixõ kifimisfo. Askatari koshõiti tãpiafo, askatari ato noikaspamisfo, askatari isharakātama õitifishkimisfo. Nāskakaxõ atonā fisti afara apaimisfo, askatari noikaspa faatanāmisfo nores fisti nõ tãpikõia a nõ tãpia keskara tsõa tãpiama ikanax. ²¹ Nāskaxõ fetsafo afara fãpaimisfo, askatari pãemisfo, askatari pikifinapaikõimisfo. Nāskakaxõ afara fetsa fetsatapafõ chakafamisfo. Ë mato yoimis a keskara chakafo Epa Niospa keyokõi ato ikinā ano tsoa katiroma afe ipaxakakī.

²² Akka Niospa Yõshi Sharapa noko ikināno fetsafo nõ noikõitiro inimakõiyānā, askatari nõ isharakõita nõ fekaxtetiroma, askatari fena fenakima nõ manasharakõiyotiro, askatari nõ fetsafo chakafamisma itiro, askatari nā nõ yoimis keskara nõ atiro isharakõita. ²³ Askatari isharakõita, fetsafo fe feratenātama oi tsifaxõ ato yoimis ita, askatari a Niospa fichikaspai atama nõa nõ kexemetiro afaa chakafaxikima. Nāskaxõ Niospa afe Yõshi Sharaõxõ noko yoia keskara nõ atiro isharaxiki. Nāskakē anā meka fetsa nõ yoipaima Niospa Yõshi Sharaõnoax isharaxiki. Nāskakē anā noko tsõa yonomatiroma. ²⁴ Nā Cristo chanimara faifo tii afe yorakõifo. Jesús cruznoax noko nāxonni nõko chaka noko soaxoxiki. Akka nõ naa keskaraõ anā afaa nõ chakafatiroma a nõ apaoni keskara. Nāskakē nā noko Niospa amapaiyai keskara fisti nõ atiro. ²⁵ Nāskakē Niospa Yõshi Shara fe nõ rafekī nā noko yoiai keskara nõ nikakõitiro. Nāskaxõ nā noko amapaiyai keskara nõ atiro.

²⁶ Nāskakē Niospa Yõshi Shara fe nõ rafeax kakapaimis nõ itiroma, fetsafāfe nokoõnoa yoisharanõfora ixõ ē mato finõkõiara iyamakāfe. Mā askakī fetsafo mā shināchakamatiroki. Mā askara chakafo shināki mā shināsharatiroma, askara chakakõiki.

6

Mā ranā axosharanõnā faatanākāfe

¹ Efe yora mışhtichi, fetsa afara chakafaito õikī, Niospa Yõshi Sharayaxõ aõ noikī oi tsii faxõ yoisharakāfe, afara chakafakī xatenõ. Meka mitsisipato yoiyamakāfe. Nāskakē mări kexemesharakāfe afara chakafayamaxiki. ² Nāskakē fetsafo fe afara axonõnā faatanāsharakāfe. Mā ranā Nios Kifinõnā faatanākāfe. Fetsa omiskõiaito aõ noikī inimamakāfe, nāskakē

kexenōnā faatanāsharakāfe. Fetsa omiskōiatio Nios kīfixokāfe Jesúsnoa shināmasharayanā Ifo sharafanō. Mā askakī nā Cristo yoini keskara keyokōi mā akikai.

³ Akka fētsa shinākī iskafai: “Ē sharakōi. Ēkai tsoa yopaima ea Nios kīfixonō,” ixō shināi. Nā keskara yorakai afama, āakōi pāramei. ⁴ Akka nō nōko shinā mēraxō nō shinātiro nō Jesús yonoxōsharaimākai. Akka nō yonoxōsharai mā nō tāpiax nō inimasharātiro. Nāskakī nō shinākī iskafatiroma: “Na fetsafāfe afara chakafaifo keskafakī ē afaa chakafamisma,” ixō nō shinātiro. ⁵ Akka keyokōichi nō afara chakafamis. Nāskaxori keyokōichi nōko shinā mēraxō nō shinātiro a nō afara chakafamis keskara. Tsōakai a Niospa noko amapaiyai keskara noko amatiro, nōakōi nō atiro.

⁶ A Niospa meka mato yoimisto afara yopaito ināsharakāfe.

⁷ Mārifi anofi pārameyamakāfe, tsoari Nioski kaxemetsamapaitiro. Akka akiki kaxemetsamapaiyaifono Niospa ato omiskōimatiro. Akka afara nō fanaxō mā fimiano āfe fimi nō fitiro. Nāskarifiakī Niospa meka nikayamata nō afara chakafaax nō omiskōitiro. Akka nā Niospa noko yoia keskara nō akax nō isharakōitiro. ⁸ Akka fētsa āfe shinā mēraxō afara shinākī afara chakafaax omiskōifinakōitiro. Akka Niospa Yōshi Sharapa amapaiyai keskara fētsa afafāini, nāfi Niospa Yōshi Sharaōnoax nisharapakenakakī. ⁹ Nāskakē afara sharafakī eneyamakāfe. Nāskaxō iskafakī shināyamakāfe: “Mē fetsafo sharafayomiski iskaratīa ē anā askaimakai, ē anā fetsafo sharafatiromaki. Nāskanō,” ixō anori shināyamakāfe. Akka nō askatama nō inimakōikē nā noko ināpaiyai keskara shara Niospa noko ināsharaxii. ¹⁰ Nāskakē afeskaraiāfe ōikī keyokōi ato axosharafafāikāfe. Nāskatari a Nios Ifofafo ato noisharayanā ato axosharafafāikāfe.

Pablo mā mekai xatekī ato yoisharani

¹¹ Akka iskaratīa ēkōi mato kirika kenexoni. Ēfe kene efapakōikī ōikapo. ¹² Akka fetsafāfe mato yoipaikani iskafakakī: “Māto foshki repa xatekāfe nōri askaraki,” ixō mato yoimisfo. Akka mato yoipaikanima a Jesucristo ifi cruz ikakinoax noko nāxonī nōko chaka noko soaxoxiki. Askara mato yoimisfoma, askara nō ato yoiaito noko omiskōimatirofora ikaxō. ¹³ Nāfāfe mā foshki repa xatefikaxokai a Moisés kenenī keskara tsōa nikakōimisma. Nāskakaxō matori yoipaikani māto foshki repa mā xatenō. Māri nā imisfo keskai mā ato fe askaito, nāfāfe fetsafo yoitirofo iskafakakī: “Nāfāfe noko nikakōimisfo,” ixō ato yoitirofo. ¹⁴ Akka ēkai anori shināpaima, nā meka shara fistiōnoa ē yoipaifafāini. Nā meka shara fistiōnoa ē yoipaikī ē iskafai: “Aicho, Jesucristo ifi cruz ikakinoax ea nāxonī, aōxō a ē chaka shināpaoni keskara anā ē shinātiro. Jesús nā ea nāxofaitīa nā ē afarafo chakafapaonifo mā Jesús fe naa keskarakōi. Nāskakē anākai ea afeska fatiroma,” ixō ē shinātiro. ¹⁵ Nō Jesucristo Ifofaxō nō foshki repa xatea askarakai sharama atokai nōko chaka noko soaxotiro. Akka nō Ifofaito Niospa nōko chaka noko soaxotiro fena keskara shara nō inō. ¹⁶ Niospa Yōshi Sharapa Jesúsnoa noko yoia keskara mā akē Epa Niospa mato inimamakōiyanā mato noikōi. Nāskax Niospa fakekōifo mā iki.

¹⁷ Akka mē mekai xatekī ē mato yoinō. Ēfe Ifo Jesúsnoax ē omiskōimis, ēfe yora toafo ōikī mā tāpitiro ē Jesús yonosharaxonaito ea iskafamisfo. Nāskakē anā ea fekaxtefayamakāfe.

¹⁸ Efe yora mīshitchi, nōko Ifo Jesucristo keyokōi mato noikī mato sharafa fafāini. Nāskapainō. Nā tii.

Pablo

Pablo Efeso Anoafu Kirika Kenexō Fomani

Pablo ato yoisharani, Efeso anoafu

¹ Ēkīa Pablo ē mato kirika kenexō fomai. Ea Jesucristo nīchia ē aōxō āfe meka yoimis inō, Niospa fichipaiyai keskafakī. Ē na kirika mato fomai a Nios Ifofaafu, Jesucristo chanīmara faafu, Efeso anoafu. ² Nōko Epa Nios feta nōko Ifo Jesucristo mato shināsharanō mato noikī māto shinā mēra mato shināmasharanō, māto ōiti fekaxtenōma.

Nō Cristo chanīmara faifo afara sharafo noko amatiro

³ Nōko Ifo Jesucristo āfe Apa Niospa noko afara sharafo noko shara famai, nai mēraxō nō ōiamafaiito nōko ōiti mēra noko inimamasharai nōmāi āfe fakefokē. Nāskakē nō yoisharai nō inimasharakōi Epa Nioski. ⁴ Epa Niospa mai yafi nai onifayoxoma noko katoni nō afe ipaxanō āfe Fake Cristo keskara afaa chakafamisma keskara sharakōi nō inō. Niospa noko noikī, ⁵ āfe fakefo noko fani. Anori shināni Niospa a Jesucristo noko nāxoyoxiai. ⁶ Nāskakē Niospa āfe Fake noikōikī nokori nāskarifai noikī. Nāskaxō noko nimasharapak-enaka. Nāskakē Nios sharafinakōikē nō aicho fai akiki inimakī nokomāi afama mīshti sharafo famaito Jesúsxō. ⁷ Niospa noko noikī finakōikī āfe Fake Jesús noko nāmā nīchixonī nokoōnoax āfe imi foax ifi cruz ikakinoax noko nāxonō nō sharakōi afe inō, askatari nōko chaka nokoōnoa noko soxonō. ⁸ Nāskaxō Niospa noko ōimana noko noisharakōikī noko tāpimasharakōikī, askatari noko shināmakī finakōi. ⁹⁻¹⁰ Nāskakē Epa Niospa yoini afama mīshti onifayoxoma āfe Fake xanīfo imaxikī, keyokōi, nai mēranoafoya, nāmānoafoyari āto xanīfo finakōi inō. Tsoa pishta anori meka nikayomisma Niospa onāxō yoini a shināi keskafakī, anori noko tāpimani nō tāpisharanō aōxō. Nāskakē Niospa āa shināki iskarafani: “Nā ēfe Fake ē nīchipaiyaitīa ē nāmā nīchixii keyokōi nai mēranoafoya, nāmānoafori āto xanīfokōi inō,” iXō Niospa shināni. Nāskaxō nīxori iskaratīa noko tāpimana.

¹¹ Nōfi Cristo fakekōifokī. Nō afe yorakōifo ikaito, Epa Niospa noko katoni noko onifay-oxoma āa shināki taefani. Epa Niospa nonori iskarafakī shināni: “Na ēfe Fake Jesús ē ināi keskari fakī nā ēfe Fake Jesús Ifofaifori ē ato ināira,” iXō Epa Niospa shināni. A Niospa shināki yoini keskara, nāskarifakī iskaratīa mā askafaa. ¹² Akka nō Cristo Ifofakī taefaxō nō yoikī iskarafanō: “Epa Niosi, mī fāsi sharakōi. Mī noko sharafofamis keskara sharakōi. Tsoa fetsakai mia keskara sharama,” iXō nō yoinō.

¹³⁻¹⁴ Nāskakē ē mato yoi mākai judeofoma. Nāskafixō Niospa meka shara Jesúsxō mā nikakī māri chanīmara fai. Mā askaito Niospa mato chaka soaxona mā afe nipaxanō. Nāskakē māri iskaratīa Cristo afe yorafokī. Anori Niospa yoikī taefani keskafakī, āfe Yōshi Shara nō mēra nanea noko ikinō. Noko askafaito nō tāpitiro āfe shara noko ināxi. Nāskaxfi nō Niosnoafoki. Nāskakē nō tāpiama afetiāra nai mēra noko ifi. Taekōifakī anori noko yoini. Nāskakē nā chanīmara fakī nō yoipakenaka: “Nōko Nios fāsi sharakōi,” iXō nō yoipakenaka.

Pablo Epa Nios yōkani iskarafakī: “Epa Niosi, mī Fake chanīmara faafu ato tāpimasharafe,” fani

¹⁵⁻¹⁶ Nāskakē nīrixō ē mato nikai mā Jesús Ifo sharafofa, a fetsafo feri a mato feta Nios Ifofamisfo fe mā rafesharakōiaito ē nikakī inimayanā ē nīrixō ē mato Epa Nios Kīfixōfafāini. Nāskakē ē iskafa fafafāini: “Epa Niosi, na Efeso anoxō mia noisharakata fetsafo feri rafesharakōiafo,” ē fai yoikī. ¹⁷ Niospa āfe Fakekōikī Jesucristo. Nāskax sharafofinakōia. Nāskakē ē mato kīfixokī iskarafamis: “Epa Niosi, mī Yōshi Sharapa na Efeso ano ikafo ato tāpimasharakōife mia xafakīakōi tāpisharakōinōfo. ¹⁸ Oa xini peisharaino nō fomākīa foiski nō nai xafakīakōishara nō ōitiro keskara, mī Yōshi Sharapa ato ōimafe Epa Niosi, mia tāpisharakōinōfo āto ōiti mēraxō. Askatari ato tāpimafe a nō oniyamatai mī noko shināni nono nāmāxō mī Fake Jesús nō Ifofaax nō mefe ipaxanō nai mēra. Askatari a nō ōimismafo mī noko ināxiai ato ōimafe. ¹⁹⁻²⁰ Epa Niosi, mī Yōshi Sharaōxō mī afama mīshti famis. Nāskaxō mī Fake Cristo mī anā nīmani mī Yōshi Sharaōxō mēfe pataxamei nīax mēfe xanīfokōi inō. Nāskax mī pōya kayakai aōri mēfe tsoa. Afia mī Yōshi Shara nō mēra nanexō a nofeta mia chanīmara faafu tii afara fetsafo mī noko ispasharakī mī noko amasharakī.” ²¹ Āfe Yōshi Sharaōxō Cristo ato mānāno nīxō, nā nāmānoafo āto xanīfo tii finōkōia. Askatari nai mēranoafori āto xanīfofo Cristo ato finōkōia keyokōi. Nāskax āto xanīfo finakōia. Tsoa pishta finōtiro. ²²⁻²³ Akka Epa Niospa āfe Fake yoini keskafakī keyokōi mai anoafoya nai mēranoafo ato ikinā. Nāskaxō āfe Fake katoni nā chanīmara faafu tii āto Ifo inō. Nā chanīmara faafofi āfe yorakōi keskarafofoki. Cristo āto mapo keskara. Akka nōko māpo nō shinātiro. Nā fistichi nā chanīmara faifo yoitiroki, noko ikināno afeskaxō nō atiromāki. Akka nō mapomaisax nō nitiroma. Nāskarifai nōko Ifo Jesúsmaisax tsoa nitiroma. Keyokōi nā chanīmara faafu nofe ikafo. Nāskax nofe rafe kakāini nā noko amapaiyai keskara nō anō.

2

Niospa noko noikī noko ifia nō afe īpaxanō

¹Taeyoi mā iyopaoni oa naa keskara mātō chaka soaxma. ²Nāskakē mā afara chakafamis, a yora chakafāfe akai keskafakī. Askata a nai mēra ikafāfe a niafaka chakafāfe āto xanīfāfe Satanás mato amapaiyai keskafakī mā amis, Satanás ifofakī. ³⁻⁴Nōri askafapaoni, nā nō afara chakafapaiyai fo keskara nō apaoni. Afara chaka shināmiskōifo nō ipaoni. Epa Niospa nā nikayospamisfo ato omiskōimanaitīa ato omiskōimakōixii. Nōri ato keskaraxō nō afara chakafaito nā ato akai keskafakī nokori omiskōimakerana. Akka nō afara chakafafiato noko omiskōimatama. Niospa noko fāsi noisharakōimis, noko shinākōikī noko omiskōimapaima. Noko chakafapaimisma. ⁵⁻⁶Nō Nios Ifofayoxoma nō shināyopaonima, chaka fistis nō shināyopaoni, nō chakafayopaoni. Niospa noko noikōifiaito, nō niyamatai ares noko Niospa ōikī yoini: “Na ēfe Fake Jesús Ifofaifo ē ato nāmā nīchixonī mā reteafono, ē otofaxō, ato yafi ifixii niri nai mēra afe īpaxanōfo,” ixō Niospa yoini ares ōikī afe ikaifono ato omiskōimayamaxii. Nāskakē nō nāmānoax oa nō afe nai mēra ika keskara nō nono ika nāmā. ⁷Epa Nios xanīfokōixō Jesús yafi noko otoani noko noikōikī nō afe nai mēra īpaxanō, nō chipo fakeiafēri tāpinōfo Epa Niospa noko noikōiaito. ⁸⁻⁹Nios sharafinakōia. Nō Jesús chanīmara fakē noko ifi nō afe īpaxanō. Akka nōa nō ifimetiroma, Nios fistichi noko ifitiro noko noisharakōikī. Akka nō afarafo shara fatokai noko ifitiro nō afe īpaxanō. Akka fetsafo āa chanīkani iskatirofoma: “Ē afama mīshti famis. Nāskakē ē tanaima sharakōi Nios ano kai,” ixō yoiflax askara yorakai Nios ano katiroma āamāi chanī Jesús Ifofamax. ¹⁰Nāskakē Epa Niospa taeyoi shināyoni Jesucristoōxō yorafetsafo nō axosharakōinō. Nāskakē aa fistichi noko onifani afara fetsafo nō sharafanō aōxō. Akka nores fisti nō afaa sharafatiroma. Cristo Jesús Ifofaxō nō afama mīshti sharafatiro. Nāskakē taeyokī Epa Niospa ares ōikī yoini.

Jesucristoōnoax nō ōiti sharakōia ipanaka anā nōko ōiti chaka neenōma

¹¹Nāskakē shināmakiyamakāfe. Mā chanīmara fayopaonima. Nā judeofāfe yora fetsafo ato yoikī iskafanifo: “Nā yora fetsafo nōko kaifoma. Akka nōfi Niospa yorafokī. Akka na yora fetsafokai Niospa yorafoma. A Niospa noko yoimis keskafakī keyokōi nōko foshki repa nō xatepakemis na nō judeofāfe. Nāskakē nō ōimani afe yorakōifoxō. Akka a yora fetsafāfe āto foshki repa xatemisfoma. Nō ato tāpitiro afokai Niospa āfe yorafoma,” ixō judeofāfe mato yoimis mā judeofokēma. ¹²Akka shinākapo. Taeyoi mā kai Cristo fe iyopaonima. Epa Niospa israelifo ato katonī keskafakī matorikai katoyonima mā ato fe afe yorafo ipanā. Afe yorafo yoiyoni keskafakī matorikai yoiyonima. Mā shinākī iskafani: “Ooa. ūNō afeskatiro mē nōko chaka noko soaxonō nō Nios fe ipaxanō?” ixō mā shināpaoni. Nāskatari nā Nios chanīmara faafoma mēra mā iyopaoni. Mā Nios fe rafexoma mā tāpiyopaonima. ¹³Nāskaxō mā Niosnoa shināyopaonima. Nāskafiano Cristo Jesús matoōnoax naino, āfe imi foni mā afe ipaxanō. ¹⁴Nāskakē Jesucristoōnoax nō noināitiro, ēfe kaifo israelifo fe yora fetsafo. Nāskakē nāskarafos noko shināmasharatiro nō aōnoax noinā faatanāx afianā nō noikaspa faatanānōma. Nāskakē afanā noko anā afeska fatiroma. Iskaratīa nō Cristoōnoax yora fisti keskarafa. ¹⁵Nāskakē Jesús nokoōnoax nani. A Moisés Niosxō keni keskara anā noko tsōa yoitiroma. Jesucristo keyokōi noko nāxoni nō afe yorafo inō. Nāskakē māri judeofoyamafekē, mato yafi noko ifini. Nāskax a yora fisti keskarafa nō inō. Mā nō fetsa keskarax ōitisharayakōifo nō inō noināsharakōi. ¹⁶Nāskakē Jesús ifi cruz ikakinoax noko nāxoni. Na ēfe kaifo judeofo yafi a judeofomari Jesúsxō Niospa noko a yora fisti keskara noko fani. Noko noisharakōikī nō nikayospafo iyopaofinikē, Jesús nokoōnoax nani. Nāskakē Niospa noko yora fetsafoya rafema sharakōia afe yorafo nō inō.

¹⁷Nāskakē Jesús nāmā fotoxō noko yoini āfe meka shara Niospa noko ifinō. Noko judeofo akai keskafakīri, matori ifia mā judeofoyamafekē mā Nios shināyamafipaonino. Akka nō judeofāfe nō Nios shināyopaoni. Nāskakē iskaratīa nō anā noikaspa faatanātama nō noināsharakōi. ¹⁸Jesús noko nāxoni nōko chaka noko soaxoxikī nō Nios fe rafesharakōinō afe ipaxakī. Nāskakē Niospa āfe Yōshi Shara nokoya rafemana na nōko kaifomafō fe nō rafesharakōinō. Nāskax Epa Nios fe nō īpaxanō.

¹⁹Nāskakē iskaratīa mā anā Nios chaifaama mā afe yorakōifo. Nāskakē iskaratīa a Jesús Ifofamisfo fe a rama Jesús Ifofaifo Niospa yorakōifo. ²⁰⁻²²Nāskax mā oa pexe sharakōi keskarafa. Oa tokiri nō pexe shara faa, afeskax paketiroma keskara. Taefakī nō mai pōkita a mēra tokiri nanexō, nō pexe fatiro pakeyamanō. Tokiri kerex sharakōikī nō atiro pexe fakī. Nāskarifiakī taefakī a Niospa mekaōnoa ato yoipaonifāfe ato yoipaonifo Niospa ato shināmanaino. Akka chipo mā Jesús nāmā fotoxō, aōxō tāpimisfo ato ifini aōxori a fetsafo tāpimanōfo, oa pexe fisti mēra nō imis keskaraxō, akairi ato tāpimanōfo Niospa meka sharaōnoa ato yoikakī, atoōxori yorafāfe chanīmara fanōfo. Askaxori a rama fakeiafēri Jesús Ifofakanax, oa nō pexe mitsisipakōi faano, anā paketiroma keskarakōi inōfo Jesucristo Ifofakanax. Nāskakē nōri Ifokōi faax, nōri anā paketiroma nō keyokōichi

Ifofoax. Oa pexe sharakōi mēra nō ika keskara, nō ixii, Niospa āfe Yōshi Shara nō mēra naneano.

3

Niospa Pablo yoini a judeofoma Jesúsnoa yoinō

¹ Nāskakē ē mato Epa Nios yoixonī. Ēfi judeokī mā ēfe kaifoyamafekē ē mato noi. Mato noixō, ē mato Jesucristoōnoa yoi. Nāskakē ea achixō karaxa mēra nīchitifo. ²⁻³ Niospa ea nīchini ē aōnoa ē mato yoinō. Niospa keyokōi yorafo ato noi, judeofo fisti ato noima. Akka a iyopaonifāfekai tsōa tāpiyopaonima Niospa ares ato noifaito. Nāskakē ē aōnoa ē mato kenexona, pishta fakī. ⁴ Na ē mato kenexona oixō, mā tāpitiro nā ē tāpia keskafakī Cristoōnoa. Akka a nōko xinifo iyopaonifāfekai tsōa tāpiapanima. ⁵ Niospa taefakī tsoa tāpimayonima. Mā iskaratīa Niospa āfe Yōshi Sharaōxō a aōnoa yoimisfo mā ato tāpimana. Askatari a āfe mekaōnoa yoimisfori mā ato tāpimana. ⁶ Akka na meka sharakai tsōa Jesúsnoa tāpiyopaonima. Akka yora fetsafori Epa Niospa afe yorafo itirofo. Nāskakē iskaratīa matori Niospa tāpimani, judeofoya yora fetsafo Jesúsnoax Niospa fakefo mā inō. Nāskakē Epa Niospa āfe kaifo judeofo yoiyoni keskafakī Jesucristoōxō akairi fitirofo.

⁷ Nāskakē a Jesús Ifofoafo ē ato chakafafaito, ea noisharakī Epa Niospa ea nīchini ē āfe meka shara ato yoinō āfe Yōshi Sharaōxō. ⁸ Ē fāsikōi Jesús chakafakī finakōipaoni, na fetsafāfe chakafakī finayamafaiyono. Ē askafafaito, ares fisti Niospa ea noikī ea nīchini aōxō na yora fetsafo judeofoma ē āfe meka shara ato yoi kī tāpimanō Niospa ato noisharakōiaito. Ato noikī ato shināmakōipai. Nios fisti tsoa keskaramakōi. Āfe Fake Jesúsnoa keyokōi nō tāpitiro. ⁹ Niospa keyokōi onifaxō, ea nīchini ē ato mēstesharakōi tāpimanō. Tsoa pishta tāpimano ares fisti tāpini Jesús noko nāxoyoamatai ato tāpimanima. ¹⁰ Nāskakē Niospa ea nīchini āfe meka sharaōnoa ē ato yoinō akairi Nios tāpinōfo. Tāpikanax oa ato fe yorakōifo keskara ixikakī Jesúsnoax. Mā askaito nai mēraxō a xanīfo tiito askara oikī tāpisharatirofo. “Chanīma, Niospa tāpikīfinakōia,” fatirofo. ¹¹ Afaa pishta onifaatama nānori shināni: “Na ēfe Fake Cristo Jesús Ifofoafo efe yorakōifo ixikani,” ixō yoini keskara mā iskaratīa askakōia. ¹² Jesúsnoa noko nāxonikē, nō Ifofoax, nō Nios fe rafesharatiro mesetama noko potayamanō. ¹³ Ē mato yoinō, ea nikakāfe. Ē mato yoiaito ea nikakakī ea karaxa mēra ikimatifo. Ē omiskōifiaino eōnoa shināchakayamakāfe. Ea karaxa mēra ikimanafoki ē Cristoōnoa mato yoiaino. Nāskakē inimasharakāfe, mā Niospa yorafoki.

Cristo noko noi

¹⁴ Nāskakē nāfo shinākī ē ratokonō mai chachipakefōfā ē Epa Nios kīfimis. ¹⁵ Nāmāi nai mēranoafo feta nono mai anoxō nā Ifofoafāfe āto Epakē, nāto ēfe fakefora noko famis. ¹⁶ Nānori ē mato Epa Nios kīfixokī iskafamis: “Epa Niosi, mī fāsi sharakōi. Maitiofo yafi nai mēranoafo mīnākōifo. Mī afama mīshiti fatiro. Mī Yōshi Sharaōxō mia chanīmara faafo Efeso anofo mī kexex shara ato ināfe. ¹⁷⁻¹⁹ Nā Jesús Ifofoafo mī Yōshi Shara atoya rafemafe. Mia tāpikī finakōinōfo. Askaxō tāpinōfo mī fāsi ato noiaito. Mī Fake Cristori fāsi ato noi. Cristo noko noiai keskara tsōa tāpitiro. Askafikē ato tāpimafe, Epa. Akka tāpikanax, mī ato fe rafekōiaito mia keskara inōfo,” ixō ē matoōxō Epa Nios kīfifāfāini.

²⁰ Akka Epa Niospa afama mīshiti fatiro a nō yōkai tii noko axotama finōmata noko axotiro. Nāto āfe sharaōxō noko axotiro afama mīshitifo. Noko axopaiyai keskafaito nō tāpitiro. Finōmainīfōfāta noko shara fatiro. ²¹ Nāskakē nō Epa Nios yoikī iskafatiro: “Epa Niosi, mī sharafinakōia. Mī Fake Jesucristoōxō mī noko sharafamis,” ixō mēxotaima nō yoifafāini. Keyokōichi nā chanīmara faafo feta a inōpokoifāferi yoisharapakenakafo. Nāskapakexapainō.

4

Niospa Yōshi Sharaōnoax oa yora fistikōi keskara nō itiro

¹ Ē mato yoisharakōi. A Jesucristoōnoa ē mato yoimis. Ē ato yoiaito a Jesucristo nikakaspaifāfe ea karaxa mēra nīchiafo. Ē mato yoisharanō, ea nikasharakōikāfe. Niospa mato katoni Jesucristo mā Ifosharakōi fanō. A ē mato yoiai kesakai isharakōikāfe. ² Nāskax, “Ē finakōia,” iyamakāfe, anori shinātama. Yora fetsafo noisharakāfe ato shinākī. A fētsa tāpisharamato mato afeskarafaito, shināchakatama ato noisharakāfe, oitifishkitama, isharakōita. ³ Niospa Yōshi Sharaōnoax nō isharakōinō a yora fistikōiax itikini. Tanaimakōi ikāfe, oitifishkiki faatanākakīma. ⁴ Niospa noko yoimis kesakai: “Isharakōikāfe, nōko Ifo ifofasharax, mā chaima anā fotoiyoi kiki,” shināi isharakāfe. A Nios Ifofoafori oa nofe naneafō keskarakōifoki. Nāskax isharakāfe. Niospa āfe Yōshi Shara askarakī. ⁵ Nōko Ifokōi Jesucristo. Nā fisti nō chanīmara fai Epa Nios fe ipaxakī. Nāskakē āfe Yōshi Shara nō mēra nanei. ⁶ Anā fato fetsa nōko Niosma. Nā fistikōi āfe Fake fe a chanīmara faafo tiito āto xanīfokōi. Nāskaxō keyokōi onifani. Nāskakē a Ifofoafo āfenākōifo. Nāskaxō afara sharafo

noko amai nōko shinā mēraxō afe keskararafa noko amatiro. Āfe Yōshi Sharaōxō keyokōi a fichipaiyai keskara nō anō āfe shinā noko ināi.

⁷ Nō Jesús Ifo sharafaito ōikī āfe shara noko minia fisti rasi chanīmara faifo nō ato axonō Jesús Ifofasharakōinōfo. Keyokōi āfe sharaōxō afara fetsa nā Jesús apaiyai keskara anōfo ato ināi. Nō fisti keskarafiakē nā noko imapaiyai keskara noko ima nō afara axonō. ⁸ Nāskakē Niospa meka Cristoōnoa yoiūkī David kirika kenekī is kafani:

Nono mai anoax Apa Nios ari kaiſiā nā Ifofafo tii āto chaka ato soaxoni afianā Satanás āto ifo inōma, askatamaroko Ifo sharakōi fanōfo. Nāskatari keyokōi nā afe yorafo ato imapaiyai keska fakī ato imani aōnoax ishara faatanānōfo, ixō kenenī.

⁹ Nāskaxō kenekī is kafani: “Nono mai anoax Cristo afianā Apa Nios ari kani,” ixō kenenī. Nānori kenenino nō tāpitiro Apa Nios ari kayoamano na mai ano fotoyonino nai mēranoax noko keskara ixiki. ¹⁰ Niospa yoiaino, fotonī. Mā reteafono āfe Apa Niospa otoani. Nāskaxō ifini afe nai mēra ixii. Nāskakē keyokōi nai mēranoafōfāfe nono nāmānoafāferi āto xanīfo ixii. ¹¹ Nāato noko katoni noko imapaiyai keskaī aōnoax nō shara faatanānō. Nāskaxō fetsafo afe rafemisfo ato imata, nokori nīchi aōnoa fetsafo nō ato yoisharanō. Fetsafori katoni nā meka shara aōnoa ato yoinōfo Jesús Ifofanōfo. Fetsafori katoni āfe meka shara chanīmara faifono ato tāpimayanā ato kexesharanōfo āfe meka nikasharakōinōfo. ¹² Afeskakī ato Niospa katonimē? Aōxō yoinōfo Niospa ato katoni a yora fetsafo ato yoisharanōfo, a Jesús chanīmara faafo aa yora fisti keskara inōfo Jesús tāpikōikanax. ¹³ Afāfe Niospa Fakeōnoa noko tāpimasharakōiaifono, aōxori fetsafori nō ato yoiūkī tāpimasharanō. Askax keyokōi oa yora fistikōiax itikini nō inō. Askaxori Jesús afe keskaramāki nō tāpisharakōinō. Askax oa Jesús ōiti keskara sharakōi ixiki. ¹⁴ Nāskax anā oa fakefo keskara nō itiroma mā nōmēra Niospa meka yosiano. Oa nefe onori kai, anā onori kai imis keskaī, fakefo askatirofo afaa shināsharaima. Askaxō a Niospa meka tāpisharafāfema ato yoiāifāfe nikafofāsa fatirofo. Askaxō tāpisharaxikāma Niospa mekakōi. Askatari a yora āa chanīki fanīra ato yoisim nō nikatiroma. ¹⁵ Fanīra ato yoitama nō nōināsharakōixō Niospa meka mēstesharakōi nō ato tāpimasharakōitiro. Nō askaī nōko Ifo Jesucristo āfe ōiti keskara sharakōi nō itiro. ¹⁶ Jesús nōko mapo keskaraxō noko shināmaki noko yonomanaino, oa afe yora keskara nō itiro. Akka nōko yora meemafīax nō mifimais ita, nō kishimais ita, nō pachomais ita, nō feromais ita, ixō nō afaa yonotiroma, afaakairoko shinākī. Akka nō mifi rafeyata, nō tae rafeyata, nō fero rafeyata, askaī fetsexō nō meemasharakōixō nō yonosharakōitiro shināfāi, nōko yoramāi meemasharakōikē. Nāskafakīri keyokōichi nō Jesús Ifokōi faax nofe yorafo fe nō isharakōitiro noināsharakōikai, Jesúsnoax mā noko āfe Yōshi Shara ināno oa āfe yora keskara sharax.

Cristo nōko ōiti noko fetsafaxōano a keskarakōi nō itiro, anā nō ipaoni keskara ixikima

¹⁷ Jesucristo ea ikīnā aōxō ē mato yoinō. Ea nikasharakōikāfe a Jesús Ifofamisfāfema fanīra chaka fisti yoisimiso fanīra shinā kakī. Nāskakē tsōa shināsharaima. Nāskakē ato keskara iyamakāfe. ¹⁸ Tsōa shināima oa fakishifā mēra niafo keskarafa. Askatari oa feromais keskara ikafo chai ōima. Nāskakē tsōa tāpifāi shināmisma. A Niospa shināi anori shināmisfoma. Nāskakē tsōa Nios Ifofapaimisma. ¹⁹ Āto ōiti kerexkōi. Askaxō afarafo chakafakani tsoa rāfitiroma. Nikayospakōimisfo, nō finakōiara ikani nikayospakani. ²⁰ A Jesús noiaifāfema shināifo anori mato Jesús tāpimamisma fanīra chaka. ²¹ Jesús mato tāpimamis chanīki mato yoisimisa. ²² A Nios tāpimamā mā iyopaoni anori anā shināyamakāfe. Fanīra mato Satanás shināmayaopaoni mā chaka inō. ²³ Anā anori shinātama, iskaratīa Niospa Yōshi Sharapa mato shināmapaiyai anori shinākāfe a mā iyopaoni shināmakikāta, isharakāfe. ²⁴ Ōiti fenashara fichipaikāfe. Oa nō rapati chapokōi potaxō nō rapati fenasharakōi nō safemis keskafakī, ōiti fena sharaya ikāfe Niospa fichipaiyai keskaī.

²⁵ Nāskax nō Cristo yorafo. Nāskakē anā fanīra chanī yoiyamakāfe. Afara ōixō yoiūkōikāfe chanīmakōi.

²⁶ Mā ōitifishkikī anā afarafo chakafayamakāfe. Askata aa chai ōitifishkiyamakāfe. Ōitifishkipai samama raekāfe xini ikiyamano. ²⁷ Mā ōitifishkiriāito koshikōi Satanás mato chakafamarisafai. Askayamakāfe Satanás nō mēra ikiyamanō.

²⁸ Mā yometsoyopaoni anā askayamakāfe. Iskaratīa yonokāfe a mā fichipaiyai fixikakī, a yora afaamaisfo ato ināixikakī afara sharafo.

²⁹ Askata anā fanīra chaka yoiyamakāfe. Shināsharata yoisharakāfe. Mā askaito mato nikakanax āto ōiti mēra inimanōfo. Askatari Jesús Ifofasharanōfo. ³⁰ Askata Niospa āfe Yōshi Shara nōko ōiti mēranoa omiskōimayamakāfe afara chakafakī. Askatamaroko nōko Ifāfe āfe Yōshi Shara nokoōnoa inimamasharakōikāfe. Āfe Yōshi Shara nō mēra naneakī, oa koxa marakka faa keskarafakī Niospa noko askafaa nā Jesús anā fotoaiſiā.

³¹ Māto yora mēraxō mato òiti fishkimamis a chaka shināmākikāfe. Ato noikaspai òitifishkikī finākòimis iyamakāfe. Afaa shināima oa òitimais keskara āakòī mekai keskara iyamakāfe. Fāsikòī yōachepemis ato ferateni iyamakāfe. Ato noikaspakī ato īchayamakāfe. Mā chakara ato fayamakāfe. Mākòī chakafakī ato noikaspayamakāfe. ³² Askatamaroko ato fe raenā faatanāsharakòikāfe, a mato Niospa aka keskafakī Jesúsxō ato raefakāfe.

5

Afeskas Niospa fakefo itirofomē

¹ Mā Niospa fakefokē mato noisharakòī. Nāskakē a keskara ikāfe, Ifofasharakòī. ² Cristo noko shināikī finakòī nokoònoax nani. Nōko chaka noko soaxoni. Nāskakē noko nāxoni, aakòī nanima. Nāskaito xafakīa Epa Niospa òini nōko chakaònoax nani, anā nōko chaka nokoò neenōma. Nāskakē mā ranāri nōināi finasharakòikāfe.

³ Mā Niospa fakefokī òisharata ikāfe. Isharakāi afafo chaka shinātama. Māto āfimafo chotayamakāfe. Kēromāri māto fenemafo chotamayamakāfe. Askatari mares fisti afama mīshti a mā fichipaiyaiyo fiyamakāfe. ⁴ Askatari fanīra mēka chaka yoiyamakāfe. Anori shinātama a Niospa fakefo isharakòikaxō, mēstekòī yoisharatirofo iskafakī: “Aicho Epa Niosi, mī noko īkisharakòiakī,” ixō mā yoimis. ⁵ Mā mā tāpimis yora fetsafāfe fanīra shināmīso āto āfimafo chotamīso ato fe oxakaxō, kēromāri āto fenemafo chotamamīso, askara yorāfo Nios ano fokanima. A afafo noikakī fichipaimīso, askara yorāfāfe afama mīshtifo noikani Nios shinātama, askara yorāfo a Nios xanīfo ano fokanima.

⁶ Òisharakakī yora fetsafāfe anorima mato yoipaikani fanīra āa mato pārakakī. Askara yorāfāfe Nios nikakaspakakī chakafakani. Askaito òikī Niospa ato kopikiri chakafaxii atokī òitifishkikī. ⁷ Nāskakē nā ikaifo keskara mā iyamakāfe. Afafo ato feta chakafakī, anori shināyamakāfe.

⁸ Mā fanīra shināyopaoni māto òiti oa fakish keskara ikax, akka iskaratīa mā Cristo fe rafeax a mā iyopaoni keskara anā mā shināima. Māto òiti xafasharakòia mā ika. Nāskara shara. Mēxotaima isharakāfe. ⁹ Nāskax mā isharakòimis. Cristo mato īkināno māto òiti xafasharakòī mā imis. Mā isharakòiax shara mā itiro. Māto òiti mēraxō mēstesharakòī mā shinākòitiro. Mā anori shināxō anā fanīra mā yoima. ¹⁰ A Niospa fichipaiyai keskafakī tāpisharakòikāfe. Nāskakòī fakāfe. ¹¹ Nā Nios Ifofakaspamīsfāfe, afaa tāpīamafāfe afafo chakafaiifāfe òiki māri ato feta chakafayamakāfe. Ato òitamaroko ato yoisharakòikāfe: “Anā afaa chakafayamakāfe,” ixō ato yoiakāfe. ¹² Askatari a yora fetsafāfe one afama mīshti chakafafakī onepaimīso. Askarayakai nō mekaima nō yoi nō rāfitiro. ¹³ Akka mā fakishano nō rāpari otaxō, keyokòī nō òisharakòitiro. Nāskarīfai a yorāfāfe afafo chakafakaxō onepaifaiifāfe, Niospa mēka òikī tāpitirofo a chakafamīso. ¹⁴ Nāskakē Niospa yoimis iskafakī:

Afafo mā chakafamīski moinīfōfākāfe oa mā naa keskara ikax fininīfōfākāfe Cristo māto òiti mēra oa fafeai keskara mato fasharanō, ixō yoimīski.

¹⁵ Nāskax isharakòikāfe. Oa Niospa mēka tāpīama keskara iyamakāfe. A Niospa mēkaònoa yoiikī kenenīfo anori isharakòikāfe. ¹⁶ Nāskakē a Nios Ifofaafomafo iskaratīa chakafīnakòiafo. Nāskakē māri isharakòikāfe ato keskara ikakīma. A Niospa apaiyai keskara akāfe mēxotaima. ¹⁷ Nāskakē fanīra chaka shināpaiyamakāfe a Niospa mato amapaiyai anori tāpisharakòikāfe. ¹⁸ Askatari anā pāeyamakāfe. Mēxotaima pāeriai mā chakakòifo itirokī. Askaxō mā afaa shināsharaima. Askatamaroko Niospa Yōshi Shara mato mēra naneano afe rafesharakāfe mato yonomasaranō. ¹⁹ Nāskakē mā ranā Niosnoa yoinōnākāfe isharakòikai. Nōko xini David mēxotaima fanāipaoni keskariai māri Nios Ifofaax aōnoax fanāikāfe mā ranā māto òiti mēraxō nōko Ifo shināi inīmayanā. ²⁰ Pena tti aichora fakāfe Epa Niospa noko afama mīshti faxōfaino, nōko Ifo Cristo shināyanā nō Ifo sharanō.

Afe keskara nō itirofomē Cristo yorāfo

²¹ Cristo nikasharapai, mā ranā nikanōnāsharakòikāfe.

²² Kēromāri a māto Ifo Jesús mā nikasharai keskafakī, māto fenefo ato nikasharakòikāfe mato yoisharaiifāfe, māto Ifo Jesús mā nikai keskafakī. ²³ Cristo nōko xanīfōfinakòia nō nikasharai keskafakī, kērofāferi āto fenefo nikasharakani āto xanīfōmāiyakē. Askatari Cristo noko ifimis nō nikasharakòitiro oa nō afe yorakòifo keskaraxō. ²⁴ Nāskakē kēromā āfe fene nikasharatiro āfe xanīfōmāiyakē a nōko Ifo Jesús chanīmara faafo tiito nikasharaiifō keskafakī.

²⁵ Nō Cristo Ifofaano noko noikòiax aakòī nokoònoax nani. Nāskarīfakī feronāfakefāfe, māto āfīfo noisharakòikāfe. ²⁶ Mā āfe mēka chanīmara faito, oa noko fāka choka keskara faxō noko katonī, oa nō afaa chakafamīma keskara noko imaxii. ²⁷ Mā noko ifīax, nāskax nokoònoax nani nōko chaka noko soaxoxikī nō isharanō. Nā anā nōko Ifo Jesús oaitīa a chanīmara

faafo tii noko ifixō sharakōi noko ðixii, oa nō afaa chakafamisma keskara noko ðixii. ²⁸ A feronāfakefo āa noimesharaifo keskafakī, mato āfīfo noisharakāfe. ²⁹⁻³⁰ Akka shinākapo. Tsōa pishtakai ato yora chakafamisma. Nōko yora nō mesefakī fonāikī nō pimis shara nixiki. Nāskafakīri Cristo a afe yorafo ato kexesharamis māmāi nō afe yorakōifokē. ³¹ A Niospa meka yoimisto keneni iskafakī: “Nāskakē feronāfāke kēro fian ānā apa fe afa ikano anā ano itiro. Paxkatiro, āfi fe ixiki. Askax oa fisti keskara ixiki anā rafema,” ixō yoiki keneni. ³² A Niospa meka yoimisto keneni anori taefakī tsōa tāpinima. Mā iskaratīa noko Niospa tāpimasharai a nōko Ifo Cristo Ifofafo tii afe yorafokanax, oa fisti keskara afe yorafo ixō keneni. ³³ Ē mato yoi fisti rasichi mato āfīfo noisharakōikāfe. Mēxotaima aa mā mā noimeai keskafakī mato āfīfo noisharakāfe. Askatari kērofāferi āto fenefo noisharakōikaxō nikasharakōinōfo.

6

¹ Fakefāfe, mato epa nikasharakōikāfe mato efa yafi, nōko Ifo Jesús noikī. Nāskara sharakōi. ²⁻³ Epa Niospa Moisés shināmanaino kirika keneni iskafakī askara nō nikanō: “Mato efa yafi mato efa noisharakōiyanā ato nikasharakōikāfe. Mā askafakī nono mai anoxō xinia ranā mā aki inimayanā,” ixō Niospa shināmāino Moisés kirika keneni.

⁴ Iskaratīa āto apafari ē yoisharai. Mato fakefo ferateyamakāfe matoki ōitifishkiyamanōfo. Ato askafatamaroko a nōko Ifāfe noko noiai keskafakī, mato fakefo tāpimasharakōikāfe. Fenāmāshata ato yoisharakōikāfe akairi Jesús tāpisharakōinōfo.

⁵ Askatari ato yonoxomisfāferi mato xanīfo tii ato nikasharakōikāfe, nono mai anoxō mato yonomanāifāfe mato xanīfo tiito. Nāskakē mato yoiaifāfe ato nikasharakōikāfe, nā nōko Ifo Jesús fichipaiyai keskafakī mā samama ato axorisa fai. Askatari mato xanīfāfe mato yonomanaito mā axosharatiro. Nāskakē, “Ē Cristoōxō yonosharai,” ixō nō yonosharatiro. Nāskarīfakī ēfe xanīfōi ē yonosharaxotiro. ⁶ Mato xanīfāfe mato ōiainos yonoxosharakakima, mato ōiayamafianori yonosharaxokāfe inimakōiyanā. Mā askaito ōi inimanō. Mā mato xanīfo yonosharaxokī, nā nōko Ifo Cristo yonoxona keskara mā faikai. Akka nono mai anoxō mato xanīfo mā inimama keskafakī, nōko Ifo Niospa mato amapaiyai keskara mā axikai. Nāskax nōko Ifo Jesús āfe yonomati ixikakī. ⁷ Inimasharakī yonosharaxokāfe. A mā nōko Ifo yonosharaxonai keskafakī mato xanīfōi yonosharaxokāfe inimayanā. ⁸ Mā mā tāpia yorafāfe yonosharaifāfe ōikī, Cristo afara sharakōifo ato ināxii, a xanīfōmāis ināta a xanīfōyari ināxii.

⁹ Nāskakē mā xanīfōfāferi, a mato yonoxomisfo ato shara fakāfe. Nō mato chakafaira ixō ato ferateki koshapaiyamakāfe. Shinākāfe, māri Ifoyakī a nai mēra ika. Nōko Ifo Cristo keyokōi nāskarafos noko ōi kiki.

Afeskax nā nō chanīmara faafo tii nō mitsisipasharakōi itiro mē fetsafāfe noko afara chakafamapaiyai fono nō afaa afeska fanōma

¹⁰ Ē mato yoisharanō, ea nikasharakōikāfe, efe yora mīshtichi. Nōko Ifo Niosnoax nō mitsisipakōi itiro āfe Yōshi Shara no mēra naneano. ¹¹ Ē afara fetsaōnoa mato yoinō mā tāpinō. Sorarōfo āto xanīfāfe ato yoitiro itipinīsharanōfo fetsafāfe ato afeska fanōfoma. Nāskaxō a aō xorakomeaifo kerexkōi ato inātiro, maiti kerexkōiri ato inātiro, sītora kerexkōiri ato inātiro fetsafāfe ato retenōfoma. Nāskarīfakī Epa Niospa āfe Yōshi Shara mato ināpaiyaito fikāfe, Satanās chakata mato afara chakafamapaiyai keskara axikakīma. ¹² Akka nōkai yorakōifo fe mēnāima. Askatamaroko nā niafaka yōshi chakafo fe nō iki, kerexkai noko afara chakafamapaiyai fono. Nāfāfe nō ōiamafiano noko afara chakafamapaikani. Nā niafaka yōshi chakafo ichapakōifo. ¹³ Nāskakē Epa Niospa āfe kerex shara mato ināpaiyaito fikāfe aōnoax mitsisipakōi ixikakī, niafaka yōshi chakafo matoki nokoxō, mato afeska fanōfoma. Nāskaxō nā niafaka yōshi chakafāfe mato afara chakafamapaiyaito Niospa kerex sharaōxō mā finōtiro mato afaa chakafamanōfoma. Akka Niospa nā mato amapaiyai keskara mā akōinax mā isharakōitiro, niafaka chakafo mato makinōa potax. Nāskax Jesús fe rafexō mā afaa chakafaima.

¹⁴ Ē mato yoiai keskai sorarōfo itipinī sharatirofo keskai. Māri itipinī sharakāfe niafaka yōshi chakafo matoki nokoxō mato afara chakafamapaiyai fono keskara axikakīma. Epa Niospa mato amapaiyai keskara fisti akāfe isharaxikakī. Sorarōfāfe ikisi āto sītora kerexkōi itipinī fatirofo ayaxō āto rapati safexikakī. Nāskarīfai mā isharakōiaino niafaka yōshi chakata mato afeska fatiroma. Askatari sorarōfo āto safeti kerexkōichinī xorakometirofo, nā ato noikaspai fāfe āto ōitiki ato pianōfoma. Māri Niosnoax isharakōikāfe, niafaka yōshi chakafāfe mato ōiti mēraxō mato afaa chakafamanōfoma. ¹⁵ Oa sorarōfāfe āto sapato shara safekanax ichotirofo keskariai, māri nāskari akāfe. Nāskarīfai mā ato Niospa meka yoisharaikai mā katiro a Niospa meka nikamisfoma mēra. Itipinī sharakāfe fetsafoki nokoxō Niospa meka sharaōnoa mā ato yoiaito nikai inimakōinōfo. ¹⁶ Akka sorarōfāfe

ãto xĩtimati nã kerexkõi tso matirofo a ato noikaspaifãfe ato pĩanõfoma. Nãskarifiakĩ a mato xĩtixonai mã fenai. Mã nõko Ifo Jesús chanĩmara faino nã niafaka chakafãfe mato afara chakafamapaiyaito mã atiroma. Nãskakẽ nõ Jesús chanĩmara fakõinaino nã nõko xĩtimati keskara itiro. ¹⁷ Sorarofãfe ãto maiti kerexkõi safekaxõ ãto mapo kexesharatirofo, a ato noikaspaifãfe ato mapoki afeskafanõfoma. Nãskarifiakĩ mã Jesús chanĩmara fakõinax mã Epa Nios fe nipaxatiro. Mã askaito niafaka chakata mato afeska fatiroma. Sorarofãfe ãto keno fitirofo a ato noikaspaifo fe aõ ato fe retenãxikaki. Nãskarifiakĩ Niospa Yõshi Shara oa keno keskaraki fikãfe. Nã keno keskaraki Niospa meka shara nã mã fichipaikõi niafaka yõshi chaka matoki nokopaiyaito otimafaxikakĩ. ¹⁸ Shinãmakiyamakãfe. Mẽxotaima kifikãfe Niospa ãfe Yõshi Sharaõxõ mato tãpimasharai. Shinãmakixoma mato shinãkõi. Nãskakẽ shinãchakayamakãfe. Mẽxotaima ato Nios kifixokãfe a Ifofaafõ ato axosharanõ. ¹⁹ Nãskaxõ eari kifixokãfe Niospa Yõshi Sharaõxõ ãfe meka shara mesetama ã ato yoinõ. Nã ãfe kaifomafoõnoaxri Jesús ato nãxoni ã yoinõ tsõa tãpiyonifoma. ²⁰ Ea Niospa nĩchini anori ã ato yoinõ ãfe meka shara. Nãskakẽ ea karaxa mẽra ikimanifo. Nãskakẽ ea kifixokãfe ã Niosxõ ato yoinõ mesetama.

Pablo mã mekai xatekĩ Efeso anoafõ meka shara fomani

²¹ Nofe yora Tĩquico ã aõ noisharakõi. Efeta nõko Ifo Jesús yonoxomiskẽ. Ë Tĩquico mato ari nũchixii, ã afe keskara ikamãkĩ mato tãpimanõ. ²² Nãskakẽ ã a mato ano nũchikai nõ afe keskaramãkĩ a Tĩquico mato tãpimanõ. Nãskakẽ mãto õitinĩ shinãsharai mã inimanõ mã mã tãpiax.

²³ Nõko Epa Nios feta nõko Ifo Jesucristo mãto õiti mẽra mato shinãsharamanõ mã fekaxteyamanõ. Jesús chanĩmara faax, keyokõi mã nõinãi fetsenõ. ²⁴ Nã nõko Ifo Jesucristo noipakenakafo Nios sharakõi mato noikõipakenaka. Askapakexapainõ. Nã tii.

Ekĩa Pablo ã mato kenexoni.

Pablo Filipos Anoafo Kirika Kenexõ Fomani

Pablo karaxa mēraxõ a Nios Ifofaafa Filipos anoafo ato kirika kenexõ fomani

¹ Ëkia Pablo, Timoteo feta nõ Jesucristo yonoxomis. Nāskakē nā Epa Nios Ifofaafoya nā māto xanifofoya a mato kexemisfo nõ kirika kenexõ fomai mā tāpinõ. Nā pexe rasi Filipos anoafo nõ fomai, nāfõfi Jesucristo afe yorafoki. ² Nõko Epa Nios feta nõko Ifo Jesucristo mato noikī mato sharafai kiki mato inimamakī mā anā fekaxteyamanõ mā isharakõinõ.

A Nios Ifofaafa Pablo ato kīfixopaoni

³ Nā ē mato shināitia, ē Epa Nios aichofa fafafāini. ⁴ Ë Epa Nios kīfikī mēxotaima inimakõikai keyokõi ē mato kīfixofafāini. ⁵ Mā efeta Jesucristo chanīmara fakī taefanitia, iskaratīari mā efeta Niospa meka shara Jesucristoõnoa mā ato yoimis. ⁶ Chanimakõi ē yoi, nā Epa Niospa mato õiti mato shara faxoni keskafakī nē askakõifa fafafāini nā Jesucristo oaitia. ⁷ Nāskakē nānori shināki ēfe õiti mēraxõ ē matoõnoa shināfafāini, emāi mato noikõiki nā Epa Niospa ea sharafai keskafakī māmāi efeta meemiskē. Akka ea karaxa mēra ikimanifo. Nāskakaxõ xanifofofāfe ferotaiifi ea iyomisfo anoxõ ē ato yoisharanõ Niospa meka sharaõnoa afe ĩpaxanõ. Iskafakī ē ato yoimis: “Jesús noko nāxoni nõko chaka noko soaxoxiki nõ afe ĩpaxanõ,” ixõ ē ato yoimis. ⁸ Epa Niospa tāpia keyokõi ē mato noikõiaito a nõko Ifo Jesucristo noko noikõiai keskafakī. ⁹ Ë mato Nios kīfixokī iskafaxofafāini, mā nõināi finakõinõ, askatari mā tāpisharakõixõ nikakõisharayanā mā tāpikõinõ. ¹⁰ Nāskaxõ afara sharakõifo tāpixõ katonõfo. Nāskakanax isharakõitirofo, afaa chakakai matoõ netiroma, matoõnoari afara chaka yoitirofoma nõ Cristo oaino. ¹¹ Nāskaxõ nā Jesucristo mato sharafai keskafakī, mārī askafatiro. Mā askaito mato õikī fetsafāfe mato yoikī iskafatirofo: “Aicho, nāfo isharakõiafo Epa Niosnoax. Nios fāsi sharakõi,” ixõ yoixikani. Nānori matoõxõ ē Epa Nios kīfifafāini.

Ë shināi ē Cristo fe rafepakenaka

¹² Efe yora mishtichi, mā tāpinõ ē mato yoinõ. Ea karaxa mēra ikimafiafono, akka ē mēxotaima Niospa meka sharaõnoa ē ato yoifafāini afe nīpaxanõfo. ¹³ Nāskakē sorarofāfe xanīfāfe pexe anoxõ fetsafo feta mā tāpiafo ē karaxa mēra ikē Cristo Ifofai. ¹⁴ Ë karaxa mēra ikano nā nõko Ifo Jesús Ifofaafāfe atirifāfe Niospa meka sharaõnoa ato yoikakī mesetamakõi inimakõikai nõko Ifoxõ ato yoikani.

¹⁵⁻¹⁷ Chanīma, fetsafāfe Cristoõnoa meka shara yoifikakī ea finõpaikani, ea shināchakamapaikakī. Akka fetsafāfe ea noikakī eõnoa shināmisfo iskafakakī: “Pablo karaxa mēra ikimafiafono Epa Niospa meka yoiaito tsõa xatematiroma Jesúsnoa ato yoiaito nikakõinõfo,” ixõ Jesúsnoa yoisharatirofo. Akka fetsafāfe Cristoõnoa yoikakī: “Noko nikakõinõfo,” ixõ ato yoipaikani ea finõpaikakī ē karaxa mēra ikano. Akka fetsafāfe ato noikakī ato yoisharamisfo, māmāi tāpixaxõ nonoxõ ē Cristoõnoa meka shara yoimiskē afe nīpaxanõfo. ¹⁸ Akka nāskanõ, nā yoipaiyai keskafaxõ Cristoõnoa ato yoinõfo. Nāskafakī ato yoiaifono nikai ē inimakõini.

¹⁹ Akka mē tāpia ē inimakõi, mā ea Epa Nios kīfixonaito nikai Jesucristo āfe Yõshi Sharapari ea axõfaino. ²⁰ Epa Niospa ea amapaiyai keskara akiki ē rāfitiroma. Ranotamakõi ē yoitiro. Ë askafakī yoiaito õikakī fetsafāfe Cristoõnoa shinākõinõfo. Nāskakē ē nayoamax ē niyoa sharakī. ²¹ Akka Cristo fistiõnoax ē ĩpanaka, akka ē nairi sharafinakõia, ē inimakõi emāi Cristo fe nīpaxakī. ²² Akka ē niyoxõ fetsafo Cristo ē ato chanīmara famatiro afe nīpaxanõfo. Akka ē fato katotiroma, nia rakikīa shara, askayamai naa rakikīa shara. Ëkai tāpiama. ²³ Akka fekaxkõi. Nā rafe sharafaxo fato ē katotiroma. Akka ē napai Cristo ari kaax afe ĩpaxakī, nā sharafinakõia ē mei. ²⁴ Akka fetsari nā sharafinakõia ē shināi, mā ea yopai Niospa meka shara ē mato yoinõ. ²⁵ Mē tāpia māmāi ea yopakõiaito, askatari mē tāpia ē nayoamax ē mato fe iyoikai. Niospa meka shara ē mato yoiaino mā inimayanā chanīmara fakī mā finakõinõ. ²⁶ Nāskakē ē anā mato fe ikaino mā inimafinakõixii Cristo Jesúsnoax.

²⁷ Akka shināsharata isharakāfe. Nāskaxõ na meka shara Jesucristoõnoa chanīmakõi yoixikakī. Mā askaito ē mato õikanõ, askayamai chai ixõ ē matoõnoa nikakī ē tāpitiro mā Jesús Ifofasharaino nāskara fisti shinākaxõ. Nāskaxõ keyokõi Niospa Yõshi Sharaõxõ fetsafo mā ato Jesús chanīmara famaxikāki. ²⁸ Mā askafakī yoiaito a mato noikaspaiifāfe mato mekakī xatemapaiyaifono rateyamakāfe. Nāskakē mā atoki rateyamaito õikakī tāpitirofo akka nāfo fenokõikani, akka mā fenotama Nios fe mā nīpanaka. ²⁹ Epa Niospa mato sharafaxõa mā Cristo chanīmara fata aõnoa mārī mā omiskõinõ. ³⁰ Ë ikai keskai mā efe omiskõimis. Mā mā ea õipaoni ē omiskõiaito, iskaratīari mā mā ea nika Cristoõnoa ē omiskõiaito nāskafixõ ē eneima Niospa meka ato yoikī.

2

Cristo nono mai anoax afama iyopaofnixakī iskaratīa xanīfo finakōia

¹ Nāskakē Cristo mato inimama mato noikī mato inimamashara mā ēfe Yōshi Shara mato fe ika. Chanīma, Cristo mato noikī mato inimamashara mā mā meemis. ² Nāskakē ea inimamakōikāfe. Isharakōita keyokōichi nānorifos shinākāfe. Mā ranā nōināsharakōikāfe. Nāskakē Jesús mato amapaiyai keskara fisti axikakī. ³ Akka fetsafo afara axotama a mā mā afara apaiyai keskara fisti shināyamakāfe, askatari fetsafāfe eōnoa yoisharakōinōfora ikax kakapaimis iyamakāfe. Askatamaroko isharakōita fetsafoōnoa yoikī iskafakāfe: “Nāfāfe ea finōtirofoki. Akka ēkai afama. Jesús fistichī ea imasharatiro,” ixō fetsafo finōpaiyamakāfe. ⁴ Askatari a mā mā fichipaiyai keskara fisti shināyamakāfe, askatamaroko a fetsafāfe fichipaiyaifo keskarafoi shinākāfe.

⁵ Nāskaxō nōko Ifo Jesucristo shināi keskafakī māri nānori shinākāfe. ⁶ Nāfi Nioskōiki Apa Nios keskara ari onifafianino yoikī iskafapaonima: “Ēri ē Nioskōi nā ēfe Epanāfori ēfenā. Nāskakē ēfe Epa nai mēra ika keskariai ē nono mai ano itiro. Ē askaito afanā ea afeska fatiroma,” ixokai anori Jesús shināpaonima. ⁷ Askatamaroko Jesús āfe sharafoya āfe afama mishtifo potayoni, nono mai ano oax ato yonoxomis keskara ixiki. Nāri fake feronāfāfe kāitiro keskaī, feronāfakekōi kāini. ⁸ Feronāfakekōi ixō isharakōixō Apa Niospa yoiai keskara nikakōiax nani. Afara chakafamis keskarax ifi cruz ikakinoax omiskōikai nani. ⁹ Nāskakē Epa Niospa xanīfo finakōia imani, nāatofi keyokōi finōinīfofanakī. ¹⁰ Nāskakē Jesús keyokōi ato finōano āfe ane nikakakī keyokōichi akiki ratokonō mai chachikaxō yoikī iskafaxikani: “Jesús, mīfi xanīfo finakōiaiki,” ixō yoixikani keyokōi nā nai mēranofoyaxō nono mai anoafāfe. Askatari nā Ifofax namisfāferi askafaxikani, niāfakafāferi askafaxikani. ¹¹ Nāskafaiyono keyokōichi tāpīxikani, “Jesucristo nōko Ifora,” faifono. Askafakāki Apa Niosri inimamakōixikani.

Jesús Ifofaafāfe ato ōimasharatiro afeskax isharatirofomāki, a Jesús Ifofaafoma

¹² Nāskakē ēfe yora mishtichī, ē mato fe ixō ē mato yoiaito mēxotaima mā ea nikapaoni keskafakī, ea nikakī finakōikāfe iskaratīa ē chai ikakī nono karaxa mēra. Jesús māto chaka mato soaxonō isharakōita shināsharakōikāfe afe ipaxakakī kachikiri fakakīma. Nāskakē meseyanā nikakī finakōifafāikāfe Niospa māto chaka mato soaxonō. ¹³ Niospa māto shinā mēraxō mato shināmāfāfāini a mato amapaiyai keskara mā anō. Nā apaiyai keskafakī, nānori mato shināmapai.

¹⁴ Nāskatari nā mato amapaiyai keskara akāfe, yōachēpekakima, askatari feratenāyamakāfe, ¹⁵ mā isharakōiano tsōa matoōnoa afaa chaka yoiyamanō. Askatamaroko yora chakafo mēra ikax mā isharakōiaito mato ōitirofo māmāi Niospa fakekōiax afaa chakafamisma. Akka mā ato mēra ixō ato ōimasharakāfe, oa fakishi fishifāfe chai chaxatiro keskafakī. ¹⁶ Nāskaxō Niospa meka sharaōnoa ato yoifofāfofāikāfe afe ipaxanōfo. Nāskakē mā Cristo oaino ē matoōnoax inimaifinakōitiro, ēakairoko kaxpa Niospa meka ē mato tāpimanax, askatari ēa ē kaxpa yonomisma. ¹⁷⁻¹⁸ Ē mato yoisharamis mā Jesús chanīmara fakōinō. Akka Epa Nios ē yoitiro iskafakī: “Epa Niospa, ea mīa yoini keskafakī Filiposo anoafō mī Fake Jesúsnoa ē yoimis. Nā chanīmara fakōinōfo, a mī ato yoiai keskara akōixikani. Ē mia ato chanīmara famaōxō ea retexikani rakikīa,” ixō ē Epa Nios yoitiro. Akka ea retefāfono eōxō mā Jesús Ifoano ē inimatiro. Nāskakē māri efe inimakāfe Niospa ea sharafoano matoōnoax ē natiro.

Timoteo fe Ipafrودito

¹⁹ Nōko Ifo Jesucristo nīchipaiyaino ē matoki samamashta Timoteo nīchipai mato ōikanō. Mā anā oxō matoōnoa ea yoiaito nikai ē inimakōixii. ²⁰ Akka tsōakai efeta iskafakī shināima, Timoteo fistichī shināi ē shināi keskara. Chanīma, na Timoteo mato noikōiki matoōnoa tāpīpai mā Jesús Ifo sharafoamāki. Akka tsoakai na Timoteo keskarama. Nāskaxō ē mato noiai keskafakī nāatori mato noikōi. ²¹ Akka fetsafāfe āakōi apaiyaifo keskara fisti shināmisfo. Cristo Jesús ato amapaiyai keskara amisfoma. ²² Akka mā mā tāpia na Timoteo isharakōixō mato ōimamis efeta Niospa meka sharaōnoa ato yoimis. Nā fāke āfe apa feta yonotiro keskafakī na Timoteo efeta yonosharamis. ²³ Nāskakē Timoteo, ē mato ano nīchipai mato ōikanō. Mē tāpīxō ē afeskaimāki, akka mē tāpīxō mato ari ē Timoteo nīchi eōnoa mato tāpimanō. ²⁴ Akka ē nōko Ifo chanīmara fai, ea mato ari nīchiaino samamashta kaxō ē mato ōikai.

²⁵ Akka ē shinā nofe yora Ipafrودito mato ari nīchipaikī. Fekaxfiano nāato efeta yonokōimis na Ipafrودito mā ekeki nīchini, ē afara yopaito ea axonō. ²⁶ Na Ipafrودito mato ōisharapikōi, mato shinākōi māmāi nikamiskē isinī ikaito. ²⁷ Chanīma, na Ipafrودito isinī ikōini, mā nakerati. Nāskaino akka Nios aō noikōiki mā sharafoita, eari noikōiyana. Akka mā naano ē shināmitsaifinakōikeraita. ²⁸ Nāskakē ē mato ari nīchipaikōi mā inimakōinō matoki anā nokoaino, ēri shināmitsakōiyamaxiki. ²⁹ Nāskakē matoki nokoaito inimayanā

ifisharakōikāfe nōko Ifoōxō. Nāskakē nā mā Ipafrodito noiai keskafakī nā keskarafori fetsafo noikōikāfe. ³⁰ Akka na Ipafrodito Cristo yonoxoni mā nakeraita. Akka mā chai ikax ekeki oyamaino matoōnoa omiskōinixakī nā Ipafrodito ekeki oyamea ea axosharaxiki.

3

Jesús chanīmara faafo a chanīmara faafoma mēra ikaxō ato ōimatiro afeskax isharatiro-fomākī

¹ Efe yora mīstichi, iskaratīa nōko Ifoōnoax inimakāfe. Mē mato kirika kenexokatsaxakī, anā ē mato yoi. Akka mā nikakōisharanō ē mato yoi. ² Kexemesharakāfe, a yora chakafo fishtayamakāfe, nā paxta pōfe keskarafoiki. Nāfāfe afara chakafamisfoki. Iskafakī mato yoipaikani kiki: “Mā foshki repa xateyamax mā Nios ari kaima,” ixō mato yoipaikani kiki. ³ Akka nō foshki repa xateoxakai nōko chaka nō soatiroma. Cristo Jesús noko nāxoni nōko chaka noko soaxoxiki. Niospa āfe Fakeōxō āfe fakefo noko imatiro. Āfe Yōshi Sharaōxō nō Nios yoitiro iskafakī: “Nō mia noi. Mī sharakōi,” ixō nō yoitiro. Nāskakē nō akiki inimakōi ares fisti noko nimatiro. Mā nō tāpia nō foshki repa xateāoxokai noko afeska fatiroma. ⁴ Fetsafāfe yoiki iskafakani: “Ē shara famis. Nāskax ē Nios fe Īpanaka,” ixō shināifono, ēri anori shināpaiki ē shināki finapaoni. ⁵ Mē kāiax ocho nia ē oxano ea foshki repa xatenifo. Ēfi israelikōikī, ēkai osiama. Benjamīn ēfe xini ipaoni, ēfi āfe fenaki. Ēfe epa feta ēfe ēfa hebreoxomāi ea fake fiafono, nāskakē ēri hebreo. Askatari fariseo ē iyopaoni, nāskaxō Niospa Moisés yoipaoni keskara ē nikakōipaoni ēmāi fariseoxō. ⁶ Askatari Niospa meka nikasharapaikōikī a Nios Ifofaafo ē ato chakafapaoni. Askatari ē isharapaikōikī Moisés yoini keskara ē nikasharakōipaoni. Nāskakē eōnoa yoiki tsōa iskafatiroma: “Na Pablokai Moisés yoini keskara nikakōipaonima,” ixō tsōa yoitiro.

⁷ Akka nāfo taeyoi ē ōia ēfenā sharafinakōia iyopaoni. Akka iskaratīa ē ōia afokai anā afama. Cristo Ifofakī afo ē anā shināima mē shināmakikōia. Cristo fisti Ifofakī afe Īpaxakī. ⁸ Akka a ē ipaoni keskara anā ē shināima. Nāfo mē shināmakikōia, afo shināi ē finakōia ipaoni. Akka ē shināi afokai afama, nā afara chaka potamea keskarafo. Akka ēfe Ifo Jesucristo fisti ē tāpipaikōi, nāfi sharafinakōiaki. Ares fisti ea imasharatiro, a Moisés yoini keskarakai ē anā nikatiroma ea imasharanō. ⁹ Askatamaroko ē Cristo chanīmara faino Epa Niospa āfe Fakeoxō ea imasharatiro a keskara shara ē inō. Akka ē Nioski nokoaino ekeki inimatiro, ē Cristo fisti chanīmara fakē ea imasharanō. ¹⁰ Ē Cristo tāpipaikōi afe rafesharaxiki. Niospa āfe kerex sharayaxō Cristo anā otofani keskai, ēri āfe kerex shara mepai a keskara shara ea imanō. Jesucristo omiskōini keskai ēri aōnoax omiskōipai. Jesús naani keskai ēri askapai a keskara ixiki, afaa chakafaxikima, askatari afaa chaka shināixikima. ¹¹ Nāskakē a chakafo kachikiri fata, nā Jesús keskara sharakōi ē ĩpai, oa yora naax anā otoa keskara shara.

Ē Jesús Ifokōi fai nā ē akiki nokoaitīa

¹² Ē isharakōira ē ifiax ēkai isharakōiama. Askatari Jesús keskara ē ĩpaifi ē askakōima. Jesucristo ea Ifofamani ē a Ifofanō. Nāskakē ē Jesús Ifofakōini a keskara sharakōi ixiki. ¹³ Efe yora mīstichi, ē Jesús keskara iyamaifai a ē ipaoni keskara ē anā shināima. Akka ē Jesús fisti Ifofai. Nā feronāfakē ichokani xonōnōnāki texkeakekafā ōitirofoma. Nā ifi nīchiti nia ari fisti ōiax ichotirofō keskariaki afara chaka shināikima Jesús fisti ē shināmis a keskara sharakōi ixiki. ¹⁴ Nāskaxō afaa fetsa ē shināima. Nā Cristo Jesús ē shināmis Ifofapaikōikī. Akka Niospa ea katoni ē afe Īpaxanō, Cristo Jesúsōnoax Epa Nios ari ē nokotiro, ariax a keskara sharakōi ixiki.

¹⁵ Mā Jesús Ifofakī nā ē mato yoisim keskafakī nānorikōi shinākāfe. Akka fetsafāfe a ē shināi keskara shināyamaifono, Niospa ato tāpimākī mēstekōi shara ato yoixii. ¹⁶ Akka nāfo nō tāpiax, shināsharakōita nō isharakōitiro, mā nōmāi Jesucristoōnoa tāpiax.

¹⁷ Efe yora mīstichi, ē Jesús Ifofaa keskafakī māri Ifofakāfe. Mā nō mato ōimamiskī, nō ikai keskai māri askakāfe. ¹⁸ Mē mato mēxotaima yoitaifamis, nāskafekē afianē ē mato yoi oiayanā. Akka fetsafāfe na ē mato yoiaki keskara nikakaspakani. Āto chaka xatekaspakakī Jesucristo ifi cruz ikakinoax noko nāxoni nikakaspakani. Nāskakanax Jesús noikaspayanā ikafo. ¹⁹ Jesús ato amapaiyai keskara shinātama āa apaiyaifo keskara fisti shināmisfo. Nā piyai fisti shinākata, a ayai fisti shināmisfo. Feronāfakēfēri kērofo shināmisfo, āto āfifoma. Kērofāferi feronāfaka fetsafo shināmisfo āto fenefoma. Nāskara chakafos shinākī, nā keskara fisti tāpiafo. Akka nō chakama, nō isharakōimis imisfo. Nāskakanax rāfitirofoma, nā keskarafo mā keyokani. Askatari nā omiskōipakenakafo mēra fokani. ²⁰ Akka nōfi askaramakī, nō Niospa fakefokī nō afe nai mēra Īpanaka. Akka nō manai a noko Īfimis nai mēranoax oxō noko ifiyonō, nōko Ifo Jesucristo. ²¹ Nāato nōko yora chakakē noko fetsafaxoxii afe yora

keskara sharafinakōia nō inō. Nāskaxō āfe kerex sharaōxō nōko yora noko fenasharafxoxii afara chakafo nō finōimifofanō.

4

Nōko Ifo Jesúsnoax mēxotaima inimafafāikāfe

¹ Nāskakē efe yora mīshitchi, ē mato noikōikī ē mato ōisharapai. Nā ē mato shināitīa ē mea ē inimakōikakāini. Nāskakē ēfe fakefāfe, Jesús kachikiri fayamakāfe. Ifo sharakōi fakāfe.

² Akka a xotofake rafe Evodia yafi Síntiqui ē ato yoisharapai mēnāpaikakīma isharakōinōfo nā yora fisti keskarakanax nōko Ifoōnoax. ³ Yamā, mī efeta Nios yonoxomiskī, ē mia yoinō nā kēro rafe ato yoisharafe isharanōfo. Nā rafeta efeta Niosnoa meka shara yoimisfoki afe ĩpaxanōfo. Clementeri nofeta yoimis. Fetsafāferi efeta Niosnoa yoipaonifo. Nāskakē āto anefo Niospa mā kirikaki kenea afe ĩpaxanōfo.

⁴ Nāskakē Jesús māto Ifokī mēxotaima inimakāfe. Afianā ē mato yoi, inimaifinakōikāfe. ⁵ Nāskakē isharakōikāfe keyokōichi mato ōinōfo, isharakōiafara mato fanōfo. Mā chaima nōko Ifo oi kiki.

⁶ Nāskakē afara afeskara afiaino shināchakayamakāfe, askatamaroko mēxotaima Epa Nios kīfiki. A mā fichipaiyai keskara yōkakāfe iskafakī kīfiki: “Aicho Epa Nios, mī ea nikasharakōimis. A ē yopai keskara tāpīxō mī ea axosharamis,” ĩxō kīfikāfe. ⁷ Nāskakē mā ratepaiyaito Niospa mato inimamasharakōixii. Afara afeskara ifiaino Niospa nōko ōiti noko inimaxotiro. Nāskakē nō tāpitiroma afesaxora nōko ōiti noko inimaxotiro. Askafiano Cristo Jesús nō chanīmara faino noko shināmasharatiro. Afara sharafoōnoa shinākāfe.

⁸ Efe yora mīshitchi, ē kirika keneki keyokerana. Afara nā chanīmakōi fisti shinākāfe, askatari afara sharafo shinākāfe, askatari nā noko mēstekōi shināmatio shinākāfe, yorafāfe a afara sharafaifo keskarari shinākāfe, a Niospa noko axōai keskarafori shinākāfe. Askaxō nōko Ifo aicho fakāfe.

⁹ Afara a ē mato yoi ai keskara yafi a ē mato tāpimana keskara akāfe. Nāskaxō afara fetsa ē akaito mā ōia keskafakī, māri askafakāfe. Mā askaito ōikī Niospa māto ōiti mēra mato inimamasharakōitiro. Nāskax mato fe isharapakenaka.

Filipos anoafāfe kori ichanāfakaxō Pablo fomanifo

¹⁰ Ē nōko Ifoōnoax inimakōi, taeyoi mā ea kori manamayopaofinixakī anā mā ea manamamisma. Akka iskaratīa ea shinākī mā mā ea manamana ē aō pinō. Akka ea shināmakiāfara ē mato faima, ea manamatiroma meekī mā ea manamamisma. ¹¹ Ē afaayayamafixō ea afaa ināfoma ē mato famisma. Ē shināchakaima, Niospa anori ea tāpimana. Ē afaamais fiāx ē inimatiro, askatari afara ichapayax ē inimatiro. ¹² Akka mē tāpia afaamaisax afesak ē itiomāki. Askatari mē tāpia a afara ichapayax ē itiro. Askatari mē tāpia afara afeskara ifiaino ē inimatiro. Nāskakē ē shināchakaima. Askatari māyaxri ē inimatiro, fonāifiari ē inimatiro. Afara mekefaxri ē inimatiro, afaa meke fayamafixri ē inimatiro. ¹³ Afara fetsafo ē atiro Cristo āfe kerex shara ea ināno.

¹⁴ Nāskakē mā ea shinākī mā ea sharafa ē omiskōiāto. ¹⁵ Akka Filipos anoxō mā mā tāpia, nā ē Jesúsnoa meka shara yoikī taefanitia noko ifipakexanō. Akka ē Macedonia anoax kaino, mā Nios Ifokōifaxō, mā ea kori manamani, ēmāi Niosnoa mato tāpimanano. Akka fetsafāfe ea afaa manamanifoma. ¹⁶ Ē Tesalōnica ano iyoano, ē kori yopaito mā ea femayopaoni. ¹⁷ Akka ē shināima a ē afara fiāi fisti. Askatamaroko ē shināi mā ea sharafaino Niospa mato sharafa fafafāinō, mato noikī. ¹⁸ Nāskakē iskaratīa ē anā afaa yopaima, mēmāi ayaxō. ĩpafrodito ea fexoyamea a mā ea manamayamea tii. Nā ē fichipaiyai tiimaroko finōmainīfōfā mā ea femayamea. Nā mā Nios noiai keskafakī eari noikī mā ea femayamea. Mā ea askafaito ōi matoki Nios inimakōixii. ¹⁹ Ēfe Niospa nā mā fichipaiyai tii mato ināxii. Epa Niosnā āfe afara sharakōifo nā ichapakōifo keyonakama, āfe Fake Cristo Jesúsxō mato ināsharaxii. ²⁰ Akka nōko Epa Niosfi nōko Ēpakōikī nā fāsi sharakōi, tsoa keskarama. Ares fisti sharakōi. Tsōakai a finōtiroma. Nā nōko Ifokōira nō fapanaka. Askara ĩpainōra.

Pablo mā mekai xatekī Filiposo anoafō meka shara ato fomani

²¹ Eōxō keyokōi a Cristo Jesús Ifofaāfo ea ato yoisharaxokāfe. Askatari na nono efe ikafāferi nā Jesús Ifofaafāfe mato yoisharakani kiki. ²² Na nono ikafāfe Nios Ifofakanax, xanīfo César āfe pexe ano yonomisfāfe afāferi mato yoisharakani. ²³ Nōko Ifo Jesucristo mato noikī mato sharafanō. Nā tii ē mato yoi.

Pablo

Pablo Colosas Anoafu Kirika Kenexō Fomani

Pablo Jesús Ifofaafu kirika kenexō fomani, Colosas anoafu

¹⁻² Ēkīa Pablo, Niospa ea nīchini, aato apaiyai keskafakī ē yorafo yoinō Jesucristoōnoa. Nofe yora Timoteo feta nō mato kirika kenexō fomai. Mā Cristo Ifofakōikē, pexe rasi Colosas anoxō Nios nikakōiyānā. Nōko Epa Niospa mato noikī mato shināfafāinō afanā mato fekaxtefanōma mā isharakōinō.

Pablo a Jesús Ifofaafu ato kīfixōfafāini

³⁻⁴ Nā nōko Ifo Jesucristo āfe Apa Nios nō mato kīfixōfafāini. Nō mato kīfikī iskafaxokī aicho fakī māmāi nō nikax mā Cristo Jesús Ifofakōikē. Nāskaxō nā Jesús Ifofaa fetsafori mā ato noikōimiskē mā nō nikamis. ⁵ Na meka shara chanīmakōi Jesucristoōnoa mā mā nikamis. Jesucristo chanīmara faax Nios ika ari mā afe ipaxatiro ixō yoinifo mā mā nikamis. Na meka chanīmara fakōixō fetsafo mā ato noikōimis. ⁶ Na meka shara Jesucristoōnoa mā nikakī taefakī mā chanīmara fakī finakōini. Nāskaxō nikakī mā tāpini chanīmakōi, Niospa mato noikī Jesucristoōxō māto chaka mato soaxoni mā chanīmara faino. Nāskakē na meka shara, nikakani maifo tii anoafori nāskarīfiamisfo. ⁷ Nonori nofe yora Ipafras mato yoini. Akka nā Ipafras nofeta Cristo yonosharaxomis, nāskakē nāato Jesucristoōnoa mato yoipaoni. ⁸ Nā Ipafras matoōnoa iskafakī noko yoiaito nō nikamis: “Na Colosas anoafu Niospa Yōshi Sharaōnoax isharakōikaxō fetsafo noikōikani,” ixō noko yoiaito nō nikamis.

⁹ Nāskakē nā ē matoōnoa nikakī taefaniūa, ē mato Epa Nios kīfixokī xatemisma. Kīfikī ē iskafa fafafāini: “Epa Niospa, Colosas anoafu mī Yōshi Sharaōxō mī ato amapaiyai keskafakī ato tāpimafe, mī ato tāpimani keskafakī āto ōiti mēraxō mia tāpikaxō mia Ifokōi fanōfo,” ixō ē mato kīfixōfafāini. ¹⁰ Nāskaxō nā mato amapaiyai keskara mā akaino ōi Nios matoki inimakōixii. Nāskax āfe Fake keskarakōi mā itiro. Nāskaxō mā fetsafo sharafa fafafāikī mā Nios tāpiki finakōitiro. ¹¹ Akka Epa Niospa afama mishtifo shara fatiroki, āfe kerex shara mitsisipakōi mato inātiro afara afeskarafiaino aōxō mā tenekōinō. Nāskafikī mā tenetiro fena fenakīma inimasharakōikai. ¹² Nāskakē mā inimakōi. “Aicho Epa Niospa,” mā fatiro nāatomāi noko imasharata afe yorafo ināpaiyai keskafakī nokorimāi ināito. Nōri afe yorafokē noko inimamaxii, a ika anokai fakishma penasharakōi. ¹³ Nāskakē noko imasharakōia anā fakish mēra nō inōma. Akka nā Satanās ika ano fakishifākōi. Nānoa Epa Niospa noko ifia, āfe Fake fe nō ipaxanō. Nāato āfe Fake noikōi. ¹⁴ Āfe Fāke noko nāxonikē aōxō Epa Niospa noko ifia, nōko chaka noko soaxoyanā.

Jesús noko nāxonioōnoax Nios fe nō isharapakenaka

¹⁵ Akka nō Epa Nios ōiyamafitirono āfe Fake Jesús mai ano oni. Nāskaxō āfe Fāke noko tāpimani afe keskaramākī Apa Nios. Nā āfe Fake Jesús Apa Nios keskarakōi, āfe ōiti keskarakōiri. Afaa oniataima Apa Nios fe nai mēra iyopaoni. ¹⁶ Āfe Fake Jesucristoōxō Niospa keyokōi onifani, nai mēranoafoya nono mai anoafu. Nā nō ōitromafoya, a nō ōitirofo onifani. Askatari āfe ājirifo nā afe ikafo onifata, niafakafāferi āto xanīfōri onifani. Epa Niospa āfe Fake Jesucristoōxō keyokōi onifani. ¹⁷ Afaa oniataima Cristo iyopaoni. Āfe kerex sharaōxō keyokōi kexesharakōimis. Nāskaxō fishifo kexeta, xini kexeta, oxe kexeta, nōko mai kexeta famis. Akka nāfo kexeyamaino, chakanai fetsekerana. Nai fe mairi chakanakerana. ¹⁸ Tsōakai Jesús finōtirono, afaa oniataima keyokōi finōyopaonixakī, iskaratūari keyokōi finōa. Nāfi nā chanīmara faafāfe āto Ifokōiki. ¹⁹ Nāskaxō Epa Niospa yoikī iskafani: “Ē imis keskaī ēfe Fakeri nāskakōimis, nāskax nāri efe Nioskōi, nō nāskara rafekōi,” ixō inimakai Epa Niospa yoini. ²⁰ Jesús ifi cruz ikaki mastaifono āfe imi foax noko nāxonī nōko chaka noko soaxoxiki. Nāskakē aōnoax Epa Nios fe nō anā isharatiro. Aōnoax keyokōi mai anoafoya nai mēranoafu afe isharatirofo.

²¹ Māto ōiti mēraxō mā Nios noikaspayanā, mā chakakōi fapaoni. Nāskata mā Nios fe rafeyamata, afe yorarikai mā ipaonima. ²² Nāskafikē āfe Fake Jesucristo nai mēraxō mai ano nīchini feronāfakēkōi ikiyonō. Nāskax ifi cruz ikakinoax noko nāxonī, aōnoax Epa Nios mato fe rafexō māto chaka mato soaxotiro a keskara shara mā inō. Nāskax mā akiki nokoaito matoōnoa afaa chaka yoitirono. Nāskaxori mā yoitirono iskafakī: “Mī afara chakafamis,” ixō aōnoa mā afaa yoitirono. ²³ Nāskano na meka shara Jesucristoōnoa mā chanīmara faxō afara fetsa mā shināyamaino Epa Niospa matoōnoa yoipakenakama iskafakī: “Mī afara chakafamis,” ixō matoōnoa afaa yoipakenakama. Askatamaroko mā chanīmara faax mā inimakōiāito mato ifixii mā afe ipaxanō. Mā Jesucristo āfe meka shara nikakī taefani keskafakī nānorikōi keyokōi ē ato tāpimani. Ēkīa Pablo, ē Epa Niospa āfe meka yoifafāini Jesucristoōnoa ato yoikī.

Niospa Pablo yoini a Jesús chanimara faafo ato yonoxonō

²⁴ Nāskakē ē inimai ē matoōnoax omiskōifi, māri afara afeskaraino mā Cristo Ifosharakōi faano. Cristo nokoōnoax omiskōini keskai, ēri nā afe rafemisfoōnoax nā Niospa fakefo atoōnoax ē omiskōimis. Ē matoōnoax omiskōita iskaratīari ē Cristoōnoax omiskōimis. ²⁵ Akka Epa Niospa ea katonī, a mato yonoxomis keskara ē inō, āfe meka shara ē mato yoinō. Nāskaxō ea yoikī iskafani: “Na maniafo tii anoā ēfe meka shara Jesucristoōnoa ato yoifofāsafafe,” ixō ea yoini. Nāskaxō āfe kaifoma mēra ea nīchini. ²⁶ Na meka shara Jesucristoōnoa nōko xinifāfe tāpiyopaonifoma. Niospa ato tāpimayopaonima. Akka iskaratīa Niospa noko tāpimani nō afe yorafokē. ²⁷ Epa Niospa Cristoōnoa mato yoimiyomis keskafakī keyokōi mato tāpimaxii, mato fisti tāpimatama, nā yora fetsafori ato tāpimaxii. Iskafakī ato yoixii: “Ēfe Fake Cristo mato fe rafekakāini, nāskakē mā chanimara fatiro a ē ika ano efe ipaxakī. Nā Cristo isharakōiai keskafakī ēri mato askafatiro māri isharakōinō,” ixō mato yoini.

²⁸ Nō Cristoōnoa yoisimis, keyokōi nō ato yoifofāsafamis keyokōi nō ato yoisimis nikakōinōfo. Mā isharakōiano nō keyokōi Niospa ferotaifi nō ōimasharapai a keskara shara ixii. ²⁹ Nāskakē ē mato yonoxokī finakōifafāini, Cristo āfe kerex shara ea ināno.

2

¹ Akka ē mato yoipai mā tāpinō, ē mato Epa Nios kīfixōfafāini. Laodicea anoāfo yafi fetsafori a ea ōimisfoma nāfori ē ato Epa Nios kīfixōfafāini. ² Nāskaxō ē mato kīfixōfafāini mātō ōiti mēranoax mā inimakōiyana, mā ranā mā nōinākōinō. Nāska faatanāxō Epa Niosnoa xafakīakōi mā tāpitiro, akka a iyopaonifāfe Cristoōnoa tsōa tāpiyopaonima. Nāskakē iskaratīa xafakīakōi mato tāpimapai aōnoa mā tāpisharakōinō. ³ Nāato keyokōi tāpikōia, Apa Niospa tāpia keskafakī āfe shinā mēraxori tāpikōia. Akka Epa Nios afarafo sharafoyakē, Cristoōxō mā tāpitiro. ⁴ Nānori ē mato yoi, tsōa mato pārayamanō, meka fetsafaxō fanīra mato yoipaikani kiki. ⁵ Ē mato fe iyamafiāxō pena tii ē mato shināi. Akka matoōnoa nikai ē inimakōi, mā chanimara fakōixō mā Cristo nikakōiaito.

Jesucristo nōko ōiti fetsafaxōfaano a keskara shara nō inō

⁶ Nāskakē mā nōko Ifo Jesucristo chanimara fakōixō, mā Ifofakōina. Nāskakē pena tii afe rafefafāikāfe. ⁷ Oa afara fanafono āfe tapo mai mēra chaikōi kaax ferotitroma keskara, Jesúsri nāskarakōikī, afe rafefafāikāfe afaa chakafatama a keskara shara ixikakī. Ipafras mato yoini keskafakī pena tii nikakōikī Jesús chanimara fafafafāikāfe. Nāskaxō pena tii Epa Nios aichofa fafafāikāfe.

⁸ Nāskakē kexemesharakāfe, fetsafāfe mato pārayamanōfo. Mā Jesús nikakōiai keskafakī anori mato yoipaikanima. Akka nā mato yoiaifo keskara mā ato nikakī kaxpakōi mā ato chanimara fatiro. Nāfāfe Cristoōnoa yoikōikanima, nāskaxō nā imisfo keskakakī mato yoipaikani. Nā chanimara faafāfema shināifo anori fisti mato shināmapaikani.

⁹ Akka Cristo fe Apa Nios nāskara rafe, Cristo noko keskara feronāfakēkōifiax Apa Nios imis keskara nā nāskakōini. ¹⁰ Nāfi keyokōichi āto xanīfokōiki, xanīfo fetsafoya, a niafaka chakafāfe āto xanīfofo finōkōinīfōfāna. Nāskakē mā Jesús fe rafexō mā afaa fetsa yopaima. ¹¹ Askatari mā Cristo Ifofai akka feronāfakēfāfe āto foshki repa xatepaonifo, nāskaramāi feyafakatsaxakakī. Akka mā foshki repa xatefiafono mātō chaka mato soaxotitroma. Cristo fistichi mātō ōiti mato fetsafaxotiro, mātō chaka mato soaxotiro afianā a mā chaka apaoni keskara mā anā atama a keskara shara mā inō. ¹² Akka mā maotisai faka mēra mā ikinitīa, nā mā chakafapaonifo oa maia keskara, askatari nā Jesús maifanifotīa a mā afara chakafapaonifo oa maia keskarafo. Mā faka mēra iki maotisameax mā fininākafāni oa Jesús fe fininākafani shinātsatiro mā a keskara sharakōi ixiki. Niospa āfe kerex sharaōxō afianā Jesús ofofani nā nō chanimara fai. Askatari mai mēranoax Jesús otonitīa, māri afe otoni keskara itiro, a keskara sharakōi ixiki. ¹³ Mā Jesús Ifofaamax nā yora naa keskara mā iyopaoni. Nāskaxō mā afara chakafapaoni mātō chaka xatexoma. Nāskafikē Epa Niospa Cristo ofofani afe nipaxanō. Nāskarifiakī matori aōxō nimapakexatiro, nāskaxō nōko chakafo mā noko soaxona. ¹⁴ Shinākapo. Keyokōi nō chakafamis keskara nōko chakafo Epa Niospa noko soaxoni, anā afoōnoa shināyamaxii. Nāskano Niospa yoini keskara nō nikatama afara fetsa nō chakafapaoni. Nāfo keyokōi nō chakafamisfo keskara kenepakea. Askafixō ifi cruz ikakinoā Jesús mastanīfoxō nāo nōko chaka noko soaxoni. ¹⁵ Akka Cristo ifi cruz ikakinoax noko nāxonixakī, Satanās yafi keyokōi niafaka chakafo finōkōia. Nāskakē noko anā afeskafatiroma, anā nōko ifo ixō noko ikitirofoma. Nāskakē Jesús ifi cruz ikakinoax naino Niospa keyokōi maifo tii anoāfo ato ispani na niafaka chakafo anā kerexfoma.

Jesús ika ari nai mēra sharakōi nā fisti fichipaikāfe

¹⁶ Akka mātō xinifāfe āto feyafati ipaoni xinia fena ikaino fista apaonifo. Askatari oxe rama kāiyaino fista apaonifo. Akka mato yotitirofo iskafakakī: “Afaa mā pitiroma askatari

afaari mā ayatiroma. Askatari nōko pena tenetitīa māri tenetiro,” ixō mato yoitirofo. Akka mā askayamaino fetsafāfe mato mekafakī Ichatirofo. Mato askafaifono ato nikayamakāfe. ¹⁷ Akka nā māto xinifāfe āto feyafati noko ōimatirofo afe keskara iximākai a Cristo oaino. Akka mā Cristo oano nā fisti nō Ifofatiro. Nā nō feyafamis keskara nō anā atiroma. Cristo fisti nō nikatiro a nō ayopaoni keskara nō anā axikima. ¹⁸ Ōisharakāfe fetsafāfe mato pārapaikani kiki iskfakakī: “Nō afaa tāpiama. Ājirifo nō kifitiro,” ixō mato pārapaikani. Afāfe afaa ōiyamafikatsaxakakī afama mīstifo yoipaimisfo. Āto shināmā shinākata kakapaikōimisfo, Niospa shināi keskarakai shināmisfoma. ¹⁹ Afokai Cristo fe rafepaikanima. Akka Cristo nōko mapo keskara askatari nō āfe yora keskara. Nāskaxō nōko yora nō kexesharax nō mitsisipakōi itiro. Nāskatari nōko pono efapayafo, nōko pono mīsthi, nōko nami mēranoax ichanātirofo. Afeskatama nō isharakōinō. Akka nō Cristo fe rafekōiaito Epa Niospa āfe Fākeoxō āfe kerex shara noko inātiro a keskara shara nō inō. Nāskarakōi noko axopai.

²⁰ Mā oa Cristo fe naa keskara mā ini. Nāskakē iskaratīa a mā chakafapaoni keskara mā anā akima. Askatamaroko mā isharakōimis. Mā askaito nā chanīmara faafāfema mato afaa yoitirofoma. Nāskakē, ōafeskakī mā ato nikaīmē, mā ato nīkaxō nā mato yoiaifo keskara ma apai? Nāskakē ato nikayamakāfe. ²¹ Nāskakē mato yoiki iskfapaikani: “Na afarafo meyamakāfe, afori piyamakāfe, mato ināifonori māto mēkemā achiyamakāfe,” ixō mato yoipaikani. ²² Akka na mato yoipaiyaifo keskara Niospa anori ato yoia. Āa shinākaxō mato yoipaikani. Akka nā mato yoipaiyaifo keskara nāfo mā keyokōi, anākai afo inakama. Nāskakē ato nikayamakāfe. ²³ Chanīma, yora fetsafāfe shinākī iskfakani. Na ato yoiaifo keskara shara, nafāfe tāpikōiafo, a Niospa noko yoini keskarakai tāpikōiafo. Nāskakē Niospa āfe ājirifo kififafāikani. Nāskakatari ato fanīrira mekfamifoma, askatari āto yorari mese famifoma āa koshamemisfo. “Nafō sharakōifo,” ixō atoŋoa yoipaikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kakapaikōimisfoki.

3

¹ Akka Cristo naax anā otoiānakani keskai māri nāskariāi afe otoiānakani keskara mā itiro mā isharakōiax afe ipaxakī. Cristo iskaratīa Apa Nios fe ika afeta keyokōi īkinā. Nāskakē aŋoa shināta nā mato amapaiyai keskara aŋoa shināfafāikāfe. ² Nāskakē nā Niospa fichipaiyai keskara fisti shinākāfe, nāskakōixikakī. Akka nono mai anoxō yorāfāfe afara chakafapayaifo keskafakī māri askafayamakāfe. ³ Anā ē mato yoi Cristo noko nāxoni. Akka mā oa Cristo fe naa keskara iyoni, nāskakē iskaratīa mā afe rafekakaini, Epa Nios feri mā askakāini. Nāskariāi Epa Niosri mato fe rafekakaini. Mā askaito tōa mato tāpitiroma, a mā Cristo fe rafekāi keskai ari askaxiki. ⁴ Cristo anā mai ano fotofaino māri afe ixii. Nāato noko īkipakenaka. Nāskakē a keskara sharakōi nōri afe ixii, keyokōichi yorāfāfe noko ōixikani.

Nō chaka iyopaonixakī iskaratīa nō ōiti fena sharayakōi

⁵ Nāskakē a mā afarafo chakafapaoni keskafakī anā askafayamakāfe. Askarafo anā shināyamakāfe. Askatari māto āfimafori chotayamakāfe, kērofāferi māto fenemafori chotamayamakāfe. Nāskaxō ato chaka shināyamakāfe. Afarafori noiyamakāfe feronāfakēfāfe māto āfima fichipaiyamakāfe, kērofāferi māto fenemafo fichipaiyamakāfe. Afara chakafori fichipaiyamakāfe, nā mā fichipaiyai fisti fichipaiyamakāfe. Mā askakī Nios mā noima, nā afarafo fisti noikī. ⁶ Askara chakafo Niospa ōipaima, nāskakē ato omiskōimakī finakōixii nikayamaifono. ⁷ Nāskakē taeyoi chakakōi mā iyopaoni Nios nikamax. ⁸ Mā mā askapaoniki. Akka iskaratīa a chakafo shināmakikāfe. Anā ōitifishkiyamakāfe, anā chaka shināyamakāfe, ato chakafayamakāfe, ato ichayamakāfe, askatari māto axfapa meka chaka yoiyamakāfe. ⁹ Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiaikī. ¹⁰ A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa māto ōiti mēra fena sharakōi mato ōi. Nāskakē a keskara sharakōi mato imafafāini, aŋoa mā tāpisharakōinō. ¹¹ Nō Cristo Ifofakē Niospa keyokōi nāskarafos noko ōi. Judeofō yafi a judeofoma, a kene tāpiafoya a kene tāpiafomari, yorafōya nafafo āto yonomatifōya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

¹² Niospa mato noikī mato katoni afe yorafo mā inō. Aa keskara shara mato imaxiki. Nāskakē fetsafo noikī ato sharafa fafafāikāfe. Nāskakē fetsafo shinākī nā mā apaiyai keskara fisti shinātama, fetsafāfe apaiyaifo keskarakai shinākāfe, oi tsiī faxō ato yoifafāikāfe. ¹³ Nāskakē fetsafo fe mēnāpaitama ato yoisharakāfe raenāsharakāikī. Nōko Ifāfe mato raefa keskafakī fetsafo fe raenā faatanāsharakāfe. ¹⁴ Nāskakē nā ē mato yoiai keskai, keyokōi noinākāfe, nō noināsharafinakōiaiki. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro. ¹⁵ Nāskakē Cristo nikasharakōikāfe māto ōiti sharanokai mā fochishpanā faatanātiroma. Askatamaroko aŋoa isharakōiax nā

yora fisti keskara shara mā itiro. Nāskakē Epa Niospa mato katonī aōnoax mā isharakōita fetsafo mā afeska fanōma. Nāskakē mā Epa Nios yoitiro iskafakī: “Aicho Epa Niosi, ēfe ōiti mīa sharafaxōa,” ixō mā yoitiro.

¹⁶ Cristo noko tāpimani keskafakī mātō ōiti mēra nanekōikāfe. Nāto mato īkinākī āfe meka tāpisharakōixō fetsafori yoisharakāfe isharaxikakī. Mātō ōiti mēraxō Nios aicho fata David fanāini keskai māri fanāixota āfe mekaōnoari fanāixokāfe. ¹⁷ Nāskaxō nā mā apaiyai keskafakī yoikāfe iskafakī: “Aicho, Epa Niosi. Nōko Ifo Jesucristoōxō nā nō apaiyai keskafakī keyokōi mī noko axōfafāimis,” ixō yoifafāikāfe.

Nō Jesús Ifofakōinax aōnoa nō afeskatiromāki

¹⁸ Kērofāfe, mātō fenefāfe mato yoiaifāfe ato nikasharakōikāfe. Nāskax mā isharakōikai nōko Ifāfe mato yoiai keskai. ¹⁹ Feronāfakēfāfe, mātō āfīfo noikōikāfe ato feratenāyamakāfe.

²⁰ Fakefāfe, mātō epa yafi mātō efa nikakōikāfe. Mā askaino nōko Ifo matoki inimakōi kiki.

²¹ Epafō feta efafāfe, mātō fakefo ferateyamakāfe, mātō fakefāfe shinākī iskafayamanōfo: “Ooa, ēfe epa feta ēfe efa ea feratenafo,” ixō shināyamanōfo.

²² Āto yonomatifāfe, mātō ifofo ato nikakōikāfe nono mai anoxō. Akka mato ōiaifonos ato yonoxokāma, mato ōiamai fonori ato yonoxokāfe. Nā mātō Ifo Jesucristo mā noiaino, matoki inimanō ato yonoxosharakāfe. ²³ Afara yonokī inimayanā axosharakōikāfe. Nōko Ifo shinākī ato yonoxosharakāfe. ²⁴ Nāskakē shināmakiyamakāfe mā mā tāpiaki nōko Ifo chipo afara sharafo mato ināxii kiki. Mā nōko Ifo Jesucristo yonoxosharamiski, nāfi mātō Ifokōikī. ²⁵ Akka nā afara chakafamiso, nāfo omiskōi finakōixikani afara chakafakatsaxakakī. Nāskakē Niospa fetsa keskarafo noko ōima, nāskarafos noko ōi.

4

¹ Ato yonomamisfāfe, mātō yonomatifo ato paraxō yonokakāma ato noisharayanā afara sharafo ato ināsharakāfe ato parakakāma. Mā mā tāpiakī māri Ifoyakī, mātō Ifāfe nai mēraxō mato ōifafaini kiki.

² Nāskakē Epa Nios kīfiki xateyamakāfe, kīfiki afara fetsa shinākakāma, Epa Nios fisti kīfiki iskafakāfe: “Aicho Epa Niosi, mī ea sharafa fafafāini,” ixō kīfikāfe. ³ Nāskakē nokori kīfixokāfe, Epa Niospa fetsafo mēra noko nīchiano Cristoōnoa nō ato yoisharanō. Afāfe Cristoōnoa nikamisfomaki. Akka ē Cristoōnoa meka shara yoiaito yorafāfe ea karaxa mēra ikimanifo. ⁴ Ea Epa Nios kīfixōfafāikāfe xafakīakōi Jesucristoōnoa anā ē ato yoinō.

⁵ Akka nā Jesús Ifofaafoma mēra mā ikaki ato ōimakāfe mā isharakōixō. Nāskaxō nā mā atoki nokoaitīa Jesucristoōnoa ato yoisharakāfe. ⁶ ato fe mekakī meka shara fisti ato yoifafāikāfe, ato kaxemetsama fakakāma ato yoisharakōikāfe, āto ōiti mēraxō shināchakanōfoma. Mā askakī nā yorafo mā ato kexesharatiro.

Pablo mā mekai xatekī Colosas anoafō ato meka shara fomai

⁷ Nofe yora Tīquico, ē aō noikōi. Nāto efeta nōko Ifo Jesús yonoxomis. Nāskakē aato eōnoa mato yoi kiki ē afeskax nono ikamākī. ⁸ Nāskakē ē mato ari nīchia, aato mato yoinō afeskax nono nō ikamākī, askatari mato inimamasharakōixiki. ⁹ Nā nofe yora Onīsīmōri afe kai, nāri ē noikōi. Nā mato fe iyopaoni, nofeta nōko Ifo Jesúsnoa yoi inimakōimis. Nā rafeta matoki noko kaxō mato yoikani nono afe keskaramākī.

¹⁰ Akka na efe karaxa mēra imisto Aristarcori mato meka shara fomai. Marcosri mato meka shara fomai, nā Marcos Bernabé āfe chai. Nāskakē nā Marcos matoki nokoaitō ē mato yoia keskafakī ifisharakāfe kexesharayanā. ¹¹ Na feronāfakē āfe ane Jesús nāatori mato meka shara fomai, āfe ane fetsa Justo. Nāfāfe judeofo mēraxō Nios Ifokōi fakaxō efeta Nios xanīfoōnoa yoikī yonomisfo. Nāskafakakī ea inimamakōimisfo. Akka ēfe kaifāfe nonoxō efeta Nios yonoxomisfoma, nā ē mato yoiaifo feta ē Niosnoa yoimis. ¹² Na feronāfakē Ipafrasri meka shara mato fomai, nāatori Cristo yonoxomis, nā mato mēra iyopaoni. Nāto mēxotaima matoōxō Epa Nios kīfiki iskafa fafafāini: “Epa Niosi, mī ato amapaiyai keskafakī ato amafe afaa fetsa shinānōfoma. Nāskakanax mī Fake Jesús ōiti keskara shara inōfo,” ixō mato kīfixōfafāini. ¹³ Akka mē ōia na Ipafras matoōxō shināchakakōiaito. Askatari nā pexe rasi Laodicea anoafō yafi Hierápolis anoafō ato Epa Nios kīfixōfafāini. ¹⁴ Na Lucas ato sharafamis, ē aō noikōi. Nāto Demās feta mato meka fomakani.

¹⁵ A Jesús Ifofaafō Laodicea anoafō ea ato yoisharaxōfe. Nīnfasri ea yoisharaxōfe, a āfe pexe anoax Nios Ifofakanax ichanāmisfōri ea ato yoisharaxōfe. ¹⁶ Akka na kirika kene ē mato fomai mā mā ōixō, nā Nios Ifofaafō Laodicea anoafōri ato fomakāfe akairi ōimōfo. Māri na kirika kene ōikāfe Laodicea anoxō mato mana manafono. ¹⁷ Nāskakē Arquipōri ea yoikī iskafaxokāfe: “Epa Niospa mia yoia keskafakī axosharakōife,” ixō ea yoisharaxokāfe.

¹⁸ Ēkīa Pablo, ē mato kirika kenexoni. Mato yoisharakī, ēfe mīfikōichi ē kenei. Nāskakē ea shināmakiyamakāfe ē karaxa mēraxō ikakī. Niospa mato noikī matoōnoa shināfafāinō. Nā tii.

Pablo Tesalónica Anoafo Kirika Kenexō Fomani

Pablo a afe rafeafo feta a Tesalónica anoxō Nios Ifofafo ato kirika kenexō fomani

¹ Ēkīa Pablo, nō mato kirika kenexō fomai, Silvano ikaino Timoteo ikaino nā tiito nō mato fomai. Nā pexe rasi Tesalónica anoxō Nios Ifofafo nō fomai, anoxomāi Epa Nios yafi nōko Ifo Jesucristo mā Ifokōi faafono. Epa Nios feta nōko Ifo Jesucristo mato noikī mato sharafanō fekaxtetama mā isharakōinō.

Tesalónica anoafāfe Jesús Ifokōi fakaxō ato ōimanifo

² Mēxotaima nō matoōxō Epa Nios aicho fakī nō kīfikī iskafa fafāfāini. ³ “Epa Niosi, na Tesalónica anoafāfe, mia noikakī mia yonoxosharamisfo, nāskakaxō fena fenakākima nōko Ifo Jesús manasharamisfo nokoki anā oi kiki,” ikaxō. Nānori pena tii ē mato kīfixōfāfāini. ⁴ Efe yora mīstichi, Niospa mato fāsi noikī mato katonī afe yorafo mā inō. ⁵ Nō mato Niospa meka sharaōnoa yoimis afeskax nō afe īpaxatiromāki. Akka nōko mekapas nō mato yoimisma, askatamaroko Niospa Yōshi Sharayaxō āfe kerex sharafoyaxō nō mato Jesúsnoa nā meka chanīmakoī nō mato yoimis. Akka mā mā tāpia nō mato fe isharaḡoni. Nō askaino mā Jesús Ifokōini.

⁶ Akka nō Jesús Ifofai keskakakī māri Ifofani. Nāskakē Niosnoa meka shara nō mato yoiāito inimakōiyanā mā nikakōini, Niospa Yōshi Sharapamāi mato inīmamakōiāino fetasafāfe mato omiskōimafiaifono. ⁷ Nāskakē mā isharakōixō mā ato ōimakōia nā Nios Ifofafo Macedonia anoafo yafi Acaya anoafo. ⁸ Matoōxō nōko Ifāfe meka shara nikakī taefanifo Macedonia anoafo feta Acaya anoxō. Akka anoxos nikanifoma. Nā pexe fetrafo anoxori nikanifo. Nāskaxō mā tāpiafo mā Nios Ifokōifakē. Nāskakē nō anā matoōnoa ato yoitiroma, māmāi matoōnoa tāpikōiafono. ⁹ Askatamaroko fetasafāfe nokoōnoa ato yoimisfo iskafakāki: “Tesalónica anoafāfe nōko Ifo Nios Ifokōinafo, nāskaxō Pablo yafi a afe rafeafo ato sharafayanā a yoiāifo keskara ato nikakōimisfo. Nāskakaxō afara fetso onifakaxō, ‘Na nōko niosra,’ ikaxō anā kīfimisfoma, Nioskōi Ifokakakī. Nāskakaxō nā nipanakā Nioskōi yonoxomisfo. ¹⁰ Akka nā Niospa Fake Jesús mā manakōi nai mēranoax anā oaitīa. Akka Niospa āfe Fake otofani. Nāato noko ifitiro a omiskōiaifo mēranoax nō omiskōinōma.”

2

Pablo Tesalónica anoxō Jesúsnoa ato yoini

¹ Efe yora mīstichi, mā mā tāpia kaxpa nō mato ōikai kanima. Jesúsnoa nō mato yoikai kani nikakī mā Ifokōinō. ² Mā mā tāpia nō matoki kayoamano na Filiposo anoafāfe noko īchayanā noko omiskōimapaiifo. Nāskaxō noko xatemapaiyafono, Epa Niospa āfe kerex shara noko ināno, nō ratetama na meka sharaōnoa Jesúsnoa nō mato yoimis keskara tsōa noko xatematiroma. ³ Akka nō mato yoiki fanīrira nō mato yoimisma, nō mato yoisharakōimis. Askatari nō mato chakafakī yoimisma, askatari nōa nō mato paramisma. ⁴ Askatamaroko Epa Niospa noko katonī āfe meka shara Jesúsnoa nō mato yoinō. Akka nōkai yorafo nokoōnoa shināmapairoma. Askatamaroko nokoōnoa Nios fisti nō inīmamapai, nā fistichi nōko shinā mēraxō nō shināi keskara tāpikōia. ⁵ Mā mā tāpia nōkai matoōnoa meka shara yoimisma, māri nokoōnoa yoisharanō. Ēkai mato feparamisma, “Noko afara shara inānōfora,” ixō. Akka a ē mato yoimis keskara Epa Niospa tāpikōia, nāato eko ōifāfāini. ⁶ Nōkai fetrafo nokoōnoa yoisharakāfe nō ato famisma. ⁷ Akka nō aōnoa yoinō noko nīchini āfe meka shara nō mato yoinō. “Akka noko afara afeskarafaxokāfe,” ixō nō mato yoikerapaoni. Akka āfa āfe fake yome kexesharamis keskakakī nō mato kexesharapaoni. ⁸ Nō mato noikōikī inimakāi nō mato Niospa meka shara yoiyanā nōa nō inānēpakoīni, mā Nios tāpisharakōinō. Nāskaxō nō mato noipanoi keskakakī, iskaratīa nō mato noikī finasharakōimis. ⁹ Efe yora mīstichi, mā mā tāpia nō mato mēraxō yonomiski omiskōikōiyanā, a nō fichipaiyai fixiki, penata yonota fakishchāiri nō yonomis. Akka nō mato afaa kaxpa fiapaimisma, Niospa meka sharaōnoa mato yoiyanā.

¹⁰ Akka mā mā noko ōimis, Niospari tāpia nō tanaima isharakōimiskē mato fe a mā Nios Ifofafo fe. Nāskakē nokoōnoa tsōa afaa chaka yoitirofoma. ¹¹ Askatari mā mā tāpia nō mato inīmamakōimis, mā shināmīsaitori nō mato askafamis inīmamamis oa āpa āfe fake inīmamatiro keskakakī. ¹² Akka nō mato yoimis mā isharakōinō a Nios Ifofafo imis keskai. Akka nāato mato katonī Jesús keskara shara mā īpaxanō.

¹³ Nāskakē mēxotaima nō Epa Nios aicho fatitaifaa māmāi noko nikasharaito, nō mato Niospa meka sharaōnoa yoiāito. Nāskakē mā yoikī iskafani: “Na meka shara mā noko yoiāi yōra mekama, Niospa meka shara,” ixō mā yoini. Chanīma, Niospa mekakōi nō mato yoimis. Nāskakē mā āfe meka nikakī mā chanīmara faino mato shināmasharai Jesús keskara

shara mā inō. ¹⁴ Efe yora mīstichi, māri omiskōini māto kaifāfe Mato omiskōimanaifono. Nāskarīfai nā mā ikai keskai a Nios Ifofafo Judea anoxō Cristo Jesús Ifofakanax omiskōikani āto kaifo judeofāfe ato omiskōimanaifono. ¹⁵ Nā judeofāfe nōko Ifo Jesús retenifo, taefakī a ato Niospa meka sharaōnoa yoisim ato retepaonifo, nāskaxori noko omiskōimayanā noko potanifo. Nāskaxori Nios aicho fayamata yorafo chakafakī mekafamisfo. ¹⁶ Askatari a judeofoma Nios fe īpaxanōfo nō ato yoisharapaiyaino, noko ato yoitima famisfo. Nāskakē afaa chakafakī finayamafikatsaxakakī mā afara chakafakī finakōimisfo. Akka iskaratīa anā tenetiromameki Niospa ato omiskōimaki finakōi.

Pablo Tesalónica anoafō anā ato ōipai kapaini

¹⁷ Efe yora mīstichi, mā nō mato fe paxkanāifinixakī, nōa nō shināki mato ōiamafikī mēxotaima nō mato shinātaifai nōko ōiti mēraxō. Akka nō kaxō nō mato ōisharapaikōi. ¹⁸ Akka mā nō mato ari kapaitaimis, nāskai fi ēroko mēxotaimakōi mato ari kapaikōimis. Nō askafiaino, akka Satanās noko katimafamis. ¹⁹ Nō mato yoisim Jesús keskara shara mā inō. Nāskakē Jesucristo oaino keyokōichi tāpitirofo Jesūsmāi Ifokōi fakaxō. Nāskakē Jesús ōiaino matoōnoax nō inimakōixii, nō mato yoipaoni keskaramāi mā nikakōimiskē. ²⁰ Chanīma, nokoōxō mā Jesús Ifofakōinafono nō inimakōi. Nāskakē Epa Nios nokoki inimakōi.

3

¹⁻² Nāskakē nō anā tenetiroma meekī nō shināita nono Atenas ano nores nētexiki, nāskaxō nofe yora Timoteo nīchixiki mato ōikanō. Na Timoteori Nios yonoxomis, nāto nofeta yonomis Jesucristoōnoa meka sharaōnoa ato yoiki. Nāto mato yoiki mato inimamasharakōitiro. ³ Nāskakē ē matoki Timoteo nīchini: “Omiskōikāki anā Niospa meka nikatirofomara,” ixō. Akka mā mā tāpia na nō omiskōiai keskara. ⁴ Akka nō mato fe iyoxō, nō mato yoifafāiyamea, nō omiskōixiira fakī. Nō mato yoifafāiyamea keskai mā askakōia, nāskakē mā mā tāpia. ⁵ Nāskakē ē anā tenetiroma meekī, ē Timoteo nīchiyamea mato yōkatanō, a mā Jesús Ifofapaoni keskafakī ai mā Jesús Ifofamāki ē tāpipaikī. Akka ē ratekōiyamea, “Niāfaka chakata ato afara chakafamaira,” ikax. Akka nōakōi kaxpa Niospa mekaōnoa nō mato yoiyamea ikerana.

⁶ Akka Timoteo mā Tesalónica anoax anā oa mato ōitani. Meka shara matoōnoa noko yoitoshia, mā Jesús Ifofasharayanā mā noināsharakōiaito. Noko yoia mā noko shināyanā mā noko noikōiaito, askatari mā noko ōisharapaikōiaito, nā nō mato ōipaiyai keskafakī mā noko ōisharapai. ⁷ Nāskakē efe yora mīstichi, noko Jesúsxō omiskōimayanā noko fekaxtefaifono mā Jesús Ifo sharafakī mā noko inimamakōimis. ⁸ Akka mā mā Jesús Ifofashara, mā anā afaa fetsa shināima. Mā nō tāpiax nō inimasharakōi nō isharakōitiro. Nāskakē afara afeskaraino nō tenetiro. ⁹ Nō matoōnoa shināki nō Epa Nios kīfikī, nōko ōiti mēranoax nō fāsi inimakōi. Nāskakē nō matoōxō Epa Nios kīfiki nō aichofa fafāīni. ¹⁰ Nāskakē penata yoita fakishi yoita nō Nios kīfifāīni matoōxō, noko mato ari nīchiaino nō mato ōikanō a mā tāpiamafo nō mato yoixiki mā Jesús Ifofakōinō.

¹¹ Nāskakē Epa Nios feta nōko Ifo Jesucristo mato ari noko nīchipainō nō mato ōikanō. ¹² Nōko Ifāfe mato shināmasharaino mā noināi finakōinō, fetsafori mā noisharanō, nō mato noiāi keskafakī māri keyokōi yorafo noisharakōinō. ¹³ Mā askaino Epa Niospa māto ōiti mēraxō mato shināmasharai, Jesús Ifo sharafayanā mā afaa chakafayamanō. Mā askaino nōko Ifo Jesús afe yorafoya oaitīa māri a keskara shara ixii, Epa Niospa ōiaino.

4

Afeskax isharaxō nō Nios inimatitromē nokoki inimanō

¹ Efe yora mīstichi, mē mekai xatekī ē mato yoinō. Nō mato yoipaoni afeskax mā itiromāki Nios matoki inimanō. Akka nā nō mato yoipaoni keskai mā mā askakōia. Nāskakē anā nō mato yoi noko nikakapo. Mā Nios Ifofaa keskafakī nōko Ifo Jesucristoōxō Ifofakī finakōikāfe.

² Akka mā mā tāpia nōko Ifo Jesús noko yoini keskara, nānorikōi nō mato yoisim. ³ Akka Niospa fichipai a keskara shara mā inō. Nāskakē tsōa āfe āfima chotatiroma. Kērofāferi āto fenemafo chotamatirofoma, ⁴ Askatamaroko āfiyatirofo āfe āfi noiyanā āfe āfifes ixiki. ⁵ Nāskata afara chakafapaimiskōi iyamaxikakī, a Nios tāpiamafāfe amisfo keskara axikakima. ⁶ Akka Epa Niospa yoini iskafakī: “Fētsa āfi fe ipaiyamakāfe. Tsoa fomāyamakāfe fetsa āfi fe ixiki,” ixō Niospa yoini. Akka nō mato yoini keskai, tsoa askayamakī afara chakafaifono Epa Niospa ato omiskōimaxii. ⁷ Epa Niospa noko katonima nō afara chakafanō. Askatamaroko noko katoni a keskara shara nō inō. ⁸ Nāskakē a ē mato yoisim keskara tsōa nikayamakī atokai yora fisti nikakaspaima. Niosri nikakaspai, nāto āfe Yōshi Shara mato ināfiano a mato amapaiyai keskara mā anō.

⁹ Ēfe mekakai mā fichipaima mā ranā noināxiki. Epa Niospa mato tāpimani mā noinānō. ¹⁰ Mā nō tāpia nā Nios Ifofaafō Macedonia anoxō mā ato noikōiaito. Nāskakē nō mato yoisharapai, mā ato noiki finakōinō. ¹¹ Nāskakē isharakāfe mato ōiti mēraxō afanā mato fekaxtefanōma. Fētsa afara afeskarafaino aōnoa shināchakayamakāfe. Nā Niospa mato amapaiyai keskara fisti akāfe. Askatari mā yonotiro xanikima. Nānori nō mato yoimiski. ¹² Nāskakāki mā yonotiro a mā fichipaiyai fixiki. Kaxpa afaa ato yōkayamakāfe. Mā askaito a Nios Ifofaafāfema matoōnoa shinākōitirofo.

Nōko Ifo Jesús anā oaino, zafe keskara ixīimē?

¹³ Efe yora mīshtichi, ē mato yoiāi keskara nikasharakāfe. Jesús Ifofaafō nakanax afeskakanimākai ē mato yoinō, akka a Ifofaafoma ato fe yorafo naafono, manomitsakani omiskōikani. Akka mā askaima māmāi Nios Ifofaax, māmāi anā ōinōnāxixakī. Akka a Nios Ifofaafoma anā ōinōnākanima. ¹⁴ Mā nō tāpia Jesús nafiāx afianā otoni. Nāskarifiakī mā nō tāpia Niospa atori otofaxii. Jesús anā oaino, a Ifofakanax namisfo.

¹⁵ Nāskakē nō mato yoimis nōko Ifo Jesús noko tāpimamis keskara. Akka nō nayoamax nōko Ifo Jesús oaino nō rekē nai mēra kaima, nā naitaenifo rekē fokani. ¹⁶ Akka nōko Ifo nai mēranoax fotopakekafāni fāsikōi mekakeraxii xanīfo finakōimāiax. Askatari nā ājiri xanīfo finakōiafāfe āto mekari nō nikaxii. Askatari Niospa āfe maneti chāi chāisaito nō nikaxii. Nāskakē a Cristo Ifofakanax namisfo otoi taexikani. ¹⁷ Nāskata a nō namisfoma Niospa atoya noko iyoxii, nāskakē nai kōi mēranoax nō fichināxii. Nōko Ifori nofe ixii nai kōi mēra. Nāskakē nōko Ifo fe mēxotaima nō ipanaka. ¹⁸ Nāskakē mā ranā inima faatanāsharakāfe, nā meka sharaōnoax.

5

¹ Efe yora mīshtichi, nōko Ifo Jesucristo anā oaino anā nō mato yoitiro. ² Akka mā mā tāpikōia nā oaitia tsōa manasharayamaino nōko Ifo nokotiro. Nā afaa shināima tanaima oxafono, fakishi oax yometso atoki yometsotiro keskai. ³ Yorafo iskaifono: “Nōkai afaa chakafamisma nō isharakōia,” ikaifono Epa Niospa ato omiskōimanaino pae meexikani. Oa kēromā fake nanexō mā fake kākīi pae meetiro keskara meexikani. Nāskakē nā omiskōiai nokoaino tsoa faki onetiroma.

⁴ Akka efe yora mīshtichi, mā kai oa fakish mēra nia keskarama, askatamaroko mā oa penata nia keskara. Nāskakē mā manasharaito nōko Ifāfe mato fichitoshitiro. Akka nā Ifofaafoma oa fakish mēra nia keskarafo, atoki yora yometso oax atoki yometsoaino tsōa tāpitiroma keskarafo. Nāskarifiakī nōko Ifo oaino afaa shināitirofoma, Ifokairoko fakaxō. ⁵ Akka māfi nā penata nia keskara sharakōifokī. Mā kai oa fakish mēra nia keskarafo. ⁶ Nāskakē nā Satanās ifofamisfo keskara nō imisma, afāfe afarafo chakafaifo fisti shināmisfo. A Jesús fotoaino tsōa shināmisma. Akka nō anā Jesús oaitia nō shināi, oa yora oxa keskara nō imisma. Oa yora moia keskara nō imis Jesús oaitia manai xafakīakōi isharaxō. ⁷ Nā afaa shināifoma a Satanās ifofaafō nā fakishi oxafo keskarafo. Nāskarifiāi a Satanās ifofaafō afaa shināifoma fakishi pāemisfo keskarafo. ⁸ Akka nō kai ato keskarama, nōfi oa penata nia keskara sharafokī. Nāskakē Jesús Ifokōi fata nō yorafo noikōita nā Jesús oaino nō manakōitiro, nō askaito Satanās noko afaa chakafamatiroma. Māraki sorarofāfe āto rapati kerekkōi safeafono tsōa ato retetiro, āto maiti kerekkōi safeafonori tsōa ato retetiro. Nāskarifiakī nō Jesús Ifofaano, āfe Yōshi Shara nō mēra naneano Satanās noko afeska fatiroma. ⁹ Akka Niospa shinānima a omiskōipakenakafo mēranoax nō omiskōipaxenō. Askatamaroko noko ifinī Jesucristoōxō nōko chaka noko soaxoxiki nō afe ipaxanō. ¹⁰ Akka Jesucristo nokoōnoax nani nō afe ipaxanō. Nayamafix mā naaxri nō afe nīpanaka. ¹¹ Nāskakē inimayanā fetsafo ato inimamasharakāfe. Mē tāpiaki mā ato askafaino. Nāskakē ato fe mēxotaima aska faatanānkāfe.

Pablo A Nios Ifofaafō ato yoisharani

¹² Efe yora mīshtichi, ē mato yoisharapaikai, ea nikasharakāfe. Epa Niospa nā Ifofaafō katoni āfe meka shara mato yoinō. Nāfāfe nōko Ifoōnoa mato yoisharamisfo nōko Ifo mā Ifo sharafanō. Nāskakē ato noiyānā ato nikasharakāfe. ¹³ Nōko Ifoōxō mato yoisharamisfo, nāskakē ato nikasharakāfe, ato noisharayanā. Mato fe yorafo fe isharakāfe, mēenāpaitama isharakōikāfe.

¹⁴ Askatari efe yora mīshtichi, nō mato yoisharamis iskafakī: A xanimisfori ato yoisharakāfe yonosharanōfo, askatari a shināmisaifo ato inimamakāfe. Nāskaxō a Nios Ifofasharafoma ato yoisharakāfe chanīmara fakōinōfo. Nāskaxō ato noiyānā fenāmāshta mā ato yoisharatiro.

¹⁵ Nāskakē kexemesharakāfe, fetsafāfe mato noikaspaifono ato kopiyamakāfe. Askatamaroko noinā faatanāsharakāfe, keyokōi yorafo sharafakāfe.

¹⁶ Mēxotaima inimafafāikāfe. ¹⁷ Pena tii Epa Nios kīfifafāikāfe. ¹⁸ Afara afeskara afiaino, Epa Nios aicho fakāfe. Nāskara Niospa matoōnoa fichipai kiki mā Cristo Jesús Ifo shara fakē.

¹⁹ Niospa Yōshi Sharapa mato amapaiyai keskara xateyamakāfe. ²⁰ Fetsafāfe Niosxō mato yoiaifono a yoiaifo keskara, “Na afamara,” ixō ato nikakaspakakīma, ato nikasharakōikāfe.

²¹ Akka fētsa mato yoipaiyaito Niospa Yōshi Sharaōxō yōkakāfe nā mato yoiai keskara chanīmamakī askayamai chanī itiroki. Akka nā meka chanīmakōi nikafafāikāfe, a meka chanī nikakakīma. ²² Afara chaka fishtayamakāfe.

²³ Niospa māto yorafoya, māto fero mēshofoya māto yōshi sharafoya Niospa mato sharakōi fatiro mā fekaxtenōma. Nāato shara mato imatiro āfe ōiti keskara shara mā inō. Mato kexesharata māto ōiti mēraxori mato shināmasharatiro. Askax mā sharakōi inō. Epa Niospa mato askafaino nōko Ifo Jesucristo afianā oaitīa mato shināmasharaxii. ²⁴ Niospa mato katoni mā Ifofanō. A noko yoiai keskara Niospa noko pāratiro, noko axotiro.

Mā mekai xatekī Pablo ato yoisharani

²⁵ Efe yora mīshtichi, noko Epa Nios kīfixokāfe.

²⁶ Keyokōi a nōko Ifo Jesús Ifofafo fe yoinōnāsharakāfe.

²⁷ Nāskaxō Epa Niospa mato yoia keskara nikasharakāfe. Nā mā Ifofa tii ē mato kirika kenexō fomaikai ato nikamasharakāfe.

²⁸ Nōko Ifo Jesucristo mato noikī mato sharakōifanō. Nā tii ē mato yoi.

Pablo

Pablo Tesalónica Anoafo Afianã Kirika Kenexõ Fomani

Pablo afe rafeafo feta Tesalónica anoxõ Nios Ifofaafono ato kirika kenexõ fomani

¹ Èkĩa Pablo. Silvano ikaino Timoteo ikaino nõ mato kirika kenexõ fomai. Efe yora mĩshtichi, mã Epa Nios Ifofaano pexe rasi Tesalónica anoxõ, mãfi nõko Epa Nios fe rafekõiaikĩ nõko Ifo Jesucristo feri mã askakõia. ² Nãskakẽ Epa Nios feta nõko Ifo Jesucristo mato noĩkĩ mato sharakõifanõ, askatari mato imasharakõinõ mãto õiti mẽranoax mã anã fekaxtenõma.

Epa Niospa a yora chaka omiskõimaxii mã Cristo anã oaino

³ Efe yora mĩshtichi, mã taefakĩ mã Nios chanĩmara fani. Nãskakẽ iskaratĩa mã chanĩmara fakĩ finakõia. Askatari mã rama Nios Ifofaax mã nõinãsharakõini. Nãskakẽ iskaratĩa mã nõinãifinakõi. Nãskakẽ nõ matoõxõ Nios kĩfikĩ iskafa fafafãini: “Aicho Epa Nios, mefe yorafãfe Tesalónica anoafãfe mia Ifokõi faafoki,” ixõ ã mato kĩfikõifafãini. ⁴ Nãskakẽ Niospa mekaõnoa nõ ato yoifofãsafakĩ nã Nios Ifofaafono fe nõ ato fe ichanãitĩa nõ matoõnoa ato yoimis iskafakĩ: “Nã Nios Ifofafo Tesalónica anoafo ãto kaifo fetsafãfe ato omiskõimamisfo. Nãskakẽ afara chakafãfe ato afeskarafafaino a shinãtamaro Jesũ Ifokõi fakaxõ tenekõimisfo,” ixõ nõ matoõnoa ato yoixomis. ⁵ Nãskakẽ mã Jesucristoõnoax omiskõifixõ mã tãpitiro Niospa isharakõixõ mato yoikĩ iskafaino: “Nãfo isharakõiafo,” mato faino mã afe ipaxatiro. Nãskax mã mã omiskõifixax chipo mã afe isharpakenaka.

⁶ Niospa mẽstekõi fisti shinãmis, a mato omiskõimamisfo kopikiri chipo Niospa ato omiskõimaxii. ⁷ Nãskakẽ nõko Ifãfe mato tenemasharaxii mã anã omiskõinõma a noko akai keskafakĩ mã nõko Ifo fotoxõ. Akka nõko Ifo nai mẽranoax fotoi oa chii xoisai itikikeraxii ãfe ajiri finakõiafo fe oi. ⁸ Akka nõko Ifo oxii a Nios Ifofamisfoma ato omiskõimaniyo, askatari ãfe meka sharaõnoari nikamisfomano ato omiskõimaxii. ⁹ Nãfo omiskõipakenakafo, anãkai nĩpanakafoma. Nõko Ifokai õipakenakafoma, askatari ãfe shara yafi ãfe kerex shara õipakenakafoma. ¹⁰ Akka nõko Ifo oaino, nã penata a Ifofamisfãfe aõnoa yoisharaxikani. Nãskafafono nã Nios Ifofamisfãfe õiketsaxikani, akka mã mã nikamis nõ mato yoiaito.

¹¹ Nãskakẽ nõ matoõxõ Nios kĩfikĩ iskafa fafafãini: “Epa Nios, mã ato imapaiyi keskafakĩ ato imasharafe mia Ifofakaxõ fetsafo sharafapaikani kiki mã kerex shara ato inãfe,” ixõ ã matoõxõ Epa Nios kĩfimis. ¹² Nãnori nõ mato Epa Nios kĩfixomis, fetsafãfe mato õikakĩ nõko Ifo Jesũsnoa yoisharanõfo iskafakakĩ: “Jesũs afama mĩshti fatiro, nãskaxõ afe yorafo a keskara sharakõi ato ima,” ixõ aõnoa yoisharanõfo. Nãskakẽ Epa Nios feta nõko Ifo Jesucristo mato noianã a keskara sharakõi mato imatiro.

2

Nã feronãfake afara chakafamisnoa ato yoini

¹⁻² Akka nõko Ifo Jesucristo anã fotofaino mã Ifofaafono tii akiki nokoxikani afe ipaxakakĩ. Nãskafekẽ fetsafãfe mato parapaikani iskafakakĩ: “Jesũs mã oxõ a inõpokoifo keskara ea tãpimana,” ixõ mato yoikani. Nãskatari fetsafãferi mato yoikĩ iskafakani: “Mã nõ nika Jesũs mã oa,” ixõ mato yoiaifono, fetsafãferi yoikĩ iskafakani: “Pablo noko kirika kenexõ fema, ‘Jesũs mã oa,’ ” ixõ mato yoipaikani, ãa chanĩkaki. Nãskakẽ rateyamakãfe. Ë mato yoinõ. Jesũs oaino mã Ifofaafono afe ichanãxikani, nãskax afe ipanakafono. Akka mato yoisharapaiyaito nikasharakãfe. ³ Nã chanĩmisfo ato nikayamakãfe. Jesũs oyoamano keyokõichi Epa Niospa meka kachikiri fakani anã nikaxikakima. Nãskakanax nikayospakõi ixikani. Nãskaifono a feronãfake chakafinakõia oxii. Nãato a Niospa yoini keskara nikakaspakõimis. Nãato Satanãs ifofakõimis. Askafixax chipo a omiskõipakenakafo mẽra kaxii. ⁴ Akka a feronãfãke niyoxõ iskafakĩ yoixii: “Ë keyokõi finõa. ‘Na nõko Niosra’ ixõ mã kĩfimis, nãri ã finõa. Akai Niosma,” ixõ ato yoita, nã Nios kĩfiti pexefã mẽra ikikaixõ ato yoixii iskafakĩ: “Afaa fetsa kifyamakãfe. Askatari afaa fetsari noiyamakãfe. Èfi Nioski,” ixõ ato pãraxii.

⁵ Akka, çmã shinãimamẽ a ã mato fe iyoxõ a ã mato yoipaoni keskara? ⁶ Akka mã mã tãpia nã chaka finakõia Epa Niospa nẽtefayoa, fena oyoamanõ. Nãskafixax chipo oxii Epa Niospa anã nẽtefayamaino. ⁷ Nã noikaspamis Epa Niospa nẽtefayoano fena oyoima. Chipõ oxii Epa Niospa anã nẽtefayamaino. Akka oyoamano nã aõxõ afara chakafamisfãfe fomãpaiyoxikani. ⁸ Nãskakẽ nã chakafinakõia mã oano, nõko Ifo Jesũs ãfe axfapa xoõ atakĩ retekĩ mapokõi fataxii. ⁹ Nõko Ifãfe refeyoamano nã yora chakafinakõiatõ Satanãõxõ afama mĩshtifo faxii afarafo afeskarafakĩ ato parayanã. ¹⁰ Nãskaxõ afarafo afeskarafakĩ ato pãraxii a nikaifo, nãskakẽ nã nikakanax afe nã omiskõiskõipakenakafo mẽra foxikani. Nãfãfe Niospa mekakõi nikayamakãta, ãfe meka sharari noimisfoma Nios fe ipaxakakĩma. Nãskakẽ nã omiskõipakenakafo mẽra foxikani. ¹¹ Nãskakẽ Niospa anã ato yoipaima ãa ato paranõfo,

a ato paramisfāfe ato yoiāifo keskara nikakōiaifono. ¹² Nāskakē nāfāfe Niospa mekakōi nikayamakāta, tsoarikai aō noimisma. Askatamaroko afara chaka fisti fichipaiyaiifono Epa Niospa nā omiskōipakenakafo mēra ato potaxii nā ato paramisfo fe omiskōipakexanōfo.

Niospa noko katonī nōko chaka noko soaxoxiki nō afe īpaxanō

¹³ Efe yora mīsttichi, taekōifakī Epa Niospa mato noikī mato katonī afe mā ipaxanō. Nāskakē āfe Yōshi Sharaōxō mato ifini afe yora mā inō, Jesūsnoa mā chanīmara faino. Nāskakē mēxotaima nō Nios aicho famis mato shinākī. ¹⁴ Nāskakē āfe meka shara nōko Ifo Jesucristoōnoa nō mato yoiaino nokoōxō mā mā tāpikōia. Nāskaxō mā chanīmara faino āfe Fake Jesucristo otofani keskafakī matori ōtofaxii a ika ano mā afe ipaxanō.

¹⁵ Nāskakē efe yora mīsttichi, nā nō mato yoimis anorikōi nikafafāikāfe. Akka anoriyamakē afo nikayamakāfe. Nā nō mato yoipaoni keskara nā fisti chanīmara fayanā, a nō mato kirika kenexoki nō mato yoini keskarari shināfāikāfe. ¹⁶ Nōko Ifo Jesucristo feta nōko Epa Niospa noko noikī, nōko ōiti mēraxō noko inimamakōinō. Nāskakē nō tāpitiro noko potanakama nō afe ipaxanō. ¹⁷ Māto ōiti inimamakōikāfe mato imasharakōiaino. Nāskaxō afara afeskara afiaino ato yoisharakōita mā ato axosharafāixikakī.

3

“Noko Epa Nios kīfixokāfe,” ixō Pablo ato yoini

¹ Akka efe yora mīsttichi, mē mekai xatekī ē mato yoi. Noko Epa Nios kīfixokāfe, nōko Ifāfe āfe meka shara mā nika keskafakī nōko Ifoōnoa keyokōichi nikanōfo. ² Askatari noko Epa Nios kīfixokāfe na yora chakafo feta a shināsharaiāfāfema noko afeskafanōfoma. Nākakē Jesūsnoa nō ato yoiāito noko nikakatama noko xatemapaimisfoki. ³ Akka nōko Ifo sharakōi, nā noko yoimis keskara noko axomis. Nāato mato imasharapakenaka, afara chakatari mato fekaxtefanōma. Askatari nāato mato kexesharapakenaka. ⁴ Nāskakē nōko Ifoōxō nō chanīmara fai, nā nō mato yoimis keskara mā akaito. Nāskakē mēxotaima mā askafa fafafāini a nō mato yoimis keskafakī. ⁵ Epa Niospa mato noiāi keskafakī nōko Ifāfe mato tāpimapaiō. Cristo omiskōifikī teneni keskafakī, aōxō māri mā tenesharakōifāifāinō.

Keyokōichi nō yonosharakōitiro

⁶ Efe yora mīsttichi, nōko Ifo Jesucristoōxō nō mato yoimis. A Epa Nios Ifofaa fetsafāfe yonokaspaiifono mā ato makinōax paxkanō a nō mato yoimis keskara nikakaspaiifono. ⁷ Akka mā mā tāpia a nō imis keskara mā askapai mā isharakōitiro. Nō mato mēra ixō nō yonokaspapaonima. Askatamaroko nō yonopaoni, penata yonota, fakishi yonota nō fapaoni a nō piāi fīxō pixii mares fisti māto kori ichapa mā potanōma. Nō yonokī askafapaoni. ⁹ Niospa mekaōnoa yoinifo iskafakī: “Nā mato Niospa meka yoimisfāfe afara yopaiāife ato inākāfe,” ixō kenenifo Niospa ato shināmanaino. Nāskakē, “Noko afara inākāpe,” ixō nō mato yōkakerapaoni. Askatamaroko nō yonopaoni nō mato ōimākī a nō akai keskafakī māri mā yononō. ¹⁰ Akka nō mato mēra ixō nō mato yoipaoni iskafakī: “Akka nā yonoyamaito afaa pitiroma,” ixō nō mato yoini. ¹¹ Akka matoōnoa noko yoiāfo iskafakakī: “Na ranārito yonokaspata ikafo, nāskakanax afaa meekatama āa fōfāsakaki ato parafofāsa famisfo,” ixō noko yoiāfo. ¹² Nāskakē nō mato yoi iskafakī, nōko Ifo Jesucristoōxō mā tanaima yonosharakōinō anā xanikima a mā fichipaiyai keskara fixiki.

¹³ Efe yora mīsttichi, a mā afarafo sharafamis keskafakī xateyamakāfe. ¹⁴ Akka na kirika kenexō nō mato yoiāi keskara nikakaspai, aōnoa shinākāpo. Nāskakē afe rafepaiyamakāfe, mā askafaino rāfinō. ¹⁵ Nāskafaiāto noikaspayamakāfe. Askatamaroko yoisharakāfe mato fe yora keskara fakī.

Mā mekai xatekī Pablo ato yoisharani

¹⁶ Nōko Ifāfe nōko ōiti noko inimamaxotiro. Pena tii afara afeskara afiaino mato inimamatiro. Nōko Ifo keyokōi mato fe isharanō.

¹⁷ Ēkīa Pablo, ēkōi ēfe mēkemā kirika kenexō ē mato fomai yoisharakōiyānā. Akka nā ēfe kirika kenefo ē iskafamis kenekī. ¹⁸ Nōko Ifo Jesucristo mato noikī keyokōi mato sharafanō. Nā tii ē mato yoi.

Pablo Timoteo Kirika Kenexõ Fomani

Pablo Timoteo yoisharani

¹ Ëkĩa Pablo. Iskaratĩa ã mia kirika kenexõ fomai Timoteo, ã mia yoikĩ. Epa Niospa ea katonĩ ã ãfe meka Jesucristoõnoa ã ato tãpimanõ. Epa Nios noko ifimis, Jesucristo nõko Ifo feta ea yoini ã ato tãpimanõ. Jesucristo nokoõnoax nani ares noko Epa Nios ari iyoxii kiki. ² Nãskaxõ ã mia Jesucristo chanĩmara famaxõ, ã mia fakekõĩ faa, Timoteo. Nãskaxõ ã mia yoixõ Epa Nios, Cristo Jesús nõko Ifo feta mia shinãsharanõ mĩo noikĩ, mĩ shinã mĩa mia shinãmasharanõ, mĩ õiti fekaxtenõma.

Pablo Timoteo yoini: “Õisharakõife, ato anorima tãpimapaikõikani kiki”

³⁻⁴ Ë Macedonia ano kayamea taefakĩ, ã mia yoifaini kati. Ë mia anã yoiaito nikasharafe. A Efeso anoax fena kayamafe. Nãno ixõ mĩ efesofo ato yoisharafe. Atiixori Niospa meka anorima yoimifokĩ. Niospa meka yoitamaroko ãto xinipao ipaoni fisti ato yoifafãikani. Askakani feratenãkani. Nãskakẽ ã mia yoi mĩ ato yoisharanõ iskafakĩ: “Niospa meka mĩstekõĩ yoisharakõikãfe. Mãto xinipaofãfe afeskax Epa Nios ari nõ nokotiomãki noko tãpimapaonifoma. Jesucristo noko nãxoni nõko chaka noko soaxoxiki. Epa Nios ano noko imaxiki nõ Jesús chanĩmara fakẽ. Nã fisti chanĩmara fakãfe, a fisti ato yoikãfe. A mãto xinipao ipaoni anori mã anã shinãnoõma. Anorima chaka ato yoiyamakãfe. Niospa meka yoisharakãfe mĩstekõĩ,” ixõ ato yoife.

⁵ Niospa meka ato yoisharafe noinãnofo. Mĩ ato yoiaito nikakĩ ãto õiti sharafanofo. Askatari ãto chakafo Jesús ato soaxonõ, anã afaa pishta chaka shinãifomano, askatari Jesús chanĩmara fakõinõfo. Nãskax keyokõĩ shara faatanãkõinõfo. ⁶ Mã askafiax atiri yorafãfe anã shinãsharakanima. Anã ato noisharakanima. Nãskakĩ mĩexotaima ato mekafofãsa fakani. Nãskakĩ anã ato tãpimasharatiroma, fanĩrira yoitiro. ⁷ Nãskaxõ a Moisés yoikĩ kirika keneni keskara ato tãpimapaikakĩ nãfãfe yoimifiso iskafakĩ: “A Moisés yoini keskara nõ fãsi tãpikõia,” ixõ yoifikatsaxakakĩ a yoiaifo keskara tãpikõiafoma.

⁸ Akka mã nõ tãpia nã Moisés yoini keskara shara. Mĩstekõĩ ato yoiaifono nikasharatirofo isharaixikakĩ. ⁹ Mã nõ tãpia a yora sharafoõnoa yoikĩ Moisés kenenima. Akka nã yora chakafoõnoa yoikĩ kenenĩ. A nikayospafoõnoa yoikĩ, askatari a yora chakafoõnoa yoikĩ, askatari a Niospa meka nikamifomaõnoa yoikĩ, askatari ãto apa yafi ãto afa retemisfoõnoa yoikĩ, askatari a ato retemisfoõnoa yoikĩ, ¹⁰ askatari a ãto ãfimafo chotamifomaõnoa yoikĩ, kãrofãferi ato fenemafo chotamifomaõnoa yoikĩ, askatari feronãfãferi aa ranã chotanãmifomaõnoa yoikĩ, nãskakãkĩ ãto ãfifo anã tanamifomaõnoa yoikĩ, askatari yora fetsafo achikaxõ onemisfo ato yonomaxikakĩ, askatari ãa chanĩmisfo, Niospa meka fanĩrira yoimifiso, askatari afarafo chakafamisfo, afãfe Niospa meka tãpiafoma, nãskara yorafoõnoa Moisés ato kenexoni tãpinõfo afeskax isharatirofomãki a Niospa noko imapaiyai anori. ¹¹ Nãfãfe Niospa meka tãpisharafoma, nikakanima. Epa Niospa ea yoia ã ãfe meka mĩstesharakõĩ ato tãpimanõ. ãfe Fake Jesucristo fãsi shara nokoõnoax nani nõko chaka noko soaxoxiki nõ afe nipaxanõ. Aicho, Nios fãsi sharakõĩ.

“Aicho, mĩ ea õia mĩ ea shinãkõia,” Pablo Nios fani yoikĩ

¹²⁻¹⁴ Ë anorima shinãyopaoni Niospa Fake tãpiaxma. Ë fãsi anorima shinãpaoni iskafakĩ: “Jesús Niospa Fakekẽroko. ãa pãrakaninõ, yorakõifekẽ,” ixõ ã chakafapaoni, ã anorima shinãkĩ. Anori shinãki a Jesús Ifofamisfo ã fãsi ato chakafapaoni. Ë fãsi feronãfãfe mesekõĩ ipaoni ea omispaoonĩ ã tãpisharaxma. Anorima ã shinãkĩ ã noikaspapaoni, ares ea shinãfaiato Niospa ea noikĩ. Nãskaxõ ea ifisharani. Ë fãsi chakafafiamiskẽ ea noisharai. Nãatofi ea shinãmamiskĩ ã aõ noinõ. Ea askafaito ã nikasharakẽ nõko Ifo Cristo Jesús ea yora fetsafo fãsi noimasharai. Aicho, ã Jesúski inimasharakõĩ ea noisharaito. Jesucristo ea shinãmani iskafakĩ: “Mĩ ea noikĩ, ea shinãsharafe, mĩ ea tãpisharaxõ eõxõ mĩ yonoi ato tãpimakĩ,” ixõ ea yoia.

¹⁵ Timoteo, na ã mia yoiai chanĩma. Keyokõichi chanĩmara fanõfo. Jesucristo nai mĩeraxõ Apa Niospa nãmã nĩchini nõko chakafoõnoax noko nãxoyonõ nõ afe ãpaxanõfo. Askafaiato na fetsafãfe chakafakĩ finayamafiaifono ã fãsikõĩ chakafakĩ finakõĩpaoni. Jesús Ifofamisfo ã chakafayopaoni. ¹⁶ Nãskafaiato õikĩ Jesús ãfe chaka ea soaxona. Ë chakafafiamiskẽ Jesucristo ea fãsi noi. Ea askafaito õi kakĩ yora fetsafãfe iskatirofo: “¡Õikapo! Na Pablo fãsi chakafafiamiskẽ mã Jesús aõ fãsi noi,” shinãito õikĩ. “Nokori Jesús noikĩ noko ifitiro, na Pablo akai keskafakĩ, nõ afe ãpaxanõ na Pablo ikai keskaĩ Jesús fe nipanaka, nõri afe nipaxanõ,” ikaxõ anori shinãtirofo.

¹⁷ Anori shinākī nānori nō yoitiro iskafakī: “Aicho Epa Niospa, mī fāsi sharakōi. Meres mī xanīfokōi, tsōa mia finōtiroma. Mī nanakama, mī nīpanaka. Tsōa mia ōitiroma. Meres mī keyokōi tāpikōia. Meres mī Nioskōi, anā fato fetsama.” Nāskafakī nō Nios yoipakenaka.

¹⁸ Ēfe fake Timoteoshta, a Jesús Ifofanifāfe mia yoiaito mī nikamiskī. Niospa ato shināmanaino anori mī kerexkai ato yoisharanō mēstekōi, ēri mia yoi kerexkai yoife mī Niospa meka nikasharakōixō Jesús Ifofaxō ato yoisharafe. ¹⁹ A yora fetsafāfe mā Niospa meka tāpifikaxō iskaratīa anā Nios shinākanima. Niospa meka nikakaspakakī Jesús anā chanīmara fakanima. Fanīrira shinākani mā na meka tāpifikatsaxakakī. ²⁰ Akka a feronāfake rafe Himeneo feta Alejandro iskafamisfo. Nā rafeta Nios chakafamisfo noikaspakakī. Askaito ōikī ē ato yoa: “Mā mā Satanās nikakī, Nios chakafakī, afianā Niospa ato kexeima.” Mā askafaito Satanās mato omiskōimatiro. Mato omiskōimanaito mā tāpitiro mā anā Nios chakafanōma.

2

Afeskafaxō nō Nios kīfitiromē

¹ Timoteo, a Nios Ifofamisfo ē mia yoiai anori ato fāsi yoife. Taefakī mī ato yoitiro iskafakī: “Keyokōi yorafo ato yoixokāfe. Afara yopaifāfe Nios ato yoixokāfe. Mato Niospa axōfaito aicho fakāfe akiki inimakī. ² A xanīfokōi fe afe rafeafo keyokōi xanīfofo ato Nios yoixokāfe mato yonoxosharanōfo ishaxaxikākī. Nāskakē afanā mato fekaxtefayamanō, mā Nios shināsharanō, Nios Ifofasharaxiki.” ³ Nāskakē Nios noko ifimisto noko ōikī noko iskafatiro: “Na ēfe fakefo isharafo. Iskara sharakōi. Na yorafoki ē inimakōira,” ixō Niospa yoitiro. ⁴ Niospa keyokōi yorafo ifisharapai, keyokōi yorafo Jesús ato nāxoni ato chaka soaxoxikī a tāpikōinōfo. ⁵⁻⁶ Nios fistikōi, anā fato Nios fetsama. Nā Nios fisti ares shara. Akka na yorafo chakakōifo. Afara chakaya shara nō ositiroma. Akka yōra ato mēraxō afara chakafamisto Nios ōikaspai, nikakaspakī. Akka nā yora chaka askara Nios ari katiroma. Nāskakē Cristo Jesús nāmā na mai ano oni yorafo nāxoxiki nōko chaka noko soaxoxiki. Askafakī, yorafo chaka soaxonano isharanōfo, ato askafaano, Nios ari nokotirofo. Nāskakē nō tāpia Jesucristo fistichi noko Nios ari iyotiro. Nāskakē keyokōi yorafo ifipai. Nāskakē noko ōimani Jesucristo keyokōi yorafo ifipai. ⁷ Nāskakē Niospa ea katonī aōnoa judeofoma ē ato tāpimanō nāfāferi tāpinōfo. Yora fetsafoōnoaxri Jesús nani. “Eōxō yoixiki,” ixō Niospa ea yoini. Ē chanīma, ē mia paraima. Niospa ea yoini ē ato tāpimanō Jesús ato nāxoni chanīmara fanōfo.

⁸ Akka feronāfakefo ichanākaxō kīfikani inimakani, keyokōi mā raenā faatanākaxō ato chaka Jesús soaxonano, āto mēke rafe Nioskiri mēshaxotirofo Niospa ōitiro. Askafiono Jesús ato chaka soaxonano, nā Nios kīfaiifāfe ato Niospa nikatiro. Askapainōfora ixō ē yoi.

⁹ Nāskarifiakī nō ichanāino xotofāke iskara shinātiroma: “Sama shara safeta, teoti ichapa safeta, askata femānāki keneta, foaromesharata, irosharakōita, ē ikaino yorafāfe, ‘Na xotofake sharakōira’ ixō ea yoinōfo,” ixō anori shināyamakāfe. ¹⁰ Askafatamaroko, fetsafo axosharakāfe, Nios Ifofaxō Nios ōimaxikākī. “Na xotofake sharakōira,” ikaxō aōnoa yoitirofo. ¹¹ Ano fisti ichanākaxō xotofakefāfe ato nikakōisharatirofo. Akairi tāpisharaxikākī atoōxō. ¹² Ē fichipaima xotofāke feronāfakefo Niospa meka ato tāpimanaino. Askatamaroko feronāfakefāfe xotofakefo Niospa meka sharaōnoa ato yoitirofo. Nāskakē xotofakefāfe feronāfakefo nikakōitirofo. ¹³ Akka Niospa Adán onifakī tafeani. Nāskaxō chipo Evari onifani. ¹⁴ Nāskakē Satanās Eva pārani. Adán anima pārakī. Nāskakē xotofakefāfe nikakōisharatirofo. ¹⁵ Nāskaxō xotofāke fake fixō pexkosharatiro, Nios Ifo shara famaxiki. Nāskakē chanīmara fatirofo. Mā askafaito Niospa ato ifitiro. Āto ōiti inimasharanōfo a fetsafo noisharakanax ato fe isharanōfo. Isharakaxō, shināsharakōinōfo.

3

Afe keskara itiromē a Niospa meka ato yoimis

¹ Nā ē mia yoiai chanīmakōi. A feronāfake Niospa meka yoimis ipai askara sharakōi itiro. Askatari a Nios Ifofamisfo ato kexemis ipai askarari shara. ² Nāskakē nā isharakōimis ifife. Isharaito ōikakī fetsafāfe yoitirofoma iskafakī: “Nato afara mēxotaima chakafamis,” ixō yoitirofoma. Askatari āfi fistiya itiro. Kēro fetsa kaxefamisma ikāi, shināsharakōita isharakōimis ikāi, fāsi yonosharamis xanimisma ikāi, fetsafo sharafamiskōi āfe pexe anoxō yora pimamis ikāi, fetsa pexe yopaito āfe pexe mēra yora ikimamis ikāi, ato tāpimasharamis ikāi, nāskara feronāfake ifife. ³ Askatari pāemisma ikāi, setemitsamisma ikāi, yorafo noimiskōi ikāi, ato chakafamisma ikāi, kori noimisma ikāi, askara feronāfake shara katofe. ⁴ Āfe āfinō āfe fakefonō afe isharakōimisfo itirofokī. Āfe fakefāfe noikakī nikasharakōimisfo itirofo. ⁵ Akka askayamaito, afe yorafāfe a nikakaxoma askara yora Jesús Ifofamisfāferi a nikatirofoma. ⁶ Akka a rama Jesús Ifofaa a Niospa meka ato yoimis askara katoyamafe.

Aato shināi iskafatiro: “Ē fāsi sharakōi, ē Niospa meka ato tāpimani. Tsoa fetsa ea keskarama,” ixō shināi Jesūs shināyamaōi āa shināi askatiro. Satanās anori mekani: “Ē Nios finōikai,” ini. Askaito Niospa nai mēraxō potani nāmā. Nāskari fakī a rama Jesūs Ifofai, Satanās ani keskari fatiro. Nāskakē a ato Niospa meka yoimis askara katoyamafe a rama Jesūs Ifofai. ⁷ Akka askaito ōikī a Nios Ifofamisfāfema yoitirofo isharakōiāito ōikakī. Akka isharayamaito, tsōa yoisharatiroma. Askara yōra fanīrira chaka shināi paketiro Satanās paraino.

Afe keskara itiroṁē a Nios Ifofamisfo ato kexemis

⁸ Nā a Nios Ifofamisfo ato kexemis nā keskara feronāfake katōxō ifife. Nāskara yora sharakōifo itirofo, āto meka mēstekōi shara itirofo, askara yorafo pāemis itirofoma, nā kori fisti shināfāfāinaifoma. Nāskara feronāfake isharamisfo ifife Nios Ifofamisfo ato kexesharanō. ⁹ Nā Niospa meka nō tāpiyopaonima, iskaratīa rama nō Niospa meka tāpi. Nāskakē na feronāfāke Niospa meka nikasharakōimis ifife, askatari afara chakafayamaino āfe ōiti fekaxtemisma askara ifife. ¹⁰ Nā Nios Ifofafo ato kexemis ikimākai mī ōiyotiro. Askarato afe keskara yonosharaimākai mī ōiyotiro asharaimākai. Askata asharakōiāito ōikī, askara yora mī ifitiro a Nios Ifofafo ato kexemis inō. ¹¹ Mā askafono āto āfifori ato keskara sharafori itirofo. Nāskaxō anā ato mekafakī chakafatirofoma. Askatari pāemismafori itirofo. Askatari āa kakapaimisfo itirofoma. Askara yorafāfe shināsharamiskōifo itirofo. ¹² Nāskax a Niospa meka yoimisfo fe rafekanax āfi fistiyafo itirofo. Nāskakanax ato pexe anoax isharakōitirofo, āto āfinō, āfe fakefori afe isharatirofo, askara nikakōisharatirofo. ¹³ Nāskaxō a Nios Ifofafo ato kexemisto yonosharakōiāito ōikakī fetsafāfe ōikaxō yoisharakōitirofo aōnoa. Nāskaxō a feronāfake mesetama fetsafo yoisharatiro: “Cristo Jesūs ea ifia,” ixō ato yoitiro.

Niospa meka chanīmakōi noko yoimis.

¹⁴ Timoteo, iskaratīa ē mia kenexō fomai, mia ari samama kapaikī. ¹⁵ Akka ē mia ari fena kayamaino ōikī na kene tāpixō mī tāpitiro afeskax itirofomākai a Jesūs Ifofaifo. Akka Nios nīpanaka. Nāskax a Ifofamisfo Niospa fakekōifo afe ipanakafo. Nāskaxō Niospa meka mēstekōi ato yoisharaifāfe fetsafāferi ato nikasharakōitirofo. ¹⁶ Fetsafāfe yoikī iskafatirofoma: “Niospa meka chanīra,” ixō yoitirofoma. Jesūs Niospa Fake feronāfakekōi kāini. Niospa Yōshi Sharapa, “Jesūs Niospa Fakekōi,” ixō yoini. Askatari Niospa ājirifāfe Jesūs ōinifo Niospa Fakekōikē. Askatari yorafāferi ōinifo Jesūs Niospa Fakekōikē. Nāskaxō yorafo tāpimakōinifo ato yoisharakōikakī, akairi tāpisharakōinōfo. Askaifāfe yora fetsafāfe mai fetsafo arixō nikakakī ato chanīmara fanifo akairi Jesūs shinānakī. Nāskakē Jesūs anā nai mēra kani Apa Nios ano.

4

Pablo yoini anā Nios shināyamaifono

¹ Niospa Yōshi Sharapa noko mēstekōi yoikī iskafamis: “Jesūs mā chaima oaitīa atiri yorafāfe Nios kachikiri fakani. ‘Ē Jesūs Ifofaira’ ifiamisxakakī nā nīafaka ato pārafaiāito anorima ato yoimisfo. Askara anori yoimisfāfe nikakaxō nīafaka fisti ifofamisfo,” ixō ato yoimis. ² Askara yorafāfe yora fetsafo anorima yoikani āa ato pārakakī, ōiti chakayafiakaxō. Anori fisti shināki feyafamisfo. Nāskakē afara chakafakani rāfikanima. ³ Askarafāfe fetsafo tāpimakī iskafakani āa ato pārakakī: “Niospa yoikī iskafamis: ‘Feronāfakefo āfiyatirofoma. Askatari nami piyamakāfe,’ ixō yoimis,” ato fatirofo. Akka Niospa keyokōi onifani nō pinō. A Nios Ifofamisfāfe pixikakī Nios kīfiyotirofo. Nāskaxō nō pitiro afama mīshti. ⁴ Keyokōi a nō piaifo Niospa onifakī sharakōi fani. Nāskakē nō inimakī yoitiro aicho fakī. Nāskakē nō pikaspakī chakafatiroma a nō piaifo Nioski inimakī. ⁵ Epa Niospa noko yoia: “Keyokōi shara,” ixō noko yoia. Nāskakē nō, “Aicho Epa Niosi, mī noko yoinā shara inā,” nō fai. Nāskaxō nō pitiro.

Afe keskara itiroṁē Jesūs yonoxosharamis

⁶ Timoteo, na ē mia yoiai anori mī chanīmara famis. Nāskakē Jesūs Ifofamisfo ato tāpimasharafe, mī Cristo Jesūs yonoxomis shara ixiki. Askatari Niospa meka mēxotaima ōife a mī piāi keskafakī, fāsi shināsharakōixiki, shara nixiki. ⁷ A tāpiamafāfe yoimis anori nikayamafe. Mēxotaima Niospa meka shināfāfāife. Askata ōiti kerexfāfāi Nios shināfāfāife mī ōiti pachi fakīma. ⁸ Akka afaa meeyamai rakatsax nōko yora xokenātiro. Nō anā afaa yonopaitiroma. Akka nō mēxotaima yonoi nō mitsisipakōi itiro. Nāskara shara. Nāskafakiri nō mēxotaima Niospa meka nō ōirifakī, Nios kīfirifai nō mitsisipakōi itiro nōmēra sharafinakōia. Nāskax nō shara itiro. Nāskatari nō naax, nai mēra kaax, ariaxri nō mitsisipakōi itiro sharafinakōimāi niāx Nios anoax, nōmāi Nios Ifofakatsaxakī. ⁹ Na ē mia yoiai chanīmakōi. Nāskaxō keyokōichi chanīmara fanōfo. ¹⁰ Nāskaxō mitsiskai nō Niospa meka yoifāfāini. Nō askafaito fetsafāfe noko omiskōimatirofo a Niospa meka ōikaspāifāfe.

Askai omiskōifiki nō tāpikōimis Jesús iskaratīamāi nikē. Nāskaxō Jesúsmāi noko nāxonikē, keyokōi yorafaōnoax, nāskaxō a Ifofamisfo ato ifixii.

¹¹ Timoteo, na ē mia yoiai yonosharata ato tāpimafe. ¹² Nios Ifofafāi isharakōife. Mī isharakōiaito mia ōinōfo, ato ōimasharakōife. Askax mī isharakōixiki Nios Ifokōi faax, ato yoisharakōife mī meka pachi faxō, ato noikōisharata, nāskax isharaito ōikakī yorafāfe mia chakafakī yoinōfoma iskafakī: “Na naetapa Timoteo fanīrira noko yoi kiki nikayamakāfe,” ixō mia tsōa yoitiroma. ¹³ Nā ē kayamaichāi, ato ichanāfaxō Niospa meka ato anexō, ato nikamasharakī, ato yoisharakōife. ¹⁴ A Nios Ifofafo ato kexemisfāfe mia māmākaxō mia Epa Nios kīfixonaifono Niospa mia amapaiyai keskara mia axoni a Nios Ifofafo mī ato tāpimasharanō ato kexesharayanā. Akka Epa Niospa mia kaxpa tāpimanimakī fetsafori sharafaxōfafāini xateyamafe.

¹⁵ Shināfāikōi isharafe nā ē mia yoiai keskafakī. Mī askafaito mia tāpisharakōinōfo mī yorafa Niospa meka yoiaito mia tāpisharakani. Askaxō, “Timoteo fāsi sharakōi,” ixō mia yoikani. ¹⁶ Nāskakē kexemesharafe. Niospa meka mēstesharakōi ato yoife, isharakōita. Mī askafai Epa Nios fe mī isharakōipakenakaki. A mia nikaifori askapakenakafoki.

5

Afeskax nō isharatiromē a nō Nios Ifofaa tii

¹ Anifo fāsi mekafata yoiyamafe. Nā mī epa mī aka keskafakī, oitsifafāi yoisharafe. Askatari nā naetapafori mī ochi yafi mī exto aka keskafakī ato shināmasharata ato yoisharafe. ² Yōxafofori nā mī efa mī aka keskafakīrī shināsharafāi ato yoisharafe. Mī chiko yafi mī chipi mī aka keskafakī nā xomayafo sharafo feesyamafāi, askara shinātama ato yoisharafe.

³ Nā kēro ifomafafo, askata fakemaisfo, askatari fafamaisfo, nāfo shināmakiyamafe nā Jesús Ifofamisfāfe kexesharanōfo. ⁴ Akka nā kēro ifomafa fakeyakē, askayamai fafafoyakē afāfe kexesharatirofo. Askarifakī nā yome pishtakē ato kexesharapaonifo keskafakīrī kopikiri kexesharanōfo āfe fakefāferi. Nāskafaiāfe fetsafāfe ōi kakī, “Nā yorafāfe Nios nikasharakani,” ikaxō yoisharanōfo. Nāskaito ōi Nios atoki inimai. ⁵ Nā kēro ifomafa fakemais ita, fafamais ita, fenemais ita, nāskarafāfe Nios fisti shināki: “Niospa ea kexei,” ixō shināki iskafakī, nā pena tii kīfita fakish tii kīfita famisfo Epa Nios mēxotaima kīfikakī. ⁶ Nāskafax nā ifomafa fetsa fenemaisax kafāsatiro. Aa inimasharakōi nā ipaiyai keskai. Niospa meka mā shināmakixō, kachikiri faax, nā mā naa keskara. Shināsharaima, chaka shināi. ⁷ Timoteo, keyokōi ē mia yoiai na kēro ifomafa Jesús Ifofamisfo tāpimasharafe, askara tāpikaxō nikasharakōinōfo, fetsafāfe, “Mā chakara,” ikaxō yoitirofoma. ⁸ Akka fetsa afe yorafa kexesharama, āfe pexe mēra ikiaifāfe ato kexeiama nāskafakī chakafai. Aa keskaratokai Niospa meka nikasharama. A Jesús Ifofamato askarato afara chakafai, akka a Jesús Ifofaafāfe afe yorafa kexesharakakīma fāsi chakafamisfo.

⁹ A kēro ifomafa sesenta xini aka, āfe fene fisti fe iyopaoni nā keskaraki kirika kenefe nā Jesús Ifofamisfāfe ato kexenōfo. ¹⁰ Nāskata nā kēroōnoa yorafāfe yoisharamisfo; nāskata āfe fakefo pekkosharakōini; askatari yora fetsa āfe pexe ano kaito atoki inimamis; fetsafo pimamis; omiskōiaito ato sharafamis; ato feta amis; kēro askara fistichi āfe ane kenetiromo Jesús Ifofamisfāfe a kexenōfo.

¹¹⁻¹² Akka nā kēro ifomafa sesenta xinia akama, a keskaraki āfe ane mī kenetiroma. Nā kēromā āa shināki iskafatiro: “Jesús, ē mia fisti shināpai. Mia fisti ē yopai. Ē anā feneyapaima,” ifiaxō anā fetsa anori shinātiromo feneyapai, anā Jesús shinātiroma. Nā Niospa yoiai anori shināima āa chanī mekatiro. Askafai āa chanīaito ōikī, askara kēroki Nios inimatiro. Nāskakē āfe ane kenetiroma. ¹³ Askara kēro fenemaisax xani itiro, pexe tii ōifofāsafakī, askai kafāsakī, ato pārafōfāsatiro āa chanīkī. Nāskakē ato fekaxtefatiro. ¹⁴ Askatamaroko kēro ifomafa yōxafa famatai feneyatiro. Mā feneyaxō fake fitiro. Fake fixō āfe pexe fisti anoxō kexesharatiro. Askafasharaito ōikī yorafāfe chakafakī mekafatirofoma. ¹⁵ Atiri kēro ifomafafāfe Nios kachikiri fakaxō Satanās ifofafo.

¹⁶ Timoteo, a Jesús Ifofamisto afe yora ifomafakē, kexesharatiro. Askatari a ifomafafo kaifoyakēma, fenemais ita, fakemais ita, fafamaisfo askara a Nios Ifofamisfāfe ato kexetiromo.

¹⁷ A Nios Ifofaafāfe xanīfōfōfāfe noko kexesharakaxō noko ikisharamisfo Niospa meka noko tāpimanaifono nō atoki inimakī nō aicho fatiro. Askatari nō ato ināsharatiro nā afara yopaifo keskara finōfo. ¹⁸ Moisés kenekī yoikī iskafani: “A ato yonomanaito ato yonomakī kopifatiro.” Askatari keneni yoikī fakakaki keparanāikai. Moisés keneni yoikī iskafakī: “Oa fakka keskara nō yonomanaino trigo āfe xaka chona chona a fofāsafatiro nō renexitiroma piifōfāsafanōfo. Askatari a noko tāpimasharamis nō kopifatiro afaa yopayamanō. Nāskafakī nō yoitiromo akiki inimasharakī,” ixō yoikī keneni.

¹⁹ A yora fistichi Nios Ifofamisto xanīfoōnoa mia yoiaito, chanīmara fayamafe. Akka feronāfakē rafe iyamai trespa a afara chakafaito ōikaxō, mia yoiāifāfē mī ato nikatiro.

²⁰ Askaito nikakī a Jesūs Ifofamisfāferi ichanākaxō yoitirofo iskafakī: “A mī chakafaa keskafakī anā askafayamafe. Nā mī chaka shināi, Jesūs yoife na afarafo mī chakafakī fetsai, mī yoiaito nikakī Jesūs mia chaka soaxonō.” Mī askafaito ōikani fetsafo rāfitirofo. Askaxō afaa chakafapaitirofoma rāfikaspakakī.

²¹ Epa Nios feta Jesucristo āfē ājirifāfē mia ōikani. Nāskakē na ē mia yoiāi anori askafafe. A afara chakafamisfāfē āto ferotaiifi yoife. Mī kaifofo yafi mī kaifofoma ōikī, nāskarāfāfē āto chaka xatenōfo ato yoife. ²² Ōisharata ato katofe Niospa meka ato yoisim. A kaa fisti ato katoyamafe. Ato ōisharayofe taefakī. Mī ōisharaxoma ato ifitiroma. Mī askara ifikē chipo afara chakafaira ixō, fetsafāfē mia mekafakī chakafatirofo. Nāskakē shināsharafāi ife, Timoteo. Afaa chakafayamafe.

²³ Timoteo, mī xāki pāemiski faka fisti ayakima uva ene pāepishta ayafe sharaxikī.

²⁴ Atiri yorāfāfē afara chakafaito nō ōitiro xafakīakōi. Akka atrifāferi afara chakafāifāferi nō ōitiro. Mā askafimisfono chipo nō tāpixii Niospa kāimanaino. ²⁵ Nāskarifakī atrifāfē shara faifāfē nō ōitiro xafakīakōi. Askatari fetsafāferi afara shara faifāfē nō ōitiro. Mā askafamisfono chipo nō tāpixii Niospa xafakīakōi kāimākē afo.

6

¹ A ato yonoxomisfāfē Jesūs Ifofamisfāfē āto xanīfo shināfāi yonosharaxotirofo. Askaxō tsōa chakafakī mekafatiroma āto xanīfo. Akka āto xanīfo yonosharaxokima chakafakī mekafāifāfē fetsafāfē ato iskafatirofo: “Kee, na Nios Ifofamisto yonokī finasharaima.” Nāskarifakī Niosri chakafakī yoi. Niospa mekari chakafakī yoi. ² Āfē xanīfāfē Jesūs Ifofamiskē a yonoxomistori Jesūs Ifofaxō askarato āfē xanīfo noiki shināfāi yonosharaxotiro, akiki xanikima aō noisharakōita afe nanea ōitsakōi ixō shināsharakōitiro āfē xanīfo.

Timoteo, nā ē mia yoiāi anori Jesūs Ifofamisfo tāpimasharafe. ³⁻⁴ Nōko Ifo Jesucristo āfē meka fāsissharakōi. Jesūs meka nikax oa Nios keskara nō shara itiro. Akka a yora fētsa noko anorima yoitiro, āa shināxō. “Ēfi fāsi tāpifinakōiakī, ea keskarakai tsoama,” ixō āa yoi askara yōra afaa tāpiamafax. Āa chanī askamis. Askara yora ato fe feratenātiro. Askakī meka shara yoitiro. Āa kakapaimis askara yōrari āa shinātiro: “Ea tsōa finōyamanōra,” ixō āa shinātiro. Askara feronāfākekai Niospa meka ato yoisharatiroma. Askaito ōi kakī feratetirofo, meepaitirofo, nikakaspatirofo, ūchatirofo, noikaspatirofo, “Noko chakafaira,” ixō shinātirofo. ⁵ Akka a feratenāmisfāfē anorima fisti shināmisfo. Mā Nios shināyopaofinixakakī anā shināsharatirofoma. Anā ato yoisharatirofoma mēstekōi. Afāfē shināfo: “Nō Nios Ifofakatsaxakī nō kori ichapaya itiro,” ixō shināmisfo anori Niospa yoiamafiano. Akka fētsa shināi iskatiro: “Ēri a keskara shara ipai,” ixō shinātiro. ⁶ Akka anori shinātamaroko nō afaamaisfixō nō Nios Ifofaax, nō inimasharakōitiro. ⁷ Na nō fake kāiyaitā nō afaaya pakenima. Nāskairi a nō naitā nōkai afaaya katiroma. ⁸ A nō piāi yafi a nō rapatiyax nō inimatiro, afaa anō ichapaya fichipaitama. ⁹ Akka atiri yorāfo rapati ichapaya ipaimisfāfē nonori shinākani iskamisfo: “Afara ē fipaikī ē fitiro, nāskax ē inimatiro,” ixō anori fisti shinātiro. Fētsa kori fisti fichipai samama shināchakatiro, afara chakafo fetsa fetsatapafo fichipaitiro. Kori ichapa fipaikī afeskaxoma askarato chaka shināfāfāini. Askara naax, a omiskōipakenakāfo mēra katiro. ¹⁰ Nāskakī kori fisti noi, Niospa meka shinātama afara chakafafa fafāfāini kori fixikī. Nāskafakī Nios kachikiri famisfo. Askara yorāfo āto shinā mēraxō shinākani omiskōikanax anā inimasharatirofoma.

Pablo yoini afe keskaramāki Nios Ifofaax nō kerexkai ikai

¹¹ Timoteo, Niospa mia katoa. Kori yafi rapati shināyamafe. Nios Ifofasharafe a keskara ixiki, afaa chakafamisma ixiki, Jesūs meka chanīmara fakōixiki. Askaxō mī yorāfo noimiskōi ixiki, Niospa meka Ifofakī, akka mī yorāfo yoiki oitsifāfāi yoisharafe. ¹² Mīa yora ichapafāfē ōiaifono mī ato yoisim: “Jesūs ea nāxoni ēfē chaka ea soaxoxikī. Nā Jesūs ēfē Ifo. Ē fāsi inimai,” ixō mī yoisharani. Akka anā shināmakiyamafe. Jesūs mia nāxoniki nō afe nīpaxanō. Nā fistiōnoa shināfē. Satanās mia chaka shināmapaiyaito nikayamafe. ¹³ Ea nikasharafe Niospa keyokōi noko onifani noko nimaxiki. Jesucristo nā xanīfo Poncio Pilato yoini: “Ēfi Niospa Fakekōi,” ixō ratakima yoini. Iskaratā Nios feta Jesūs mia ōi. ¹⁴ Nāskakē Jesūs meka nikasharafe. Afara ē mia yoiāi keskara afe, mī askaito ōiki fetsafāfē, “Timoteo chakafamisra,” ixō yoinōfoma. Nāskara afe nōko Ifo Jesucristo nokoaitā. ¹⁵ Nios fistichi Jesūs nokoaitā tāpiakī āa nīchixiki. Ares afara apaiakī atiroki. Afi xanīfo efapakōiki xanīfo fētsa finōtiro. Nā nōko Ifo efapakōi fato xanīfo fētsa finōtiro. ¹⁶ Akka tsōa onifanima, aakōi ares ika. Nāskax nanakama. A chaxasharai mēra ika tsoa akiki nokotiro. Askatari tsōa

ōimisma, tsōa ōitiroma. Nāskakē keyokōichi nō aōnoa yoisharatiro: “Nios fisti sharafinakōia. Nā fistichi afara sharafo ares atiroki,” ixō yoipakenakafo. Askapainō.

¹⁷ A kori ichapayafo ato yoife: “ ‘Ē kori ichapayaki tsoa ea keskarama,’ ixō anori shināyamakāfe. Māto koriōnoax inimamis iyamakāfe. Askatari māto kori mato afeskafatiroma, keyotiro samama. Askatamaroko Nios fisti shinākāfe. A nō afara fipaiyai noko ināi noko fishkoima. ¹⁸ Nāskakē māto korioxō fetsafo aō noisharakāfe. Fishkomītsayamakāfe. Afaamaisfo ato inākāfe. Fishkoyamakāfe. Inākōikāfe. ¹⁹ Akka mā ato ināsharaito ōi Nios matoki inimai. Mato afara fāsi shara faxōi mā Nios ari nokoaitīa. Iskaratīa mā fetsafo ināsharai keskari fakī, Niospari chipo mato ināsharaxii kiki. Nāskax mā Niosnoax isharapakexatiro,” ixō ato yoife.

Pablo mā mekai xatekī, “Timoteo, mī isharaxō ato yoi sharafe,” ixō kirika kene manamani

²⁰ Nāskakē Timoteo, Niospa āfe meka shara mia tāpimani fetsafori mī ato yoinō. Nāskakē tāpisharayofe, āfe meka tāpisharaxō fetsafo mēstekōi tāpimaxii. Akka fetsafāfe Niospa meka anorima yoimisfo. Aa ranā yoinōnākakī kaxpakōi yoimisfo. Nāfāfe yoimisfo nō tāpikōiara ifiakaxō tāpiafoma. Nāskakē ato fe rafeyamafe. ²¹ Nāskakē nikayamafe. Fetsafāfe nāfo nikakanax ifofakaxō Niospa meka kachikiri fakanax, nāfo fenoafo. Afianā chanīmara faafoma.

Nōko Ifofāfe mato noikī mato kexesharanō. Nā tii.

Ēkīa Pablo.

Pablo Timoteo Afianã Kirika Kenexõ Fomani

Pablo Timoteo yoisharani

¹ Ëkĩa Pablo ē mia kirika kenexõ fomai. Epa Niospa fichipaiyai keskafakī Cristo Jesús ea katoni aōnoa āfe meka shara ē yoifofāsafanō. Ea yoini iskafakī: “Keyokōi yorafo yoife iskafakī: ‘Jesucristo matoōnoax nāxoni māto chaka mato soaxoxiki nā chanīmara faafo tii afe nīpaxanōfo,’ ixō ato yoife nā ē mia yoiai keskafafe,” ixō Jesús ea yoini. ² Timoteoshta, ē mīo noikī ē mia kirika kenexõ fomai mī tāpinō. Epa Nios nōko Ifo Cristo Jesús feta mia noikī mia shara famanōfo. Askatari mī shinā mēra mia shināmasharakōinōfo mī ōiti fekaxtenōma.

Ato Jesúsnoa yoisharafe

³ A ēfe xinifāfe Epa Nios yonoxosharpaonifo keskari fakī, ēri a yonoxosharai. Ē mēraxō ē afaa shināchakayamafai ē yonoxosharai. Nāskakē ē mia Nios kīfixōfāfāini aicho fakī. Pena tii yafi fakish tii ē mia Nios kīfixōfāfāini. ⁴ Nāskakē mē oaino, mī ea shināi oiaito ē mia ōiferani. Nāskakē ē anā mia ōisharapai, mia ōi ē inimasharakōixiki. ⁵ Taefakīkōi mī chichi Loida Jesús Ifofani. Askata mī efa Euniceri Jesús Ifofani. Afāfe Ifofasharakōimisfo keskafakī, mīri Ifofasharai. Mē mia tāpia mī Ifofasharakōiaito nāskakē ē mia yoi.

⁶ Anā shināmakiyamafe ē mia māmāxō ē mia Nios kīfixoni. Nāskakē Niospa mia katoni Jesús yoisim mī inō. Mā chii nokakē nō anā xofisa fatiro anā xofisanō. Nāskarifiakī mī anā yorafo ato yoipaima mā mī xokenāifinaxō askara meekī mī Nios kīfitiro anā mia ōiti fepeaxosharanō, mī anā ato yoisharanō inimayanā a mī taefakī ato yoini keskafakī. ⁷ Nāskakē Niospa Yōshi Sharapa noko yorafoki mesematama. Aōxō afama mishti noko amatiro. Askatari noko ato noimasharai. Aōxori noko shināmasharatio anā nō chakafanōma. ⁸ Askafai rāfiyamafe Jesúsnoa yorafo yoitaifāfe rāfikima. Askatari eōri rāfiyamafe. Ē Jesucristo ato yoirifaito ea karaxa mēra ikimatifoki. Mīri Jesús ato tāpimasharafe; mī askaito, miari omiskōimanaifono rateyamafe. Jesúsnoax mī omiskōiaito, Niospa mia axoxii. ⁹ Akka Niospa āfe Fake Cristo Jesús noko nīchixoni nokoōnoax nāxoyonō nōko chaka noko soaxoxiki. Askaxō noko shināni afe yora nō inō. Nō yora chakafofiakē Niospa noko noimis. Taefakīkōi Niospa mai onifaxoma, a inōpokoai tāpixō, noko shināni noko ifixixakī Jesúsxō. ¹⁰ Jesús noko ano oamatai Niospa noko ifipaiyai anori nō tāpipaonima. Akka rama iskaratīa mā nō tāpia noko ifimis Jesucristo noko nāxoni. Nāskax iskaratīari nō nai, nō rateima omiskōipakenakafo mēra nō kairoko. Nō Nios ari kaax anā nō naxima. Jesús noko chaka soaxonano nō Nios ari nīpanaka. Mā iskaratīa nō tāpia Jesús noko nāxoni nō chiifā mēra kanōma noko ifiano.

¹¹ Niospa ea katoni na meka shara Cristoōnoa yora fetsafo ē ato tāpimanō. ¹² Nāskakē ē karaxa mēranoax Cristoōnoax omiskōifi ē rāfima. Ē Jesús tāpikōiax chanīmara fayana. Jesús ēfe chaka taefakī ea soaxonitā ē Epa Nios iskafakī yoini: “Epa Niosi, ea kexesharapakexafe Jesús afianā oaitā,” ixō ē yoini keskara ea axoxii ē chanīmara fakōini.

¹³ Na ē Cristo Jesúsnoa mia chanīmākōi tāpimana shināmakiyamafe. Ē mia mēstekōi tāpimana keskafakī, nāskari fakī ato tāpimafe. Cristo Jesús chanīmara fakī afe rafekī aōxō yorafo noife mī afe rafeakī. ¹⁴ Nā ē mia yoia keskara mī mēraxō shināfe, shināmakixikima. Āfe Yōshi Shara mī mēra ikano mefeta aki. Ōifāi, Niospa mia yoia keskafakī kachikiri fayamafe.

¹⁵ Mā mī tāpia keyokōichi chanīmara faafo Asia mai anoafāfe ea ōifaināfo. Askatari ato feta Figelo feta Hermógenesri ea ōifaināfo ato fe fokākī. ¹⁶⁻¹⁷ Akka Onesiforokai askanima, eō rāfinima ē karaxa mēra ikikē. Nāafi Roma ano nokoxō pena tii ea fenafafāikī ea karaxa mēranoa fichita, ea ōiyoi nā otitaiapaoni mēxotaima ea ōifaa ōifakī, ea pishta inimamani. Nāskakē nōko Ifāfe Onesiforo āfe āfinō āfe fakefonō Efeso anoxō ato noikī ato kexesharaxonō. ¹⁸ Onesiforo Efeso anoxori ea yonosharaxopaoni, mīfi a ōixō tāpisharakī. Jesucristo anā fotoxō noko ichanāfaxō Onesiforoki inimakōikī noikī axosharaino ē askara fichipai.

2

Nō Jesús Ifofakī oa soraronō āfe xanīfo nikakōiai keskafakī nōri Nios nikasharakōitiro

¹ Timoteoshta, Jesucristo āfe kerex sharaōnoax isharafe, afaa chakafaxima. ² Ē yorafo Jesúsnoa yoiaito mīri ea nikafafāini. Nāskarifiāi mī ato chanīmara fasharatio. Nāskaxō a feronāfakēfāfe a shinā sharaifo ifife mī ato tāpimaxikī afāferi fetsafo tāpimanōfo.

³⁻⁴ Akka soraro ōiti sharayato omiskōifikī tenetiro. Āfe pexe shināyamata āfe xanīfo fisti ifofaxō nikasharakōi. A afara yonoai keskara āfe xanīfāfe yonomanaino soraro sharapa yonosharatio. Nāskarifiakī Niospa mia yonomapaiyai keskari fakī yonosharaxōfe fanīrira fetsa shinākima. Jesúsnoax omiskōifi meseyamafe. ⁵ Askatari fetsafo xonōnōnāxikakī ikisi itipinīsharatirofo xonōnōnāpaikani. Askatari mīri shināsharafai Niospa mia yoiaito

nikasharakōife. Akka mī nikasharayamaito Niospa mia, “Aicho, mī fāsi sharakōi,” ixokai mia yoitiroma. ⁶ Askatari feronāfāke yonosharamiskōi āfe tare efapafaxō, ikisi āfe yono fitiro pixikī. Nāskarifiakī mīri Jesúсноa yonoxosharamis Jesús mikiki inimakōinō mia afara shara ināxii. ⁷ Ē mia yoiāi keskara shināsharafe. Nōko Ifāfe mato tāpimasharai kiki.

⁸ Nāskakē shināmakiyamafe Jesucristo naafiakē anā Niospa ofotani noko ifimis inō. Nā David āfe fena. Nānori nā meka shara ē yoiāfāimis. ⁹ Nā ē yoiāifo, yorāfāfe Jesús Ifofaafo ōitifishkikakī. Ē Niospa mekasharaōnoa yoiaino ekeki ōitifishkikakī ea karaxa mēra ikimanafo. Ē afaa chakafayamafiakē ē feronāfake chaka keskarakē ea karaxa mēra ikimanafo. Ea ikimaflanifono Niospa meka Jesucristoōnoa ē enetiroma. ¹⁰ Nāskakē ē atoōnoax omiskōifiki ē tenekōi a Jesús Ifofaafo tii ē ato tāpimani chanīmara fanōfo, Nios fe ipaxakakī.

¹¹ Nā meka sharakōi nikafe:

Nō Jesúсноax nakī nō chanīmara faax nō afe ipanaka. ¹² Askatari nō Jesúсноax omiskōifiki nō tenei, nō Jesús fe Epa Nios ariax xanīfo ipanakakī. Akka nō Jesús potakī, “Niospa fakemara,” ixō nō askafaito Jesús noko yoitiro iskafakī: “Mā ea Niospa Fakemara faito ēri mato kopitiro iskafakī: Mī ēfe fakema,” fakī noko fatiro. ¹³ Askatari nō Jesús nikayamai nō isharayamafimiso, akka akai askarama, aroko isharakōimis. Aatokai afaa chanī yoisma, āfe meka chanīmakōi. Aakai ōiti ranāyama.

Afe keskara a Niospa meka yoisma shara itromē Nios akiki inimanō

¹⁴ Nā ē mia yoiāi anori, mefe yorafo ichanāmisfo ato shināma fāfāife. Niospa mia xafakia ōiaino ato yoiāfe Niospa mekaōnoa feratenānofoma, feratenākani aōnoax mekanōfoma. Akka fatotokai yoisharaimākai fatotori yoisharaimamākai ikaxō tsōa tāpitiroma tāpipai kakī. Anorima nika kakī tsōa tāpitiroma. Askakani fanīrira mekamisfo āa chanīkani. ¹⁵ Timoteo, Niospa meka pena tii ōife. Askafaxō Niospa meka tāpisharaxō yorafo mēstekōi ato tāpimafāfāife. Mī askaito Niospa miōnoa yoitiro iskafakī: “Na ea yonoxosharamis, ē akiki inimasharakōi,” ixō miōnoa yoixiki. Mia askafainokai mī aō rāfitiroma. ¹⁶ A feratenāmisfo āto meka nikayamafe. Nō āto meka nikaxō meka mēstekōi Jesúсноa nō nikapaitiroma. Askaxō anā nō Nios Ifofapaitiroma. Chakakōi itiro. ¹⁷ Oa yora faraxiki finaxō, koofi payokometiro keskafakī, a yōra anorima yoiki yorafo āto ōiti chakana fatiro. Himeneo feta Fileto askara chakakōi ato yoisma. ¹⁸ A Jesús oaitia a namisfo anā otōxiaifo mā nō tāpifekē, a feronāfake rafeta Himeneo feta Fileto anorima mato yoisma. Akka nō tāpia mā Jesús anā fotoaino Epa Niospa nā namisfo otōfaxii. Akka nā rafeta mato pāramisfo āa chanīkakī. Iskara mato yoisma: “Mā finōa a mato yoisma keskara. A Niospa namisfo mā ato otōfaa,” ixō a refeta yoisma. Afāfe nā meka nikaxō shinākī iskafatirofo: “Ooa. Mā nō nakē Niospa noko anā otōfaima,” ixō anorima shinātirofo. Anori shinākani Jesús shināmakitirofo. ¹⁹ Akka Niospa meka chanīmakōi. Tokirinīfakai tsōa rafetiroma. Niospa meka nāskarari. Tsōakai āfe meka fetsafatiroma. Nāskarifiakī Niospa meka kenenifo iskafakī: “Nōko Ifāfe afe yorafo tāpikōia.” Nāskaxō, “Afe yorāfāfe a afara chakafamisfo keskara potatirofo,” ixō kenenifo.

²⁰ Feronāfāke āfe pexe efapa sharakōi faxō a mēra kecho sharakōifo faa, askaxō a kecho sharafo mēra afara sharafo fatiro. Akka a kecho chakafo mēra afara chakafatiro. ²¹ Mā mī chaka mī xatekōiax, nā fēta xinikī afara chaka potatiro keskara itamaroko. Nā sapa choka keskara sharakōi mī itiro. Nāskax Jesús keskara shara mī ikaino Epa Niospa mia yonompaiyai keskara mī aōxō afara sharafo faxotiro.

²² A naetapafāfe afara chakafo shinākī nā apaiyai keskara faifono mīri askayamafe. Anori shinātamaroko Niospa fichipaiyai keskara shināfe, Jesús chanīmara fāfāi, yorafo noikī, fetsafāferi shināsharakōiaifono, Jesús Ifofaifo ato fe mēstekōi isharakōife. ²³ Anā ē mia yoinō, ea nikasharafe. A feratenāifo ato nikayamafe. Ato fe feratenāpaiyamafe. Askara yorafo samama ōitifishkitirofoki. ²⁴ Niospa meka yoisma tsoa feratetiroma. Anori askatamaroko keyokōi yorafo ato noisharafāi, ato tāpimasharatiro, tenekōisharata ato yoitiro. ²⁵ Fētsa Niospa mekakōi nikakaspakī meka anorima fisti shināito, fenāmāshata ato tāpimasharafe. Mī ato askafaino āto chaka xatetirofo Niospa mēfeta akaino. Askaxō Jesús chanīmara fakōinōfo. ²⁶ Nāskafakī anā Niosnoa shināsharanōfo. Oa tarapa mēra ikia keskara Satanás ato fapai kiki. Nāskaxō ato amapaiyai keskafakī ato yonofāfāini. Akka mia nikaxō Jesús ato ifitiro. Nāskaifono Satanás afianā ato afara yonomaotiroma. Afianā tarapa mēra ikia keskara ikanima.

3

Afeskakanimākai yorafo na mai keyoaino

¹ Timoteo, ōisharafe. Ē mia yoi Jesús chaima oaino fekaxkōi ixii kiki. ² Fetsa noitama āakōi kexemei, askatari fētsa āfe kori fisti shināfāi, āakōi anofi inimamif ikāi, Niosnoa chaka

yoimis ikāi, askaxō āto apa yafi āto afa nikakaspamisfo ikāi, yonoxofiaifāfe aichora ato famisfoma ikāi, ato noikaspamisfo, Niosnoa shinātama chakakōi fistis shināmisfo, ³ afe yorakōi noiyamafāi, fetsafo noiyamata axokaspafāi, fetsafo āa pāramis ikāi, āa apaiyai keskafakī enemisma ikāi, mitsisipakōi ikāi, afara mīshiti sharafo noiyamafāi, ⁴ askata a afe rafeafo ato chakafafāi, samama ōitifishkimis ikāi, “Ēkai tsoa keskarama,” ixō yoifāi, Nios noitaama afara chaka fisti fakī ato inimamapaimiskōi ipaikani. ⁵ Askata a Nios Ifofaafō ichanāifonono ato fe ichanākaxō Niospa meka nikafikaxō shināsharakanimā. “Nōri Nios Ifofai,” ixō āa mato pārakani. Askax āa chanīmisfo Nios Ifofayamafiakanax.

Askaifāfe ōi ato fe rafeyamafe. ⁶ Askara yorafāfe a fofāsakakī ato pāratirofo a kēro tāpisharamisfoma fanīrira ato yoimisfo ato anorima yoiāifāfe. Atirifāfe noko yoikōikanira ato famisfo. Nāskakē a xotofakefāfe noko yoikōikanira ikaxō a yoiāfo anori ato nikataifaafō. Nāskakē a kērofāfe āa shinākani iskakakī: “Nō fāsi chakakakainaito, noko tāpimasharanōfora,” ixō shinākani anorima āto shinā mēraxō shinākaxō nāskai fekaxtetitaiāfo. ⁷ Nāskaxō a ato yoimis fētsari ato yoiāito, nikatai fakaxō Niospa meka sharakōi tsōa mēstekōi tāpinakafoma. A rama ikai fētsari yoiāito, nikakākiri aōxō tāpisharapaifikakī, tsōa tāpinakama Niospa mekakōi. ⁸⁻⁹ Mā mī shināimē anori aakōi Egipto anoa xanīfāfe Faraón israelifo ato yonomapaoni, mesemaxō? Askaito ōikī Niospa Moisés nīchini afe yorafo israelifo mai fetsa ari ato iyotanō. Ato askafaito Faraón ato nīchikaspani. Askaino a feronāfake rafe ano mokaya inifo; fētsa ane Janes ikaino fētsa aneri Jambres inī, nā rafe Faraón fe rafeafo inī. A rafe Moiséski ōitifishkinifo. Nāskaxō āto xanīfo Faraón āa pāranifo ato Moisés nikanōma. Askafāifāfe ōikī chipo āto xanīfāfe tāpini Moisés a feronāfake mokaya rafe finōkōia inī. Mokayafiakaxō afaa tāpiama inifo. Nā rafeta Faraón yoinifo Moisés nikanōma. Nāskafakīri fetsafāfe Niospa meka mēstekōi ato nikamakaspakani. Nāskakaxō Niospa meka mēstekōi tsōa yoiā āto shināmā anorima shinākani. Oa Janes feta Jambres āto xanīfo anorima yoiāifonono āto xanīfāfe ato tāpini keskafakī. Nāskafakīri na iskaratīa na anorima yoimisfo āa chanīāifāfe nō ato tāpixii afāfe afaa tāpiafoma.

Mā Pablo mekai xatekī Timoteo yoisharani

¹⁰ Timoteo, mā mī ea ōisharakōimiskī ē ato afo tāpimanaito. Mā mī ea ōimiskī afeska ē isharaimākai, Nios fisti inimamapafāi, Jesús noikī chanīmara fafāi, afarafo chakafo nokoaito ē tenefāi, ē yorafo noifāi, ¹¹ a yora chakafāfe ea Jesúsxō chakafāifāfe ē tenefāi, askai ē omiskōimis. Mā mī tāpia ē afo tenemis. Askatari mā mī tāpia a Antioquia anoa ita, Iconio anoa ita, a Listra anoxō ea chakafāifāfe ē teneni. Nāskakē nā chakafoōxō nōko Ifo Nios ea kexesharamis ē tenesharakōimis inō. ¹² Na ē mia yoiāi anori chanīma. Nō Cristo Jesús fe rafesharapaiyaito a Jesús noikaspamisfāfe noko omiskōimaxii. ¹³ A yora chakafāfe āa ato pārakani. Askatari chipo ato pārakī finakōixikani. Nāskakē afara chakafakī ato pāraifāfe ōikī Satanāsri ato pāraxii.

¹⁴ Nāskakē Timoteo, na meka Jesúsnoa mī tāpisharai. A mia tāpimanafō mā mī tāpikōia. Nāskakē mī tāpisharakōi. Anori meka chanīmara fafe, shināmakikima. ¹⁵ Mā mī shināimē yomepishtaxō mī Niospa meka tāpiakī? A mekaōnoa mī shināsharamiskī Cristo Jesús chanīmara faax nō afe isharapakenaka. ¹⁶ Niospa ato shināmanaino feronāfakefāfe kirika ato kenexonifo Niospa meka ato tāpimaxikakī. Fetsafāfe afara chakaifaifono, nō ato Niospa meka tāpimasharatiro anā askayamanōfo. Askatari nō isharapaikōikī nō Niospa meka ōikī nō tāpitiro afeska faxō nō Jesús Ifofasharatirōmākī. ¹⁷ Akka Nios Ifofamisfāfe āfe meka nikasharakōikaxō, Nios yonoxosharakōitirofo.

4

¹ Timoteo, ē mia kaxeta yoiā, nikafe. Jesús oatiā nōko xanīfokōi ixii Apa Nios feta, keyokōi yorafo namisfo yafi niafōri ato yoixii. Jesús chanīmara fakanax afe nai mēra nisharapakenakafo; akka a chanīmara famisfoma chiifā mēra Niospa ato potai omiskōipakexanōfo. Nāskakē āfe Fake Jesucristo feta Niospa noko ōiaino ē mia yoi iskakakī. ² Niospa meka fena fenakima ato yoife fenāmāshta shara. A nikapaiyāifo askatari a nikakaspāifōri ato yoisharafe, mī ato yoisharaino āto chaka xatenōfo Jesús Ifofasharax isharanōfo. Shināsharata, Niospa meka mēstekōi yoife. ³ A yora chakafamāi nokoaino yorafāfe Niospa mekakōi nikakaspāitirofo. A nikatamaroko meka fetsafo shinātirofo, nā apaiyai keskafakakī. Anori fisti shinākani. Nāskakanax ano fisti ichanāikaxō anorima a fetsafāferi yoiāito nikakakī. ⁴ A Niospa mekakōi nikakaspakani a āto xinīfāfe shināpaonifo keskari fakakī. ⁵ Nāskakē Timoteo, ōisharafe. Afara afeskaraito Niospa mekakōi Ifofasharafe; mī shināfenotama anori tāpisharafe. Mia omiskōimanaifonono tenefe. Kafākakāikī yorafo Jesúsnoa tāpimafe Ifofanōfo. Nā mia Niospa yoiāi keskafafe shināfāi.

⁶ Iskaratīa eōnoa ē mia yoi. Anā ē samarakaima mē chaima nai ea Jesúsxō retexikani. ⁷ Mē yonosharakōitiani ēfe Ifo Jesúsxō. Ē chanīmara fatitāifaa enekima. Keyokōi Niospa ea yoiāi

keskara mē aka. ⁸ Nōko Ifokōichi ea òimis ē Ifofasharakōiaito. Nāskakē ē akiki nokoaito ea afarafo ināsharaxii. Eres fisti ē fixiima. Nā nōko Xanīfo finakōia oaitia keyokōi nā Ifofaafāferi fixikani. Aō noikī a manaifori ato ināsharaxii.

Pablonō Timoteo fisti yoini kirika kenexokī

⁹ Timoteo, ea ano orisape. ¹⁰ Demās afarafo fichipaikī ea nonoa òifaiti, Tesalōnica ano kakī. Askatari Crescenteri kati Galacia ano. Askatari Titori Dalmacia ano kati. ¹¹ Akka na Lucas fisti efe ika. Nāskakē Marcos ea efexōfe ea axosharaiyonō Niospa meka ato yoikī. ¹² Akka ē Tíquico Efeso ano nīchiyamea ēa. ¹³ Mī oaitia ea ēfe rakoti fexōfe a Troas ano ē faferati a Carpo pexe ano. Askata ēfe kirikari ea fēxota, askatari kirika fetsari ea fēxota a fakka fichisharakōi ē akiki kenemis, aari ea fexōfe. Ē afo fichipaikai.

¹⁴ Na yami famis Alejandro ea fāsi mekafamis. Aato ea chakafaito òikī Niospa kopikiri omiskōimaxii. ¹⁵ Ōisharafe. Alejandro miari chakafatiroki na meka shara Jesúsnoa nō yoiaito noko meka xatemapai kiki.

¹⁶ Akka ea taefakī xanīfo ano iyonifo tsōakai eōnoa yoisharanima. Akka keyokōichi ea òifainifo fōkakī. Askafiaifono ē Nios iskafakī yoini: “Epa, na ea nonoa òifainaifo ato chakafayamafe,” ixō ē Nios yoiyamea. ¹⁷ Ea askafafiaifono ēfe Ifāfe Jesús ea potayameama, ea kexexō. Ea askafiaifono ē ratetima ēfe Ifāfe ea kexeano āfe kerex ea ināno ē ato yoinō. A judeofomafāfe ea yōkaifāfe keyokōi nikanōfo ē Niospa meka Jesúsnoa ato yoiyamea. Ē askaito ea retepaikakī, oa poomānā noko pipaiyai keskara ea fatifo ea retepaikakī. Ea askafiaifono ea Niospa kexesharayamea ea tsōa retenōma. ¹⁸ Afara chakafo ekeki nokoaito òikī ēfe Ifāfe ea kexetaifa a ē akiki nai mēra nokoaitia. Fāsi nōko Nios sharakōi, tsoa fētsakai askafatiroma. Nāskakē tsōa nōko Nios finōtiroma. Ares fisti sharafinakōia. Nō aōnoa yoisharapakexanō. Nāskapakexapainō.

Pablo mā mekai xatekī ato meka shara fomani

¹⁹ Timoteoshta, ea Prisca yafi Aquila ea yoixōfe, keyokōi yorafo Onesíforo pexe ano ikafori ea yoixōfe. ²⁰ Erasto Corinto ano nēteyamea. Tróximo isinī ikī rakakē ē Mileto ano rataferayamea. ²¹ Nā mechaka ikamano ekeki ofe. Eubulonō, Pudentenō, Linōnō, Claudianō, keyokōichi Jesús chanimara faafāfe mato yoisharapaikani.

²² Nōko Ifo Jesucristo mefe ipaxanō. Askatari Niospa mato noikōikī mato kexesharakōinō keyokōi. Nā tii ē mato yoi.

Ēkīa Pablo

Pablo Tito Kirika Kenexō Fomani

Pablo Tito yoisharani

¹ Tito, ē mia kirika kenexō fomai. Ēfi Pabloki, Niosfi ēfe Ifokōiki. Nā ea yoiyai keskamis ē. Jesucristo ea nīchia ē aōnoa yoisimis inō, nā Niospa katoa yorafo ē ato tāpimanō afāfe Jesús chanīmara fanōfo. ² Niospa mai onifatama shināki iskafani: “Na yorafo ē ato katoano efe rafeaifono ē ato ikikōipakenaka efe Ipaxanōfo,” ixō shināni. Nāskakē nō Nios Ifofapaikī nā yoiyai keskara nō chanīmara fatiro. Nios ramashara chanīmisma. ³ Aatofoi noko tāpimapaiyaiā āfe meka shara noko tāpimani. Nāskakē iskaratīa ea nīchia ē ato āfe meka shara yoinō eōxō tāpīnōfo. Nā Nios noko ifimis nō afe Ipaxanō. ⁴ Tito, ē mia kirika kenexō fomai. Mīfi ēfe fake keskarakōikī, eōxomāi mī Nios chanīmara fakē. Epa Nios mī Ifofakē mia imasharakōipakenaka mia noikī mia shināsharamani. Nōko Ifo Jesucristori mia askafai.

Pablo Tito Creta ano nīchiferani ato tāpimanō

⁵ Tito, ē mia nīchiferati Creta ano a nō yonofai mitoxoma mī chipo mitonō. Nāskakē ē mia yoiti iskafakī: “Nā pexe rasi anoafo kexemisfo katofe nā Nios Ifofafo ichanāfono ato kexenō,” ixō ē mia yoiferati. ⁶ A Nios Ifofafo kexemis katofe afaa chaka shināmisma. Āfi fistiya inō. Āfe fakefo Jesús tāpīafo inōfo, ato kemamisma inōfo, afaa chakafamisfoma inōfo āfe fakefo. ⁷ Nā Nios Ifofafo kexemis sharakōi itiro, afaa chaka shināmisma nāmāi xanīfoax. Nā keskara yora mī katotiro nā Nios Ifofafo kexemis inō. Nā Niospa shināmanai keskara inō aōnoa afaa chaka yoyamanōfo. Askatari kakapaimis itiro. Askatari samama ōitīfishki imiskai itiro. Askatari pāemis itiro. Askatari setemitsamis itiro. Askatari yora fetsa pāraxō kori fīamis itiro. ⁸ Askatamaroko isharakōixō yorafo āfe pexe nokoaito atoki inimayanā ato ifitiro. Askatari yorafo keyokōi ato afara shara axosharakōimis itiro. Askatari āa kexemesharamis itiro mēstekōi isharakōiyānā. Niospa meka nikasharakōipai afara chakafapaikī anā akima. Nāskaxō a Niospa fichikaspaifo anā shināima. ⁹ Niospa meka nikasharaxō kachikiri fayamafāi, nā Niospa yoiyai anori chanīmara faxō fetsafori yoitiro. Xafakīakōi yoitiro. Nāskaito nikai yorafo Nioski inimanōfo. Askatari anorima yoisimisfori ato tāpimatiro, akairi tāpīnōfo.

¹⁰ Akka nā fetsafo nikayospakōimisfo Niospa meka ato yoiiaifono nikakaspakōimisfo. Nāskaxō meka fetsafaxō yoisimisfo āa fanīrira yoikakī nā Moisés yoini keskara fisti nō nikanōra ikaxō. Akka nā judeofo ranāri askamisfo āa chanīkani. ¹¹ Nāskakē ato xatemafo ato pārānōfoma. Kori fisti fīpaikakī anorima chakakōi ato tāpimapaikani kiki. Nāskakē ranārito atoōxō Jesús kachikiri fayomisfoki.

¹² A feronāfake onāyato a inōpokoi keskaraōnoa Creta anoxō yoini: “Nono ikafo, Cretafofi chanīmīsfokī, nikayospafo, pikī fisti tāpīafo, yoinā keskara pitsikōifo xanikōifo,” fani. ¹³ Nā tāpīafo ato yoikōini ato pārānima. Creta anoafo chakakōi ikafo. Nāskafiafono ato yoisharafe Titopa, anā askanōfoma, Niospa yoiyai keskara nikanōfo. Nāskaxō Niospa meka chanīmara fanōfo. ¹⁴ Akka judeofāfe āto xinīfāfe ato yoipaonifoki anorima, āa chanīkākī. Nāskakē ato yoisharafe anā ato nikanōfoma. Askatari a Niospa meka anā nikaifāfema ato yoipaiyaifono, ato yoisharafe anā ato nikanōfoma.

¹⁵ Fetsafo ōiti sharayafo, māmāi Epa Niospa ato chaka xatexonano. Nāskakē afara sharafa atonā sharakōifo. Akka a ōiti chakayafāfe āto shinā mēraxō chakakōi shināmisfo. ¹⁶ Askafīax chanīmīsfō, “Nō Nios tāpīara,” iki, tsōa Nios shināyamafī. Askara yōra Niospa meka nikakaspakī chakafai. Nāskakē nō tāpīro askara yora Nios fe rafemisma. Askara yōra shara shināima, afaa pishta shara fatiroma, chakakōi shināi.

2

“Niospa meka ato mēstekōi tāpimasharafe,” Pablo Tito fani

¹ Mīfi askaramakī, Titopa, mī ato yoisharafe. Niospa meka ato mēstekōi tāpimasharafe, mia nikasharanōfo. ² Askata anifo tiiri ato yoisharafe isharanōfo. “Anā pāeyamakāfe,” ato fafe. Askafaxō ato yoisharafe: “Māri isharakāfe mā askaito ōikī fetsafāfe mato ōinōfo. Afara chakafapaikī anā ayamakāfe, kexemesharakāfe. Shara shināi ikāfe. Māto ōitīnī Nios shināki kachikiri fayamakāfe. Askata māri yorafo fe rafesharakāfe. Ato noikāfe. Māto afara afeskaraito shināchakayamakāfe, a finōmataroko Nios yoikāfe.” Nāskaxō anori ato tāpimasharafe, Titopa. ³ Askatari a yōxafo tiiri ato yoisharafe iskafakī: “Isharakāfe a Niospa fichipaiyai keskai. Askatari mā ranā paranōnāyamakāfe. Parakī ato chakafayamakāfe. Yōxafōfīax pāeyamakāfe. Askatamaroko afara sharakōifo fetsafo ato tāpimakāfe,” ixō ato yoife. Askafafe ato yoikī, a ranā askanōfo. ⁴ Nāskafaxō anā ato yoisharafe, Titopa, yōxafo tiito a

naetafafa to yoisharanōfo a tiitori tāpinōfo, nāskaxō āto fene noisharakōinōfo, āto fakefori noikōinōfo, ⁵ afara chakafapaifikāki anā anōfoma, kexemesharanōfo, askatari āto pexe anoxō āto fakefo kexesharakōinōfo faki fofāsapaiyamanōfo, askatari ato noisharakōinōfo, askatari āto fene nikakōinōfo. Nāskaifāfe ōikī fetsafāfe Niospa meka chakara fatirofoma, nā kērofo shara niaifāfe ōikī, Nios Ifofakanax. Akka kērofāfe Nios Ifofafiakakī anorima shināifono fetsafāfe Niospa meka chakara fatirofo, nā kērofo ōikī, chaka niaifono, Nios Ifofafiakanax. Akka nā kērofo Nios Ifofaax shara ikaifono ōikī fetsafāfe Niospa meka chakara fatirofoma. Nāskara yōxaxofofāfe ato shara tāpimatirofo, naetafafa.

⁶ Askatari naetapafori yoisharafe iskafakī: “Māri tāpikāfe, shināsharakāfe isharaxikāki. Afara chakafapaifikāki anā ayamakāfe, kexemesharakāfe,” ixō ato yoife, Titopa. ⁷ Askatari mīri isharafe. Keyokōi yorafo shara fafe. Afeskax isharatirofomākī ato ōimafe. Ato Niospa meka tāpimafe, mēstekōi ato yoisharafe, xafakīakōi. Niospa mekaki kakapayamafe. ⁸ Ato meka shara yoife. Mī shara yoiaito, mia fetsafāfe iskafanōfoma: “Titopa noko meka chaka yoira,” inōfoma. Tsoa mefe feratenāyamanō. Mefe feratenāpaikani rāfitirofo. Mī afara chakafaino mia tsōa ōiyamanō.

⁹ Askatari a ato yonomatifo ato yoife iskafakī: “Māto xanīfāfe mato yoiaito akiki inimayanā nikakōikāfe afe feratenākakima. ¹⁰ Nāskaxō māto xanīfo āfe afara onēyamakāfe. Shara yonoxokāfe, ramashara mā ato pāramismakī. Askara ōikī mato tāpisharanōfo mā ato yonoxosharakōiaito māmāi Niospa meka shara shinākī.” Nāskakē mātoōxō, “Niospa meka sharara,” fatirofo. Nā Nios noko ifimis nō afe ipaxanō.

¹¹ Epa Niospa āfe Fake Jesús nāmā nīchini nokoōnoax naiyonō nōko chaka noko soaxoyanā nō afe ipaxanō. Nāskakē nō tāpitiro Epa Niospa keyokōi noko noikōiaito. ¹² Noko noikī noko tāpimani afara chakafakī nō xatenō. Noko afara chakafamapayiaifāfe nō ato yoitiro iskafakī: “Maa, ē anā afaa chakafapaima. Ē shara nipai, ē anā chaka shināpaima,” nō ato fatiro. Nāskaxō nōko ōiti mēraxō a afara chaka nō fichipaiyai a Niospa fichipaiyaima, nōri anā fichipaitiroma. Askara fichipaitama a nō shināmakitiro. Nāskata nō isharakōitiro. Niospa noko shināmanai keskara fisti nō shinātiro. Nāskaxō nō shara nitiro. Yora fetsafāfe chaka shināifono nō askara shinātiro, Nios Ifofaxō. ¹³ Iskaratīa nō Jesucristo manai anā oaito nō ōisharapai. Nāfi nōko Ifokōikī. Nāfi Nioski. Nō tāpia nokoki anā oxii. Nokoki nokoaito sharafinakōia nō ōixii. Nāato noko nāxoni nō omiskōipakexanōma nōko chaka noko soaxoxiki, nō afe nīpaxanō. ¹⁴ Nā nokoōnoax nani. Nōko chaka keyokōi noko soaxōfaini. Nāskaxō nōko ōiti noko sharafaxōa. Nō afe yoraxō nō afara sharafapaki nō anō.

¹⁵ Nāskakē ē mia yoiai keskafakī keyokōi yorafo ato tāpimafe, mia Niospa shināmanaino. Afara chakafaiifāfe ato yoisharafe, anā askanōfoma. Niospa yoiai keskafakī mīri ato yoisharafe, imanānōfo. Mī ato askafaito mia nikasharanōfo Niospa mia yoiai keskafakī akairi nikasharanōfo.

3

Nios Ifofaafu shara nitirofo

¹ Nāskaxō mefe yorafo ato yoisharafe, Titopa, iskafakī: “Māto xanīfofeta nafa xanīfāfe yoiaito nikasharakāfe. Ato nikasharax a mato yoiaiffo keskakāfe. Askatari afara afeskaraito ato axosharakāfe. Shara shinākāfe. ² Askatari ato mekafakī chakafayamakāfe. Fētsa mato yoipaiyaito ferateyamakāfe. Akiki ōitifishkiyamakāfe. Ato shināsharakāfe. Fenāmāshta ato yoikāfe,” ixō ato yoisharafe, Titopa.

³ Nāskakē nōri afaa shināyopaonima. Nōko ōiti mēra nō afaa pishta shinātiro, nō ipaoni. Nō nikayospakōi nō ipaoni. Nō chaka shināpaoni. A nā nō ipaiyai keskara nō ipaoni. “E shara shināi, nā ē ipaiyai keskara ē iki,” ikax nōa nō pāramepaoni. Nō yora fetsa āfe afara fichipaipaoni. Nō ato mekafakī chakafapaoni. Chakakōi nō ipaoni, afaa pishta nō mekeaima. Nāskax nō noikaspa faatanāpaonixakikai nō xatemisma. ⁴ Mā nō askapaonino, Epa Niospa noko noikī āfe Fake fisti nīchini nōko chaka noko soaxoniyonō, nō omiskōipakexanōfoma nokoōnoax naiyonō. Nāskaxō noko ōimani afesaxō noko noimākai. ⁵ Akka nō chaka shināmiskē noko nāxoni nōko chaka noko soaxoxiki, nokomāi noikōikī. Akka nō afara shara faōxō noko ifima. Noko noikī nōko ōiti fetsafaxō noko shināmashari. Noko askafaano nō niax fena keskara shara nō itiro. Niospa Yōshi Sharapa noko askafatiro. Nōa nō niax nō askatiroma. Nōa nō chaka soametiroma. ⁶ Nōko Ifo Jesucristo noko nāxoni, nōko chaka noko soaxoxiki noko ikipakexakī. Nāskakē Niospa āfe Yōshi Shara noko inā nō mēra nanenō, fishkomītsatiroma. ⁷ Nāskaxō noko ōiti shara faano, nō afe rafekōitiro nokomāi noikōikī. afe rafeax nō afe nisharakōipakexatiro nā nō ipaiyai keskai.

⁸ Titopa, ē mia xafakīakōi yoiaiki. Nā ē mia yoiai keskara chanīmaki. Nāskakē Nios Ifofaafu yoisharakōife, shināsharata isharakōinōfo, yora fetsafo shara fanōfo. Askara shara ikax keyokōi nō isharatiro. ⁹ Nāskata fētsa mia feratenāito kemayamafe. Mia iskafaito: “Nōko

xinifo mī tāpiama, mī ea keskarama,” mia faito kemayamafe. Askata oi mitsisipato mekaito kemayamafe. Moisés yoini keskafakī mia mekafainīfōfānaito kemayamafe. Mī kemapanā sharamaki. A noko askafai yōra afaa tāpiamaki. Askara fe nō kemañātiromaki.

¹⁰ Akka fētsa a Jesús Ifofaafō ato yoisharakima āa ato pārakī ato paxkanāfaino kenaxō yoisharafe mia nikasharaimākai anā askanōma. Akka mā mī yoikī rafefafiano mia nikayamaino anā afaa yoyamafe. Askatari anā afe rafeyamafe, ares inō. ¹¹ Mā mī tāpia askara yōra Nios Ifofaama. Niospa meka nikaima, chaka shināi, ōiti chakaya. Askarato afashta shara faima. Mā āa tāpimekōia, yora chaka.

Pablo mā mekai xatekī ato meka shara fomani

¹² Askata ē mikiki Artemas iyamakī Tíquico ē mia nīchixononi. Mikiki nokokē, ekeki ofe, Nicópolis ano. Na oi pakeaitīa ē shinā ē nono Nicópolis ano itiroki, mechakaino.

¹³ Apolos yafi Zenas kexesharafe. Nā Zenasmā noko ato yoixomiski, nōko xanīfo. A rafe mato makinoax foaifāfe ato kexesharafe. Nāskaxō afara fichipaiyaifāfe ato ināfe, aya fōtanōfo. ¹⁴ Askatari a Jesús Ifofaafō ato yoife yonomisfo inōfo, yonosharakōi yononōfo, yonochakama. Askarafāferi afara yopakakī fitirofo, yonokaxō. Askarafo ato yoife xanimisfoma inōfo, ato afara ināxikākī a omiskōiaifo, afaamaisfo.

¹⁵ Na ēfe ikafāferi āto meka shara mia fomakani, Jesús Ifofaafāfe. A noko shināifori noko ato yoixōfe. Niospa āfe shinā shara māto ōiti mēra nanemanō mato noikōikī. Nā tii ē mia kenexō fomai, Titopa.

Pablo

Pablo Filemón Kirika Kenexõ Fomani

Pablo Filemón yoisharani

¹⁻² Ëkĩa Pablo. Na karaxa mēraxõ ã mia kirika kenexõ fomai. Na nõko exto Timoteo feta nõ mia kirika kenexõ fomai. Ë Jesucristoõnoa ato yoiaino, ea nikakaspakakĩ ea achikaxõ karaxa mēra ea ikimatifo. Nāskakē ã mia yoi, Filemón, mĩfi noko keskarakĩ Niosnoa ato yois. Nāskakē nõ mia noikõi. Nõ mia kirika kenexõ fomai, mia yafi a mefeta Jesús Ifofaafõ a mĩ pexe anoax ichanāmisfori nõ mato kirika kenexõ fomai. Akka Apia nõko poi keskara, nāskakē Arquipo yafi nõ ato kirika kenexõ fomai. Akka nã Arquipo noko keskarari nãatori ato Niospa meka yois. ³ Niospa mato noikĩ mato shinã mēra mato shināmashara mã fekaxtenõma. Epa Nios feta nõko Ifo Jesucristo mato askafanõ.

Filemón Jesús Ifofaxõ yorafo noipaoni

⁴⁻⁵ Mē mia nika mĩ nõko Ifo Jesús noikõiaito, askatari mĩ chanĩmara fakõinaito, askatari a Jesús Ifofaafõi mĩ ato noisharakõia keyokõi. Mĩ askaito nikakĩ ã mia nirixõ kifixõfafaĩni iskafakĩ: “Aicho Epa Niosi, na Filemón mia Ifofasharakõia,” ixõ ã mia Epa Nios kifixomis. ⁶ Askatari mĩ Epa Nios Ifofasharakõianã mĩ ato afara axosharakõimis ato tãpimasharakõianã. Nāskakē ã Epa Nios mia kifixomis mĩ tãpisharakõinõ nã Cristo Jesús nõ Ifofaito noko inimamamis keskafakĩ. ⁷ Ë mikiki inimasharakõi mĩ ato noisharakõiaito nikai. Nāskakē ã mikiki inimai, efe yorashta, a Nios Ifofaa fetsafo mĩ ato noikĩ mĩ ato inimamasharakõiano.

Pablo Filemón iskafani: “Mĩ yonomati Onĩsimõ eõxõ sharafafe,” ixõ yoini

⁸ Cristo ea ifini ã ãfe meka yois inõ. Nāskakē fãsi mekainĩkafã ã mia yoifitiroxakĩ, akka ã mia askafapaima mĩmã fetsafo ato noiyanã mĩ ato inimamasharakõiano. ⁹ Ë mia askafatamaroko ã mia noikõianã ã mia yoi. Ëkĩa Pablo mē anifokõia ã Cristo meka ato yoiaino ea nikakaspakakĩ karaxa mēra ea ikimatifo. ¹⁰ Nāskakē Onĩsimõõnoa ã mia yoisharapai. Na Onĩsimõi ãfe fake keskaraki. Nono karaxa mēraxõ ã Onĩsimõ Jesús chanĩmara famati. Nāskakē Onĩsimõ ãfe fake keskara.

¹¹ Akka taeyoi Onĩsimõ mia yonoxosharapaonima. Mã askayopaofinixakĩ, iskaratĩa mĩ noikĩ mia axosharatiro, nã ea axõai keskafakĩ. ¹² Ë mia anã Onĩsimõ nĩchixonõ ã aõ noikõifiki. ¹³ Epa Niospa meka shara ã yoiaino ea karaxa mēra ikimanifono, oa nono efe ixõ mĩ ea kexesharamis itikixõ na Onĩsimõ ea kexenõ ã fichipaikerana. ¹⁴ Akka ã mia yõkaxoma nonoxõ ea kexenõ, ã nētefapaima. Nāskakē, “Na ea Onĩsimõ anã nĩchixõfe,” ã mia faima. Nāskakē na Onĩsimõ mĩ efeta yonomapaikĩ ea kexenõ mĩ yoitiro. ¹⁵ Oĩtsai, Niospa anori fichipaiyaino askayameaki nāskax anã mĩ yonomati keskara ikima Nios chanĩmara faax. Mĩ yonomatifax mikiki onekeratiki afetiama. Anã iskaratĩa mia ano kaax, chaka ikima mēfe rafesharakõi kiki. Anã mikikinoax fakĩ kanakama. ¹⁶ Anã mĩ yonomati keskarama. Iskaratĩa mã Jesús Ifofaa. Nāskax oa mēfe nanea keskara mã Jesús Ifofaax. Nāskai ã aõ noiãi keskafakĩ, mĩ aõ noifinakõitiro. Iskaratĩa anã oa mĩ yonomati keskarama. Mã isharakõia oa mĩ exto keskara, anã oa yora fetsa keskarama.

¹⁷ Nāskakē mĩ oa efe nanea keskaraxõ mĩ efeta Jesús Ifofai, ã mikiki nokoaino mĩ ekeki inimayanã mĩ ea ifitiro keskafakĩ, na Onĩsimõki inimayanã ifisharakõife. ¹⁸ Akka mia chakafaferatimãkĩ, askayamãkĩ mia nimiferatimãkĩ ea yoi ã mia kopifanõ. ¹⁹ Nãnori ã mia yoi mia kirika kenexõ fomanã. A Onĩsimõ mia nimia ã mia kopifanõ ea chanĩmara fafe. Efe yorashta, mĩ ea nimia shinãfe. Mĩ ea kori nimiyamafekē ã mia Jesús meka yoiyamano mĩ Jesús Ifofakeranama efe nĩpaxakĩ. ²⁰ Efe yorashta, ã mia yoi nõko Ifoõxõ ã Onĩsimõ shara faxõfe. Ëfe õiti inimamasharakõife.

²¹ Mē tãpia a ã mia yoiã anori mĩ ea nikasharakõi. Askatari a ã mia kirika kenexõ õiki a finõmainĩfõfã mĩ ea axosharai. ²² Ë mia anã fetsari yoi. Mĩ ea Epa Nios kifixõititaifanõ. Mĩ askafaino ea karaxa mēranõ kãimanafono ã mikiki samama nokotiro. Nāskakē ea mĩ pexe kene ano mĩ ea itipinĩ faxotiro, Niospa ea kãimanano ã ano oxaxinõ.

Mã Pablo mekai xatekĩ ato meka shara fomani

²³ Na Ipafras Cristo Jesúsnoa yois a yafi ea karaxa mēra ikimatifo, aatori mia yoisharai. ²⁴ A efeta Jesucristo yois, fetsafõri Marcos ikaino, Aristarco ikaino, Demãs ikaino, Lucas ikaino, nã tiito mia yoisharakõikani mikiki inimakãkĩ.

²⁵ Nõko Ifo Jesucristo mato noikĩ mato kexesharakõipainõra. Nã tii ã mato yoi.

Ëkĩa Pablo.

Jesúsnoa Yoikĩ Fětsa Hebreofo Kirika Kenexõ Fomani

Jesús áfe Apaõxõ yoini. Nãskakẽ nõ tâpitiro afe keskaramãki

¹ Efe yora mĩshtichi, ẽ mato kirika kenexõ fomai mã tâpinõ Jesúsnoa. Taeyoi Epa Niospa áfe meka nõko xinifõ israelifo yoipaoni mēxotaima. Áfe ájiriõnoa ato yoipaoni. Askatari áfe namapa ato yoipaoni. Askatari áfe meka yoimisfoxõ ato yoipaoni. ² Akka iskaratĩa noko yoiã áfe Fakeoxõ. Nãskakẽ nõ tâpitiro Nios afe keskaramãki. Áfe Fakeoxõ keyokõi nai mēranoafoya mai anoafoyari onifani. Nãskafata áfe Fake katonĩ nai mēranoafoya mai anoafoyari nõko xanĩfo finakõia inõ. ³ Nãfi sharafinakõiaiki Apa Nios keskarakõi. Apa Nios afe keskaramãki noko õimani. Nãato keyokõi kexesharamis áfe mekasharaõxõ. Askatari nokoõnoax nani nõko chaka noko soaxoxikĩ a keskara shara noko õi. Nãskakẽ nõko chaka anã shinãima. Nãskata mã otoax nai mēra kani Apa fe xanĩfokõi ixiki.

Niospa áfe ájirifo Jesús ato finõkõia

⁴ Nãskakẽ nõ tâpitiro Niospa Fãke ájirifo ato finõkõia. Nãskax Niospa Fake xanĩfokõi Jesús. ⁵ Akka Niospakai áfe ájirifo yoikĩ iskafamisma:

Mãfi ẽfe Fakekõifokĩ. Ẽ mãto Epaki, ato famisma. Akka áfe Fake fisti yoikĩ iskafani:

Mĩ ẽfe Fakekõi. Nãskakẽ mã fisti áto xanĩfo finakõia ipanakaki, ixõ yoini. ⁶ Nãskaxõ áfe Fakekõi mai ano nĩchini. Nãskata áfe ájirifo yoini iskafakĩ: Keyokõichi ẽfe Fake noikõikãfe. “Mĩ fãsi sharakõi,” ixõ yoikãfe. ⁷ Nãskata áfe ájirifoõnoa yoikĩ iskafani:

Ẽfe ájirifo oa nefe koshi katiro keskara ẽ fai, ẽfe meka yoinõfo. Nãfõri oa chii xoisai keskarafo. Nãskakẽ nã ẽ ato yoiã keskafakĩ afara arisafatirofo, ixõ Niospa yoini. ⁸ Akka afianã áfe Fakeõnoa yoikĩ iskafani:

Mĩ ea keskarari. Mĩri mã Nioskõi. Mĩ áto xanĩfokõi ipanaka. Mĩ keyokõi ikikõisharapakenaka. ⁹ Mĩ afara sharafo noikõimis, nã afara chakafo noikaspayanã. Nãskakẽ ẽ mia katonĩ mã áto xanĩfo inõ. Akka ájirifo ẽ ato inimamai. Akka ẽ mia inimamakõi, ixõ yoini. ¹⁰ Askata anã yoini,

Mĩri ea keskarakõi. Mĩ áto xanĩfokõi. Afaa oniyamatai mai yafi nai mã onifakĩ taefani. ¹¹ Nãskakẽ nãfo keyokõi mitokomexii. Akka mã fisti keyonakama. Nã rapati mã chapoax keyotiro keskai mai fe nai keyoxii. ¹² Rapati chapokẽ potatirofo fetsa fena shara fixikakĩ. Nãskarifiakĩ mai fe nai anã sharakẽma mã anã mai yafi nai pãofakĩ keyotiro. Anã fenashara faxiki fenashara inõfo. Akka mã fetsatiroma. Mĩ fisti ipanaka, ixõ Epa Niospa áfe Fake yoini. ¹³ Niospakai áfe ájirifo yoikĩ iskafamisma:

Mã efe xanĩfo ikikai efe ketaxamei. Tsaokãfe, ixokai yoimisma. Akka áfe Fake fisti yoini iskafakĩ:

Mĩ efe xanĩfokõi ikano nã mia noikaspaifãfe anã mia afeska fatirofoma mĩmãĩ keyokõi ato ikikẽ. Nã mã mia noikaspaifo mã ato ikixii, ẽ mã askafaino mã efe xanĩfokõi ixii, ixõ yoini. ¹⁴ Akka Epa Niospa áfe ájirifo yoini noko kexesharanõfo. Fatorafãferi Jesús Ifofaafomãki afe ipaxakakĩ. Nãskakẽ Niospa áfe ájirifo yoini a Ifofaafõ kexesharanõfo.

Nãskakẽ nõ tâpia ájirifo Jesús finõkõia.

2

Jesús nokoõnoax nanixakĩ noko imapakenakakĩ. Nãskakẽ kachikiri fayamakãfe

¹ Akka Cristo ájirifo finõkõia. Nãskakẽ nã meka chanĩmakõi Niospa Fakeõnoa nõ nikasharakõitiro, na meka shara kachikiri fayamaxiki. ² Niospa áfe ájirifo nĩchini áfe meka yorafo yoitanõfo nõko xinifãfe nikasharanõfo. Akka nikasharayamaifono Niospa ato omiskõimani. ³ Akka taefakĩ Jesús yoiyoni nokoõnoax chipo naxiai, nõko chaka noko soaxoxikĩ nõ afe Ipaxanõ. Nãnori ato yoiaito nikakaxõ a afe rafemisfãfe noko yoinifo. Akka nõ Jesús Ifofaino, Niospa noko ifitiro. Akka nõ nikayamaino Niospa noko ifitiroma. ⁴ Askatari Niospa afara fetsa fetsatapafõ tsõa atiroma keskara ato ispapaoni aõxõ tâpinõfo áfe meka chanĩmakõikẽ. Askatari áfe Yõshi Shara ato mēra naneni ato katõxõ nãfãfe yonokĩ fetsa fetsafakĩ yonoxonõfo. Nãskakẽ nõ Niospa meka chanĩmara fai.

Jesucristo nono mai anoax yorakõi ikiyoi oni, feronãfakekõi askaftax Nioskõi

⁵ Akka Niospa áfe ájirifo yoikĩ iskafanima: “Na mai fena anoax mã xanĩfo ixii,” ixõ yoinima. (Nãskakẽ nõ Jesúsnoa nõ shinãmakitiroma nãmãĩ xanĩfofinakõikẽ.) ⁶ Akka na kirika kenekĩ David yoikĩ iskafani Niospa shinãmanaino:

Epa Niosi, keyokōi mī onifani. Akka nōkai afama. Nāskafekē mī noko noiyana mī noko shināmīs, noko kexesharayanā. ⁷⁻⁸ Akka mī ājirifāfe noko finōyonifo. Nāskafiano nono mai ano mā noko xanīfo ima. Nāskakē nā mī onifanifāfe noko nikakōitirofo mīmāi noko xanīfo imasharakē, ixō keneni. Akka keyokōi nā Niospa onifanifo nō āto xanīfo itiro. Tsoa fetsakai xanīfo itiro. Askafiano keyokōichi noko nikakanima. ⁹ Akka mā nō tāpia Niospa noko noikī nono mai ano Jesús nīchini yorakōi inō. Nāskakē āfe ājirifāfe Jesús finōyonifo. Akka mā nokoōnoax nai omiskōixō noko chaka soaxokē. Epa Niospa xanīfo finakōi imani, nāskaramāi Niospa fichipaikī keyokōi noko noikī. ¹⁰ Epa Niospa keyokōi onifani aōnoax keyokōi inōfo. Nāskakē āfe fakefo afe isharapakenakafo. Nāskaxō āfe Fake Jesús nīchini nokoōnoax omiskōiyonō nō afe ipaxanō. Āfe Fake fisti nokoōnoax omiskōitirofo nōko chaka noko soaxoxiki. Nāato Apa Nios ika ari noko iyoano nō afe ipaxatiro. ¹¹ Akka Jesús āfe Apa Nios nāri nōko Epa. Nāskaxō noko chaka soaxona nō a keskara shara inō. Nāskaxō rāfikima noko yoikī iskafatiro: “Nafō ēfe fakefo,” ixō noko yoitiro. ¹² Nā chanīmara faafoōnoa Jesús Apa Nios yoikī iskafani:

Epa Niosi, mīōnoa efe yorafo ē yoisharaxii. Nāskakē ato fe mīōnoax ē fanāixii, ixō yoini. ¹³ Nāskaxō anā yoikī iskafani:

Epa Niosi, ē mia chanīmara faaki, ixō yoini. Nāskafata anā yoikī iskafani:

Epa Niosi, nā ea chanīmara faafo mā mī ea inā ēfe fakefo inōfo, ixō Jesús Apa Nios yoini. Nāskarakōi keneni David.

¹⁴ Nā fakefo apa fistichi ato fake fafiano nā yora fistiyata nā imi fistiya ikafo tsoa osiama. Nāskarifiāi Jestūsri noko keskara yorakōi ipaoni. Yorakōi kāimixakī noko nāxonī Satanās yōshi chaka nōko ifo iyamanō anā noko namapakenōma. Nokoōnoax Jesús naitīa Satanās āfe kerex xateni anā noko afeska faxima. ¹⁵ Akka Jesús nokoōnoax nayoamano yorafo nō naira ikax ratekōipaonifo. Askafiano mā nokoōnoax Jesús naxō noko chaka soaxona afe ipaxanōfo. Nāskakē napai nō anā ratetiroma. ¹⁶ Akka mā nō tāpia Jestūsikai onima āfe ājirifo afara ato axoyoi. Askatamaroko Abraham āfe fenafo nā chanīmara faafo, Abraham chanīmara fapaoni keskafakī chanīmara faifono ato afara axosharayoi oni. ¹⁷ Akka Jesús noko keskara yorakōi ini. Nāskakē nā nō meemis keskarari arifi meepaoni. Yorafāfe noikspaifono meepaoni paekōi. Askatari mekafaifono, askatari chakafamapayiafono, meepaoni paekōi. Nāskakē nokoōnoa shināi. Noko potaxikima. Nāskakē Epa Nios noko kifixomis noko imasharanō. Akka nā Jesús nokoōnoax nani nōko chaka noko soaxoxiki. Nāskakē noko Apa Nios kifixotiro iskafakī: “Epa Niosi, ē ato nāxonikī ato chaka soaxōfe nā ea chanīmara faifo,” ixō Apa yoitiro. Nāskaxō noko Epa Nios kifixomis xanifokōi itiro. ¹⁸ Satanās Jesús chakafamapaini. Akka Jesús omiskōifikī afaa chakafanima. Nāskakē nokori Satanās afara chakafamapayiaito Jesús noko axosharatiro nō afaa chakafayamanō.

3

Jesús Moisés finōkōia

¹ Efe yora mīstichi, Epa Niospa mato katonī āfe Fakekōifo mā inō, nāskaxri mā afe xanīfo inō. Niospa Jesús nīchini nokoōnoax nanō. Akka nāatori Apa Nios noko kifixomis. Akka a ato Nios kifixomisfo Jestūs ato finōkōia. Nāskakē Jestūs shināsharakōikāfe. ² Akka a Niospa Jesús yoini keskara, nāskara asharakōini. Nāskatari Niospa Moisés katonī israelifo Egipto mai ano ato ifinō, askatari āfe meka shara ato yoinō. Nā Niospa yoini keskarari Moisés asharakōini. ³ Akka Moisésnoa yoisharafitirofono, askatamaroko Jestūsnoa yoisharakōitirofo. Nā pexe sharaōnoa yoisharatirofono, askatamaroko nā pexe famisnoa yoisharakōitirofo. Nāskarifiakī Moisésnoa yoisharafitirofono akka Jestūsnoaroko yoikī finasharakōitirofo. ⁴ Āa pexe itiro. Akka nā pexe famisto atiro pexesharafakī. Nāskarifiakī Epa Niospa keyokōi onifani. ⁵ Akka Moisés Epa Niospa āfe yonomati ini. Niospa yoini keskafakī, nāskarakōi ani. Āfe kaifo israelifo ato yoipaoni Niospa meka. Askatari ato kexesharapaoni. Askatari Egipto ano ato ifixō ato iyoni. Nā Moisés apaoni keskafakī oikī keyokōichi tāpikōitirofo Epa Niospa āfe Fake nīchiai afe yorafo ichapakōi ifinō nai mēra afe ipaxanōfo. ⁶ Akka Jestūsikai Epa Niospa āfe yonomatima. Āfe Fakekōi. Nāskakē afe yorafāfe āto Ifokōi. Akka tsoamāki afe yorafo ē mato yoinō. Nō Jesús Ifofaxō a noko yoiyoni keskafakī nō manasharai nā anā oaitia, nō kachikiri fayamax nō afe yorakōi nō iki.

Niospa fakefo aōnoax inimakōitirofo anā āto ōiti fekaxtenōma

⁷⁻⁸ Akka Niospa Yōshi Sharapa yoikī iskafani:

Epa Niospa mato yoiai keskafakī nikasharakāfe. Māto ōiti kerexfayamakāfe Niospa meka nikakaspakī. Māto xinifo keskara iyamakāfe. Māto xinifo ē ifini Egipto ano. Ē ato

iffinino tsōa istoma anoxō ea nikasharanifoma. Askakimaroko Jesús mato yoiyai keskara nikasharakōikāfe. ⁹ Nā tsōa istoma anoxō mato xinifāfe ea nikakasapaonifo nā tsōa ōiyomisma ēfe yonoshara ē ato ispafiaino. Ano afaamano a piaifo ē ato ināpaoni. Askatari ano fakamano, ē ato ināpaoni. Ē ato xinia ranā askafafiaino ea nikakasapaonifo. ¹⁰ Nāskakē ē atoki ōitifishkini. Nāskakē ē yoini iskafakī: “Ea nikatamaroko āto ōiti mēraxō afara chaka shināmiso. A ē ato shināmapaiyai keskarakai tsōa nikafoma.” ¹¹ Nāskakē ē atoki ōitifishkikī ē atoōnoa yoini iskafakī: “Na israelifāfe ea nikakaspakani. Nāskakē a ē ato inimamapaiyai keskafakī ē ato axopakenakama,”

ixō Epa Niospa nōko xinifoōnoa yoini.

¹² Efe yora mīshtichi, ōisharakāfe. Nōko xinifo keskara iyamakāfe. Māto shinā mēraxō mā Jesús chanīmara fayamax chakakōi mā itiro. Mā askaikai nā Nios nīpanakāfe mā ipanakama. ¹³ Askatamaroko pena tii yoinōnāsharakī inimama faatanākāfe nōko Ifoxō shināsharakōixikakī. Afara chakafāfe noko pāratirofoki nō chakafanō. Akka nō nikaxō nō anā shināsharatiroma. Nōko ōiti chakakōi itiro. Nāskakē ato nikayamakāfe. ¹⁴ Akka nō taefakī Jesús chanīmara fakōini keskafakī eneyamax nō afe ipaxatiro. ¹⁵ Akka nā kirika keneano iskakī ē mato yoinō,

Epa Niospa mato yoiyai keskara fisti nikasharafāikāfe. Māto xinifāfe Epa Nios nikakaspakakī āto ōiti kerexkōi fapaonifo. Nāskakē ato keskara iyamakāfe. Māto ōiti kerex fayamakāfe. Nāskax nikayospa iyamakāfe, ixō Niospa meka yoiķi kenenifo.

¹⁶ Akka, ŷtsoafo Niospa tsekanimē Egipto mai anoa āfe meka nikakaspakakī kachikiri faifono? Akka keyokōi nōko xinifo Moisés Egipto mai anoa iyoni. Nāfāfe Nios nikakasapaonifo. ¹⁷ Akka, ŷtsoafoki Epa Nios ōitifishkinimē cuarenta xinia mā akax? Nā nikakaspaanā afara chakafaifoki ini. Nāskakē Epa Niospa tsōa istoma anoxō keyokōi ato namapakeni. ¹⁸ Akka, ŷtsoafo Niospa yoinimē iskafakī? “A ē mato inimamapaiyai keskafakī ē anā askafapanakama,” ixō yoini. Akka nā nikayospafo ato yoiķi askafani. ¹⁹ Akka Epa Nioskai tsōa chanīmara fanima. Nāskakanax a Niospa ato imapaiyai ano tsoa ikinima. Nāskakē tsōa anoxō tenenima inimayanā.

4

¹ Akka Epa Niospa noko yoiyoni iskafakī: “Mā ea Ifofaino ē mato anā inimamatiroma. Akka mā ea Ifofayamakē ē mato inimamatiroma,” ixō noko yoiniki. Nāskakē keyokōichi nō Ifofanōkāfe. ² Epa Niospa noko yoiya: “Ē mato ifipai,” noko fani. Nāskarīfakī Epa Niospa nōko xinifo yoiķi iskafani: “Ē mato ifipai mato inimamapaixikī anā mā fekaxtenōma,” ixō ato yoini. Ato askafafiaino tsōakai nikasharanima. Kaxpakōi Epa Niospa ato yoini. ³ Akka Niospa Moisés shināmanaino iskafakī kirikaki kenekī yoini:

Ea nikayamaifono ē atoki ōitifishkikī. Nāskakē ē ato fāsikōi yoiya iskafakī: “Mā ea nikayamaino ē mato mai shara fetsa ano imapakenakama anoax mā isharanō,” ixō ato yoini. Akka Epa Niospa keyokōi onifani. Mā keyokōi askafakī fetsaxō teneni. Nāskafakīri Niospa fichipai afe yorafo isharanōfo anā fekaxteyanōfo. Iskaratīari afe yorafo isharamapai afe isharapakexanōfo. Akka nōa nō Nios chanīmara faino, Epa Niospa noko ifisharai nō inimapakexanōfo. ⁴ Akka kirikaki Moisés keneni pena tenetiōnoa yoiķi. Iskafakī keneni:

Seis nia yonokī Epa Niospa keyokōi onifani. Nāskaxō pena fisti teneni, ixō keneni. ⁵ Askatari anā kirikaki keneni, iskafakī yoiķi:

Efe isharapakenakafoma, ixō kirikaki kenekī yoini.

⁶ Askafiano ranāri afe isharapakenakafo. Akka nā Niospa meka nikaspaifo afe ipanakafoma. ⁷ Nāskakē Niospa shināmanainori chipo David kirika kenekī yoini iskafakī:

Iskaratīa Niospa meka nikakī mato shināmā shināsharakāfe. Anorima shinākakima, ixō David yoini.

⁸ Mā Moisés naano, Josué israelifo iyoni Canaán mai ano isharanōfo. Nāskaifono Niospa iskafakī yoini: “Nā ea Ifofafo efe nai mēra isharapakenakafo,” ixō yoini. ⁹ Nāskakē mā nō tāpia nō Ifofaax, nō afe isharapakenaka. Epa Niospa afe yorafo inimamasharapai isharapakexanōfo. ¹⁰ Epa Niospa keyokōi onifaxō inimayanā teneni. Nāskarīfai nō Epa Nios ano kaax a nō iyopaoni keskara nō anā itiro, Niospa noko inimamasharakōiaino. ¹¹ Akka fekaxfiano nō Nios Ifofakōitiro afe isharapakexakī. Akka nōko xinifāfe nikayamaito Epa Niospa ato mai shara ināpaifikī ato inānima. Nāskakē nōri ato keskara ipaima.

¹² Epa Nios nīpanaka. Nāskarīfai āfe meka keyonakama, mitsisipakōi. Akka keno ikikōichi nami potexō āfe xaki mēra nō ōitiro. Nāskarīfai Epa Niospa meka fāsi finakōia. Āfe meka shara nō mēra ikano aōxō nō tāpitiro nō shara ikamāki askayamai nō chakamāki. ¹³ Epa

Niospa keyokōi tāpia nō ōtatiroma. A nō afara shināxō nō amis keskara keyokōi tāpikōia. Akka nōri tāpia a nō amis keskara. Nāskakē nō Nios pāratiroma.

A Nios ato kīfixomisfo Jesús ato finōkōia

¹⁴ Akka Jesúsfi Niospa Fakekī. Askatari noko Nios kīfixomis. Nāatofi a Nios ato kīfixomisfo finōkōiaki. Nāskax nai mēra Nios ano kani. Nāskakē nō kachikiri fatiroma nikakōisharayanā. ¹⁵ Nāatori meemis a Satanás noko afara chakafamapaiyi keskara. Nāskakē nāato tāpia a nō meemis keskara fekaxkōi. Akka Satanás Jesúsri afara chakafamapaini. Nāskafekē Jesús nikanima. Nāskakē nokori axotiro. ¹⁶ Nāskakē nō Nioski ranokima nā nō yoipaiyai keskara nō yoitiro. Nō yoiaito Niospa noko noikī noko afara axosharatiro.

5

¹ Ē mato yoinō afeskax ato Nios kīfixomis xanīfo itirofomāki. Nā Niospa ato katoato nāato noko kīfixonō. Nā Niospa katoa noko keskara yorari itiro. Nāfi Nios noko kīfixomis xanīfo itiro. Nāskakē yorafāfe Epa Nios aicho fakakī a Nios ato kīfixomisto āfe xanīfo afara ināmis atori Nios inānō. Askatari yorafāfe āto chaka soapaikakī nā yoinā ina fexomisfo retexō ato koofaxonō Epa Niospa āto chaka ato soaxonō. ² Akka nāri noko keskarari nāatori afara chakafatiro. Nāskakē tsōa tāpisharayamakī, shināsharakima afara chakafaino, nā xanīfāfe tanaima isharaxō ato axosharatiro. ³ Nāskaxō yorafāfe nā yoinā ināfo ināino nāato retexō koofakī Epa Nios ato kīfixomis Epa Niospa āto chaka ato soaxonō. Nāskatari āri āfe yoinā ina retexō koofamis ari Epa Niospa chaka soaxonō, a noko axomis keskafakī. ⁴ Akka ākai tsoa katometiroma Nios ato kīfixomis xanīfo ixii. Nios fistichi ato katotiro Aarōn ani keskafakī. ⁵ Nāskarifiāi Cristo aari katomenima Nios ato kīfixomis xanīfokōi ixiki. Akka Apa Nios fistichi yoini iskafakī:

Mī ēfe Fakekōi. Nāskakē mī fisti āto xanīfo finakōia ipanakaki, ixō yoini. ⁶ Askatari anā iskafakī yoini:

Mīfi ato Nios kīfixomis xanīfo ipanakaki, nā xanīfo Melquisedec ipaoni keskara, ixō Apa yoini.

⁷ Jesús nono mai ano ikax, mā chaima naxiki omiskōikōini. Nāskaxō fāsikōi mekayanā oiāyanā Apa kīfīni iskafakī: “Epa, mī keyokōi tāpia. Ea mā ifipaikī ea mā ifitiro ē nanōma,” ixō yoini. Mēxotaima nā Āpa amapaiyai keskara fisti shināki Jesús āfe Apa nikakōini. Nāskakē āfe Āpa tenemakōini axosharakōiyanā omiskōiaino. ⁸ Akka Jesús Niospa Fakekōifiax omiskōini. Omiskōifikī Apa nikakōini. ⁹ Nokoōnoax omiskōifikī Apa Niospa yoiai keskara nikakōini. Nāskaxō a nikaifo ato ifipakexakī. Nāskax noko ifimis sharakōi imis. ¹⁰ Epa Niospa āfe Fake Jesús katoxō yoikī iskafani: “Mīfi nā Melquisedec keskara ikikai. Nāskakē a ea ato kīfixomisfāfe āto xanīfokōi mī ipanakaki ato ikipakexakī. Nāskaxō a eōnoa ato kīfixomisfo xanīfofori mī ato finōkōinifōfanakī,” ixō Āpa yoini.

Ōisharakōikāfe. Mā Jesús kachikiri faa fāsi mesekōi itiroki

¹¹ Ē mato yoia Epa Niospa Jesús katoa a noko Nios kīfixomis afe xanīfo finakōia ixii. Akka nāōnoa ē mato fetsa yoisharapai. Nāskakē ē mato anā yoisharatiroma māmāi fenāmāshta tāpiaino. ¹²⁻¹³ Akka mā Niospa meka nikakī mā mā xinia ranā aka. Nāskakē tāpikōixō mā ato yoikerana. Akka mākai tāpisharama. Akka a mā taefakī Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaima keskarakōifo, mā. Akka fake yomēkai afaa piyotiro. Nāskarifiakī māri Niospa meka tāpisharaima. Nāskakē mā tāpiama fato sharamākī fatofori chakamakī. ¹⁴ Akka nō pena tii Niospa meka ōifafākī nō tāpikōiax isharakōitiro māmāi nō tāpiax fato sharamākī, fatofori chakamakī.

6

¹ Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa ē mato yoipai a ē mato yoiyomis keskara anā ē mato yoima. Mā nō tāpia a nō afara chakafamis. Nāskakē nō rāfikōiyanā noko chaka shināmakitiro. Nāskaxō nō Nios Ifofaino noko chaka soaxotiro nō afe ipaxanō. ² Mā nō tāpia noko fētsa maotisafaino keyokōi tāpitirofo mā nōmāi Nios Ifofaino. Askatari nō tāpia noko Nios Kīfixoyanā āto mīfi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoxiai. Akka a Jesús nikakaspamisfo Niospa a omiskōipakenakafo mēra ato potaxii. Nāskakē nāfo mā nō tāpikōia. ³ Nāskakē a Niospa fichipaiyaino afara fetsafori nō tāpitiro.

⁴ Nāskakē nō Jesucristoōnoa meka shara nikaxō chanīmara faax mā naax Nios fe nō ipaxatiro. Nāskatari Niospa Yōshi Shara noko fe iki. ⁵ Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo noko famapai afara sharafo nō atiro, āfe Yōshi Sharaōxō. ⁶ Nāskakē keyokōi nō afo tāpifixō nō Niospa

Fake kachikiri faxō chakafakī mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiro. ⁷ Akka ē mato yoinō nikakapo. Oi ikaino mai mehanatiro. Nāskakē tare anoax fanafo foaisharatiro. Nāskakē a tare yonomisfo iniatirofo fanafo foaisharaino Niospamāi imasharaino. ⁸ Akka nā tare fetsa chaka anori oi ikaino, fanasharafa foaitiro. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakī fetsa Niospa meka shara nikafafāifikī Nios chakafakī mekafaito nā keskarafō Niospa nā omiskōipakenakafō mēra potaxii. Nō tare shara keskarakē Epa Nios nokoki iniatiro. Akka nō tare chaka keskarakē Epa Nios nokoki iniatiro. Nāskakē noko omiskōimaxii.

Akka mā nō tāpia nō Jesús chanīmara faax nō isharakōitiro

⁹ Efe yora mīstichi, mē matoōnoa tāpisharakōia. Mākaī ato keskarama. Akka Jesús Ifofaax oa mā fāi kai keskara mā Nios ari kai. ¹⁰ Akka Epa Nios sharakōi. Afaa chaka shinānismā. A mā sharafamis Epa Niospa tāpia, shināmakima. Askatari mā Nios noikī a chanīmara famisfo mā ato axosharamis. Nāskakē Epa Nios shināmakima. ¹¹ Akka Epa Nios kachikiri faxoma a mā akai keskararifikī, ato sharafakī mēxotaima Ifofasharakōikāfe, “Nioski nokoaitia nō afe isharapakexakī,” shinākōikī. ¹² Akka Epa Niospa meka shināmakiyamakāfe. Epa Niospa fetsafo yoini iskafakī: “Mā ea Ifofakī mā ea manasharaito ē mato afara shara ināxii,” ixō ato yoini. Nāskarifiakī māri manasharakāfe, Jesús kachikiri faxoma. Māri afara shara fixikakī.

¹³⁻¹⁴ Niospa nōko xini Abraham yoyoni iskafakī: “Ēkīa mī Nios. Ea tsōa finōtiroma. Ramashara ē chanīmismā. Ē mia yoinō mī tāpisharakōinō. Ē mia axosharakōikai mī fenafo ichapakōi inōfo. Akka mīkai ato tanātiroma mī fenafo mī fenafo mī ichapakōikē,” ixō Niospa Abraham yoyoni. ¹⁵ Nāskakē Abraham fena fenakima manakōipaoni. Nā Niospa yoyoni keskarakōi fakī Abraham āfinī fake finī. Āfe fake Isaaca. ¹⁶ Akka fetsa noko yoiikī iskafatiro: “Ē mia pāraima ēfe xanīfāfe mā ea ōi. Nāskakē nā ē mia yoiakī keskara ē mia axoxii,” ixō noko yoiitiro. Nāskakē nō tāpitiro nokokairoko pārāito. ¹⁷ Nāskarifiakī Niospa noko tāpimapai āfe meka chanīmakōi. A noko yoyoni keskara afeskaō anā fetsafatiroma. Nāskaxō ato yoini iskafakī: “Ē Nioskōi. Tsōakai ea finōtiroma. Nāskakē nā ē mato yoiakī keskafakī mā ea chanīmara fatiro,” ixō ato yoini chanīmara fanōfo. ¹⁸ Chanīma Niospa a noko yoyoni keskara mā noko ōimasharakōia mā nō tāpia. Nāskakē noko pāratiroma. Noko yoini iskafakī: “Ēfe Fake ē matoki nīchixii māto chaka mato soaxonō mā efe Īpaxanō,” ixō noko yoini. Nāskakē nō chanīmara fai nā noko yoyoni keskara āfe Fakeōnoax Epa Nios ano nō afe ipaxatiro. ¹⁹ Nāskaxō anā afaa fetsa nō shinātiroma. Nios makinoakai tsōa noko potatiroma. Nāskakē Epa Nios fe nō ipanaka. ²⁰ Jesús nai mēra kani nō aōnoax čipo kanō. Nārixō xanīfokōixō noko Apa Nios kīfixōfāfāini Melquisedec ipaoni keskaraxō.

7

Nā Melquisedec yorafo Nios kīfixomis ipaoni

¹ Akka Melquisedecnoa ē mato yoinō afe keskara ipaonimāki. Melquisedec xanīfo ipaoni pexe rasi āfe ane Salem anoax. Askatari ato Nios kīfixomis ipaoni. Nā cuatro xanīfofo yometso chakafo ato ichoxō Abraham āfe pia ifitani, afama mīstifoya oaino, nā Melquisedec Abrahamki nokoni. Nāskata Melquisedec Abraham Nios kīfixoni axosharanō. ² Askafaito ōiki Abraham Melquisedec nā afama mīsthi fitanai ranāri ināni. Nā Melquisedec āfe ane “Asharakōimis,” famisfo. Nā Salem pexe rasi anoax xanīfo ipaoni. Nā Salem āfe ane “Isharakōi,” fapaonifo. ³ Nā Melquisedec āfe epa yafi āfe efa nō tāpīama. Āfe xiniforikai nō tāpīama. Askatari nō tāpīama a fake kāinitia. A naniitāri nō tāpīama. Nāskakē nō Melquisedec shinākī Niospa Fakeri nō shinātiro. Nāato noko Niosnoa kīfixomis xanīfo ipanaka.

⁴ Efe yora mīstichi, shinākapo. Melquisedec xanīfokōi ipaoni tsoa keskarama. Akka Abraham israelifāfe taefenai ato xini iyopaoni. Abraham sharakōi ipaoni. Askafixō Abraham Melquisedec afama mīsthi ināni āfe afaayamafekē. Akka Melquisedec xanīfo finakōia ini Abraham sharafano. ⁵ Israeli xoko fetsafo Levi āfe fenafo Epa Niospa katonī. Nāfāfe āto kaifo Epa Nios kīfixopaonifo. Nāskakē Moisés yoini keskafakī nā ato Nios kīfixomisfo kori fisti rasi ato ināpāonifo. Askatari āto afama mīstifiro ato inānifo āto kaifāfe. ⁶ Akka Melquisedec Levi āfe fenayamafiano Abraham āfe afama mīstififo fetsa fetsatapafō ināni. Nāskakē Melquisedec Abraham yoini iskafakī: “Abraham, mia Niospa axoshara,” ixō yoini. ⁷ Chanīma, keyokōi nō tāpikōia fetsa ato finōkōixō āfe mekapa ato shara fatiro. Nāskakē nō tāpia Melquisedec Abraham finōkōia. ⁸ Nāskakē nā israeli xoko fetsafāfe nā Levi fenafo afama mīsthi ato ināfinifono nāfo mā nai keyonifo. Akka Melquisedec Abrahamnā afama mīsthi finī. Akka Niospa meka yoiikī kenenifo Melquisedec iskaratīa nia keskara. ⁹⁻¹⁰ Levi fenafāfe āto xini Abraham ipaoni. Nāskaxō Abraham Melquisedec afarafo ināino Levifāfe akairi ināi keskafanifo. Nō tāpīama afetiara nani. Nāskakē nia keskara nō famis. Nā

Abraham Melquisedec afarafo ināitīa Abraham āfe fena Leví anokai fakeama ini. Chipō Leví fakeni. Nāskakē nō tāpitiro Melquisedec fistichi āto xini Abraham yafi ato finōkōia.

¹¹ Efe yora mīstichi, shinākapo. Epa Niosxō Moisés noko yoini keskakafā Leví fenafāfe noko Nios kīfixomisfāfe noko ifitirofono Niospa āfe Fake nīchikeranima Apa Nios noko kīfixomis inō. Cristokai Leví āfe fena Aarón keskarama. Nā Cristo Melquisedec keskarakōi. ¹²⁻¹⁴ Akka tae fena Leví āfe fena Aarón ini. Nā Aarón yorafo ato Nios kīfixomis ini fetsafāfe āto xanīfo. Akka nōko Ifo Jesúska Leví āfe fenama, xoko fetsa ini. Nāskax Aarón keskarama. Akka nōko Ifo Jesús Judapa fena. Nā Levīpa chipoko Judā. Akka, “Judapa yorafāfe yorafo ato Nios kīfixomisfo itirofora,” ixō Moisés yoinima. Askafiano Niospa āfe Fake Jesús nīchini yorafo ato Nios kīfixomis inō. Nāskatari a Moisés yoini keskara Epa Niospa fetsafani.

¹⁵ Nāskakē anā ē mato mēstekōi yoisharapai. Iskaratīa xafakīakōi nō tāpishara Nios afara fetsa yoini keskara noko Nios kīfixomis āfe fena Jesús, Melquisedec keskara nokoki nokoni. ¹⁶ Akka Moisés yoini keskarakōi Leví āfe fenafo fisti ato Nios kīfixomisfo itirofoki. Jesúska Leví fenaxoma a Moisés yoini keskarānoax noko Nios kīfixomis itiroma. Askatamaroko Niospa Jesús katoni noko kīfixomis inō. Āfe sharaōxō Epa Niospa Jesús otofani. Anā nanakama. Nāskax noko Nios kīfixomis ipanaka Niospa sharaōxō. ¹⁷ Nānori Niospa yoyoini David Jesucristoōna kenekī iskfani:

Mī Melquisedec keskara. Nāskaxō mī yorafo Nios kīfixomis ipanaka, ixō keneni. ¹⁸⁻¹⁹ Nāskakē a Moisés yoini keskarakai nō anā ifofaima. Nokokai imasharatiroma. Askatari nōko chaka noko soaxomisma nō Nios fe īpaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nīchini aōnoax nō āfe ipanaka.

²⁰⁻²¹ Akka Epa Niospa āfe Fake yoini keskakafāka Leví āfe fenafo anori yoinima. Niospa yora shināmanaino iskara keneni, Niospa āfe Fake Jesús yoikī iskfani:

Na meka ē mia yoiai chanīmākōi. Nāskakē ē anā fetsapakenakama. Ē yorafāfe āto Ifokōi. Nāskakē a ē mia yoiai keskakafā yorafo mī ato ea kīfixomis ipanaka,

ixō Epa Niospa āfe Fake yoini. ²² Akka Apa Niospa nānori yoinikē nō tāpitiro Jesúsnoax Nios fe nō ipaxatiro. Akka Moisés meka askarama. Aōnoax Niospa yorafo nō itiroma. Akka Epa Niospa Moisésxō Leví āfe fenafo yoini keskara sharafiano akka āfe Fake Jesús yoini keskara sharafinakōia.

²³ Akka a āto kaifo ato Nios kīfixomisfo ichapafofiax afo natirofo. Tsoa nīpaxatirofoma. Mā fetsa nano fetsari katotirofo atori āfe yorafo Epa Nios kīfixomis inō. ²⁴ Akka Jesúska ato keskarama. Nāfi nīpanakakī nāato noko Epa Nios mēxotaima kīfixomis ipanaka. ²⁵ Nāskakē Apa Niosxō noko ifitiro nō āfe ipaiyaito nokoōxō Apa Nios yoifafāini iskfakī: “Epa Niosi, ē ato nāxoniki, āto chaka soaxōfe. Nāskaxō a mī ika ano ato imafe,” ixō nokoōxō Apa yoisim. Nāskakē a nokoōnoa Apa yoia keskakafā noko nāskakōi faxoxii nō āfe īpaxanō. Nāskaxkai nō fenopakenakama.

²⁶ Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia. Tsōakai aōnoa afaa chaka yoitiroma. Aatokai afaa chaka shinānīmīma yora chakafo keskarama. Nāskaxō Apa Nios ika anoafori ato finōkōia. Nāskaxō a nō yopaifo noko axosharatiro. ²⁷ Akka a ato Nios kīfixomis xanīfo fetsafo keskarafoma. Taefakī afāfe pena tii yoinā ina retepaonifo Epa Nios inākakī ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafinōfo, atori Epa Niospa chaka soaxonō. Akka Jesúska ato keskarama. Jesús ato finōkōia. Nāskakē Jesús nai fistini noko chaka soaxonano Epa Nios fe nō ipaxatiro. ²⁸ Akka Epa Niosxō Moisés yoini keskakafā yorafoōnoa Epa Nios ato kīfixomisfo inōfo āto xanīfofo katoni. Akka nāfofi noko keskarafori nāfāferi afara chakafamisfo. Nāskakē Niospa yoyoini keskakafā āfe Fake Jesús chipō katoni nokoōxō Nios kīfixomis īpaxanō. Aatokai afaa chakafamisma. Isharakōimim.

8

Epa Niospa meka fenasharakōi yoini Jesús noko nāxonō nōko chaka noko soaxoxii

¹⁻² Akka nā sharafinakōia nō yoiai nāfi Apa Nios xanīfokōi ika ari āfe ikakī. Nāskakē nō afara yoipaiyaito nokoōxō Apa yoipakenaka. Nāatofi noko Apa Nios kīfixomis xanīfokōikī. Nāskakē a ika arikai tsōa afaa fetsa onifanima. Akka Nios fistichi onifani. Nāskakē ariax Apa fe nokoōnoax mekakakāini. Nā ika ari nai mēra anoa a anoxō Nios kīfiti pexefā keskarakōifiax finakōia. Nāskakē nā ē mato kenexona keskara xafakīakōi mā tāpitiro.

³ Nā ato Nios kīfixomis xanīfokōi inōfo Niospa ato katoni afarafo yorafāfe Nios inākata finōfo. Askatari yoinā inafō fixō retexaxō koofaxō ato kīfixonōfo āto chaka ato soaxonō Niospa ato katoni. Nāskakē nā Jesús, noko Nios kīfixomisto, nāatori Nios ināni. Yoinā ina inānima. Askatamaroko āa noko nāxonī nōko chaka noko soaxoxiki. Āfe Āpa amapaiyai keskara ani. ⁴ Moisés yoini keskakafā Leví āfe fenafo israelifāfe ato Nios kīfixomis itirofo

yoinā retekaxō ato Nios ināxoxikakī Niospa ato chaka soaxonō. Akka Jesúskaí Leví áfe fenama. Nāskakē Jesús nono mai ano ixō nokoōxō Apa Nios kífimis ikeranama. Akka nai mēra ixō noko kífioxomis, Niospa ato katoano. ⁵ Akka nono mai anoxō nā Leví fenafāfe a anoxō Nios kífiti karapa pexe mēraxō yonopaonifo. Nānoxō áto kaifo israelifo tāpimapaikakī Nios ika ari afe keskarāmākī tāpinōfo. Askafixō askarakōi tsōa tāpiyonima. Nāskakē Epa Niospa Moisés yoini iska fakāki karapa pexe fayomanō: “É mia yoiāi keska fakāki a anoxō ea kífiti karapa pexe fafe. ¿Mā mī shināimē ē mia machi anoxō tāpimama keskara nāskakōi fafe karapa pexe fakī? Nāskakē a yonomisfo tāpimafe nā ē mia yoiāi keskarakōi fanōfo,” ixō Epa Niospa Moisés yoini. ⁶ Akka Niospa áfe Fake Jesús yoini keskarato a Moisés yoini keskara finōkōia. Nāskakē Jesús Apa ika arixō nokoōxō Apa Nios kífifāini. Akka Leví fenafāfekai askafapaonifoma. Epa Niospa áfe Fake Jesús yoiyoni keskarakōi ato yoiomisma. Akka nā ato yoiyoni keskara sharafiano nā áfe Fake Jesús yoini keskararoko sharafinākōia.

⁷ Niospa Moisés yoini keskara nō nikasharakōixō nō afara chaka nō fakeranama. Akka nō nikasharakōima. Nāskakē Epa Niospa aōxō noko ifitiroma. Nāskakē noko fetsa yoini iska fakāki: “Éfe Fake ē nīchixii mato nāxonō mato chaka soaxonō. Mā Jesús Ifofaino ē mato ifixii,” ixō Epa Niospa yoini. ⁸ Akka Epa Niospa Moisésxō yoini keskarakai tsōa askara nikasharakanamax nōko xinifo nikayospakōi inifo. Nāskakē nōko Ifo Niospa yoini iska fakāki:

É chipo na efe yorafo israelifo yafi Judapa áfe fenafo meka fena shara ē ato yoixii. Nā ē ato sharakōi axōai keskara ē ato oimaxii. ⁹ É áto xinifo Egipto anoa iyoni. Nāskaxō ē ato yoisharani éfe meka nikasharaifāfe ato kexesharafafāixikī. É ato yoisharafaino éfe meka kachikiri fanifo. Nāskakē ē ato potani. Akka a áto xinifo ē ato yoini keskarakai ē áto fenafo askara ē yoixiima. Askatamaroko éfe meka fena shara ē ato yoixii ea nikasharanōfo. ¹⁰ A ē israelifo yoixiaí kene fistiōxō ē ato tāpimaxima. Askatamaroko áto shinā mēra éfe meka shara ē nanexii áto oiti mēraxō a kirika kenea keskara sharaōxō shināsharanōfo. Nā ē ato yoiāi keskakōixii shināsharaxikani. Nāskakē ē áto Epa Nioskōi ixii. Akka afo efe yorafo ixikani. ¹¹ Akka anā fisti rasichí ato tāpimaxikanima. Keyokōichi ea tāpixonima. Yorafo afamafāferi ea tāpiaifono, xanīfofofāferi ea tāpikōixikani. Nāskakē anā eōna tsōa ato tāpimaxima akōi keyokōichi mā ea tāpikōiafono. ¹² É ato chaka soaxoxii afara chakafafāiaifāfe. Nāskaxō a afara chakafamisfo ē anā shināpakenakama, ixō Niospa yoini. ¹³ Nāskakē Niospa anā ato yoini iska fakāki: “Meka fena shara ē mato yoinō,” ixō ato yoini. Akka a Moisés ato yoini keskarakai anā tsōa shinātiroma. Nā Moisés ato yoini keskara meka xinikōi. A mekakai anā tsōa shināpakenakama. Nāskakē nā meka shināmakipakenakafo.

9

Karapa pexe kene fetsa mēraxō Epa Nios ato kífioxopaonifo. Akka iskaratīa Jesús noko kífioxomis Apa Nios ika arixō

¹ É mato yoinō afe keskara yorafo ipaonifomakī. Akka Epa Niospa Moisés yoini afeska xō nono mai anoxō áfe yorafo ato Nios kífixotirofomākī Niospa ato chaka soaxonō. Akka karapa pexe fanifo a mēraxō Nios kífinofo. ² Akka a karapa pexe fanifo mēra kene rafe ini. Nā kene rekētana mēra siete rāpari oro otatia metax keskara ini. Askatari mīsari a mēra ini. Nā mīsa kamakī mēxotaima doce pāa fapaonifo. Nā kene rekētana anenifo iska fakakī: “Nios chaimashta ika,” ixō anenifo. ³ Akka karapa pexe fanifo mēra sama namikōi nakirafekōi potexō xītia ini. Nā kene chikaya anenifo iska fakakī: “Nono Nios ikōina,” ixō anenifo. ⁴ Nā kene rekētana ketaxamei mīsa kafāshara oroya taxa fanifo ini. A kamakixō nakas potoshara kooati ipaoni. Nāskatari kene chikaya fetsa mērari kafo oroya taxtafanifo ini. Nā kafo mēra pāa keskara áfe ane mánā kecho oro mēra nanea ini. Akka Aarón áfe chatiri nā kafo mēra naneyoamano Niospa nā Aarón áfe chati charofo onifayoni. Nāskata Aarón áfe chati chipo kafo mēra naneni. Nāskatari Niospa Moisés áfe meka makexki kenexō ināni nikanōfo. Nā makex para Niospa mekaya nā kafo mēra nanea ini. ⁵ Nāskakē nā kafo māmākīa Niospa áfe ājiri keskara raferi nia ini. Áto peta rafeta kafo fepoafō keskara ini. Nāskakē nā Niospa áfe ājiri keskara rafeoxō nō tāpitiro Nios fāsi sharakōikē nōko chaka noko soaxomis. Askafiano akka nafaōnoakai ē mato iskaratīa yoitiroma.

⁶ Nāskakē nā Nios kífiti karapa pexe kene rekētana mēra a ato Nios kífioxomisfo mēxotaima ikipaonifo anoxō nakas potoshara koofaino ato Nios kífioxoxikakī. ⁷ Akka a kene fetsa mērari tsoa iktiroma ipaoni. Nā ato Nios kífioxomis xanīfo finakōia fisti ikipaoni. Xinia fisti ata ikipaoni. Nāskatari imimais ikipaonima. Yoinā imiya ikipaoni nā imi Epa Nios ināxikī áfe chaka soaxonō, askatari afe yorafori ato chaka soaxonō. ⁸ Nāskakē Niospa Yōshi Sharapa xafakīa noko tāpimani. Akka nā karapa pexe iyoano áfe kene fetsa mēra tsoa ikipaonima. Nā ato Nios kífioxomis xanīfokōi fisti ikipaoni Nios fe mekakiki. Yorafo Epa

Nios fe mekayoxoma, Nios ato kifixomis xanifo fisti yoiyopaonifo. ⁹ Nāskakē nā ipaonifoñoa iskaratīa noko shināmatiro Moisés ato yoini keskafakī. Karapa pexe ano yoinā ina retexō ināpaonifo Niospa āto chaka ato soaxonō. Askafikanax isharapaonifoma afara chakafakaxō shinātaifapaonifo. ¹⁰ Akka Moisés ato yoini keskafakī a ato Nios kifixomisfāfe nāskakōi fanifo. Nāskaxō afara shara fetsafari ato tāpimani Moisés meka. Afara pita, afara ayata mā fatiro ato fani. Askatari afaari mā pitiroma, afaari mā ayatiroma ato fani. Askatari ato tāpimani afeskax mechokometirofomāki Epa Niospa ato nikakōinō. Akka askafiaifono afāfekai ato chaka soaxokōitirofoma. Cristo oyoamano nānori Niospa ato yoiyoni. Nā Cristo naitā aōxō keyokōi Niospa fetsafani. Nāskakē nō Jesús Ifofaino, Niospa nōko chaka noko soaxotiro. Nāskakē a Moisés yoini keskara anā tsōa ifofasharatiroma āfe chaka soapikī.

¹¹ Akka Cristo mā anā nai mēra kaax, noko Nios kifixomis xanīfokōi ini. A Niospa noko yoiyoni keskara noko ināmis. A karapa pexe anoxō a ato Nios kifixomisfāfe ato Nios kifixopaonifo yorafāfe anifo. Akka Jesús noko kifixomis ano sharafinakōia Nios fistichimāi nai fanino. ¹² Akka Cristokai karnīro imi fota fakka fakeshtari fonima. Askataroko nokoōnoax nakī āfe imi foax ikisi Apa Nios ari kani. Nāskaxkai anā Jesús nanakama. Nāskaxō nōko chaka noko soaxonano āfe Apa Nios ari nō katiro. ¹³ Akka chanīma, karnīro yafi fakka retexaxō āfe imi fikaxō nā karnīro koofakaxō āfe chii mapoya nā imi osikaxō saa saa anifo Epa Niospa ato chaka soaxonō anā choshta keskara iyamanōfo. ¹⁴ Akka Cristokai afaa chakafamisma. Nāfi sharafinakōia. Niospa Yōshi Shara a nīpanakato Jesús shināmani. Nāskakē Apa yoini iskafakī: “Epa, ē atoōnoax naikai. Nāskakē ēfe imi foano eōxō mī āto chaka soaxotiro mefe yorafo inōfo,” ixō Apa yoini. Akka a nō Nios inimamapaikī nō shināpaoni keskara nō anā shināima. Akka iskaratīa nō Nios inimamapaikī nō nikasharakōitiro. Nā Nios nīpanaka sharafinakōia.

¹⁵ Akka a Moisés ato yoini keskara sharafiano tsōa nikapaonima. Afara chakafapaonifo. Nāskakē nā afara chakafapaonifo keskara Cristo fistichi ato chaka soaxotiro. Akka a Moisés yoipaoni keskara anā ato yoitiro. Nāskakē Cristo oni nokoōnoax naiyoi nōko chaka noko soaxoxiki nō Nios fe ipaxanō. Nāskakē Niospa noko yoini iskafakī: “Ekeki fekāfe ēfe Fakeōnoax efe yorafo ixikakī,” ixō noko yoini. Nāskaxō a noko yoiyoni keskara noko ināxii. ¹⁶⁻¹⁷ Iskaratīa afara fetsa ē mato yoinō mā tāpinō. Nō nayoxoma nō yoitiro iskafakī ato yoiikī: “Ē naano tsōa ēfe afafo fiimākai ikisi ē mato tāpimayonō,” ixō nō yoitiro. Nāskakē nā nō yoiyomis keskafakī nō nayoxoma nōko afafo fetsafo ināpaikī nō yoitiro. Akka nō nayoamano nōko afafo tsōa fena fitiroma. ¹⁸ Nāskakē Niosxō Moisés afe yorafo yoini āto yoinā inafō reteafiono imi fonō. Akka a yoinā inafāfe imi foyamaino a ato yoiyoni keskafakī Niospa ato chaka soaxotiroma. ¹⁹⁻²⁰ Taefakī Epa Niospa shināmanaino Moisés israelifo keyokōi ato yoini nikanōfo. Mā ato yoiikī mitoxō, nā ifi hisopo āfe pōya pishta fini. Mā fixō fakka fake imi yafi oveja imi fakkaya osini. Nāskaxō ifi hisopo pōya pishta fixō oveja raniya texkeani. Nāskata nā ifi hisopo pōya pishta texkeata fakka fake imiki momo momo axō nā Niospa meka kirikaki kenea a Niospa yoiyoni keskafakī fakka imi saa saa ani. Askatari yorafokiri fakka imi saani. Ato yoiikī iskafayanā: “Na imioxō mā tāpitiro Epa Niospa noko yoiyoni keskara axii. Nāskax nō afe yorafo itiro,” ixō Moisés āfe kaifo yoini. ²¹ Nāskatari nā karapa pexe a mēraxō Nios kifiti Moisés imī saa saa ani, askatari a mēranoafori keyokōi imī saa saa ani. ²² Chanīma, nā Epa Niospa Moisés yoini keskafakī Moisés imi saakano karapa pexe anofo keyokōi ato chaka soaxona. Akka imi foyamaino noko chaka soaxotiroma. Anā ano fato fetsama nōko chaka noko soaxotiro.

Cristo nōkoōnoax nani noko chaka soaxoxiki

²³ Nā anoxō Nios kifiti karapa pexe mēranoa keskarakōifo Nios ika ari. Nāfoki ato Nios kifixomisfāfe yoinā imi saanifo Niospa afo ōisharanō. Akka a karapa pexe mēranoa imifo sharafiano afāfe nōko chaka noko soaxotiroma. Askataroko nā Cristo nokoōnoax nai fistini nōko chaka noko soaxoxiki. Noko chaka soaxonano Nios ika ari nō katiro, a keskara shara afe ipaxakī. Askatari anokai a anoxō Nios kifiti karapa pexe keskarama. A Nios ika ano sharafinakōia. ²⁴ Akka yorafāfe karapa pexe fanyo anoxō Nios kifinōfo. Nāskakē a mēra a Nios nai mēra ika keskarakōi ipaoni. Akka Cristo mā otox a karapa pexe fanifo mēra ikinima. Askataroko Apa ari nai mēra kani. Nāskakē iskaratīa ari āfe ika noko Apa Nios kifixōfāixiki. ²⁵ Akka nā ato Nios kifixomis xanīfo karapa pexe kene fetsa mēra ares fisti xinia fisti akax ikipaoni a mēraxō Nios kifixiki. Āfe imikōiya a mēra ikitamaroko, yoinā imiya ikipaoni. Akka Cristokai ato keskarama. Akai mēxotāima natiroma, nai fistini Apa Nios ari kaxiki. ²⁶ Akka askakatsaxakī Cristo nokoōnoax nai ranā ranākerana nā Niospa mai onifanichāi. Akka askamisma. Jesús nai fistini ikisi noko keyokōi chaka soaxoxiki. ²⁷ Akka keyokōi nō nai fetsexii. Nō naax keyokōi nō akiki nokoaito noko yoiixi a nō niyoxō amis keskara. Nāskakē a nō amis keskara noko yoiaino nā Jesús Ifofafo tii afe isharapakenakafo. Akka nā nikamisfoma omiskōipakenakafo mēra ato potaxii. ²⁸ Cristo

āari ināmeax noko naxōi fistini. Yora ichapafoōnoax omiskōixō noko nāxoni. Askafiax anā āfe yorafoki oxii, noko ikisharapaxakāi. Nāskakē anā nokoōnoax nanakama noko chaka soaxoxiki. Askatamaroko aōnoax nō isharapakenaka.

10

¹ Niospa Moisés yoini keskarāōxō nō tāpitiro Cristo noko afarasharakōi faxoxiai. Nāskakē nā Moisés ato yoini keskarakai tsoa imasharatiroma. Afia Moisés ato yoini keskakafāki nā xinia tii a ato Nios kīfixomisfāfe yoinā inafō retepaonifo Niospa ato chaka soaxonō. Askatari a Moisés yoini keskaratokai ato imasharamisma Nios fe īpaxanōfo. ² Akka a ato Nios kīfixomisfāfe yoinā inaōxō ato chaka soaxonaifono, tsōa anā akeranama yoinā ina retēkī. Āfe chakaōxō anā shināchakakeranama. Nāskakē anā tsōa yoinā ina retēkeranama. ³⁻⁴ Akka askarama. Nā xinia tii cabra ato retexonaifotia nā afara chakafamis keskara ato shināmapaonifo. Akka yoinā ina imioxō āfe chaka ato soaxotiroma.

⁵ Nāskakē Cristo mai ano fotoyoxoma Apa yoini iskafakī:

Epa, mīkai fichipaima yoinā ina imioxō āto chaka soanōfo. Askatamaroko yorakōi mīa ea onifani ēfe yora ē mia inānō. Nāskaxō yorafoōnoax naxō ē ato chaka soaxoxiki. ⁶ Akka yorafāfekai mia inimamakanima yoinā ina retēkaxō kooakī mī ato chaka soaxonō, ixō yoini. ⁷ Akka anā mē mia yoia iskafakī:

Mē nono mai ano fotoa a mīa amapaiyai keskara ē axiki. Nānorikōi mī meka yoimisto eōnoa yoikī keneyoni,

ixō Cristo Apa yoini. ⁸ Efe yora mīshtichi, shinākapo. Cristo Apa yoikī taefani iskafakī: “Epa, mīōxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafō retēkāfe āfe imi foano aōxō Niospa mato chaka soaxonō,’ ixō ato yoini. Akka a yoinā retēxō koakaxō mia ināifāfekai afāfekai mia inimaima,” ixō Apa yoini. ⁹ Nāskaxō anā yoikī iskafani: “Epa, ē nono mai ano ē fotoni a mīa amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mī Niospa fetsafaa. ¹⁰ Nāskakē a Apa amapaiyai keskai Jesucristo āari ināmeni noko nāxoxikī aōnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

¹¹ Akka a atoōxō Nios kīfixomisfāfe pena tii yoinā ina retepaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma. ¹² Akka Jesucristo mā noko nai fistixoni noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoōnoax naax Apa Nios ari kani ariax afe xanīfokōi ikikai. ¹³ Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfokinōia ixii. ¹⁴ Nāskakē āarifi ināmei fistixō noko nāxoni noko chaka noko soaxoxiki. Nāskaxō nō Ifofaax a keskara shara nō ixii. Nāskakē Niospa anā afaa chaka nokoōnoa ōipakenakama. Nāskakē nōri a keskara sharakōi ixii.

¹⁵⁻¹⁶ Nānori Niospa Yōshi Sharapa noko yoiyoni iskafakī:

Efe yorafāfe, ea Ifofaifono āto shinā mēra ēfe meka ē nanexii āto ōiti mērari a ēfe meka kenea keskara ē faxii ea Ifofasharanōfo,

ixō yoini. ¹⁷ Nāskaxō anā yoikī iskafani:

Mā ea Ifofaino ē anā shināpakenakama a mā chakafamisfo, ixō Niospa Yōshi Sharapa yoini. ¹⁸ Akka mā noko chaka soaxonano, nāskakē nō anā yoinā ina inātiroma noko chaka soaxonō.

Nios fe rafesharakōikāfe

¹⁹ Efe yora mīshtichi, nāskakē nō nai mēra ikitiro Nios ano ranotama Jesucristomāi nokoōnoax nai imi fonikē, noko chaka soaxoxiki. ²⁰ A ato Nios kīfixomisfo kīfiti pexefā kene fetsa mēra xinia tii ikifistipaonifo ato Nios kīfixoxikakī. Anā iskaratīa nō yopatiroma askara. Anā askafapanakama. Akka iskaratīa afara fetsa fenasharakōi Jesús noko axoni. Nāskakē mā Jesús naino nā Nios kīfiti pexefā kene mēranao sama nāmīfā faxtetani anā tsoa ikiyamanō. Nāskakē nākōi nā Nioskōi nō kīfitiro. ²¹ Nōko Ifo Jesús nokoōxō Apa Nios kīfixomis xanīfokōi. Nāskakē keyokōi Niospa fakefāfe āto Ifokōi. ²² Nāskakē nō Jesús chanīmara fakē nā noko nāxonioxō nōko ōiti fena sharakōi noko faxotiro. Nāskaxō a nō afarafo chakafamis keskarafō anā nō shinātiroma nōko ōiti inimakōitiro. Nāskaxō faka sharapa nashimana keskara noko fatiro anā afaa chaka nōko shinā mēraxō nō shinānōma. Nāskakē Nios fe rafekāfe. ²³ Akka nō yoikī iskafamis: “Jesús nōko Ifokē Epa Niospa a noko yoiyoni keskara noko axoxii,” ixō nō yoimis. Nāskakē afaa fetsa shināyamakāfe. Nā nō shināi fisti shināfafāikāfe. ²⁴ Akka Epa Niospa noko sharafamis. Nōri nō shināsharanō afesaxō nō fetsafo shināmasharatiromākī nōinā faatanākaxō afara axoshara faatanānōfo. ²⁵ Mā mā tāpia mā Jesús chaima oi. Akka fetsafo anā ichanāmisfoma. Nāskakē ato keskara iyamakāfe.

Nāskakē ichanāi xateyamakāfe. Jesúsnōa mā shināi keskafakī fetsafori yoitaifakāfe māto ōiti inimasharakōinō.

²⁶ Fatora fētsa mā tāpia Jesús nokoōnoax nani nōko chaka noko soaxoxiki. Nāskara mā tāpifixō afara chakafakī nōko Ifo Jesús kachikiri fakī, askarakai Niospa āfe chaka soaxotitroma. ²⁷ Nāskarafo Niospa ato omiskōimaxii. Akka Niospa ato ōiaino ratei finakōixikani. Nāskakē Niospa ato yoixii iskafakī: “Emakinoax omiskōipakenakofo mēra fotakāfe, chiifā mēra,” ixō ato yoixii. ²⁸ Akka fētsa nā Moisés yoini keskara nikakaspakī afara chakafaito fētsa ōixō xanīfo yoimis. Fisticchi yoyimaki rafeta yoitiro, askayamakī trespa yoitiro iskafaki: “Mā nō ōia nato afara chakafaito,” ixō yoitirofo. Nāskakē xanīfāfe yoitiro: “Na feronāfāke afara chakafāfa mā natiro,” ixō yoitiro. ²⁹ Akka nā Moisés yoini keskara nikakaspai fo retepaonifo keskafakī fatorafāferi Jesús nikakaspamisfokē Niospa ato omiskōimaki finakōixii. Nāskakē nā yora chakafāfe shināki iskafamisfo: “Mē nikamis Jesús ea nāxonī. Nā naino āfe imi foni. Nāskaxō ea katonī aōnoax ē Niospa fake inō. Akka ē shināikai afama. Nāskakē ē Jesús Ifofapaima,” ixō anori shināki nāto Niospa Fake nikakaspakōimis. Askara meka yoiki Niospa Yōshi Shara chakafakī mekafamis, Niospa Yōshi Sharapa sharafafiamisno noikī. ³⁰ Akka mā nō tāpia Niospa yoiki iskafani: “Afara chakafaiāfe ē ato omiskōimaxii,” ixō yoini. Askatari yoiki iskafani a kirika keneano: “A ea Ifofaafāfe afara chakafariafaifono atonā fāsi mesekōi ixii. Nāskakē askarafo nā Nios nīpanakato ato achixō ato omiskōimaki finakōixii.

³² Shinākapo efe yora mīstichi. Mā tafakī Jesúsnōa tāpixō mā Ifofani keskafakī shināmakiyamakāfe. Fetsafāfe mato Jesús Ifofatimafafono ato nikatama mā nōko Ifo Jesús Ifofasharakōipaoni. ³³ Nāskaxō mā Jesús Ifofasharaito ōikakī fetsafāfe mato īchayanā mato omiskōimamisfo. Akka a Jesús Ifofamis fetsafori omiskōiaifono māri ato fe omiskōipaimis. ³⁴ A Jesús Ifofaa fetsafo karaxa mēra ato ikimanifo. Nāskakē mā ato noyanā ato inimamapai karaxa mēranao mā ato ōikai kani ato shināmarsharata ato inimamaxiki. Nāskatari nā Jesús Ifofaafāfema māto afarafo mato fiakī keyokōinifo. Mato askafafiaifono a shināchakatamaroko mā tāpini Epa Niospa nā ika arixō mato afara mekexona afokai fenopakenakama. Nāskara tāpiax mā inimakōini. ³⁵ Nāskakē a mā Jesús chanīmara faa keskafakī kachikiri fayamakāfe. Mā kachikiri fayamakē Epa Niospa mato sharafaxii noko yoiyoni keskafakī. Nāskaxō afara shara mato ināxii. ³⁶⁻³⁷ Akka Niospa meka kenenī is kai:

Cristo mā chaima matoki oi, samarakaima, ixō kenenifo. Nāskakē mā Jesús Ifofasharai keskafakī omiskōifiki tenekāfe. Epa Niospa mato ināpaiyai keskara aōxō nē mato yoiyoni keskara mā fixii. ³⁸ Nāskaxō anā Niospa meka kenenifo iskafakī yoiki:

Nā ea chanīmara fai ē imasharaito, nāto ea Ifofasharakōixii. Akka nā ea kachikiri faafoki ē inimaxima, ixō Niospa yoini kirika keneano. ³⁹ Nāskarafāfe Jesús kachikiri fakanax omiskōipakenakofo mēra fokani. Akka nōkai askarama. Askatamaroko nō Jesús chanīmara fakōimis noko nimasharapakexanō nō afe ipaxakī.

11

Nios nikakōipaonifo

¹ Akka nō Epa Nios chanīmara fakōixō a noko yoiyoni keskara noko axoyoamano nō chanīmara fai chipomāi noko axōfaito. Nāskarifiakī a noko yoiyoni keskara nō ōiyamafixō āfe mekaōxō nō chanīmara fai. Nāskara nō shināki nō Nios chanīmara fai. ² Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōiki atoōnoa meka shara yoini.

³ Akka nō chanīmara faxō nō tāpitiro Niospa āfe mekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

⁴ Ē mato yoinō nikakapo mā tāpinō a nōko xinifo ipaonifo afe keskaramākī. Nōko xini Abel Nios chanīmara faxō oveja fake ināni nā Niospa yoini keskafakī. Nāskakē Nios akiki inimakōini. Akka āfe ochi Caínkai askara inānima. Nā Caín Nios nikakaspayanā āfe afarafo ināpaiyaito Niospa fichikaspani. Akka āfe exto Abel Nios chanīmara fakōikē Niospa aōnoa yoiki iskafani: “Mī ea chanīmara fakōina,” ixō yoini. Abel Nios chanīmara faax mā nafianikē nō Abel shināki nō tāpitiro Nios chanīmara faxō nō nikasharakōitiro. Nō askafaino Nios nokoki inimasharakōi.

⁵ Nōko xini Enoc aatori Nios chanīmara fakōinax afe rafekōipaoni. Nāskakē nayamafiakē a ika ari Niospa ifirisafatani. Aōnoa yoiki Niospa meka kenenifo iskafakī: “Ē Enoc yoiai keskafakī ea nikakōimis. Nāskakē ē akiki inimakōi,” ixō Niospa yoini. ⁶ Akka nō Nios

nikayamakī nō Nios inimamatiroma. Akka nō Nios fe ipaikōikī nō nikakōitiro. Iskaratīa Nios nia. Nāskakē nō chanīmara fatiro Niosmāi nikē. Askatari nō nikapaikōikī chanīmara fayana ākiki nokoaito Niospa noko afara shara faxoxii.

⁷ Nōko xini Noéri Nios chanīmara fakōipaoni. Nāskakē Niospa Noé yoikī iskafani: “Ē oi kaya imai faka faipafanō āsai fetsenōfo. Nāskakē kanōanāfā pexeya fafe. Mī fakefo fe mī āfinō ano ikanax āsaxikanima. Nā ē mia yoiāi keskafafe,” ixō Niospa Noé yoini. Akka tsōa askara ōiyomisma nāskakē Noé chanīmara fakī kanōanāfā fani āfe fakefo fe āsaxikakima. Nā Noé Nios chanīmara faax isharakōipaoni. Akka nā nikakaspaifo askapaonifoma, afāfe afara chakafapaonifo. Nāskakē Niospa ato omiskōimani āsanōfo. Nāskakē Nios fe Noé rafeaito ākiki inimakōini.

⁸ Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafīax nā Niospa yoiāi keskakōini. ⁹ Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani. A keskarafo inima. Nānoax pexe keskara a karapa pexe fofāsafapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato mato mai ināxii,” ixō yoini. ¹⁰ Nāskakē Abraham manapaoni. Akka Niospa yoini keskara nā mai ano ifīxō tāpīpaoni a Nios ika ari afe ipanaka. Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

¹¹ Niospa Abraham yoini iskafaki: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxafokōi ini fake fimisma. Nāskakē Abraham āfe shinā mēraxō shinākī iskafani: “Epa Niospa ea yoiyoni keskara ea axōi. Nāato nā yoiāi keskarakōi famis,” ixō Abraham Nios chanīmara fani. Nāskakē Abraham āfini fake fini, āfe fake feronāfake. Nāskakē Abraham fakeya ini. ¹² Akka Abraham mā anifokōia ini. Nāskano āfe fenafo ichapakōifo ini. Tsōa ato tanātīroma. Nā fishifo tiikōi askatari nā mashī exe tiikōi inifo tsōa ato tanātīroma. Abraham āfe fenafo ichapakōi inifo.

¹³ Nā ē yorafoōnoa mato rama yoiāi keskara atoōnoa ē mato yoinō. Nā yorafo nai mitokomenifo a Niospa ato yoiyoni keskara fikanaxma. Akka askafīkaxō chanīmara fakakī ato shinā mēraxō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo. ¹⁴ Akka nānori yoiāifāfe nō tāpitiro nāskara yorafo nono mai ano ipaitama Nios ika ari fopaikani afe ipaxakakī. ¹⁵ Akka a ipaonifo ano shinākani āto mai ano anā fopaikani fokeranifo. ¹⁶ Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafīnakōia. Nāskakē Epa Niospa a ika ari ato pexe shara faxoni afe īpaxanōfo. Nāskakē Niospa atoōnoax inimakī ato yoikī iskafani: “Ēfi mato Nioski,” ixō atoōnoa yoini inimayana.

¹⁷⁻¹⁸ Anā Abrahamnoa ē mato yoinō. Epa Niospa tāpipaini Abraham chanīmara fakī nā yoiāi keskara akimākai. Nāskaxō yoikī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoiyoni āfe fake fisti Isaacaōnoax āfe fenafo ichapakōi ixiaifo. Nā afara sharafo Niospa Abraham yoiyoni keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani. ¹⁹ Nāskaxō Abraham āfe shinā mēraxō shinākī iskafani: “Epa Niospa ea yoiāi iskafaki: ‘Mī fake Isaaca ea retexōfe,’ ea faito ē shinā Niospa afama mīshiti fatiro. Akka ēfe fake nafiakē Epa Niospa samama ea otifaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otifaxotiro.

²⁰ Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobō yafi Esaū, chipo Epa Niospa afara shara mato faxoxii,” ato fani.

²¹ Nāskarīfīakī Jacobori Nios chanīmara fakōipaoni. Nāskakē mā chaima naito Niospa āfe shinā mēra shināmanai keskafakī āfe fafa rafe, José fake rafe, Niospa ato shara faxonōpokofai ato yoini. Ato yoita āfe chatiki mēstexō Epa Nios Kīfīyanā aicho fani.

²² Nā Joséri Nios chanīmara fakōipaoni. Nāskaxō mā chaima nakī āfe yorafo yoikī iskafani: “Chipo Epa Niospa nōko fenafo nā israelifo Ejipto anoa ato iyoxii kiki. Fokakī ēfe xaori foxikani kiki. Nā ikaifo ano ea maifaifoxikakī,” ixō ato yoiyoni.

²³ Moisés āfe apa feta āfe afa Nios chanīmara fakōipaonifo. Nāskakē Moisés yomeax sharapīshakōikē āfe apa feta āfe afa ōini. Nāskaxori tāpinifo mā yosixō a Niospa yoiāi keskara yonosharakōixiaito. Nāskakē Ejipto anoa xanīfāfe ato yoini a israelīfāfe āto fake feronāfake yome mīshiti keyokōi ato rētekī mitokakōinōfo. Askafīaifono Moisés āfe apa feta

āfe afa Nios chanīmara fakaxō ratekakima tres oxe anifo āto fake onekakī xanīfāfe āto fake rēteyamanō.

²⁴ Moisés āfe chata keskara ini Faraón. Askafafiaifono Moisés askara fichikaspani. Nāskaxō ato yoini iskafakī: “Xanīfo Faraónkai ēfe chatama. Āfe fakerikai ēfe efama,” ixō ato yoini, chanīmara fanōfo israelifo āfe kaifo ini. Moisésri Nios chanīmara fakōipaoni. ²⁵ Akka Moisés shināni iskakī: “Ē Ejipto anoax xanīfāfe pexe ano ikax ēri ato fe inimasharakai xini ranā ayanā ē afara chakafatiro Nios shināyamakī. Ē askapaima,” ixō shināni. Askapaitamaroko iskafakī shināni: “Ēkai ejiptofo feta afara chakafapaima, askakimaroکو ēfe kaifo fe nā Niospa inafō omiskōiaifo keskai ēri ato fe omiskōi. ²⁶ Ē Egipto anoafō ato afara fīapaikī ē ato fīakerani. Ē fīaxoma, ea mekafafiaifono Egipto anoafāfe, nāskanō. Akka afarafoyafīax shara. Akka Cristo, a Niospa noko nīchixii noko ifinō, nā sharafīnakōia. Ē Cristoōnoax omiskōifiano Epa Niospa a ika arixō ē nokoaito afara sharakōi ea ināxii ē afe īpaxanō,” ixō shināni.

²⁷ Akka Nios chanīmara fakōinax Ejipto anoax āfe kaifo fe Moisés kani. Ejipto anoax āto xanīfo akikī ōitifishkifaiino akikī mesetama nā xanīfāfe mai anoax kani. Akka Nios tsōa ōiyamafitirono Moisés fisti Nios fe rafekōiax afe mekapaoni. Nāskakē nā Niospa yoini keskafakī enepaonima. ²⁸ Akka Ejipto anoax israelifo foyofomano Niospa Moisés yoini iskafakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotifo raish anōfo, askafafono ōiki ēfe ājirinī āto fake iyoafō rēteyamanō, nā Ejipto anoafō āto fake iyoafō ato reteaitā,” ixō Niospa yoini. Nāskakē Moisés nā Niospa yoia keskara chanīmara faxō āfe kaifo israelifo yoini. Nāskakē israelifāfe āto fake iyoafō nanima.

²⁹ Nāskakē israelifāfe Nios chanīmara fanifo. Nāskakaxō nā fakafā āfe ane Ōshi pokefainifo. Epa Niospa nēxpakīa fakafā shināfatanaino israelifāfe pokefainifaifono ato aho Ejipto anoafō fonifo ato retepaikani. Mā fakafā nēxpakīa kāiyaifono Niospa atoki fakafā yosifani. Nāskakē āsai mitokomenifo.

³⁰ Akka Niospa israelifo yoini: “Nā Jericó pexe rasi kachiori siete nia foaketi fayakenōfo,” ixō yoini. Nā pexe rasi kachiori simīto kene keyakōi masoa ini. Nāskakē israelifāfe a pexe rasi kachiori foaketi fayakenaifono nā Niospa yoini keskara nā pexe rasi maokomei fetesen. ³¹ Akka keyokōi Jericó anoafō nai keyonifo. Akka nā kēro chotaferoma āfe ane Rahab nā fisti nanima nāatomāi mā Nios chanīmara faax. Akka Jericó pexe rasi ano foyofomano israeli xanīfāfe feronāfake rafe nīchini ato onāti fatanōfo. Mā foafono nā rafe Rahab āfe pexe mēra ato ikimani tsōa ato fichixō reteyamanō. Nāskakē nā Rahab tsōa retenima āfe kaifo retetikakī.

³² Akka, ūanā afaa fetsa ē mato yoitromē? Nā yora ichapafāfe Epa Nios chanīmara fapaonifoōnoa ē mato yoikī keyotirono. Nā Gedeón ikaino, Barac ikaino, Sansón ikaino, Jēftē ikaino, David ikaino, Samuel ikaino nā Niospa meka yoimis fetsafoōnoari ē mato yoipanā ēkai yoikī keyotirono. ³³ Nāskakē afāfe Epa Nios chanīmara fakaxō āto sorarofō yoinifo a ato noikaspaifo ato retenōfo. Nāskakē a ato noikaspaifo ato retepaifīkakī finōkōinifo. Akka atiri xanīfo ikaxō āfe yorafō kexesharapaonifo isharanōfo. Nāskakē a Niospa ato yoiyoni keskara ato axosharani. Nāskatari atiri nā Nios Ifofaafāfema poomā mēra ato potanifo. Askafiaifono Epa Niospa ato kexesharani poomānā ato pinōma. ³⁴ Akka atiri xanīfo chakafāfe ato yoinifo chīfā mēra ato potanōfo. Chīi mēra ato potafiafono Niospa ato kexesharani koonōfoma. Atiri kenofāfe ato retepaifīkakī tsōa ato retenima. A isinī ikani ato yora pachikōifokē afori Niospa ato mitsiskōi imani. Nāskakē nā ato noikaspaifāfe āto sorarofāfe ato retepaifīaifono nāfāferoko ato īchonifo ato afeskafanōfoma. ³⁵ Kērofāferi Nios Ifofaino, fake naano Niospa ato otofaxoni anā ninō.

Akka fetsafo Nios chanīmara fakōinafono nā Nios Ifofaifāfema ato omiskōimanifo ato retetakī. Nāskaxō ato yoikī iskafanifo: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafafiaifono tsoa Nios shināmakinima. Nāskakē ato retenifo ato reteyoafomano shināki iskafanifo: “Noko retefīaifono Epa Niospa samama noko ōtofatiro nō afe īpaxanō,” ixō shinānifo. ³⁶ Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otxekere axō ato karaxa mēra ikimanifo. ³⁷ Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafaiifono. Nāskakē nā afaamaisfāfe ano rapatīyamano oveja fichi iyamai cabra fichi rapatī faxaxō safenifo. Ato retepaifīkakī ato īchorifaifono. Nāskakē omiskōikōinifo. ³⁸ Nāskakē tsōa istoma anoax machi keya anoax a mafa kini mēra ikikata mai kini mērari ikinifo. Akka nā Nios chanīmara faafō a Nios Ifofaafāfema ato shara fanifoma Niospa ato ōia sharafiafono, ato chakafapaonifo.

³⁹ Nāskakē nāfo omiskōi finafīkakī Nios Ifokōi fapaonifo. Nāskakē Niospa atoōnoa yoikī iskafani: “Nafāfe ea nikakōikani. Nāskakē ē atoki inīmakōi omiskōifīkani isharakōimifō,” ixō

Niospa atoōnoa yoini. Askafikaxō a Niospa ato yoyiوني keskara tsōa fiamā ini. ⁴⁰ Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesūs ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoyiوني keskara keyokōi noko ināxii nai mēraxō.

12

Nō Jesūsnoa shināsharatiro

¹ Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafamapaitiro. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiyai keskara nō axosharakōi. ² Akka nō Jesūs fisti shināfafāinō. Nāfi nōko Ifokōikī noko tāpimamiskōi. Akka nāato noko ōimakī taefanikī afara afeskara afiaino nō Nios chanīmara fakōinō. Nāskaxō a Apa yoiya keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe ferotaifi rāfinī fanifo. Askafafiaifono omiskōiyanā tenekōini māmāi tāpiax a chipo xanīfo ixō Apa Nios feta noko ifixiai inimakōiyanā Apa Nios ika arixō.

³ Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī matori omiskōimānāfono, shināchakatama māto ōiti fekaxtefayamakāfe. Nāskaxō a Niospa mato amapaiyai keskara mā enetiroma. ⁴ Akka yorafetsafāfe mato afara chakafamapaimisfo anā mā Jesūs Ifofanōma, ato nikatama mā omiskōifi mā omiskōi sharamisma. Akka Jesūsroko omiskōi finakōini. ⁵ Mā mā shināmākia keskara ē anā mato yoini. Mā āfe fakekē, Epa Niospa mato yoini keskara āfe meka kirikano kenea iskara fētsa keni:

Ēfe fāke, ēfi mī Ifokōikī. Akka nā ē mia yoiyai keskara mī ayamaito ē mia omiskōimani mī ea nikanō, mī ea Ifofasharanō. Ē mia askafaino, akai afamara mī fatiroma. Askatari shināchakayamafe. Tāpisharafe. ⁶ Nā ē aō noiai tāpimasharai aō noikī. Ēfe fake keyokōi omiskōimani anā nikasharanō,

ixō keni a Niospa shināmanaino. ⁷ Epa Niospa mato tāpimapaiyai keskara tāpikāfe. Nāskax omiskōifikī shināchakatamaroko tenesharakōikāfe. Nāskakē omiskōixō mā tāpitiro māmāi Niospa fakefoxō. Apafāfe āto fakefo tāpimatirofo keskafakī Epa Niospa mēstekōi nokori tāpimani. ⁸ Keyokōi Epa Niospa āfe fakefo ato tāpimanaito mā meemisfo. Akka Epa Niospa noko tāpimayamaino nō āfe fakekōifo itiro. Nāskax nōri āfe yorafo itiro. ⁹ Akka nō yomekē nōko epafāfe nono mai anoxō noko tāpimapaonifo. Nāskakē nō shinākī nō ato nikakōimis. Akka Epa Niospa noko tāpimanaino nō tenekōitiro. Nāskaxō nā noko tāpimapaiyai keskai nō inimayanā nō isharakōitiro. ¹⁰ Nōko epafāfe āa shināxaxō noko tāpimamisfo nō shara inō. Akka mā nō yosiano anā noko askafamifoma. Nāskarifakī Epa Niospa mēste shināsharakōikī, nokori shara fapaikī noko tāpimamis a keskara shara nō inō. ¹¹ Chanīma, noko tāpimayanā noko omiskōimanaino nō shara meetiroma. Paekōi mēi nō ichopaitiro. Askafixō mā yosixō chipo nō shinātiro Epa Niospa noko tāpimasharai, nōko ōiti inimasharatiro shara noko imaino.

Nō Niospa meka nikakaspaino mesekōi ixii

¹² Nāskakē afara afeskara afiaino shināchakayamakāfe. Epa Niospa mato tāpimapaiyai keskara fisti akāfe. Nāskaxō Nios Ifofakī kachikiri fatama nikasharafafāikāfe. Nāskatari āfe meka shara nikakī enepaiyamakāfe. Yora pachi keskara iyamakāfe. ¹³ Nāskax isharakōikāfe Jesūs Ifofasharaxikakī. Mā askaito ōikani nā Jesūs Ifo sharafaafoma mato fe rafepaitirofo Jesūs keskara shara ipaikani.

¹⁴ Nāskakē mēenāpaitama keyokōi yorafo fe isharafafāikāfe. Nāskatari Jesūs keskara shara ipaikāfe. Akka tsoa Jesūs keskara shara iyamakani afāfekai nōko Ifo ōinakafo. ¹⁵ Epa Niospa noko noikōikī āfe Fakeoxō noko sharafa fafafāimis. Nāskakē a Niospa noko amapaiyai keskara akāfe fenoxikakima. Askatari māto shināmā afaa shināyamakāfe. Akka māto shināmā mā afara shinākī fetsafori mā ato afara chakafamatiro akari askara anōfo. ¹⁶ Nāskatari māto āfima fe iyamakāfe. Kērofori māto fenema fe iyamakāfe. Akka nō naino, nōko fake iyoato nōko afama mīshti fitiro. Akka Esau shināsharanima. Fonāikī āfe exto yōkani āfe ēxto pimanō. Nāskaxō a āfe apa ināpaiyai shinākima āfe exto yoini iskafakī: “Epa naano āfe afama mīshtifo ē fiaī ē mia inānō kopifakī,” ixō yoini. Nāskakē nā Esau keskara iyamakāfe. Atokai Niosnoa shināpaonima. Akka a Niospa mato ināpaiyai keskara fikaspakīma, fikāfe. ¹⁷ Mā mā tāpia āpa afara shara ināpaiyai keskara fipaifikī finima. Nāskaxō apa yōkakī iskafani: “Epa, a mā ināpai keskara ea ināfe, ē mī fake iyoakōi,” ixō oiayanā yōkafaito āpa inānima māmāi chipokoto fiano. Nāskakē ōisharakāfe. Mā Nios nikayamai māri Esau keskara itiro. Nāskakē Niospa mato ināpaiyai keskara mā fitiroma.

¹⁸ Epa Niospa a nōko xinifo yoini keskara iskaratīa noko yoimisma a keskara. Ato yoini machi āfe ane Siōn tenāmā fotanōfo anoxō afara fetsa ato yoixiki. Akka nā machi anoax chiifā erepafākōi, askatari kōi fakishifākōi, askatari nēfefākōiyanā kana piishini. ¹⁹⁻²⁰ Nai mēranoax maneti fāsikōi chāi chāisaito nikanifo. Nāskatari nai mēraxō fāsikōi ato yoiaito nikanifo ato Niospa iskafaito: “Na machi ano tsōa māpetiroma. Māpeaifāfe tokirinī ato tsakakī retekāfe. Askatari yoināfāferi māpeaito mā retetiro,” ixō ato yoiaito nikanifo. Nāskakē ratekōikakī Moisés yoinifo iskafakakī: “Moisés, nō anā Niospa meka nikapaima. Māchi ari māpei nō narisatiro. Nāskakē Nios yoife noko anā yoiyamanō,” ixō israelifāfe Moisés yoinifo. ²¹ Akka Moisésri nā ōia keskara ato yoini iskafakī: “Ēri fāsi ratekōi, tari tari iki,” ixō ato yoini.

²² Akka nōkai machi Siōn ano nō kaima. Askatamaroko machi Siōn fetsa ano nō kai, āfe ane fetsa nā Jerusalén Fena ano a Nios ika ari. Nāskakē nānoax āfe ājirifo ichanākaxō, “Nios sharara,” fafafaifāikani. Akka nā āfe ājiri ichapakōiifo tsōa ato tanātiro. ²³ Nānori nō keyokōi a Jesús chanīmara faafo afe ixii. Akka nā Nios ika ari āto anefo kenea afe īpaxanōfo. Nāskakē nōri nō Nioski noko. Nāskakē noko yoixii fatofāfe Ifofakanax afe ipanakafo. Nā Ifofaafos a keskara shara ato nai mēraxō imai afaa chakafamisfoma keskara inōfo. ²⁴ Jesús noko nāxoyoamano tsōakai nokoōnoax nāxoyonima. Nāskakē iskaratīa Jesús noko nāxonikē nō Nios fe isharapakexatiro. Akka nōko xinī Caín onefetsa Abel reteni. Nāskakē Epa Niospa Caín yoikī iskafani: “Caín, çafeskakī mī exto mī reteamē? Iskaratīa ē mia omiskōimani,” ixō yoini. Abel nafianixakī aato noko nimapaketiro, Jesús keskarama. Akka Jesús nanixakī noko nimapakenaka.

²⁵ Nāskakē Niospa mato yoiai keskara nikakaspayamakāfe. Nā nono mai anoxō nōko xinifo Moisés ato yoini keskara nikayamaifāfe Epa Niospa ato omiskōimani. Akka Jesús Moisés keskarama. Nios ika ariax nokoki fotoni Niospa Fakekōiax. Nāskakē a Jesús noko yoiai keskara nō nikayamaito nokori omiskōimakī finakōixii. ²⁶ Akka Epa Niospa Moisés yafi nōko xinifo machi Siōn anoxō ato yoikī āfe mekapa mai naya naya ani. Nāskaxō anā ato yoini iskafakī: “Anā mai fisti ē naya naya axima. Nairi ē naya naya axii,” ixō ato yoini. ²⁷ Nāskakē nā Epa Niospa noko yoini keskaraōxō nō tāpitiro nā afara nipatirofoma, Niospa nāfo yamafarisafataxii anā afaa inōfoma. Akka nā Niospa ato imapaiyai fisti itirofo. ²⁸ Nāskatari a Nios ika ariax mai naya naya itiro. Nāskakē nāno nō afe isharapakexatiro. Nāskakē aōnoa nō shināsharayanā nō kififafāinō. Nāskaxō a noko amapaiyai keskara nō axōaino nokoki Epa Nios inima sharakōixii. ²⁹ Akka mā nō tāpia nōko Ifo Nios nā chiifā erepafāi keskara. Akka nā āfe meka shara nikakaspakī kachikiri faifono Niospa chiifā erepafāi mēra ato potaxii anoax omiskōipakexanōfo. Nāskakē nō nikasharakōinō.

13

Afesaxō nō Nios inimamatiro

¹ Māfi Cristo afe yorafokī. Nāskakē mā ranā nōināi xateyamakāfe. ² Yora fetsafori mai fetsa ariax oaito mātō pexe anoxō ifisharakāfe. Nāskakēri tāpioxoma fetsafāfe yorayama fiano ājirifo fiano ifimisfo.

³ Nā karaxa mēra ikafori ato shinākāfe. Nāskaxō ato ōiti inimamasharakāfe. Askatari ato axosharakāfe. Nā mā ato fe karaxa mēra ika keskara shinākōikāfe.

⁴ Feronāfakēfo, mātō āfiffo fe nōināsharakāfe. Nāskax isharakāfe. Askatari mātō āfima fe ipaiyamakāfe, mātō āfi fisti fe ikāfe. Kērofori mātō fenema fe ipaiyamakāfe, mātō fene fisti fe ikāfe. Akka nā āto āfima fe ikaifono, kērofori āto fenema fe ikaifono, nāskarafo Niospa ato omiskōimaxii.

⁵ Akka kori ichapa noiyamakāfe. Askatamaroko inimakāfe afe tii mā ayamakī. Epa Niospa yoinikī iskafakī: “Ēkai mato makinoax paxkanakama. Askatari ē mato potanakama. Nāskakē a mā yopai ē mato ināxii,” ixō yoini. ⁶ Nāskakē chanīmakōi nō yoitiro iskafakī:

Afara afeskara afiaito ēfe Ifāfe ea axomis. Nāskakē ē rateima, Epa Niospamāi ea kexesharaino yorafāfe ea afeskafanōfoma, ixō nō yoitiro.

⁷ Niospa meka yoimisfāfe mato yoinifo keskara atoōnoa shināfāfāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

⁸ Akka Jesucristo nā ipaoni keskara īpanaka. Anākai iskaratīa fetsatiroma. ⁹ Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināsharatiro,” ixō mato yoipai ani kiki. Akka a nō piatokai nōko

shinā mēra noko shināmasharatiroma. Askatamaroko Niospa noko noixō noko imasharatiro a keskara shara nō inō.

¹⁰ Nāskakē nō chanīmara famis Jesucristo ifi cruz ikakinoax noko nāxoni nōko chaka noko soaxoxiki. Akka Jesucristo chanīmara fatama nā Moisés ato yoini keskara fisti chanīmara famisfo. Nāskakē afāfekai ato chaka soaxotirofoma.

¹¹ Akka nā Moisés ato yoini keskai a ato Nios kīfixomis xanīfo fisti, ares fisti pexe kene fetsa mēra ikipaoni, nā mēra yoinā ina imiya ikikē ōikī Epa Niospa ato chaka soaxonō. Akka nā yoināfāfe ato kaya pexe rasi pasotaixō koofapaonifo. ¹² Nāskarīfiai Jesús Jerusalén pasotainoax noko omiskōixokī āfe imi foax noko nāxoni nōko chaka noko soaxoxiki a keskara shara nō inō. ¹³ Akka nōri Jesús ipaoni keskara inōkāfe a nō ipaoni keskara anā ixikima. Nāskaxō āfe kaifāfe potanifo keskafakī nokori nofe yorafāfe potatirofo. Nāskakaxō Jesús īchaketsanifo keskafakī nokori aōxō īchatirofo. Akka Jesúsnoa chaka shināmisfo keskafakī nokori aōxō chakafatirofo. ¹⁴ Nono mai anoax nō omiskōifikī nō shināchakaima, mā nōmāi tāpiax nono mai ano nō ipanakama. Askatari mā nō tāpia a Nios ika ari nokoax nō afe ipanaka. Nāskakē nā nō manasharamis.

¹⁵ Jesús noko nāxonioxō nō Epa Nios aicho fai. Akka nō yoikī iskafatiro: “Aicho Epa Niosi, mī Fake Jesús ēfe Ifokōi. Aōxō ē mia aicho fai,” ixō nō yoitiro. ¹⁶ Askatari ato shināmakiyamakāfe mā afarayaxō a afaamaisfo ato ināsharakāfe. Mā ato askafaito ōikī Nios matoki inimasharakōi kiki.

¹⁷ Akka nā ichanāti pexe anoxō Niospa meka mato yomisfo ato nikasharakōifafāikāfe. Nāskax nā mato yoiāifo keskakōikāfe. Nāfāfe mato kexesharamisfo mā Jesús nikasharanō. Akka nāfāferi tāpiafo Nios ari nokoāifāfe ato yōkaxii iskafakī: “Ķmā ēfe meka mā ato tāpimasharamismē?” ixō ato yōkaxii. Nāskakē ato nikasharakāfe inimakōinōfo. Akka mā ato nikayamaino inimatirofoma, shināchakatirofo. Nāskaxō mato axosharatiroma.

¹⁸ Nokori Epa Nios kīfixokāfe. Epa Niospa noko amapaiyai keskara mā nō apaimiski. Nāskaxō nōko shinā mēraxō nō afaa chaka shināima. Nō isharaaikōi. ¹⁹ Eari Nios kīfixokāfe matoki ea samama nīchinō ē anā mato fe inō.

Ato Nios kīfixoyanā mā mekai xatekī ato yoini

²⁰⁻²¹ Epa Niospa noko inimamakōimis nō afaa shināchakanōma. Nōko Ifo Jesús mā nokoōnoax nafiakē Apa Niospa otofani Jesús keyokōi finōax noko kexemis inō. Jesús noko nāxonioānoax Epa Nios fe nō afe yora ipanaka. Nāskakē mā afara shara yopaito Epa Niospa mato inātiro a mato apaiyai keskara shara mā anō. Āfe Fake Jesucristoōxō nōko shinā mēra noko shināmasharax nokoki inimakōixii. Nāskakē keyokōichi Jesúsnoa nō yoisharapakenaka. Nāskara sharakōi ipanaka.

²² Efe yora mīshtichi, nā ē mato ichapama yoiā keskara nikasharakāfe fena fenakākima. Nā ē mato kenexona keskai māto shinā mēra mato shināmasharaxii kiki. ²³ Ē mato yoipai mā nofe yorashta Timoteo iskaratīa karaxa mēranoax mā tsekea. Akka samamashta ekeki oano ē afe kai mato ari.

²⁴ Keyokōi ichanākaxō a mato Niospa meka yoixomisfo yafi a mato kexemisfori nō ato yoisharai. Akka nono Italia anoxori nā Nios Ifofaafāferi mato yoisharakani.

²⁵ Epa Niospa keyokōi mato noikī mato shara faxōfafāinō. Nā tii.

Santiago Jesús Chanĩmara Faafu Kirika Kenexõ Fomani

Judeofo paxkanãnifono Santiago ato kene fomani

¹ Èkia Santiago ã mato kirika kenexõ fomai. Epa Nios yafi nõko Ifo Jesucristo ã ato yonoxomis. Mãfi Jesucristo mã Ifofamiskĩ nõ maitiofo mã paxkanãni fetseni. È mato meka shara fomai.

Niosxõ nõ tâpisharatiro

² Efe yora mĩstichi, afara chakafo nokoaino, inimasharakãfe, shinãchakakakima. ³ Mã mã tâpiakĩ, ano afara chakafo nokoaino, mã Jesús nikakĩ finasharakõikĩ, afara chakafo nikakãkima mã tenesharakõitiro. Nãskaxõ afara chakafo mã finõinĩfofãtiro. ⁴ Mã askaino Jesús mato imapaiyai keskara mã itiro mēxotaima mãmãni mã Jesús nikakõisharakĩ. Mã askakĩ afarafo Jesús mato amapaiyai keskara mã atiro afaa chaka shinãkima.

⁵ Akka Niospa mato amapaiyai keskara mã tâpixoma, Nios yõkakãfe mato tâpimanõ. Mã yõkaito mato tâpimatiro. “Ea fekaxtefayamakãfe,” ixokai Niospa mato anori yoima. Inimayanã mato tâpimani. ⁶⁻⁸ Nãskata mã Nios yõkakĩ iskafakĩ shinãyamakãfe: “È Epa Nios yõkaito ea tâpimanimaraka,” ixõ anori shinãyamakãfe. Akka mã mã yõkapaiyai keskara shinãkãfe. Nãskaxõ, “Aicho, ã Nios yõkaito mã ea tâpimasharaki. Nãskakẽ ea amapaiyai keskara ea tâpimaxii,” ixõ shinãkãfe. Askatari anã afaa shinãyamakãfe. Fekaxteyamakãfe. Nãskarari nēfefakĩ ifi fokẽ fokẽ akaito nõ tâpitiroma fakiri kaimãkai. Nãskarifiakĩ Niospa mato tâpimafaino mã anã afara fetsa shinãkĩ mã shinãsharatiroma. Nãskakẽ mã fekaxtefõ mã shinãsharatiroma. Nãskakẽ Niospa mato afaa tâpimatiroma mã fekaxteaito.

⁹ Jesús chanĩmara fafiakani ranãri yorafo afaamaisfo. Nãskakẽ fetsafãfe ato tanakanima. “Nafokai afama,” ixõ shinãkani. Askatamaroko afaamaisfiarono Niospa ato iskafai: “Mãfi ãfe fakekõifokĩ. Keyokõĩ ãfenãfo mãtonãri,” ixõ Niospa ato yoini. Nãskakẽ inimatirofo. ¹⁰⁻¹¹ Fetsafori Jesús chanĩmara faafu afama mĩshtiyafu. Nãskakẽ feronãfake afama mĩshti ichapayato shinãkĩ iskafatiro: “È afama mĩshti ichapayafekẽ ãfe afama mĩshtifãfe ea inimamatiroma. Èfe afama mĩshtiõnoaxkai ã ishara tiroma. Akka ãfi Niospa fakekõiax, ã afe rafepakenakakĩ. Nãskax ã inimakõĩ,” ixõ shinãtiro. Akka taeyoi charofo sharashta iyotiro. Askafaino xini tsofifaano, anã shara itiroma mãmãni xini tsofifaano. Nãskarifiati feronãfake afama mĩshti ichapayato shinãtiro iskafakĩ: “Nã charo ikai keskariai fatora penata ã natiro. Mẽ nãxõ ãfe afama mĩshti ã fotiroma. Askatari ãfe afama mĩshtifãferikai ea afeska fatiroma,” ixõ mã feronãfãke afama mĩshtiyato shinãtiro. Nãskakẽ mã ãfe afama mĩshtifõnoax ishara kõiax narisatiro.

Santiago ato tâpimani afara chakafamisfoõnoa

¹² Nõko Ifãfe yoikĩ iskafayoni: “Nã ea noiaifi efe ãpanakakĩ,” ixõ yoiyoni. Nãskakẽ afara chakafo nokokĩ nokoaino, nãskara teneyanã nõko Ifo Nios nõ kachikiri fayamaito õikĩ nokokĩ inimatiro. Nãskax a yoiyoni keskai nõ afe ãpanaka. ¹³ Chanĩma, keyokõichi nõ Jesús Ifofaxõ afara chakafapaikĩ nõa nõ yoitiro iskafakĩ: “Ea Niospa afara chakafamapai,” ixõ nõ yoitiro. Akka Nios shara finakõia. Afara chakafatiroma. Tsõarikai Nios afaa chakafamatiroma, Niosmãni shara finakõikẽ. Nãskakẽri Niospa ato afaa chakafamatiroma. ¹⁴ Nãskakẽ nõ afara chakafapaiyaino afara chaka nõo nea. Nãskatari nõko shinã mēraxõ nõ afara chakafapaikĩ nõ atiro. ¹⁵ È mato yoinõ, nikakapo. Kẽro fistichi fake naneano fenãmãshta yositiro. Akka mã kãiax yositiro. Mã yosiax anifoax, natiro. Nãskarifiakĩ nõko shinã mēraxõ nõ afara chakafo fapai, akka afara chakafo nõ shinãmakiyamaxõ, afara chakafo nõ atiro. Nãskakẽ mēxotaima nõ afara chakafatiro. Nãskax nõ naa keskara nõ itiro.

¹⁶ Akka efe yora mĩstichi, anorima shinãyamakãfe. Niospa afaa chakafatiromaki. ¹⁷ Akka Epa Niospa nai mēraxõ mēxotaima noko kexesharafafãini. Nãskaxõ noko afama mĩshti onifaxonĩ. Xini onifata, fishifo onifata, oxe onifata, nãfo noko onifaxonĩ, afãfe noko chaxasharanõ. Akka oxe ikiaito nõ anã õitiro. Fishiri nãskarari ikiaito nõ õitiro. Chipõ kãiyaito nõ anã õitiro noko chaxasharaito. Akka Epa Nioskai askarama. Akai fetsatiroma. Noko mēxotaima sharakõĩ faxomis. Nokokai chakafatiroma. ¹⁸ Niospa ares shinãyoni iskakĩ: “Èfe meka chanĩmakõĩ nikaifono ã ato fetsafaxii ãfe fakekõĩ inõfo,” ixõ Niospa shinãyoni. Nãskakẽ noko katokĩ taefani. Nãskatari a rama chanĩmara faifo ãfe fakekõifo ixikani.

Niospa meka mēstesharakõĩ nikax askakõikãfe. Nãskakẽ mã chanĩmara fakõinikai

¹⁹ Efe yora mĩstichi, nikasharakãfe ã mato yoisharanõ. Fẽtsa mato yoipaiyaito, nikakaspatama nikayokãfe. Mãri chipõ fenãmãshta yoisharaxikakĩ. Akka samamashta õitifishkiyamakãfe. Nãskakẽ nõ õitifishkiki nõ mekatiro.

²⁰ Mā ōitifishkikikai Niospa mato afara sharafamapaiyai keskara mā atiroma. ²¹ Nāskakē afara chakafo mā famis xatekāfe. Mā mā chaka xatexō mā Niospa meka nikakōisharatiro. Nāskaxō mā yoikī iskafatiro: “Epa, mī meka shara emēra nanefe ē mia Ifofasharapaikai. Ē mia nikapaisharakōikai,” ixō anori yoikāfe. Āfe meka shara mato mēra naneano, a mato yoiyoni keskai mā afe nīpanaka.

²² Āfe meka fisti nikakākima nā Niospa yoini keskakōiri akāfe. Mā mā nikafi mā askayamai mā mā pāramei, “Nō Nios Ifofara,” ixō shinākī. ²³⁻²⁴ Nā keskarafofi iskamisfokī: Espejo fikaxō āto femānā choshtakē ōikanax fechokomepaikani shināmakitirofo. Nāskarifiakani Niospa meka nikafikakī, nāskakaxō afara chakafakakī xateafoma. ²⁵ Akka fētsa Niospa meka shara nikafafāikī nā yoiāi keskara amis, shināmakitama. Nā keskara yōra Nios chanīmara faxō Niospa yoiāi keskara amis, nāskax inimakōimis. Shinākī iskafamis: “Niospa meka sharakōi. Nā ea yoiāi keskara ē aki,” ixō shināmis. Nā keskara yora isharakōitiro inimayanā.

²⁶ Akka fētsa shinākī iskafai: “Ē Jesūs Ifofasharai,” ifiakī meka chaka fisti yoisimis āa pārameyanā. Askara yōrakai Jesūs Ifofasharama. Akikikikai Nios inimaima. Nā keskara yōrakai tosa ōimatiroma afeskax isharatiromāki. Atokairoko Nios Ifofaxō ato ōimaxiki. ²⁷ Askatari nō Jesūs Ifofasharaxō fakefo apamaisfoya, kēro ifomafafori nō ato ke-xesharatiro, omiskōiaifāfe. Nāskatari nō Jesūs Ifofasharaxō a afara chakafaifo keskara nō atiroma. Nō aska sharaito noko ōi nokoki Jesūs inimatiro. Nāskarafō nōko Ifo Jesūs keskara sharakōi ikani.

2

Yora kori ichapaya fisti sharafatama a afaamaisfori ato sharafakāfe

¹ Efe yora mīsttichi, nōko Ifo Jesucristo xanīfōfinakōia. Nāskakē noko noipakenaka. Yora afama mīsttifoja, afaamaisfojari keyokōi noko Jesūs noi. Nāskatari māri Jesūs chanīmara famis, noko Jesūs noiāi keskakakī, keyokōi noikāfe. Nā yora kori ichapaya fisti noikakūma, nā yora afaamaisfojari noikāfe. ²⁻³ Akka mā ichanāno feronāfake kori ichapaya oro anīcho efapa safefāi rapati sharakōi safeax mato fe ichanāiyoi oaito, mā shinākī iskafatiro: “Nafi afama mīsttifoja, nāskakē nō ifisharai,” ixō mā shinātiro. Nāskaxō, “Nono tsaoyofe keyokōichi mia ōinōfo,” mā fatiro. Mā askafaino, feronāfake afaamais rapati chapokōi safeax mato fe ichanāpaiyaito mā iskafatiro: “Onī nīxō ōife,” askafayamakī, “Onī nāmā tsaoxō ōife,” mā fatiro. ⁴ Mā askafakī mā chakafai. Nā kori ichapaya noikī nā feronāfake afaamaisya mā ifimisma. “Jesūs shināi keskara nōri nō shināi,” ixō mā yoisimis. Anori yoifi mā askamisma. Feronāfake afaamaisya ifisharaxma Jesūs shināi keskara mā shināima.

⁵ Efe yora mīsttichi, ē mato noikōi. Akka ē mato yoiāi keskara ea nikasharakāfe. Yorāfāfe afaamaisfikaxō, Jesūs chanīmara faifāfe ato noixō Niospa ato katoni afe yorakōifo inōfo. Ato yoiyoni iskafakī: “Mā ea chanīmara fakī, mā ea noikōi. Nāskakē mā efe ipanaka ē xanīfo ika ano. Nāskatari nā ēfenāfo mātonāri ixii,” ixō Niospa ato yoiyoni. ⁶⁻⁷ Askafixō a afaamaisfoja mā ato ikisharakōima, mā ato chakafai ato ōikaspayanā. Akka shinākāpo afe keskarafomāki kori ichapayafo. Nā kori ichapayafāfe mato omiskōimakani. Mā ato nīmikē xanīfo ano mato iyokaxō mato karaxa mēra ikimapaikani. Askarafāfe nōko Ifo chakafakī mekafamisfo. Akka a kori ichapayafāfe mato noikanima ato kori fisti noi kakī. Akka, *afeskakī a kori ichapayafo mā ato ifisharapaimē mato chakafafāifono?* Akka a afaamaisfo mā ato noikasпамis.

⁸ Akka kirikaki Niospa meka kenekī iskafanifo: “Nā mā noimekōiai keskariakī fetsafori noikōikāfe,” ixō yoinifo. Nā Niospa yoini keskara mā nikakōiax mā isharakōikai. ⁹ Akka mā fetsafo noiāmax mā shara ikima, chaka mā iki. A Niospa Moisés yoini keskara mā akima. Nāskakē, “Mā nikayospakōifo,” Niospa mato fatiro. ¹⁰ Niospa noko yoiyoni iskafakī: “Keyokōi noikāfe,” noko fani. Akka keyokōi Niospa noko yoini keskara nō nikafikī afara fisti nō shināmakixoma nō chakafai. Nāskakē Epa Niospa noko ōi nā nō afaa nikama keskara. ¹¹ Shinākāpo. Niospa noko yoini iskafakī: “Kēro fetsa fe oxayamakāfe. Xotofakeri feronāfake fetsa fe oxayamakāfe,” noko fani. Askatari, “Yora reteyamakāfe,” Niospa noko fani. Akka kēro fetsa fe mā oxayamafikatsaxakī mā yora retēkī Niospa noko yoini keskara keyokōi mā nikama.

¹² Akka Niospa noko noikī, āfe meka noko yoini nō afaa chakafanōma. Nāskakē noko yoini keskara, nō keyokōi nikasharaito noko omiskōimanima. Akka nāfo tāpikōixō, keyokōi nō nikakōixō nō ato yoisharatiro. Askatari fetsafo sharafakāfe, askara sharakōikī. ¹³ Mā askaxō Niospa noko yoini keskara, mā yorāfo noiyanā ato shinākī mā ato sharafai. Mā askafaito Niospa mato omiskōimatiroma. Akka mā yora fetsafo mā noiyamaito Niospari mato noixoma mato omiskōimatiro.

Nō Jesūs chanīmara fakōixō nō fetsafori afara sharafaxotiro

¹⁴ Efe yora mīstichti, ē mato yoisharapai. Akka fētsa yoikī iskafai: “Ē Jesús chanīmara fai,” ixō yoifixō yorafo sharafamisma, askarakai sharama. Nāskaxō mā noko ōimani mākai Jesús chanīmara faama. Nāskakē mā Nios fe nīpanakama. ¹⁵⁻¹⁶ Akka a Jesús chanīmara faa fetsa omiskōi afaamaisyax matoki nokoaito, mā iskafatiro: “Mī rapati safesharata katāfe, matsi meyamaxiki. Askatari pisharatāfe fonāiyamaxiki,” mā fafiakī mākai afaa inānimsa, askarakai sharama. ¹⁷ Akka mā yōra nāxokai anā fetsafo afaa sharafaxotiroma. Nāskarifiakī fetsafāfe yoikī iskafatirofo: “Ē Jesús chanīmara fai,” ifiaxō fetsafo afaa sharafaxomisma atokai Jesús chanīmara fakōinama. Nā keskarafi yora naa keskarakī.

¹⁸ Akka fētsa shinākī noko iskafatiro: “Ē Jesús chanīmara fai. Nāskakē Epa Nios ēfe Ifo,” ifiaxō fetsafokai sharafamisma. Akka ē iskafai: “Ēri Jesús chanīmara fai. Askatari ē fetsafo sharafamis. Nāskakē mī ea tāpitiro Nios ēfe Ifokē.” Akka mī, “Ē Jesús chanīmara fai,” ifiaxō mī fetsafo sharafamisma. Akka, ζafeskafaxō mī ato ōimatiromē mī Jesús chanīmara faxō? Akka ē fetsafo sharafakī ē ato ōimatiro ē Jesús chanīmara fakī. ¹⁹ Akka mī yoimis iskafakī: “Nios fisti, anā ano Nios fetsama,” ixō mī yoimis. Nāskakē mī chanīmara fai. Nā mī chanīmara fai keskara shara. Akka nā niafaka chakafāferi chanīmara fakani Nios fistikē. Akka chanīmara fafiakanax rateifinakōikani choakani māmāi tāpikanax a omiskōipakenakafa mēra Niospa ato potaxiaino. ²⁰ Akka mī yoimis: “Ē Jesús chanīmara fai. Nāskakē ē Nios fe nīpanaka,” ixō mī shināfikī, mī afaa sharafamisma. Nāskakē mī shināsharaima. Akka ē mia yoisharapai. ²¹ Akka nōko xini Abrahamnoa shināfe. Niospa yoini iskafakī: “Mī fake Isaaca ea fishkoyamafe,” fani. Askafaino Abraham āfe fake fishkomītsanama, āfe fakekōifiano. Nāskakē Niospa Abraham ōini sharakōi māmāi nikasharakōiaino. ²² Akka shināpo. Abraham Nios chanīmara faxō nā yoiai keskara ani. Akka Abraham yoikī iskafanima: “Epa Niospa, ē mia chanīmara fafiakhō mīa yoiai keskara ē akima,” ixō yoinima. Askafaino akiki Epa Nios inimakeranima. Abraham Nios chanīmara faxō, Niospa yoia keskara ani. Nāskakē Nios akiki inimakōini. ²³ Taefakī kirika kenenifo Abraham Nios chanīmara fakōinaito. Nāskakē Abrahamki Nios inimani. Nāskaxō Niospa yoini: “Mīfi efe rafepakenakakī,” fani.

²⁴ Nāskaxō mā tāpitiro fetsa iskaito: “Ē Nios chanīmara fai,” ifiaxō Niospa yoia keskara akima, askara yorakai Nios fe nīpaxatiroma. Niospakai, “Ē mikiki inimai,” fatiroma. Akka fētsa chanīmara fakī, Niospa yoia keskara aki, nāfi Nios fe nīpanakakī. ²⁵ Nāskarifiakī nā xotofāke Rahab Nios chanīmara faxō nā israeli rafe ato oneni tsōa ato reteyamanō. Rahab taeyoi chota feromakōi iyopaoni. Mā askapaonixakī, chipo Nios Ifofaax sharakōi ipaoni. Nāskaxō nā israeli rafe Josuē ato nīchini Jericó anoafō ato ōitanōfo onexō. Nā rafe Rahab ato oneni tsōa ato reteyamanō. Nāskaxō ato fai fētsa nīchini fotanōfo. Nāskakē nā xotofake Rahabki Nios inimani.

²⁶ Mā nō naano, nōko fero mēsho nomakinoax tsekeano, anā nōko yora shara itiroma. Nāskarifiakī nō Nios Ifofayamakī nō isharatiroma. Nāskaxō Niosxō nō fetsafo nō axosharatiroma. Nāskaxō nō tāpitiro nō Nios chanīmara faimākai.

3

Meka shara fisti yoikāfe

¹ Efe yora mīstichti, ē mato afara fetsa yoinō. Mā Niospa meka tāpifixō nikasharaxoma mā ato tāpimapaiyamakāfe. Akka nō Niospa meka nikasharaxoma nō ato yoiaito noko nikaxaxō akairi afara chakafatirofo. Nāskakē Niospa ato omiskōimafiakī, ato omiskōimasharanima. Akka nokoroko omiskōimakī finai. Nāskakē Niospa meka nikasharaxoma nō ato yoitiro. ² Akka fake yome rama finipai paketiro kerex sharaxma. Nāskarifiakī nōko mekapa nō afara chakafatiro, Nios Ifofasharaxoma. Akka fētsa meka chaka yoikīma meka shara fisti yoifafāini nā keskaratokai afaa fetsa chakafaima āa kexemesharatiro. Akka shara ifiakani tsoa shara imisma, afara chakafamisfo.

³ Akka shinākapo. Āfe ifāfe āfe kamayo renexti fatiro. Askatari afara pishta aostatiro. Nāskax a kamakī tsoax ifo kafāsatiro. Akka kamayo efapafiano nā aostamea pishta āfe yora kexetiro nā kapaiyai ari kanō. ⁴ Askatari shinākapo. Kanōa efapanāfāiano āfe fiti pishtafakeshta. Kanōa efapanāfāiano āfe fiti āfe ifāfe chiataxō nā iyopaiyai ari iyotiro. Faka faipafāfekē, nā iyopaiyai ari iyotiro ifāfe chiataxō. ⁵ Nāskarifiakī nōko anari efapayamafiano nō yoikī chakakōi nō yoitiro. Nāskarifiakī chii pishta nō kētefano nefekī chii xoisafatiro. Nāskakī nōko afarafo noko kōatiro. ⁶ Nāskarari nōko ana pishtafiano, nō chakai mekaino, nōko meka efapatiro. Nāskakē nō yorafo chakana fatiro Satanās noko pāraino.

⁷ Akka yoināfo fetsa fetsatapafoya, peyafoya, xōchixaraifori, faka mēra ikafoya nō ifofamatiro. ⁸ Akka nōko anakai tsōa ifofamatiroma noko nikanō. Nōko anā nō mekai chakakōi imis nō itiro. Nā rono pae keskarakōi. Rono paekapato noko chachiano nō omiskōitiro. Nāskarifiakī nōko anā yora fetsa mekafakī, chakafakī, nō omiskōimatiro. ⁹⁻¹⁰ Nā

nōko ana fistichi nō afara chaka yoitiro. Nāskatari nā nōko ana fistichi nō Epa Nios yoitiro iskafakī: “Epa Niospa, mī sharakōi. Mī nōko Ifo,” ixō nō yoitiro. Epa Niospa keyokōi yorafo onifani āfe ōiti keskara inōfo. Askafixō nō fetsa mekafakī chakafatiro, askafayamakī Niosnoa meka shara nō yoitiro. Efe yora mīstichi, meka sharafekai meka chaka osia shara itiroma. ¹¹ Mai mēranoax faka tsekeai shara itiro, askayamai faka pota tseketiroma. Nāskax nōko faka fiti anoax faka pota fe faka shara tseketiroma. ¹² Shīko fanax xopaya foaitiroma. Askatari sātera fanax fāraya foaitiroma. Askatari faka fiti anoax faka pota tsekeaino, faka shara tseketiroma, nō mea shara itiroma. Nāskarifikī yōra āfe shinā mēraxō Jesūs shinākī fena faaa chaka shināyotiroma.

Nios fistichi noko shināsharamatiro

¹³ Akka fētsa mato mēraxō Niospa meka tāpisharax āfe ōiti keskara shara ikī, nā keskara yōra shara ixō mato axosharafāitiro. Nā keskara yōra āfe shinā mēra shinākī iskafatiro: “Ē afaayamafixō ē Jesucristoōnoax isharaxō, ē yorafo sharafai,” ixō shināitiro. Askaxō mā noko ōimani Jesūs Ifosharafakī. ¹⁴ Akka mā isharaxoma, mā fetsafāfe fiai keskara mā fipaimis, askatari mā finakōia ipaimis, ato finōpaiyanā mā askaino mato ōiti fekaxetiro. Nāskax mā isharatiroma. Nā afara chaka fisti mā shinātaifa, askarafo shināi, inimayamakāfe. Anori shināi iskayamakāfe: “Ē Niospa meka tāpishara, ē āfe ōiti keskarakōi,” iyamakāfe. Anori shinākī mā yoisharaima. ¹⁵ Mā askara chaka shināito Niospa mato shināmanima. Mā chaka shināi keskara nā Jesūs Ifofaafāfema nāskarari shinākani, Satanās ato shināmanaino. ¹⁶ Fetsafāfe fiai keskarari mā fipaimis, askatari mā ato finōpaimis, askafakī nā Jesūs chanimara faafo fe mā feratenāmis. Askaxori mā ato fekaxtefapaimis. Askatari afara chaka fetsa fetsatapafo mā ato amamis.

¹⁷ Akka Niospa noko mēstesharakōi noko shināmasharakōitiro. Nō shara inō, askatari nō fetsafo fe nō mēnāpaiyanā, tanaimakōi isharakōixō fetsafo nō noisharakōitiro afara axosharayanā, askatari fetsafāfe noko yoipaiyai keskara nō nikakōitiro, askatari fetsafo omiskōiaino nō noiyanā nō axosharatiro. ¹⁸ Nō afara fanaxō, āfe fimi nō fitiro mā fimiyanō. Nāskarifikī nō isharakōixō a Niospa apaiyai keskara nō shināsharaxō, nō fetsafo shināmasharatiro, tanaima isharakōinōfo.

4

Niospa fichipaiyaima fichipaiyamakāfe

¹ ¿Afeskai mā raenā faatanāsharakōimamē? Akka māto shinā mēraxō afarafo mā chakafapai. Nāskax mā feratenā faatanāpai, ōitifishkiyanā. ²⁻³ Mā afarafo fipaikī fiamax mā ōitifishkikī finakōikī mā fetsafo meepaiyanā mā retepaitiro. Akka a Niospa mato ināpaiyai mā yōkama. Nāskakē Niospa a mato ināpaiyai mato ināitiroma mā yōkayamaino. Nā afama mīstifo mā apaiyai nā fisti mā shināi, fetsafo shinākima. Askaxō mā afara yōkafaiito Niospa mato ināima, mākōimāi mā afarafo fipaiyaito fetsafo inākima.

⁴ Akka kēro feneyafix feronāfake fetsafo fe imis keskarakōi māri nāskarakōi. “Jesūs ēfe Ifoki,” ifaxō mā Jesūs Ifofakōinama. Nā mā shināi keskara chakakōi. ¿Mā tāpiamamē mā fetsafo feta afara chakafakī, mā Nios noima? A Niospa fichipaiyaima, mā fichipaiax mā Nios fe rafetiroma māmāi noikaspakī.

⁵ Niospa āfe Yōshi Shara nō mēra naneano nō afe rafepakenaka. Akka shinākapo. Nō afara fetsa noikōikī nō Nios noisharaimano āfe Yōshi Shara shināmitsatiro. Akka Niospa meka kirikaki kenenifo iskafakakī: “Epa Niospa āfe Yōshi Shara nō mēra naneni. Aōxō noko noikī finakōi. Akka nō Epa Nios noisharayamakī nō afara fetsa noikōiaino āfe Yōshi Shara shināmitsatiro,” ixō kirikaki kenenifo. Nāskakē kaxpa noko kenexonifoma. ⁶ Askatari Niospa meka kirikaki kenekī iskafanifo: “Fētsa Epa Nios nikakaspakī āa apaiyai keskara fisti āi āa kakapaiyanā, aa keskara feka, Epa Nios afe rafetiroma, akiki inimaima. Akka fētsa Epa Nios nikapaiikī Epa Nios fenai afe isharapakexakī. Nāskakē Epa Nios akiki inimatiro, askara fe Epa Nios rafesharatiro,” ixō kirikaki kenenifo. Nāskakē Epa Niospa āfe Yōshi Shara nō mēra naneano nā fisti nō noikōiaino Epa Niospa noko axosharai nō Ifofasharanō.

⁷ Nāskaxō yoikī iskafakāfe: “Epa Niospa, mā amapaiyai keskara ea amafe,” ixō yoikāfe. Akka Satanās mato afara amapaiyito yoikī iskafakāfe: “Satanās, Jesucristo ēfe Ifoki ea fekaxtefakima, emakinoax katāfe,” ixō yoikāfe. Mā askafaino mato makinoax ichotanō.

⁸ Nios Ifofasharakāfe. Mā Nios Ifofasharaino mato fe rafēi. Nāskakē mato chaka xatekāfe faaa chakafapaikakima. Akka fētsa Nios Ifofasharapaifikī, Satanāsri ifofapai, askatamaroko, Nios fisti Ifofasharakāfe. ⁹ Afara chakafaxō shināchakakōikāfe inimakakima. “Ē afara chakafaax ē rafikōiaino meei,” ixō shinākāfe. ¹⁰ Nāskakī Jesūs yoikāfe iskafakakī: “Jesūs mī ēfe Ifofekē ē mia chakafakī. Ea anō chaka soaxōfe,” ixō yoikāfe. Mā askafaito Niospa

mato inimamai. Nāskakē noko yoixii iskafakī: “Ē mia noi. Ē mia anā chaka soaxonō, mikiki inimayanā,” ixō noko yoixii.

Fetsaōnoa yoikī chakafayamakāfe

¹¹ Niospa meka noko yoikī iskafakī Moisés kirikaki keneni, Niospa shināmanaino, “Nōinā faatanākāfe,” ixō noko yoini. Nāskakē fetsafo pārāyamakāfe, ato chakafakī mekafayamakāfe. Mā ato chakafakī Niospa noko yoini keskara mā akima ato noikīma. Akka, “Niospa meka chakara,” nō fatiroma nikakaspakī. Askatamaroko nō nikakōisharatiro. ¹² Nios fistichi noko yoini afeskax nō ishariatromākī, ares fistimāi xanīfokōixō. Ares fistichi tāpikōia nō afe keskara ikamākī, shara iyamai chaka nō ikamākī. Ares noko ifitiro. Akka noko ifiyamakī omiskōipakenakafo mēra noko potatiro. Nāskakē fetsafo pārāyamakāfe.

Mā kai tāpiama a inōpokoai afe keskara iximākai

¹³ Meka fetsari ē mato yoipai. Ea nikakapo. Mā kai afaa tāpiama fatora penata afara afeskara ifiaito mā yoimis iskafakī: “Na penata nō kayamai, penama nō kai pexe rasi ano. Anoxō nō xinia fisti akikai. Anoxō nō kori ichapa fixii nōko afarafo minixō,” ixō mā yoimis. ¹⁴ Nāskakē anorima mā shinākōimis. Mā kai afaa tāpiama fatora penata afara afeskara afiaino. Akka fakishpari nai nifi keyopaketiro. Nāskax yamarisatatiro. Nāskarifiiai nō nīpanakama. Fatora penata nō narisatani. ¹⁵ Nāskakē mā yoitiro iskafakī: “Niospa fichipaiyai keskara ē iki. Nāskakē nā apaiyai keskara ē aki,” ixō yoikāfe. ¹⁶ Askatamaroko mā kakapaikōimis. “Ē afara ichapa fii,” ixō mā yoifafāni. Niospa mato amapaiyai keskara mā shināima. Nā mā shināi keskara chakakōifo. ¹⁷ Niospa mato amapaiyai keskara mā tāpifixō mā askara atama mā afarafo chakafamis.

5

Nā afama mīshti ichapayafa Santiago ato yoini

¹ Nikakapo kori ichapayafāfe, mato Niospa omiskōimaxii. Nāskakē oiakāfe mā mā omiskōixikai. ² Māto afama mīshtifo mā payokomea. Māto rapati sharakōifo mā nakaxfāfe pikī keyoa. ³ Māto kori mā mekemis mātonā fisti mā fapaikī. Mā mekeaino mā xina. Nāskakē fetsafāfe tāpitirofo māto kori mā mekea mā xinaano, toa pishta ināxoma, mātonā fisti mā fapaikī. Mā askafaito Niospa mato ōi. Akka mato yoikī iskafaxii: “Māfi afara fishkomīsamiskī. Mā kai tsoa noimisma. Nāskakē ē mato omiskōimaxii,” ixō yoixii. ⁴ Shinākapo. A mato yonoxomisfo mā ato afaa ināsharamisma, mā ato feparamis finōmafāi fifiakī. Nāskakē Epa Nios yoimisfo iskafakakī: “Epa Niospa, noko axōfe nōko patoronō noko kopifamismakī,” ixō yoimisfo. Askafaifono Niospa ato nikamis. Akka a mato yonoxomisfo mā ato omiskōimani keskara Niospa mā tāpikōia. ⁵ Askatari mā afama mīshtifoyax mā isharakōia, afaa yopatama. Afama mīshti ichapayata, ichapa pifāi, rapati ichapayata, nā afarafo mā fipaiyaifo mā ffixaxō fetsafo mā noimisma. Fetsafo keskarama mā isharakōikē, Niospa mato omiskōimakī finakōixii mā fetsafo noiyamaito. ⁶ Fetsafāfe afaa chakafayamafiakē mā ato pārāmis xanīfo yoikī, xanīfāfe ato retemanō. Nāskatari ākai afeskax ifimetirofoma a yorafo.

Omiskōifikī tenekāfe, Nios kifīkāfe

⁷ Efe yora mīshtichi, mā omiskōifi fena fenayamakāfe. Nōko Ifo kachikiri fayamakāfe. Akka nō tarepa xiki fanano fenāmāshta foaitiro. Nāskakē nō fena fenakima. Nō oi manayotiro. Akka mā choshiano nō fisharakōitiro foaisharano. ⁸ Nāskarifikī manasharayokāfe nā nōko Ifo Jesús chaima nokoaitia. Nāskakē āfe meka kachikiri fakākima, nikasharakāfe shināchakakākima.

⁹ Efe yora mīshtichi, feratenāyamakāfe Niospa mato omiskōimayamanō. Nā nōko Ifo Jesús chaima nokoaitia nā yora chakafo ato omiskōimaniyoi. ¹⁰ Efe yora mīshtichi, ē mato yoisharapai, shinākapo. Niospa meka yoimisfo Niospa meka yoikani omiskōipaonifo. Omiskōifikani fena fenapaonifoma. Nōko Ifo nikaki finakōipaonifo. Āfe meka yoikī enepaonifoma. ¹¹ Nāskakē Nios atoki inimani. Askatari nōko xini Job omiskōifikī teneni. Omiskōifikī Nios potanima. Nāskakē Nios Jobki inimani. Nāskakē Niospa Job sharafarisafatani. Nāskatari Niospa Job āfe fake fetsafoya āfe ina fetsafori ichapa anā ināni. Nāskakē nōri nō Job shinākī nō tāpisharatiro Niospa noko noisharakōiaito.

¹² Efe yora mīshtichi, ea nikasharakapo ē mato yoinō. Afara chanīma fisti yoifafāikāfe. Nāskakē, “Ēje, ē mia axōi,” ixō axosharakāfe. Akka mā yoikī iskafakī: “Maa. Ē mia axōima,” ixō anori yoita ayamakāfe. Mā askafamiskē keyokōichi tāpitirofo mā chanīkima yoimiskē. Nāskakē iskayamakāfe: “Ē mia pārāito, Epa Niospa ea omiskōimatiroki,” ixō yoiyamakāfe Epa Niospa mato omiskōimayamanō.

¹³ Fetsa omiskōikī Epa Nios kifitiro kexesharanō. Askatari fetsari inimai fanāitiro. “Aicho Epa Niosī, mī fāsi sharakōi,” ikax fanāitiro. ¹⁴⁻¹⁶ Askatari nā isinī ikaito Jesús chanīmara faafo

ãto kexemisfo kenatiro Nios kifixonõfo. Nãskakê ichanãkaxõ a isinĩ ikai Nios kifixoxikakĩ. Taefakĩ a mã afarafo chakafamis kãimakãfe. Nãskax mã ranã Epa Nios kifixonãkãfe mato chaka soaxonõ, askatari a isinĩ ikairi sharafanõ. Nãskakê a isinĩ ikai xiniyaxõ femãkãfe, Epa Nios kifixoyanã. Mã nõko Ifo chanĩmara fakõixõ nõko Ifo mã kifixonaino, nõko Ifãfe a isinĩ ikai sharafatiro. Askatari afara chakafaino Niospa ãfe chaka soaxotiro. Nõ Epa Nios chanĩmara fakõita nõko chakafori keyokõi kachikiri faxõ nõ kifixaito noko nikakõitiro. Nõ yõkai keskara noko afama mĩshti axotiro.

¹⁷ Nã Nios yoimis ãfe ane Elías feronãfake noko keskarari ini. Nãskaxõ Epa Nios fãsikõi kifixaino oi inima. Kifixĩ is kafani: “Epa Niosi, efe yorafãfe mia kachikiri faafokĩ, fena oi imayamafe, efe yorafãfe anã mia Ifofayonõfo,” ixõ yoini. Askafaino xinia tres ata mã xinia fistiri keyoaino oi inima. ¹⁸ Askata anã Elías Epa Nios kifixini oi inõ. Nãskakê oi ranã ikaino fanafõ foaisharani.

¹⁹⁻²⁰ Efe yora mĩstichi, fẽtsa Niospa meka kachikiri fakĩ anã Jesús Ifofaimano, nã Jesús chanĩmara faato yoikĩ iskafatiro: “A mã afara chakafamis xatefe, anã Jesús Ifofaxii,” ixõ yoiaino anã Jesús Ifofatiro. Nãskaxõ fẽtsa mã ãfe chakafo xatemanano, Niospa ãfe chaka soaxoxii. Nãskakê nã feronãfãke afara chakafapaoni Niospa ãfe chaka soaxõ, anã Niospa shinãchakaima fẽtsamãi taefakĩ ãfe chaka xatemanano. Nãskakê a omiskõipakenakafo mẽra kaima. Nãskakẽri mã ato yoisharatiro anã Jesús Ifofanõfo. Nã tii.

Santiago

Pedro Jesús Chanĩmara Faafu Kirika Kenexõ Fomani

Pedro Jesús Ifofaafu paxkanãnifono ato kirika kenexõ fomani

¹ Ëkĩa Pedro. Jesucristo ea nĩchini aõnoa ã ato yoimis inõ. Niospa mato katoni afe yorafo mã inõ. Akka mato potaifono mã Jesúsnoax paxkanãnino ã mato kirika kenexõ fomai mã tãpinõ. Ponto anoafu fomata, Galacia anoafu fomata, Capadocia anoafu fomata, Asia anoafu fomata, Bitinia anoafu fomata, ã mato fomai. ² Epa Niospa taefakĩ mato katoni mã afe yorafo inõ, afe Yõshi Sharaõxõ nã mato amapaiyai keskara mã anõ, mã Jesucristo nikasharakõinõ. Akka afe Fãke Jesús mato nãxoni afe imiõxõ mãto chaka mato soaxoxiki. Niospa mato noikĩ mãto õiti mato sharafaxonõ ixõ ã matoõnoa shinãi.

Jesucristoõnoax nõ Nios fe ipaxatiro

³ Nãskakẽ nõko lfo Jesucristo afe Apa Nios nõ aicho fatiro: “Mĩ fãsi sharakõ;” ixõ nokomã noikõiaino afe Fake Jesucristomã nõkoõnoax naax anã otonikẽ. Nãskaxõ fake yome rama kãia keskara shara noko imai õiti fenasharayakõ. Nãskakẽ nõ afe isharakõipakenaka. ⁴ Nãskaxõ noko ikisharapakenaka nõ afe ipaxanõ. Akka nõ afe fakekẽ nã nai mërãxõ noko mekexona nõkonãri ixii. Nã Niospa noko mekexona afanã afeskafatiroma, chakanari atiroma, askatari keyotiro. Charofo keskarama. Charofo sharashtafiax chipo otsi fetsetiro. Nãskakẽ nãfo Niospa noko mekexona nõkonã inõ. ⁵ Akka mã Nios chanĩmara fakẽ, Epa Niospa afe sharaõxõ mato kexesharafafãini nã Jesús oaitĩa mã omiskõinõma, nã oaitĩa afe isharapakexakĩ a mato itipinĩshara faxoni ano.

⁶ Nãskakẽ mã inimai finakõikakaini, omiskõifi nono mai anoax. Mã omiskõifiax chipo Jesús fe mã isharakõipakenaka. ⁷ Akka mã Jesucristo chanĩmara fakõini mã oa oro keskara. Akka kooaito mã õitiro orokõimãki, chakaya osiyamaito. Nãskarifiakĩ Niospa noko tãpitiro nõ chanĩmara faimãkai, akka oro sharafiano nõroko finõinõfofana. Akka nõ oro sharafiax keyotiro. Akka mã Epa Nios chanĩmara fasharakõiyana mã Jesús potayamaino Jesús anã nãmã matoki fotoax inimasharakõixii. Iskakakĩ mato yoixii: “Aicho, mĩ ea chanĩmara fakõimis. Mĩ efe isharakõipakenaka,” ixõ mato yoixii.

⁸ Mã Jesucristo noisharakõ õiyamafikatsaxakĩ. Askatari iskaratĩa mã chanĩmara fakõini õiyamafikatsaxakĩ. Nãskakẽri mã inimai finasharakõiyana mã tsoa yoisharatiroma. ⁹ Nõmã chanĩmara fasharakõiax, nãskax nõ afe isharakõipakenaka.

¹⁰⁻¹¹ Nã Niospa meka yoimisfãfe a inõpokoai yoikakĩ Cristoõnoa meka shara yoipaonifo, Niospa Yõshi Sharapa ato shinãmanaino. Iskakakĩ yoinifo: “A noko noikĩ noko ifimis nokoki oxii, mato omiskõioxoxiki mã aõnoax isharanõ,” ixõ kenenifo. Ato askafafiaino tsõa tãpisharapaonima afeskaxoma tãpisharapaipaonifo. ¿Tsoamẽ noko ifimis ixiai afetiari oximẽ? ixõ shinãpaipaonifo. ¹² Akka Niospa Yõshi Sharapa ato tãpimani a inõpokoai yoiaifo keskara, akka afãfe niyokaxõ õiyonifoma. Akka afãfe õiyamafiaifono mãroko mã mã õia. Akka na meka shara Jesucristoõnoa keyokõichi mã nõ nikamis. Noko yoiaifãfe Epa Niospa afe Yõshi Shara atoki nĩchini nai mërãxõ Jesucristoõnoa noko yoinõfo. Nã mã nikamis keskarari Niospa ajirifãferi tãpipaikõikani.

Epa Niospa noko yoini Jesucristo keskara shara nõ inõ

¹³ Nãskakẽ itipinĩsharakãfe shinãsharakõiyana. Nã Niospa noko noikĩ noko afara shara inãxiaitĩa Jesucristo oaino. Nãskakẽ manasharakõikãfe. ¹⁴ Mãfi Niospa fakefoki. Nãskakẽ Epa Nios nikasharakõikãfe. Mato amapaiyai keskara mã tãpiyopaonima. Mã afara chakafapaoni keskara anã ayamakãfe. ¹⁵ Askatamaroko afaa fetsa shinãtama isharakõikãfe. Akka Nioskai afaa chakaya osiama. Niospa mato katoni a keskara shara mã inõ. ¹⁶ Akka Niospa meka kenekĩ iskafanifo Niospa ato shinãmanaino: “Ë isharakõimiski. Nãskakẽ isharakõikãfe,” ixõ Niospa ato shinãmanaino kenenifo.

¹⁷ Shinãkapo. Mã Epa Nios kifikĩ Epa mã famis. Nãskax nõ afe fakefokẽ noko õi. Akka a afe meka nikamisfo Niospa ato shara fai. Akka a nikamisfoma ato omiskõimatiro. Ares fisti Epa Niospa noko õimis mẽstekõi. Nãskakẽ isharakõikãfe nono nãmãnoax. Nãskaxõ Nios shinãsharakãfe meseyana. ¹⁸ Akka mãto xinifãfe mato tãpimapaonifo keskarato mato nimapakexatiroma. Mãto xinifo Nioski mesepaonifoma. Aakõi ipaonifo. Nãskakẽ mãri ato keskara ipaoni chaka shinãi. Mã askaito Niospa mato ifini mã anã chaka shinãyamanõ a mã ipaoni keskara Nios shinãmax. Akka shinãkapo. Mã mã tãpia a oro sharakõi mã Nios inãx mã aõnoax nĩpaxatiroma. Askatari kori exe mã inãx aõnoaxri mã nĩpaxatiroma. ¹⁹ Akka Cristo fistichi noko nimatiro. Atokai afaa chakafamisma, nã oveja fake meema keskara sharakõi. Jesús noko nãxoni afe imi foni noko imasharapakexakĩ nõ anã chaka inõma. ²⁰ Epa Niospa mai onifatama afe Fake Jesús katoni noko nimapakexanõ. Nãskakẽ

fetsafāfe tāpiyopaonifoma, akka iskaratīa Epa Niospa mā mato tāpimana. ²¹ Jesucristoōxō mā Epa Nios chanīmara fai, Epa Niospa Jesucristo otoax akiki inimakōini. Nāskakē mā iskaratīa chanīmara fakōini, Nios manakōiyanā afe ipaxakī.

²² Akka mā mā Jesucristoōnoa meka shara nikakōixō anā afaa chaka shināyamakī. Mā mā isharakōixō mā fetsafo noikōi. Nāskakē māa ranā nōinā faatanāsharakōikāfe māto shinā sharafoyxō shināsharakōita. ²³ Nāskakē nā mā rama fake kāia keskara shara mā. Akka māto epa feta māto ēfa mato fake fifiakanax chipo natirofo. Akka Niospa āfe meka sharaōxō fena keskara shara noko ima, nā keyonakama. ²⁴ Akka kirika ano kenekī iskafanifo:

Keyokōi yorafo fana keskarafo, sharakōifikanax nā charofo keskarafo. Akka nā fanafo naino āfe charofo keyopaketiro. Nāskarīfiai keyokōi yorafo nīpaxatirofoma, keyokōi natirofo. ²⁵ Akka nōko Ifāfe āfe mekakai keyonakama, ixō kenenifo. Nā mekaōnoa Jesucristoōnoa fetsafāfe mato yoimisfo mā afe ipaxanō.

2

¹ Nāskakē nā mā afara chakafamisfo xatekāfe. A mā ato pāramisfo, askatari a mā ato feparamisfo: “Noko sharara fanōfora,” ixō nāfori xatekāfe. Nāskatari a fētsa fiai tii fipai fekaxtemis iyamakāfe. Askatari fetsafo ato chakafapai chanīmis iyamakāfe. ²⁻³ Askatamaroko nā fake rama kāiato yosixiki chocho apaiyai keskafakī, māri Niospa meka shara fichipaikāfe, oa fake yomē chocho aki yositiro keska shara ixikakī. Mā mā tāpiaki nōko Ifāfe mato shara faxōaito. Nāskakē nā Epa Niospa mato amapaiyai keskara fisti akāfe.

Cristo nā tokiri mitsisipa keskarakī

⁴ Nō pexe fakī tokiri mitsisipasharakōi nō fenatiro, pexe mitsisipa sharakōi inō. Akka tokiri mitsisipakima nō pexe faano pexe shara itiroma. Nōko Ifo Jesucristofi nāskarakī oa tokiri mitsisipakōi keskara shara. Nāskaxō afama mīshti fatiro. Nāskafekē tsōa chanīmara famisma, nōko Ifo fichipaimisfoma. Nāskaxō yoimisfo iskafakakī: “Afeskakīkai nō fichipaitiroma,” ixō yoimisfo. Akka Epa Niospa Jesús katoni noikōikī nōko Ifo inō. Nāskakē akiki fekāfe Ifofaxikakī. ⁵ Nāskarīfiai Niospa mato tokiri pexefā keskara faxii mā afe yorafokē. Askatari mā ato Epa Nios kīfixomis inō mato imaxii afaaya osiama sharakōi mā inō Jesúsnoax, Jesúsmai noko nāxonikē. Nāskakē Nios aicho fakāfe akiki inimakōikāfe, “Epa Niosi, nō fasi sharakōi,” fayana. ⁶ Akka kirika ano kenekī iskafanifo, Niospa ato shināmanaino:

Ōikapo, ē Cristo ōia ares fisti sharakōi. Nāskakē ē katoni efe yorafo afe yora inōfo. Nā tokiri mitsisipa keskarakōiki. Nāskakē afe yorafo afe isharakōipakenakafo. Nāskakaxō Cristo chanīmara fakaxō anā afaa chaka shināpakenakafoma. Askatamaroko afe inimakōipakenakafo, ixō Niospa yoini.

⁷ Nāskakē nō Jesús Ifofaxō nō shinākī iskafatiro: “Jesúsfi nā tokiri kere keskarakōikī, nāskax sharafinakōiaki,” ixō nō shinātiro. Akka a Jesús Ifofaifāfema askara shinākanima: “Oa tokiri shara nō potatiro,” keskafakani. Akka aōnoa yoikī kirika kenekī iskafanifo Niospa ato shināmanaino:

Oa tokiri pexe famisfāfe tokiri efapa shara potafono, pexe ifāfe ato yoitiro iskafakī: “¿Afeskakī na tokiri efapa mā potaimē? Potayamakāfe, efapa sharaki. Ē fichipaikai ē akiki pexe fanō,” ixō pexe ifāfe yoitiro, ixō yoinifo Jesúsnoa yoikakī. ⁸ Askatari kirika kenenifo iskafakakī Niospa Yōshi Sharapa ato shināmanaino:

Tokiri efapafai nēxpakīa rakano tsōa ōiamax akiki otisikaini paketirofo keskakani. Nāskarīfiai nō tsōa nōko Ifo chanīmara fakanaxma, oa pakeai keskarakano fenokanax Epa Nios ika ari fopafai nā omiskōipakenakafo mēra fokani, ixō kenenifo. Niospa anori yoifinino Cristoōnoa nikayamakanax fenopakenakafo. Nānori kirika kenenifo, Niospa ato shināmanaino.

⁹ Akka māfi askaramakī. Niospa mato katoni afe yorafo mā inō. Nāfi nōko Xanīfokōikī mā yonoxotiro, fetsafori mā ato kīfixotiro Jesúsnoa ato tāpimaxiki. Noko aa keskara shara imaino mā afe yorakōi itiro. Nāskaxō aōnoa fetsafo mā yoisharatiro iskafakī: “Epa Nios sharafinakōia afara noko sharafaxomis,” ixō nō ato yoitiro. Epa Niospa mato katoni afe yorakōifo ikax xafakīakōi shara mā afe ipaxanō, anā fakish mēra ika keskara mā inōma. ¹⁰ Akka māakai Nios shināyopaonima, afe yorakai mā iyopaonima. Akka iskaratīa mā afe yorafo, taeyoi Niospa mato noifaino mā tāpiyopaonima. Akka iskaratīa mato noikōiāito mā mā tāpia.

Nō Niospa yorafo ikax nō shara itiro

¹¹ Efe yora mīshtichi, ē mato yoisharapai ea nikasharakāfe. A Nios Ifofaafomafo fe nō ato fe ikax oa yora fetsa keskara nō iki. Askafax nōkai ato fe ipanakama. Akka nōroko Epa

Nios fe İpanaka. Nāskakē nā Epa Nios İfofaafoma keskara iyamakāfe. A mato shināmapaiyaifo keskara shināyamakāfe. Mā ato keskara itiroki, Satanās mato chakafamapai kiki. ¹² Nāskakē ato mēranoax Jesūs İfofaax isharakōikāfe. Akka afāfe mato yoikī chakafamisfo fanīrira mato mekafakakī. Nāskakē ato kopiyamakāfe. Tanaimakōi ato mēra ikāfe. Mā askaito mato ōinōfo mā afaa chakafatama mā isharakōikē a Niospa keyokōi noko ichanāfaitia mā mai keyoaino. Nāskakē mato iskafakani: “Aicho, na yorafo fāsi sharakōifo, nō ato chakafafaiino noko kopikanima, Niosxō noko shara famisfo. Fāsi Nios sharakōi,” ixō yoinōfo.

¹³⁻¹⁴ Nōko İfo Jesūs fichipaiyai keskafakī, xanīfofo nikasharakōikāfe. Askatari a noko İkinā nōko xanīfo finakōia nikasharakōikāfe. A xanīfo fetsafori ato nikakāfe. Nā xanīfo finakōiato ato xanīfo imakī, afāfe nā afara chakafaifo ato omiskōimanōfo, askatari a afara shara famisfo ato yoisharanōfo. ¹⁵ Nāskakē Niospa fichipaiyai keskafakī mā fetsafo afara shara faxōfāfikāfe. Nā afaa tāpiamafāfe shara shināmisfomakī, askatari Niospa meka tāpiamafomakī ōikaxō anā mato mekafatirofoma māmāi ato shara faxōaito a Niospa fichipaiyai keskafakī.

¹⁶ Jesūs fisti mato İfokōi, akka afaa fetsa shinātama isharakōikāfe. Niospa mato amapaiyai keskara fisti shinākāfe. Mā askax afaa fetsa mato ifo itiro. Afaa chakafatama Nios yonosharaxōfāfikāfe. ¹⁷ Nāskakē keyokōi yorafo shināfāfikāfe. Nā Jesūs İfofaafori ato noikōikāfe. Niosnoa shinākōikāfe iskafakī: “Ē Nios noikōi nā ea yoiai keskara ē nikakōi. Ēkai nikayospapaima ea omiskōimanōma,” ixō Niosnoa shinākāfe. Nāskaxō mato xanīfofo nikaxapayamakāfe, ato nikasharakāfe.

Cristo noko omiskōixoni keskai nōri nō aōnoax omiskōitiro

¹⁸ Ato yonoxomisfāfe mato xanīfofo ato nikasharakōikāfe. Nā mato sharafaifos shinākakīma. Nā yora chakafāferi mato yonomamisfoki ato nikakāfe. ¹⁹ Mā afaa chakafayamafiakē mato xanīfāfe mato omiskōimanaino Nios shināki tenekāfe. Mā askaito Epa Niospa matoōnoa yoisharai kiki. ²⁰ Akka mā afara chakafakē mato xanīfāfe mato omiskōimanaino, Niospa mato iskafakī yoitiroma mā teneaito: “Mī afara sharakōifāa,” ixō mato yoitiroma māmāi afara chakafakē. Akka mā afara sharafaino mato omiskōimanaifono mā omiskōifināfikī mā tenekē, nōko İfo Niospa matoōnoa yoikī: “Sharakōifo,” mato fatiro. ²¹ Cristo nokoōnoax omiskōikōini, nāskakē nōri aōnoax nō omiskōitiro. Nāskax nō aa keskara shara itiro. ²² Cristokai afaa pishta chakafamisma, askatarikai tsoa pishta pāramisma. ²³ Fetsafāfe mekafakakī İchafiaifono, atorikai kopikī tsoa İchamisma. Askatari omiskōimanaifono, “Ēri mato kopixii,” ixō ato yoinima. Askatamaroko Apaōnoa shinākī iskafani: “Epa, mī eōnoa tāpiaki. Nāskarifikī mī ato tāpikōia. Nāskakē a mī ato chipo omiskōimaxiai chanīmakōi,” ixō Apa shināni, Apamāi mēstekōi ikē. ²⁴ Cristo cruznoax noko nāxonī, nōko chaka noko soaxoxikī. Nāskakē nō anā fanīrira shinātiro oa yora naa keskara nō itiro mā noko chaka soaxonano nō afe isharapakexanō. Māraki yora naato afaa shinātiro. Nāskax mēstekōi nō isharakōitiro. Nā noko omiskōixoniōnoax nō isharakōipakexanō. ²⁵ Akka mā teyoi oa oveja fenoa keskara mā iyopaoni afara chaka shināi. Akka iskaratīa mā Cristo İfosharakōi, mato kexesharano oa oveja kexemisto āfe oveja kexetiro keskafakī. Nāskaxō mato kexesharakōiaino mā afe yora iki.

3

Afesax fene fe kēro isharatirofomāki Pedro ato yoini

¹ Nāskarifikī māri kērofāfe, mato fenefo nikasharakōikāfe. Nā Niospa meka shara chanīmara faifāfema mā isharaito mato ōikakī Niospa meka shara chanīmara fanōfo, mā afaa yoiyamata mā isharakōiatio ōikakī. ² Māto fenefāfe mato yoiaifono ato nikaxspakakīma ato nikasharakāfe. Mā Jesūs keskara shara ikaito ōikakī nōko İfo chanīmara fanōfo. ³ Akka mā samasharakōi safexō, foarome sharakōita, teoti sharakōi safeta, parotameti sharakōi mā safekē, mato tsōa tāpitiroma mā ōiti sharaya iyamai mā ōiti chakayakē. ⁴ Akka mā Cristo İfosharakōioxō mā ato ōimasharakōitiro. Māto ōiti mēraxō shināsharakōita, meka mitsisipato mā ato yoitiroma, tanaima sharakōi mā itiro. Fetsafo ōikī ato yoisharakāfe, ato fe isharakāfe. Mā askaito ōikī Niospa mato iskafatiro: “Na kērofo sharakōifo ē ōi,” ixō Niospa mato yoitiroma matoximā inimayanā. ⁵ Nāskakanax kērofo ranāri Nios İfosharakanax isharakōipaonifo. Nāskaxaxō āto fenefo nikakōisharapaonifo. ⁶ Akka nā Sara āfe fene Abraham nikakōisharapaoni, “Ēfe ifora,” fayanā. Nāskax mā isharakōiax, askatari mā meseyamax Sara āfe fenafo keskara mā itiro.

⁷ Akka māri feronāfakēfāfe, mato āfīfo İkisharakōikāfe. Nā kērofokai mitsisipafomakī mato keskara. Nāskakē ato kexesharakāfe, mato feta Nios İfofaafokī Niospa ato noikī atori ifiakī afe ipaxanōfo. Nāskakē mato āfīfo ato noisharakāfe. Mā ato noimax ato kexesharaxoma mā kīfīatio Niospa mato nikasharatiroma.

Afara ato sharafaxōkani omiskōitirofo

⁸ Nāskakē isharakōixō keyokōichi nānori fisti shināsharakāfe. Oa mato fe yora mā noiāi keskfakī ato fe nōinā faatanāsharakōikāfe. Ato shinākī ato axosharafafāikāfe. Askatari, “Nā yora afaa tāpiamafo ē finakōia,” ikaifo keskai askayamakāfe. ⁹ Fētsa mato chakafaito kopiya-makāfe. Askatari mato īchaito kopikiri īchayamakāfe. Askatamaroko ato noisharakāfe, akka Niospa noko katonikī noko sharafakī. ¹⁰ Niospa meka yōra kenekī iskafani, Niospa Yōshi Sharapa shināmanaino:

Mā isharapaikī afara chakafo yoyimakāfe, fetsafo pārayamakāfe. ¹¹ Afara chakafo fīshstayamakāfe, ato makinoax fotakāfe. Askatamaroko afara sharafos akāfe. Afeskax mā isharatiromākī nāskax isharakōikāfe fetsafo fe. ¹² A Niospa meka nikasharakōipaiyafono Niospa ato kexesharakōifāini, Kīfīafāferi ato nikakōimis. Akka a afara chakafamisfo Niospa ato nikatama ato tāpimatiro ato chakafakī,

ixō yorafāfe Niospa mekaōnoa kenenifo. ¹³ ŪMā afara ato axosharaino, akka tsōa mato chakafatiromē? ¹⁴ Akka mā askafiaino mato omiskōimanaifono inimai finasharakōikāfe. Nāskakē atoki meseyamakāfe, askatari shināchakayamakāfe. ¹⁵ Askatamaroko nōko ōiti mēraxō nōko Ifo kīfikī iskafakāfe: “Cristo, mīfī ēfe Ifokōiki. Mīkai afaa chakafamisma, mī sharakōi,” ixō yoikāfe. Askatari fet-safāfe mato iskafafāfe: “Ūfeskaxō mī tāpiamē mī Nios fe ipanaka?” ixō mato yoiaifāfe ato yoixikakī īkisi itipinīsharakāfe ato tāpimasharaxikakī. ¹⁶ Akka māroko isharakōita ato nikasharakōikāfe, mato ōinōfo mā shara ikaito. Māto ōiti fekaxtefayamakāfe. Akka mato chakafakī mekafafāfe iskafakī mato yoikanax: “Na Jesūs Ifofamisfāfe afara chakafamisfo,” ixō mato yoifikanax rāfitirofo māmāi isharakōikē. ¹⁷ Akka nō afara shara faino fetsafāfe noko omiskōimanaifono nō teneaino Epa Nios nokoki inimatiro. Akka nō afara chakafaax nō omiskōiaino nokoki inimatiro.

¹⁸ Akka Cristo nokoōnoax omiskōiax nani nōko chaka noko soaxoxiki. Anākai nanakama nai fistini. Sharakōifiano retenifo. Akka nō chakakōifokē noko nāxoni. Apa Nios ano noko imapakexakī. Akka mā nafīax āfe fero mēsho nanima, anā otoni Āpa Yōshi Sharaōnoax. ¹⁹ Akka mā naax āfe fero mēsho Niospa Yōshi Sharaōnoax a namisfo mēra kayoni a tsoa tseke-tiroma ano, anoxō yoikai. ²⁰ Akka nāfo nayokanaxma taeyoi nikayospakōi iyopaonifo. Nāskaifono Noēri nāno ato fe iyopaoni. Nāskakē Epa Niospa Noē manayopaoni kanōanāfā fayofaino, Noēmāi Epa Nios Ifofakē. Āfe fakefori afe inifo, āto āfīfo fe. Ocho inifo. Nāskakē ato fāka āsanima Epa Niospamāi ato kexesharakē. Akka nā nikayospafo ato fakafānē āsaki mitoni. ²¹ Faka faipafāino kanōanāfā mēra ikiax Noē āfe āfi fe āsanima. Āfe fakefori āto āfīfo fe afe ikikanax āsanifoma. Ocho inifo. Nāskarīfīakī fētsa noko maotisafakī faka mēra noko ikimaxō, noko fininīfōfanaino nō yorāfo ispai nō Jesūs Ifofakī nōko chaka noko soaxonō nō afe ipaxanō. Akka nā noko maotisafafōōxokai nōko choshta nō soatiroma. Askatamaroko nō Nios yōkai nōko chaka noko soaxonō noko īkipakexanō Jesūsmāi mā naax anā otonikē. Nāskaxō nō anā shināchakatama Jesucristoōxō nō shināsharakōi Nios fe ipaxakī. ²² Jesūs Apa ari nai mēra kani Apa Nios fe xanīfokōi ixiki. Nāskakē ājirifāfe āto xanīfōfōfāfe Jesūs finōtiroma nā yōshifāferi. Askatari nā yōshifāferi xanīfōfiakaxō Jesūs finōtirofoma Jesūsmāi finakōikē.

4

Epa Niospa noko āfe shara ināi keskfakī fetsafori nō sharafaxotiro

¹ Nāskakē nā Cristo āfe yora omiskōini keskai, māri nāskai omiskōixikai itipinīsharakāfe. Akka nā omiskōiato anā afaa chaka shinātiroma māmāi āfe chaka xatexō. ² Isharakōixō nā mā apaiyai keskara mā atiroma, nā Niospa mato amapaiyai keskara mā atiro. ³ Mā xini ichapa finōa, nā Jesūs Ifofaafāfema apaonifo keskara mā ayopaoni. Nā mā afara chakafa-paiyai keskara fisti mā ayopaoni. Māto āfīmafo mā fichipaiyaoni. Kērofori askapaonifo. Askatari mēxotaima mā pāepaoni, ato fe ichanāx afarafo chakafayanā ayakī finakōiyānā. Askatari afara fetsafo mā noikōipāoni nā Nioskōi noitama. ⁴ Akka mā anā ato fe rafeyamaxō mā anā ato feta afaa chakafayamaito ōikakī. Nāskaxō mato yoikī iskafatirofo: “Ōikapo. Na yorafāfe anā nofeta afaa akanima,” ikaxō mato chakafakī mekafatirofo. ⁵ Akka ato askafafāfe Niospa ato yoixii iskafakī: “Ūfeskakī māto chaka mā xatekaspakī nā fetsafo mā ato chakafamismē?” ixō ato yōkaxii. Ato askafata ato omiskōimaxii. A niyoafoya a namisfo Niospa ato omiskōimaxii, tsōa Ifofatama āto chaka xateyamafono. ⁶ Nāskakē Epa Niospa āfe meka yoisfō nīchini yorafāfe nayokaxoma Jesucristoōnoa meka shara nikanōfo. Nā namisfāfe niyokaxō nikayopaonifo. Akka mā keyokōi nanifo. Nāskafikē fatora fetsafāfe Jesūs chanīmara fakē Epa Niospa nā nia keskara ato imapakenaka afe ipaxanōfo.

⁷ Nāskakē meka fetsari ē mato yoinō. Nikakapo. Mā chaima mai keyoi kiki. Nāskakē shināsharakāfe, afaa chaka shinātama. Epa Niospa mato shināmapaiyai keskara fisti shinākāfe. Nāskaxō Epa Nios fisti kīfīfāfīkīkāfe. ⁸ Nāskax noinā faatanākōikāfe nō noinākōia sharaki. Fetsa noikōixō nō rae fatiro, a noko chakafai keskara anā shinānōma. ⁹ Fetsafo

māto pexe ano nokoaito akiki inimayanā māto pexe anoxō ifikāfe, ato mekafakī chakafax-oma. ¹⁰ A Niospa āfe Yōshi Sharapa noko tāpimanai keskafakī nōri fetsafo axosharatiro fetsafāferi Nios Ifofanōfo. Nāskaxō fetsafo afara shara faxokī xateyamakāfe. A Niospa afe yorafo noikōiai keskafakī māri ato noikōikāfe. ¹¹ Mā Niospa meka yoi, nā Nioskōi mekai keskaraōxō ato yoikāfe. Māto shināmā shināxō ato yoikakīma. Askatari mā Niospa Yōshi Sharaōxō mā afafo ato shara faxōfāito ōikakī yorafāfe iskafakī yoitirofo: “Aicho, Epa Nios sharakōi. Āfe Fake Jesucristoōxō afama mīshtifo fatiro,” ixō yoitirofo. “Epa Niospa ares fisti afafo shara famis, atokai afaa chakafapanakama. Ares fisti āfe Yōshi Sharaōxō afama mīshti fapanaka,” ixō yoinōfo.

Nō omiskōifikī nō tenetiro nōmāi Jesucristo chanīmara fakī

¹² Efe yora mīshtiki, omiskōifikī rateyanā shināchakayamakāfe. Mā askaito Epa Niospa tāpitiro mā Jesús Ifokoi fakē. Nāskakī shinākī iskafayamakāfe: “ĵAfeskaī ē omiskōimē?” ixō anori shināyamakāfe. ¹³ Askatamaroko inimakōikāfe Jesucristo omiskōiai keskai māri omiskōifikī. Askatari chipo mā inimasharakōixii Jesucristo anā nai mēranoax fotoaino. Nāskakē keyokōichi ōixikani āfe sharafoya nai mēranoax fotokē, nōko xanīfo finakōi ixiki. ¹⁴ Akka mā Cristo Ifo shara faino Cristoōxō mato Ichaifono inimakōikāfe. Nāskakē Epa Niospa āfe sharafoya āfe Yōshi Shara matoya rafemani kiki. ¹⁵ Akka fatora mā fētsa mā afaa chakafamiskēma mato omiskōimanaifono tenekāfe inimayanā. Askatari yometsoyamata, askatari afara chakafakī finata iyamata, askatari fetsafāfe afara yoipaiyaifo keskara ato feta ayamakāfe omiskōixikāma. Ato keskara iyamakāfe. ¹⁶ Akka nō omiskōi Nios Ifofaax, nāskakē rāfiyamakāfe. Askatamaroko Epa Nios yoikāfe iskafakī: “Aicho Epa Niosi, ē mī Fāke Jesús afe yora. Nāskakē nā chanīmara faafāfema ea omiskōimanaifono ē Jesúsnoax omiskōi. Aicho,” ixō yoikāfe.

¹⁷ Akka Epa Niospa yorafo keyokōi tāpimaniyoi afe keskara ikafomākī. Taefakī noko ōikī taefaiyoi nōmāi afe yorafokē. Akka chipo nā Jesús chanīmara faafomāfori ato yoixii afe keskara ikafomākī. Akka iskaratīa nō omiskōiyoi, anākai nō omiskōinakama nō isharakōipakenaka, Epa Nios fe nai mēra. Akka chipo nā Niospa meka nikakaspamisfo omiskōi finakōixikani, afokai anā nīpanakafoma. ¹⁸ Niospa meka yoikī iskafakī kenenifo: “Nā Nios chanīmara faifo isharakōimisfo, Nios ari foyokanaxma omiskōiyotirofo. Nāskafikanax mā Nios ari nokokanax anā omiskōinakafoma. Akka nā Nios chanīmara faafāfema afara chakafamimisfo nāfo omiskōi finakōipakenakafa,” ixō kenenifo. ¹⁹ Nāskakē nā Niospa mato yoiai keskai mā omiskōifikī shināchakayamakāfe. Nāto mato onifaniki. Nāskakē yoikī iskafakāfe: “Epa Niosi, mī ea amapaiyai keskara fisti ē apai. Meres fisti mī ea yoitiro,” ixō yoikāfe. Nāskax isharakōikāfe nā mato yoiai keskara amiski.

5

Afeskax isharatirofomāki a Nios Ifofafo Pedro ato yoini

¹ Akka nā Niospa meka nikakani ichanāfono ato kexemisfo, ē mato yoisharapai ea nikasharanōfo. Nāskaxō māto shinā mēra ēfe meka nanesharakāfe. Ēri nā Jesús chanīmara faafo ē ato kexemiski. Nōko Ifo Cristo omiskōiaito ē ōini. Anā oaino ēri afe isharapakenaka. Tsōa a keskara ōimisma sharakōi keyokōichi ōixikani. Ēri ōixii a keskara sharafinakōia. ² Nāskakē ē mato yoi nā Jesús chanīmara faafo ichanāifono Niospa mato yoini keskafakī ato kexesharakāfe. Ato Niospa meka yoisharakāfe isharanōfo. Nāskaxō shinākī iskafayamakāfe: “Ooa, ē afara fetsafapaifiki ē Niosxō ato kexei,” ixō shināyamakāfe. Askatamaroko a Niospa fichipaiyai keskafakī ato kexesharakāfe ato noiyanā. Nāskakē, “Ea Niospa ato yoimanaino ē ato yoikapai,” ixō yoiyamakāfe. Anori shinātamaroko inimasharayanā Niospa meka ato yoisharakāfe. “Ē ato yoiaito ea kori inākani kiki,” ixō shināyamakāfe. Anori shinātamaroko ato Niospa meka yoisharakāfe inimayanā. ³ Nāskata āto xanīfo ipaikakīma ato ōimasharakāfe afeskaxō Jesús Ifofasharax isharatirofomākī. ⁴ Mā askaito a noko kexemis, nōko Ifo Jesucristo anā nāmā fotoxō mato ōisharaxii. Nāskaxō mato afara shara ināxii a keyonakama. Nāskakē mā afe Ipanaka.

⁵ Nāskarifiakī māri naetapafāfe anifofo yafi a mato Niospa meka yoimisfo nikakōisharakāfe. Naetapafāfe anifofo fe isharakōikāfe. Nāskata mā ranā axoshara faatanākāfe. “Ē xanīfoki,” iyamakāfe. Akka, “A xanīfo nīpaikani kakapaimisfoki Nios atoki inimaima. Akka a kakapaimisfomaki Nios atoki inimayanā ato afara axosharai ato noikī,” ixō kenenifo Niospa meka yoikakī. ⁶ Epa Nios finakōixō afama mishti famis. Nāskakē kakapaimis iyamakāfe. Anori shinātamaroko iskafakāfe: “Epa Nios finakōia. Ē afaa tāpiama,” ixō yoikāfe kakapaimis ikakīma. Mā askaito Niospa ato mōnāo mato nīchixii xanīfo keskara mā inō. ⁷ Askatari afaa shināchakayamakāfe. Afaa shinātamaroko Nios yoikāfe mato kexesharanō. Niospa mato noikī mato kexesharaino anā māto ōiti fekaxtefayamakāfe.

⁸ Shināsharata mēste shinākāfe. Satanás noko noikaspakī noko chakafapai kiki, oa poomā fonāiki kafāsakī yoinā fenai keskaraxō. Satanás chakata noko afara chakafamapaimiski Niosnoa tsōa shinānōma, Satanás ato chakafamaino afe yora inōfo. ⁹ Nā mā omiskōiai keskariai nā nōko Ifo chanīmara faa fetsafori maitio anoax omiskōikani. Nāskakē Satanás mato afara chakafamapayaito nikayamakāfe. Māto Ifo fistiroko chanīmara fakāfe. Afara chakafayamakāfe. ¹⁰ Niospa mato noikōikī mato katoni, Cristo ika ari mā afe isharakōipakexanō nā sharafinakōia ano. Nono mai ano mā iyoax mā aōnoax omiskōiyoi. Mā askaino Epa Niospa māto ōiti mato kerex faxōi. Nāskaxō afara afeskara afiaino mā tenekōixō mā Jesucristo Ifofasharakōixii. ¹¹ Nāatofi afama mīshtifo fapanakaki. Nā fistichi atiro keskafakī tsōa askafatiroma. Nā fistichi askafāpanaka.

Mā mekai xatekī Pedro ato meka shara yoini

¹² Ēfi Silvano shinākōimis. Ē tǎpia nā Niospa amapayai keskara amiskē. Akka nā ē mato yoipayai anori ea kīrika kenexoni. Na kīrika ichapama ē mato kenexoni māto ōiti mato inimamasharakōixonō mā shināsharakōinō. Ē mato yoi chanīmakōi Niospa noko noikōi. Nāskakē nānori fisti shinākāfe fanīrira shinākakima.

¹³ Jesús chanīmara faafo ichanāmisfo mēraxō Babilonia anoafāfe mato yoisharakani. Ēfe fake Marcosri mato yoisharapai. Nāfori Niospa katoni afe yora inōfo, noko akai keskafakī. ¹⁴ Māri mā nōinā faatanāi yoinōnāsharakāfe. Mā Cristo yorakōifokī, nāskakē inimasharakōikāfe. Nā tii.

Pedro

Pedro Jesús Chanĩmara Faafõ Afianã Kirika Kenexõ Fomani

Pedro Jesús Ifõfaafõ ato kirika kenexõ fomani

¹ Ëkã Simón Pedro, Jesucristo ã yonoxomis. Aõnoa yorafo ãfe meka shara ã ato yoinõ ea nichini. Nãskakẽ ã mato kirika kenexõ fomai, mã mã nõko Ifo Jesús mã chanĩmara fakĩ finakõiano ã akai keskafakĩ. Nã nõko Ifo Nios feta Jesucristo noko ifimis nã ã chanĩmara famis nãmãisharakõimiskẽ.

² Akka Epa Nios yafi nõko Ifo Jesús mã tãpikõikẽ matoõnoa shinãkĩ mato inimamakõiki mãto õiti mato inimamaxotiro tanaima sharakõĩ mã inõ.

A Nios Ifõfaafõ afeskax isharatirofomãki

³ Niospa noko katoni a keskara shara ikax nõ afe ipaxanõ. Nãatofi afama mĩshti fatiroki. Nõ Nios tãpikõikẽ afara nõ yopaito ãfe kerex sharaõxõ noko inãxii. Nãskaxõ noko amapaiyai keskara nõ anõ. ⁴ Nãskakẽ noko yoiyoni keskafakĩ ãfe kerex sharaõxõ afara sharakõifo noko axoxii a keskara sharakõĩ nõ inõ. Akka a nikakaspafãfe nã afara chakafapayiaifo keskara fisti amisfo. Nãskaifono Niospa noko imasharai nõ ato keskara inõma. ⁵ Nãskakẽ nã mato imapaiyai keskakãfe, chanĩmara faax a keskara sharakõĩ ikãfe. A keskara sharakõĩ mã ikaino, Niosxõ mato amapaiyai keskara fisti tãpikãfe. ⁶ Akka nã mã apayiai keskara fisti shinãkakĩma, kexemesharax aõnoax isharakõita afara afeskaraino tenekõita Niosnoa fisti shinãfafãikãfe. ⁷ Askatari keyokõĩ yorafo sharafata oitsifaxõ ato noifafãikãfe.

⁸ Mã askafakĩ nõko Ifo Jesucristo mã tãpikõitiro. Nãskaxõ nã mato amapaiyai keskafakĩ mã yonoxosharakõitiro. ⁹ Akka mã askafayamai oa fẽxo keskara mã itiro, õisharaima. Nãskakẽ mãto chaka mã mato soaxofiano mã anã shinãima, mã mã shinãmakiãx. ¹⁰ Nãskakẽ efe yora mĩshtichi, Niospa mato ifikĩ mato shinãmami mã afe yorakõifo mã inõ. Nãskakẽ afe yorakõĩ isharapãikõikãfe. Shinãsharata isharakõikãfe. Askafaax mã anã afara chakafo ifõfaima. ¹¹ Mã askaito õikĩ mato ifisharakõixii a ika ano mã afe ipaxanõ nõko Ifo fe. Nõko Ifo Jesucristo noko ifimis.

¹² Nãskakẽ ã mato shinãmãfãfãini, mã mã tãpifekẽ, nãskakẽ iskaratĩa na meka shara mã mã tãpixõ nã fisti mã shinãkõimis. ¹³ Akka ã nayoxoma ã mato yoisharafãfãini, ¹⁴ mã mã nõko Ifo Jesucristo ea tãpimanano ã chaima naino. ¹⁵ Nãskakẽ mẽxotaima ã mato yoirifai mã naano nã ã mato yoimis keskara mẽxotaima mã shinãfãfãinõ.

“Cristo Niospa Fake chaxapakekafanaito ã õini,” ixõ Pedro ato yoini

¹⁶ Nõ mato yoimis nõko Ifo Jesucristo ãfe kerex sharaõxõ afama mĩshti fatiro. “Anã nokoki oxii,” ixõ nõ mato yoimis. A yorafãfe yoipaonifo anori nõ mato yoimisma. Akka nõko ferokõichi nõ õini, nõko Ifãfe chaxapakefõfãnaito. ¹⁷ Askatari ãfe Apa Niospa iskafakĩ yoini: “Nafi ãfe Fakekõikĩ ã aõ noisharakõĩ, ã akiki inimakõĩ,” ixõ yoini. ¹⁸ Nõkõĩ nikani nai mẽranoax mekai askaito. Nã mãchifã ano nõko Ifo fe nõ ini, nã mãchifã anoxõ nõ nikani anoax Nios mekaito.

¹⁹ Akka a Niospa meka yoipaonifãfe a inõpokoai keskara yoikakĩ Jesúsnoa kenenifo keskara nõ chanĩmara fakõitiro. Nãskakẽ mãri mã na meka mã mã chanĩmara fakõitiro. Oa ãparinĩ fakish mẽraxõ chaxatiro keskafakĩ, akka mã penano xafasharakõitiro. Nãskarifikĩ mã Niospa meka nikasharaino Epa Niospa mãto õiti mãra oa pena keskara mato fatiro. ²⁰ Akka taefakĩ iskara tãpikãfe. A Niospa meka yoipaonifãfe ãa ato õiti mẽraxõ shinãkaxõ kenepaonifoma. ²¹ Askatari ãa ãto shinãmã shinãxõ yoipaonifoma. Askatamaroko Niospa Yõshi Sharapa ato shinãmãnaino nãnorikõĩ ato yoipaonifo. Nãskakaxõ a Niospa Yõshi Sharapa ato shinãmãni keskara kenepaonifo.

2

*Fetsafãfe chanĩ fisti ato yoipaonifo
(Ju. 4-13)*

¹ Akka, “Nõ Niospa meka mato yoinõra,” ixõ ãa nõko xinifo ato pãrapaonifo. Nãskarifiakĩ mato mẽraxõ mato pãramisfo, “Nõ Niospa meka mato yoinõra,” ikaxõ. Afãfe mato pãrakani fanĩrira mato yoikani mã anã shinãsharanõma. Akka nõko Ifo Jesús ato nãxoni afara chaka ãto ifõ inõma. Nãskakẽ a nõko Ifãfe noko tãpimapaoni keskara chanĩmara faafoma. Nãskakẽ nãfo Epa Niospa ato omiskõimarifaxii omiskõipakexanõfo. ² Nãfãfe afara chakakõifo ato tãpimanaifo keskafakĩ yora ichapafãfe ato nikamisfo. Nãskakaxõ atoõxõ Niospa mekaõnoa chakakõĩ fatirofo. Nãskakẽ a Niospa ato shinãmãpaiyai keskara shinãkanima mã fenoafo. ³ Nãskakaxõ kori fisti noikõimisfo, “Nõ mato yoinõra,” ixõ mato pãrakani. Akka a afara

chakafaifo keskara mā Niospa tāpia fatora penata ato tāpimani omiskōipakexanōfo. Afetiāma Niospa shināyoni a yora chakafo ato omiskōimapakexakī.

⁴ Epa Niospa āfe ājirifo āto chaka ato soaxonima afara chakafaifāfe. Askatamaroko chiifā mēra ato potani, anoax fakishifā mēra ipaxanōfo kaninānā ato metexkere axō. Nā ato ichanāfaiāto ato yoixō ato omiskōimaxii. ⁵ Nāskatari nā yorafo Noé niyoatīa Niospa meka nikakaspafiono Niospa āto chaka ato soaxonima. Askatamaroko oi kaya imani faka faipafaxō a yora chakafo ato āsakī mitonō. Akka Noé fisti āsanima. Nā Noé ato yoioyopaoni iskafakī: “Nios sharakōikī mātō chaka xatekāfe a keskara shara ixikakī,” ixō ato yoioyopaoni. Nāskakē Noé āsanima afe yora sietefo fe Niospa ato kexesharano. ⁶ Nāskatari Niospa pexe rasi Sodoma yafi Gomorra pāoakī fetsaxō kooakī mitoni, mapokōifakī. Nāskakē nā rama chipo ixiaifāfe tāpinōfo yora chakafo keyokōi Niospa ato omiskōimaxiai. ⁷⁻⁸ Akka Lot fisti nanima Niospa nimasharakōini. Nā feronāfakemāi sharakōikē, nāato ōipaoni yorafāfe anoxō chaka shināifāfe. Nā Lot fekaxtekōini, nā yora chakafo askaifāfe ōi. ⁹ Nāskakē nōko Ifāfe afe yorafo kexesharatiro afarafo ato chakafamapaiyai keskara anōfoma. Nāskaxō nā afara chakafamisfo ato omiskōimakī nā omiskōipakenakafo mēra ato potaxii anoax omiskōipakexanōfo.

¹⁰ Nāskakē Niospa ato omiskōimaxii āa shināxaxō afara chakakōi famisfona, nōko Ifāfe āfe meka sharari nikakaspamisfona. Afāfekai afaa tāpiafoma. Mesetamakōi ato īchamisfo a nō ōimisma nai mēranoa xanīfo finakōiafo. ¹¹ Akka nā ājirifo xanīfōfikanax afokai askamisfoma. Afāfe tosa īchamisfoma nōko Ifāfe ferotaifi. Askatamaroko yoikī iskafamisfo: “Āa Niospa ato tāpimanō omiskōimakī,” ixō shināmisfo āfe ājirifāfe a yora chakafāfe chakafafiaifono ato afeska fapaimisfoma.

¹² Akka na yorafo yoinā keskarrafo, afaa tāpiafoma. Afaa shināima ikafo. Nāskakē achixō retetirofo. Afāfe afara chaka yoimisfo ōiyamafikakī, nāskakē afori naxikani na yoināfo natirofo keskakani. ¹³ Fetsafo omiskōimakatsaxakakī afori omiskōixikani. Afāfe afarafo chakakōifo fakakī sharakōimeyokani. Akka nā mato pāramisfo mato fe ichanāfo Jesús nikayamafikatsaxakakī. Anoxō mato feta piyanā mato pārapaikani. Akka māfi askaramakī mā noināsharakōita ano fisti ichanāxō mā piisharamis. Mā askafaiato a ato pāramisfo mato fe ichanāpaikani mato fanīrira chakafo yoipaikani mā anā shināsharanōma. Inimakōiyanā nā mato pārapaiyai fisti yoipaikani. ¹⁴ Askatari kēro fetsa ōikakī akiki nokofenepaikakī chotapaimisfo, chaka fisti shināmisfo. Akka kēromā Jesús Ifofayamaxō ato fichipai ato fe ixiki. Askatari a chanīmisfāfe Jesús Ifofasharamisfoma ato chakafamapai ato feta afarafo chakafanōfo ato ōikakī. Askatari ato afama mīshti ato fichipaimisfo mā askara feyafamisfo. Niospa nā keskara yorafo ato omiskōimani omiskōipakexanōfo, yora chakafomāiano. ¹⁵ Nāfo fofasakani mā fenoafo, Niospa meka shara kachikiri fakanaxō nā Balaam ipaoni keskarrafo. Nā Balaam Niospa meka yoimis iyopaoni, Beorpa fake. Mā Niospa meka yoipaofinixakī kori kaya fichipaini, afara chaka shināki. ¹⁶ Niospa yoiano Balaam āfe burro nā yora mekai keskani. Nāskaxō āfe ifo iskafakī yoini: “Āfeskakī mī ea koshaimē?” ixō nā burropa yoini. Askafaito nikai Balaam ao yōra shināsharaima keskarakōi ini.

¹⁷ Na feronāfakefo faka fiti ano faka netsoa keskarrafo. Afaakai tāpiafoma, nāskaxō Niospa meka shara noko tāpimatirofoma. Askatari mā oi fei kiki ixō, nai kōi choshta nō ōifaino, nēfe nai kōi potatiro keskarrafo. Nāskaraxaxō noko pāratirofo: “Niosnoa nō mato yoirā,” ikaxō āa shināi imisfo Niosnoa yoikōimisfoma. Nāskakē Epa Niospa ato potaxii fakishifā mēra ipaxanōfo. ¹⁸ Nāfo chanīkani kakapaimisfo. Nāskaxō yoimisfo iskakani: “Nō tāpia keskafakī tsōa tāpia. Nā tsōa atiroma keskafakī nō tāpikōia,” ixō āa yoikani chanīfinamisfo. Nāskaxō a rama Nios Ifofapaikakī āto chaka xatepaiyaifo ato yoitirofo iskafakakī: “Mī fētsa āfe āfi fe ika sharakī, nāskax mī afe inimakōitiroki, nō anō kafe,” ixō fētsa iyotiro afara chakafamaxiki. ¹⁹ Afāfe iskafakī yoimisfo: “Mā afara shara faōnoaxkai Nios fe mā ipaxatiroma. Akka nā mā afarafo apaiyai keskafakāfe. Nā mā apaiyai keskafaino tsōa mato xatematiroma inimayanā akāfe,” ixō ato yoikakī anorima ato yoikani. Afori isharamisfoma, āa pāramemisfo. Afara chakafo āto ifo, nāfo Satanās inafō. Nāskakē shināsharakanimā. Chaka fisti shināmisfo. ²⁰ Akka nōko Ifo Jesucristo nā noko ifimis, nō nikakōixō nā nikaifāfema afara chakafaifo keskafakī, anā afaa chakafakanima. Nā afara chakafo makinoax paxkatirofo anā āto ifo inōma. Akka anā afara chakafaifono afara chakakōi ato mēra nanetiro a ipaonifo keskara chakafinakōia inōfo. ²¹ Akka afo shara ikeranafo Jesús nikayamakatsaxakakī. Akka a meka shara mā nikafikatsaxakakī chipo anā kachikiri faifono ato omiskōimaki finakōixii. ²² Akka nōko xinifāfe Niospa mekaōnoa kenekī yoikōinifo iskafakī: “Paxta nā imis keskai ori kafāsayotiro. Chipō anā a anāpakea ano otiro. Nāskariai kochiri mīfamā raish iyotiro, nāskax fakanaki kaax choki sharata, mā choki sharafax anā chipo mīfamā raish itiro.” Nāskari akani Niospa Yōshi Sharaōxō āto

chaka potakanamax Satanás āto ifo iki. Āto chaka xatepaifikanax afianā afara chaka mēra paketirofo.

3

Nōko Ifo Jesús anā fotoxii

¹ Efe yora mīstichi, anā ē mato kirika kenexō fomai. Taeyoi ē mato manamayonixakī, nā kirika kene rafeoxō ē mato shināmasharapai mā shināsharakōinō. ² Shinākāfe, a Niospa meka yoimis sharafāfe afetiama mato yoipaonifo anori. Askatari a noko ifimisto nōko Ifo Jesús ato yoiaito a aōnoa yoimifāfe nikakatsaxakakī nānori mato yoipaonifo keskara shinākāfe.

³ Nāskakē ē mato yoinō shinākōikāfe. Mā chaima Jesús oaino nā yora chakafo mato kikanax nāifo matoki kaxemetsamapaixikani kiki āakōi askara chakafo shinākanax.

⁴ Nāskaxō mato yōkaxikani iskafakakī: “A Niospa yoini keskai, zafeskaī Cristo oimamē? Akka nōko xinifo nanifo chāikai afaa afeskaito nō ōimisma, keyokōi nāskara. Nā Niospa mai onifani chāi afaa afeskaito nō ōimisma,” ixō yoixii. ⁵ Akka nā yorafāfe mā tāpifikaxō shinākanima, afetiama Niospa nāi onifafianino Niospa yoiaino fakafā nēxpakīa mai onifani, taeyoi fakafā iyopaoni. Nāskakē Niospa āfe mekapa fakafā nēxpakīa mai onifarifatani. ⁶ Askatari fakafaiapafakī mai maiyaino keyokōi yorāfo āsai mitokomeni. ⁷ Akka mai yafi nai iskaratīa ato mekeyoa, chipo ato koofakī mitokōixii. Niospa yoiaino askai fetsexii. Nā Niospa ato ichanāfaiāna na chiiifānē ato koofakī mitoxii nā yora chakafo ato omiskōimanaitīa.

⁸ Nāskakē efe yora mīstichi, shināmakiyamakāfe. Nō ōimiski xiniachāikōi. Akka nōko Ifāfe ōia pena fisti xini ichapa keskara, askatari xini ichapa pena fisti keskara ōi. ⁹ Nāskakē shinākī iskafamisfo: “Nōko Ifāfe yoiyoni keskara ikamano, akka mā yoini keskara mā finōkōia,” ixō shināmisfo. Askatamaroko Niospa noko noikōiki a omiskōipakenakafo mēra ato potapaima. Fena fenakima ato manasharamis keyokōichi āto chaka xateyonōfo āfe meka shara nikaxikakī omiskōipakexakakīma.

¹⁰ Akka nōko Ifo nokoki nokorisai tsōa manasharayamaino nā yometso nōko pexe ano oaito nō tāpitiroma keskai. Nāskarifiakī tsōa tāpiama afetiara nōko Ifo nokorisai, itipinīsharafomano. Mā nōko Ifo nokoaino chāa itakōixii. Nāskaino nai mēranoafo koofi keyokōixii, nāskatari nono mai anoafori koofi keyokōixikani.

¹¹ Nā ē mato yoiai keskai keyokōi keyoxii. Nāskakē tāpisharakōixō nōko Ifo nikasharakōikāfe. Mā mā itipinīsharakōixō a mā apaoni keskara anā mā akimakai. A mato amapaiyai keskara fisti mā akikai. Epa Nios shinākī finakōiax sharakōi ikāfe. ¹² Fatora penata Jesús nokoi kiki manashara fafāikāfe. Nāskakē fetsafo Jesúsnoa yoisharakāfe tāpisharakōinōfo, āto chaka xatekaxō mā chaima Jesús oi kiki. Mā Jesús oaino nai mēranoafo koofi mēsho mēshokōixikani. ¹³ Akka nai fenashara nō manai, mai fena yafi a Niospa yoiyoni keskafakī afo sharafai. Akka afara chakafo ano itiroma, nā sharafos ano itirofo.

¹⁴ Nāskakē efe yora mīstichi, mā Jesús manakī manasharafafāikāfe. Mā askaito Niospa mato ōi kiki āfe Fākeōnoax mā isharakōikē. Nioski mesekīma iskafakī shināfafāikāfe: “Epa Niospa āfe Fakeōxō ea noi. Ēri Epa Nios noi afe rafepakexakī,” ixō anori shināfafāikāfe.

¹⁵ Nāskakē māri fekaxtekākīma. Shināsharata isharakōikāfe. Ōikapo. Nōko Ifo samarakamis fena omisma yorafāfe ea Ifofanōfora ixō shināmis Epa Niospa. Nāskarifiakī nofe yora Pablo mato kirika kenexoni Epa Niospa shināmasharaino. ¹⁶ Nā kirika keneai tii nōko Ifo anā oxii kiki ixō aōnoa yoikī mato kirika kenexoni Pablo. Akka a atiri yoikī keneni afokai nō tāpisharatiroma. Akka a Niospa meka tāpiamafāfe āa fanīrira yoimisfo a Pablo yoikī keneni anori tsōa yoimisma. Nāskarifiakī Niospa mekakōi yoitama, fanīrira yoimisfo. Nāskakanax omiskōipakenakafo.

¹⁷ Efe yora mīstichi, a ē mato yoiai keskara mā mā tāpiaki. Nāskakē ōisharakāfe, a chanīmifāfe mato yoipaiyai fo anori mā ato nikaxikima. Mā Jesús nikakōiaito mato kexesharakōitiro. Akka a fanīrira yoimisfo mā ato nikaxō anā mā shināsharatiroma. Nāskaxō fanīrira mā shinātiro. ¹⁸ Akka a noko ifimis nōko Ifo Jesucristo nikasharakōifāikāfe tāpisharakōixikakī. Mato sharafapaiyai keskara a keskara shara ixikakī. Māto ōiti mēraxō a mato tāpimapaiyai keskara tāpisharakōikāfe. Nā fisti nō yoikī iskafatiro: “Mī nōko Ifo, mīōxō afara shara nō atiro, meres fisti mī sharakōi,” ixō iskaratīa yoita a inōpokoai keskara nō yoipakenaka. Nāskakōipakexanō. Nā tii.

Pedro

Juan Jesús Chanĩmara Faafõ Kirika Kenexõ Fomani

Jesús noko nimasharaino nõ afe İpaxanõ

¹ Ēkĩa Juan, ě mato kirika kenexõ fomai mã täpinõ. Jesucristo ě õimixaki ě mato yoi mãri mã täpisharanõ. Nã Jesucristo nõko İfokõi tae fenakõi Nios fe iyopaonixakĩ. Akka Niospa afama müshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõi keskara nõ õimis. Mã õiki feyafaxõ nõ ramãti nõko mifi. Nãskakẽ noko yoiaito nikayamexakĩ ě mato yoi, noko imasharanõ nõ afe İpaxanõ. ² Apa Nios ariax nokoki Jesús fotoni. Fotokẽ nõ õiki feyafani. Nãfi afeskapishta nakama, nãfi nĩpanakakĩ. Apa Nios fe ikatsaxakĩ nokoki fotoni. Nãskakẽ nã nõ õia keskara nõ mato yoi. ³ Nõ õipaonixakĩ nõ mato yoi noko yoiaito afe meka. Nãskakẽ nofe rafexõ nã nõ shinãi keskarakari mãri mã shinãtiro. Nios feta afe Fake Jesucristo shinãi keskafakĩ nõri anori nõ shinãi, nõ ato fe rafekõitiro. ⁴ Nãskakẽ ě mato kirika kenexõ fomai mã kirika kene õiax mã inimakõinõ.

Nios xafakĩakõi ika oa luz keskara

⁵ Akka noko Cristo yoiai, anori ě mato yoinõ. “Oa xinĩ chai chaxaino fakishtiroma keskara, xafakĩakõi Nios ika. Afaa chaka afe rafemisma,” ixõ Cristo noko yoimis. ⁶ Akka anorima shinãi yora fetsafo iskakani: “Ē Nios fe rafea,” ifiaxõ a Niospa yoiai anori shinãima ãa chanĩ anorima yoi. Afe õiti sharama xafakĩakõi ikama, fakish keskara a Niospa yoiai anori shinãyamafi. ⁷ Nios xafakĩakõi ikakĩ, afaa pishta chakafamisma. Afe õiti mẽra oa fakish keskarama, xafakĩa sharakõi ika. Akka nõri afe rafekõixõ, nõ afe meka nõ mẽra nanekõixõ, Niospa shinãi keskafakĩ nõri nõ shinãtiro. Nõ askara shinãx, nã İfofaafõ fe nõ ato fe rafetiro. Nãskax nõ xafakĩakõi nitiro, Niospa Fake Jesúsmaĩ noko nãxonikẽ. Afe imĩ nõko chaka noko soaxõfafãini keyokõi.

⁸ Akka nõ yoikĩ iskafamis: “Ē afaa chakafamisma,” ifiax nõa nõ pãramemis. Nãskax nõa nõ chanikõimis. Nõko õiti mẽra Niospa meka nanema. ⁹ Akka nõ afara chakafaxõ nõko chaka nõ soapaikĩ, nõ Nios yoiaito nõko chaka noko soaxotiro. Keyokõi noko soaxotiro noko raefakĩ, Niosmaĩ mẽstekõi isharakõixõ. ¹⁰ Niospa yoimis: “Keyokõi yorafefe chakafamisfo,” noko famis yoikõikĩ. Noko askafafiaino, “Ēkai afaa pishta chakafamisma, ě chaka shinãima,” ixõ yoikĩ nõ Nios chanĩmara faima, “Āa chanĩra,” nõ Nios fai. Nãskakẽ afe meka nõko õiti mẽra nanema.

2

Jesús Apa Nios noko yoixonĩ

¹ Efe yora mĩshtichi, ě mato shinãi. Mẽ mato Jesús İfofamaxõ ě mato fakefai. Mato fakefaxõ ě mato kirika kene fomai, mã anã afarafo chakafanõma, shinãsharata mã inõ. Askara Niospa fichipai. Akka nõ chakafaino Niospa fichipaima. Nãskakẽ nõ anã afara chakafaxõ nõ nõko İfo Jesucristo nõ yoitiro anã nõko chaka nõ soapaikĩ, nokomãi nikaito. Noko nikaxõ Apa Nios noko yoixonĩ iskafakĩ: “Epa, ě ato nãxoni. Eõxõ ato chaka soaxõfe, ãto chaka soapaikani kiki,” Apa fatiro. Nã fistimãi mẽstekõi ixõ, afaa chakafamisma. Nãskaxõ Apa Nios noko yoixotiro. ² Noko nãxoni nõko chaka noko soaxoxiki. Noko fistima, keyokõiõnoax noko nãxoni. Nõko İfo Jesucristo noko nãxoni. Nõko chaka noko soaxõfãini nani.

³ Nãskakẽ Cristo noko yoiai keskafakĩ nõ nikakõixõ nõ täpisharakõitiro nõmãi afe rafexõ. ⁴ Yora fetsafo iskai: “Ē Cristo fe rafea,” ifiaxõ afe meka nikama, ãa akikiri kėtapamis, mẽstekõi ikama. ⁵ Akka nõ Niospa meka nikakõikĩ nõ aõ noikõi. Nãskafaxõ nõ täpitiro nõ afe rafekõia, Nios fe. ⁶ “Mẽ Nios fe rafekõiakĩ,” ixõ yoi, a Jesús imis keskara ikãfe.

Noko meka fena shara yoini nõ nõinãsharakõinõ

⁷ Efe yora mĩshtichi, ě mato yoisharakĩ ě mato kirika kenexoni. Na ě mato yoiai keskafakĩ taefakĩ mã mã nikamiskĩ. Jesús noko yoia keskafakĩ ě mato kenexonõ. ⁸ Mã mã nikafimiskẽ, ě mato anã fenafakĩ yoinõ chanĩma. Jesucristo noko noikõi. Nãskari fakĩ nõ fetsafo noikõi. Fetsafo noikĩ, nõko õiti mẽra xafakĩakõi iki. Anã fakish keskara ikima. ⁹ Akka, “Ē Nios fe rafea ě xafakĩakõi ika,” ixõ nõ yoifixõ nofe yorafo nõ noikaspamis, nõkai xafakĩakõi ikama. ¹⁰ Akka nõroko nofe yorafo noi, nõ xafakĩakõi iki. Nõ shinãsharata nõ ikax, nõ anã fenotiroma. Nãskakẽ nõ xafakĩakõi iki, afaa pishta chaka shinãtama. ¹¹ Akka a afe yorafo noikaspaifo, afokai sharama. Fakish mẽra niafo keskara. Afaakai shinãkanima. Āto chaka xatekaspakani. Askafikaxõ afaa täpiafama, fenokõiafo.

¹² Efe fakefāfe, māto chakafo Jesúsxō Epa Niospa mato soaxonano, nāskakē ē mato shināki ē mato kirika kenexoni. ¹³ Afaa oniataima Epa Nios fisti iyopaoni. Efe anifo tiito, ē mato kirika kenexoni, afe keskaramāki mā mā Epa Nios tāpiakī. Mā mā tāpixō mā chanīmara famiski. Naetapafāfe, matori ē kirika kenexoni, Satanās chakata mato afara chakafamapaiyaito mā mā finōfakī. Nāskakēri naetapa tiito ē mato kenexō foma, mā Satanās chaka finōano. Efe fakefāfe, ē mato yoiki kenexona māmāi Epa Nios tāpikē.

¹⁴ Efe anifo tiito, matori ē kirika kenexona, mā mā tāpiakī, afaa oniyataima Epa Nios fisti iyopaoni. Naetapafāfe, matori ē kirika kenexona, mātō ōiti kerexkōifafāi Epa Nios āfe meka shara nikakōiyanā mā mā Satanās chaka finōfakī.

¹⁵ Akka a Niospa fichipaiyama, nōri fichipaitiroma. Afo fichipaikī nō Nios shinātiroma. Afarafo na yora chakafāfe āto shinā mēraxō shināifo keskara afo fichipaiyamakāfe. Afo fichipaikī mā Nios shinātiroma. ¹⁶ Akka a Nios shināifoma nono nāmā ikafo āa shinākani iskamisfo: “Ēa ē shināxō nā ē apaiyai keskara ē atiro. Afara ōiki ē fichipaikī ē fitiro. Ē toa keskarama. Ē afama mšitī shināi. Ea keskara tsoama,” ixō fētsa yoitiro āa chanīki. Aato Niospa meka shināima, āa shināx askatiro. ¹⁷ Akka na afe keskarafo Niospa ōikaspaifo mā afo mitokomei. Nāskatari a yora chakafāfe fichipaiyaifo mā afori mitokomei. Akka nā Niospa yoiai keskara nikakōiax nō Nios fe nīpanaka.

A yora chanāifo nō nikatiroma

¹⁸ Efe fakefāfe, mā chaima Jesucristo anā nāmā fotoiyoi mā nō nika. Nāskakē Jesús nāmā fotoyomano, akka nā yora chakafāfe Cristo shināmisfoma āto xanīfo finakōia oi taei. Nāto, “Ē Cristora,” ixō noko pārapaixii. Mā mā tāpia nāto Jesús noikaspamisi. Akka iskaratīa, “Ē Cristora,” ikanaifo yora ichapakōifo. Nāskakē mā nōri tāpia nā Cristo kayakōi samama fotoi. ¹⁹ Nā Cristo noikaspaifo nofe iyoafo, mā noikaspakani nomakinoax tsekeafō. Afokai noko keskarafo. Cristo anā shinākanima, mā kachikiri faafo. Nāskax nomakinoax tsekeafono nō tāpitiro afāfekai Cristo Ifofaafoma. Akka a Cristo āto Ifokōikē nomakinoax tsekekeranafoma.

²⁰ Akka Cristo āfe Yōshi Shara mātō ōiti mēra nanea. Nāskakē keyokōichi mā mā tāpia Niospa Yōshi Sharapa mato tāpimapaiyai keskara. ²¹ Nāskata Jesucristo mā tāpikī finakōiakī. Tāpixō noko mā mā chanīmara fakī. Nāskakē ē mato kenexoni. Nāskaxō afara mato pāraifāfe mā chanīmara faima. Mā tāpia Jesucristo ramashara anorima ato yoimisma, nāfi chanīmakōiki. ²² Yora fetsafo iskamisfo: “Cristokai Niospa nai mēraxō nīchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesús chanīmara fakanima. Afāfe Cristo noikaspakōikanani. ²³ Akka nā Cristo noikaspaiāfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoiki iskafaifo: “Jesús Niospa Fakekōi,” fakanax nāfo Nios fe rafekani.

²⁴ Nāskakē Jesúsnoa mā nikakī taefani keskafakī, āfe meka shara shināmakiyamakāfe. Nā mā nikakī taefani keskafakī, mā shināmakiyamax mā nikakōisharaino. Epa Nios fe āfe Fake Jesús mato fe rafekōipakenaka. ²⁵ Nāskakē Jesús noko iskafakī yoiyoni: “Ea yafi ēfe Epa mā Ifofaax, mā nofe nīpanaka, anā mā nanakama,” ixō noko yoini.

²⁶ Akka na yorafāfe Cristo noikaspaifo afāfe mato pārapaikani. Mato anorima yoipaikani. Nāskakē ē mato yoisharakī kirika kenexoni mā tāpikōinō tsoa mato pārayamanō anorima yoiki. ²⁷ Akka Epa Niospa āfe Yōshi Shara mato ināni mato fe rafekōinō. Nāskakē aōxō mā mā tāpikōia. Mā anā toa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pārtiroma. Nāskakē nikakōiyanā Cristo fe rafesharakōikāfe, a Niospa Yōshi Sharapa mato yoiai keskai. A Niospa Yōshi Sharapa mato yoini keskai shināmakikakīma Cristo fe rafesharakāfe enekakīma.

²⁸ Ēfe fakefāfe, iskaratīa Cristo nikakōiyanā afe rafekōikāfe, mā nāmā fotofaino nō akiki meseimakai nōmāi isharakōiax. Askatari nō akiki rāfimakai.

²⁹ Mā mā tāpiakī Nios isharakōimiskī afaa chakafatama. Nā isharakōimisfo nāfo Epa Niospa imasharapakēnaka āfe fakefo inō. Nafofi Epa Niospa fakekōiofoki.

3

Niospa fakefo

¹ Epa Niospa noko noikōi. Shināfāi ikāfe. “Ēfe fakefora,” noko famisi. Akka nō āfe fakekōifo. Akka nā yora fetsafāfe Jesucristo shināifoma Nios tāpiafoma. Nāskakēri nokori tāpiafoma, nō Niospa fakefofiano. ² Efe yora mšitichi, ea nikakāfe. Nōfi iskaratīa Niospa fakekōiofoki. Nāskakē afe keskarafo chipo noko Niospa imai nō tāpiana. Cristo fotoaito nō ōiax nā keskarakōi nō iki, āfe ōiti keskarakōi. ³ Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shināki nō anā chaka shināpaima. Jesucristo shināi keskari nō shinātiroma, anā chaka shināyamakī.

⁴ Akka yora fetsafāfe ato chakafakakī, āto chaka potakaspakani, a Niospa yoiia keskara shinākanima, afara chaka fisti shināmisfo. ⁵ Jesucristo nai ariax nokoki fotoni nōko chaka noko soaxoxiki. Akka nāatofi afaa chakafamismakī. Nā fistifi finakōiakī. Ē mato yoiia keskara mā mā tāpiakī. ⁶ Nāskakē a afe rafeafāfe chaka shināmisfoma. Akka a ōiti chakayafāfe Jesús tāpiafoma, Jesús shinākanima. Jesús fe rafeafoma. ⁷ Ea nikasharakāfe, ē mato yoinō. Fetsa iskatiro: “Ē Niospa meka mato yoinō,” ixō mato yoisharama. Mato anorima tāpimapai, akka aa nikax mā chaka nitiro. Akka a isharakōixō shināsharamis. Aa keskarafi yora sharakōikī. A Cristo ika keskarari ari isharakōia shināsharakōita. ⁸ Akka nā afara chakafamiso Satanās fe rafeafo. Nā Satanāsmāi taeyoi ōiti chakaya inino, iskaratīari nāskara. Nāskaxō Satanās keyokōi yorafo afara chakafamapai. Nāskakē Niospa āfe Fake nokoki nīchini. Noko nāxoxiki nokoki fotoni, nōko chaka noko soaxoxiki. Nomakinoo Satanās potatiro noko afara chakafamapayaito. Nāskakē Jesucristo Satanās finōinīfofana. ⁹ Akka Niospa āfe Yōshi Shara nōmēra naneano nō Niospa fake itiro. Nō Niospa fakexō nō anā afaa chakafapaima. Nā Niospa Yōshi Shara nōko ōiti mēra ikē nō anā afaa chakafatiroma, nōko ōiti noko fetsafaano. Nōko ōiti noko fetsafaxō, mā Niospa noko fakefa. ¹⁰ Fetsafāfe afara chakafamiso, afokai Niospa fakefoma. Afofi aa ranā noinākanima. Askarafo Niospa fakefoma. Afofi Satanās fakefoki. Nāskakē Satanās fakefo nō tāpitiro. Nāskakāiri Niospa fakefo nō tāpitiro.

Nōa ranā nō noināitiro

¹¹ Nāskakē taefakī mā Nios Ifofaxō mā mā nikamiskī mato yoiaito: “Nōa ranā nō noināsharanō,” ixō mato yoiaito mā mā nikamis. ¹² Akka nā Caīn onefetsa noikaspakī reteni keskara iyamakāfe. Askara Satanās chaka fe rafea. Nāskaxō onefetsa reteni noikaspakī, ē mato yoinō nikakapo. A Niospa yoiia keskafakī onefetsa Nios shināni. Akka Caīn askanima. Āfe onefetsaki ōitifishikī reteni. A onefetsa Nios Ifofaito ōikī noikaspakī reteni, Niosri noikaspayanā. ¹³ Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyamakāfe. A mā Jesús Ifofaito a Jesús Ifofafāfema mato noikaspatirofo. ¹⁴ Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakafoma mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama. ¹⁵ Akka a yorafo noikaspai fofo retemitsamis keskarafoki. Afo chakakōifo. Askarafo mā mā tāpia Niospa fakefoma. Askarafo Nios fe rafeafoma. Nios fe nīpanakafoma, yorafo noikaspakanax. ¹⁶ Akka Jesús noko noikōikī, noko nāxoni. Ākōi nokoōnoax nani. Nāskarifiakī nō fetsafo noikōiax nō atoōnoax natiro. ¹⁷ Akka afama mīshti ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima. ¹⁸ Efe yorafāfe, ea nikakōikāfe, ē mato yoinō. Fetsafo iskakani, āa chanīkani: “Ēfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

Nō Nios nikasharax nō akiki ranotiroma

¹⁹ Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima. ²⁰ Nāskafixō nōko ōiti mēraxō nō shinākī iskafatiro: “Ē afara chakafaa,” ixō nō shināito Niospa noko ōi. Noko ōikī tāpia a nō shināi keskara. Nāskakē nōko chaka nō soapayaito nōko chaka noko soaxotiro. Nios nōko ōiti keskarama. Aato keyokōi tāpia. ²¹ Efe yora mīshtichi, ea nikasharakāfe. Nōko ōitinī nō shināi iskatiro: “Ē Nios Ifofaito ēfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiroma. ²² Nō askaino Epa Nios nokoki inimatiro. Nāskakē nā nō yōkai keskara noko ināitiro, a noko yoiia keskaramāi nō nikasharaito, askatarimāi nō inimamasharaito. ²³ Iskafakī noko yoini: “Ēfe Fake Jesucristo nikasharakōikāfe,” ixō noko yoini. Nāskatari a noko yoini keskaī nōa ranā nō noināsharai. ²⁴ Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara nokoki nīchini. Aōxō nō tāpitiro Epa Nios nofe ikaito.

4

Nīafaka chakata Niospa Yōshi Shara noikaspai. Askatari Cristo noikaspai

¹ Efe yora mīshtichi, fetsafāfe mato anorima yoiiaifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoisimiso. Askaifono Niospa meka ōikī mā tāpitiro a yoiiaifo keskara chanīmamākī. Niospa Yōshi Sharaōxō mato yoikanimakī. Akka afokai Niospa ato afaa yoiama. ² Nāskakē ē mato yoisharai, ea nikakāfe. Fetsafāfe a Niospa meka mato tāpimasharaito mā tāpitiro. Niospa Yōshi Shara a mēra naneano yoiaito mā tāpitiro. Iskara mato yoiaito: “Jesucristo fotoni

Apa ariax nai mēranoax. Nāfi yora keskara kāiniki. Aafi yorakōiki,” mato faito mā tāpitiro Niospa shināmanaino mato askafakī yoiaino. ³ Akka yora fetsafāfe anori yoyamaifāfe nō tāpitiro afāfe Jesucristo noikaspamisfo, Niospa Yōshi Shara āto mēra naneama. Satanās ato shināmamis. Akka a Cristo noikaspaisfo noko ano fexikani mā mā nikamis. Akka iskaratīa mā noko ano feafo, afāfe Cristo noikaspamisfo.

⁴ Akka māroko askaramakī efe yorafāfe, Niosfi māto Ifokōikī, māfi Niospa yorakōifokī. Āfe Yōshi Shara mā māto ōiti mēra nanea. Akka a anorima shināifo askarafoma, Satanās yōshi āto ōiti mēra nanea. Akka Niospa Yōshi Shara mato mēra naneano mā Satanās finōkōia. ⁵ Akka fetsafāfe Nios tāpiafomano, nāskakē anorima ato yoisimisfo, Satanās ato shināmanaino. Nāskakē Satanās ifofaafāfe ato nikamis Satanāsmāi āto ifokē. ⁶ Akka nōfi Niospa yorafokī. Nāskakē a Nios tāpiafāfe noko nikakōitirofo nō yoiaino anori. Akka a Nios Ifofaafāfema a nō yoiaino anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrira ato shināmanima. Akka a noko nikaifoma ato mēra Satanās nanea. Satanās ato mēra nanexō fanīrira ato shināmani. Satanās chanī finakōia. Nāskax ōiti chakaya.

Niospa noko noikōi

⁷ Efe yora mīshtichi, nō noinākdōinō, Niospa noko ato noimanō. Nios fistichi noko shināmaitiro nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ōiti mā noko fetsafaano. ⁸ Niospa yorāfo noikōia. Nāskaxō ato noikī noko tāpimatiro. Akka a yorāfo noiaifāfema, Nios tāpiafoma. ⁹ Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatiro, nāatomāi nōko chaka noko soaxomiskē. Nāskakē Niospa noko ōimani afeskaxō noko noimākai. ¹⁰ Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

¹¹ Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe. ¹² Akka tsoa pišta Nios ōimisma. Nāskafax nō noināino, Nios nōmēra ika. Nofe ixō yorāfo noko noimasharatiro. ¹³ Niospa āfe Yōshi Shara nōmēra ikimakē nō tāpitiro nō Nios fe rafea, Nios nofe ikano. ¹⁴ Epa Niospa nai arixō āfe Fake noko nāmā nīchixonī. Āfe Fake nāmānoa nō ōipaoni. Ōipaonixakī nō ato yoisimis iskakakī: “Epa Niospa āfe Fake noko nāmā nīchixonī, keyokōi nokoōnoax nanō nōko chaka noko soaxoxiki noko iflano nō afe ipaxanō.” ¹⁵ Fetsa iskaī: “Jesúsfi Niospa Fakeki,” ixō shināi. Aafi Nios fe rafeakī Nios afe ikano.

¹⁶ Niospa noko noikōia mā nō tāpia, nō chanīmara faiyanā, Niospamāi noko noimiskē. Nō Nios chanīmara faito nofe rafexō noko yorāfo noimatiro. Akka nō ato noikōiaino Nios nofe ika, afe nō rafekōia. ¹⁷ Nō Nios noi. Nō Nios noikī finakōiax nō inimatiro Jesús anā nāmā fotoano. Anā fotoxō noko iskatatiro: “Nā ea Ifofaafō tii ēfe Epa Nios ari fokani. Akka nā ea Ifofaafoma tii ēfe Epa ari fokanima, nā omiskōipakenakafo mēra fokani,” ato fatiro. Ato askafaino nōkai Nioskī meseima. Nō ranoima nō afe rafekōi. Afe rafei nō Jesús keskara iki, āfe ōiti keskara nō iki. Nāskakē Jesús oaitīa nō akiki meseima. ¹⁸ Nō Nios noikōiax nō akiki mesetiroma. Nōko shinā mēraxō nō Nios noikī finakōixō nō rate potatiro. Akka fētsa mesekī iskakāi: “Niospa ea omiskōimani,” ixō shināi aatokai noikī finakōiama. Ato noikōiamax Nioskī mesetiro.

¹⁹ Nō Nios noiyamatai noko noikī taefani. Akka noko tafakī noinikē iskaratīari nōri nō aō noi. ²⁰ Akka fetsafo iskakani: “Ē Nios noi,” iflaxō a Nios Ifofaafō noima, anorima yoisimisfo. Mā afe yorāfo ōifiki atokairoko noikatsaxakakī, Niosri noisharakanima askara ōiroko fakatsaxakakī. ²¹ Niospa noko yoisimis: “Ea noixō nā ea Ifofaafōri noikāfe,” noko famis.

5

Nō Nios Ifofakē tsōa noko afaa chakafamatiroma

¹ Jesucristo Niospa Fakekōi. Nokoki nīchini noko nimapakexanō, nōko Ifo inō. Akka nō a chanīmara fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro. ² Nō Nios noikōikī noko yoiaino keskara nō nikai. Nāskaxō mā nō tāpia nō Niospa fakefōri noikōi. ³ Nō Nios noikōixō āfe meka nō nikakōikī a noko yoiaino keskara nō nikai nō fekaxteima. ⁴ Nāskakē nō Epa Niospa fakexō afara chakafāfe noko amapaiyai keskarakai nō atiroma. Niospa Fake Jesucristo chanīmara faxō afarafāfe noko afara chakafamapaiyai keskara nō finōtiro. ⁵ Afara chakafo noko amapaiyai noko keskara Niospa noko amatiro nō anōma. Nāskaxō Jesucristo Niospa Fake nō chanīmara faxō aōxō na chakafo nō finōtiro anā afaa chakafaxikima. Nā chanīmara faafāfe finōtirofo.

Niospa āfe Fakekōi noko ōimani

⁶ Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimani āfe Fakemāiakē. Āfe Yōshi Shara chanīmisma nōmēra nanexō noko yoisim Jesús Niospa Fakekōi. ⁷ Nā trespato yoisimfo Jesús Niospa Fakekōi. ⁸ Jesús faka mēra maotisani shināta, askatari naino āfe imi foni shināta, askatari Niospa Yōshi Sharapa noko yoiaino, nānorifos nā trespa shināmisfo. ⁹ Akka yorafāfe noko afara yoiāito ato chanīmara fata a Niospa noko yoiāiri nō chanīmara fakī finakōitiro. Akai yora keskarama, afi Nioskōikī. Akka āfe Fakeōnoa noko yoiāito nō chanīmara fakōitiro. ¹⁰ Akka Niospa Fake chanīmara faxō Apa Niospa aōnoa yoini keskara āfe ōiti mēraxō chanīmara fatirofo. Nāskafekē āfe Fakeōnoa yoisim keskara tsōa chanīmara fayamāxō, “Nios chanīra,” fakaxō yorafo fanīrira shināmapaikani. ¹¹ Nāskakē Nios iskamis: “Ē mato nimasharapaketiro ēfe Fake Jesúsxō,” ixō noko iskafamis. Nāskakē nō Jesús Ifofaax nō afe nīpaxatiro. ¹² A Niospa Fake Ifofaifo afe nīpaxatirofo. Akka a Ifofaima afe nīpaxatirofoma.

Mā mekai xatekī ato yoisharani

¹³ Mā Niospa Fake chanīmara faakī. Nāskakē ē mato kirika kenexoni, mā tāpinō mā afe nīpanaka.

¹⁴ Nō afara sharafo nō fichipaikī, a Niospa noko shināmanaino, nō Nios yoitiro kīfikī, a Niospa fichipaiyai keskafakī. Nō askakī nō tāpitiro Niospamāi noko nikasharamiskē. ¹⁵ Nāskakē nō tāpitiro a nō Nios yoiāito noko nikaito noko nikaxō noko afara ināitiro nō yōkaito.

¹⁶ Akka a Nios Ifofaa fētsa afara chakafaito ōikī, a Nios Ifofaa fētsa Nios kīfixotiro āfe chaka xatenō. Akka Epa Niospa ato nimatiro isharapakexanōfo. Askafikanax fetsafāfe oa Nios Ifofaafō keskara iyokanax mā potakaxō chaka shināfafāikakī Nios kachikiri fakōimafo. Askarafokai tsōa ato nimatiroma nīpaxanōfo. Naax omiskōipakenakafo mēra fokani. Atoōnoa Epa Nios kīfixokāfe ixō ē mato yoiama. ¹⁷ A Niospa noko yoiāi keskara nō nikayamāxō nō chaka shināi. Askafixō anā nō chaka xatepaiyāito ōikī nōko ōiti noko fetsafaxotiro, nō anā chaka shināpaiyamanō.

¹⁸ Mā nō Nios Ifofaano, noko fakefai. Nō āfe fake ixō nō tāpia nō anā chaka shināpaima, māmāi noko Niospa ōiti fetsafaano. Mā nō askano Satanās afara anā noko chakafamapaiyāito, Niospa Fakekōichi Jesús noko ifixō noko kexesharatiro. Noko askafakē Satanās noko afeska fatiroma. ¹⁹ Mā nō tāpia nō Niospa fake. Akka fetsafāfe Nios nikakaspafono, afo Satanās ato shināmani āto ifo inōfo. ²⁰ Niospa Fake nokoki oni. Noko tāpimaniyoi āfe Apa nō tāpisharakōinō. Āfe Apafi mēstekōi ikaki. Akka nō Jesús fe rafeax āfe Apa feri nō rafetiro. Nā Jesucristo Niospa Fake. Nāri Nioskōi. Nāskakē noko nimapakexatiro. ²¹ Efe yora mīsttichi, Nios fisti Ifofakāfe. Satanās mato afara chakafamapaiyāito afe rafeyamakāfe. Askatari afara chakafo mā ifofapaikī afo shināyamakāfe. Nios fisti shinākāfe.

Nā ti ē mato kirika kenexō fomai, efe yora mīsttichi.

Ēkīa Juan

Juan Jesús Chanĩmara Faafõ Afianã Kirika Kenexõ Fomani

Juan a Nios Ifofaafõ ato kirika kenexõ ato fomani

¹ Ēkĩa Juan, ē Jesús Ifofaafõ ē ato kexemis ē mato kirika kenexõ fomai mā tāpinõ. Mā mā tāpia Niospa mato katonĩ afe yorafo mā inõ. Chanĩma, ē mato noikõĩ, eres fistima, a Jesús Ifofaafõ feta ē mato noikõĩ. ² Nõ mato noikõĩ Jesús māĩ nofe rafeano. Akka nã Jesús nofe rafepakenaka. ³ Efe yorafãfe, ē mato yoisharanõ. Nõko Epa Nios feta ãfe Fake Jesús noko noikõĩ. Nãskakē noko noikõiyañã nõko õiti mẽra noko inimamasharai, nõko õiti mẽra nõ inimasharakõinõ.

⁴ Mē tāpia ē inimaifinakõĩ ranãri mā isharakõiaino a Epa Niospa noko yoini keskai. Nãskakē ē matoki inimakõĩni. ⁵ Ea nikakãfe ē mato yoisharanõ, mā ranã noinãkãfe. Mā mā nikamiskĩ nã mā Jesús Ifofakĩ taefanitĩa. Akka ēa shinãxõ ē mato meka fena kenexonima, mā mā nikamis. Nãskakē mā ranã noinãsharakãfe. ⁶ Nõ Nios noikĩ a noko yoiã keskara nõ aki. Niospa taefakĩ noko yoiãito mā mā nikamiskĩ iskafakĩ yoiãito: “Mãa ranã noinãkãfe,” ixõ noko yoiãito mā mā nikamis.

Ãa anorima yoikĩ ato pãramisfo

⁷ A ãa ato pãramisfo ato mẽra fofãsamisfo. Afãfe, “Na Jesucristo Niospa Fake Apa Nios ariax oni feronãfakakõĩ ixikĩ,” ixõ yoimisfoma. Afãfe ato pãrapaimisfo Cristo noikaspakata imisfo. ⁸ Mãri ato keskara iyamakãfe. Shinãfai ikãfe ato keskarama. Mã askakĩ mā ato Nios yoisharaimano tāpitirofoma, fenotirofo. Akka ato Niospa meka mẽstekõĩ ato yoisharakõikãfe Nios tāpisharakõinõfo. Nãskakē mãri afara shara a Niospa mato mekexona mā fitiro, mã Nios yonoxosharakĩ.

⁹ Akka fetsafãfe a Cristo noko yoiã keskara nikayamakaxõ anã shinãkanima, ãa fanĩrira shinãkani. Afokai Nios fe rafeafoma. Akka fetsafãfe a Cristo yoiã anori nikakanax Apa Nios fe rafekõikata ãfe Fake Cristo feri rafekani. ¹⁰ Akka yora fetsa matoki oxõ Cristoõnoa yoisharaima fanĩrira yoi, askara fe rafeyamakãfe. “Noko Niospa meka yoife,” fayamakãfe. ¹¹ Nãskakē askara yora mã chanĩmara fakĩ afe rafexõ afeta mã anorima yoitiro chaka shinãkĩ.

Mã Juan mekai xatekĩ ato yoisharani

¹² Ē mato kirika kenexõ ichapa fomapaifkĩ askatamaroko ē matoki nokopai mato fe yoinãxiki. Ē matoki nokoano nõ inima faatanãsharanõ.

¹³ Nã efe yora mĩshtichi, Nios Ifofaafõ nonoax ichanãmisfo afãferi. Nã tii ē mato yoi kirika kenexõ.

Ēkĩa Juan

Juan Gayo Kirika Kenexō Fomani

Juan feronāfake yoisharani, āfe ane Gayo

¹ Efe yorashta Gayo, ĕkĭa Juan. Ĕ xini ichapa amis a Nios chanĭmara faafo ĕ ato kexekĭ. Ĕ mia kirika kenexō fomai mĭ tĕpinō. Ĕ mia noikōi.

² Yamā, ĕ mia noikĭ Nios kĭfĭxōfafāini mĭ yonayamanō. Mĕ tĕpia mĭ ōiti sharakōi mĕ mĭ Nios Ifofasharai. Nāskakĕ ĕ mia kĭfĭxōfafāini mia kexesharanō mĭ afeskanōma shara mĭ inō. ³ Mĕ mia nikamis mĭ Nios potakaspakōiaito. Nāskaxō a Ifofafo mĭ ika anoax ekeki nokokaxō ea iskafamisfo: “Nā Gayopa Niospa meka nikasharai,” ixō ea yomisfo. Nā nikai ĕ mikiki inimai finakōi. ⁴ Ĕfe fakefĕfe Jesūs Ifokōifafĕfe nikai ĕ inimakōimis. Afara fĕtsakai ea inimamakĭ iskafatiroma.

⁵ Yamā, ĕ mia noisharai. Mĕ nika a Nios Ifofafo yora fetsafo mĭ ato kexemis mia ano nokoafĕfe, mĭ ato ĭkĭsharakōia, ato ōiyamafĭkatsaxakĭ. ⁶ Nāskakĕ na mĭ ato kexeafĕfe noko yoitafo mia yoikakĭ. Nāskakĕ na Nios yoiti pexe mĕranoax ichanākanax fanāikani mĕ nō nika mĭ ato noikĭ, mĭ ato ĭkĭsharakōia. Nāskata ĕ mia yoikĭ iskafai: Afara ato ināfe Niospa meka ato yoinōfo pexe tĭi, Niospa meka ato yoifofāsafanōfo. Mĭ askafaino Nios mikiki inimai. ⁷ Nāfo fofāsamisfo Jesūsnoa meka shara ato yoifofāsafakani. Afara yopafĭkĕki a Jesūs chanĭmara faafoma ato afaa yōkamisfoma. ⁸ Nāskakĕ a Nios Ifofafo nō ato kexesharatiro afara fichipaiyaifĕfe nō ato inātiro. Nō ato askafakĭ nōri ato feta Nios yonoxomis itiro.

Yora fetsa āfe ane Diótrefes chaka ini

⁹ A Niospa meka nikapaikani ichanāmisfo ĕ ato kirika kenexō fomayamea ōinōfo. Akka Diótrefes ea nikakaspamis, “Ĕ āto xanĭfo finakōia inōra,” ixō. Nāskaxō ea ōikaspai, efe rafepaima. ¹⁰ Ea mekafakĭ chakafamis, ea yafi a Niospa meka yomisfōri noko chakafai. Askatari a Nios Ifofafo fetsafo ato ifĭkaspamis Niospa meka ato yoiyamanōfo. Fetsafĕfe ato ifĭpaifĭaifono a Diótrefes ato ifĭmakaspamis. “Mĕ anā nofe ichanātĭroma nono ikĭax,” ixō ato chakafamis. Nāskakĕ ĕ matoki nokoxō ĕ mato xafakĭakōi yoi kaikai mĕ tĕpisharakōinō, afeskakĭ ato chakafaimākai. ¹¹ Yamā, ōiti chakayafo keskara mĭri iyamafe. Akka a ōiti sharayafō keskara mĭri ife. A ato sharafamisfo Niospa fakefokĭ. Akka a ato chakafamisfo Nios tĕpimisfoma afe keskaramĕki.

Na yora fetsari āfe ane Demetrio shara ini

¹² Keyokōichi a yoisharakani Demetrioōnoa iskafakakĭ: “Na Demetrio feronāfake sharafĭnakōia,” ixō yoikani. Nōri anori yomis. Nō anori yoiaito mĭri chanĭmara fatiro, mĕ mĕmĕi noko tĕpixō.

Mĕ mekai xatekĭ Juan ato meka shara fomani

¹³ Ĕ mia ichapa yoipaifĭkĭ ĕ anā mia kirika ichapa kenexonima. Kaxō ĕ mia yoisharaxiki. ¹⁴ Akka ĕ mikiki koshi nokosharapai. Ĕ mikiki nokoax mefe yoinōnāsharaxiki.

¹⁵ Mĭri isharafe, ōiti fekaxteyamaxiki. Na efe ikafāferi mia meka shara fomapaikani. Mĭri a mefe ikafo noko ato yoixosharafe. Nāskakĕ nā tĭi ĕ mia yoi kirika kenexō mia fomai.

Ĕkĭa Juan

Judaspa Jesús Chanĩmara Faafu Kirika Kenexõ Fomani

Judaspa ato kirika kenexoni a Nios Ifofafo

¹ Èkĩa Judas, Santiago áfe exto. Nõko Ifo Jesucristo ã yonoxomis. È mato kirika kenexoni a Epa Niospa mato noĩki mato ifini tii áfenãkõi faxiki. Akka Epa Niospa nõko Ifo Jesucristoõxõ mato kexesharafafãini. ² Epa Niospa mato noĩki, mato inimamasharakõinõ mato õiti fekaxteyamanõ, askatari mato noĩkĩfinakõinõ.

Fetsafãfe chanĩfisti ato yoipaonifo (2 Pe. 2.1-17)

³ Efe yora mĩshtichi, nõko Ifãfe noko nãxoni keskara ã yoi, a noko imapaiyai keskai nõ chipo afe ixiai keskaraõnoa ã mato kenexopaifiki mẽ nika mã meka fetsa yopaito. Nãskakẽ iskaratĩa ã mato kirika kenexoni mã Jesucristo nikakõiyana mã shinãfafãinõ. Nãnori Epa Niospa áfe Fakeõxõ noko tãpimani. Nã áfe Fakeõnoa noko tãpimani keskafaki nã fisti nõ yopai Ifo sharafaxiki. Akka meka fetsa mato fanĩrira yoipaiyafãfe ato nikatamaroko nã mato yoini keskara nã fisti nikakõikãfe. ⁴ Yora chakapo mato mẽra fõkaxõ anorima mato pãrakani chaka tãpimapaikakĩ. Afokai Niospa yorafoma. Akka nõ afara chakafamixakĩ nõ Epa Nios yoiaito nõko chaka noko soaxonano nõ afe ipaxatiro. Nãskafekẽ nãfãfe fanĩrira chakakõi mato yoipaikani, iskafaki mato yoipaikakĩ: “Mã Jesús Ifofaxõ nã mã apaiyai keskara mã atiro, mãto áfima fe mã ikaino, kãrofori áfe fenema fe itirofo. Nãskaxõ nã afara chaka fetsafo mã apaikĩ mã atiro. Mã askafaito Niospa mato omiskõimatiroma,” ikaxõ fanĩrira mato yoipaikani. Nõko Ifo Jesucristo fisti nikakaspamisfo. Nã keskarafoõnoa Niospa shinãmanaino keneyonifo Niospa ato omiskõimakĩ finakõixii.

⁵ Akka mã mã tãpifekẽ anã ã mato yoipai nõko Ifãfe Ejipto anoa israelifo ato ifini anã omiskõinõfoma. Akka ato ififinixakĩ chipo a chanĩmara faafoma ato keyokõi reteni. ⁶ Nãskatari Niospa áfe ájirifo taeyoi Nios fe isharayopaonifo. Nãfãferi Epa Nios yonosharaxoyopaonifo. Nios fe isharafiakatsaxakĩ atirifãfe afara chaka shinãkakĩ anã Nios Ifofapainifoma. Askafãfe õikĩ Niospa kaninãnã metexkereaõ fakishifã mẽra ato nĩchiyoni. Nãskaxõ nã nikamisfoma ato omiskõimanaitĩa ato ichanãfaxõ nã omiskõipakenakafo mẽra ato potaxii. ⁷ Nã Niospa ájirifãfe afara chakafapaonifo keskafaki Sodoma anoafõ feta Gomorra anoafãfe a pexe rasi ano chaima ikafãferi nãskafapaonifo afara chakafakakĩ. Feronãfakafãfe ato áfimafo chotaifono, kãrofãferi ato fenemafo chotamapaonifo. Askatari feronãfãfõ ãa ranã chotanãpaonifo, kãrofori askapaonifo ãa ranã chotanãkani. Nãskarafo õikĩ Niospa ato omiskõimani, chiifã tokiriya nai mẽraxõ atoki potani. Nã askafanioxõ Niospa noko tãpimani. Nã tãpixõ nõ tãpitiro fatorafãfe ato chaka xateyamakanax nãskarifiakani, chiifã mẽranoax omiskõipakenakafo.

⁸ Nãskarifiakĩ nã chanĩmisfãfe afara chaka fisti shinãfafãikani. Nãskakaxõ afia ato namapa õia keskafakakĩ, nãskakõi fakani, ato yora chakanafakakĩ. Askatari Nios nikakaspakani. Nãskakaxori Niospa ájirifori Ichamisfo. ⁹ Akka Niospa áfe ájiri Miguel xanifokõifixõ atokai Satanás Ichanima. Mã Moisés naano Satanás Miguel fe feratenãni. Miguel Moisés áfe yora maifapaifãino, akka Satanás Moisés áfe yora chakafapaixikĩ fipaini. Askafaito õikĩ Miguel áfe feratenãfikĩ Ichanima. Yoikĩ iskafani: “Satanás, ã mia afeskafatiroma. Akka ãfe Ifo Niospa mia yoinõ mĩ omiskõinõ,” ixõ yoini. ¹⁰ Akka nã feronãfakafãfe mato mẽra fõkaxõ nã afaa tãpimafikaxõ meka chaka yoisfõ. Askatari nã apaiyai keskara fisti famisfo, nã yoinãto shinãsharatiroma keskarafo. Nãskakaxõ ãa afarafo chakafakanax omiskõipakenakafo.

¹¹ Ooa. Nã Caĩn ini keskarato. Caĩn áfe onefetsa noikaspapaoni. Nãskakẽ reteni. Askatari nã Balaam kori fisti fichipaikĩ Nios kachikiri fani. Na yorafori nãskarafori. Nãfori nã Corẽ keskarafo. Nã Corẽ áfe xanifo Moisés nikakaspapaoni. Nãskakẽ nikakaspaito Niospa reteni, nãskarifikã nã ato pãramisfo Niospa askari faxii omiskõimakĩ. ¹² Akka mã noinãkĩ ayayanã mã pimis nõko Ifo shinãyanã. Akka mã yora chakafori rãfitama mato fe ichanãkaxõ nõko Ifo shinãmisfoma. Fetsafo noitama ãakõi noimemisfo. “Nõ mato yoi mato kexesharaxikĩ,” ifakaxõ tsõa afaa yoisharamisma. Nãfo nã nai kõi oimais keskarafo. Nõ nai kõi fakish õikĩ mã oi feira nõ fatiro inimayanã. Akka oi iyamaino nẽfe nai kõi potano nõ shinãchakatiro. Nã ato kexemisfo keskarafofikanax afãfe nõko Ifoõnoa tsõa tãpima. Nãskatari nã yorafo nã ifi fimimistĩa fimiyamai keskarafo. Nã ifi mã nai rafea keskarafo, mã nakẽ áfe tapo tsekatirofo. Nãskarifiakĩ nã ato pãramisfãfe tsõa ato Jesús Ifofamatiro afe nĩpaxanõfo. ¹³ Nãfo oa fakafã poo ikĩ fãkox potatiro keskarafo. Nãskakaxõ afãfe afaa shara yoitirofoma, mẽxotaima afara chaka yoikani rãfimisfoma. Nãfo nã fishi keskarafo. Mã fishi nãmã pakexõ, anã chaxatiroma. Nãskarifiã nã mato pãramisfo Nios kachikiri fakanax fakishifã mẽra fokani, Niospa nã keskarafo ato tãpimakĩ ato omiskõimakõixii anoax omiskõipakexanõfo.

¹⁴ Nāskatari Enoc chipo fakeni, mā Adán afetīama Epa Niospa onifanino. Akka Enoc āfe xini ini Adán. Nā Enoc nā chanīmisfāfe ato pāranōpokoxiaifoōnoa yoini. Nāskata aato ato yoikī iskafani: “Nikakapo, ē ōia nōko Ifo oi, afe nai mēra ikafo fe ichapakōifo tsōa ato tanatiroma afe fexikani. ¹⁵ Nāskaxō ato yoipakexii nā niyoxō amisfo keskara. Keyokōi maitio anoafō nōko Ifoki fexikani, fatofomāki afe yorafa a afe ipanakafo ato ōinō, askayamai fatoforimākai a chanīmara fayamakanax omiskōipakenakafo mēra foaifo. Akka nā nikamisfoma afe yorafoma. Akka nā chakafamisfo tii ato yoita, niyokaxō Nios nikakasapaonifoōnoa yoita, keyokōichi mekafakī chakafamisfoōnoari ato yoixii,” ixō Enoc ato yoini. ¹⁶ Nāfāfe yōachepeyanā ato mekafamisfo. Nā chakafapaiyai keskara fisti shināfafāimisfo. Askaxori fetsafo pārakaxō afara fīapaimisfo ea ināsharakanira ixō shināfafāimisfo.

Nā Nios Ifofafo ato yoisharani isharanōfo

¹⁷ Efe yora mīstichi, nā nōko Ifo Jesucristoōnoa mato yoimisfāfe mato yoinifo keskara shināmakiyamakāfe. ¹⁸ Iskafakī mato yoinifo: “Nōko Ifo mā chaima oaino nā Jesús Ifofaafāfema mato kaxemetsama faxikani, Niospa meka nikakaspakakī. Nāfāfe afaa shinātama nā chakafapaiyaifo fisti shināfafāikani,” ixō mato yoinifo. ¹⁹ Nā keskara fāfe mato paxkanā fatirofo, afafo chakafa shināfafāikani. Askarafo Niospa Yōshi Shara ato mēra naneama.

²⁰ Akka efe yora mīstichi, kexemesharata isharakōikāfe Niospa āfe meka shara nikakōiyana. Nāskakē kīfikāfe āfe Yōshi Sharaōxō mato imapaiyai keskara mato tāpimanō. ²¹ Nāskakē Jesús Ifosharakōifakāfe, Epa Niospa mato noikōiaito mā mā meemiski. Nōko Ifo Jesucristo noko noikōikī nō nafiakē noko nimapakenaka nō afe fīpaxanō.

²² Fetsafāfe iskafakī shināifono: “Ētsa, chanīma rakikīa,” ixō shināifono, fenāmāshta ato yoisharakāfe nikasharakōinōfo. ²³ Oa afara chiifā mēra pakeax koofaito, nō koshi firisafatiro keskafakī nāskarifiakī fetsafāfe afara chakafaifono ato noikī yoisharakāfe Jesús chanīmara fanōfo, chiifā mēra foyamanōfo. Akka yora chakafinakōiafōri mā ato noikī ato yoisharakāfe xatenōfo, chiifā mēranoax omiskōiyamanōfo. Nāskatari nō kooyoxō rapati chakana faxō nō anā fichipaitiroma. Nāskatari āto chakafafo noikaspai fo keskara iyamakāfe. Ato noikōita nā afara chakafaifo keskafakī ato feta ayamakāfe.

Mā mekai xatekī Niosnoa ato yoisharani

²⁴⁻²⁵ Nōko Ifo Nios fisti finakōia, nāato keyokōi tāpiakōia. Askatari nāato noko ifimis. Āfe kerex sharaōxō noko kexesharatiro nō fenonōma. Nāato noko inimamasharakōi nō nai mēra kai, afaa chakafamisma keskara. Nā sharafinakōia, efapakōi, afama mīsthi fatiro, tsōa atiroma keskafakī nōko Ifo Jesucristoōxō atiro. Nāskarakōi mēxotaima fīpanaka. Nā tii.

Ēkīa Judas

Jesucristo Juan Ōimani Keskara

Afara afeskara ixiai anori Jesucristo Juan tāpimani

¹⁻² Efe yora mīstichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoaifo nāmānoafo a yonoxomisfo tāpimaximākai. Askafaito nikakī Jesūs āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoaifo xafakīakōi. Askaito ōikī ē kirika kenea a inōpokoaifo anori a Niospa Jesūs yoia anorikōi mā tāpisharakōinō.

³ Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori inimaxikani. Nā ē mato yoiai keskai mā samamashta iki. Ea nikasharakāfe.

Juan a ichanāmisfo anoafō siete Nios yoiti pexe ano a kirika kenexō fomani tāpinōfo

⁴⁻⁵ Nā Asia mai anoafō a Nios Ifofafo tii siete pexefo anoafō ē mato kirika kenexō fomai. A ē mato yoiai anori ōisharakōikāfe. Afetiama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī mātō ōiti mēra mato shināmasharapainō afanā mātō ōiti feaxtefanōma. Nāskakē nōko Ifo Jesucristo Niospa meka noko yoimis chanīmākōi. Jesūsfi Niospa Fakekōifekē retenifo. Mā retexō maifafafono Apa Niospa anā otofani anā nanakama. Fato fetsa askayomisma. Nāskaxō Apa Nios fe rafexō a xanīfofo maitio anoafō ato ikixii xanīfokōi ixō. Aatoifi noko noikōiakī, āfe imi foax noko nāxoni Satanās chaka nōko ifo inōma. ⁶ Nō aōnoax nō Epa Nios afe yorakōi ixō noko yonomapaiyai keskafakī nō anō. Nō askai afe yorakōifo ixō nōri yora fetsafo nō kīfixoti Epa Nios noko nikai. Nāskarafoskōi nōko Ifo Jesucristo noko imai. Nāskakē keyokōi yorafāfe aōxō iskafakakī yoipakenakafo: “Aicho, tsoa fetsakai na Jesūs keskarama. Nā fisti sharafinakōia. Ares fisti nōko Ifo nīpanaka. Ares fisti keyokōi yorafa ato ikipakenaka,” ixō yoipakenakafo. Askapakexapainō.

⁷ Ōikapō. Oa nai kōi keskara sharakōi nōko Ifo Jesūs oaito keyokōi yorafāfe ōixikani. Askatari a retenifāferi ōikani, akiki rāfixikani. Oaito ōikani keyokōi yorafa a Ifofamisfomafō, “¿Afskakī nō Jesūs Ifofamismamē?” ikanax oiaxikani, shināmitsakōixikani.

⁸ Epa Niospa yoia: “Afara onifataima ē iyopaoni. Ēfi nīpanakakī. Afetiara na nōko mai keyoai eres fisti ē ato yoitiro. Nāskaxō ē afama mīshti famis. Akka ē niyopaoni. Nāskatari ē nīpanaka,” ixō nōko Ifo Niospa yoia.

Nōko Ifo Jesucristo āakōi oa namakē ōiai keskara Juan ōimani

⁹ Ēkīa Juan, ē mātō ochikōi. Nāskax māri Jesūs Ifofaax mā efe yorakī. Askax mā aōnoax omiskōifikī, mā tenemis. Nāskariai ēri aōnoax omiskōifikī ē tenei. Ē Niospa meka ato yoita Jesūsnoari ē ato yoimis. Ea nikakaspakakī, āto xanīfāfe sorarofō ea achimaxō, fakafā nakirafe ea ato nīchimana āfe nāsimā, āfe ane Patmos ano. ¹⁰ Ē mato yoinō, ea nikakāfe. Anoxō iskafani. A Jesūs otoni penata, nomīkonō, Niospa Yōshi Sharapa ea ikixō a ea tāpimapaiyai ea ōimana. Oa namakē nō ōimis keskara xafakīakōi ea ōimana. Askata ea kachiorixori fāsikōi oa xāaiti keskarato ea yoiaito ē nika. ¹¹ “Nā mī ōiaifo fetsafo kenexōfe. A kirika kenexō Jesūs Ifofamisfo tii ato fomafe. A siete Nios yoiti pexe anoafō Asia anoafō ato fomafe, afāfe ōinōfo. A Nios Ifofamisfo a pexe tii Efeso anoafō fomata, Esmūrnā anoafō fomata, Pérgamo anoafō fomata, Tiatira anoafō fomata, Sardis anoafō fomata, Filadelfia anoafō fomata, Laodicea anoafori nā mī ōiaifo ato kirika kenexō ato fomafe,” ea faa.

¹² Ea askafaito ē fesoakekafā ē ōia tsōa ea yoimākai ixō. Ē ōia siete oa rāpari efapa ōta keskara oro ē ōia. ¹³ Nāskai rāpari nakirafe feronāfexe xanīfo finakōia nia keskara ē ōia. Āfe tari āfe tae fepokōia, āfe sitorari orokōi aō nonexeme ika. ¹⁴ Askata āfe foo oxokōi. Askatari āfe fero oa chii keskara xafakīakōi. (Nāskarifiakī xafakīakōi Jesūs noko ōitiro a nō shūnāi keskara.) ¹⁵ Askatari āfe taeri chaxasharakōia ika. Āfe mekari oa oi kaya feaito nō nikamis keskarakōi. ¹⁶ Āfe pōya kayakai aōri āfe mifi kamaki siete fishi keskara ika. Āfe ana keno chainipa keskara aostamea ika. Askatari āfe femānā fafekōi oa xini nō ōimis keskara ika.

¹⁷ Nāskara ōi ē pakea, oa nai keskara. Ē askaito ōikī ea ramā āfe mifi kayakai aōxori. Ē askaito ea yoia iskafakī: “Rateyamafe. Ē Jesūsiki. Afara onifataima ē iyopaoniki. Ēfi anā nanakamakī. ¹⁸ Iskaratīari ē nia. Mē nafianixakī, iskaratīa ē nia. Ē anā nanakama. Ē anā afeska pishta nakama. Eres fisti ē ato namata, chiifā mēra ē ato potatiro a ea nikakaspamisfo. ¹⁹ Nāskakē a mī taefakī ōiafo kirikaki kenefe. Askatari na mī iskaratīa ōiaifori kirikaki kenefe. Askatari a chipo ixiaifori kenefe. ²⁰ Ē mia yoinō afskai siete

fishimē ēfe mēke kayakai aōri; askatari afeskai siete rāpari oro keskara otamāki. Na siete fishi mī ōiai nāato noko shināmamis siete Niospa meka yoimisfo Nios yoiti pexe mēranoa ichanāmismo. Askatari nā siete rāpari keskara mī ōiai nāatori noko shināmamis siete Nios yoiti pexe mēranoax ichanāmismo Nios Ifofakanax,” ixō ea faa.

2

Jesús a Ifofafo Efeso anofo ato yoini taekōifakī

¹ Jesús ea yoia iskafakī: “Efeso anoxō a ea Ifofafo a ato Niospa meka yoimisto na kirika ato anxonaito nikanōfo, iskafakī kenexōfe: ‘Ēkīa mato Ifo Jesús keyokōi yorafo ēfe Epa Niospa meka yoimisfo ē ato kexetaifaa. A ē mato yoiai anori ea nikasharakōikāfe. ² A mā ikai keskara mē tāpia, mā mato ōi. Māfi eōxō fāsi yonosharakōimiskī. Afara fetsa afeskara afiaito mā tenekōimis. A yorāfāfe afarayo chakafamismo anorikai mā tāpipaimisma. Akiki mā inimapaimisma afara chakafaifono, nāskax mā ato fe rafekaspamis. Yora fetsafāferi mato yoikī iskafakani: “Cristo ea nīchia ē mato yoinō,” ixō mato yoiaifāfe, “Nō ato nikayonō,” ixō mā ato nikataifaa. Fanīrira mato yoiaito anā chanīki yoimara mā faima mē mato ōia mā askafaito. Anorima yoi āa chanīmisfo mā mā tāpia. ³ Nāskax mā eōnoax omiskōikī mā tenemis ea potakaspakī. ⁴ Mā anori shara shināfimiskē ē anā meka fetsari yoinō. Taefakī mā ea noiyopaonixakī anā iskaratīa mā ea anā noisharaima. Mā mā ea shināmaki fetsea. ⁵ Shināsharakāfe a mā taefakī shināyopaoni anori. A ea noikī mā taefani keskafakī anā ea noikāfe. Askatari mā ranā mē nōnāyopaoni keskakōikāfe. Akka mā ea tanaima, oa chii nokaito nō anā kētefatiro keskafakāfe ea shinākī. Mā ea Ifofasharayamainokai chipo tsōa anā mato tanaima. Mā ichanāi ano anā tsoakai mato fe ichanāima. ⁶ Mā askafixō afara fetsa mā shara famis. A feronāfāfe āfe ane Nīkoraita fanīrira yoiaito nikakakī atirifāfe mato anoxō nikakaxō, afāferi chakafamismo keskafakī ēri ato noikaspai. A ē noikaspai keskafakī māri efeta noikaspai. ⁷ Mā pachoyakī ea nikakōikāfe. Niospa Yōshi Sharapa mato yoiaito nikasharakōikāfe. Satanās mato fanīrira shināmapaimiskī. A Satanās finōinīfōfā ea kachikiri fatama ea Ifofasharakōiaito, aafi Epa Nios ano ē ikimaxii efe isharpakexanō,” ixō Jesús ea yoia anori Efeso anofo a chanīmara faafo ato ē kenexonō.

Jesús Ifofafo Esmīrnā anofo ato yoini

⁸ Anā Jesús ea yoia iskafakī: “A ea Ifofamismo Esmīrnā anofo a ato Niospa meka yoimis ē yoinō ea kirika kenexōfe iskafakī: ‘Ēkīa mato Ifo Jesús ē mato yoi mā tāpinō. Ea nikasharakāfe. Nā afama mīshti onifataima ē iyopaoni. Iskaratīa ē nīpanaka. Mē nayofinixakī ē anā nanakama. Ē mato nonori yoi iskafakī: ⁹ Mā omiskōiaito mē ōi. Askatari mā afaayafoma. Mā askafaiino ē mato fe ikano, ea keskarari mā shara itiro. Mē tāpia matoōnoa yora fetsafāfe meka chakayoiāifāfe. “Nō judeofo, nō Nios Ifofamis,” ikaxō yoiaifo afokai efe yorafoma. Afofi Satanās yorafoki. ¹⁰ Akka a inōpokoai ē mato yoinō. Satanās ifofaafāfe fatora fetsa fisti mato karaxa mēra ikimaxikani mā ea shināmakimākai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: “Ea retefiaifono ē meseima, ē Nios ari kai. Ēfe Ifāfe ea potanakama. Ē ēfe Ifo noikī finakōifafāini,” ixō yoikāfe. Mā askax, nakē, ē mato ikipakenaka mā efe ipaxanō. ¹¹ Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifakī ea shināmakiyamaito Satanās afeskafatiroma. Nāskax naax a omiskōipakenakāfo mēra katiroma,” ixō anori Jesús ea yoia a Ifofafo Esmīrnā anofo ē ato kenexonō.

Jesús Pērgamo anofo a chanīmara faafo ato yoini

¹² Anā Jesús ea yoia iskafakī: “A ea Ifofamismo Pērgamo anofo a ato Niospa meka yoimis a ē yoipaiyai anori ē yoinō ea kirika kenexōfe tāpinōfo. Iskafakī kenefe: ‘Ēkīa mato Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, ēfe mekapas a ea noikaspai tii ē ato chakafatiro kopikī. ¹³ Mē tāpia a pexe rasi Pērgamo ano mā ika. A Pērgamo anoafāfe Satanās nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eōnoa ato yoimis ōikī mā reteafō noikaspakakī. Mā reteafāfe ōifiax mā atoki meseima, mā ea chai faama. Māto ōiti mēra mā shināsharakōi. “Noko retefiaifonokai nōko Ifo Jesús nō chai faima,” ixō mā yoimis. Anori mā shināi sharakōi. ¹⁴⁻¹⁵ Akka nāno afara fetsa a sharama ē mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afeskaxō mī kaifo ē ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixikī. Nā mā akai keskarari akairi anōfo. Nā nōko niosra ixō afara onifaxō a mā piāi mā ināmis. Nā israelifāfe pikanax chakananōfo mato fista mēranoax. Askatari āto āfima fe ikanax chakananōfo,” fanī. Iskaratīari nāskarāfori mā fisti rasi chakanāfo nā Nicolaitāfāfe ato afara chaka tāpimanaifo keskara ikafo. ¹⁶ Nāskakē anā iskaratīa askafayamakāfe. Nios

Ifokakāfe, anā shinākāfe. Māto chaka xatekāfe shināmitsayanā. Akka mā chaka xateyamaito, ē matoki samamashta nokoxō ēfe mekapa ē mato kopikī chakafatiro mā omiskōinō. Ēfe mekafi oa keno ikiai keskarakōiki. ¹⁷ Mā pachoyakī ea nikakāfe. Niospa Yōshi Sharapa eōnoa mato yoiaito, nikasharakāfe. Satanās mato chakafamapai. Fētsa Satanās nikayamaxō ea kachikiri faamano, nā ē kexesharaxii nā ēfe Epa israelifo kexesharani keskakafi. Shinākapo. Epa Niospa israelifāfe āto xinifo a piaifo ato ināni fonāikaifāfe afaa piamaifāfe Epa Niospa nai mēraxō ato pōtani oa misi keskarāfo āfe ane mānā nā pinōfo ato pōtapaoni pena tii ato noikī. Nāskafakīri nā ea chanīmara faafo ea Ifo sharakōi faifo ē ato ināxii ēfe Yōshi Shara isharapakexanōfo. Ea ōiyamafiaifono pena tii ē āto ōiti xafasharakōi faxotiro. Askatari mā ea Ifo sharafaifono isharakōiyanā mā ea chanīmara faino, akka ē mato ane fetsafaxōi tsōa tāpimisma, nā fiafī fistichi tāpitiro. Tokiri oxosharakōiki nā tokiriki mā mato ane kenea mato ane fena ē mato ināxii. Nāskakē ea tāpisharakōixikani. Mā ōitisharayakōi ixii, ” ixō Jesús anori ea yoia a chanīmara faafo Pērgamo anofo ē ato kenexonō.

Jesús a Tiatira anofo a Ifofamisfo ato yoini

¹⁸ Anā Jesús ea yoikī iskafaa: “Ea Ifofafo Tiatira anofo Niospa meka ato yoimis a ē yoipaiyai anori ē yoinō ea kirika kenexōfe iskafakī: ‘Ēkīa ē mato Ifo Jesús ē mato yoisharapai mā tāpinō. Ēfe fero oa chii xoisai keskara. Nāskakē ē mato tāpikōia. Ēfe taeri nā keno fakka fakka ikai keskara. Nāskakē ē mato yoikī iskafai: ¹⁹ “Mē mato tāpia, nā mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsafori mā noisharakōimis ato kexesharayanā. Mā omiskōifiki eōxō mā tenekōimis. Mā ea chanīmara fakī taefanitīa mā fetsafo sharafamis. Nāskakē iskaratīari mā ato noisharataifaa. ²⁰ Mā mā askafimiso afara fetsa ē mato yoinō a ē fichipaiyaima mā anā fichipainōma. Akka kēro fisti mato fe ichanāxō, ‘Ē Niospa meka ē mato yoinō, ea nikakāfe,’ ixō mato yoipaiikī, ēfe mekakōi mato yoima. Nā kēro Jezabel fanīrira mato yoikī āa mato pāramis. Mā Jesús Ifofafamiskē mato pāramis iskafakī: ‘Māto āfimafo chotakāfe; kērofāferi mato fenemafo chotamakāfe,’ mato famis. Askatari mato yoimis iskafakī: ‘Afara fetsa yora fakaxō, nā nōko niosra ixō, a mā piā ispaxō nōko nios nō ināira ixō, ano fisti ichanāxō, mā pitiro,’ ixō na kēro Jezabel mato yoikī mato pāramis. ²¹ A kēromā fanīrira mato yoimis mē yoitaifamis anā chakafanōma. Ē yoifaitokai āfe chaka xatepaima. ²² Ē yoifaino ea nikayamaito ōikī ē isinī imaxii rakatsax omiskōinō. Askata a fetsafori a keskara a sharashināifoma āto chaka xateyamafāfe ē ato omiskōimani. ²³ A kēromā shināi keskarari shināifo ē ato retexii. Ē askafaito, ōikani a ea Ifofamisfo mai fetsafo arixō tāpitirofo ē keyokōi yorafo ē tāpisharakōia. Māto ōitinī a mā shināi anori mē tāpikōia. Tsōakai afaa pishata ekeki onetiroma. Ē keyokōi tāpikōia. Nāskakē mā afarafo shara famis ē mato shara faxii kopifakī. Akka a afarafo chakafamisfo ē ato omiskōimaxii kopikiri. ²⁴ Efe yora mīstichi Tiatira anoafāfe, mā atiri nā kēromā mato fanīrira yoipaiyai anori mā nikamisma. Satanās ato tāpimamis keskara mā anori shināpaima. Askara shara. Nāskakē ē anā mato afaa fetsa yoima. ²⁵ Nāskakē ē anā fistiri mato yoi. Na eōnoa mā tāpimis anori shināmakiyamakāfe. Ē mato ifyoiāi mā eōnoa tāpimis anori shināmakiyaiyamakāfe. ²⁶⁻²⁸ Fētsa Satanās finōkōixō, ea fisti Ifokōifaax mā naax nā ēfe nīpanaka. Ē ato xanīfo imaxii. Epa Niospa ea xanīfokōi ima keyokōi ē ato ikinō. Nāskarifikī ē ato xanīfo imatiro efeta na maitio anofo ato ikinōfo, mitsisipakōixō. Akka a fetsafāfe ēfe meka shara nikakaspaifāfe nō ato omiskōimaxii. Oa nō kesho kerexkai nō yamī moshaino moshitiro keskara afesaxō nō anā shara fatiroma. Nāskarifikī nā nikayospamisfo nō ato omiskōimanitīa tsoa pishata ato timamatiroma nanōfoma. Mā penaino, fishifā fisti fafeaito, keyokōichi yorafāfe ōitirofo. Aa keskara ē anā oxii ea ōisharanōfo. Ē anā nokoxō, ē ato yoixii nā ea Ifofamisfo efe isharapakexanōfo. ²⁹ Mā pachoyakī ea nikasharakāfe. Niospa Yōshi Sharapa mato yoia keskara nikasharakāfe, ” ixō Jesús anori ea yoia a Ifofafo Tiatira anofo ē ato kenexonō.

3

Jesús Sardis anofo a chanīmara faafo yoini

¹ Askata anā Jesús ea yoia iskafakī: “A ea Ifofamisfo Sardis anofo a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mato Ifo Jesús ē mato yoi mā tāpinō. Niospa Yōshi Shara efe ika. Ēfi Nios yoimisfāfe āto xanīfokōiki. Ē mato yoi iskafakī: Mā ika keskara mē tāpimis. Yorafāfe matoōnoa iskafakī yoimisfo: “Nafō shara ikafo. Na Sardis anoafāfe mā Jesús Ifokōinafo,” ixō matoōnoa yoimisfo. Mā isharamis keskara ōikani. Māri shināmis iskafakī: “Nō shara ikara” iflax mā shara ikama. Mā ea Ifofasharakōiama. ² Akka mā mā ea shināmakia. Askakakīma, anā a mā shināyopaoni anori shinākāfe. Mē tāpia Epa Niospa mato imapaiyai keskara mā isharakōiama. Ē mato yoiai

keskara mā akama. Mā eōxō asharayopaoni anā iskaratīa mā anā askafaima. Mā ea shināmakiwai. Nāskakē afianā ea shināsharainīfōfākāfe. ³ Nā mā ēfe meka mato ōiti mēra mā shināyopaoni keskafakī anā shinākāfe. A mā chakafamis keskara shinākakima; ea Ifo shara fakāfe. Akka mā ea shināyamaito ē matoki samama nokorisatiro mato omiskōimaxiki. Oa yometso tsoā tāpiamano āto pexe mēra ikirisatiro keskaī, ē matoki nokorisatixii mato omiskōimaxiki. ⁴ Askafiax a mato fe ichanāmisfo fisti rasi a Sardis ano ikafāfe chakafamisfoma. Nōko rapati choshtakōi nō pekaxō fatiro fetsa fena shara safexiki. Nāskafakīri atiritto mā chaka shināpaoni keskara mā anā shināima, mā mā pota. Nāskaxō mēstekōi mā eōnoa shināi. Nāskaxō rapati fenasharakōi keskara ē mato ōitiro. Mā askano, mā ea ano nokoaito ē mato rapati oxokōi sharakōi ināxii mā ēfe Ipaxanō. Mā isharakōimixakī mā ēfe rafepakenaka. Nā ē keskara shara ixikākī. ⁵ Tsoa ēfe meka shināmakitama ea Ifofakaxō, eōxō Satanās finōkanax afo ēfe isharakōipakenakafo. Afori ē ato rapati oxokōi sharakōi ināxii. Askaiāferi ēfe Epa Niospa a ea Ifofaafō tii āto ane tii kirikakī kenea. Nāskaxō āto ane kenea kirikakī a ea Ifofaifāfe tāpinōfo ēfe nīpaxakākī. Askaiāfē ē āto ano soanakama. Epa Nios feta āfe ājirifāfe ōiaifono ē ato yoixii iskafakī: “Nafofi ēfe yorafokī,” ixō ē ato yoixii. ⁶ Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiaito nikasharakōikāfe,” ixō anori ea Jesús yoia a Ifofaafō Sardis anoafō ē ato kenexonō.

Jesús Filadelfia anoafō a chanīmara faafō yoini

⁷ Askata anā Jesús ea yoia iskafakī: “A ea Ifofaafō Filadelfia anoafō a ato Niospa meka yoimis a ē yoinō ea kirika kenexōfe iskafakī: ‘Ēkīa mato Ifo Jesús ē mato yoi mā tāpinō. Ē afaa pishta chakafamisma. Ē sharafinākōia. Ēfe meka chanīmakōi. Nā fichipaiyai afama mīshti sharafo āfe pexe ano fapaoni, xanīfo David. Akka āfe pexe fepoti chamisyano tsoa ikitiroma ipaoni, chamismaisax. Akka ato ikimanaino ikitiromo. Akka ato ikimayamaino tsoa ikitiroma. Nāskarari mā Nios ano ikipai mā ikitiroma ē mato ikimayamaino ēmāi chamis keskaraxō. Akka ē mato ikimanaino mā ikitiromo Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro. ⁸ A mā imis keskara mē tāpia. Mā yora ichapayamafaxō mā shināsharakōimis. A ē yoimis keskara mā ato tāpimatiro a mā amis keskara eōnoa. A ē yoimis anori tsoā mato xītitiro. Yora fetsafāfe mato yoiaifo mā metsanima. Mato askafafiafono ēfe meka mā shināmakimisma. “Na Jesús nōko Ifo,” mā ea famis. ⁹ Fetsafāfe chanīkakī mato yoimisfo iskafakī: “Nō judeofo,” ixō mato yoimisfo. Afokai Niospa afo yorafoma, Epa Nios chanīmara faxoma. Afāfe Satanās ifofamisfo. Nāskakē ēfe Epa fe nō āto kaifoma. Afofi āa chanīmisfo. Shinākāfe. Nā yorafo ē ato yoimaxii iskafakī yoinōfo: “Nōkai shara shināima. Nō afama. Chanīma, Niospa āfe Fake mato noisharakōimis,” ratokonō mai chachikaxō iskafakī mato yoixikani. ¹⁰ A ē mato yoimis anori mā isharakōia omiskōifiki mā tenekōimis ēfe meka nikakatsaxakī. Mā eōnoax omiskōifiki mā tenekōimis. Nāskakē mā ea shināmakimismano ē mato kexesharaxii a omiskōiai nokoaino nā maitio. Keyokōi omiskōixikani ea Ifofayamakanax. ¹¹ Ē anā samama oxii matokī. Ea shināmakiyamakāfe. Mā ea Ifofakī ea chaifayamakāfe. Mā ea chaifayamaino eōxō Epa Niospa mato ināpaiyai keskara mato ināi fetsafāfe finōfoma. ¹² Fetsa omiskōiki ēfe meka shināmakitama tenekōifai ea Ifo sharakōi faxō ato Satanās finōkōia. Nāskakē a ēfe Epa Nios ika ano, ē ato imasharapakenaka. Anoax anā faki fonakafoma. Nāskakē ē afo tāpimaxii afomāi Epa Niospa yorafokē. Askaxō ē ato yoixii iskafakī: “Nono Epa Nios ikano, nofe mā ipanaka,” ē ato faxii. A Niospa yorafo, judeofo, Jerusalén ano ipaonifo. Akka iskaratīa Epa Nios ika ari Jerusalén fena. Jerusalén fena nai mēra. Nai mēra ifiax, chipo nāmā fotoxii. Akka fetsafo ea shināmakikanaxma afo ano ipanakafo. Nāskakē fotoxō ēfe Epa ane ē atoki nētaxii. Askatari Jerusalén fenapa aneri ē atoki nētaxii. Askatari ēfe ane fenari tsoā nikayomisma ē atoki nētaxii keyokōichi tāpinōfo ē ato Ifokē. ¹³ Mā pachoyakī ea nikasharakōikāfe. A Niospa Yōshi Sharapa ato shināmanaino yoiaifo anori nikasharakōikāfe,” ixō Jesús ea anori yoia a Ifofaafō Filadelfia anoafō ē ato kenexonō.

Jesús Laodicea anoafō a chanīmara faafō ato yoini

¹⁴ Askata anā Jesús ea yoia iskafakī: “A ea Ifofaafō Laodicea anoafō a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mato Ifo Jesús ē mato yoi mā tāpinō. Epa Niospa ea amapaiyai keskara ē fakatsaxakī āfe meka yoinō. Epa Niospa yoipaiyai keskara ē keyokōi yoimis. Ē chanīkima yoimis. Epa Niospa onifani tii keyokōi ēfi āto xanīfokōikī. Ē mato iskafakī yoi: ¹⁵⁻¹⁶ Mā amis keskara mē tāpia. Ea kachikiri fayamakaxō akka askafixō ē mato amapaiyai keskara mā fichipaikōiama. Askara sharama. Afara matsishara nō nīskakī nō inimayanā nō ayatiro. Askatari afara xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarifiāi ranāri yorafo afara xana keskarafo. Ea Ifo sharakōi faafō. Akka ranāri afara matsi keskarafo. Ēfe meka tāpisharafoma. Ē ato nōnoax rafaanā

ikōini. Askafiaxkai mā kai xana yafi keskarama. Mā katsa keskara. Afara katsa meekī nō anāpaketi ro keskara ēri mato askafai. Nāskakē ē mato potaxii oa ē anāpakeai keskafakī. ¹⁷ Akka mā yoimis iskafakī: “Ē afara ichapaya. Ē afaa yopaima. Ē Niospa mekari tāpifinākōia,” ixō, anori mā yoifiax mā tāpiama mā chaka imis. Ooa. Ea mā yopafikī mā kakapaimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ē kai askara fichipaima. Askafixō ē matoōnoa shināi keskara mā kai tāpiama. Mā nā fēxo keskarafo. Fēxo afara ōitiro. Nāskarifiāi māri ēfe mekakōi nikasharamisma. Mā yora chitoria keskarafo. Akka mā tāpiama mā chitoria keskara. Yora chitoriato rapati yopai chitoria ixikima. Nāskarifiakī mā ea yopaima keskara ea yopafikī. ¹⁸ Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afeskax mā ea keskara itiomākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaroko mā afara chakafamis ē mato yoi. Akka ē mato ōiti fetsafaxotiro ea keskara shara mā inō. Akka a afara mā chakafamis ē xafakā ōia. Mā fēxo keskarakōi imis. Nāskakē ea yōkakāfe ē mato sharafanō, ēfe meka ē mato tāpimasharanō. ¹⁹ Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimākī mā chaka xatenō. Nāskaxō nāfōri ē ato yoisharapai ea Ifo shara fanōfo. Akka a mā chaka shināmis keskara anā shināiyamakāfe. Iskaratā ēfe meka nikakōikāfe ē mato yoiāi keskara axikakī mato chaka xatekāfe. ²⁰ Shinākapo efe yora mīshtichi. Akka a yora pexe mēra ikipai kī ikisi pexe ifo kenatoshitiro pexe ifāfe ikimanō. Nāskarifiāi ē mato ano nokoxō mato yoi kī iskafaxii: “Ē mefe rafepai,” ixō ē mato yoimis. Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiāito ē a mēra ikiax ē afe rafei. Ari efe rafei. ²¹ Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanās finōa. Ēfi xanīfokōikī ari efe xanīfo itiro. Ē Satanās yafi niāfaka chakafa finōkōia. Ēfe Epa Nios ika ano afe xanīfokōi ē ika. Nāskarifiāi fētsa āfe chaka kachirikiri fakī, ea Ifosharafaxii ē ika anoax ari efe xanīfo ipaxatiro. ²² Mā pachoyakī ea nikakāfe. Niospa Yōshi Sharapa ea yoiāi keskara nikasharakāfe,” ixō ea anori Jesūs yoiā a Ifofaāfo Laodicea anoāfo ē ato kenexonō.

4

¹ Akka nā ea taefakī yoiā, mē kenekī mitoano, ea anā yoiāito ē nika. Ea iskafaito ē anā ōia nai mēraxō oa pexe fepoti fepekemea keskaraxō. Ē nika afia ē nika keskara xāaiti āfe oi efapa keskarato ea yoiā anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafō ē mia ispanō nafō afarafo chipo ixiaifō ē mia ispanō,” ea faa.

² Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a xanīfāfe tsaoti ano tsaokē ē ōia. ³ A ē ōimismafo ē ōia sharakōifo. Nāskakē ē tāpia. Nioskōiromē ē faa. Askaito ē ōia fafesharakōiāito. Iskara ē ōia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē ōia. A āfe tsaoti ano oa nāfa fai nana keskara ē ōia fafesharakōiāito. ⁴ Nā nōko Ifo tsaoo ano a kematai veinticuatro tsaotifo ē ōia. A tsaoti kamaki feronāfakēfo tsaoofo ikafo. Nā feronāfakēfo Jesūs Ifofamisfo ikafo. Afāfe nā ato chanīmara faifo ato kexemisfo ipaonifo. Ato rapati oxo sharakōifo māmāi ato Niospa āfe chaka soaxonikē. Askatari xanīfāfe maiti keskara oro sharakōi safeafo ika. ⁵ A āfe tsaoti anoax kana peeitaitani oa kana piishikai keskara a mēranoa ē nika. A fesoa anori sietē rāpari xofisaito ē ōia. A ē ōiaino Epa Niospa ea shināmāna iskafakī: “A Epa Nios tsaooano rāpari ōtaito ē ōia keskara, nāskarifikī Epa Niospa āfe Yōshi Shara nokoki nīchiarokomē nofe rafenō,” ixō ē shinā.

⁶ Askatari a fesoa anori oa fakafā keskara fakka fakka ikaito ē ōia, oke mēra xafakīakōi ika. Askatari a nōko Ifāfe āfe tsaoti ano a onifanifo cuatro ano niafo ika. Askai fero ichapayafo. Takairafe fero neafo. ⁷ Oa poomā femānā keskara fetsa ita, fetsari oa fakka fene femānā keskara ita, fetsari oa yōra femānā keskara ita, fetsari oa tete yoyai keskara ika. ⁸ Askakani āto pei ichapa seis ika, fisti rasi pei ichapayafo. Askai āto fero rasi ato neei fetsee ika. Penachāi fanāita, fakishchāiri fanāiki xatepakenakafoma. Fanāiyāni iskafakani:

Sharafinākōia, sharafinākōia, sharafinākōia, nōko Nios sharafinākōi. Nōko Niospa afama mīshti famis nā apaiyai fo. Epa Nios niyopaofinixakī, nāskakē iskaratā nia. Askatari Epa Nios afeska pishta nakama, ikax fanāikaifo.

⁹⁻¹⁰ Nāskakē aōnoax fanāikafo iskakani: “Epa Niosi, mī fisti nōko Ifo. Fato fetsakai nā mī ikai keskarama. Mīfi nīsharapakenakaki. Mī sharakōi. Mī afaa pishta chakafamisma. Mī askaito nō mia Ifofasharakōi. Aicho Epa Niosi. Fato fetsakai mia keskarama,” ixō Nios fanākafo. Mā askafono nā Jesūs Ifofamisfo veinticuatro xanīfofo nōko Ifo Nios āfe

tsaotiki tsaooano a nāmā feopakefōfānafo. Feopakefōfākata, āto maiti tsekakata feofafo Nios nāmā māmāi askafakatsaxakakī. Nāskaxō yoiāfo iskafakakī: “Nōko Ifo Nios mī noko maiti inā keskari fakī nōri miari mini. Mī noko ināfikē nō mia fāsi noikī na maitifo nō mia mini. Meres fisti mī noko ikitiro. Mī noko ifimis. Akka mī nōko Ifokōi itiro. ¹¹ Mī afaa chakafatamaroko mī sharakōifamis. Akka mīōnoa fisti nō yoitiro iskafakī:

Mī nōko Ifokōi. Mī nōko Nios. Tsoa fetsakai mia keskarama shara. Mī isharapakenaka. Mīkai afaa chakafamisma. Nāskakē nō mia fāsi noi. Mī shināmās mī afama mīshti fatiro. Mī keyokōi onifani. Mī apaiyai keskara mī keyokōi onifani ato nimapaxekakī,”
ixō nā Jesūs Ifofamisfāfe veinticuatro xanīfofōfāfe yoisimfo.

5

Jesūs kirika kataramea tsomaxō ato yoiyoni afeskaximākai chipo

¹ Askata ē anā ōia oa ēfe namapa ōia keskara nā ē mato yoinō. Nā mifi kayakai aōri nōko Ifo Nios tsaooano ē ōia kirika kataramea takai rafe kenea ē ōia, siete taxtati aō neekē. ² Niospa ājiri finasharakōia ē ōia. Fāsikōi mekayanā iskafakī yoiā: “Na kirika taxtatini taxa afeskaxō tsōa ōitiro. Nā xanīfo afaa chakafamisma fistichi fēpetiro ōixii. ¿Fato xanīfāfe afaa chakafamismato fēpetiromē nō ōinō?” ixō yoiā.

³ Askafixō tsōa fēpetiroma nai mēranoa ikafāferi fēpetirofoma. Askatari a nāmā ikafāferi, Niospa ājirifāferi fēpetirofoma a mēra ōixikakī. ⁴ Nāskakē ē oiāi finakōiyānā iskafakī yoiā: “¡Ooa! Xanīfo afaa chakafamisma tsōa fichiama na kirika noko fēpexopanā a mēra nō ōipanā,” ixō ē shinā. ⁵ Askata nā veinticuatro xanīfofōfāfe Jesūs Ifofamis fētsa ea iskafaa: “Oiyamafe. Ōipo. Nōko Ifo oa ono nia. Cristo fisti nōko xanīfo finakōi. Afama mīshti atiro. Tsoa a keskarakōima. Nōko xinifāfe āto xanīfo ipaoni David āfe fena Jesūs. David xanīfo finakōia ipaofinikē, Jesūs finōkōia. Keyokōi ato finōa. Satanās finōta, a xanīfo fetsafori ato finōkōia Jesūs. Iskaratīa nono Epa Nios fe ika. Nāskakē na siete taxtati Jesūs noko fēpexotiro nā kirika nō ōinō. Nāskakē anā oiayamafe,” ea faa.

⁶ Nāskakē nānoa ovejanā fake ē ōia āfe māxo sieteya, āfe ferori nāskara ika. Reteafo keskaraflax Niospa tsaoti ano nia ika. Nānoa nā Niospa onifani cuatrofo feta a veinticuatro Nios Ifofafo xanīfofōfāfe foaketefayakenafo ika. Tsoa fetsakai a keskarama. Nāato afama mīshti fatiro. Nā fero sietefāfe noko shināmani Niospa āfe Yōshi Shara nīchiano keyokōi nā maitio ano inō. ⁷ Akka Epa Niospa nā kirika āfe mifi kayakai aōri tsomakē Jesūs fia. ⁸ Fīxō tsoano nā cuatro Niospa onifanifo fe nā veinticuatro xanīfofo Jesūs Ifofamisfo a nāmā feopakefōfānafo. Nāfāfe maneti yafi kechofo tsoafo. Nā kechofo oro fakka fakka ikai keskara mēranoax otano āfe kōi nofe nakas shara nai mēra foai keskara. Nāskarīfai nā Nios Ifofamisfāfe kifiaifono Epa Niospa nikamis. ⁹⁻¹⁰ Akka nā fanāikaifo tsōa nikayomisma fanāikani, iskakani:

Mī afaa chakafayamafiamiskē mia retenifo. Mī noko nāxoni, mī imi foni Satanās anā nōko ifo inōma Epa Nios āfe fakefo nō inō. Nāskakē mī fistichi fitiro kirika kenea fēpexiki noko tāpimaxiki. Mīōnoax nā mia chanīmara faafo tii maifo tii anoafo Niospa yora itirofo meka fetsa fetsatapafāfe mekakani. Nāskakē nāfāferi fetsafo mī meka shara ato tāpimanano, mī ato amapaiyai keskara anōfo. Askatari nā maifo tii anoafo xanīfo mefe ixikani,
ikax fanāikafo.

¹¹ Askatari ē ōia Niospa ājirifo ichapakōifo tsōa ato tanatiroma ichapakōi fanāikaifāfe ē ato nika. Nios xanīfo tsaoti ano nā Niospa onifaa cuatrofo fe nā xanīfofo veinticuatrofo feta nakifayakenafo. ¹² Fāsikōi fanāikani iskafo:

Niospa Fake Jesūs oveja fake keskara yorafo nāxōa āto chaka soaxoxikī. Akka keyokōi nā maitio anoafo ato ikitiro, keyokōi nai mēranoafori ato ikitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakōisaxakī mī nīpanakara,
ikax fanāikafo.

¹³ Askata ē nika keyokōi nai mēranoafo tii fanāikaifono, mai anoafori fanāikaifono ē nika. Mai mēranoafori ē nika. Fakafā anoafori fanāikaifono iskakani:

Epa Nios āfe tsaoti ano tsaofa, āfe Fake Jesūs oveja fake keskara, nā rafe nōko Ifo isharakōimisfo. Keyokōichi mā sharakōira ato fapanakafo. Mares fisti mā nōko Ifo itiro. Mā afama mīshti atiro. Nāskara mā ipanaka,
ikanax fanāikafo.

¹⁴ Askatari nā cuatro Niospa onifāfē yoiāfo iskafakakī: “¡Aicho! Askapainōra,” fata, nā veinticuatro xanīfofo Nios nāmā feopakefōfānafo. Afāferi Epa Nios yafi Jesūs yoisharakani.

6

Nā siete taxtati

¹ Nāskata ē namakē ōiai keskara ē anā ōia. Jesús oveja fake keskara nāato noko nāxoni nāato nā kirika āfe taxtati fisti fēpeaito ē ōia. Fēpeaino ē nika nā cuatro Nios onifaa fetsa fāsikōi mekaito nai tiri ikai keskara: “Niri ofe,” ikaito.

² Askaino kamayo oxo chaima nia ē ōia. Nā kamayo kamaki fētsa kati tsoamax tsaono xanīfāfe maiti Niospa maimana. Nānoax kamayonō kaa fetsafo ikipai xanīfo ixiki. Tsoa pishtakai nētefatiroma.

³ Askata Jesús anā kirika taxtati fetsa fēpea. Fēpeaino nā cuatro Niospa onifani fetsa ē nika iskaito: “Niri ofe,” ikaito.

⁴ Nāskafaino kamayo fetsari ōshi nokotoshia. Nā kamayo kamaki tsoa fetsari ē ōia. Keno chainipa Niospa inā aya katanō maifo tii anoafō ato shināmatanō anā isharanōfoma noikaspa faatanākanax retenānōfo.

⁵ Askatāfata Jesús anā kirika taxtati fetsa fēpea. Fēpeaino nā cuatro Nios onifaa fetsa ē nika iskafakī yoiaito: “Niri ofe,” ikaito. Anori yoiaino kamayo fetsa fisokōi nokotoshiaito ē ōia. A kamaki tsoa aō kilo tanati tsoamax. ⁶ Nā cuatro Niospa onifani anoax mekaito ē āfe meka nika iskaito: “Kori texe fayamanō, feronāfāke pena fisti yonoxō kori fixō trigo kilo fisti fikī kopifatiro. Askayamakī tres kilo xiki fitiro. Kori texefayamaxō faa fetsa fitiroma. Nāskakē xini yafi nā uva fimi ene chakanafayamafe. Akka mā texefayamax mā fonāiki omiskōixii,” ixō yoia.

⁷ Askata Jesús anā kirika āfe taxtati fetsa fēpea. Fēpeaino ē nika na cuatro Nios onifani fetsa, “Niri ofe,” ikaito.

⁸ Anori askafaino kamayo fetsa pāshikōi nokotoshiaito ē ōia. Nā kamayo kamaki fetsa tsoa ika āfe ane Ato Namamis. Nāato yorafo namatiro. “Ē yorafo namapaira,” faito, “Ēje. Mī ato namatiro,” Niospa faa. Askafaito nā ato namamisto yora fetsafoya ato retenāmai. Akka atiri ato fonī namai, atiri pae fetsa fetsatapafāfe ato namaxii, atiri yoinā pōfēfāfe ato yokakani. Akka yora kayakōi ato namaxiai ē ōia tsoa ato tanātiroma.

⁹⁻¹⁰ Nāskata Jesús āfe kirika taxtamea anā fēpea. Fēpeaino nā Niospa meka ato yoifofāsafaifono fetsafāfe ato redefinifono mā otoafo ē ōia. Epa Nios kīfiti mīsa ano nā Jesúsnoax nanifo āto fero mēshofo ichanākanax fāsikōi mekaito ē nika iska mekaifono: “Nōko Ifo Nios, mī keyokōi tāpikōia. Mī afama mīshti fatiro. Mī shara famis. Mīkai afaa chakafayomisma. Mī chanīmakōi. Nā mia chanīmara faafāfema mai anoafāfe noko retemisfo. Nāskakē, ¿afetīa mī ato kopimē omiskōimakī?” ixō yoiaifāfe ē nika. ¹¹ Nāskakē nōko Ifāfe yoia isfakī: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retexikani. Akka mā ato retekī mitoafo nā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimakī omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikanifono nā Epa Nios Ifofasharamisfo tii ato inā.

¹² Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fepoa keskara ika, fakishkōi. Oxi ōshikōi imi keskara ika. ¹³ Oa nefe kerexepato nokoki nefekī fana fimi yome mīshti niriatiro keskara. Nāskarīfai fishifo nai mēranoax mai ano pakei fetsea. ¹⁴ Askatari nai katarameake kafākē ē anā ōiama. Māchifā fe mai toomāfā mai naya naya ikaino, anā ano ikama. ¹⁵ Nāskakē keyokōi mai anoafō ratekōiafo. Yorafāfe āto xanīfofori sorarofāfe āto xanīfofori ratekōiafo; afama mīshtiyafori, yora mītsisipafori, āto yonomatīfori, fetsafori ifomaisfori keyokōi nāfo ratekōiafo. A tiiri mafa kini mēra ikiafo. A tiiri māchi keya ano ichoafō tokirinīfā nāmā oneafo. ¹⁶⁻¹⁷ Askata fiisikafo iskayanā: “¡Ooa! Epa Nios nai mēra ikato āfe Fake Jesús fe iskaratīa nokoki ōitīfishkikōina. ¿Nō afeskatiromē omiskōiyamaxiki? Tsoakai Nios timamatiroma noko omiskōimayamanō. Nā māchi keya ano tokirinīfā nokoki pakepainō Niospa noko fichinōma nō omiskōinōma,” ixō nā nikakaspamīfāfe yoiafo.

7

Niospa ciento cuarenta y cuatro mil afe yorafo kexexii

¹ Nāskata ē anā ōia oa ēfe namapa ōia keskara nā ē mato yoinō. Niospa āfe ājiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapakekafana. Nefe nishpapakekafanaino keyokōi maifo tii ano nūi peifo takka takka ikama. Fakafāri anā poo ikama. ² Nā cuatro Niospa ato yoiaito mai yafi fakafā chakafatirofo. Askata Epa Nios nīpanakato āfe ājiri fetsa ē ōia xini oaikirinoax oaito, nōko Epa Nios āfe marakka fati feaito, a afe yorafo aō marakka faxii keyokōichi tāpinōfo Niospa afe yorafokē. Nā Niospa ājiri okī nā cuatro Niospa ājiri

fetsafori fāsikōi ato yoia iskafakī: ³ “Manayokāfe, nā Nios Ifofamisfo ikisi āto femānāki āfe anefo keneyonō nāfāfe Nios yonoxomisfoki keyokōichi tāpinōfo. Nāskakē fena ato chakana fayamakāfe. Mai anoafo fakafā anoafori, ififo ato chakana fayamakāfe. Chipo ato axikakī,” ixō ato yoia.

⁴ Akka ē nika mā Niospa ājirinī mā ato marakka faano ciento cuarenta y cuatro mil judeofāfe femānāki. ⁵⁻⁸ Nōko xini Israel āfe fakefo feronāfakefos doce inifo. Ato iyoakōichi āfe ane Judā. Judā āfe pefeta Rubén. Rubén āfe pefeta Gad. Gad āfe pefeta Aser. Aser āfe pefeta Neftalī. Neftalī āfe pefeta Manasés. Manasés āfe pefeta Simeón. Simeón āfe pefeta Levī. Levī āfe pefeta Isacar. Isacar āfe pefeta Zabulón. Zabulón āfe pefeta José. José āfe pefeta ato chipo fakekōi Benjamín. Nā doce feronāfake fisti rasi paxkakanax mā kaiafono nā doce feronāfake ano Niospa ato katonī. Fetsa ano doce mil faxō ifita, fetsa anoari doce mil faxō ifini. Nāato askafakī fetsa doce mil faxō ato ifiketsani. Nāskakē mā afo yosikanax ciento cuarenta y cuatro mil inifo.

Yorafā rasikōichi rapati oxokōi safeafo

⁹ Askata Epa Nios fe āfe Fake Jesús nā oveja fake keskara nā tsaoafo ano yorafā rasi niafo tsōa ato tanatiroma. Nā maitio anoafo fisti rasi anoafo, xoko fetsafo, meka fetsayafo ikafo, rapati oxokōi chainīpa safeafo ē ōia fisti rasichi epe pei tsofāfē. ¹⁰ Nāfāfe fāsikōi yoiafo iskafakakī:

Nōko Epa Nios feta āfe Fake Jesús noko ifimis nōko Ifo Jesús oveja fake keskara nokoŋnoax nani nōko chaka noko soaxoxikī nō afe nīpaxanō, ixō yoiafo. ¹¹⁻¹² Nāskata nōko Ifo xanīfāfe tsaoti ano tsaono āfe ājirifāfe foaketi fayakenafo ikafo. Nāskakē nā veinticuatro xanīfofo fe nā Niospa onifanifo cuatrofo nōko Ifo tsaono tsaofafo ikafo. Nāskafono nā ājirifo nā nōko Ifo tsaono ratokonō mai chachipakefōfākanax feopakefōfānafo Nios yoisharakakī iskafakakī:

¡Aicho! Chanīmakōi, meres fisti mī isharpakemīs. Meres fisti nokori mī imasharatiro.

Mī keyokōi tāpia. ¡Aicho! Nā nō yopai keskara mī noko axomis. Keyokōichi sharakōi mia fapanakafo. Mī afama mīshti fatiro. Mī nāskapakenaka. Nāskaroko anōkī, ixō yoiafo.

¹³ Nāskata nānoa xanīfo fētsa ea yōka: “¿Na yorafo rapati oxo chainīpa safeafo tsoamē? ¿Fakiax feafomē, mī tāpiamē?” ixō ea yōka. ¹⁴ “Maa. Ēkai tāpiama. Mī tāpia. Mī ea yoitiro,” ē faito ea yoia iskafakī: “Yorafo omiskōiaifono na yorafori fāsi omiskōinifo. Akka omiskōiaifono Niospa āfe Fāke Jesús ato nāxonī āto chaka ato soaxoxiki. Ato chaka soaxō mā ato imasharakōia. Nāskakē ato rapati oxo shara safemana. ¹⁵ Nāskakē Epa Nios ano iskaratīa afe ikafo. Epa Niospa ato yonomana keskara axopakenakafo. Nāskakē ato kexefafāini afara chaka atoki nokoyamanō. ¹⁶⁻¹⁷ Niospa āfe Fake Jesús Epa Nios fe imīs. Nāato ato kexepakenaka. Nāskakē anā fonāitama, anā nomipakenakafoma. Xinīri anā ato pipanakama. Jesús ato kexeaino inimapakenakafo. Epa Niospa āto ōiti ato fepeaxoxii anā ōianōfoma,” ixō ea yoia.

8

Nā taxtati mā keyoaino Jesús fēpea

¹ Mā kirika āfe taxtati keyoaino Jesús fēpeaito ē ōia namakē ōiai keskara. Nā seis taxtati taefakī fēpeyoa. Akka iskaratiāri fetsari fēpea mā keyoaino. Fēpeano Nios ika ano nai mēranoax keyokōi nishparakafo. Media hora nishparakayofo. ² Nishparakaifono ē ōia Niospa āfe ājirifo siete a ketaxamei niāfāfe, nāfāfe Niospa ato yoimis keskara anōfo. Niospa ato tii maneti inā nā ato yoiaitīa āto maneti chāi chāisafanōfo. ³ Askata Niospa ājiri fētsa sapa oro fakka fakka ikai keskara tsomax Epa Nios kīfiti ano nia ē ōia. Akka fētsa sapa kamaki nakas otaxō naneaito ē ōia. Nāskaxō Nios kīfiti mīsa ano oro kamaki sapa faa. ⁴ Askano āfe kōi nakas shara nai mēra foa āfe mifi kamaki sapa tsomano. Nāskarīfai Niospa yorafāfe kīfīaifono Epa Nios ika ari nokoaito nikatiro. ⁵ Akka ē anā ōia Epa Niospa āfe ājiri yoiaino, mīsa kamakinoa chii fixō āfe sapa kamaki chii fospi faa. Fospi fata nai mēraxō mai ano pota. Askaino mai anoax nai fāsikōi tiiri ika pachakōi ika, kanari piūshika mairi naya naya ika. Nāskakē nā chanīmara faafoma tii ato omiskōimaxii.

Ājirifāfe maneti chāi chāisafafafo

⁶ Askata Niospa āfe ājirifāfe siete nā manetifo Niospa ato tii inā itipinīsharafafo chāi chāisafaxikākī.

⁷ Askata fētsa āfe maneti chāi chāisafaino faka matsi tokoro efapafo imia osia nai mēranoax keyopakea. Chiiri imiya osia nai mēranoax mai ano pakea. Māifā kaxke fetsa koofi keyoa ififoya. Akka ranāri texea. Akka fasifo kooi keyokōia.

⁸ Askata Niospa ājiri fētsa āfe manetiri chāi chāisafaino machi efapa chii xoisai keskara Niospa nai mēraxō nāmā pota. Fakafā mēra pakea. Askaino fakafā kaxke fetsa imi keskara ika. ⁹ Nāskakē fakafā mēranoax fafifo ranāri naafo. Askatari kanōanāfāfori ranāri kooafo.

¹⁰ Askata Niospa ājiri fētsa atori āfe maneti chāi chāisafaino fishi efapakōi xofisai chii keskara nai mēranoax pakea fakafā mēra. Akka faka fetsafo mērari pakeama. Askatari faka poyo poyo ika ano pakea. ¹¹ Nā fishifā āfe ane Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafo ranāri nai fetseafō.

¹² Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārito chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisima.

¹³ Ē nāfo ōiaino tetepafā keskara keya yoyaito ē nika. Fāsikōi mekayanā yoia iskafakī: “¡Ooa! Yorafāfe Nios nikaskapakanax omiskōikani finakōixikani. Niospa ājiri tres fetsafāfe āto maneti chāi chāisafaifono mai ano ikafo omiskōifinaxikani,” ixō tetepafā keskarato yoia.

9

¹ Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinifā fakishifā mēra ikafo ano kaa. Nā kinifā fepotiya. A mēranoaxkai kāitirofoma. Akka nā nai mēranoax nāmā pakea Niospa chavis inā aato kinifā fakishifā mēranoa ato kāimanō. ² Fēpeaino mafa kinifā mēranoax kōinifā nai mēra foa. Nāskakē xinī chaxasharama. Nai fakishkōi ika. ³ Askata nā kōinifā mēranoax kōketsere keskara ichapa rasi mai ano fotoa. Niospa ato pōfekōi ima nifo keskara inōfo. ⁴⁻⁵ Ē nika iskaito: “Mai anoa fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato retayamakāfe. Ato retetamaroko cinco oxe ato amakāfe ato omiskōimakī,” ixō ato yoia. Nāskakē kōketserefāfe ato tekafo nā chanīmara faafoma nifo keskara paekōi meafō omiskōiafo. ⁶ Nāskakē kōketserefāfe cinco oxe ato omiskōimana nā chanīmara faafomafo napaixikani, tenetirofoma mekani. Askafikanax nakanima.

⁷ Iskaratīa nā kōketserefo afe keskarāmākī ē mato yoinō mā tāpinō. Kamayofō itipinī faax a kamaki tsoax katiro fetsafo reteikai. Nāskarīfai nā kōketserefo nā kamayo keskarafō. Kamayo kamaki tsoaxō fetsafo reteikai keskara īta, xanifāfe āfe oro maiti maia keskara īta, āto fēso feronāfāke fēso keskara īta, ⁸ āto foo kērofāfe foo keskara īta, āto piti poomānā piti keskara īta, ⁹ āto xochi ano rapati kerexkōi keskara safemanano ato tsakapayaifono a mēra ikitiroma īta, āto petafo pei pei ikī kamayonō karo keskara niniaiino pachakōi īta, fetsafo retenāifo keskara īta, ¹⁰ keyokōi tsitsisyafō. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma. ¹¹ Nā kinifā fakishifā mēra niafaka chakafo ikafo anoa āto xanifāfe ane israelifāfe mekapa Abadón famisfo. Griego mekapari Apolión famisfo. Nōko mekapari, “Yorafo Retemis,” nō famis.

¹² Akka taeyoi a omiskōiaifo mā finōfiano, akka nāno raferi a finakōia finōama.

¹³ Askata Niospa ājiri fētsa āfe maneti chāi chāisafaino, Epa Nios kīfti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsoamaxō nika. ¹⁴ “Nā cuatro niafaka chakafo menexemexō nā faka efapa Eufrates anoxō manaifo ato mēpetāfe fotanōfo,” ixō āfe ājirinī yoia.

¹⁵ Nā tsekeafō penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani mai kaxke fetsa ano ikafo ato retexinōfo. ¹⁶ Ē nika dos cientos millones sorarofō kamayo kamaki tsoafāfe fetsafo retexikakī.

¹⁷ Askata Epa Niospa oa namakē ōia keskara ea ōimana nā sorarofō yafi āto kamayofō ē ōia iskara. Āto xochi ano oa chii ereai keskara kerexkōi āto xochi ano safeafō ikafo. Askatari nanakōiri ika, chaxtari ika a aō xorakomeafō. Akka a kamayofāfe āto mapo poomā mapo keskarafō. Āto āxfā mēranoax kōi fe chii ereai keskara. ¹⁸ Chii fe kōi xofisakī āto āxfā mēranoax kāifaikī ato retepakeafō yorafo ichapakōi ranāri naafo. ¹⁹ Āfe āxfā feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

²⁰ Tsoa nayamafixō āto chaka xateafoma Epa Nios Ifofaxikakīma. A niafaka chakafo ifo-famisfo xateafoma. Nāskakē oro nimofō fakāta, a kerexkōi fakkai fakkaisai nimofō fakāta, keno āfe ane bronze nimofō fakāta, ifi nimofō fakāta, tokiri nimofō fakāta; nāfo askafaxō, “Nāfo nōko nios. Nō aō noi,” ixō yoisiffo. Afāfe ōiyamafiaifono, askatari mekayamafiaifono, askatari kafāsayamafiaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafiaifono ōifikanax āto chaka xateafoma Epa Nios Ifofapaikanima. ²¹ Ato retetakī xatemisfoma, askatari koshoiki xatemisfoma, askatari āto āfima chotamisfo, kērofāferi āto

fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko Ifo Jesús Ifofaxikakima. Nāfo chakakōifikaxō āto chaka xateafoma nōko Ifo Jesucristo Ifofasharaxikakima.

10

Epa Niospa āfe ājirinī kirika tsoma

¹ Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chii keskara. ² Kirika fepekemea tsomax nia ika. Āfe tae kayakai aōri fakafā femākia paia. Akka āfe tae oshkiori mai ano paia ika. ³ Askata āfe meka poemā efapato meka keskara ē nika. Askatari ē nika naitiriki fetseaito. ⁴ Mē nikaxō nā yoiāfo keskara ē kenekerana. Akka nai mēranoax Nios ika anoa meka fetsa ē nika ea yoiāito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoiā.

⁵⁻⁷ Askata nā Niospa āfe ājirinī takai fetsa fakafā aōri paita takai fetsari mai ano paixō anā yoiā. Epa Nios nā nipanakato nai onifaa. Askatari nai mēra ikafo onifaa. Askatari mai onifaa. Mai ano ikāfori onifaa. Askatari fakafā onifaa. Fakafā mēra ikāfori onifaa. Nā Nioskōichi āfe ājiri yoiā iskafakī: “Epa Niospa ea ōiaino chanīmakōi ē mato yoi. Epa Niospa anā manaima. Āfe ājiri fētsa āfe maneti manekī chāi chāisafaino Epa Niospa axiai keskara āfe meka yoisifāfe yoiāifo keskara yorāfāfe tāpinifoma. Iskaratīa a Nios yoisifāfe yoinifo keskara mā askakōia,” ixō Niospa ājirinī ea yoiā.

⁸ Askata anā nai mēranoax mekaito ē nika ea yoiā iskafakī: “Oa Niospa ājiri fakafāki paita mai ano paiax nia ano katāfe. Nā kirika kataramea fēpexō tsoma fiatāfe,” ea faa.

⁹ Askata ē Niospa ājiri ano kaxō ē yoiā iskafakī: “Nā kirika pishta ea ināfe,” ē faito, “Nakā, fife. Ōixō tāpikōife. Mā tāpikōixō mī tāpitiro nā meka chanīmakōi. Niospa meka shara. Askatari mī tāpitiro na meka yoiāifo keskara yorāfo omiskōikani. Mīri tāpixō mī fāsi shinātiro,” ea faa.

¹⁰ Nāskaxō ē kirika pishta fita ē ōia. Ea yoiā keskara chanīmakōi mē tāpikōia. Nā Niospa meka sharafinakōia. Nāskakē nā inōpokoai yoiā keskara yorāfo omiskōixikani. Nā ōiax ē shināmitsakōia. ¹¹ Ē askano, anā ea yoiā: “Niospa afe yorāfo yoiāiyai keskara anā ato yoiā. Afarafo ixiai yorāfoōnoa yoiā, manifetsafoōnoari yoiā, xanīfofoōnoari ato yoiā,” ea faa.

11

Nōko Ifo Jesús yorāfo yoiāiyai anori feronāfake rafeta ato yoiāikani

¹ Askata na tanati metro keskara ea ināyanā ea yoiā iskafakī: “Nāo Nios kīfiti pexefā anoa āfe chainīpa yafi āfe xāki tanatāfe. Anoxō Nios kīfiti mīsari tanafe. Askatari a mēranoax fanā ikānāifo ato tanasharafe afe tiito Epa Nios fanā ixokanimākai, askatari afe tiixori kīfikanimākai ato tanasharafe. ² Akka a ketokonō mapoāfo a israelifoma ato tanayamafe; afāfe na Jerusalén anoāfo ato chakafakani oa fākka nō afara faanano fākka peamanaino kāitiroma keskafakani ato. Cuarenta y dos oxe amaxō ato askafaxikani. ³ Nāskakē nā feronāfake rafe ē ato nīchixii. Nā rafeta nā ē ato yoiāiyai anori ato yoiāikani. Un mil dos cientos sesenta pena ato yoiāikani ēfe meka. A rafeta āto rapati chapokōi safexō ato ōimāxikani. A ato chakafamisfāfe, ato ōikakī a afara chakafamisfo shināxikani,” ixō ea yoiā.

⁴ Nāskakē Niospa afe yorāfo yoiāiyai keskara nā rafeta yoisifo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōisharakōitiro. Nāskarifikā nā rafeta Niospa Yōshi Sharaōxō ato tāpimāxikani Niospa meka. Mā isharakōikaxō āto Ifāfe meka ato fe yorāfo yoiāikani. ⁵ Na Niospa meka yoisif rafe fetsafāfe ato chakafapayāifo, āto axfa mēranoax chii kāitiro ato koofaxii nanōfo. Nāskakē nā rafe tsōa ato chakafatiroma. ⁶ Epa Niospa ato yoiāino, nā rafeta āto mekapa oi nesefatirofo anā fena oi iyamanō nā ato yoiāifotiā. Askatari faka yafi īa āto mekapa fetsafatirofo oa imi keskara inō. Askatari afara afeskarafapāikakī āto mekapas afara meseni fetseāifo fatirofo pae fetsa fetsatapāfori fatirofo.

⁷ A feronāfake rafeta mā ato yoiā senēfaafono, a chakakōi mai kinīfā mēranoax Satanás shināmanaino, tsekeinākakā a feronāfake rafe retexii. ⁸ Mā reteafono, fāi nēxpakīa pakeax rakaxikani nā Jesús mastanīfo ano, a Jerusalén ano. Nā Jerusalén anoāfāfe nōko Ifo Jesús āfe meka shināmisfoma. Nāskakē nō ađnoa yoiāito iskafakī: “Na Sodoma ano ikafo feta Egipto ano ikafāferi, afaa shināpaonifoma. Nāskakē chakakōi ipaonifo anoāfo. Nāskarākōi Jerusalén anoāfori.” Nāskax nā feronāfake rafe Jerusalén anoax nakanax āto yora fai nēxpakīa rakaxii. ⁹ Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanīfofofāfe, “Ato fena maifayamakāfe,” ixō ato yoiāikani ato noikaspakōikakī. Nāskakē tres nia ato ōixikani. ¹⁰ Askaito ōikani a mai

ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

¹¹ Askafiaifono mā tres nia oxata nayoafono anā chipo Niospa ato ofofaxii a feronāfake rafe. Askaito ōikani a ato mǎnāo nikaxō ato ōiaifo, afo mesexikani, ratekōixikani, askaifāfe ato ōikani. ¹² Askata nā feronāfake rafe otokāta nai mēranoax mekaito nikakani ato iskafaito: “Niri ekeki māpeferakāfe,” ato faito nikakani a rafe āto ferotaiifi ronoinīfōfākani nai kōi mēra māpefainīfokani. Askaifāfe a ato noikaspāifāfe ato ōikani. ¹³ Askata samama atoya mai naya naya iki finakōia. Pexefā rasi fisti rasi potaito ē ōia. Askaino siete mil yorafo naafo. A naamafāferi ratekakī Nios yoiāfo, “Nios mīfi afama mīshti fatirokī,” faafo.

¹⁴ Mā afo askayoa anā chipo finakōixii.

Niospa ājiri fētsa āfe maneti chāi chāisa faa

¹⁵ Akka Niospa ājirinī chipokōitakī nā sietepa āfe maneti chāi chāisafaino, nai mēra Epa Nios ika ariax fāsikōi mekaifāfe ē nika iskai mekaifāfe:

Iskaratīa na nōko Ifo Cristo xanīfokōi iki nāmānoax nai mēra ika keskarari ixii nāatixō xanīfo īpanaka, ixō yoiāfo. ¹⁶⁻¹⁷ Akka nā Jesūs chanīmara faafo ato kexemisfo nā veinticuatro feronāfakefo tsaokanax a Nios nāmā feopakefōfā nafo Nioski inimayanā iskafafo:

īAicho, mī fāsi sharakōiki! Mī afama mīshti famiski. Mī Yōshi Sharapa ato īkinā. Afama mīshti onifaaxma mī iyopaonixakī. Iskaratīari mī nia. ¹⁸ A mai fetsa anoafāfe mia noikaspamisfo mikiki ōitifishkikōikakī mefe ikaspakakī. Afama mīshti chakafamisfo. Askaifāfe ōiki, mūri ato kopiki ato omīskōimaxii atoki ōitifishkikōixō. Akka a mia Ifofamisfo mī ato ināsharakōixii afara sharakōifo. Akka a mia yonoxoyanā mī meka mēxotaima yoisimisfo afo mī ato ināsharakōiketaxii, a mia chanīmara famisfo tii; keyokōi afaamaisfo ita, a xanīfori a afama mīshti ichapayāfori mī ato ināsharakōixii a mia Ifofamisfo tii. Akka nā yorafo chakafamisfo, mī ato omīskōimaxii, a amēranoax, omīskōimisfo mēra mī ato potaxii, ixō yoiāfo.

¹⁹ Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israeliifo yoini kīrika kenea nanea ika. Askatari ē ōia kana pee ikaito nairi tiri ikaito ē nika, mīamāfanēri mai naya naya akaito ē ōia, nai mēranoaxri oi kaya ikaino, oi nami keyopakeaito ē ōia.

12

Kēro yafi kapetafā keskara nai mēranoa Juan ōini

¹ Askata ē afianā ēfe namapa ōia keskara ē mato yoinō a ea Niospa ispaito ē ōiafo nā inōpokoaifo ōiki ē tāpinō a tsōa ōimismafo. Ē kēro ōia āfe rapati oa xini pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neafo. ² Askata nā kēro mā chaima fake kāiki, fāke pāefai. ³ Askainori fetsari ē ōia a tsōa ōiyomisma keskara nai mēranoax. Nā Satanās oa ronofā keskara efapanāfakōi ōshimāfa, askai mapo ichapayakōi siete mapoya, askai a āto xanīfokōichi maiti sharakōi keskara maiya siete faxō, askatari āfe māxofori diez ika. ⁴ Askata āfe tene fininīfōfā nai mēshanānaino nai mēranoax fishi rasi pakea. (Naskarifakī Epa Niospa ājirifo Satanās atiri ato chakana fama ato īkipaikī, “Ea ifofakāfe,” ixō ato feparapaikī. Nāskakē a keskara niafaka chakafo ato īkinō Niospa nāmā potani nāmāxō ato īkinō.) Nāskakē mā kēro chaima fake kāiyaino, a ronofānē kexei āfe fake pīapaikī kāiyaito. ⁵ Askata a kēro fake kāi feronāfake mitsisipakōi. Nāskakē yorafo manifo tii, ato kexesharakōixii āto xanīfo finakōia ixii. Mēstekōi ato yoisharakōixii nikasharakōinōfo. Askafiaito a fake yome rama afa kāiyaito ronofānē pipaiyaino Niospa ifirisafaa nai mēranoax afe xanīfokōi inō. ⁶ Askaito ōifaini afa ichoachāi tsōa istoma ano a Niospa afetūama itipinī faxoni ano Satanās afeskafanōma arixō Niospa kexenō cuarenta y dos oxe akaino Niospa kexesharanō.

⁷ Askatari ē anā ōia Satanās āfe inafō fe nā ājiri Miguel āfe inafō nai mēranoax retenāpaiyaifono Satanās ato finōpaiyaino. Nāskaxō Satanās Niosri finōpaini. ⁸⁻⁹ Akka Satanās ato finōpaifikī ato finōnima. Nāskakē fanī itirokēma Niospa nāmā potani āfe inafōya. Taeyoi ājiri iyopaoni. Nāskaxō nāto keyokōi yorafo maifo tii anofo ato pāramis anorima ato yoiki chaka shinānōfo, chaka nīpaxakakī.

¹⁰ Askaito ē anā nika meka efapato mekai iskaito: “īAicho! Epa Niospa mā Satanās nirixō nāmā potakī, mēxotaima āakōi noko fanīrira pārarifaito. Nāskakē Epa Niospa Satanās finōinīfōfana. Nāskakē Satanās anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi. ¹¹ Nāskakē Jesūs Ifofaxō mēxotaima nō yoisimis niri nai mēra oyoxoma nō yoiyopaoni

nāmāxō iska fakā: 'Nōko Ifo Jesús, Niospa Fakekōi, oa oveja fake keskaraxō noko nāxoni nōko chaka noko soaxoxiki,' ixō nō yoimis mēxotaima. Askatari nō Niospa meka ato yoimis. Nāskai nō meseima, 'Noko retefiaifono, nō inimasharai,' ixō anori mēxotaima nō yoimis. Askaxō nō Satanás finōinifofana. ¹² Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā Satanás finōkōiafo. Akka Satanás Niospa nāmā potani nai mēraxō. Askafaino òitifishkiki nāmā fotoxō yorafo chakafapaikōi. ¡Ooal! Yorafo ono mai anoax fe fakafā mēranoaxri omiskōikani. Satanás mā tāpia afetiāra Jesús mai ano fotoai tsōa anā afaa chakafanōma. Nāskara mā tāpiax Satanás òitifishkikōikī keyokōi maifo anofo ato chakafamapai omiskōinōfo Jesús fe İpaxanōfoma," ixō nai mēranoax mekaito ē nika.

¹³ Mā afo nikakī ē anā òia afia ē òiyoa keskara. Mā Niospa Satanás nāmā potano, Satanás shinākī iska fai: "Na kēro ē akiki nokoxō omiskōimanikai," ixō shinākī Satanás chīfafaina. ¹⁴ Nāskakē Niospa nā kēro tetepafā pei keskara inā aō katanō tsōa istoma ano. Nā afetiāma Epa Niospa itipinī faxoni ano mā kaxō anoxō piinō cuarenta y dos oxe akī, nā niafaka chakata ronōfā keskarato afeskafanōma. ¹⁵ A kēro ari ikano chakafapaikai Satanás ari kai. Mā kaxō chaima nikaxō āfe axfapa faka siiakī faka faipafānē iyotanō āsapaikī. ¹⁶ Askafaito òikī Niospa mai kaxkexoni a mēra faka faipafā ikikaitanō a kēro afeskafanōma. ¹⁷ Nāskaito òi Satanás a kēroki òitifishkikōina. Nāskax nā kēromā āfe fakefoki kaa ato retepai, nāfāfemāi Niospa meka nikakōisharaifono isharakōiyanā Jesús İfofasharakōiyanā. ¹⁸ Askata ē anā òia Satanás fakafā kesemē nia.

13

Fakafā mēranoax yoinā keskara mesekōi kāinākfana

¹ Askata ēfe namapa ē òia keskara afianā ē mato yoi. È òiaino fakafā mēranoax yoinā keskara mesekōi kāinākfanaiteo ē òia. Nā yoinā pōfe keskaraōnoa ē mato yoinō. Ea nikasharakāfe. Nā fistifax mapo ichapaya, siete mapoya. Askatari āfe māxo rasi diezya. A āfe māxo rasi xanīfāfe maiti maimakī fetsa. Nāskaxō Epa Nios meka fakāi chakakōi faa. Āfe femānāfoki ane fetsafo chakakōifo nēta. ² Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea òimana ē tāpinō a feronāfāke Satanáōxō tāpikifinakōia, oa xanīfo finakōia keskara ixii nāmānoax. Satanás āfe yōshi ināno ato yoimis ixii, afama mīshti fakī fetsaki ato òimaxii. ³ Āfe mapo fetsa ano mā māpeafiafano anā otoax afianā nia. Nā mai tio anoxō yora rasichi òikani askaito: "Kee, ¿afesax otoamē mā nākōina nō òia?" ixō yoikani. Nāskaito òikī ifofaxikani. ⁴ Nāskakē ifofakaxō yoikani Satanás iska fakā: "Mī fāsi sharakōi. Mī afama mīshti famis," fakaxō ifofakani. "Nāskaxō nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima," fakaxō yoikani. Askatari oa yoinā keskara akiki inimakakī fanāixokani iska fakakī: "Mia keskarakai tsoama. Mī fāsi sharakōi. Miakai tsōa chakafatiroma. Mī fistichi ato finōkōia," fakaxō yoikani fanāikakī.

⁵ Askatari anā Nios chakakōifakī yoia iska fakā: "Fato fetsakai ea keskarama. È Nios finōkōia," ikax, āa chanī Nios chakafakī finakōimīs. Nāskafekē Niospa yoixii: "Cuarenta y dos oxe finōta mī anā afaa fatiroma xanīfokōixō afara fetsafo sharafakī." ⁶ Nios noikaspakī meka fakāi fetsaito ē nika iska fakā: "Fato Nioskai nai mēra ikama. Anā ano Niosma. Mā kaxpakōi mā Nios İfofai," ixō yoia. "A yora namisfāfekai fato Nios İfofamisma," ato fakī fetsai. ⁷ Askatari Satanás ifofakaxō ato afara shināmānaino yorafāfe a Jesús İfofamisfo ato finōpaikī ato retepaikani āto xanīfo ipaikakī. Askatari maitio anofo, xoko fetsafo, meka fetsafoya keyokōi āto xanīfo ikani a feronāfāke xanīfo chakakōi a Satanás yōshi a mēra nanea. ⁸ Askafaxō yoisharaxikani akiki inimakakī: "Mī fāsi finakōia, mī nōko nioskōi," ixō yoixikani akiki inimakakī. Askaifāfe tāpixō nōko Ifo Niospa atoki kirika keneama a İfofaafāfema òikī. Mai onifotaima mā tāpixō Niospa āto anefo āfe kirikaki kenei fatofāfe Jesús İfofaimākai. Akka nā Jesús ovejanā fake keskara noko nāxoni noko İkipakexakī.

⁹ Mā pachoyakī ea nikasharakāfe. ¹⁰ "Nā Satanás ifofaafāfe mato karaxa mēra ikimakaki mato ikimaxikani. Askatari mato kenopa retekakī mato retexikani." Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús shināmākitama.

¹¹ Askatari ē anā òia oa namakē òia keskara. Mai mēranoax kāinākfanaiteo ē òia yoinā pōfe fetsa keskara. Āfe māxo tiixo pishta rafe oveja fakenā keskara. Askai fāsikōi mekai oa poomā keskara āfe meka mēxakōi chai potai. Askaito ē òia. ¹² Akka nā yoinā pōfe taeyoi fakafā mēranoax kāiyaito afama mīshti atiroxakī nāato yoiaino nā rama oatori afama mīshti atiro nā fētsa aka keska fakāiri nāskaxō yorafo tii İkitiro. Keyokōi maifo tii anofo ato yoia iska fakā: "A yoinā keskara mā mapokī rerafo mā nayoflax afianā mā otoa nā fisti ifofakāfe. 'Na nōko ifora,' fakāfe," ixō ato yoia. ¹³ Afama mīshti tsōa atiroma keskara ato ispa yorafāfe chanīmara fanōfo. Nāskata yorafāfe āto ferotaifi nai mēranoa chii fotomana.

14 Satanáõxõ nãskarifikã yorafo pãra niosra fanõfo. Askafata ato yoia: “Nã yoinã põfe keskara retefiafono mã otoa nõ nimofonõfã faxõ inãkãfe a keskara faxõ,” ixõ ato yoia. 15 Nãnori ato yoiaino mã nimofonõfã mãpeakano xãkaitiroma. Askafiano Satanáõxõ xãkaima mekanõ, askatari a siete mapoya mekayamaifo ato retenõ. 16 Askata anã ato yoia iskafakã: “Maitio ikafãfe ãto mẽke kayakai aõri kenenõfo askayamakã ãto femãnãki kenenõfo.” Nã yoinã põfe keskara fakafã mẽranoax kãiatõ ãfe ane kedayamakã ãfe nõmero ato kenemana. Keyokõ ato kenemana. Fakefo kenemata, xinifori kenemata, afama mĩshtifoyari kenemata, afaamaisfõri kenemata, inafomari kenemata, inafõri kenemana. Tsoa pishta finõmanama. Keyokõ nã yoinã põfe keskarato ãfe ane atoki kenemana. 17 Tsõa nã ane kedayamaxõ afaa fitiroma. Askatari afaa inãmitsatiroma a piaifõri tsõa fitiroma, a rapati yopaiifõri tsõa fitirofoma.

18 Nãskakẽ Niosxõ shinãsharatirofo nã yoinã põfe keskara ãfe nõmero tãpitirofo. ãfe nõmero tãpixõ ãfe aneri tãpitirofo. Nã yoinã põfe keskarafiax feronãfakẽkõ, ãfe nõmero seiscientos sesenta y seis.

14

Jesús chanĩmara faafo ciento cuarenta y cuatro mil akiki fanãikani

1 Askata ãfe namapa ã õia keskara afianã ã mato yoinõ. Nã Jesús ovejanã fake keskara mãchifã ãfe ane Sion ano nia ã õia. Askatari ciento cuarenta y cuatro mil afe yorafo afe niafo ika. ãfe ane Jesús yafi Epa Nios ãto ane femãnãki kenea ã õia. 2 Nãskatari nai mẽranoa meka efapakõ ã nika. Faka põoitifã keskara ã nika, nai tiri ikai keskarari pachakõ ã nika. Meka efapari ã nika yora ichapa fanãikanaifono ãto manetiya ichapa rasi fanãikanaifãfe ã nika. Nã manetinĩ ãfe ane arpa. 3 Fana fena tsõa nikayomisma Epa Nios ferotaiifi fanãixõãfo. Nãnoxõri nã cuatros Niospa onifanifãfe nikakani. Askatari nã veinticuatrofãfe nikakani. Nã ciento cuarenta y cuatro mil nono mai anoa Jesús ato ifini, nãfãfe na fana fena tãpitirofo. Tsoa fẽtsakã tãpitirofoma. 4 Nã ciento cuarenta y cuatro mil yorafãfe nõko Ifo Jesús Ifokõ famisfo. Afara chaka shinãtamaroko Jesúsnoa shinãfãfãikani. Aato ato ifimis ato nãnoxixãkã Epa Nios yafi ãfe Fake Jesús Ifokõ fakanax ãfe yora inõfo. Ato iyopaiyai ari afe fomisfo. Ato katoa afe yoraxõ ato yoiã keskara anõfo. 5 “Nãfãfe chanĩki yoimisa,” ixõkã tsõa atoõnoa yoiitirofoma. Jesúsnoax isharamisfo. Aõxõ afaa chakafamisfoma.

Niospa ãfe ãjiri trespa yoiãfo

6 Askata ã õia Niospa ãjiri fẽtsa nai mẽra ika fãsi keyakõ yoyakã keyokõ yorafo maifo tii anoãfo ato meka shara yoia. Yorafo keyokõ yoita, xoko fetsafo tii yoita, nã meka fetsa fetsatapãfãfe meka yoimisfõri yoita, nã mani fetsafo tii ato meka shara yoia. Epa Nios nipanakaõnoa ato yoia. 7 Mekakã fãsikõ ato yoia iskafakã: “Nios shinãkãfe. Nikakõikãfe. A noikõikãfe. ‘Mĩ sharakõ, mĩ afama mĩshti mĩ atirora,’ fakãfe. Iskaratã Niospa nã keyokõ chakafamisfo ato omiskõimani. Nãato nai onifani, mairi onifani, fakafãri onifani, faka sharari onifani. Nãskakẽ a noikãfe: ‘Mĩ nõko Ifo Nios sharakõ,’ fakãfe,” ato faa.

8 Askata Niospa ãjiri fẽtsa mã mekã keyoano fetsari nokotoshixõ iskafakã yoia: “Babilonia ano pexe rasi iyopaoni. Iskaratã anã ano tsoa ikama. Nãnoxõ yorafãfe afara chaka shinãpaonifo. Fetsafori afara chaka ato famapaonifo ato keskara inõfo. Askaifãfe Epa Niospa ato omiskõimani anã ano inõfoma. Nãskakẽ Babilonia anã anoma,” ixõ Niospa ãjirinĩ nai mẽra ikato yoia.

9-11 Askata afianã Niospa ãjiri fetsari nai mẽranoax nokotoshixõ meka fãsikõ yoia iskafakã: “Fẽtsa nã yoinã põfe keskara yafi ãfe nimõfo keskara nikakõikã yoimis iskafakã: ‘Nã ãfe nioskõ,’ ixõ anõri yoikã ãto mẽkeki kenenifo, askayamakã ãto femãnãki na yoinã põfe keskarato ãfe ane keneafãfe Epa Nios atoki õitifishkikõixii. Nãfo Niospa ato fãsi kerexkã omiskõimaxii. Chii mẽra ato potafianokã keyonakafoma. Jesús ãfe ãjirifo sharakõifo feta õiaino a omiskõipakenakã mẽra Niospa ato potaxii chakamã famisfono, Nios nikakaspakakã. Pae meekakã xatenakafoma. Tsõa ato ifitirofoma, nã yoinã põfe keskarato ãfe ane ãto mẽkeki keneafono, askayamakã ato femãnãki keneafõ. Nãskakẽ pena tii ita, fakishchãi ita, omiskõixikani tenepakenakafoma,” ixõ Epa Niospa ãfe ãjirinĩ yoia.

12 Nãskakẽ efe yora mĩshtichi, mãto õiti inimamasharakãfe. Omiskõifikã tenekãfe. Niospa nõko yoini keskara akãfe. Nõko Ifo Jesús kachikiri fayamakãfe.

13 Askata ã meka nika nai mẽraxõ ea yoiãito: “Ë mia yoiã keskara kenefe. Fatorafõ nõko Ifo Jesúsnoax nai, inimakõixikani,” ixõ ea yoia. “Chanĩmakõ. Mã nakanax anã omiskõitirofoma. Epa Niospa ato ama keskara akõikanax, nãskakẽ inimakõixikani. Nãfãfe fetsafo shara faxomisfono Nios atoki inimasharaxii. Akka Epaki nõkoafono ato inãsharaxii,” ixõ Niospa Yõshi Sharapa yoia.

Nã chakafamisfoki Nios õitifishkikõikã maifo tii anoãfo ato ichanãfãi ato omiskõimaxii

¹⁴ Akka ěfe namapa ōia keskara afianā ě mato yoinō. Ě afara fetsa ōia nai kōi oxokōi kamaki feronāfakē tsaokē ě ōia. Ě ōikī iskafaa: Xanīfāfe maiti orokōi maiya, askatari kenō extea ikikōi tsuma ika. ¹⁵ Akka āfe ājiri fetsa Nios kīfiti pexefā anoax kaxō fāsikōi yoia iskafakī: “Nā maifo tii ano mā fanafo ōshia. Nāskakē iskaratīa mā fanafo chetekani. Akka mī kenō exteato taxtexō ichafafe,” faa. Nānori yoifīkī fanakōifoŋoŋoŋo yoia. Niospa yorafoŋoŋoŋo yoia iskafakī: “Iskaratīa keyokōi Jesūs chanīmara faafo tii ifife Epa Nios fe ika anoax ichanākanax afe īpaxanōfo,” ixō yoia.

¹⁶ Askata nā nai kōi kamaki tsaoto āfe kenopa fanafo taxtea keskakakī āfe sharaŋōxō a chanīmara faafo tii ifia afe īpaxanōfo.

¹⁷ Askata ě ōia nai mēranoa ājiri fetsari Nios kīfiti pexefā anoax kaito, aatori kenō extea ikiai tsomax. ¹⁸ Afianā ājiri fetsari Nios kīfiti mīsa anoax kaa. Nāto Niospa maifo tii anoax koatiro. Nāatori kenō extea ikiai tsomax fāsikōi mekayanā yoia: “Nā uva fimi mā pachiki. Mextexō ichafafe,” ixō yoia. Nāskarīfakī Epa Niospa āfe ājiriŋōxō a nikakaspamisfo ichanāfaxii. ¹⁹ Nāskata nā Niospa ājiri nī āfe kenō extea ikiai tsomaxō uva xatexō āfe tsinīti mēra nanea āfe ene fonō. Nāskarīfakī Niospa ājiri fāfe nā Niospa meka nikakaspamisfo ato ichanāfai. Akka Nios atoki ōitīfīshkikōixō ato omiskōimani. ²⁰ Nios ika anoaxō ato omiskōimanama. Iskafakī ěfe namapa ě ōiai keskara ea ōimana. Fetsafāfe ato retexikani āto imi ichapa foxii. Askara tsōa ōiyomisma. Āto imifo kamayoyo tesanākōixii. Āto imi chaikōi trescientos kilometros foxii. Ato imi noakōi un metro ixii, nakirafekōi. Nāskarīfakī nā Epa Nios nikakaspamisfo omiskōixikani ato omiskōimanaitīa.

15

Epa Nios āfe ājiri siete aftanā ato yoia mai anoafō ato omiskōimanō

¹ Askata anā ěfe namapa ě ōia keskara ě mato yoinō. Afara fetsa tsōa ōiyomisma nai mēranoa ě ōia. Ě ratekōia. Akka Nios nā yora nikayospafoki ōitīfīshkiki. Nāskakē āfe ājiri siete ato yoia keyokōi mai anoafō ato omiskōimanōfo. Mā askafafono Epa Niospari ato omiskōimani. Akka anā tsoaki ōitīfīshkixō, Niospa ato omiskōimatiroma.

² Askata ě ōia fakafā feroikima raka chiya osia keskara. Nāno yorafā rasi niafo ika. Nā yorafāfekai yoinā pōfe keskara ifofaafoma; āfe nimofori ifofaafoma; āfe numerori āto yoraki keneafoma. Nāfāfe ato finōkōiafo. Nā fakafā feroikima raka chiya osia keskara a kesemē maniafo. Epa Nios ato tii maneti ināpakea. Nā maneti āfe ane arpa. ³ Taeyoi Nios yonoxomiskōi Moisés ipaoni. Nā Moisés āfe rāfīfo finōkōiax fanāini keskara nāskarīfai āto arpa tsomakaxō Jesūs shinākakī fanāikani a Moisés fanāini keskara iskafakakī:

Ifo, mīfi Nioski. Mī afama mīshiti atiro. Mī amis keskara sharakōi. Tsoa fētsakai atiroma. Mī mai fetsa anoafori keyokōiŋoŋoŋo mī āto xanīfokōi ipanaka. Mī shināmis keskara mēstekōi ikōina. ⁴ Ifo, keyokōi mīkiki mesekakī mia nikasharapainōfo. Mī afama mīshiti tsōa ōiyomisma mī atiro. Keyokōi maitio anoafāfe anori yoipakexanōfo. Mī fistichikai afaa chakafamisma. Mī shara fisti famis. Afetiara mī ato apaiyaitīa mī ato omiskōimaxii a chakafamisfo. Chanīmakōi mī ato askafaxii. Keyokōichi mā fēkaxō mia shinākani inimayanā fanāikani, ixō yoiaifāfe ě nika.

⁵ Askata afianā ě ōia nai mēranoa Nios ika anoax. Ea fēpexona Nios ika ano ě ōinō. ⁶ Nios ika mēranoax āfe ājiri siete ichanāfo. Rapati oxokōi chainipa choshtama fafeai safeafo, oro ōshi keskarato xonexemeafo. Nāfāfe mai anoafō ato omiskōimakani omiskōinōfo. ⁷ Nāskakē nā cuatro Niospa onifaa fētsa Niospa āfe ājiri sietefo ato oro kecho ināakea. Nios nā nipanakato nā ifofaafoma mai anoafoki ōitīfīshkikōikī nā kechofo mēra afara chakafo fospi faa nāskaxō chipo atoki ājiri fāfe nachiakaifono omiskōinōfo. ⁸ Nios ika mēra kōinīfā nashfiāi keskara. Niospa āfe kerex shara a mēra fospi. Nāskatari a mēraxō chaxasharai. Akka mai anoax nā Nios nikakaspamisfo Niospa ājiri fāfe ato omiskōimakani omiskōinōfo. Nāskakē a ato omiskōimanai xateamano tsoa Nios ika ano ikitirofoma.

16

Nikayospafō Niospa ato omiskōimani omiskōinōfo

¹ Askata Nios ika ariax fāsi mekaito ě nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitīfīshkiki nā kechofo mēra afara chakafo fospi faa atoki nachitakāfe,” ixō ato yoia.

² Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamākī āto femānāki keneafō, āfe nimofō keskarari ifofaafō nāfo kooyoi fetsekaxō paekōi meexikani.

³ Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

⁴ Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai mēranoax faka tsekeafokiri nachia. Nachiaino fakafo fe mai mēranoax faka tsekeafō fe imi keskara osiafo. ⁵⁻⁶ Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisfori nā Jesús Ifofaafāfema ato reteafō. Nāskakē nā mia Ifofaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

⁷ Askatari Nios nai mēra ika anoā nā kīfīti ano fistixō Epa Nios kīfimisfo anoā ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

⁸ Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chui keskara ikano yorafo koofafo. ⁹ Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafiano āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

¹⁰ Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara ifofafo ika ano fakishkōi ika. Nāskakē keyokōichi paekōi meafō, aripe iyanā. ¹¹ Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

¹² Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oalkirinoax fekanī, mā Eufrates netsokōiano, āto sorarofō feta pofekeranani.

¹³ Askatari ē niafaka chakakōifo tres fexko keskara ē ōia. Fetsa ronōfā keskara nā Satanās āfe āxfa mēranoax kāikaina, fetsari nā yoinā pōfe keskarato āfe āxfa mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āxfa mēranoax kāikaina. ¹⁴ Nā tres niafaka chakafāfe tsōa afaa ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

¹⁵ Askatari nōko Ifo Jesús ato yoiaito ē nika iskafakī ato yoia: “Ea nikakāfe. Yometso tsōa yoiyamano koshikōi pexe mēra ikirisatiro afara onexikī. Nāskarīfakī ē tsoa tāpimanima nā ē matoki nokoaitīa. Ē matoki samamashta nokorisai. Mā itipinīsharakaxō ea manasharakanax inimasharaxikani. Akka tsoa itipinīsharayamano ē matoki nokoaitīa keyokōi yorafāfe ea ōikani afāfekai ea Ifofasharama. Nāskakē rāfikōitirofo,” ixō yoia.

¹⁶ Nānori nōko Ifo Jesús yoifiano nā tres niafaka chakafāfe keyokōi xanīfofo maifo tii anoafō ichanāfaa Niospa yorafo retepaikī. Ato ichanāfai nā mai āfe ane israelifāfe mekapā Armagedón famisfo anoxō.

¹⁷ Askata Niospa ājiri fētsa anā nai mēraxō āfe kecho mēranoa nachia. Mā nachiano Epa Nios meka fāsikōi iskai: “Mē keyokōi aka,” ixō yoiaito ē nika.

¹⁸ Askatari fāsikōi kana piishikai ita, afarafo pachakōifo ita, nai tiri iki ikai ita, mai naya naya ita, askarafokai tsōa ōiyomisma. Nā feronāfaka onifakī taefanitīa tsōa mai naya naya iki finakōiaito askara tsōa ōiyomisma. ¹⁹ Akka nā Babilonia anoax mai naya naya ikaino mai tres kaxketani. Maifo tii anoari āto pexe rasi nā mai naya naya ikaino maokomea. Nā Babilonia anoafō anā Niospa shināni afara chakafamisfono. Nāskakē atoki ōitifishkikōikī ato omiskōimani omiskōinōfo. ²⁰ Nāskatari nā mai toomāfā anoafō yamarisatana. Keyokōi māchifāfori yamarisatana. ²¹ Nāskatari oi nami matsi tokorofō efapakōi āfe efe cincuenta kilo nai mēranoax yorafoki pakea. Askafiaito ōikakī āto chaka xateafoma. “Nios chakakōi. Na oi nami efapakōi nokoki potai,” ixō yoiaifāfe ē nika.

17

Mai fetsa anoafō kēro feroma keskarafō

¹ Askata anā ēfe namapa ē ōia. Afara afeskara ixiai keskara anā ea ōimana. Nā Niospa ājiri sietepa kecho tsofō ikafo akka fistichi ea yoia: “Niri ofe. Na pexe ichapa rasi fakafāfo chaimashta anoafō chakakōifo. Kēro feromakōi keskarafō Nios nikakaspakani. ² Akka keyokōi xanīfofo maifo tii anoafō ato fe chaka imisfo. Nāskakē atoŋoax afori chakakōifo

ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ē mia ōimanō,” ixō ea yoia.

³ Ea askafaino ē anā namakē ōia keskara ē ōia. Epa Niospa Yōshi Sharaōxō ājirinī ea iyoo tsōa istoma ano ea iyoo. Nānoa kēro ē ōia yoinā pōfe ōshikōi kamaki tsaokē. Nā yoinā pōfekōi āfe yora tiixō ane ichapato kenea ika. Keyokōi nā anefo kenekī Nios mekafakī chakafaa. Nā yoinā pōfe āfe mapo sieteya. Āfe māxo diezya. ⁴ Nā kēromā sama chainipa yafi nana ōshi safea ika. Oro fakka fakka ikai keskara safea. Askatari maxex keskara fakka ikai sharashta yafi fetsa āfe ane perla oxoshara, nāri safea ika. Nā kēromā kecho oro tsoma a mēra afara chakakōi naneato, a mēra nanea keskara yorafo afara chakakōi fetsa fetsatapafo chakafama. Āto mēra nanexō ato afara chaka shināmana. Ato pāemata, chanīmis ato imata, āto āfima chotamisfo ato imata, āto fenema chotamamisfo ato imata, nāskara chakakōifos ato imamis. ⁵ Āfe femānāki kenea keskara tsōa tāpimisma. Iskara kenea: “Babilonia anoafō tsoa keskarafo. Nā kēro feromakōichi Nios nikakaspaī keskarafo. Nāskakē fetsa fetsatapafo chakafakī finakōimisfo,” ixō kenea. ⁶ Nā kēro feroma keskarato Jesūs chanīmara faifo ichapakōi ato retea inimayanā. Nāskaito ōikī tāpia. “Choo, na kēromāsi ato retemiski,” ixō ē shinā. ⁷ Ē askaito Niospa ājirinī ea iskafaa: “Āfeskaī mī ratemetsaimē? Ē mia yoinō, ea nikapo. Na kēro yafi nā yoinā keskaraōnoa ē mia yoinō. Na yoinā pōfe keskara siete mapoya askatari diez māxoya tsōakai askara tāpiyomisma. Akka iskaratīa ē mia tāpimani. ⁸ Nā yoinā pōfe mī ōiai yoinākōima. Nāfi xanīfo efapa chakakōi. Nāato Nios nikakaspaī. Taeyoi niyopaoni. Anā iskaratīa niama. Askafiax chipo nā niafaka chakafo kinīfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax fakī kanakama. Akka nā taefakī mai onifakī taefanitiā yorafāfe āto anefo Niospa āfe kirika kenei, nāfo afe ipanakafo. Akka a āfe kirikaki āto anefo keneama, afo Nios fe ipanakafo. Nāfāfe yoixikani iskafakakī: ‘Ķee, ōikapo! Mā nāfianixakī afianā mā otoa,’ ixō yoixikani.

⁹ “Akka fetsa Niosxō mēstekōi shinākī nāato nā ē rama kenea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika. ¹⁰ Cinco xanīfofo anā anoma. Mā nanifo. Fisti iskaratīa nia. Fetsari chipo ixii xanīfoi. A chipokōi xanīfoixiai xanīfoi chaima. ¹¹ Nā yoinā pōfe keskara ōshi ē mia yoia, ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyoapaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafo.

¹² “Askatari nā māxo diez mī ōiai māxokōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafikanax xanīfoi chai samaraka kanima. ¹³ Nāskakē nā diez xanīfofofāfe shināmisfo: ‘Na nāto pōfe keskara nōko xanīfo iki kiki,’ ixō shinākani. Nāskakē, ‘Mī noko yoiai keskara nō atiro,’ ixō nā diez xanīfofofāfe nā feronāfake yoinā pōfe keskara yoikani. ¹⁴ Nāskaxō nā feronāfake yoinā pōfe keskarato nōko Ifo Jesūs afe yorafoya noikaspaī, xanīfofo fetsafāferi ato noikaspaixikani. Nā yoinā pōfe keskarato nā diez xanīfofo feta Jesūs yafi afe yorafo reterpaikani. Retemapaifiaifono Jesūs ato kanāxii. Niospa ato katoo afe yorafo kena a Ifofamisfo. Nāfāfe afara afeskarafiaito nōko Ifo kachikiri famisfoma. Nōko Ifo Jesūs xanīfo fetsafori ato ikitiro. Nōko Ifo finakōixō keyokōi ato ikitiro. Akka tsōakai nōko Ifo Jesūs finōtirioma,” ixō nā Niospa ājirinī ea yoia.

¹⁵ Askano afianā ea yoia iskafakī: “Na mī ōiai nā kēro feromakōi keskara, fakafā femākīa tsaoa nā fakafākai fakafākōima, askatari yorafo mai fetsa anoafō, meka fetsayafo. ¹⁶ Nā diez xanīfofo feta nā xanīfo yoinā pōfe keskarato nā kēro feroma keskarakaxō noikaspakōixikani. Keyokōichi āfe afara fiāxikani anā aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma. ¹⁷ ‘Mī noko yoiai keskara nō atiro,’ ixō nā diez xanīfofofāfe xanīfo yoinā pōfe keskara yoikani. Akka Niospa anori ato shināmana a apaiyai keskara fanōfo. Askata taeyoi Niospa yoiyoni nā inōpokoai keskara nāskarakōi ixii. ¹⁸ Na kēro feromakōi keskara nā ōiai kērokōima, akka nā pexefā rasi Babilonia keskara. Babilonia anoafō yorafo chakakōifo. Nāfāfe manifo tii anoafō ato ikināno ato chakafakani ato keskara ikaxō,” ixō Niospa ājirinī ea yoia.

18

Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia

¹ Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshiti atiro. Nāato chaxaito maifo tii anoxō ōikani. ² Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niáfaka yōshi chakakōifo ano ika, askatari peya yōshi chakakōifori ano ika. ³ Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofōri ato askafamafo. Askatari afara sharafos fichipaimisfo. Nāskakē a afama mīstifō ato minimisfo, afara ichapayakōifo,

ixō yoiatio ē nika. Niospa inapa askara ato yoiā a Niospa keyoxiai a Babilonia anoafō.

⁴⁻⁸ Yoikī askafatanaino nai mēranoax mekaito ē meka fetsa nika iskaī mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfōno afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro ifomafa keskarama. Nō omiskōitiroma. Askatamaroko nō isharapakenaka,” ixō kakapaimisfāfe yoisfō. Akka Epa Niospa ato fāsi omiskōimani omiskōikakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifōri ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroma keskara Epa Niospa afama mīsthi atiro. Nāskakē Epa Niospa mato yoi iskafakī: “Efe yora mīstichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki,

ājirinī faito ē nika.

⁹ Askano Babilonia kooaino mai fetsa anoafāfe āto xanīfofōfāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia anoā keskarafori afāfe afama mīsthi ichapa fimisfo. ¹⁰ Babilonia kooaino nā xanīfofo ratekōixikani chai inoaxri fetsafo mesexikani.

¡Ooa! Babilonia anoafō fato yora fetsafo keskarafo. Mā tāpikōisharafikē samamashta Epa Niospa mato omiskōimani mā kooi fetsenō. ¡Keexto! Koshikōi Babilonia mā kooi keyoa. Nōri iskayamapainō, ixō shinākani xanīfofōfāfe ratekōiyanā.

¹¹ Nāskatari maifo tii anoafō āto afama mīstifō minimisfo oiaxikani shināmitsakani. “¡Ooa! Mā Babilonia kooi keyoa. Iskaratīa anā nōko afama mīstifō noko tsōa fiatiroma. ¹² Nōko oro ōshishara fiayamata, a kerexkōi fakkai fakkaisai fiayamata, nōko tokirinī fakeshta fakkai fakkaisai fiayamata, nōko tokiri fetsa āfe ane perla fiayamata, nōko sama sharafinakōia fiayamata, nōko sama nana shara fiayamata, sama fetsa fetsatapafo fiayamata, nōko ifi nakas sharakōi fetsa fetsatapafo fiayamata, tokiri keskara kerexkōi oxosharakōi āfe ane mārfil nāato afarafo onifaa fiayamata, afe keskara ifi sharakōifo fiayamata, firo shara āfe ane bronze fiayamata, keno fetsa āfe ane firo fiayamata, tokiri āfe ane mārmofo fiayamata, nāfo kopikōifo noko anā fiakanima. ¹³ Akka nō pīchamis afama mīstifōya osixō, nā ita sharafoya fetsa fetsatapafoya osixō, afo noko tsōa fiatiroma. Askatari a nakas shara āfe ane incienso, fetsari mīrra, fetsari pirofomā, fetsari vinō, fetsari xini, fetsari arinā, fetsari trigo, askatari nōko yoinā inafōri ovejari, kamayori, nōko karori, yonomatifōri, nāfo noko anā tsōa fiatiroma. ¹⁴ ¡Ooa! Babilonia anoafāfe nā afara fetsa fetsatapafo fichipaikakī anā fitirofoma. Keyokōi afara sharafo fichipaikakī mā fimis anā anoma mā fenokōia anā mā fipanā. Mā afaa yopakima mā fimis. Mākai anā fitiroma. Keyokōi nā mātonā mā keyoa,” ixō nā ināmitsamisfāfe yoixikani.

¹⁵ Nā mai fetsa anoā fēkaxō afama mīsthi minikaxō kori ichapa fimisfāfe mā noko kaxō chaima nīxō ato ōikani, ratekōiyanā, oiakani, askatari shināmitsakōikani. ¹⁶ Yoikī iskafaxikani: “¡Ooa! Fato fetsakai Babilonia anoafō keskarama. Ato fe yorafāfe rapati sharakōifo safeafo. Rapati ōshi sharafo, askatari oro teoti safeafo, tokiri fakkai fakkaisai keskara menexemeafo, perlari askari faafo. ¹⁷⁻¹⁹ Koshikōi na afama mīstisharafo mā keyokōia,” ixō yoixikani.

Nāskarifiāi nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīsthi minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato pexe fetsakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfāfo yonomisfāfe yoixikani.

²⁰ Askaifono keyokōi Epa Nios ika anoafō inimakāfe. Babilonia anoafāfe a Jesús chanīmara faafo ato omiskōimamisfo, Epa Niospa ato kopikī omiskōimaxii. Nāskakē keyokōi

a Jesús chanīmara faafo fe, Jesúsxō āfe meka yoipaonifo fe, a Niospa meka inōpokoai yoimisfori inimakāfe.

²¹ Akka Epa Niospa āfe ājiri fetsa mitsisipakōichi tokiri efapakōi fininīfōfāta fakafā mēra potaxō yoia iskafakī: “Na tokiri kerekxai ē potai keskakakī, nāskakakīri Epa Niospa na pexe rasi anoafō Babilonia kerekxai omiskōimana kooi keyonō. Mā keyokōikanax anā ano tsoa ikima. ²² Nāskakē anā Babilonia anoax manetifo, xāitifo, maneti fetsafori, afo anā tooxikama. Askatari anā tsoa fanāikama. Tsōakai anā ato nikatirofoma. Askatari a yonomisfo anā ano ikafoma. Askatari a aō xiki reneaifo nō anā nikatiroma. ²³ Anā luzri ōtapakenakama. Feronāfāke kēro fiaino inimaifāfe mā nikamis keskara anā tsoa askara mā nikapakenakama. Babilonia anoax a ināmitsamisfāfe tāpikōikani. Nāfāfe ichapakōi fimisfo. Askatari koshōiti tāpixō yora fetsafo pāramisfo. Askafikanax mā keyoafō.

²⁴ “Babilonia anoafāfe a Niospa meka yoimisfo, fetsafori a Jesús chanīmara faafo, fetsafori mai fetsa anoafō ato retemisfo Jesús ōikaspakakī. Niospa meka mato yoipaifiaifono mā ato nikakaspamiskē, Niospa mato omiskōimana,” ixō Niospa ājirinī yoia.

19

Nios ika anoax fanāiki iskakani: “¡Aicho! Nōko Ifo Nios sharakōi,” ikaxō Niosnoa afara sharafo fanāikani

¹⁻² Askata nai mēra ikafo ichapakōi āto meka ē nika, fāsikōi iskaifāfe:

A fetsafāfe chakafamisfo Epa Niospa ato omiskōimani. Chanīmakōi, ato omiskōimani. ¡Aicho! Nōko Ifo Nios fāsi sharakōi. Nāato nōko chaka noko soaxona nō afe nīpaxanō. Aōnoa fisti nō yoitiro iskafakī: “Mī nōko Ifokōi. Fato fetsakai mia keskarama afara shara famis. Mī sharaōxō mī afama mīshti fatiro,” ixō keyokōichi yoipakenakafo. Epa Niospa Babilonia anoafō atoōnoa iskafakī yoia: “Nā Babilonia anoafō nā kēro feromakōi keskarafo. Nā chakafamisfoōxō maifo tii ano ikafori ato chakafama. Nāskakē Babilonia anoafāfe ea fāsi chakakōi famisfo. Efe yorafori ato omiskōimakani nanōfo. Nāskakē ē ato kopia omiskōimakī,” ixō Epa Niospa yoi,

ixō yoiaifāfe ē nika. ³ Afianā meka fetsari ē nika nai mēranoafāfe yoiaifāfe iskafakakī:

¡Aicho! Nōko Ifo fāsi sharakōi. Afaa chakafamisma. A chakafamisfo chanīmakōi ato omiskōimani. Ato chiifā mēra potano afo kooi nishpapakenakafoma, ixō yoiaifāfe ē nika.

⁴ Askanori Epa Nios tsoa ano nā veinticuatro xanīfori nā Nios onifani cuatro a nāmā feopakekafakī iskafakī yoiafo: “Askapainō. ¡Aicho! ¡Nōko Ifo fāsi sharakōi!” ixō yoiaifāfe ē nika. ⁵ Askata Epa Nios tsoa ano a ē meka fetsa nika iskafakī yoiaito:

Epa Nios yonoxomisfāfe xanīfōfāfe askatari afamafofāfe mato Niospa yoia keskara mā apaikōimis. Māri Epa Nios yoikāfe iskafakī: “¡Aicho! ¡Epa Niosi, mī shara finakōia!” ixō yoiaito ē nika.

Feronāfāke āfiyakī fista atiro inimakī. Nāskarifikī Jesús nai mēraxō noko fista axoxii nokoki inimakī

⁶ Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nōko Ifo Nios tsōa atiroa keskara afama mīshti fatiro. Nā nōko Xanīfo finakōia. Maifo tii anoafō noko ikitiro. ¡Aicho! ¡Nōko Ifo Nios shara finakōia! ⁷⁻⁸ Akka feronāfāke kēro fiaino nā kēro inimakōi itipinīsharatiro āfe fene fe fianāxiki. Nāskarifiāi nōko Ifo Jesús fe iskaratīa afe yorafo afe ipanakafo. Akka afe yorafo mā itipinīsharafo afe ipaxakakī. Akka āfinī āfe fene inimamapai itipinīsharatiro. Sama fena sharakōi patsaxō safetiro afe fianāxiki. Nāskarifikī nā Jesús Ifofamisfāfe itipinīshara fatirofo. Epa Niospa ato shara fapaikī, ato chaka soaxoni Jesús fe ipaxanōfo. Nāskakē nō inimai. Tsoa fetsakai mia keskarama afara shara famis, ixō yoiafo. Niospa yorafāfe Jesúsxō fetsafo shara famis. Nāskakē Niospa ato rapati shara finakōi safemana Jesús fe ipasharanōfo.

⁹ Askatari ājirinī ea yoia: “Ē mia yoiai keskara kenefe iskafakī: ‘Ēfe Fake Jesús iskaratīa keyokōi afe yorafo ichanāfai afe ipaxanōfo. ‘Niri fekāfe,’ ato faino, nikakanax inimakōikani. Nāskakaxō ēfe Fake feta pikani afe ipaxakakī, ixō Epa Niospa yoia. Nāskakē Epa Nios āfe meka mā chanīmara fatiro,” ixō ea yoia.

¹⁰ Ea yoiaino ē a nāmā feopakekafana, “Mī fāsi sharakōi,” ixō yoixiki. Ē askafaino ea yoia iskafakī: “Ea askafayamafe. Ēri Nios yonoxomiski mī axomis keskakakī, a Nios Ifofaa fetsafāferi askafamisfokī. Jesús mato yoiai keskara mā kachikiri famisma. Nāskakē Nios fisti nāmā nō feopakekafā yoitiro: ‘Mī fāsi sharakōi. Mī ēfe Ifokōi; ixō anori fisti nō yoitiro. Nā Niospa meka yomisfāfe yomisfo keskarifikī ēri Jesúsnoa yomis Epa Niospa ea shināmanaino,” ixō ājirinī ea yoia.

Jesús mai ano afianā oxiai keskara yoi

¹¹ Akka ē anā ēfe namapa ōia keskara anā ē mato yoinō mā tāpinō. Epa Nios ika anoa nai mēranoa ē ōia. Fepoti fepekemea keskara ē a mēra ōia. Nāskara Epa Nios ika ari xafakīakōi ē ōia. Nāno kamayo oxokōi ē ōia. Nā kamayo kamaki Jesucristo nōko Ifo tsaao. Āfe ane ichapa. Āfe ane rafeōnoa ē mato yoinō. Fētsa, “Nā Yoia Keskara Akōimis.” Akka āfe ane fetsari, “Chanīmisma.” Nāato chanīmakoī yora chakafo omiskōimani. Niospa meka nikakaspamisfono a omiskōipakenakafo mēra ato potaxii. ¹² Āfe fero rafe chii xofisai keskara. Fakishi chii xofisaino yōra ōisharatiro. Nāskarifakī nōko Ifāfe yorafāfe āto ōiti mēraxō shināifo keskara tāpia. Xanīfāfe maiti sharakōifo ichapakōi maiafo ika. Āfe femānāki āfe ane kenea. Ares fisti nā ane tāpia. ¹³ Rapati chainipa safea. Nā rapati imiki momoa. Nāskara ōikī ea shināmāna Jesús noko nāxoni. Āfe ane fetsari, “Niospa Meka,” famisfo. ¹⁴ Afe yorafo nai ariax kamayofo oxokōi kamaki āto Ifo kachiori fokani. Āto rapatifo oxokōi chainipa safeafo. Nā rapati oxokōi rama pātsaxona keskarafo. ¹⁵ Āfe axfa mēranoa keno chainipa ikaikōi ē ōia. Akka āfe kenoma, āfe meka. Āfe mekapas maifo tii anoafo nikayospamisfo omiskōimani. Maifo tii ato ikinā, fetsafo nikayospamisfo ato kerekxai omiskōimakōi. Āfe meka nikakaspamisfono Nios ōitifishkikōini. Akka Jesúsxō ato omiskōimani, omiskōipakenakafo mēra ato potaxii. ¹⁶ Jesús āfe ane fetsa āfe rapati chainipaki kenea mānākiri keneta maikiri kenea iskafakī: “Xanīfo maifo tii anoa āto Xanīfo finakōia, askatari āto Ifo finakōia,” ixō kenea.

¹⁷⁻¹⁸ Askatari ē ōia ājiri fetsa xini ano nīxō fāsikōi yoia iskafakī: “Xanīfofo ikaino, sorarofō āto xanīfofo ikaino, āto xanīfofo fe rafea ikaino, feronāfakefo mītsisipafo ikaino, kamayofo ikaino, a kamayofo kamaki tsaoofo ikaino, keyokōi Niospa meka nikakaspamisfo ikaino, ato yonomatifoma ikaino, a āto yonomatifo ikaino, yora afamafori ikaino, a yora finakōiafo ikaino, keyokōi Niospa ato namaxii,” ixō yoia. Nāskakē ishpifo ato yoia: “Fekāfe āto nami pixikakī,” ixō nā ājirinī ishpifo kena.

¹⁹ Askatari afianā ē ōia a nōko Ifo Jesús noikaspai nā yoinā pōfe keskara yafi maifo tii anoa xanīfofo āfe sorarofoya ēfe namapa ōia keskara ē ōia. Mā ichanāfo Jesús āfe kamayo kamaki tsaokē afe yorafoya retepaikani. ²⁰ Akka ato retetamaroko Jesús ato achia chiifā mēra ato potaxiki. Nā ato pāramisto, “Ē Niospa meka mato yoisim,” ifiax āa chanīmis. Nāato na yoinā pōfe keskaraōxō tsōa atiroma keskara famis Satanās yōshixō. Nāskaxō keyokōi yorafoki kenea nā marakkaōxō yoinā pōfe keskara tāpixikani. Nāfāfe yoimisfo iskafakakī: “Mī ēfe nios. Ē mia noi,” ixō anori yoinā pōfe keskara yoimisfo. Akka nā ato pāramisto yōra atiroma keskafakī afama mīshiti faito nāfāfe ōiafo. Nāskakē ato pārakōia. Nā yoinā pōfe keskara fe nā ato pāramis naafomano iriyafi Jesús ato chiifā mēra pota. ²¹ Nā rafeta āto inafō Jesús āfe kamayo kamaki tsaooxō āfe mekapa ato reteaino nai fetsefo. Mā naafono ishpifo atoki ichanāxō āto nami pikani māyakōiafo.

20

Jesús Satanās achixō nexaxii mil xinia

¹ Askata Niospa ājiri Nios ika ariax fotoaito ē ōia, chamis keskara tsoma. Nā niafaka chakafo kinifā fakishifā mēra ikafoki atoki fepoti fepoa keskara ē ōia. Nā Niospa āfe ājirinī fepotinī āfe chamis yafi kaninā efapa tsoma ika. ² Tsomaxō nā ronōfā keskara achia. Nā ronōfā keskara nā niafaka chakakōi Satanās. Nā achixō nexa. ³ Nāskaxō kinifā fakishifā mēra pota. Potata akiki fepokōia mil xinia a mēra inō anā yorafo pāranōma. Mā mil xinia finōano afianā kāimayoxii samarakatama chaimashta anā mai ano kafāsayonō.

⁴ Askata xanīfāfe tsaotifo Epa Nios ika anoa ē ōia. Jesús afe yorafo yoia nā tsaoti kamaki tsaofono, “Mā yoitiro fatofomākī omiskōipakenakafo mēra foaifoma, akka fatoforimākī a omiskōipakenakafo mēra foaifo.” Askano nānoari ē ōia nā Jesús chanīmara faafo yamī ato textenifo. Ato texteyoafomano yoiyopaonifo: “Jesús nōko Ifo,” fayopaonifo. Niospa meka ifofamisfono, nāskakē ato textenifo. Akka nāfāfekai nā yoinā pōfe keskara yafi āfe nimofō yoimisfoma iskafakakī: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafi āto femānā kenemisfoma. Nāskakē nā yoinā pōfe keskara atoki ōitifishkikī ato textemani. Mā nai fetsefiafono Jesús ato otoani. Mā otokaxō Jesús feta maifo tii anoafo mil xinia yorafo tii ato ikināfo. ⁵ Nāfo mā otoafono mā mil xinia keyoano fetsafori Epa Niospa ato otaoxii. ⁶ Shinākapo efe yora mīshitchi, mato yoiai keskara. Noko Epa Niospa ototakī taefaxii. Noko katoni afe yorafo nō inō. Epa Nios feta Cristo noko yoiai keskara nō fetsafo Epa Nios kifixomis. Nō omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō ikixii. Nāskakē Jesús keskara shara ikax nō fāsi inimaxii.

Satanás kinifā chaikōi mēranoa kāimayoi anā yorafo pāranō. Ato askafaino kosihōi anā kinifā mēra potaxii anā kāipakexanōma

⁷⁻⁸ Askata mā mil xinia finōano Satanás kinifā fakishifā mēranoa anā kāimayoxii anā maifo tii anoafō ato pārāyonō. Askata mā kāixō nā Nios nikakaspaifo maifo tii anoafō ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo. ⁹ Maifo tii anoafō ato ichanāfaxii Niospa yorafo ikafo anoafō ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanás ichanāfaa ono nai mēraxō atoki chiifā potano nai fetsekani anā tsoa pishta ninakama. ¹⁰ Akka nā Satanás niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafi nā ē mato Niosnoa mato yoisimra iki a chanīmis ato mērari Satanás niafaka chaka Epa Niospa pota. Nā tii chiifā mēranoax omiskōikani xatenakafoma.

Jesús chanīmara faafoma ato omiskōimaxii

¹¹ Askata xanifāfe tsaoti oxokōi efapakōi ē ōia. Nāno Epa Nios tsaofa. Akka mai fe nai anā ano ikama. ¹² Askata ē ōia nā xanīfofo fe nā yora afamafori nakanax Epa Nios tsaofa ano niafo. Nāno niafono Epa Niospa āfe kirikafo fēpea. Kirika fetsari fēpea. Nā kirikakī nā Ifofamisfo atoki kenea. Akka a Ifofamisfoma atoki keneama. Akka nā kirikanā āfe ane Nīpamisfo. Nā nayoxoma aponifo keskara kirikafo mēra keyokōi Epa Niospa mā kenenī. Nāskakē nā afara chakafapoonifo keskara atoki kenexō ato ispai tāpinōfo chanīmakōi ato omiskōimaxii. ¹³ Nā āsamisfo fe mai anoax namisfori askatari fetsafori nafiakanax otoyokanima keyokōi namisfo Epa Nios āfe ferotaiifi faefo. Nā chakafamisfo tii Epa Niospa ato omiskōimapakea. ¹⁴ Keyokōi nā Niospa meka nikakaspamisfo Epa Niospa ato chiifā mēra pota. Mā nafiānifono iskaratīa afianā ato chiifā mēra potaito ē ōia. Nānoax omiskōikani xatēpakēnakafoma. ¹⁵ Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiāi keskara mai keyoaino.

21

Nai yafi mai fenakōi Epa Niospa onifaxii

¹ Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana. ² Askano ē ōia Niospa yorafo nāfāfe Jesús Ifo shara famisfo nai mēranoafō Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharaxikī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi inō afe yorafo nāno afe nīpaxanōfo. ³ Askano Epa Nios tsaofa ano meka achakōi ē nika. Yoia iskafakī: “¡Aicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara. ⁴ Ato kexesharaxii anā tsoakai omiskōitiroma. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kexexaino tsoakai anā natiroma, anārikai manomitsai oiakanima, anārikai paemekanima. Afara chakafo iyopaoni keskarakai anā askanakama,” ixō yoia.

⁵ Askata Niospa āfe tsaoti kamaki tsoaxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

⁶ Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afetiāri maifo tii keyoai eres fisti ē yoitiro. Ē keyokōi ikinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarīfai fetsa ipaisharapaikōikī yoitiro iskafakī: ‘Ēa ē ishartiroma. Ē Nios yopakōi,’ ixō anori yoiaito ē inimakī ifitiro, efe ipaxanō. ⁷ Fētsa ea kachikiri fatamaroko nā naitia ea Ifofasharaxō nāto keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii. ⁸ Akka fetsa ratei eōnoax omiskōikaspakī ea kachikiri faa, askatari fētsa ēfe meka nikakaspamis, fētsari afara chakafo fetsa fetsatapafo xatekaspai, askatari fetsari retēmīsamis, fetsari āto āfima chotamis, askatari kēromāri āto fenema chotamamis, fētsari koshoiti tāpiāx nā niafaka chakafo fe rafemis, askatari fētsari ea noitamarofo afara fetsa noikī, ‘Na ēfe nioski,’ famis. Nāskakē askarafo fe nā chanīmisfo afokai efe nīpanakafoma. Chiifā mēra nā omiskōipakenakafoma mēra ipanakafo. Anoaxkai faki fonakafoma,” ixō Epa Niospa ea yoia.

Jerusalén Fena

⁹ Askata Niospa ājirinī siete kecho keskara mēra afara chakakōi fospia maifo tii ano nachixii ato omiskōimanō fētsa ekeki oxō yoikī iskafaa: “¡Ofē! Ē mia afara sharakōi ōimanō. Akka feronāfāke mā āfiyaxō kexesharatiroma. Nāskarīfakī Jesús chanīmara faafō afe yorafo ifia.

Ofe. Ē mia ðimanð,” ea faa. ¹⁰⁻¹¹ Askano Niospa Yðshi Sharapa ea ikinãino Niospa ajirinĩ ea machi efapa keyakõi ano ea iyoa keyokõi ě ðinð. Jesús chanĩmara faafo nã Nios ika anoaf ato chaka soaxona nãfo nai mēranao Epa Nios ika ariax fotoaifãfe ea ðimana. Na mächifã keyakõi anoxð ea ðimana. Nãfo ika ano ãfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais isharai. Tokiri fakkai fakkais ikai keskara sharafinakõi. Nã tokiri ãfe ane jaspe fēxta shara, tokiri fetsa ãfe ane cristal. Shara fakkai fakkais ikai keskara. ¹² Nã tokiri kenea efapa Jerusalén foake tii fayakena. Nã kene keyakõi doce fepotiya. Nã doce fepoti ano Niospa ajiri niafo kexesharaxikakĩ. Israel iyopaonito ãfe fake doce ipaoni. Nã docefãfe ãto fakefo paxkanifo. Nãskakē fepoti tii ãto anefo doce kenea. ¹³ Nã kene keya ãfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya. ¹⁴ Nã kene keyakõi tokiri doce efapanãfã kamaki kenea. Jesúsnoa yoimisfãfe ãto anefo nã tokiri doceki kenea.

¹⁵ Niospa ajirinĩ nã ea taefakĩ yoiato, nãato tanati oro tsoma, Jerusalén Fena tanaxii, ãfe kene yafi ãfe fepoti tanaxiki. Nã tanati tafa chainipa keskarafiax oro øshi keskara sharakõi. ¹⁶ Nã Jerusalén Fena ãfe kene keya senēsharakõi. ãfe chainipa fe ãfe xãkĩ nãtixð rafe. ãfe keyari nãtixori. Niospa inapa tana dos mil dos cientos kilometro ãfe chainipa fe, ãfe xãkĩ, ãfe keyari. ¹⁷ ãfe kenefo keyakõi a akiki kenea sesenta y cuatro metros. Nã Niospa ajiri yorafãfe tanamis keskari fakĩ nãatori metropa tana.

¹⁸ Nã Jerusalén Fena sharakõi. Nã manishomo fēxta nõ ðimis keskara sharafiax øshi keskara. Nãðxð Epa Niospa Jerusalén Fena onifaa. Askatari a kenea keyakõi nã tokirinĩ ãfe ane jaspe Niospa onifaa. ¹⁹ Tokiri sharakõifo fetsa fetsatapafo Epa Niospa onifaa, nã doce tokiri kamaki nã kene keya tsaoa. Taeyoi jaspeki iyoa. ãfe pefeta zafiroki ika. ãfe pefetari agataki ika, ãfe pefetari esmeraldaki ika, ²⁰ ãfe pefetari onĩceki ika, ãfe pefetari cornãlinãki ika, ãfe pefetari crisolitoki ika, ãfe pefetari beriloki ika, ãfe pefetari topacioki ika, ãfe pefetari crisoprasaki ika, ãfe pefetari jacintoki ika, ãfe pefetari amãtistaki ika; nãfo sharakõifoki nã kene Epa Niospa nimainĩfofãni. ²¹ Nã kene keyapa ãfe fepotifo perla oxo efapa Niospa onifaa. Nã perla tokiri keskara oxo sharakõi. Nã perla fistiðxð fepoti fisti onifaa. Nãskakē doce fepoti onifaa nã perlaoxð. Nã Jerusalén Fena ãfe fai manishomo fēxta sharakõi keskara oke rafe nõ ðitiro. Manishomo fēxta keskara sharafiax oro øshi keskara shara.

²² Akka Epa Nios kifiti pexefã anoma. Epa Niospa nã afama mĩshti fatiroxakĩ nõko Ifo Jesús noko fe Jerusalén Fena mēra imisfo. Askatari yorafãfe Epa Nios kifiti pexefã nã anã yopanakafoma. ²³ Nãskarifikã anã xini yafi oxo yopakanima Epa Nios fe Jesús ato fe ikano. Epa Nios nãno ato fe ixð ato chaxaxonĩ. Jesúsri ato askafaxði øsharakõinõfo. Anã afaa yopakanima. ²⁴ Mai fetsa anoaxri fofãsatirofo Epa Niospa ato chãxano. Xanĩfofori Jerusalén Fena mēra ikikaxð a aya imisfo afara sharafo inãxikani. ²⁵ Nãno fakishri anã ikima. Fakishpakenakama. Akka anã Jerusalén Fena ãfe fepotifo fepopakenakama. ²⁶ Akka fetsafori maifo tii anoax Jerusalén Fena mēra ikikakĩ a aya imisfo ato afara sharafo inãxikani. ²⁷ Akka afara chaka nã Jerusalén Fena mēra ikitiroma. Nã chaka shinãmisfo fe a afara chakafamisfo, a ato pãramisfori afo ikitirofoma. Akka Jesús ãfe kirika mēra ãto ane keneano afe ipaxatirofo. Nãfo fisti Jerusalén Fena mēra ikitirofo Jesús fe ipasharaxikakĩ.

22

¹⁻² Askano ěfe namapa ðiai keskara Niospa ajiri fētsa ea ðimana afe keskaramãki Nios ika ano. Nios fe Jesús tsaoa anoax faka shara fakkai fakkaisai keskara kafani, fai nēxpakĩa. Afara choshta a mēra ikitiroma. Nãno ikafãfe nã faka shara ayapaiyaitĩa ayatirofo, nãskakē nomipakenakafoma. (Nãskarifikã nãno Niospa noko potapakenakama noko ikipakenaka.) Nãnori fai nēxpakĩa ifi nia ika. Faka takai raferi nii xokoa ika. Nãno ikafãfe nã nii fimi pipaiyaitĩa pitirofo. Nãskakē fonãipanakafoma. Nãskarifikã Nios nofe ikano nõ aõnoax omiskõitiroma nõ nisharapakenaka. Nã ifi oxo tii fimimis. ãfe pei tsasimisma xachoko fena shara ipanaka. Nãskarifikã nã chanĩmara faafo tii maifo tii anoax Niosnoax meema sharakõi ipanakafo. ³ Nã Jerusalén Fena ano Epa Nios fe Jesús nofe ixii. Nõ ato fe yorakõixð nõ ato noikõixii. Nõ ãto yonoxomiskõi nõ ixii. Atoki fanãsharayanã nõ ato yoisharapakenaka. Akka nõko mai xini ano afara chaka fetsa fetsatapafo imis. Akka iskaratã nã Jerusalén Fena ano afara chaka a mēra itiroma. ⁴ Nãnoax nõko Ifo fe ãfe femãnãki ðinðnãfãfãixikani. ãto femãnãki ãfe ane ato nētamana. ⁵ Nõko Ifo Nios ari ikafo ato penafaxða. Nãskakē anã rãpari yafi xini yopatirofoma. Anokai anã fakishima. Nãskax afe xanĩfo ipanakafo.

Jesús chaima oi

⁶ Askata Niospa ajirinĩ anã ea yoia: “Nõko Ifo Niospa ãfe Yðshi Sharaðxð a ãfe meka yoimisfo ãto ðiti mēraxð ato tãpimamis a afara afeskara ixiai keskara afe yorafori ato tãpimanõfo.

Nāskarifiakī iskaratīa āfe ājiri fetsa nīchia afara afeskara ixiai keskara a yonoxomisfo tii ato tāpimanō. Nā ē mia yoiāi keskara chanīmākōi. Keyokōi ēfe meka mā chanīmara fatiro,” ixō ea yoiā.

⁷ Akka yoikī iskafaa nōko Ifo Jesús yoiā iskafakī: “Ē nai mēranoax mai ano matoki nokorisai. Nā mī ōia a inōpokoai a mī nikafori, nāfo mī kenetiro. Akka nāfo chanīmara fakakī chachikiri fayamakanax inimākōixikani,” ixō Jesús ea yoiā.

⁸ Ēkīa Juan ē nika, askatari ē ōia ea Niospa ājirinī ōimanaino. Nāskakē ē a nāmā feopakekafana ēfe Ifo keskara shināi. Nāskaxō, “Mī fāsi sharakōi,” ē fakerana. ⁹ Ē askafaito ea yoiā iskafakī: “Ea askafayamafe. Ēri mia keskaraki. Mī ikaino, Jesús chanīmara faafo ikaino, āfe meka yoimisfo ikaino, keyokōi nā mī rama kenea keskara chanīmara faafo fe, ēri mato keskara nōko Ifo Nios ē yonoxomis. Akka Epa Nios fisti mī Ifofatiro. Nā fisti nāmā mī feopakekafatiro,” ea faa.

¹⁰ Askata afianā ea yoiā iskafakī: “Nā mī kenea oneyamafe. Nā mī kenea keskara samama askakōi. Nāskakē a mī kenea keskara keyokōi yorafāfe tāpinōfo. ¹¹ Akka mā Jesús nokoaino nā nikaskapamisfāfe chakafakī finākōixikani. Yora chakafamisfāferi nāskari faxikani chakakōi fakakī. Akka nā Niospa yoiāi keskara amisfāfe nāskarakōi fakakī mimākōi faxikani Niospa yoiāi keskara akakī. Nā Jesús keskara shara imisfo nāfori isharākōixikani āto Ifo ifosharakōifakani,” ixō Niospa ājirinī ea yoiā.

¹² Nāskaxō Jesús anā yoiā iskafakī: “Ea nikasharakāfe. Ē matoki samama nokorisai. Nokoxō ē mato yoioa keskara ē mato ināsharaxii. Nā afara shara famisfo ē ato shara fata nā afara chakafamisfo ē ato omiskōimaxii. ¹³ Afarafo onifataima ē iyopaoni. Ēfi nīpamiskī. Ē niixatepakenakama. Nā mātō mai keyoai eres fisti ē yoitiro,” ixō ea yoiā.

¹⁴ Anā Jesús yoiā iskafakī: “Nō Jerusalén Fena mēra ikixō, nā ifi āfe fimi pipaiyaitīa nō pitiro. Nāskarifiāi nō Epa Nios fe ikaino ares fisti noko nimapakexatiro. Nā Jesús chanīmara faafo ato chaka soaxona nāfo fisti Epa Niospa ato ikimatiro afe ipaxanōfo. ¹⁵ Nāskakē nā yora chakakōi paxta pōfe keskarāfo fe, a koshoiti tāpiafo, nā koshoiti chanīmara faifori, feronāfāke āfe āfima chotamis, kērofāferi āto fenema chotamamisfo, retemitsamisfori, Nioskōima noikī ifofamisfori, chanīmisfori, nā chanī noimisfori, askara yorafokai Jerusalén Fena mēra ikitirofoma.

¹⁶ “Ēkīa Jesús, ēfe ājiri matoki nīchia ē mia yoiā keskara nā ea Ifofaafo tii ichanāfo anoxō ato tāpimanō. Ēkīa David āfe fena. Ēfi nā fishi efapa penaino ōimisfo keskarakī. Nā fishi ōikī nō tāpitiro mā penaino. Nāskarifiāi mē chaima oaino tāpikanax itipinīsharatirofo Jerusalén Fena mēra efe ipaxakakī,” ixō Jesús ea yoiā.

¹⁷ Askano Niospa Yōshi Shara feta Jesús afe yorafāferi yoikakī iskafatirofo: “Jesūsiki fekāfe,” ato faifono, fetsafāferi nikaxō ato yoitirofo: “Jesūsiki fekāfe,” ato fatirofo. Fētsa nōamā ikī faka yopai, faka ano katiro mā yax anā nōamā itiroma. Nāskarifiāi fētsa āfe chaka xatepai, Jesūsiki otiro Epa Nios fe ipaxakī. Afaa inātama Jesús chanīmara faax, afe ipaxatiro.

Juan mā mekai xatekī Jesús yoiāi keskara kenei

¹⁸ Ēkīa Juan, afara ixiai keskara ē mato kenexona. Ē mato kenexonai keskara chanīmākōi. Nā meka ē mato yoiāi nikasharakāfe. Ē mato kenexona keskara akka fētsa afianā meka fetsa shinākī keneax, na kirika mēra kenea mā ōiai keskara omiskōipakenakafo chanīmākōi Epa Niospa keyokōi nāfo omiskōimaxii. ¹⁹ Askatari a afara afeskara ixiai keskara ē kenea fētsa na meka atiri soakē Epa Niospari āfe ane soaxii āfe kirika mēranoa. Nāskakanax nā Jerusalén Fena shara mēra ikitirofoma. Ē kenea keskara soakanax nā Epa Nios afara shara yoioyoni keskara, aya ipanakafoma.

²⁰ Jesús yoiā keskara nānori ē mato kenexona. Nāato yoikī iskafaa: “Chanīma, ē matoki samama nokorisai,” ixō yoiā. Askapainō. Nōko Ifo Jesús orisapainō.

²¹ Mā Niospa yorafo. Afara afeskara afiaino nōko Ifo Jesús mato noixō mātō ōiti mato fēpeaxosharapainō. Askapainōra. Ēri mato fāsi shināi. Nā tii.

Ēkīa Juan